

ରାକ୍ଷତତ୍ତ୍ୱ
(ପ୍ରଥମ ଖଣ୍ଡ)

রাষ্ট্রতত্ত্ব

[ত্রৈবার্ষিক স্নাতক সংস্করণ]

প্রথম খণ্ড (প্রথম পত্র—রাজনৈতিক মতবাদ)

(POLITICAL THEORY)

(কলিকাতা, বর্ধমান ও উত্তরবঙ্গ বিশ্ববিদ্যালয় কর্তৃক সংকলিত ত্রৈবার্ষিক স্নাতক পরীক্ষার রাষ্ট্রবিজ্ঞানের পাঠ্যসূচী অনুসারে লিখিত)

শ্রীশিবনাথ চক্রবর্তী, এম. এ.

অধ্যক্ষ, শ্রীমাদ্রস কলেজ, কলিকাতা

'An Introduction to Politics', 'রাষ্ট্রতত্ত্ব' (ত্রৈবার্ষিক স্নাতক সংস্করণ

১ম, ২য় ও ৩য় খণ্ড), 'অর্থতত্ত্ব', 'ধনবিজ্ঞান ও পৌরবিজ্ঞান',

'প্রাগ-বিশ্ববিদ্যালয় ধনবিজ্ঞান ও পৌরবিজ্ঞান',

'বাণিজ্যিক পৌরবিজ্ঞান ও ধনবিজ্ঞান'

প্রভৃতি গ্রন্থ-গ্রণ্থেতা

মডার্ন বুক এজেন্সী প্রাইভেট লিমিটেড

পুস্তক-বিক্রেতা ও প্রকাশক

১০, বঙ্কিম চ্যাটার্জী স্ট্রীট, কলিকাতা—১২

প্রকাশক—শ্রীদীনেশচন্দ্র বসু
মডার্ন বুক এজেন্সী প্রাইভেট লিমিটেডের পক্ষে
১০, বঙ্কিম চ্যাটার্জী স্ট্রিট, কলিকাতা-১২

সপ্তম সংস্করণ—শ্রাবণ, ১৩৬৭

মূল্য—৮ টাকা ৭৫ পয়সা মাত্র

মুদ্রাকর—শ্রীস্বকুমার মল্লিক, বি. কম.
এ. বি. প্রেস
১৬, হেমেন্দ্র সেন স্ট্রিট, কলিকাতা-৬

THREE-YEAR DEGREE COURSE

Syllabus in Political Science

Political Theory—Paper—I

Definition and scope of Political Science—Relation of Political Science to other Sciences—Methods of Political Science. Definition of State—Difference between State, Government and other Associations.

Leading Theories of the Origin and Nature of the State—Theory of Divine Origin—Theory of Force—Theory of Social Contract—views of Hobbes, Locke and Rousseau—Evolutionary theory of the Origin of the State—Organic Theory about the nature of the State—The Idealist Theory—Marxist concept of the State.

Nature and characteristics of Sovereignty—Legal and Political Sovereignty—De jure and De facto Sovereignty, Doctrine of Popular Sovereignty—Austinian Theory of Sovereignty—its critical estimate—Theory of limited Sovereignty—Attacks on the Monistic Theory of Sovereignty.

Definition and Nature of Law—Different kind of Law—Sources of Law—Distinction and relation between Law and morality—Relation between law and liberty—The concept of Liberty—Safeguards of liberty in modern State—Concept of Natural Law and Natural Right.

Meaning of Nationality—Nation and Nationalism—Essential elements of Nationality—Right of self-determination—Mononational State vs. Poly-national State—Dangers of Nationalism—Nationalism and Internationalism. •

Citizens and Aliens—Modes of acquiring citizenship—Rights and duties of citizens—Hindrances to good citizenship—Relation between Rights and Duties.

Unions of States and Forms of Governments—Personal and Real Union, Confederation and Federal Union—Nature and types of Federation—Chief features and conditions of Federation—Merits and defects of Federation—Alliance—Distinction between Unitary and Federal Governments.

Forms of Governments—Monarchy, Aristocracy, Oligarchy and Democracy—Types of Democracy—Strength and Weakness of Democracy—Comparison between—Democracy and Dictatorship—Conditions essential to the Success of Democracy—Parliamentary and Presidential Governments—their Strength and Weakness.

Structure of Government—Organisation and functions of Legislature—Executive and Judiciary—Bi-cameralism—its Merits and Defects—Separation of Powers.

Functions of Government—Individualism and Socialism—their comparative merits and defects—Types of Socialism. Constitution—Different kinds of Constitutions—their strength and weakness.

Party System—its advantages and disadvantages. Two-Party System vs. Multiple Party System—one Party Rule.

Public Opinion—Its nature and importance in Popular Government—Agencies for formation of Public opinion.

Electorate—Universal Suffrage—Methods of minority representation—Direct and Indirect election—Relation between the representative and his Constituency.

নিবেদন

স্কুল ও কলেজগুলিতে এতদিন পর্যন্ত যে শিক্ষাব্যবস্থা প্রচলিত ছিল, বর্তমান বৎসর হইতে তাহার আমূল পরিবর্তনের সূত্রপাত হইল। সপ্তদশম শ্রেণীর স্থলে একাদশ শ্রেণীভুক্ত হইল ও কলেজগুলিতে আই. এ. ও আই.এস.-সি. পঠন-পাঠন রহিত হইল। উপাধি পরীক্ষার জন্য ছাত্র-ছাত্রীগণকে বর্তমানে দুই বৎসরের স্থলে তিন বৎসরের শিক্ষা গ্রহণ করিতে হইবে। এই উদ্দেশ্যে বিশ্ববিদ্যালয় কর্তৃপক্ষ কর্তৃক অধিতব্য বিষয়সমূহের জন্য পরিবর্তিত পাঠ্যসূচী সংকলিত হইয়াছে। তাঁহারা রাষ্ট্রবিজ্ঞানের পাঠ্যসূচী সংকলন করিয়াছেন, তাঁহারা এই সুদূরপ্রসারী পরিবর্তনের প্রথম পর্যায়ে পাঠ্যসূচীর কলেবর অথবা ভারাক্রান্ত না করিয়া বিচক্ষণতার পরিচয় দিয়াছেন।

পাঠ্যসূচী অল্পসারেই পুস্তকখানি লিখিত হইল। ছাত্র-ছাত্রীগণের সুবিধার জন্য পুস্তকের প্রারম্ভে পাঠ্যসূচীর তালিকা দেওয়া হইল। এতদ্ব্যতীত প্রত্যেক অধ্যায়ের শেষে অধ্যায়টির সংক্ষিপ্তসার ও বিশ্ববিদ্যালয়ের প্রশ্নপত্র সংযোজিত হইল। পুস্তকের শেষে বর্ণানুক্রমিক সূচী দেওয়া হইল। আশা করি, ছাত্র-ছাত্রীগণ পুস্তক পাঠে উপকৃত হইবেন। দ্বিতীয় ও তৃতীয় পত্রের জন্য ভারতসহ পাঁচটি দেশের আধুনিক শাসনব্যবস্থা সম্বলিত রাষ্ট্রতত্ত্ব—দ্বিতীয় খণ্ড অতি সস্তর প্রকাশিত হইবে।

প্রকাশকের সাহায্য ব্যতীত এই দুরূহ কার্য সম্পন্ন করা সম্ভব হইত না। এজন্য তাঁহাদিগকে আন্তরিক ধন্যবাদ জানাইতেছি। পুস্তক গ্রণয়নে কলা পুরবিকা নানাভাবে সাহায্য করিয়াছে।

শ্রীমা প্রসাদ কলেজ

স্বাধীনতা দিবস, ১৩৬৭

ইং ১৫. ৬. ৬০

শ্রীশিবনাথ চক্রবর্তী

সূচীপত্র

প্রথম খণ্ড

বিষয়

পৃষ্ঠা

প্রথম অধ্যায়

অবতারণা

...

...



নামকরণ, রাষ্ট্রবিজ্ঞানের বিষয়বস্তু, রাষ্ট্রবিজ্ঞান আলোচনার পদ্ধতি, রাষ্ট্রবিজ্ঞান কি বিজ্ঞান-পর্যায়ভুক্ত, রাষ্ট্রবিজ্ঞানের অহুমসন্ধানপদ্ধতি, রাষ্ট্রবিজ্ঞানের সহিত অন্যান্য বিজ্ঞানের সম্বন্ধবিচার—রাষ্ট্রবিজ্ঞান ও সমাজবিজ্ঞান, রাষ্ট্রবিজ্ঞান ও ইতিহাস, রাষ্ট্রবিজ্ঞান ও ধনবিজ্ঞান, রাষ্ট্রবিজ্ঞান ও নৃতত্ত্ব, রাষ্ট্রবিজ্ঞান ও নীতিশাস্ত্র, রাষ্ট্রবিজ্ঞান ও মনস্তত্ত্ব, রাষ্ট্রবিজ্ঞান ও ভূগোলশাস্ত্র, রাষ্ট্রবিজ্ঞান ও ব্যবহারশাস্ত্র, রাষ্ট্রবিজ্ঞান ও আন্তর্জাতিক আইন ; সংক্ষিপ্তসার, প্রশ্নাবলী।

দ্বিতীয় অধ্যায়

রাষ্ট্র

...

...

...

২৮

রাষ্ট্রসংজ্ঞা, রাষ্ট্রের উপাদান, রাষ্ট্রের সার্বভৌমিকতা ব্যক্তিগত না স্থানগত, রাষ্ট্রের বাস্তব ও অবাস্তব রূপ, রাষ্ট্রের অন্ত্যন্ত বৈশিষ্ট্য—রাষ্ট্রের আন্তর্জাতিক আইনসম্মত সংজ্ঞা, ভারতবর্ষকে কি স্বাধীন সার্বভৌম ক্ষমতাবিশিষ্ট রাষ্ট্র বলা চলে, সম্মিলিত জাতিপুঞ্জকে কি রাষ্ট্র বলা যাইতে পারে, রাষ্ট্র ও সমাজ, রাষ্ট্র ও সমাজের অন্ত্যন্ত সংঘ, রাষ্ট্র ও শাসনব্যবস্থা, রাষ্ট্রের বিভিন্ন প্রকাশ ; সংক্ষিপ্তসার, প্রশ্নাবলী।

তৃতীয় অধ্যায়

রাষ্ট্রের উৎপত্তি ও প্রকৃতি সম্বন্ধে বিভিন্ন মতবাদ

...

৫৬

উৎপত্তি-বিষয়ক বিভিন্ন মতবাদ ; ঐশ্বরিক উৎপত্তি অথবা রাষ্ট্র বিধাতার সৃষ্টি—মতবাদ ; পরিবারের ক্রমসম্প্রসারণের ফলে রাষ্ট্রের উৎপত্তি—মতবাদ ; পিতৃতান্ত্রিক মতবাদ, মাতৃতান্ত্রিক মতবাদ ; বল-প্রয়োগ মতবাদ, সমালোচনা ; সামাজিক চুক্তি মতবাদ, হব্‌সের অভিমত ; লকের অভিমত ; রুশোর অভিমত ; সমালোচনা ; মতবাদের সত্যনির্ধারণ ও ইহার বাস্তব গুরুত্ব ; হব্‌স, লক ও রুশোর মতবাদের মধ্যে সাদৃশ্য ও বৈসাদৃশ্য, সামাজিক চুক্তি মতবাদের গুরুত্ব-হ্রাস,

সামাজিক চুক্তি মতবাদ ও গণতন্ত্র, ঐতিহাসিক মতবাদ বা বিবর্তনবাদ, রাষ্ট্রের প্রকৃতি সম্বন্ধে মতবাদ : আইনমূলক মতবাদ, জৈব মতবাদ, সমালোচনা, মূল্যনির্ধারণ ও কার্যকারিতা, আদর্শবাদ, সমালোচনা, মূল্য-নির্ধারণ, রাষ্ট্র সম্বন্ধে মার্কসীয় মতবাদ, মার্কসীয় মতবাদের সমালোচনা, সংক্ষিপ্তসার, প্রস্তাবলী

চতুর্থ অধ্যায়

সার্বভৌমিকতা ... ১১০

সার্বভৌমিকতার অর্থ, সার্বভৌমিকতার বৈশিষ্ট্য, সার্বভৌমিকতার বিভিন্ন রূপ, গণ বা সার্বজনীন সার্বভৌমের মতবাদ, সমালোচনা, জাতীয় সার্বভৌমিকতা, সার্বভৌমিকতা ও শাসনতান্ত্রিক আইন, অষ্ট্রিনের সার্বভৌমত্ব মতবাদ, সমালোচনা, অষ্ট্রিনের সার্বভৌমত্বের পুনঃ সংজ্ঞা নির্দেশ, সার্বভৌমক্ষমতা কি বিভাজ্য, সমালোচনা, সার্বভৌমক্ষমতা কি সীমাবদ্ধ, সার্বভৌমক্ষমতার বহুত্ববাদ, সমালোচনা, সার্বভৌমক্ষমতার অবস্থিতি, সংক্ষিপ্তসার, প্রস্তাবলী।

পঞ্চম অধ্যায়

আইন ... ১৩৭

আইনের সংজ্ঞা ও প্রকৃতি, আইনের সমর্থন, আইনের উৎস, রাষ্ট্রীয় আইন ও অন্তর্গত আইন : প্রাকৃতিক আইন, সামাজিক আইন, ধর্মীয় আইন, নৈতিক আইন, রাষ্ট্রীয় আইন ও নৈতিক নিয়মের সম্পর্ক, আন্তর্জাতিক আইন, আইনের শ্রেণীবিভাগ, রাষ্ট্র ও আইন, সংক্ষিপ্তসার, প্রস্তাবলী।

ষষ্ঠ অধ্যায়

রাষ্ট্র ও জাতীয়তাবাদ ... ১৫৭

স্বজাতীয় মানুষ, জাতীয় জনসমাজ, জাতি ও জাতীয়তাবোধ, রাষ্ট্র ও জাতি, জাতীয় জনসমাজ বা জাতিগঠনের উপাদান, জাতীয় ভাবের উৎপত্তি, এক জাতি এক রাষ্ট্র, ভারতীয়গণকে কি এক জাতি বলা যায়, আত্মনির্ধারণের নীতি ও ইহার সপক্ষে ও বিপক্ষে যুক্তি, জাতির অন্ত্যস্ত দাবী, জাতীয়তাবাদ, বিকৃত জাতীয়তাবাদ, সাম্রাজ্যবাদ, আন্তর্জাতিকতা, সম্মিলিত জাতিপুঞ্জ, ইহার উদ্দেশ্য, সংক্ষিপ্তসার, প্রস্তাবলী।

সপ্তম অধ্যায়

বিষয়		পৃষ্ঠা
নাগরিকতা	...	১৮৩

নাগরিক সংজ্ঞা, নাগরিক ও বিদেশী, পূর্ণ নাগরিক ও অসম্পূর্ণ নাগরিক, নাগরিক ও নির্বাচক, নাগরিক ও প্রজা, নাগরিকত্ব অর্জনের পদ্ধতি, যুক্তরাষ্ট্রীয় ব্যবস্থায় নাগরিকত্ব, নাগরিক অধিকার বিলুপ্তি, পূর্ণ নাগরিক জীবনের অন্তরায়, অন্তরায়গুলির প্রতিকার, সংক্ষিপ্তসার, প্রণাবলী।

অষ্টম অধ্যায়

স্বাধীনতা, সাম্য ও অধিকার	...	১২৪
---------------------------	-----	-----

স্বাধীনতা, স্বাধীনতা সংজ্ঞার মধ্যে দ্বন্দ্ব, স্বাধীনতার প্রকৃত তাৎপর্য ও আইনের সহিত ইহার সম্পর্ক, স্বাধীনতা ও সাম্য, সাম্যনীতির উদ্ভব ও বাস্তবক্ষেত্রে এই নীতির প্রয়োগ, নাগরিক অধিকার ও কর্তব্য, অধিকার ও কর্তব্যের পারস্পরিক সম্পর্ক, নাগরিক অধিকারের প্রকারভেদ : প্রাকৃতিক অধিকার, সমালোচনা, পৌর অধিকার, মৌলিক অধিকার, রাজনৈতিক অধিকার, অর্থনৈতিক অধিকার, অধিকারের আইনগত ভিত্তি, অধিকারের অর্থনীতি-ভিত্তিক সংজ্ঞা, নাগরিকের কর্তব্য, ব্যক্তি-স্বাধীনতা রক্ষা করিবার বিভিন্ন উপায়, সংক্ষিপ্তসার, প্রণাবলী।

নবম অধ্যায়

রাষ্ট্র সমবায় ও সরকারের বিভিন্ন রূপ	...	২২৪
--------------------------------------	-----	-----

রাষ্ট্র সমবায় ও সরকারের বিভিন্ন রূপ, রাজতন্ত্র, অভিজাততন্ত্র, অভিজাততন্ত্রের প্রভাব, প্রজাতন্ত্র, গণতন্ত্র : গণতান্ত্রিক রাষ্ট্র, গণতান্ত্রিক সমাজ, গণতান্ত্রিক সরকার, গণতন্ত্র প্রত্যক্ষ ও পরোক্ষ, গণতন্ত্রের গুণ, দোষ, পরোক্ষ গণতন্ত্র ব্যবস্থায় প্রত্যক্ষ গণতান্ত্রিক পদ্ধতির প্রয়োগ : গণনির্দেশাধিকার, গণ-প্রস্তাব অধিকার, গণভোট, প্রত্যা-বর্তনের আদেশ, গণতান্ত্রিক উপায়গুলির গুণাগুণ, গণতন্ত্রের সাফল্যের • উপাদান, গণতন্ত্রের ভবিষ্যৎ, প্রাচীনকালের গণতন্ত্র ও আধুনিক গণতন্ত্র, একনায়কতন্ত্র, গণতন্ত্র ও একনায়কতন্ত্র, একনায়কতন্ত্রের গুণ, দোষ, আমল্যুতন্ত্র, সংক্ষিপ্তসার, প্রণাবলী।

দশম অধ্যায়

যুক্তরাষ্ট্রীয় শাসনব্যবস্থা ... ২৫১

এককেন্দ্রীয় ও যুক্তরাষ্ট্রীয় শাসনব্যবস্থা, যুক্তরাষ্ট্রের বিশেষত্ব, যুক্তরাষ্ট্রের গঠনপ্রণালী, যুক্তরাষ্ট্র-ব্যবস্থার সাফল্যের উপায়, যুক্তরাষ্ট্রের সাফল্যের উপাদানগুলি কি ভারতে বর্তমান, যুক্তরাষ্ট্র-ব্যবস্থায় ক্ষমতা-বণ্টনের নীতি ও পদ্ধতি, যুক্তরাষ্ট্র-ব্যবস্থায় স্থানীয় সরকারগুলির উপর কেন্দ্রীয় সরকারের কর্তৃত্ব, যুক্তরাষ্ট্রের আধুনিক প্রবণতা, যুক্তরাষ্ট্রের সহিত অপরূপার সমবায় রাষ্ট্রের পার্থক্য : সন্ধি-বন্ধন, ব্যক্তিগত-বন্ধন, প্রকৃত-বন্ধন, সন্ধি-সমবায়, এককেন্দ্রীয় রাষ্ট্রের গুণ, অপগুণ, যুক্তরাষ্ট্রের শ্রেষ্ঠত্ব, যুক্তরাষ্ট্রের দুর্বলতা, মন্ত্রিসংসদ-চালিত সরকার, রাষ্ট্রপতি-চালিত সরকার, মন্ত্রিসংসদ-চালিত সরকার ও রাষ্ট্রপতি-চালিত সরকারের পার্থক্য, মন্ত্রিসংসদ-চালিত সরকারের সুবিধা ও অসুবিধা, রাষ্ট্রপতিচালিত শাসনব্যবস্থার সুবিধা ও অসুবিধা, বিকেন্দ্রীকরণ, সংক্ষিপ্তসার, প্রস্তাবনী ।

একাদশ অধ্যায়

সরকারের বিভিন্ন বিভাগ (১) ... ২৮৮

আইনসভা, আইনসভার কার্য, আইনসভার সংগঠন, এক-কক্ষ বনাম দ্বি-কক্ষ আইনসভা, উচ্চপরিষদের সংগঠন ও কার্যকলাপ, ভারতে রাজ্য সরকারের ক্ষেত্রে উচ্চপরিষদের প্রয়োজনীয়তা, খসড়া-আইনের শ্রেণী বিভাগ, আইন-প্রণয়ন পদ্ধতি, সার্বভৌম ও অ-সার্বভৌম আইনসভা, আইনসভার গুরুত্ব হ্রাস, সংক্ষিপ্তসার, প্রস্তাবনী ।

দ্বাদশ অধ্যায়

সরকারের বিভিন্ন বিভাগ (২) ... ৩০৮

শাসনকর্তৃপক্ষ ও বিচারবিভাগ, শাসনকর্তৃপক্ষের শ্রেণী-বিভাগ ও নিয়োগ-পদ্ধতি, শাসন-বিভাগীয় কার্য, বিচার-বিভাগ ও ইহার কার্য, বিচার-বিভাগের স্বাধীনতা ও নিরপেক্ষতা, বিচারক নিয়োগ-ও-অপসারণ পদ্ধতি, আইনসভার সহিত শাসনকর্তৃপক্ষের সম্পর্ক, আইনসভার সহিত বিচারবিভাগের সম্পর্ক, শাসনকর্তৃপক্ষের সহিত বিচার-বিভাগের সম্পর্ক, সংক্ষিপ্তসার, প্রস্তাবনী ।

ত্রয়োদশ অধ্যায়

ক্ষমতার স্বাতন্ত্র্যবিধান নীতি

...

... ৩২২

ক্ষমতার স্বাতন্ত্র্যবিধানের প্রয়োজনীয়তা, মতবাদের উৎপত্তি, সমালোচনা, উপসংহার, ক্ষমতার স্বাতন্ত্র্যবিধান নীতির আধুনিক ব্যাখ্যা, সংক্ষিপ্তসার, প্রস্তাবনী।

চতুর্দশ অধ্যায়

রাষ্ট্রের উদ্দেশ্য ও কার্যকলাপ

...

... ৩৩৪

রাষ্ট্রের উদ্দেশ্য ও কার্যকলাপ, রাষ্ট্রের প্রকৃত উদ্দেশ্য, জনকল্যাণ নীতি, রাষ্ট্রের ক্রিয়াকলাপ স্বত্বক্ষে বিভিন্ন মতবাদ : অ-রাষ্ট্রতন্ত্র, ব্যক্তি-স্বাতন্ত্র্যবাদ, ব্যক্তিস্বাতন্ত্র্যবাদের পক্ষে যুক্তি, ব্যক্তিস্বাতন্ত্র্যবাদের বিপক্ষে যুক্তি, ব্যক্তিস্বাতন্ত্র্যবাদের আধুনিক ব্যাখ্যা, সমাজতন্ত্রবাদ, সমাজতন্ত্রবাদের প্রকারভেদ : কালনিক সমাজতন্ত্রবাদ, মার্কসীয় সমাজতন্ত্রবাদ, সমষ্টিপ্রধান সমাজতন্ত্রবাদ, রাষ্ট্রপ্রধান সমাজতন্ত্রবাদ, ক্রমবিবর্তমান সমাজতন্ত্রবাদ, খৃষ্টীয় সমাজতন্ত্রবাদ, অ-রাষ্ট্রতন্ত্রী সমাজতন্ত্রবাদ, সমিতি-প্রধান সমাজতন্ত্রবাদ, সাম্যবাদ, সোভিয়েত যুক্তরাষ্ট্রের সাম্যবাদ, সোভিয়েত সাম্যবাদের মূল্য নির্ধারণ, চৈনিক সাম্যবাদ, সমাজতন্ত্রবাদের পক্ষে যুক্তি, সমাজতন্ত্রবাদের বিপক্ষে যুক্তি, সত্যসিদ্ধান্ত, বর্তমান রাষ্ট্রের কার্যকলাপের পরিধি, রাষ্ট্রীয় কার্যকলাপের শ্রেণীবিভাগ, ব্যক্তিগত জীবনে রাষ্ট্র-নিয়ন্ত্রণের সীমা, নতন মতবাদ, ধনতন্ত্রবাদ, ধনতান্ত্রিক-ব্যবস্থার স্বফল, ধনতান্ত্রিকব্যবস্থার কুফল, ফ্যাসিবাদ, নাসীবাদ, গান্ধীবাদ, রাজনীতির শেষ সমস্তা, সংক্ষিপ্তসার, প্রস্তাবনী।

পঞ্চদশ অধ্যায়

শাসনতন্ত্র ...

...

...

... ৩৩৫

শাসনতন্ত্রের প্রয়োজনীয়তা, সংজ্ঞা, শাসনতন্ত্রের শ্রেণীবিভাগ, লিখিত ও অ-লিখিত শাসনতন্ত্রের পার্থক্য সুস্পষ্ট নয়, শাসনতন্ত্র-পরিবর্তনের বিভিন্ন পদ্ধতি, শাসনতন্ত্রের বিষয়বস্তু, সংক্ষিপ্তসার, প্রস্তাবনী।

ষোড়শ অধ্যায়

রাজনৈতিক দল ও জনমত

...

* ... ৪০২

রাজনৈতিক দল, রাজনৈতিক দলের কার্য, দলীয় শাসনের গুণ, দলীয় শাসনের দোষ, চাপস্ফটিকারী ও স্বার্থ-প্রণোদিত সংস্থা, দুই-দল বনাম বহু-দল, দুই-দলের পক্ষে ও বিপক্ষে যুক্তি, এক-দলীয় শাসন ও গণতন্ত্র, দলব্যবহার ক্রটি দূরীকরণের উপায়, দলবিহীন শাসন, জনমত : গণতন্ত্র ও জনমত, জনমতের প্রকৃতি, জনমত-গঠন ও প্রকাশের বিভিন্ন উপায়, আইন ও জনমত, ভারতে জনমত, সংক্ষিপ্তসার, প্রস্তাবলী।

সপ্তদশ অধ্যায়

নির্বাচকমণ্ডলী

...

...

... ৪৩৬

নির্বাচকমণ্ডলী ও ভোটাধিকার, সার্বজনীন ভোটাধিকার : ইহার পক্ষে ও বিপক্ষে যুক্তি ; স্বীলোকের ভোটাধিকার, প্রত্যক্ষ ও পরোক্ষ নির্বাচন, এক সদস্য-সমন্বিত নির্বাচনকেন্দ্র বনাম বহু সদস্য-সমন্বিত নির্বাচনকেন্দ্র, অবৈতনিক বনাম বেতনভুক্ত প্রতিনিধিত্ব, প্রতিনিধিত্বের স্বরূপ, একাধিক ভোটদান, প্রকাশ্য অথবা গোপন ভোট, সংখ্যালঘিষ্ঠের নির্বাচন সমস্যা, সংখ্যালঘুদের প্রতিনিধিত্ব প্রণালী : একক হস্তান্তর-যোগ্য ভোটে আত্মপাতিক নির্বাচন, তালিকা-প্রণয় আত্মপাতিক নির্বাচন, সীমাবদ্ধ ভোট, ভূপীকারী ভোট, দ্বিতীয়বার ভোট গ্রহণ, আত্মপাতিক নির্বাচনের পক্ষে ও বিপক্ষে যুক্তি, বিভিন্ন দেশে সংখ্যালঘু-দলের অধিকার রক্ষার উপায়, আঞ্চলিক প্রতিনিধিত্ব বনাম বৃত্তিগত প্রতিনিধিত্ব, সাম্প্রদায়িক ভিত্তিতে পৃথক নির্বাচন, নির্বাচকমণ্ডলীর কর্তব্য, সংক্ষিপ্তসার, প্রস্তাবলী।

প্রশ্ন ও উত্তরের ইংগিত

...

... ৪৬২

বর্ণানুক্রমিক সূচী

...

... ৫২০

রাষ্ট্রতত্ত্ব

প্রথম খণ্ড

প্রথম অধ্যায়

অবতারণা

Introduction

নামকরণ (Nomenclature)

সমাজবদ্ধ মানুষের রাজনৈতিক জীবনের আলোচনা করাই হইল রাষ্ট্র-বিজ্ঞানের বিষয়বস্তু। কিন্তু বিষয়বস্তুর আলোচনার পূর্বে আমাদের পঠিতব্য বিষয়ের একটি সর্বজনগ্রাহ্য নামকরণ করা প্রয়োজন। আমাদের আলোচ্য শাস্ত্রটিকে নানা নামে অভিহিত করা হইয়াছে—যথা, রাজনীতি (Politics), রাষ্ট্রদর্শন (Political Philosophy) ও রাষ্ট্রবিজ্ঞান (Political Science)। প্রসিদ্ধ গ্রীক দার্শনিক অ্যারিস্টটল্ এই শাস্ত্রকে রাজনীতি নামে অভিহিত করিয়াছেন। আমাদের আলোচ্য শাস্ত্রকে রাজনীতি বলিতে অনেক লেখক আপত্তি করেন। তাঁহাদের আপত্তির কারণ হইল যে, রাজনীতি বলিতে প্রধানতঃ রাজ্যশাসনের চলিত রীতিনীতি ও পদ্ধতি বুঝায়। রাজনীতি বা রাষ্ট্রনীতি বলিতে আমরা বর্তমান যুগে বুঝি সরকারের সাম্প্রতিক সমস্তা-সমূহকে, যেমন ভারতরাষ্ট্রের সাম্প্রতিক সমস্তা হইল, পাকিস্তানের সহিত কাশ্মীর লইয়া যে বিরোধ সেই সমস্তার সমাধান করা। সুতরাং রাজনীতি বলিলে বুঝা যায় যে, যে-মত অনুসরণ করিয়া সরকার তাহার কার্যাবলী পরিচালনা করে তাহাকেই তদানীন্তন রাজনীতি বলা হয়। এইজন্য সর্বদেশে সর্বসময়ে এক রাজনীতি বা এক রাজনৈতিক মত বা একই প্রকার শাসনব্যবস্থা প্রচলিত থাকিতে পারে না। সুতরাং দেখা যাইতেছে, রাজ-নীতি শুধু সরকারের বর্তমান অনুসৃত নীতি ও শাসনব্যবস্থার পরিচালক। কিন্তু আমাদের আলোচ্য শাস্ত্র ইহা অপেক্ষা অধিকতর ব্যাপক অর্থে ব্যবহৃত হয়। সরকারের নীতি ও শাসনব্যবস্থা বিশ্লেষণ করা ব্যতীত রাষ্ট্র ও রাষ্ট্র-

সংক্রান্ত অগাধ বিষয়ের ব্যাখ্যা করা এই শাস্ত্রের আলোচ্য বিষয়। এইজন্য অনেক লেখক এই শাস্ত্রকে ‘রাষ্ট্রদর্শন’ এই আখ্যা দিতে চাহেন।

রাষ্ট্রসম্বন্ধীয় তত্ত্বকথা আলোচনা করাই রাষ্ট্রদর্শনের মুখ্য উদ্দেশ্য। রাষ্ট্রের উৎপত্তি, প্রকৃতি, তাৎপর্য ও রাষ্ট্রকর্তব্যের মূলনীতি ব্যাখ্যা করাই রাষ্ট্রদর্শনের বিষয়বস্তু। কিন্তু এই নামকরণও আমাদের আলোচ্যশাস্ত্রের সম্যক পরিচায়ক নহে। রাষ্ট্রদর্শন বলিলে শুধু রাষ্ট্রের দার্শনিক তত্ত্ব বুঝায়। দার্শনিক দিক ছাড়াও রাষ্ট্রের একটি কার্যকর দিক আছে। যে শাসনপদ্ধতিতে ও যে নীতিতে বিভিন্ন রাষ্ট্র পরিচালিত হয় তাহা রাষ্ট্রদর্শনের অন্তর্ভুক্ত নহে। উদাহরণস্বরূপ বলা যাইতে পারে যে, ভারতীয় যুক্তরাষ্ট্রের বর্তমান শাসনপদ্ধতি রাষ্ট্রদর্শনের বিষয়বস্তু নহে। ইহা একটি রাষ্ট্রবিশেষের প্রচলিত শাসনব্যবস্থা মাত্র, যাহা শুধু ভারতেই প্রযোজ্য। আমাদের আলোচ্য শাস্ত্রটির বিষয়বস্তুকে সিজুইক, পোলক প্রভৃতি লেখকগণ দুই ভাগে ভাগ করিয়াছেন—তত্ত্বগত রাজনীতি ও ফলিত রাজনীতি। রাষ্ট্রদর্শন বলিলে শুধু তত্ত্বগত রাজনীতিকে বুঝায় ও ফলে আমাদের আলোচ্য শাস্ত্রের পরিধি সংকুচিত হয়, কারণ আমরা আমাদের আলোচ্য শাস্ত্রে তত্ত্বগত রাজনীতি ও ফলিত রাজনীতি উভয়েরই আলোচনা করি। এইজন্য বর্তমান যুগে আমাদের এই শাস্ত্রকে ‘রাষ্ট্রবিজ্ঞান’ নামে অভিহিত করা হয় ও এই নামই সকলে গ্রহণ করিয়াছেন।

রাষ্ট্রবিজ্ঞানের আলোচ্য বিষয়বস্তু শুধু তত্ত্বগত রাজনীতিতেই সীমাবদ্ধ নহে। ইহা ফলিত রাজনীতি সম্বন্ধেও আলোচনা করে। প্রত্যেকটি রাষ্ট্র ও সরকার কতকগুলি মূলনীতির উপর প্রতিষ্ঠিত। এই নীতিগুলি বিশ্লেষণ করিলে রাষ্ট্রের প্রকৃতি, রাষ্ট্রের উৎপত্তি, রাষ্ট্রের বৈশিষ্ট্য ও রাজনৈতিক জীবনের উদ্দেশ্য জানিতে পারা যায়। আমাদের আলোচ্য শাস্ত্রে আমরা একদিকে যেমন রাষ্ট্রের গঠন ও কার্যপদ্ধতির আলোচনা করি, সেইরূপ অন্য দিকে আবার যে মূল সূত্রগুলির উপর রাজনৈতিক প্রতিষ্ঠানগুলি প্রতিষ্ঠিত তাহারও আলোচনা করি। সুতরাং রাষ্ট্রবিজ্ঞানে রাষ্ট্রসম্বন্ধীয় যাবতীয় তত্ত্ব ও তথ্য আলোচিত হয়। সেজন্য রাষ্ট্রদর্শনকে রাষ্ট্রবিজ্ঞানের অংশমাত্র বলা যাইতে পারে। আমাদের আলোচ্য শাস্ত্রটির সর্বজনগ্রাহ্য নাম হইল রাষ্ট্রবিজ্ঞান।

অনেক লেখক বিশেষ করিয়া ফরাসী লেখকগণ রাষ্ট্রবিজ্ঞানকে একক শাস্ত্র না বলিয়া অনেকগুলি শাস্ত্রের সমষ্টি বলিয়া অভিহিত করিয়াছেন (Political Sciences)। তাঁহাদের মতে রাষ্ট্রবিজ্ঞান রাষ্ট্রের বিশেষ একটি দিকের আলোচনা করে। আন্তর্জাতিক আইন, শাসনতান্ত্রিক ইতিহাস প্রভৃতি বিষয়গুলিও রাষ্ট্রবিজ্ঞানের মত রাষ্ট্রসম্বন্ধে আলোচনা করে। সুতরাং রাষ্ট্রবিজ্ঞান রাষ্ট্রসম্বন্ধীয় শাস্ত্রগুলির মধ্যে অন্যতম, রাষ্ট্রসম্বন্ধীয় একমাত্র শাস্ত্র নহে। বর্তমান যুগে যদিও আন্তর্জাতিক আইন, শাসনতান্ত্রিক ইতিহাস প্রভৃতি বিষয়গুলির আলোচ্য বিষয়বস্তু যথেষ্ট পরিমাণে বৃদ্ধি পাইয়াছে, তথাপি রাষ্ট্রবিজ্ঞান হইতে সম্পূর্ণ পৃথক্ভাবে ইহাদের আলোচনা সম্ভবপর নয়। এই বিষয়গুলি রাষ্ট্রবিজ্ঞানের সহিত এরূপ অঙ্গাঙ্গিভাবে জড়িত যে, রাষ্ট্রবিজ্ঞান হইতে বিচ্ছিন্ন করিয়া ঐগুলির স্বাধীন ও স্বতন্ত্র আলোচনা সম্ভবপর নয়। এই বিষয়গুলিকে পৃথক্ শাস্ত্র বলিয়া অভিহিত না করিয়া রাষ্ট্রবিজ্ঞানেরই বিশেষ শাখা বলিয়া গণ্য করা সমীচীন বলিয়া মনে হয়।

রাষ্ট্রবিজ্ঞানের বিষয়বস্তু (Scope of Political Science)

মানুষ বুদ্ধিজীবী প্রাণী, তাই সমাজ গঠন করিয়া সংঘবদ্ধভাবে বাস করে। মানুষের এই সামাজিক জীবন বহুমুখী। এই বহুমুখী জীবনের একটা দিক প্রকাশিত হইয়াছে তাহার রাজনৈতিক জীবনে। আর এই রাজনৈতিক জীবন গড়িয়া উঠিয়াছে যে অভূতপূর্ব প্রতিষ্ঠানকে কেন্দ্র করিয়া, সেই প্রতিষ্ঠানটি হইল 'রাষ্ট্র'। রাজনৈতিক চেতনাসম্পন্ন মানুষ রাষ্ট্রকে কেন্দ্র করিয়া তাহার যে বৃহত্তর জীবন সংগঠন করিয়াছে, সেই রাষ্ট্রকে কেন্দ্রীভূত মানবজীবনের আলোচনা করাই রাষ্ট্রবিজ্ঞানের প্রধান বিষয়বস্তু। মহামতি অ্যারিস্টটল্ বলিয়াছেন, মানুষ স্বভাবতই রাজনৈতিক চেতনাসম্পন্ন জীব। বর্তমান যুগের মানুষসম্বন্ধে অ্যারিস্টটলের উক্তি সম্পূর্ণ প্রযোজ্য না হইলেও একথা নিঃসন্দেহে বলা যাইতে পারে যে, রাষ্ট্রের প্রভাব মানবজীবনের উপর ঘনরূপে সূদূরপ্রসারী, অন্ত কোন প্রতিষ্ঠানই মানবজীবনের উপর ততটা প্রভাব বিস্তার করিতে পারে নাই। তাই মানুষকে বুঝিতে হইলে, তাহার চিন্তাধারা ও কার্যাবলীর সম্যক বিশ্লেষণ করিতে হইলে, রাষ্ট্রসংশ্লিষ্ট

মানুষকেই আমাদের জানিতে হইবে। তাই রাষ্ট্রবিজ্ঞানের প্রারম্ভ হইতে শেষ পর্যন্ত এই রাষ্ট্রের বিষয়ই আলোচিত হয়।

রাষ্ট্রবিজ্ঞানের বিষয়বস্তু অত্যন্ত ব্যাপক। রাষ্ট্রবিজ্ঞানে যে শুধু রাষ্ট্রতত্ত্ব আলোচিত হয় তাহা নহে। রাষ্ট্রবিজ্ঞানে আলোচিত হয় রাষ্ট্রের উৎপত্তি, রাষ্ট্রের সংগঠন, রাষ্ট্রীয় প্রতিষ্ঠানসমূহ, স্বরাষ্ট্রের সহিত পররাষ্ট্রের সম্বন্ধ, নাগরিক অধিকার ও শাসনযন্ত্রের সহিত তাহাদের সম্বন্ধ। সর্বোপরি আলোচিত হয় রাষ্ট্রের তাৎপর্য ও রাষ্ট্র কর্তব্য। মানুষ তাহার সামাজিক জীবনকে সার্থক করিবার জন্য রাষ্ট্ররূপ যে বিশাল সৌধ কোন্ অজানা অতীত যুগ হইতে গঠন করিতে আরম্ভ করিয়াছে তাহা কি পরিমাণে মানব-জীবনের সহায়ক হইয়াছে ও ভবিষ্যতে মহত্তর জীবনগঠনে কতদূর সহায়ক হইতে পারে—তাহাও রাষ্ট্রবিজ্ঞানের অগতম আলোচ্য বিষয়।

বর্তমান রাষ্ট্রের নীতি, গঠনপ্রণালী ও শাসনপদ্ধতির সহিত সম্যক পরিচিত হইতে হইলে রাষ্ট্রের অতীত জীবনের আলোচনা করা প্রয়োজন। পুরাতন কাঠামোর সংস্কার সাধন করিয়া মানুষ তাহাকে বর্তমান যুগোপযোগী করিয়াছে। তাই বর্তমান রাষ্ট্রকে বুঝিতে হইলে অতীত ও মধ্যযুগীয় রাষ্ট্রের স্বরূপ বিশ্লেষণ করা দরকার। অতীত ও বর্তমান রাষ্ট্রের যথাযথ স্বরূপ জানিতে পারিলেই আমরা রাষ্ট্রের ক্রটি-বিচ্যুতি-সম্বন্ধে সচেতন হইয়া আদর্শ রাষ্ট্র গঠন করিতে সমর্থ হইব। যুগযুগান্তর ধরিয়া রাষ্ট্রকে কেন্দ্র করিয়া মানুষ তাহার মুক্তির সন্ধান খুঁজিতেছে। আদর্শ রাষ্ট্রের মাধ্যমেই সেই মুক্তির সন্ধান মিলিতে পারে। তাই রাষ্ট্রের আদর্শ পরিণতি কি তাহা রাষ্ট্রবিজ্ঞানের অগতম বিষয়বস্তু। ব্যক্তি ও সমষ্টির পারস্পরিক সম্বন্ধবিচার ও আদর্শ সম্বন্ধস্থাপনই রাষ্ট্রবিজ্ঞানের মূল লক্ষ্য।

রাষ্ট্রবিজ্ঞান আলোচনার সার্থকতা (Utility of the Study of Political Science)

এখন প্রশ্ন উঠিতে পারে যে, রাষ্ট্রবিজ্ঞানের আলোচনার দ্বারা মানুষ কি প্রকারে লাভবান হইতে পারে—এই প্রশ্নের আলোচনার উদ্দেশ্য কি? পূর্বেই বলা হইয়াছে যে, মানুষকে জানিতে হইলে, তাহার কার্যাবলীর সম্যক পরিচয় পাইতে হইলে রাষ্ট্রভুক্ত মানুষের পরিচয় একান্ত প্রয়োজন। সমাজবদ্ধ মানব-

জীবনের চরম পরিণতি হইল রাষ্ট্র। সুতরাং রাষ্ট্রবিজ্ঞানের আলোচনা দ্বারা মানবজীবনের একটি অতিশয় গুরুত্বপূর্ণ অধ্যায়ের বিবরণ জ্ঞাত হওয়া যায়। রাষ্ট্র শাসনতন্ত্রের মাধ্যমে আইন প্রণয়ন করিয়া কি প্রকারে শান্তি-শৃঙ্খলা প্রতিষ্ঠিত করিয়া প্রত্যেক নাগরিককে তাহার ব্যক্তিবিকাশে সুবিধা দান করে, রাষ্ট্রবিজ্ঞানের আলোচনা হইতে তাহা জানিতে পারা যায়। এতদ্ব্যতীত রাষ্ট্রবিজ্ঞানের আলোচনা দ্বারা মানুষ আত্মসচেতন হইয়া তাহার নাগরিক অধিকার ও নাগরিক কর্তব্যসম্পর্কে অবহিত হইতে পারে। নিরপেক্ষভাবে রাষ্ট্রবিজ্ঞানের আলোচনা আত্মকেন্দ্রিক ব্যক্তির মধ্যে সমাজচেতনা সঞ্চারিত করিয়া ব্যক্তিকে স্বার্থপরতার ক্ষুদ্র গতির মধ্য হইতে পরার্থপরতার ব্যাপকতর স্তরে উন্নীত করে। এই শাস্ত্রের আলোচনা মানুষকে নানা বিষয়ে চিন্তাশীল করিয়া তুলে এবং মানুষ তাহার পারিপাশ্বিক সামাজিক নানা সমস্যার সমাধান করিয়া কিভাবে উন্নততর জীবন যাপন করিতে পারে, সে বিষয়ে সুনির্দিষ্ট মত গঠন করিতে শিক্ষা লাভ করে। পূর্ণ নাগরিক জীবনের অন্তরায়গুলি দূর করিয়া সুনাগরিক হইতে পারিলে মানুষে মানুষে, জাতিতে জাতিতে আর বিবাদেব অবকাশ থাকে না। সুতরাং নিছক জ্ঞান অর্জন করা ব্যতীতও এই শাস্ত্রের অহুশীলনের একটা বাস্তব উপকারিতা অনস্বীকার্য।

স্বাধীনতা লাভ করিবার পর এই শাস্ত্রের আলোচনা ভারতীয় নাগরিকগণের পক্ষে অপরিহার্য হইয়া উঠিয়াছে। সার্বজনীন ভোটাধিকার প্রবর্তনের ফলে নাগরিকগণের দায়িত্ব বহুল পরিমাণে বৃদ্ধি পাইয়াছে। সুতরাং স্বাধীন দেশের স্বাধীন নাগরিকগণের পক্ষে তাহাদের সংবিধান-প্রদত্ত অধিকার ও নাগরিক কর্তব্যগুলি সম্পর্কে সম্পূর্ণ অবহিত হইতে হইলে রাষ্ট্রবিজ্ঞানের মূল সূত্রগুলির সহিত পরিচিত হওয়া একান্ত বাঞ্ছনীয়।

রাষ্ট্রবিজ্ঞান কি বিজ্ঞান-পর্যায়ভুক্ত? (Is Political Science a Science?)

রাষ্ট্রবিজ্ঞান বিজ্ঞান-পদবাচ্য হইতে পারে কি-না এ বিষয়ে রাষ্ট্রবিজ্ঞানীদের মধ্যে পূর্বে যথেষ্ট মতভেদ ছিল। প্রসিদ্ধ ঐতিহাসিক বার্কল ও ফরাসী লেখক কঁোত প্রভৃতি এই শাস্ত্রকে বিজ্ঞানের মর্যাদা দিতে অস্বীকার করেন। তাঁহাদের মতে রাষ্ট্রবিজ্ঞানের বিষয়বস্তু এত ব্যাপক, জটিল ও

অনিশ্চয়তাপূর্ণ যে, বিজ্ঞানসম্মত পদ্ধতিতে ইহার পর্যবেক্ষণ ও পরীক্ষাকার্য সম্ভব নয়। এই শাস্ত্রের বিষয়বস্তুর পরিধি এত বিস্তৃত ও এত বিভিন্ন প্রকারের বিষয়বস্তু ইহার আলোচ্য বিষয় যে, রাসায়নিক ও জ্যোতির্বিদ্যে পদ্ধতিতে তাঁহাদের বিষয়বস্তুর বিশ্লেষণ করিয়া স্থানিষ্ঠ সিদ্ধান্তে উপনীত হইতে পারেন, রাষ্ট্রবিজ্ঞানের বিষয়বস্তু বিশ্লেষণ করিয়া সেরূপ কোন অভ্রান্ত সিদ্ধান্তে উপনীত হওয়া রাষ্ট্রবিজ্ঞানীর পক্ষে সম্ভব নয়। ইহা ছাড়া এই শাস্ত্রের কোন একটি নির্দিষ্ট অঙ্গুলীনপদ্ধতিও নাই। বিভিন্ন লেখক বিভিন্ন পদ্ধতিতে এই শাস্ত্রের আলোচনা করিয়াছেন। বিরোধীপক্ষ আরও বলেন যে, রাষ্ট্রবিজ্ঞান অন্তান্ত বিজ্ঞানশাস্ত্রের মত বাস্তব নয়। এই শাস্ত্রে অনেক অবাস্তব বা কাল্পনিক বিষয়ের আলোচনা হয়। সুতরাং এই শাস্ত্রকে বিজ্ঞান আখ্যা দেওয়া কোন মতেই সমীচীন নয়।

বর্তমান যুগে এই বিরুদ্ধ মতবাদের অবসানে রাষ্ট্রবিজ্ঞান বিজ্ঞানের মর্যাদা লাভ করিয়াছে। রাষ্ট্রবিজ্ঞানকে বিজ্ঞান বলা যাইতে পারে কি-না সে সম্বন্ধে আলোচনা করিতে গেলে প্রথমেই বিজ্ঞান কাকে বলে তাহা জানা প্রয়োজন। বিজ্ঞানের সংজ্ঞা নির্দেশ করিতে পারিলে রাষ্ট্রবিজ্ঞান প্রকৃত বিজ্ঞান কি-না নির্ণয় করা সহজ হইবে। ‘বিজ্ঞান’ শব্দটির সাধারণ অর্থ হইল বিশেষরূপ বিজ্ঞা বা জ্ঞান। এই জ্ঞান পর্যবেক্ষণ, বিশ্লেষণ ও পরীক্ষা বা গবেষণাদ্বারা আহরণ করা হয় এবং সেইজন্য এই জ্ঞানকে বিশেষ বিষয়সমূহ-সম্বন্ধে সুসংবদ্ধ জ্ঞান বলা হয়। এই সুসংবদ্ধ বা শৃঙ্খলিত জ্ঞানের বৈশিষ্ট্য হইল যে, ইহা হইতে কতকগুলি সাধারণ সূত্র বা নিয়ম সংকলন করা যায় ও সেই সংকলিত সূত্রসমূহের প্রয়োগ করিয়া বিজ্ঞানের বিষয়বস্তুর সত্যাসত্য নির্ণয় করা সম্ভব হয়। রসায়ন, পদার্থবিজ্ঞা, জ্যোতিষশাস্ত্র প্রভৃতিকে বিজ্ঞান পর্যায়ভুক্ত করা হয়, কেননা তাহাদের বিষয়বস্তুগুলির শ্রেণীবিভাগ, পর্যবেক্ষণ ও বিশ্লেষণ করিয়া শৃঙ্খলিত জ্ঞান আহরণ করা যায় এবং এইরূপে নির্ণীত জ্ঞান হইতে কতকগুলি কার্যোপযোগী সূত্রও নির্ধারণ করা সম্ভব হয়।

রাষ্ট্রবিজ্ঞানের ক্ষেত্রেও এই পদ্ধতি প্রযোজ্য। রাষ্ট্রবিজ্ঞানীও অগতী বৈজ্ঞানিকের মত তাঁহার বিষয়বস্তুর শ্রেণীবিভাগ, বিশ্লেষণ ও পরীক্ষা করিয়া রাজনৈতিক বিষয়সমূহ-সম্বন্ধে শৃঙ্খলিত জ্ঞান লাভ করিতে পারেন। মাহুষের

রাজনৈতিক আচরণ দেশ-কাল-পাত্র-ভেদে বিভিন্ন হইলেও মানুষের আচরণে মূলত কতকগুলি সামঞ্জস্য দেখা যায়। এই অন্তর্নিহিত সামঞ্জস্যকে ভিত্তি করিয়া রাষ্ট্রবিজ্ঞানী তাঁহার পরীক্ষাকার্য্য করিতে পারেন। সুতরাং রাষ্ট্র-বিজ্ঞানীর পক্ষে তাহার বিষয়বস্তুর শ্রেণীবিভাগ ও বিশ্লেষণ করা সম্ভব এবং এই শ্রেণীবিভক্ত ও পরীক্ষিত জ্ঞান হইতে সাধারণ সূত্র আবিষ্কার করিয়া বাস্তব রাজনৈতিক সমস্যার সমাধানকল্পে প্রয়োগ করাও সম্ভবপর সমস্ত বিজ্ঞানেরই কতকগুলি সাধারণ সূত্র থাকে। রাষ্ট্রবিজ্ঞানেও রাজনৈতিক সূত্র নির্ধারণ করা সম্ভব; সুতরাং রাষ্ট্রবিজ্ঞানকে বিজ্ঞান বলিয়া অভিহিত না করিবার কোন সম্ভব কারণ নাই।

অধুনা রাষ্ট্রবিজ্ঞান বিজ্ঞান বলিয়া পরিগণিত হইলেও অন্যান্য বিজ্ঞান-গুলির সহিত ইহার পার্থক্য পরিলক্ষিত হয়। এই পার্থক্যের কারণ হইল যে, শ্রেণীবিভাগ, বিশ্লেষণ ও পরীক্ষাকার্য্যে অন্যান্য বৈজ্ঞানিকের যে সুবিধা আছে রাষ্ট্রবিজ্ঞানীর সে সুবিধা নাই। বৈজ্ঞানিক তাঁহার বিষয়বস্তুকে ক্ষুদ্র অংশে বিভক্ত করিতে পারেন, তাহার সঠিক পরিমাপ জানিয়া ও তাহাকে অপরিবর্তনীয় অবস্থায় রাখিয়া তাহার স্বরূপ নির্ণয় করিতে পারেন। বৈজ্ঞানিকের গবেষণার সকল বস্তুই একই অপরিবর্তনীয় অবস্থায় থাকিলে একই রকমের ফলপ্রসূ হইবে। সুতরাং বৈজ্ঞানিক তাঁহার পর্যবেক্ষণ ও পরীক্ষাধারা যে সিদ্ধান্তে উপনীত হন, তাহা অনাস্ত ও সকল ক্ষেত্রে প্রযোজ্য। কিন্তু রাষ্ট্রবিজ্ঞানে এরূপ বিজ্ঞানসম্মত গবেষণার ক্ষেত্র স্বল্পপরিসর। যে বিষয়-বস্তু লইয়া রাষ্ট্রবিজ্ঞানী আলোচনা করেন, তাহা বহুল পরিমাণে বাহ্যিক পরিবেশের উপর নির্ভর করে। আর এই বাহ্যিক পরিবেশ এত দ্রুত পরিবর্তনশীল যে, ইহা পর্যবেক্ষণ করিয়া যে সিদ্ধান্ত করা হউক না কেন তাহা সর্বক্ষেত্রে প্রযোজ্য হয় না। রাসায়নিক যে পদ্ধতিতে অম্লজান ও উদ্‌জান মিশ্রিত করিয়া জলে পরিণত করিতে পারেন, রাষ্ট্রবিজ্ঞানী ঠিক সেই পদ্ধতিতে গণতন্ত্র বিশ্লেষণ করিয়া সর্বক্ষেত্রে প্রযোজ্য কোন সিদ্ধান্তে উপনীত হইতে পারেন না। রাসায়নিক দ্রব্যগুলির নির্দিষ্ট অবস্থায় নির্দিষ্ট কারণে একই প্রকার প্রতিক্রিয়া হয়। বাহ্যিক কোন শক্তিই তাহাদের এই প্রতিক্রিয়া-সংঘটন প্রতিরোধ করিতে পারে না। তাই তাহাদের সম্বন্ধে পর্যবেক্ষণ ও পরীক্ষাধারা যে সিদ্ধান্ত করা যায় তাহা নিরুল ও সঠিক হয়। কিন্তু রাষ্ট্র-

বিজ্ঞানী যদি মানবচরিত্রের উপর গণতন্ত্রের প্রতিক্রিয়াসম্বন্ধে কোনরূপ স্থির সিদ্ধান্ত করিবার প্রয়াস পান তাহা হইলে তাঁহার সিদ্ধান্ত নির্ভুল হইতে পারে না। তাহার কারণ, মানবচরিত্র রাসায়নিক দ্রব্যের মত অপরিবর্তনীয় বা সর্বত্র সমান নয়। অবস্থা-পরিবর্তনের সঙ্গে মানবচরিত্রেরও পরিবর্তন হয়। তবে সাধারণভাবে একথা বলা চলে যে, রাষ্ট্রবিজ্ঞানেও পরীক্ষামূলক গবেষণা সম্ভব। যখনই কোন রাষ্ট্র তাহার অস্থায়ী নীতি বা প্রচলিত শাসনব্যবস্থার পরিবর্তন করিয়া নূতন নীতি বা শাসনব্যবস্থা প্রবর্তন করে, তখনই তাহাকে পরীক্ষামূলক পদ্ধতির আশ্রয় লওয়া বলা যাইতে পারে। এই প্রকার পরিবর্তনের দ্বারাই রাষ্ট্রের অস্তিত্ব ও কার্য-কারিতা প্রমাণিত হয়। বিদ্রোহের পরবর্তী কালে ফরাসী দেশে পরপর বহু শাসনপদ্ধতি প্রচলিত হইয়া অবশেষে ১৮৭৫ খৃষ্টাব্দে নূতন শাসনতন্ত্র রচিত হয়। আদর্শ শাসনতন্ত্র গঠনের উদ্দেশ্যে সকল সভ্য দেশেই জনগণের উপর দিয়া এই পরীক্ষাকার্য চলিতেছে। কিন্তু পরীক্ষার ফল সব দেশে সমান হয় না। তাই রাষ্ট্রবিজ্ঞানকে পদার্থবিজ্ঞা, রসায়নশাস্ত্র বা জ্যোতিষ-শাস্ত্র প্রভৃতি প্রাকৃত বিজ্ঞানগোষ্ঠীর সমপর্যায়ভুক্ত করা যায় না। এইজন্ত লর্ড ব্রাইস রাষ্ট্রবিজ্ঞানকে আবহবিজ্ঞার ত্রায় অসম্পূর্ণ বিজ্ঞানের সহিত তুলনা করিয়াছেন। রাষ্ট্রবিজ্ঞান একটি সমাজবিজ্ঞান। কোন সমাজবিজ্ঞানই প্রাকৃত বিজ্ঞানগুলির মত সম্পূর্ণ নয়। মাহুষের পারিপার্শ্বিক অবস্থা ও চিন্তাধারা পরিবর্তনের সঙ্গে সঙ্গে রাষ্ট্রের পরিবর্তন চলিতেছে। তাই রাষ্ট্রবিজ্ঞানীর পক্ষে স্থির সিদ্ধান্ত করা সহজসাধ্য নয়। রাষ্ট্রবিজ্ঞান ধন-বিজ্ঞানের মতই একটি প্রগতিশীল সমাজবিজ্ঞান।

রাষ্ট্রবিজ্ঞানের অনুসন্ধান-পদ্ধতি (Methods of Political Science)

কি প্রণালীতে রাষ্ট্রবিজ্ঞানের বিষয়বস্তুকে বিশ্লেষণ করিলে আমরা সঠিক সিদ্ধান্তে উপনীত হইতে পারি তাহাই আমাদের আলোচ্য বিষয়। রাষ্ট্র-বিজ্ঞানের একাধিক অনুসন্ধান-পদ্ধতি আছে। ঊনবিংশ শতাব্দীর প্রথম ভাগ পর্যন্ত রাষ্ট্রবিজ্ঞানের আলোচনা বিজ্ঞানসম্মত পদ্ধতিতে হয় নাই। তাহার কারণ তখন পর্যন্ত এই শাস্ত্র বিজ্ঞান বলিয়া স্বীকৃতি লাভ করে নাই। বর্তমানে ইহা বিজ্ঞান বলিয়া স্বীকৃত হইয়াছে ও ইহার আলোচনা বর্তমানে

নানারূপ বৈজ্ঞানিক পদ্ধতিতে পরিচালিত হয়। রাষ্ট্রবিজ্ঞানের অমুশীলন প্রধানতঃ নিম্নলিখিত পদ্ধতিগুলির দ্বারা পরিচালিত হয় :—

(ক) পরীক্ষামূলক পদ্ধতি (Experimental Method)

এই পদ্ধতিতে সাধারণতঃ বৈজ্ঞানিক গবেষণা পরিচালিত হয়। রাষ্ট্র-বিজ্ঞান কি বিজ্ঞান-পর্যায়ভুক্ত এই আলোচনা করিতে গিয়া আমরা পূর্বেই দেখিয়াছি যে, পরীক্ষাকারে বৈজ্ঞানিকের যে সুবিধা আছে রাষ্ট্রবিজ্ঞানীর সে সুবিধা নাই। বৈজ্ঞানিক অনেক কিছুর সঠিক পরিমাপ করিয়া নিভুল সিদ্ধান্ত করিতে পারেন, কিন্তু রাষ্ট্রবিজ্ঞানীর পক্ষে রাজনৈতিক ঘটনার সঠিক পরিমাপ করিয়া বৈজ্ঞানিক সূত্র প্রতিষ্ঠা করা সম্ভব নয়। রাষ্ট্রবিজ্ঞানের বিষয়বস্তু ব্যাপক, জটিল ও দ্রুত পরিবর্তনশীল বলিয়া প্রাকৃত বিজ্ঞানসমূহের মত ইহার অনুসন্ধানকার্য সম্পূর্ণভাবে বিজ্ঞানসম্মত পদ্ধতিতে পরিচালিত হইতে পারে না। তবে একথা সত্য যে, রাষ্ট্রবিজ্ঞানিগণ ইহার অমুশীলনে অধিকাংশ ক্ষেত্রে বৈজ্ঞানিক পদ্ধতি অবলম্বন করেন।

(খ) পর্যবেক্ষণমূলক পদ্ধতি (Observational Method)

এই পদ্ধতির সারমর্ম হইল যে, মানুষের স্বভাবের মূল প্রবণতাগুলি সর্বত্রই সমান। কিন্তু অবস্থাভেদে মানুষের রাজনৈতিক প্রকৃতি ও কার্যাবলী ভিন্ন-রূপে প্রকাশ পায়। এই কথা স্মরণ রাখিয়া রাষ্ট্রবিজ্ঞানের অমুশীলন করিতে হইবে। এই পদ্ধতি অনুসারে রাষ্ট্রবিজ্ঞানীর প্রধান কার্য হইল বহু রাষ্ট্রের সহিত তাঁহার পরিচয় করা। প্রত্যেক রাষ্ট্র কর্তৃক তাহার অনুমত নীতি ও কার্যপ্রণালী বিশেষভাবে লক্ষ্য করা প্রয়োজন। এজন্য রাষ্ট্রবিজ্ঞানীর অন্তর্দৃষ্টি ও বিশ্লেষণ করিবার শক্তি থাকা দরকার। রাষ্ট্রের শুধু বাহ্যিক বৈশিষ্ট্য দেখিয়া কোনরূপ সিদ্ধান্ত করা সমীচীন নয়। অনেকগুলি রাষ্ট্রের আভ্যন্তরীণ বিধিব্যবস্থা দেখিয়া রাষ্ট্রবিজ্ঞানীকে তাঁহার অন্তর্দৃষ্টি ও বিচারবুদ্ধির দ্বারা সেগুলির পরীক্ষা করিতে হইবে। এইরূপ সূক্ষ্ম পর্যবেক্ষণ ও নিভুল বিশ্লেষণ-দ্বারা রাষ্ট্রবিজ্ঞানের মূল সূত্রগুলির সন্ধান মিলিবে। সেই মূলসূত্রগুলির ভিত্তিতে রাষ্ট্রকে রূপায়িত করিতে পারিলে রাষ্ট্রবিজ্ঞানের আলোচনা সার্থক হইবে।

(গ) ঐতিহাসিক পদ্ধতি (Historical Method)

এই পদ্ধতিকে তুলনামূলক পদ্ধতির প্রকারভেদ বলা যাইতে পারে। রাষ্ট্র-বিজ্ঞান ও ইতিহাস অঙ্গাঙ্গিভাবে জড়িত। ইতিহাসই হইল রাষ্ট্রবিজ্ঞানের গোড়াপত্তন। ঐতিহাসিক দৃষ্টিভঙ্গী ব্যতীত রাষ্ট্রবিজ্ঞানের আলোচনা হইতে পারে না। বর্তমান যুগে যে সমস্ত রাজনৈতিক মতবাদ বা রাজনৈতিক প্রতিষ্ঠান প্রচলিত আছে সেগুলি মানুষের বহু অভিজ্ঞতার ফল। উদাহরণ-স্বরূপ বলা যাইতে পারে যে, রাষ্ট্রের উৎপত্তিসম্বন্ধে যে সমস্ত মতবাদ প্রচলিত আছে সেগুলি বিভিন্ন পারিপার্শ্বিক অবস্থায় মানুষের রাজনৈতিক প্রয়োজনের তাগিদে আবিস্কৃত হইয়াছিল। সেই সমস্ত মতবাদের যথাযথ তাৎপর্য বুঝিতে হইলে সেই সময়কার সামাজিক, অর্থনৈতিক ও ধর্মসম্বন্ধীয় পরিবেশ সম্বন্ধে জ্ঞান থাকা প্রয়োজন। সে জ্ঞান-আহরণ ইতিহাস ব্যতিরেকে হয় না। রাজনৈতিক মতবাদ ও রাজনৈতিক প্রতিষ্ঠান কিরূপে বিবর্তনের মধ্য দিয়া ধীরে ধীরে প্রগতির পথে অগ্রসর হইতেছে, রাষ্ট্রবিজ্ঞানী ঐতিহাসিক অনুসন্ধিৎসা লইয়া বিশ্লেষণ না করিলে তাহা জানা সম্ভব নয়। রাজনৈতিক চেতনাসম্পন্ন মানুষ প্রগতির পথে, না অবনতির পথে—তাহা নির্ণয় করিবার একমাত্র উপায় হইল রাষ্ট্রবিজ্ঞানের ঐতিহাসিক মতে বিশ্লেষণ। কিন্তু এই বিশ্লেষণ-কার্য নিরপেক্ষভাবে করিতে হইবে। কোন কারণেই কোন ঐতিহাসিক ব্যক্তি, প্রতিষ্ঠান বা মতবাদের প্রতি ব্যক্তিগত সহানুভূতি বা বিরুদ্ধ ভাবের বশবর্তী হইয়া সমালোচনা করা হইলে রাজনৈতিক সূত্রগুলি নিভূল হইতে পারে না। ব্যক্তিগত ধারণার উর্ধ্বে উঠিয়া তাহাদের নিজস্ব গুণাগুণ নিরপেক্ষভাবে বিচার করিতে হইবে। তাহা হইলে পদ্ধতিটি সমধিক কার্যকর হইবে।

(ঘ) তুলনামূলক পদ্ধতি (Comparative Method)

অ্যারিস্টটল, মনটেস্কু, লর্ড ব্রাইস প্রভৃতি প্রসিদ্ধ রাষ্ট্রবিজ্ঞানীরা এই পদ্ধতিতে রাষ্ট্রবিজ্ঞানের বিশ্লেষণ করিয়াছেন। এই পদ্ধতিতে অতীত যুগের ও বর্তমানকালের রাষ্ট্রগুলির বৈশিষ্ট্য বিশ্লেষণ করিয়া তাহাদের তুলনামূলক বিচার করা হয়। এই পদ্ধতির সুবিধা হইল যে, পাশাপাশি একসঙ্গে অনেকগুলি রাষ্ট্রের দোষ-গুণ নির্ণয় করিতে পারিলে প্রত্যেক রাষ্ট্রের উৎকৃষ্টতর বৈশিষ্ট্যগুলির সমন্বয়ে এক আদর্শ রাষ্ট্রের পরিকল্পনা করা সহজ

হয়। অ্যারিস্টটল তাঁহার আদর্শ রাষ্ট্রের চিত্র অঙ্কন করিবার নিমিত্ত অতীত যুগের বহু রাষ্ট্রের ও তাঁহার সমসাময়িক অনেকগুলি রাষ্ট্রের তুলনামূলক বিশ্লেষণ করিয়াছিলেন। তুলনামূলক পদ্ধতি প্রয়োগ করিয়া নিতুল সিদ্ধান্তে উপনীত হইতে হইলে রাষ্ট্রবিজ্ঞানীর পক্ষে সতর্কতার প্রয়োজন। যে সমস্ত বিষয়ের মধ্যে কোন তুলনা চলে না, সেগুলিকে বর্জন করিয়া শুধু তুলনীয় বিষয়গুলির আলোচনা করিলে স্থির সিদ্ধান্তে উপনীত হওয়া যায়।

(৬) আইনমূলক পদ্ধতি (Juridical Method)

ফরাসী ও বিশেষ করিয়া জার্মান লেখকগণ এই দৃষ্টিভঙ্গী লইয়া রাষ্ট্র-বিজ্ঞানের আলোচনা করিয়াছেন। তাঁহাদের মতে রাষ্ট্র একটি আইনমূলক ব্যক্তি বা প্রতিষ্ঠান মাত্র এবং ইহার প্রধান কার্য হইল আইন প্রণয়ন করা ও আইন বলবৎ করা। এই পদ্ধতি অনুসারে রাষ্ট্রকে সামাজিক বা রাজনৈতিক প্রতিষ্ঠান হিসাবে বিবেচনা করা হয় না। এই পদ্ধতির প্রধান ত্রুটি হইল যে, রাষ্ট্রের উৎপত্তি ও ক্রমবিকাশে আইনের সীমাবহিত্ব কখন সামাজিক প্রভাবের কার্যকারিতা এই পদ্ধতির সমর্থকগণ অস্বীকার করেন। রাষ্ট্র একটি বহু জটিল সমস্তাপূর্ণ প্রতিষ্ঠান। শুধু আইনজীবীর দৃষ্টিভঙ্গী লইয়া এই প্রতিষ্ঠানের সম্যক পরিচয় পাওয়া যাইতে পারে না।

(৭) জীববিজ্ঞানমূলক পদ্ধতি (Biological Method)

এই পদ্ধতি অনুসারে রাষ্ট্রকে একটি জীবদেহের সহিত তুলনা করা হয়। রাষ্ট্রের উৎপত্তি, ক্রমবিকাশ ও গঠনের সহিত জীবদেহের সাদৃশ্য বর্ণনা করিয়া রাষ্ট্রের ক্রমবিকাশ বিবর্তনবাদ অনুসারে ব্যাখ্যা করা হয়। রাষ্ট্রের সহিত জীবদেহের কোন কোন বিষয়ে সাদৃশ্য থাকিতে পারে, কিন্তু শুধু বাহ্য সাদৃশ্যের দ্বারা রাজনৈতিক জীবনে সম্পূর্ণ ব্যাখ্যা করা চলে না। অনেক সময় এই বাহ্য সাদৃশ্য ভ্রান্ত মতবাদ সৃষ্টির সহায়তা করিয়াছে।

(৮) সমাজবিজ্ঞানমূলক পদ্ধতি (Sociological Method)

এই পদ্ধতি অনুসারে রাষ্ট্রকে একটি সমাজদেহ বলিয়া কল্পনা করা হয়। সমাজদেহ গঠিত হয় নাগরিকগণের সমবায়ে ও নাগরিকগণ এই সমাজদেহের অংশ। এই অংশগুলির গুণাগুণের উপর সম্পূর্ণ দেহের অর্থাৎ রাষ্ট্রের গুণাগুণ

নির্ভর করে। এই পদ্ধতিও জীববিজ্ঞানমূলক পদ্ধতির ন্যায় বিবর্তনবাদ অনুসারে রাষ্ট্রের ক্রমবিকাশের ব্যাখ্যা করে।

(জ) মনোবিজ্ঞানমূলক পদ্ধতি (Psychological Method)

মনোবিজ্ঞানের বিশেষ বিশেষ সূত্রের সহায়তায় অনেক সময় রাজনৈতিক ঘটনার ব্যাখ্যা করা হইয়া থাকে। মনোবিজ্ঞান মানুষের কাজের পিছনে যে উদ্দেশ্য থাকে তাহা বিশ্লেষণ করিতে চেষ্টা করে। সংঘবদ্ধভাবে মানুষের রাজনৈতিক কার্যকলাপ কিভাবে প্রভাবান্বিত হয় তাহা মনোবিজ্ঞানের সূত্রগুলি প্রয়োগ করিয়া জ্ঞাত হওয়া যায়। কি কারণে বিভিন্ন রাজনৈতিক দল ও উপদল সৃষ্ট হয়, কি কারণে রাষ্ট্রের মধ্যে গৃহযুদ্ধ ও আন্তর্জাতিক যুদ্ধ বাধে, এগুলি মনোবিজ্ঞানমূলক পদ্ধতির দ্বারা বিশ্লেষণ করা সম্ভব হয়।

উপরি-উক্ত তিনটি পদ্ধতির কোনটিকেই রাষ্ট্রবিজ্ঞানের অনুসন্ধান-পদ্ধতি বলিয়া আখ্যা দেওয়া চলে না। জীববিজ্ঞান, সমাজবিজ্ঞান ও মনোবিজ্ঞান-মূলক পদ্ধতিগুলি রাষ্ট্রকে শুধু একটি বিশেষ দিক হইতে ব্যাখ্যা করিবার প্রয়াস পাইয়াছে। সুতরাং এগুলিকে পদ্ধতি না বলিয়া বিশেষ দৃষ্টিভঙ্গী বলিলে অধিক সমীচীন হইবে।

(ঝ) দর্শনমূলক পদ্ধতি (Philosophical Method)

ক্লেশা, মিল্, সিজ্‌উইক প্রভৃতি লেখকগণ এই পদ্ধতির সমর্থক। এই পদ্ধতি অনুসারে প্রথমে মানবপ্রকৃতি-সম্বন্ধে একটি মনঃকল্পিত ধারণা করা হয় এবং সেই ধারণার ভিত্তিতে রাষ্ট্রের প্রকৃতি, উদ্দেশ্য, কর্তব্য ও রাষ্ট্রের ভবিষ্যৎ সম্বন্ধে কতকগুলি নীতি স্থিরীকৃত হয়। এই নির্ধারিত নীতিগুলির সহিত রাজনৈতিক জীবনের ঘটনাগুলির সামঞ্জস্য বিধান করিবার চেষ্টা চলে।

এই পদ্ধতির প্রয়োগ অনেক সময় ভ্রান্ত ও বিপজ্জনক মতবাদের সৃষ্টি করিয়াছে। এই পদ্ধতি অনুসরণ করিতে গিয়া ইহার সমর্থকগণ অনেক সময় রাজনৈতিক জীবনের বাস্তব সত্য উপেক্ষা করিয়া কল্পনার আশ্রয় গ্রহণ করিয়াছেন।

রাষ্ট্রবিজ্ঞানের অনুসন্ধান-পদ্ধতিগুলি আলোচনা করিয়া দেখা যায় যে, ইহার কোন-একটি বিশেষ পদ্ধতি এককভাবে রাষ্ট্রবিজ্ঞানের অনুসন্ধান-পদ্ধতি বলিয়া বিবেচিত হইতে পারে না। কোন পদ্ধতিই স্বয়ংসম্পূর্ণ নহে। সঠিক

অনুসন্ধান-পদ্ধতি নির্ণয় করিতে গেলে বিশেষ কতকগুলি পদ্ধতির, যথা ঐতিহাসিক পদ্ধতি, তুলনামূলক পদ্ধতি, দর্শনমূলক পদ্ধতি, পর্যবেক্ষণমূলক পদ্ধতি প্রভৃতির সমন্বয় সাধন করিয়া রাষ্ট্রবিজ্ঞানের অনুসন্ধানকার্য পরিচালিত করা উচিত। তবেই রাষ্ট্রবিজ্ঞানের মূলসূত্রগুলির সন্ধান মিলিবে ও সেই সূত্রগুলির সাহায্যে স্থির সিদ্ধান্তে উপনীত হওয়া সম্ভব হইবে।

রাষ্ট্রবিজ্ঞানের সহিত অন্যান্য বিজ্ঞানের সম্বন্ধবিচার

Relation of Political Science to other Sciences

বিজ্ঞানবিষয়ক শাস্ত্রগুলিকে সাধারণতঃ দুই ভাগে ভাগ করা হয়, যথা, (ক) প্রাকৃতিক বিজ্ঞান (Natural Sciences) ও (২) মানবীয় বিজ্ঞান (Human or Social Sciences)। আদিম যুগ হইতে আরম্ভ করিয়া বর্তমান যুগ পর্যন্ত মানুষ প্রাকৃতিক ও মানবীয় জগৎ সম্বন্ধে নানারূপ তথ্য আহরণ করিয়াছে। যুক্তির ভিত্তিতে এই তথ্যগুলিকে সুসংবদ্ধভাবে সজ্জিত করিয়া মানুষ নানা বিজ্ঞান সৃষ্টি করিয়াছে। প্রাকৃতিক শক্তিগুলি ও পারিপার্শ্বিক অবস্থা পর্যবেক্ষণ ও পরীক্ষা করিয়া মানুষ প্রাকৃতিক শক্তিগুলি সম্বন্ধে যে তথ্যগুলির অধিকারী হইয়াছে, সেই তথ্যগুলির ভিত্তিতেই পদার্থ-বিদ্যা, রসায়ন, উদ্ভিদ-বিদ্যা, ভূগোল প্রভৃতি প্রাকৃতিক বিজ্ঞান গঠিত হইয়াছে। আর, জীবজগৎ ও মানবসমাজ সম্বন্ধে মানুষ যে তথ্যগুলি আহরণ করিতে সমর্থ হইয়াছে, সেই তথ্যগুলির সুসংবদ্ধ ও যুক্তিসম্মত প্রকাশ হইল মানবীয় বিজ্ঞান। সমাজবিজ্ঞান, রাষ্ট্রবিজ্ঞান, ইতিহাস, ধনবিজ্ঞান প্রভৃতি মানবীয় বিজ্ঞান পর্যায়ভুক্ত। উপরি-উক্ত বিভিন্ন বিজ্ঞান-বিষয়ক শাস্ত্রগুলির বিষয়বস্তুর মধ্যে পার্থক্য থাকিলেও এই শাস্ত্রগুলি কোন-না-কোন দিক দিয়া পরস্পর সম্পর্কযুক্ত। রাষ্ট্রবিজ্ঞান একটি মানবীয় বিজ্ঞান—সুতরাং এখানে রাষ্ট্রবিজ্ঞানের সহিত অপরাপর মানবীয় বিজ্ঞান-গুলির সম্পর্কে বিচার করা প্রয়োজন।

রাষ্ট্রবিজ্ঞান ও সমাজবিজ্ঞান (Relation to Sociology)

মানুষ সমাজবদ্ধ জীব। মানুষের সামাজিক জীবন বিশ্লেষণ করাই হইল সমাজবিজ্ঞানের বিষয়বস্তু। মানুষকে লইয়া আলোচনা শুধু রাষ্ট্রবিজ্ঞানে হয় না, আরও অনেক বিজ্ঞান আছে যেগুলি মানবজীবনের কোন-না-কোন দিক

লইয়া আলোচনা করে। এই দিক দিয়া দেখিতে গেলে সকল মানবীয় বিজ্ঞানই পরস্পর সম্পর্কযুক্ত। এই মানবীয় বিজ্ঞানগুলির কোন একটি পৃথকভাবে আলোচিত হইতে পারে না। সমাজবিজ্ঞানে মানুষের সামাজিক জীবনের সকল রকম অবস্থার আলোচনা হয়। এই বিজ্ঞানের পরিধি বহুদূর বিস্তৃত। মানুষের সম্পূর্ণ পরিচয় জানিতে হইলে আমাদের সমাজবিজ্ঞানের সাহায্য লইতে হয়। পরিবার, গোষ্ঠী, জাতি, রাষ্ট্র প্রভৃতি সমাজের ক্ষুদ্র-বৃহৎ প্রতিষ্ঠান মানবজাতির আচার, ব্যবহার, রীতি, নীতি প্রভৃতি জীবনযাত্রার প্রণালী—সর্ব বিষয়ের আলোচনা হয় এই সমাজবিজ্ঞানে। এই কারণে সমাজ-বিজ্ঞানকে মানবীয় বিজ্ঞানগুলির মধ্যে মৌলিক বিজ্ঞান বলা যাইতে পারে।

রাষ্ট্রবিজ্ঞানে আলোচিত হয় সামাজিক মানুষের শুধু একটা দিক। রাষ্ট্রকে কেন্দ্র করিয়া মানবজীবনের যে দিকটা আলোচিত হয় তাহাই হইল রাষ্ট্রবিজ্ঞানের প্রধান বিষয়বস্তু। মানুষের রাজনৈতিক কার্যকলাপগুলি মাত্র আলোচিত হয় রাষ্ট্রবিজ্ঞানে, কিন্তু সমাজবিজ্ঞানে মানুষের রাজনৈতিক কার্য-কলাপ ছাড়া আরও অনেক কিছু আলোচিত হয়। রাষ্ট্রবিজ্ঞানের প্রধান বিষয়বস্তু হইল নাগরিক জীবনের অধিকার ও কর্তব্য। কিন্তু এই অধিকার ও কর্তব্যবোধ-সম্বন্ধে মানুষ সামাজিক জীব হিসাবে সচেতন থাকে। রাষ্ট্র সমাজের অন্তর্ভুক্ত একটি প্রতিষ্ঠান মাত্র। রাষ্ট্রজন্মের বহু পূর্বেই সমাজ গড়িয়া উঠিয়াছে এবং মানুষের জন্ম, মৃত্যু ও বিবাহসম্বন্ধে যে-সমস্ত দেশগত আচার ও পদ্ধতি প্রচলিত আছে তাহা রাষ্ট্রকর্তৃক সৃষ্ট হয় নাই। সুতরাং সমাজ রাষ্ট্র অপেক্ষা বৃহত্তর ও অধিক ব্যাপকভাবে মানবজীবনকে নিয়ন্ত্রিত করে। রাষ্ট্রবিজ্ঞানের উপাদান সমাজবিজ্ঞান হইতে আহরণ করিতে হয়। রাষ্ট্রবিজ্ঞানী সমাজবিজ্ঞানী না হইলে রাষ্ট্রসম্বন্ধে তাঁহার নিভুল ধারণা হইতে পারে না। বর্তমান যুগে যদিও রাষ্ট্রবিজ্ঞানের বিষয়বস্তু এত ব্যাপক হইয়াছে যে, সমাজবিজ্ঞানের অংশ হিসাবে আর ইহার আলোচনা সম্ভবপর নয়; তথাপি একথা সত্য যে, রাষ্ট্রবিজ্ঞান সমাজবিজ্ঞানের একটি বিশেষীকৃত শাখা। মানুষ রাজনৈতিক চেতনাসম্পন্ন হইবার বহু পূর্বেই সমাজ গঠন করিয়া সমাজসম্বন্ধে সচেতন হইয়াছিল, সুতরাং সমাজবিজ্ঞানের বিষয়বস্তুর আলোচনা শুরু হয় সমাজজীবনের গোড়াপত্তন হইতে। আর রাষ্ট্রবিজ্ঞানের আলোচনা আরম্ভ হয় রাজনৈতিক জীবনের সূত্রপাত হইতে।

রাষ্ট্রবিজ্ঞান ও ইতিহাস (Relation to History)

রাষ্ট্রবিজ্ঞান ইতিহাসের সহিত ঘনিষ্ঠভাবে সম্পর্কযুক্ত। শ্রর জন সিলি ইতিহাস ও রাষ্ট্রবিজ্ঞানের সম্বন্ধ অতি বিশদভাবে ব্যাখ্যা করিয়াছেন। তাঁহার মতে ইতিহাস হইল রাজনীতির মূল এবং রাজনীতিই হইল ইতিহাসের পরিণতি।

“Politics without History has not root

History without Politics has no fruit.”

একটু প্রাণধানপূর্বক দেখিলেই এই উক্তির সত্যতা সম্বন্ধে সন্দেহের অবকাশ থাকে না। ইতিহাসে আলোচিত হয় মানবসমাজের ক্রমবিকাশ ও মানব-সভ্যতার বহুমুখী কাহিনী। রাষ্ট্র মানবসমাজের একটি প্রতিষ্ঠান যাহা যুগ-যুগান্তর ধরিয়া গড়িয়া উঠিয়াছে। সুতরাং সামাজিক প্রতিষ্ঠান হিসাবে রাষ্ট্রের ক্রমবিবর্তনের কাহিনী ইতিহাসপাঠে জানা যায়। মানুষের রাজনৈতিক জীবনের পরিচয় ইতিহাস হইতে সংগ্রহ করিতে হয়। বস্তুত রাষ্ট্রবিজ্ঞান ইতিহাসের নিকট অতিমাত্রায় ঋণী। ইতিহাসে মানবসমাজের রাজনৈতিক অভিজ্ঞতার কাহিনী লিপিবদ্ধ আছে। সেই অভিজ্ঞতার ভিত্তিতে আমাদের ভবিষ্যতের আদর্শ রাষ্ট্র গঠন করিয়া তুলিতে হইবে। সুতরাং ইতিহাসের সাহায্য ব্যতীত রাজনৈতিক জীবনের মঙ্গলময় পরিণতি হইতে পারে না। তাই বলিয়া আমরা যদি মনে করি যে, ইতিহাসে শুধু রাজনীতিরই আলোচনা হয়, তাহা হইলে মারাত্মক ভুল হইবে। ইতিহাস শুধু রাজনীতিরই ইতিহাস নয়। মানবসভ্যতার সবদিকই আলোচিত হয় এই ইতিহাসে। তাহার সামাজিক, রাজনৈতিক, আর্থিক, নৈতিক, কৃষ্টিগত সব কিছুই কাহিনী ইতিহাসের বিষয়বস্তু। রাষ্ট্রবিজ্ঞানী ইতিহাস হইতে শুধু সেই সকল তথ্য আহরণ করেন যে-তথ্যগুলি রাজনৈতিক জীবন-সংগঠনে সহায়তা করে। ধর্মের ইতিহাস বা চারুকলায় ইতিহাসে রাষ্ট্রবিজ্ঞানীর কোন প্রয়োজন হয় না।

ইতিহাসেব সমগ্র বিষয়বস্তু যেমন রাষ্ট্রবিজ্ঞানীর অঙ্গসন্ধানের ক্ষেত্র নহে, সেইরূপ রাষ্ট্রবিজ্ঞানের সমস্ত বিষয়বস্তুই ঐতিহাসিক তথ্যের ভিত্তিতে নির্ধারিত হয় নাই। রাষ্ট্রবিজ্ঞানে এমন অনেক অংশ আছে যেগুলির সহিত ইতিহাসের প্রত্যক্ষ সম্বন্ধ খুঁজিয়া পাওয়া যায় না। রাষ্ট্রের প্রকৃতিনির্ণয় বা রাষ্ট্রকর্তব্য সম্বন্ধে এমন অনেক মতবাদ আছে যাহা সম্পূর্ণ কল্পনাপ্রসূত।

ও দার্শনিক ভবের উপর প্রতিষ্ঠিত। এই সমস্ত মতবাদের কোন ঐতিহাসিক ভিত্তি নাই। গার্গার বলেন যে, ঠিকভাবে ইতিহাসের আলোচনা করিতে গেলে রাষ্ট্রনৈতিক পরিপ্রেক্ষিতে ইতিহাসের আলোচনা করা প্রয়োজন। আর ঠিকভাবে রাষ্ট্রবিজ্ঞানের আলোচনা করিতে গেলে ঐতিহাসিক ঘটনার পরিপ্রেক্ষিতে রাষ্ট্রবিজ্ঞানের আলোচনা করা প্রয়োজন।

রাষ্ট্রবিজ্ঞান ও ধনবিজ্ঞান (Relation to Economics)

গ্রীক দার্শনিকগণ হইতে আরম্ভ করিয়া অষ্টাদশ শতাব্দী পর্যন্ত অনেক লেখক ধনবিজ্ঞানকে একটি পৃথক্ শাস্ত্র বলিয়া গণ্য করিতেন না। তাঁহাদের মতে ধনবিজ্ঞান রাষ্ট্রবিজ্ঞানের একটি অংশ বলিয়া বিবেচিত হইত। তাঁহাদের মতে ধনবিজ্ঞানের প্রধান আলোচ্য বিষয়বস্তু হইল রাষ্ট্রের কার্য পরিচালনা করিবার জন্ত প্রভূত পরিমাণে অর্থ আহরণ করা। ধনবিজ্ঞানের এইরূপ সংকীর্ণ সংজ্ঞা নির্দেশের কারণও ছিল। আভ্যন্তরীণ শান্তি-শৃঙ্খলা রক্ষা করা এবং বৈদেশিক আক্রমণ প্রতিহত করাই রাষ্ট্রের প্রথম ও প্রধান কর্তব্য বলিয়া মনে করা হইত। এই কারণে রাষ্ট্রকে প্রভূত ক্ষমতামূলক করিয়া সমস্ত শক্তির আধার করিয়া গড়িয়া তোলা হইত। সেইজন্যই ধনবিজ্ঞানকে রাষ্ট্রের অর্থনৈতিক ব্যবস্থা বলিয়া অভিহিত করা হইত। এই ব্যবস্থার মূল উদ্দেশ্য ছিল রাষ্ট্রের আয় প্রভূত পরিমাণে বৃদ্ধি করিয়া রাষ্ট্রকে অসীম শক্তিশালী করিয়া গঠন করা।

বর্তমান যুগে ধনবিজ্ঞানের বিষয়বস্তুর পরিধি অনেক ব্যাপক হইয়াছে। বর্তমানে ধনবিজ্ঞান শুধু রাষ্ট্রের জন্ত অর্থসংগ্রহ লইয়া আলোচনা করে না; জনসমষ্টির কল্যাণের জন্ত অর্থের ব্যবহার কিভাবে হওয়া উচিত সমগ্রভাবে তাহার আলোচনা করে। তাই বর্তমান যুগে ধনবিজ্ঞানের বিষয়বস্তু হইল ধনের উৎপাদন, বিনিময়, বণ্টন ও ভোগসম্বন্ধে মানুষের যাবতীয় কাজকর্ম। মানুষ সংঘবদ্ধ প্রচেষ্টায় কিভাবে ধন উৎপাদন করে ও উৎপাদিত ধন বিনিময়ের দ্বারা অর্থে রূপান্তরিত করিয়া অর্থের মাধ্যমে নিজস্ব পারিশ্রমিক নির্ধারিত করিয়া কিভাবে তাহার অভাবমোচন করে ইহাই হইল ধনবিজ্ঞানের আলোচ্য বিষয়বস্তু। ধনের উৎপাদন, বিনিময়, বণ্টন ও ভোগব্যবস্থা বর্তমানে এত বিরাট আকার ও জটিল রূপ ধারণ করিয়াছে যে,

এই শাস্ত্রের সম্যক অন্বেষণের জন্ত রাষ্ট্রবিজ্ঞানের আলোচনার ক্ষেত্র হইতে ইহার বিষয়বস্তুর সম্পূর্ণ পৃথকীকরণ অনিবার্য হইয়া উঠিয়াছে। তাই বর্তমানে ধনবিজ্ঞান একটি সম্পূর্ণ পৃথক শাস্ত্ররূপে পরিগণিত হয়।

কিন্তু স্মরণ রাখিতে হইবে যে, যদিও রাষ্ট্রবিজ্ঞান ও ধনবিজ্ঞানের আলোচনা-ক্ষেত্র পৃথক্ তথাপি উভয় শাস্ত্র ঘনিষ্ঠভাবে সম্পর্কযুক্ত। উভয় শাস্ত্রেরই উদ্দেশ্য এক—সমাজের হিতসাধন করা। বেকার-সমস্যার দূরীকরণ, দারিদ্র্য-সমস্যার সমাধান ও কৃষি, শিল্প, ব্যবসায়-বাণিজ্যের উন্নতি সাধন করিয়া দেশে যথেষ্ট ধনাগমের ব্যবস্থা করা এবং তদ্বারা রাষ্ট্রের অর্থনৈতিক মান উন্নয়ন করা ধনবিজ্ঞানের মূল উদ্দেশ্য। ধনবিজ্ঞানের সম্পর্কহীন রাষ্ট্রবিজ্ঞান কোন সফল দিতে পারে না। দেশের শান্তি, শৃঙ্খলা, এমন কি রাষ্ট্রের হায়িস্র বহুল পরিমাণে অর্থনৈতিক অবস্থার উপর নির্ভর করে। অপরপক্ষে দেশের অর্থনৈতিক অবস্থা—ইহার ধনোৎপাদন, বিনিময় ও বণ্টনব্যবস্থা বর্তমান যুগে রাষ্ট্রদ্বারা নির্ধারিত হয়। বহু অর্থনৈতিক সমস্যার সমাধান রাষ্ট্র ব্যতীত কোনব্যক্তি বিশেষ বা কোন প্রতিষ্ঠান করিতে পারে না। বর্তমান যুগে রাষ্ট্র অর্থনৈতিক সমস্যার সমাধান করিবার নিমিত্ত বহু জনহিতকর কার্য স্বহস্তে গ্রহণ করিয়াছে। সমাজতত্ত্ববাদীদের মতে রাষ্ট্র হইল ধনোৎপাদন ও বণ্টনব্যবস্থার একমাত্র নিয়ামক। অধুনা বহু রাষ্ট্র অর্থনৈতিক পরিকল্পনা প্রবর্তিত করিয়া রাষ্ট্রের অর্থনৈতিক কাঠামো সমগ্রভাবে নিয়ন্ত্রিত করিতেছে।

রাষ্ট্রবিজ্ঞানের সহিত ধনবিজ্ঞানের এই ঘনিষ্ঠ সম্পর্কের কারণ হইল যে, বর্তমান রাষ্ট্র জনগণের সদিচ্ছা ও সহযোগিতার উপর প্রতিষ্ঠিত; অধু ক্ষমতার উপর প্রতিষ্ঠিত নহে। তাই বর্তমান রাষ্ট্রকে কল্যাণরাষ্ট্র বলা হয়। এই কল্যাণরাষ্ট্র জনগণের সর্বাঙ্গীণ উন্নতিসাধনের জন্ত সমাজের অর্থনৈতিক কাঠামো নিয়ন্ত্রিত করে। এই রাষ্ট্রনিয়ন্ত্রণের অবর্তমানে মানুষের অর্থনৈতিক জীবনে বিশেষ করিয়া ধনোৎপাদন ও বণ্টনব্যবস্থায় বিপর্যয় ঘটিত। আইনের দ্বারা রাষ্ট্র যেরূপ মানুষের সামাজিক জীবনের পারস্পরিক সম্পর্ক নির্ধারণ করিয়া দেয়, সেইরূপ আইনের দ্বারা রাষ্ট্র মানুষের পরস্পরের সহিত অর্থনৈতিক সম্বন্ধ নির্ধারণ করিয়া সমাজের ভিত্তি সুদৃঢ় করিতে সহায়তা করে। সুতরাং রাষ্ট্রবিজ্ঞান ও ধনবিজ্ঞানের আলোচনার সম্পূর্ণ পৃথকীকরণ সম্ভবপর নয়।

রাষ্ট্রবিজ্ঞান ও নৃতত্ত্ব (Relation to Anthropology)

রাষ্ট্রবিজ্ঞান একটি মানবীয় বিজ্ঞান, সুতরাং নৃতত্ত্বের সহিত এই শাস্ত্রের নিকট সম্পর্ক বিদ্যমান। অধুনা নৃতত্ত্ব সম্বন্ধে গুরুত্বপূর্ণ গবেষণার ফলে এরূপ তথ্য আবিস্কৃত হইয়াছে যাহা রাষ্ট্রের উৎপত্তি, আদিম মানব সমাজের নানাবিধ সংগঠন ও জাতিতত্ত্বের উপর আলোক সম্পাত করিয়াছে। জেকর্ক, মরগ্যান প্রভৃতি রাষ্ট্রবিজ্ঞানিগণ নৃতত্ত্ব হইতে বহু তথ্য আহরণ করিয়া সেই তথ্যের ভিত্তিতে রাষ্ট্রের উৎপত্তি বিচার করিয়াছেন। রাষ্ট্রের উৎপত্তি সম্পর্কে পিতৃতান্ত্রিক ও মাতৃতান্ত্রিক মতবাদ দুইটি নৃতত্ত্ব ও রাষ্ট্রবিজ্ঞানের নিকট সম্পর্কের নিদর্শন বলা যাইতে পারে। রাষ্ট্রীয় আইনের উৎপত্তি বিচার করিতে গেলেও দেখা যায় যে, প্রাচীন মানব সমাজে প্রচলিত নিয়ম-কানুন, প্রথা, আচার, বিধিনিষেধগুলির দ্বারা বর্তমান যুগের রাষ্ট্রস্বীকৃত আইনগুলি বিশেষভাবে প্রভাবিত হইয়াছে।

রাষ্ট্রবিজ্ঞান ও নীতিশাস্ত্র (Relation to Ethics)

প্রাচীন যুগের সকল দেশের দার্শনিকগণ বিশেষ করিয়া গ্রীক দার্শনিকগণ রাষ্ট্রবিজ্ঞানকে নীতিশাস্ত্রের শাখা বলিয়া গণ্য করিতেন। নীতিশাস্ত্রকেই তাঁহারা মূলশাস্ত্র বলিয়া মনে করিতেন ও রাষ্ট্রপরিচালনার মূল সূত্রগুলি নীতিশাস্ত্রের ভিত্তিতে নির্ধারিত হইত। প্রাচীন ভারতেও রাজা ও প্রজার সম্বন্ধ, রাজার কর্তব্য প্রভৃতি নৈতিক আদর্শের ভিত্তিতে প্রতিষ্ঠিত ছিল। প্রসিদ্ধ গ্রীক দার্শনিক অ্যারিস্টটল্ তাঁহার 'রাজনীতি' গ্রন্থে রাষ্ট্রের উদ্দেশ্য-বর্ণনাপ্রসঙ্গে এই নৈতিক আদর্শের উপর সবিশেষ গুরুত্ব আরোপ করিয়াছেন। জ্যেদশ শতাব্দী পর্যন্ত রাষ্ট্রের আদর্শ এই নৈতিক ভিত্তির উপর প্রতিষ্ঠিত ছিল। রাজনৈতিক কার্যকলাপের একমাত্র মাপকাঠি ছিল নৈতিক আদর্শ এবং এই নৈতিক আদর্শের দ্বারা অল্পপ্রাণিত হইয়া রাষ্ট্রের কার্য প্রধানতঃ পরিচালিত হইত।

ইতালীয় চিন্তানায়ক ম্যাকিয়াভেলি সর্বপ্রথম রাজনীতিকে নীতিশাস্ত্র হইতে পৃথক করিয়া নৈতিক আদর্শের পরিবর্তে সুবিধাবাদ আদর্শের ভিত্তিতে প্রতিষ্ঠিত করেন। রাষ্ট্রের উৎপত্তিসম্বন্ধে বলপ্রয়োগ মতবাদ ও সামাজিক চুক্তি-মতবাদ প্রচারের ফলে রাষ্ট্রবিজ্ঞান পুরাতন নৈতিক

আদর্শবাদ পরিত্যাগ করিয়া নতুন আদর্শের ভিত্তিতে প্রতিষ্ঠিত হইল। হব্‌স্‌, লক্‌, রুশো প্রভৃতি লেখকগণ এইরূপে নতুন আদর্শের সৃষ্টি করিয়া রাষ্ট্রবিজ্ঞানকে নীতিশাস্ত্র হইতে সম্পূর্ণ পৃথক্ করিতে সহায়তা করিলেন। ফলে, রাষ্ট্রবিজ্ঞান একটি স্বয়ং-সম্পূর্ণ পৃথক্ শাস্ত্রের মর্যাদা লাভ করিল।

রাষ্ট্রবিজ্ঞানের বিষয়বস্তু যে নীতিশাস্ত্রের আলোচ্য বিষয় হইতে পৃথক্ এ বিষয়ে কোন মতভেদ নাই। নীতিশাস্ত্রের বিষয়বস্তু রাষ্ট্রবিজ্ঞানের বিষয়বস্তু অপেক্ষা অধিকতর ব্যাপক। নীতিশাস্ত্র মানুষের সমগ্র জীবনের—তাহার চিন্তাধারা, উদ্দেশ্য ও বাহ্যিক আচরণ সব লইয়াই আলোচনা করে। রাষ্ট্র-বিজ্ঞান আলোচনা করে শুধু মানুষের বাহ্যিক আচরণের। রাষ্ট্রবিজ্ঞান মানুষের বহিজীবন নিয়ন্ত্রণ করে এ কথা বলিলেও ভুল হইবে, কেন-না রাষ্ট্র-বিজ্ঞান মানুষের সমগ্র বহিজীবন লইয়াই আলোচনা করিতে পারে না। শুধুমাত্র মানুষের রাজনৈতিক জীবনের আলোচনাই হইল এই শাস্ত্রের বিষয়বস্তু। সুতরাং রাষ্ট্রবিজ্ঞানের আলোচ্য বিষয়বস্তু নীতিশাস্ত্রের আলোচ্য বিষয়বস্তু হইতে সংকীর্ণতর। নীতিবিগর্হিত কার্য করিলে কোন দৈহিক শাস্তি নাই। বিবেকদংশন অথবা লোকনিন্দা সহ্য করিতে হয়, কিন্তু বে-আইনী অথবা রাষ্ট্রবিরোধী কার্য করিলে দৈহিক শাস্তি অবশ্যজ্ঞাবী। কতকগুলি নৈতিক আদর্শের ভিত্তিতে নীতিশাস্ত্রের নির্দেশ স্থিরীকৃত হয়, যেমন মিথ্যাভাষণ বা অকৃতজ্ঞতা সর্বসময়ে ও সর্বদেশে নীতিশাস্ত্রবিরোধী বলিয়া বিবেচিত হয়। কিন্তু রাষ্ট্রের নির্দেশগুলি, যেগুলিকে আইন বলা হয় সেগুলি রচিত হয় জনস্বার্থের ভিত্তিতে অর্থাৎ জনগণের সুবিধা ও অসুবিধার কথা চিন্তা করিয়া। যুদ্ধের সময় আকাশপথে শত্রুর আক্রমণ হইতে আত্মরক্ষার নিমিত্ত অনাচ্ছাদিত আলো রাখা বে-আইনী বলিয়া গণ্য হয়, কিন্তু অনাচ্ছাদিত আলো রাখা নীতিশাস্ত্রবিরোধী নয়।

উপর-উক্ত পার্থক্য থাকা সত্ত্বেও এ কথা বলিতে হইবে যে, রাষ্ট্র-বিজ্ঞানকে নীতিশাস্ত্র হইতে সম্পূর্ণভাবে পৃথক্ করা যায় না। উদ্দেশ্যের দিক দিয়া দেখিতে গেলে রাষ্ট্রবিজ্ঞান ও নীতিশাস্ত্রের সম্পর্ক অতি ঘনিষ্ঠ। উভয় শাস্ত্রই মানুষকে আদর্শ মানব করিয়া গড়িয়া তুলিতে চয়। সমাজে

মাতৃষের আদর্শ আচরণ কি হওয়া উচিত নীতিশাস্ত্র তাহারই নির্দেশ দেয়। কোনটি স্নায় কোনটি অন্ত্রায়, কোনটি গ্রহণীয়, কোনটি বর্জনীয়, তাহা নীতিশাস্ত্রে আলোচিত হয়। এক কথায় নীতিশাস্ত্র মাতৃষের চিন্তাধারা ও কার্যে উহাদের বহিঃপ্রকাশের মানদণ্ড নির্ধারণ করে। রাষ্ট্রবিজ্ঞানও নাগরিক হিসাবে মাতৃষের কর্তব্যাকর্তব্য স্থির করিয়া দেয়। রাষ্ট্রপ্রণীত আইনগুলির বৈধতা নীতিশাস্ত্রের মানদণ্ডে স্থিরীকৃত হয়। যদি কোন আইনের প্রচলিত নীতিবাদের সহিত সংঘর্ষ হয়, তাহা হইলে সে আইন জনগণ মাস্ত্র করিতে চায় না। রাষ্ট্রের প্রধান কার্য হইল স্ব-নাগরিক সৃষ্টি করা। এই স্ব-নাগরিক সৃষ্টি করিতে হইলে জনগণের নৈতিক জীবনের মান উন্নয়ন করা একান্ত আবশ্যক। নৈতিক জিতির উপর প্রতিষ্ঠিত আইন প্রণয়ন করিয়া এবং নীতিবিগর্হিত আইন, প্রথা ও লোকাচার দূর করিয়া রাষ্ট্র জনগণের নৈতিক জীবনের মান উন্নয়ন করিতে সহায়তা করে। বস্তুতঃ, নীতিশাস্ত্রের নির্দেশ ও রাষ্ট্রবিজ্ঞানের নির্দেশের মধ্যে সব সময় সূক্ষ্ম পার্থক্য করা যায় না। বর্তমান জনমত অনুসারে যাহা নীতিশাস্ত্রসম্মত বলিয়া বিবেচিত হইতে পারে রাষ্ট্রনির্দেশের মাধ্যমে পরবর্তী কালে তাহা নীতিশাস্ত্রবিরোধী বলিয়া গণ্য হইতে পারে। এইরূপে রাষ্ট্রপ্রণীত আইনের দ্বারা জনমতের পরিবর্তন ঘটে ও মাতৃষের নৈতিক জ্ঞান ও নৈতিক আদর্শেরও পরিবর্তন হয়। এক শতাব্দী পূর্বে আমাদের ভারতবর্ষে সতীদাহপ্রথা প্রচলিত ছিল ও তখন এই প্রথা নীতিশাস্ত্রবিরোধী বলিয়া বিবেচিত হইত না। এই প্রথাকে আইনের দ্বারা রহিত করা হয়। কালক্রমে জনগণের নৈতিক জ্ঞানের পরিবর্তন ঘটিতে থাকে। বর্তমান সময়ে আমাদের দেশ হইতে এই প্রথা সমূলে উৎপাটিত হইয়াছে। তাহার কারণ আমরা শুধু বে-আইনী বলিয়া যে-এই প্রথা আর মানি না তাহা নয়। এই প্রথা একটি দুর্নীতি ও নীতিশাস্ত্রবিরোধী, রাষ্ট্র আইনের দ্বারা এই নৈতিক জ্ঞান জনগণের মধ্যে সঞ্চারিত করিয়াছে। রাষ্ট্রের অস্তিত্বের প্রথম ও প্রধান তাৎপর্য হইল ব্যক্তির ও সমষ্টির মঙ্গলসাধন। রাষ্ট্রের আদর্শ নৈতিক জিতির উপর প্রতিষ্ঠিত না হইলে এই মঙ্গল সাধিত হইতে পারে না। সুতরাং নীতিশাস্ত্রকে রাষ্ট্রবিজ্ঞান হইতে সম্পূর্ণ পৃথক্ করা যায় না। রাষ্ট্র-বিজ্ঞান ও নীতিশাস্ত্র পরস্পরের পরিপূরক।

রাষ্ট্রবিজ্ঞান ও মনস্তত্ত্ব (Relation to Psychology)

মানুষ বিচারশক্তিসম্পন্ন জীব হইলেও অনেক সময় সহজাত প্রবৃত্তি, ভাবাবেগ ও উদ্বেজনীর দ্বারা কার্যে পরিচালিত হয়। মনস্তত্ত্বে মানুষের এই যুক্তিবহির্ভূত কার্যাবলীর আলোচনা করা হয়। আর রাষ্ট্রবিজ্ঞানে মানুষের পারস্পরিক রাজনৈতিক সম্পর্কের বিষয় আলোচিত হয়। কিন্তু মানুষের রাজনৈতিক কার্যাবলী অনেক সময়েই যুক্তিহীন ভাবাবেগ বা উদ্বেজনীর দ্বারা পরিচালিত হয়। সুতরাং রাষ্ট্রবিজ্ঞানের বিষয়বস্তু মনস্তত্ত্ব-সম্বন্ধীয় প্রভাব হইতে সম্পূর্ণরূপে বিমুক্ত নহে। ম্যাকডুগাল, ল্যাং বঃ প্রভৃতি আধুনিক মনস্তত্ত্ববিৎ পণ্ডিতগণ দেশের শাসনব্যবস্থার উপর মনস্তত্ত্ব-সম্বন্ধীয় প্রভাবের গুরুত্বের উল্লেখ করিয়াছেন। তাঁহারা বলেন, যে শাসনব্যবস্থা জনসাধারণের ঐতিহ্য ও চিন্তাধারার ভিত্তিতে গঠিত, একমাত্র সেই শাসনব্যবস্থাই স্থায়িত্ব ও জনপ্রিয়তা লাভ করিতে সক্ষম হয়। অনেক সময় বিভিন্ন দেশে রাজনৈতিক সংস্কারের দাবীতে যে গণ-আন্দোলন উখিত হয় তাহা বিশ্লেষণ করিলে বুঝিতে পারা যায় যে, এই দাবী প্রকৃত সংস্কারের প্রয়োজনীয়তা অপেক্ষা জনসাধারণের এক বিশেষ ভাবাবেগের অভিব্যক্তি মাত্র। প্রতিষ্ঠিত শাসনব্যবস্থা বা প্রচলিত আইনের প্রতি বিরূপ মনোভাব এবং রাজনৈতিক বিপ্লবের মূলেও অনেক ক্ষেত্রে এই যুক্তিহীন গণ-বিক্ষোভ কার্যকর হইতে দেখা যায়; সুইস্ দেশে যে শাসনব্যবস্থা সাকল্যমণ্ডিত হইয়াছে তাহা অল্প দেশে সাকল্য লাভ করিতে পারে নাই—ইহার মূলেও রহিয়াছে বিভিন্ন জাতির গঠনপ্রকৃতি ও মনোভাবের পার্থক্য। ইংলণ্ডের বিচিত্র শাসনব্যবস্থার কারণ অনুসন্ধান করিলেও দেখা যায় যে, এই শাসনব্যবস্থার মূলে রহিয়াছে ইংরাজ জাতির স্বতন্ত্র জাতীয় বৈশিষ্ট্য। সুতরাং রাষ্ট্রবিজ্ঞানের বিষয়বস্তু মনস্তত্ত্বের প্রভাবমুক্ত নহে। কিন্তু স্মরণ রাখিতে হইবে যে, মানুষের রাজনৈতিক কার্যকলাপের কিছু কিছু মনস্তত্ত্বের সাহায্যে বিশ্লেষণ করা সম্ভব হইলেও রাজনৈতিক কার্যকলাপই মনস্তত্ত্বের সাহায্যে বিশ্লেষণ করা সম্ভবও নয়, বাঞ্ছনীয়ও নয়।

রাষ্ট্রবিজ্ঞান ও ভূগোলশাস্ত্র (Relation to Geography)

ভূগোলশাস্ত্রের সহিত রাষ্ট্রবিজ্ঞানের কিছু সম্বন্ধ আছে। মানুষের চরিত্র,

চিন্তাধারা ও কার্যপ্রণালী তাহার আবাসভূমির ভৌগোলিক পরিবেশ-দ্বারা অনেক পরিমাণে প্রভাবিত হয়। দেশের জলবায়ু, ভূমির উর্বরতা, প্রাকৃতিক সম্পদের প্রাচুর্য বা অনটন, সমুদ্র বা পর্বতের নৈকট্য প্রভৃতি ভৌগোলিক পরিবেশ মানুষের চরিত্রগঠনে প্রভূত প্রভাব বিস্তার করে। এই ভৌগোলিক পরিবেশের পার্থক্যের জন্তই বিভিন্ন দেশের চিন্তাধারা, অর্থনীতি, রাজনীতি ও শাসনব্যবস্থার বৈষম্য পরিলক্ষিত হয়। গ্রীক দার্শনিক অ্যারিস্টটল্ হইতে আরম্ভ করিয়া ফরাসী লেখক বৌড়া, মন্টেস্কু, রুশো প্রভৃতি মনস্বিগণ লোকচরিত্রের উপর ভৌগোলিক পরিবেশের প্রভাব বর্ণনা করিয়াছেন। বিখ্যাত ঐতিহাসিক বাকুল তাঁহার ‘সভ্যতার ইতিহাস’ গ্রন্থে বিশেষ গুরুত্ব সহকারে বলিয়াছেন যে, মানুষ তাহার নিজের ও সামাজিক জীবনের কার্যাবলীতে স্ব-ইচ্ছা অপেক্ষা ভৌগোলিক পরিবেশ দ্বারা অধিকতরভাবে চালিত হয়। বাকুলের মত সম্পূর্ণরূপে গ্রহণ করিতে না পারিলেও এ কথা নিঃসন্দেহে বলা যাইতে পারে যে, রাষ্ট্র-পরিচালনাকালে ভৌগোলিক পরিবেশ অত্যন্ত গুরুত্বপূর্ণ বিষয়। দৃষ্টান্তস্বরূপ বলা যাইতে পারে, ইংলও যে তাহার সম্পূর্ণ নিজস্ব সভ্যতা, শাসনব্যবস্থা ও রাজনীতি গড়িয়া তুলিয়াছে তাহার প্রধান কারণ হইল তাহার বিশেষ ভৌগোলিক পরিবেশ।

রাষ্ট্রবিজ্ঞান ও ব্যবহারশাস্ত্র (Relation to Jurisprudence)

ব্যবহারশাস্ত্রের প্রধান আলোচ্য বিষয় হইল রাষ্ট্রপ্রণীত ও রাষ্ট্রসমর্থিত আইনগুলির প্রকৃতি ও প্রয়োগবিধি বিশ্লেষণ করা। রাষ্ট্রবিজ্ঞানের বিষয়বস্তু ব্যবহারশাস্ত্রের বিষয়বস্তু অপেক্ষা অধিকতর ব্যাপক। রাষ্ট্রবিজ্ঞানে আলোচিত হয় রাষ্ট্রের শাসনকার্য। এই শাসনকার্য পরিচালনা করিবার নিমিত্ত রাষ্ট্র কতকগুলি আইন বা বিধি প্রণয়ন করে, সেগুলির সাহায্যে রাষ্ট্র তাহার সরকারের মাধ্যমে রাষ্ট্রের উদ্দেশ্যকে কার্যকরী করিতে সক্ষম হয়। সুতরাং রাষ্ট্র-কর্তৃক সৃষ্ট আইনগুলির পরিপ্রেক্ষিতে বিভিন্ন রাষ্ট্রের তাৎপর্য ও প্রকৃতি বিশ্লেষণ করা চলে। এই দিক দিয়া দেখিতে গেলে ব্যবহারশাস্ত্রের আলোচ্য বিষয়বস্তু সংকীর্ণতর ও এই শাস্ত্রকে রাষ্ট্রবিজ্ঞানের একটি অংশমাত্র বলিয়া গণ্য করা যাইতে পারে।

রাষ্ট্রবিজ্ঞান ও আন্তর্জাতিক আইন (Relation to International Law)

সামাজিক জীবনে প্রত্যেকটি মানুষ যেমন পরস্পরের উপর নির্ভরশীল ও একের সহিত অন্যের সম্পর্ক কতকগুলি আইন বা বিধির দ্বারা নিয়ন্ত্রিত হয়, আন্তর্জাতিক ক্ষেত্রেও সেইরূপ এক রাষ্ট্রের সহিত অপর রাষ্ট্রের সম্পর্ক কতকগুলি আইন দ্বারা নিয়ন্ত্রিত হয়। বৈদেশিক রাষ্ট্রের সহিত স্বরাষ্ট্রের সম্পর্ক যে-বিধানগুলির দ্বারা নিয়ন্ত্রিত হয়, সেই বিধানগুলিকে আন্তর্জাতিক আইন বলিয়া আখ্যা দেওয়া হয়। যদিও জাতীয় আইনগুলির মত আন্তর্জাতিক আইনগুলি অতটা সুস্পষ্ট নয় এবং অতটা সহজে বলবৎ করা যায় না, তথাপি বর্তমান যুগে গণতন্ত্রের ভিত্তিতে গঠিত রাষ্ট্রগুলি এই আইন অনুসারে তাহাদের বৈদেশিক সম্পর্ক পরিচালিত করে। সুতরাং আন্তর্জাতিক আইনের প্রধান বিষয়বস্তু হইল রাষ্ট্রের বহিমুখী কার্যকলাপ-সম্বন্ধে আলোচনা করা ও এই বহিমুখী কার্যকলাপের একটা আদর্শ মান স্থির করা। রাষ্ট্রবিজ্ঞান শুধু রাষ্ট্রের আদর্শ আন্তর্জাতিক সম্পর্ক নির্ণয় করে না, আভ্যন্তরীণ শাসনব্যবস্থা যাহাতে সুষ্ঠুভাবে পরিচালিত হয় সে বিষয়েও আলোচনা করে। রাষ্ট্রের উদ্দেশ্য সার্থক করিতে হইলে এক দিকে যেমন আভ্যন্তরীণ শাসনকার্যের মান উন্নয়ন করা প্রয়োজন, অপর দিকে সেইরূপ পররাষ্ট্রের সহিত সম্পর্কস্থাপনের একটা আদর্শ মান নির্ণয় করা একান্ত আবশ্যক। পারস্পরিক সদিচ্ছা ও সহযোগিতার ভিত্তিতে এই মান স্থিরীকৃত হইলে সর্বজাতির ও সকল দেশের মঙ্গল। সুতরাং রাষ্ট্রবিজ্ঞানের বিষয়বস্তু সহিত আন্তর্জাতিক আইন অঙ্গাঙ্গীভাবে জড়িত। আন্তর্জাতিক আইনের প্রকৃতি প্রত্যেকটি রাষ্ট্রের সদিচ্ছা ও সহযোগিতার ঐকান্তিক ইচ্ছার উপর নির্ভর করে, অপর পক্ষে রাষ্ট্রের শাস্তি, শৃঙ্খলা ও সমৃদ্ধি আন্তর্জাতিক আইনের প্রকৃতির উপর নির্ভরশীল।

সংক্ষিপ্তসার

• **নামকরণ**—আমাদের আলোচ্য বিষয়ের নামকরণ লইয়া লেখকদের মধ্যে মতভেদ আছে। রাজনীতি, রাষ্ট্রদর্শন ও রাষ্ট্রবিজ্ঞান এই তিন নামে এই শাস্ত্র অভিহিত হয়। বিষয়বস্তুর ব্যাপকতা ও জটিলতা বিবেচনা

করিয়া বর্তমান যুগের অধিকাংশ লেখক এই শাস্ত্রকে রাষ্ট্রবিজ্ঞান আখ্যা দিয়াছেন।

রাষ্ট্রবিজ্ঞানের বিষয়বস্তু—রাষ্ট্রকে কেন্দ্র করিয়া সমাজবদ্ধ মানুষের যে দিকটা প্রকটিত হইয়াছে তাহাই রাষ্ট্রবিজ্ঞানের আলোচ্য বিষয়। মানবজীবনে রাষ্ট্রের প্রভাব অপরিসীম। যে প্রতিষ্ঠানের মাধ্যমে মানুষের রাজনৈতিক চেতনা যুঁতি পরিগ্রহ করিয়াছে, সেই প্রতিষ্ঠানের উৎপত্তি, ক্রমবিকাশ ও তাৎপর্য এই শাস্ত্রে আলোচিত হয়। অতীত যুগের রাষ্ট্রের বৈশিষ্ট্যের ভিত্তিতে বর্তমান রাষ্ট্রকে বিশ্লেষণ করিয়া ভবিষ্যৎ যুগের আদর্শ রাষ্ট্রের পরিকল্পনার প্রয়াস পায়। রাষ্ট্রের অতীত, বর্তমান ও ভবিষ্যৎ এই শাস্ত্রের বিষয়বস্তু।

রাষ্ট্রবিজ্ঞান আলোচনার উদ্দেশ্য—রাষ্ট্রবিজ্ঞান আলোচনার দ্বারা শুধু যে মানুষের জ্ঞানের পরিধি বিস্তৃত হয় তাহা নয়, ইহা দ্বারা মানুষ বাস্তব জীবনেও লাভবান হয়। এই শাস্ত্র মানুষকে তাহার নাগরিক অধিকার ও কর্তব্য সম্পর্কে আত্মসচেতন করে। এতদ্ব্যতীত মানুষের মধ্যে সমাজ-চেতনা বৃদ্ধি করিয়া মানুষের পারস্পরিক সম্পর্কের মান স্থিরপূর্বক উন্নত জীবনযাপনে সহায়তা করে।

রাষ্ট্রবিজ্ঞান কি বিজ্ঞান-পর্যায়ভুক্ত?—রাষ্ট্রবিজ্ঞানের বিষয়বস্তুর ব্যাপকতা, অনিশ্চয়তা ও ইহার অহুসন্ধান-পদ্ধতির বৈচিত্র্যের জন্ত এই শাস্ত্রকে বিজ্ঞানের মর্যাদা দিতে অনেকে আপত্তি করেন; কিন্তু বর্তমানে বিজ্ঞানসম্মত পদ্ধতিতে এই শাস্ত্রের অহুশীলন সম্ভবপর বলিয়া বিবেচিত হইয়াছে ও কার্যতঃ বিজ্ঞানসম্মত পদ্ধতিতেই ইহার অহুশীলনকার্য পরিচালিত হয়। অন্যান্য বিজ্ঞানের মত এই শাস্ত্র সম্পূর্ণ বিজ্ঞান না হইলেও ইহা একটি অসম্পূর্ণ সামাজিক বিজ্ঞান বলিয়া পরিগণিত হয়।

রাষ্ট্রবিজ্ঞানের অহুসন্ধান-পদ্ধতি—রাষ্ট্রবিজ্ঞান-অহুসন্ধানের নানা-রূপ পদ্ধতি প্রবর্তিত হইয়াছে। এই পদ্ধতিগুলির মধ্যে কোনটিই একক রাষ্ট্রবিজ্ঞানের সম্যক অহুসন্ধান করিতে পারে না। হুতরাং দুই বা ততোধিক পদ্ধতির সমন্বয়ে রাষ্ট্রবিজ্ঞানের আলোচনা করিলে সফল পাওয়া যায়।

পদ্ধতিগুলি যথাক্রমে নিম্নলিখিত নামে অভিহিত হয় : ১। পরীক্ষামূলক পদ্ধতি ; ২। পর্যবেক্ষণমূলক পদ্ধতি ; ৩। ঐতিহাসিক পদ্ধতি ; ৪। তুলনামূলক পদ্ধতি ; ৫। দার্শনিক পদ্ধতি ইত্যাদি।

রাষ্ট্রবিজ্ঞানের সহিত অন্যান্য শাস্ত্রের সম্পর্ক নির্ণয়

রাষ্ট্রবিজ্ঞান ও সমাজবিজ্ঞান—রাষ্ট্রবিজ্ঞানকে সমাজবিজ্ঞানের একটি বিশেষীকৃত শাখা বলা যাইতে পারে। সমাজবিজ্ঞানে আলোচিত হয় মানবজাতির সমগ্র জীবন, আর রাষ্ট্রবিজ্ঞানে আলোচিত হয় শুধু রাষ্ট্রনৈতিক চেতনাসম্পন্ন মানুষের রাজনৈতিক জীবন। রাষ্ট্র মানবসমাজের অন্তর্ভুক্ত একটি বিরাট প্রতিষ্ঠান মাত্র। সুতরাং রাষ্ট্রবিজ্ঞানের বিষয়বস্তুর পরিধি, সমাজবিজ্ঞানের পরিধি অপেক্ষা অনেকাংশে সংকীর্ণতর।

রাষ্ট্রবিজ্ঞান ও ইতিহাস—ইতিহাস হইতে রাষ্ট্রবিজ্ঞানের উপাদান সংগৃহীত হয়। মানুষের রাজনৈতিক চেতনা সুদূর অতীত হইতে সম্প্রসারিত হইয়া রাষ্ট্রকে কেন্দ্র করিয়া কিভাবে বর্তমান মূর্তি পরিগ্রহ করিয়াছে তাহা ইতিহাসপাঠে জানা যায়। কিন্তু ইতিহাসকে নিছক রাজনৈতিক ঘটনার কালনিরূপণ-বিষয়া বলিলে ভুল হইবে ; ইতিহাসে মানবসভ্যতার সব দিকই আলোচিত হয়। রাজনৈতিক চিন্তাধারা ও রাজনৈতিক প্রতিষ্ঠানগুলির মূল সূত্রের সন্ধান পাইতে হইলে ইতিহাসের সাহায্য আবশ্যক।

রাষ্ট্রবিজ্ঞান ও ধনবিজ্ঞান—মানুষের অর্থনৈতিক জীবনযাত্রা অনেকাংশে রাজনীতির দ্বারা পরিচালিত হয়। ধনবিজ্ঞানের মূল উদ্দেশ্য হইল দারিদ্র্য-সমস্যার সমাধান করিয়া সমাজের অর্থনৈতিক মান উন্নয়ন করা। এই উন্নয়ন-ব্যবস্থা রাষ্ট্রের অল্পস্বত নীতির উপর নির্ভর করে। অপর পক্ষে ধনবিজ্ঞানের সম্পর্কবিহীন রাজনীতি কোন সফল দিতে পারে না। রাষ্ট্রের কাঠামো, ব্যবস্থাপনা ও কার্যকারিতা অনেকাংশে দেশের অর্থনৈতিক ব্যবস্থার উপর নির্ভর করে।

রাষ্ট্রবিজ্ঞান ও নীতিশাস্ত্র—উভয় শাস্ত্রই মানুষের আদর্শ আচরণ কি হওয়া উচিত তাহার নির্দেশ দেয়। উভয় শাস্ত্রই মানুষকে আদর্শ নাগরিক

হইতে শিক্ষা দেয়। কিন্তু নীতিশাস্ত্রের বিষয়বস্তু রাষ্ট্রবিজ্ঞানের বিষয়বস্তু অপেক্ষা ব্যাপকতর। রাষ্ট্রবিজ্ঞান শুধু মানুষের সামাজিক জীবনের বাহ্যিক আচরণের মান স্থির করিয়া দেয়। নীতিশাস্ত্র মানুষের চিন্তাধারা ও কার্যে উহাদের বহিঃপ্রকাশের মান স্থির করে।

রাষ্ট্রবিজ্ঞান ও মনস্তত্ত্ব—মানুষ সব সময়ে যুক্তির দ্বারা পরিচালিত হয় না, চ্যুতক সময় ভাবাবেগ দ্বারাও কার্যে পরিচালিত হয়। মানুষ তাহার কার্যাবলীর পশ্চাতে যে সব সহজাত প্রবৃত্তির দ্বারা পরিচালিত হয়, মনস্তত্ত্ব সেই সব সহজাত প্রবৃত্তিগুলির বিষয় আলোচনা করে। মানুষের রাজনৈতিক কার্যকলাপ অনেকক্ষেত্রে যুক্তিহীন উত্তেজনা ও ভাবাবেগ দ্বারা প্রভাবিত হয়। সুতরাং অনেক রাজনৈতিক ঘটনা মনঃসমীক্ষণ পদ্ধতির সাহায্যে বিশ্লেষণ করা সম্ভব।

রাষ্ট্রবিজ্ঞান ও ভূগোলশাস্ত্র—রাষ্ট্র মানুষের সৃষ্ট একটি প্রতিষ্ঠান। সুতরাং এই প্রতিষ্ঠানের বৈশিষ্ট্য অনেকাংশে মানবচরিত্রের উপর নির্ভর করে। দেশের ভৌগোলিক পরিবেশের উপর মানুষের প্রকৃতি গড়িয়া উঠে। তাই রাষ্ট্রপ্রকৃতিও ভৌগোলিক পরিবেশ দ্বারা প্রভাবিত হয়।

রাষ্ট্রবিজ্ঞান, ব্যবহারশাস্ত্র ও আন্তর্জাতিক আইন—ব্যবহারশাস্ত্র ও আন্তর্জাতিক আইন রাষ্ট্রবিজ্ঞানের বিশেষীকৃত শাখা মাত্র। ব্যবহারশাস্ত্রে রাষ্ট্র-প্রণীত আইনের আলোচনা হয়। আন্তর্জাতিক আইনের দ্বারা স্বাধীন সার্বভৌম রাষ্ট্রগুলির সম্পর্ক নির্ণীত হয়।

প্রশ্নাবলী

1. Discuss the relation of Political Science to History and Ethics. (C. U. 1950)
2. "Political Science without History has no root." Seely. Examine this statement. (C. U. 1957)
3. Discuss the scope of Political Science. How far do you agree with the view that History is the root of Political Science ? Give reasons for your answer. (C. U. 1959)
4. Define Political Science and discuss the nature of its relationship with Economics and Sociology. (C. U. 1960)

5. Describe the different methods of study in Political Science. Which of them do you consider to be the most desirable, and why? (C. U. B. A. Part I, 1962)

6. Discuss the nature of Political Science as a Science, and distinguish it from Political Philosophy.

(C. U. Part I, 1964, 1966)

7. Write a short note on the Methods of Political Science. (C. U. Part I, 1965)

8. Define 'Political Science' and point out the relation of Political Science to History and Sociology. (C. U. 1969)

দ্বিতীয় অধ্যায়

রাষ্ট্র

The State

৬. রাষ্ট্রসংজ্ঞা (Definition of the State)

রাষ্ট্রবিজ্ঞানে রাষ্ট্রতত্ত্ব ও রাষ্ট্রতথ্য আলোচিত হয়। সুতরাং প্রথমেই রাষ্ট্রের সংজ্ঞা নির্দিষ্ট হওয়া প্রয়োজন। ইতালির চিন্তাবীর ম্যাকিয়াভেলী ‘রাষ্ট্র’ শব্দটি প্রথম ব্যবহার করিয়াছিলেন। গ্রীক ও রোমকগণ ক্ষুদ্র ক্ষুদ্র রাষ্ট্রে বাস করিত। রাষ্ট্রের আয়তন নগরেই সীমাবদ্ধ থাকিত। গ্রীক ও রোমকগণ যথাক্রমে ‘পোলিস’ ও ‘সিভিটাস’ এই দুইটি শব্দ দ্বারা রাষ্ট্রকে বুঝাইত। টিউটন যুগ হইতে অপেক্ষাকৃত বৃহদায়তন রাষ্ট্রের ‘রাষ্ট্র’ নামকরণ হইল। টিউটনেরাই সর্বপ্রথম ‘স্ট্যাটাস্’ কথাটি ব্যবহার করিল। বর্তমান যুগে ‘রাষ্ট্র’ শব্দটি অনবধানতাবশতঃ বিভিন্ন অর্থে ব্যবহৃত হয়। অনেক সময় ‘রাষ্ট্র’ শব্দটি জাতি, সরকার, সমাজ, দেশ প্রভৃতি শব্দের প্রতিশব্দ হিসাবে ব্যবহৃত হয়। অনেক সময় আবার রাষ্ট্র শব্দটি যুক্তরাষ্ট্রের প্রাদেশিক সরকার বুঝাইতে ব্যবহৃত হয়, যেমন, মার্কিন যুক্তরাষ্ট্র ও ভারতীয় যুক্তরাষ্ট্রের স্বতন্ত্র অংশগুলিকে রাজ্য (State) বলা হয়।

রাষ্ট্রবিজ্ঞানে রাষ্ট্র শব্দটিকে একটি বিশেষ অর্থে ব্যবহার করা হয়। অতীত যুগ হইতে আরম্ভ করিয়া বর্তমান যুগ পর্যন্ত ভিন্ন ভিন্ন লেখকগণ রাষ্ট্রের বিভিন্ন সংজ্ঞা নির্দেশ করিয়াছেন। কয়েকটি সংজ্ঞা বিশ্লেষণ করিলেই বুঝা যাইবে যে, এই সমস্ত লেখক বিভিন্ন দৃষ্টিভঙ্গী লইয়া রাষ্ট্রের সংজ্ঞা নির্দেশ করিয়াছেন। পাশ্চাত্য রাজনীতির জন্মদাতা মহামতি অ্যারিস্টটল বলিয়াছেন যে, স্বাবলম্বী ও পূর্ণাঙ্গ জীবনধারণের উদ্দেশ্যে যখন অনেকগুলি পরিবার ও গ্রাম একত্রিত হয়, তখনই তাহাকে রাষ্ট্র বলা হয়। স্বাবলম্বী ও পূর্ণাঙ্গ জীবন বলিতে লেখক মানবচরিত্রের নৈতিক উৎকর্ষের উপর গুরুত্ব প্রদান করিয়াছেন। আর এই মানবজীবনের চরম নৈতিক উৎকর্ষ লাভ করে রাষ্ট্রের সভ্য হিসাবে। সুতরাং অ্যারিস্টটল ও অতীত যুগের

অন্তান্ত দার্শনিকের মতে রাষ্ট্রের অস্তিত্ব ও উদ্দেশ্য নৈতিক ভিত্তির উপর প্রতিষ্ঠিত।

জার্মান পণ্ডিত ব্লুনৎস্লি ও সিডেল্ রাষ্ট্রের অন্তরূপ সংজ্ঞা নির্দেশ করিয়াছেন। ব্লুনৎস্লির মতে, যখন একদল লোক রাজনৈতিক উদ্দেশ্যে নির্দিষ্ট ভূখণ্ডে সংঘবদ্ধ হয়, তখনই রাষ্ট্রের উৎপত্তি হয়। সিডেল্ বলেন, যখন বহুসংখ্যক লোক পৃথিবীর কোন নির্দিষ্ট ভূভাগ অধিকার করিয়া কোন উচ্চতর শক্তির অধীনে সম্মিলিত হয়, তখনই রাষ্ট্রের সূত্রপাত হয়। উড্‌ব্রো উইলসনের মতে, নির্দিষ্ট ভূভাগের মধ্যে আইন ও শৃংখলার সহিত সংঘবদ্ধ জনসমষ্টিকে রাষ্ট্র বলা হয় (“A state is a people organised for law within a definite territory”)।

অন্তান্ত বহু লেখক তাঁহাদের নিজস্ব ভাষায় রাষ্ট্রের সংজ্ঞা নির্দেশ করিয়াছেন। কিন্তু এই সংজ্ঞাগুলির কোনটি ত্রুটিবিহীন নহে। অনেকের মতে ডাঃ গার্নার রাষ্ট্রের যে সংজ্ঞা নির্দেশ করিয়াছেন তাহাই সর্বোৎকৃষ্ট বলিয়া বিবেচিত হয়। তিনি বলিয়াছেন, রাষ্ট্রবিজ্ঞান ও শাসনতাত্ত্বিক আইনের দিক দিয়া দেখিতে গেলে রাষ্ট্র অল্পবিস্তর বহুসংখ্যক জনসমষ্টি যাহারা স্থায়িতাবে একটি নির্দিষ্ট ভূখণ্ডে বাস করে ও যাহারা সম্পূর্ণভাবে স্বাধীন অর্থাৎ বৈদেশিক শাসন-পাশ হইতে মুক্ত এবং যাহাদের একটি সুনিয়ন্ত্রিত শাসনপ্রতিষ্ঠান অর্থাৎ সরকার আছে, যে শাসনপ্রতিষ্ঠানের নির্দেশ এই স্থানের অধিবাসীরা প্রতিনিয়ত পালন করিতে অভ্যস্ত।

(“The state, as a concept of Political Science and Public law, is a community of persons more or less numerous, permanently occupying a definite portion of territory, independent or nearly so, of external control and possessing an organised government to which the great body of inhabitants render habitual obedience.”)

আধুনিককালের দুইজন বিখ্যাত রাষ্ট্রবিজ্ঞানী—ল্যাক্সি ও ম্যাকাইভার রাষ্ট্রের নিম্নলিখিত সংজ্ঞা নির্দেশ করিয়াছেন। ল্যাক্সি বলেন, “The modern state is a territorial society divided into government and subjects claiming, within its allotted physical area, a supremacy over all other associations.” (আধুনিক রাষ্ট্র হইল

একটি নির্দিষ্ট ভূখণ্ডে সীমাবদ্ধ সমাজ যে সমাজ হইল শাসক ও শাসিত লইয়া গঠিত এবং যাহা ইহার নিজস্ব নির্দিষ্ট প্রাকৃতিক অঞ্চলের মধ্যে অন্তর্ভুক্ত সকল প্রতিষ্ঠানের উপর আধিপত্য দাবী করে)। অধ্যাপক ল্যাস্কি প্রদত্ত সংজ্ঞা বিশ্লেষণ করিলে দেখা যায় যে, তিনি যদিও রাষ্ট্রের সার্বভৌমিকতা সম্পর্কে বহুত্ববাদ নীতির সমর্থক ছিলেন তথাপি তিনি রাষ্ট্রকে সার্বভৌমিকতা হইতে সম্পূর্ণরূপে বঞ্চিত করিতে চাহেন নাই।

ম্যাকাইভার বলেন, “The state is an association which, acting through law as promulgated by a government endowed to this end by coercive Power, maintains, within a community territorially demarcated the universal external conditions of social order.” (রাষ্ট্র হইল এমন একটি প্রতিষ্ঠান যাহা আইন ঘোষণা করিবার উদ্দেশ্যে প্রদত্ত জবরদস্ত ক্ষমতার অধিকারী সরকার কর্তৃক ঘোষিত আইনের সাহায্যে কার্য করিয়া নির্ধারিত ভৌগোলিক অঞ্চলে বসবাসকারী মানবসমাজে সামাজিক শৃংখলার সার্বজনীন ও বাহ্যিক পরিবেশ অটুট রাখে)।

অধ্যাপক ল্যাস্কির মতে ম্যাকাইভারও বহুত্ববাদের উগ্র সমর্থক। তিনি রাষ্ট্রকে একটি সামাজিক প্রতিষ্ঠান হিসাবে বর্ণনা করিয়াছেন ও রাষ্ট্রীয় কার্যকলাপ সম্পর্কে বলিয়াছেন যে, রাষ্ট্র শুধু মানুষের বহিজীবন নিয়ন্ত্রণ করিবে।

রাষ্ট্রের উপাদান (Elements of the State)

উপরি-উক্ত সংজ্ঞাগুলি বিশেষ করিয়া, ডাঃ গার্নারের সংজ্ঞা বিশ্লেষণ করিলে দেখা যায় যে, প্রত্যেক রাষ্ট্রই চারিটি উপাদান লইয়া গঠিত; যথা, জনসমষ্টি, নির্দিষ্ট ভূ-ভাগ, শাসনপ্রতিষ্ঠান বা সরকার ও সার্বভৌম ক্ষমতা। জনসমষ্টি ও নির্দিষ্ট ভূ-ভাগ হইল রাষ্ট্রের বাস্তব অস্তিত্বের ভিত্তি; শাসনপ্রতিষ্ঠান ও সার্বভৌমিকতা হইল রাষ্ট্রের আধ্যাত্মিক ভিত্তি।

(ক জনসমষ্টি (Population)

বহু জনসমষ্টি না হইলে রাষ্ট্র গঠিত হইতে পারে না। রাষ্ট্রের অন্তর্ভুক্ত জনসমষ্টির অবশ্য শ্রেণীবিভাগ করা যায়; যথা, পূর্ণ-নাগরিক, অসম্পূর্ণ-নাগরিক অর্থাৎ যাহাদের ভোটাধিকার জন্মে নাই, বিদেশী ও প্রজা-গণের শুধু কর্তব্য পালনের দায়িত্ব থাকে, কিন্তু তাহাদের অধিকারের দাবী

রাষ্ট্র

স্বীকৃত হয় না। ব্রিটিশ শাসনকালে ভারতীয়গণ প্রজাপদবাচ্য ছিল। রাষ্ট্রগঠনে একদল লোক প্রয়োজন, কিন্তু কত লোক লইয়া রাষ্ট্র গঠিত হইবে তাহার কোন ধরাবাঁধা নিয়ম নাই। প্রাচীনকালে গ্রীক ও রোমকগণ ক্ষুদ্রকায় নগর-রাষ্ট্রে বাস করিত, তাই অ্যারিস্টটল্ প্রভৃতি দার্শনিকেরা এমন কি অষ্টাদশ শতাব্দীর ফরাসী লেখক রুশো পর্যন্ত রাষ্ট্রের জনসমষ্টির সংখ্যা নির্দেশ করিয়া দিয়াছিলেন। প্রেটো রাষ্ট্রের জনসমষ্টির সংখ্যা ৫,০৪০এ এবং অ্যারিস্টটল্ ১০,০০০এ সীমাবদ্ধ করিয়াছিলেন। কিন্তু বর্তমান যুগে বৃহদায়তন রাষ্ট্রের আবির্ভাবের ফলে প্রাচীন মতবাদ পরিত্যক্ত হইয়াছে। বর্তমান যুগে মনাকো, স্তানম্যারিণো প্রভৃতি অল্পসংখ্যক জনসমষ্টি লইয়া গঠিত রাষ্ট্র ও সোভিয়েত রাশিয়া, মহাচীন ও ভারতের স্থায় জনবহুল রাষ্ট্রও পাশাপাশি দেখিতে পাওয়া যায়। বর্তমান যুগেও জনসংখ্যার দিক দিয়া বিভিন্ন রাষ্ট্রের মধ্যে বিশেষ পার্থক্য দেখা যায়। স্যান্ডোরা রাষ্ট্রের জনসংখ্যা হইল মাত্র ৫,০০০, অপরপক্ষে চীনদেশের জনসংখ্যা হইল ৪২২ মিলিয়নেরও অধিক। কিন্তু এই কথা স্মরণ রাখিতে হইবে যে, প্রত্যেক রাষ্ট্র এমন সংখ্যক জনসমষ্টি লইয়া গঠিত হইবে যাহার দ্বারা সরকারের সর্ববিধ কার্যকলাপ সুষ্ঠুভাবে সম্পন্ন হইতে পারে।

রাষ্ট্রগঠনে জনসংখ্যার গুরুত্ব অপরিসীম। দেশের উৎপাদন ব্যবস্থা ও প্রতিরক্ষা ব্যবস্থা সুদৃঢ় ভিত্তির উপর প্রতিষ্ঠিত করিতে হইলে দেশে যথেষ্ট জনবল থাকা একান্ত প্রয়োজন। হিটলার শাসনকালে জার্মানিতে ও মুসোলিনি শাসনকালে ইতালিতে জনসংখ্যা বৃদ্ধির উদ্দেশ্যে বহু-সন্তানের জনক-জননীকে সরকারী সাহায্য প্রদান করা হইত। কিন্তু উৎপাদন পরিমাণের সহিত সামঞ্জস্য-বিহীনভাবে যদি জনসংখ্যা বৃদ্ধি পায়, তাহা হইলে বর্ধিত জনসংখ্যা দেশের উন্নতির সহায়ক না হইয়া দেশের দুর্গতির কারণ হয়। সুতরাং বর্তমানে দেশের জনসংখ্যার হ্রাস-বৃদ্ধি অনেক ক্ষেত্রে দেশের অর্থনৈতিক অবস্থার দ্বারা নিয়ন্ত্রিত হয়।

(খ) নির্দিষ্ট ভূ-ভাগ (Definite territory)

নির্দিষ্ট ভূ-ভাগ বলিতে একটি নির্দিষ্ট ভৌগোলিক সীমা বুঝায়। প্রত্যেক রাষ্ট্রেরই আধিপত্য এবং কার্যকলাপ এই নির্দিষ্ট ভৌগোলিক সীমার মধ্যে

পরিচালিত হয়। তাই নির্দিষ্ট ভূখণ্ড ব্যতীত রাষ্ট্র গঠন করা যায় না। এই নির্দিষ্ট ভূখণ্ড বলিতে শুধু ভূমির উপরিভাগ বুঝায় না। ইহা এক ব্যাপক অর্থে ব্যবহৃত হয়। রাষ্ট্রাঙ্গগত ভূ-ভাগ, ভূগর্ভস্থ সমুদ্র পদার্থ, আকাশপথ, নদনদী, গিরিপর্বত ও তিন মাইল পর্যন্ত সমুদ্রোপকূল এই ভূ-খণ্ডের অন্তর্ভুক্ত রাষ্ট্রের কর্তৃত্বাধীন। কিন্তু রাষ্ট্রের এই নিজস্ব ভূ-খণ্ডের উপর একাধিপত্যের দুই-একটি বাধা আছে। বিদেশ হইতে আগত ভারপ্রাপ্ত রাষ্ট্রদূতের গৃহ স্বরাষ্ট্রের অন্তর্ভুক্ত হইলেও সে গৃহ পররাষ্ট্রের ভূ-খণ্ডের অন্তর্ভুক্ত বলিয়া আইনতঃ পরিগণিত হয়। দিল্লীতে অবস্থিত মার্কিন দূতাবাস মার্কিন যুক্তরাষ্ট্রের ভূখণ্ডের অংশ বলিয়া পরিগণিত হয়। বিদেশী যুদ্ধজাহাজ পররাষ্ট্রের বন্দরে সাময়িক কালের জন্য অবস্থান করিলেও তাহার উপর বন্দর কর্তৃপক্ষ রাষ্ট্রের কোন কর্তৃত্ব থাকে না।

ভ্রাম্যমাণ যাযাবর জাতি রাষ্ট্র গঠন করিতে পারে না। তাহাদের দলের একজন নেতা থাকিতে পারে যাহার আদেশ দলস্থ সকলে মান্ত করে, তথাপি তাহারা স্থায়ীভাবে কোথাও বসবাস না করা পর্যন্ত রাষ্ট্র গঠন করিতে পারে না। যখন একদল লোক স্থায়ীভাবে নির্দিষ্ট ভূখণ্ডে বসবাস আরম্ভ করে, তখনই তাহাদের লইয়া রাষ্ট্রগঠনের সূত্রপাত হয়। কত লোক লইয়া রাষ্ট্র গঠিত হইবে ইহার যেমন নির্দিষ্ট কোন সংখ্যা স্থির হয় নাই, সেইরূপ রাষ্ট্রের ভূখণ্ডের আয়তনের কোন নির্দিষ্ট সীমা স্থিরীকৃত করা যায় না। বর্তমান যুগে যে সমুদ্র স্রসংবদ্ধ রাষ্ট্র দেখিতে পাওয়া যায় তাহাদের মধ্যে ভূখণ্ডের আয়তনের বিশেষ তারতম্য দেখা যায়। শ্রান্ম্যারিণো রাষ্ট্রের আয়তন হইল মাত্র ৩৮ বর্গমাইল, অপরপক্ষে ভারতের আয়তন হইল ১২ লক্ষ ২০ হাজার ৯৯ বর্গমাইল, মার্কিন-যুক্তরাষ্ট্রের ৩০ লক্ষ বর্গমাইল এবং সোভিয়েত যুক্তরাষ্ট্রের আয়তন হইল ৮৭ লক্ষ বর্গমাইল। তবে ক্ষুদ্র ও বৃহৎ উভয় প্রকারের রাষ্ট্রেরই ভূখণ্ড থাকা চাই। এস্থলে একথা স্মরণ রাখিতে হইবে যে, রাষ্ট্রের প্রাধিকার ও মর্যাদা সব সময়েই এই ভূখণ্ডের আয়তনের উপর নির্ভর করে না। বৃটেন, জার্মানী, ফরাসী প্রভৃতি দেশ আয়তনে ক্ষুদ্র হইলেও জ্ঞান ও বিজ্ঞানে অগণ-সভ্যতায় ইহাদের অবদান আদৌ উপেক্ষণীয় নহে। মনাকো বা শ্রান্ম্যারিণোর ত্রায় ক্ষুদ্র রাষ্ট্রের বিপদ হইল যে, এ জাতীয় রাষ্ট্র কখনও সম্পূর্ণভাবে আত্মনির্ভরশীল হইতে

পারে না। অর্থনৈতিক ও রাজনৈতিক ব্যাপারে ইহার। পরনির্ভরশীল হয় এবং এই পরনির্ভরশীলতা অনেক সময় ইহাদের স্বাধীনতা হরণ করে। তবে ক্ষুদ্র রাষ্ট্রের স্ববিধা হইল যে, রাষ্ট্রের আয়তন ও জনসংখ্যা স্বল্প হওয়ার ফলে রাষ্ট্রের বিভিন্ন অংশের মধ্যে ঘনিষ্ঠ সম্পর্ক স্থাপিত হয়। ফলে জনগণের মধ্যে ঐক্য প্রতিষ্ঠিত হয়। ক্ষুদ্র রাষ্ট্রের অধিবাসিগণ অধিকতর সুসংবদ্ধভাবে একতাবদ্ধ হইয়া তাহাদের মতামত প্রকাশ করিতে পারে এবং বৃহৎ রাষ্ট্রের অধিবাসিগণ অপেক্ষা অধিকতর সক্রিয়ভাবে তাহাদের গণতান্ত্রিক অধিকার রক্ষা করিতে পারে। বৃহদায়তন রাষ্ট্রের কতকগুলি স্ববিধা আছে। রাষ্ট্রের আয়তন বিস্তৃত হইলে সে রাষ্ট্রের পক্ষে আত্মরক্ষা করা সহজসাধ্য। এই কারণেই রুশ দেশ জয় করা অসম্ভব। ইহাছাড়া, বৃহৎ রাষ্ট্রগুলি ইহাদের নৈসর্গিক সম্পদের প্রাচুর্যের সাহায্যে দেশের অর্থনৈতিক উন্নতি সাধন করিয়া লোকের জীবনযাত্রার মান বৃদ্ধি করিতে পারে। মার্কিন যুক্তরাষ্ট্র, সোভিয়েত রুশিয়া প্রভৃতি দেশ ইহার প্রকৃষ্ট উদাহরণ। কিন্তু অতিকায় রাষ্ট্রগুলির প্রধান অস্ববিধা হইল যে, আয়তনের ব্যাপকতার জন্য রাষ্ট্রের বিভিন্ন অংশের মধ্যে যোগসূত্র ক্ষীণ ও দুর্বল হয়। ফলে জাতীয় ঐক্য ব্যাহত হয়। শাসনব্যবস্থায়ও নানারূপ জটিলতা সৃষ্টি হয়। বর্তমান যুগে যোগাযোগ ব্যবস্থার উন্নতি ও স্থানীয় স্বায়ত্তশাসনপদ্ধতি প্রচলনের ফলে বৃহদায়তন রাষ্ট্রের আবির্ভাব সম্ভব হইয়াছে। তাই বর্তমান যুগের রাষ্ট্র-লংজায় জনসমষ্টি ও ভূ-ভাগ রাষ্ট্রগঠনের এই দুইটি উপাদানের কোন সীমারেখা স্থির করিবার প্রয়োজন হয় না।

(গ) শাসনযন্ত্র বা সরকার (Government)

একদল লোক কোন নির্দিষ্ট জায়গায় বসবাস করিলেই তাহাকে রাষ্ট্র আখ্যা দেওয়া চলে না। নির্দিষ্ট ভূ-খণ্ডে বসবাসকারী জনসমষ্টিকে সুসংবদ্ধ করিয়া একটি হৃদৃঢ় ভিত্তিতে তাহাদের ঐক্যবদ্ধ করিতে হইবে। সুসংবদ্ধ জনসমষ্টির এই ঐক্যবদ্ধতা শাসনযন্ত্রের মাধ্যমেই সম্ভব হয়। তাই যতদিন পুঙ্খানুপুঙ্খ না তাহারা এক স্থানীয়স্থিত শাসনযন্ত্র রচনা করিয়া তাহার কর্তৃত্বাধীনে আসে ততদিন পর্যন্ত রাষ্ট্রের কোন সৃষ্টি হইতে পারে না। এই শাসনযন্ত্রই হইল রাষ্ট্রের কার্যকরী শক্তি, যে শক্তির মাধ্যমে রাষ্ট্র তাহার ইচ্ছাকে বাস্তব

রূপ দিতে পারে। শাসনযন্ত্রবিহীন বা শাসনযন্ত্রবিকল রাষ্ট্র নাবিকহীন পোতেলের মত বেশী দিন স্থায়ী হইতে পারে না। শাসনযন্ত্রই হইল রাষ্ট্রের নিয়ামক বা কর্ণধার। মানুষ যেমন তাহার বুদ্ধিবৃত্তির দ্বারা পরিচালিত হয়, রাষ্ট্রও সেইরূপ পরিচালিত হয় শাসনযন্ত্রের দ্বারা। তাই শাসনযন্ত্রকে সাধারণ লোকে রাষ্ট্র বলিয়া ভুল করে। শাসনযন্ত্রের সাধারণতঃ তিনটি বিভাগ থাকে; যথা, আইনসভা, শাসনবিভাগ ও বিচারবিভাগ। এই তিন বিভাগে নিযুক্ত কর্মচারীসমষ্টিকে লইয়া রাষ্ট্রের শাসনযন্ত্র গঠিত।

(ঘ) সার্বভৌম ক্ষমতা (Sovereignty)

রাষ্ট্রগঠনের সর্বপ্রধান উপাদান হইল সার্বভৌম ক্ষমতা। এ ক্ষমতা রাষ্ট্রের প্রাণস্বরূপ। জনসমষ্টি, নির্দিষ্ট ভূগণ্ড ও শাসনযন্ত্র থাকিলেও সার্বভৌম ক্ষমতাবিহীন রাষ্ট্র প্রকৃত রাষ্ট্র বলিয়া পরিগণিত হইতে পারে না। রাষ্ট্রের উদ্দেশ্য সাধন করিবার জন্য রাষ্ট্রকে এই চূড়ান্ত ও অপ্ৰতিহত ক্ষমতার অধিকারী হইতে হইবে। এই ক্ষমতার বলে রাষ্ট্র রাষ্ট্রান্তর্গত সমগ্র জনসমষ্টির নিকট হইতে একক ও পূর্ণ আনুগত্য দাবী করিতে পারে। রাষ্ট্রের মধ্যে এমন কোন ব্যক্তি বা প্রতিষ্ঠান নাই যাহার উপর রাষ্ট্রের অবাধ ক্ষমতা পরিচালিত হইতে পারে না। রাষ্ট্র সমাজের একটি প্রতিষ্ঠান কিন্তু অবাধ ক্ষমতার অধিকারী বলিয়া রাষ্ট্র সামাজিক অগ্ন্যন্ত্র প্রতিষ্ঠানগুলির উপর প্রভুত্ব করে। রাষ্ট্রের ভিতর এমন কোন শক্তি থাকিতে পারে না, যে শক্তি রাষ্ট্রের কোন কার্যকে অবৈধ বা অযৌক্তিক বলিয়া অমান্য করিতে পারে। রাষ্ট্রের এই ক্ষমতাকে আভ্যন্তরীণ সার্বভৌমিকতা (Internal Sovereignty) বলা হয়। রাষ্ট্র যে শুধু আভ্যন্তরীণ ব্যাপারে সর্বসর্বা তাহাই নয়। এই সার্বভৌম ক্ষমতার অধিকারী বলিয়া এক রাষ্ট্র অন্য রাষ্ট্রের নিয়ন্ত্রণাধীন হয় না। নিজ ইচ্ছা অনুসারে প্রত্যেক রাষ্ট্রই তাহার কার্য পরিচালনা করিতে পারে। সুতরাং দেখা যাইতেছে যে, রাষ্ট্রের সার্বভৌমিকতার দুইটি দিক আছে। প্রথমটি হইল, রাষ্ট্রের আভ্যন্তরীণ ব্যাপার পরিচালনা করিবার অবাধ ও চরম ক্ষমতা; অপরটি হইল, বহিঃশক্তির নিয়ন্ত্রণ হইতে সম্পূর্ণ মুক্তি (External Sovereignty)। যে রাষ্ট্রের আভ্যন্তরীণ ব্যাপারে সম্পূর্ণ আত্মনিয়ন্ত্রণের ক্ষমতা নাই, সে রাষ্ট্র স্বভাবতঃই

বহিঃশক্তির নিয়ন্ত্রণাধীন হয়। সুতরাং আভ্যন্তরীণ ব্যাপারে অবাধ ও অপ্রতিহত ক্ষমতার অধিকারী হইতে হইলে বহিঃশক্তির নিয়ন্ত্রণ পাশ হইতে সম্পূর্ণ মুক্ত হওয়া একান্ত আবশ্যিক। কিন্তু ক্যানাডা, অষ্ট্রেলিয়া প্রভৃতি এমন কতকগুলি দেশ আছে যাহাদের রাষ্ট্রপদবাচ্য বলা যায় কি-না এ সম্বন্ধে মতভেদ হইতে পারে। এই দেশগুলি রাজনৈতিক ক্রমবিবর্তনের ফলে এমন একটি অবস্থায় উন্নীত হইয়াছে যে, ইহারা নামমাত্র ইংলণ্ডের রাজার আভুগত্য স্বীকার করে, কিন্তু কার্যতঃ কি আভ্যন্তরীণ ব্যাপারে, কি বৈদেশিক ব্যাপারে ইহারা প্রায় সম্পূর্ণরূপে ইংলণ্ডের শাসনপাশ হইতে মুক্ত। এই দেশগুলিকে রাষ্ট্রপর্যায়ভুক্ত করিবার নিমিত্ত গার্গার তাঁহার প্রদত্ত রাষ্ট্রসংজ্ঞায় রাষ্ট্রের বৈশিষ্ট্য বিশ্লেষণ করিতে গিয়া “বহিঃনিয়ন্ত্রণ হইতে সম্পূর্ণরূপে অথবা প্রায় অল্পরূপভাবে মুক্ত” (Independent or, nearly so, of external control) শব্দগুলি ব্যবহার করিয়াছেন।

এস্থলে একটি কথা মনে রাখিতে হইবে যে, বর্তমান যুগে কোন রাষ্ট্র রাষ্ট্রবিজ্ঞানের সংজ্ঞা অল্পাধিক সার্বভৌম ক্ষমতার অধিকারী নহে। কোন রাষ্ট্রই সম্পূর্ণভাবে বহিঃশক্তির নিয়ন্ত্রণমুক্ত নহে। দ্বিতীয় মহাযুদ্ধের শেষে সম্মিলিত জাতিপুঞ্জ গঠনের পর রাষ্ট্রের সার্বভৌমিকতা বহুলাংশে নিয়ন্ত্রিত হইয়াছে। বর্তমান যুগের বহু প্রগতিশীল লেখকও রাষ্ট্রের সার্বভৌম ক্ষমতা অস্বীকার করেন। তাঁহারা মনে করেন আন্তর্জাতিক ক্ষেত্রে পররাষ্ট্রনীতি-পরিচালনায় রাষ্ট্রের সার্বভৌমিকতা বিশ্বশান্তি স্থাপনের অন্তরায় হইয়া উঠিয়াছে। তাই তাঁহারা বিশ্বমানবের কল্যাণে বিশেষ করিয়া রাষ্ট্রের এই বহিঃস্ব সার্বভৌম ক্ষমতার অবমান ঘটাতে চান।

রাষ্ট্রের সার্বভৌমিকতা ব্যক্তিগত না স্থানগত? (State Sovereignty personal or territorial?)

রাষ্ট্রের সার্বভৌম ক্ষমতার প্রকৃতি বিশ্লেষণ করিতে গেলে একটি প্রশ্ন স্বতঃই উঠে যে, রাষ্ট্রের এই সার্বভৌম ক্ষমতা স্থান-নিবিচারে ব্যক্তির উপর প্রকৌজ্য না ব্যক্তি-নিবিচারে নির্দিষ্ট ভূভাগের উপর প্রযোজ্য? সার্বভৌমিকতা যদি ব্যক্তিবাচক বলিয়া ধরা হয়, তাহা হইলে রাষ্ট্র এই অবাধ ক্ষমতায় বলে স্বদেশ অথবা বিদেশ সর্বত্রই সমানভাবে তাহার নাগরিকদের উপর

কর্তৃত্ব করিতে পারে। রাষ্ট্রপ্রণীত আইন নাগরিকদের উপর সর্বত্রই সমানভাবে প্রযোজ্য। অপর পক্ষে যদি সার্বভৌম ক্ষমতাকে স্থানবাচক বলিয়া ধরা যায় তাহা হইলে এই ক্ষমতার বলে রাষ্ট্র সেই রাষ্ট্রে বসবাসকারী সকল লোকের উপর—কি নাগরিক, কি বিদেশী—সমানভাবে ইহার ক্ষমতা প্রয়োগ করিতে পারিবে। নির্দিষ্ট ভূখণ্ডের মধ্যে যাহারাই বাস কর্কেন না কেন সকলেই রাষ্ট্রের আইন মানিতে বাধ্য। এই শেষোক্ত মতবাদ অনুসারে বর্তমান যুগে সার্বভৌমিকতার প্রয়োগ হয়। রাষ্ট্রের কর্তৃত্ব নির্দিষ্ট ভূ-ভাগের মধ্যেই সীমাবদ্ধ। রাষ্ট্রের এই অবাধ কর্তৃত্ব রাষ্ট্রের নিজস্ব সীমারেখার বাহিরে অত্র রাষ্ট্রের উপর বলবৎ হইতে পারে না, কেন না, তাহা হইলে অত্র রাষ্ট্রের সার্বভৌমিকতা নষ্ট হয়। এই মতবাদ অনুসারে রাষ্ট্রের সার্বভৌমিকতা নির্দিষ্ট ভূ-ভাগে সীমাবদ্ধ থাকিলেও কয়েকটি ক্ষেত্রে ইহার ব্যত্যয় দেখা যায়। কোন দেশের রাষ্ট্রদূত অথবা যুদ্ধ জাহাজ সাময়িকভাবে যখন অত্র দেশে অবস্থান করে, তখন তাহাদের উপর সেই রাষ্ট্রের অবাধ ক্ষমতা প্রযোজ্য নহে। রাষ্ট্রদূত সাময়িকভাবে ভিন্ন দেশে বাস করিলেও সে দেশের সার্বভৌম ক্ষমতার অধীন নহে।

সার্বভৌমিকতার ব্যক্তিবাচক সংজ্ঞা এযুগে আর কার্যকর নাই। এই ব্যক্তিবাচক সংজ্ঞার উপর প্রতিষ্ঠিত ক্ষমতার বলে ইংলণ্ড, ফ্রান্স প্রভৃতি কতকগুলি পাশ্চাত্য দেশ ভিন্ন দেশেও তাহাদের অবাধ ও অপ্রতিহত ক্ষমতা বলবৎ করিত। বিগত শতাব্দীতে এই সমস্ত পাশ্চাত্য রাষ্ট্র এশিয়ার কতকগুলি দেশে বিশেষ করিয়া চীনদেশে তাহাদের অবাধ ক্ষমতার প্রয়োগ করিত। এই ক্ষমতার বলে কোন ইংরাজ নাগরিক চীনদেশে গুরুতর অপরাধ করিলেও কোন চীন বিচারালয়ে চীনের আইন অনুসারে তাহার বিচার হইতে পারিত না। ইংরাজ নাগরিকের বিচার ইংরাজ বিচারকের দ্বারা তাহার স্বদেশীয় আইনানুসারে হইত। ইংলণ্ডের আইন ইংলণ্ডের বাহিরে ভিন্ন রাষ্ট্র চীনদেশে কার্যকর করা হইত। বর্তমান যুগে এই ভৌম-অধিকার-বহির্ভূত ক্ষমতার (Extra-territorial jurisdiction) অবসান ঘটিয়াছে। তথাপি একটি ক্ষেত্রে এখনও পর্যন্ত ইহার প্রয়োগ দেখা যায়। এক রাষ্ট্র অপর দেশে জাত তাহার নাগরিকের সম্মানকে পিতৃত্বের ভিত্তিতে নিজ নাগরিক বলিয়া দাবী করিতে পারে। যে আইনের দ্বারা

এই দাবী সমর্থিত হয় তাহাকে *Jus Sanguinis* বলা হয়। এই আইন সার্বভৌম ক্ষমতার ব্যক্তিবাচক সংজ্ঞার উপর প্রতিষ্ঠিত।

রাষ্ট্রের বাস্তব ও অবাস্তব রূপ (Idea vs. Concept of the State)

রাষ্ট্রসংজ্ঞা বিশ্লেষণ করিলে দেখা যায় যে, রাষ্ট্রের দুইটি বিভিন্ন রূপ আছে। একদিক দিয়া দেখিতে গেলে মনে হয় যে, রাষ্ট্র একটি বস্তুনিরপেক্ষ ধারণামাত্র, অপর দিক দিয়া দেখিতে গেলে রাষ্ট্রকে একটি বাস্তব প্রতিষ্ঠান বলিয়া মনে হয়। রাষ্ট্রের অবাস্তব রূপকে ইহার বাস্তব অস্তিত্বের উপাদান জনসমষ্টি ও নির্দিষ্ট ভূখণ্ড ছাড়াও কল্পনা করিতে পারা যায়। এই অবাস্তব রূপ অনেকাংশে যৌথ কারবারের অস্তিত্বের অন্তর্গত। বাস্তব দিক দিয়া দেখিতে গেলে রাষ্ট্রের অস্তিত্ব প্রকাশ পায় জনসমষ্টি ও নির্দিষ্ট ভূখণ্ডের মধ্য দিয়া। রাষ্ট্রবিজ্ঞানে রাষ্ট্রের এই বাস্তব বা অবাস্তব উভয় দিকই আলোচিত হয়।

অনেক লেখক আবার রাষ্ট্রসংজ্ঞাকে বিশ্লেষণ করেন আদর্শ রাষ্ট্রের মাপকাঠিতে। পরিকল্পিত আদর্শ রাষ্ট্রের উপাদান অধুনা-প্রচলিত রাষ্ট্রের উপাদান হইতে পৃথক্। আদর্শ রাষ্ট্র বলিতে তাঁহারা মনে করেন রাষ্ট্রের যাহা হওয়া উচিত অর্থাৎ ভুলত্রুটিবিহীন এক আদর্শ প্রতিষ্ঠান। আর প্রচলিত রাষ্ট্রগুলি হইল ভ্রমপ্রমাদপূর্ণ মানবীয় প্রতিষ্ঠান। অনেকে মনে করেন, এক বিশ্বরাষ্ট্র-গঠনেই আদর্শ রাষ্ট্রের পরিকল্পনা সার্থক হইবে। গ্রীক দার্শনিক প্লেটো হইতে আরম্ভ করিয়া টমাস্ মুর পর্যন্ত বহু লেখকই আদর্শ রাষ্ট্রের চিত্র অঙ্কন করিয়াছেন, কিন্তু কার্যতঃ এখন পর্যন্ত আদর্শ রাষ্ট্র একটি কল্পনামাত্র রহিয়া গেল।

ভিন্ন ভিন্ন যুগে আদর্শ রাষ্ট্রের বিভিন্ন পরিকল্পনা দেখা যায়। গ্রীক দার্শনিক প্লেটো ও অ্যারিস্টটল্ উভয়েই নগর-রাষ্ট্রের ভিত্তিতে আদর্শ রাষ্ট্রের পরিকল্পনা রূপায়িত করিয়াছিলেন। কিন্তু তাঁহাদের পরিকল্পিত এই আদর্শ রাষ্ট্রের প্রধান ত্রুটি ছিল যে, এই রাষ্ট্র সর্বসাধারণের জ্ঞান পরিকল্পিত হয় নাই, মুষ্টিমেয় নাগরিকদের স্বত্ব-সুবিধার জ্ঞানই এই রাষ্ট্রের পরিকল্পনা করা হইয়াছিল। নগর-রাষ্ট্রের পরিকল্পনা পরিত্যক্ত হইবার পর বিশ্বরাষ্ট্র-গঠনের ভিত্তিতে আদর্শ রাষ্ট্রের একটা পরিকল্পনার প্রয়াস দেখা যায়। মহাবীর

আলেকজান্দার হইতে আরম্ভ করিয়া নাৎসী নায়ক হিটলার পর্যন্ত এই আদর্শকে কার্যকর করিবার চেষ্টা করেন। কিন্তু এ প্রচেষ্টাও সফল হয় নাই। শক্তির ভিত্তিতে প্রতিষ্ঠিত কোন আদর্শই মানবসমাজে স্থায়ী হইতে পারে না। অষ্টাদশ বা বিশেষ করিয়া উনবিংশতি শতাব্দীতে একটা নতন আদর্শে অনুপ্রাণিত হইয়া বহু রাষ্ট্রের সৃষ্টি হয়। এই আদর্শবাদ জাতীয়তা-বোধ বা ‘একজাতি একরাষ্ট্র’ এই ভিত্তির উপর প্রতিষ্ঠিত হয়। ক্ষুদ্র ক্ষুদ্র বিভিন্ন ভাষাভাষী বা ধর্মাবলম্বী জাতিগুলি নিজ নিজ স্বাধীন শাসনব্যবস্থার মাধ্যমে-নিজস্ব সভ্যতা ও কৃষ্টির পরিপূর্ণ বিকাশের স্বর্ধোগ পাইল। বর্তমান শতাব্দীতে প্রথম মহাসমরের পরবর্তী কাল হইতে আদর্শ রাষ্ট্রসম্বন্ধে আবার নতন চিন্তাধারার প্রবর্তন হইয়াছে। মানুষ বোধহয় বুঝিয়াছে যে, জাতিগত বৈষম্যের জন্য পরস্পর হইতে বিচ্ছিন্ন হইয়া আত্মঘাতী কলহে লিপ্ত থাকা মানবধর্ম নয়। তাই আবার বিশ্বরাষ্ট্র সংগঠনের প্রচেষ্টা চলিয়াছে, আর এই প্রচেষ্টা রূপায়িত হইয়াছে পারস্পরিক সহযোগিতার ভিত্তিতে জাতিসংঘ ও সম্মিলিত জাতিপুঞ্জ সংগঠনে।

রাষ্ট্রের অন্যান্য বৈশিষ্ট্য

(ক) স্থায়িত্ব ও ধারাবাহিকতা (Permanence and Continuity)

রাষ্ট্রের একটি বিশেষ লক্ষণ হইল যে, ইহার বিনাশ নাই। অগ্নাগ্ন প্রতিদ্বন্দীগুলি অস্থায়ী কিন্তু প্রতিদ্বন্দী হিসাবে রাষ্ট্র হইল একমাত্র স্থায়ী প্রতিদ্বন্দী। শাসনযন্ত্রের পরিবর্তন ঘটিতে পারে, কিন্তু শাসনযন্ত্রের পরিবর্তনে রাষ্ট্রের ধারাবাহিকতা নষ্ট হয় না।

(খ) রাষ্ট্রের সমানাধিকার (Equality of States)

রাষ্ট্র বলিয়া পরিগণিত হইলেই প্রত্যেক রাষ্ট্র আন্তর্জাতিক আইনের বলে সমান অধিকার দাবী করিতে পারে। যেমন রাষ্ট্রের সকল নাগরিকই রাষ্ট্রের নিকট সমান অধিকার দাবী করিতে পারে, সেইরূপ আন্তর্জাতিক ক্ষেত্রে প্রত্যেক রাষ্ট্রই সমান প্রভাব ও প্রতিপত্তি দাবী করিতে পারে। এই অধিকার

দুই প্রকারের — আইনসম্মত অধিকার (Legal Right) ও রাজনৈতিক অধিকার (Political Right)। আইনসম্মত অধিকারের বলে ক্ষুদ্র-বৃহৎ প্রত্যেক রাষ্ট্রই আন্তর্জাতিক আইনের চক্ষে সমান বলিয়া পরিগণিত হয়। রাজনৈতিক অধিকারবলে সকল রাষ্ট্রই আন্তর্জাতিক ব্যাপারে সমানভাবে যোগদান করিবার ক্ষমতার অধিকারী হয়। রাষ্ট্রের আইনগত অধিকার সকল রাষ্ট্র কর্তৃক স্বীকৃত হইয়াছে, কিন্তু রাজনৈতিক অধিকারে সাম্য নীতি এখনও পর্যন্ত কার্যকর হয় নাই। সম্মিলিত জাতিপুঞ্জের (U. N.) সংগঠনে এই নীতির কার্যকারিতার অভাব দেখা যায়।

রাষ্ট্রের আন্তর্জাতিক আইনসম্মত সংজ্ঞা (The State as a Concept of International Law)

আন্তর্জাতিক আইনের বিচারে রাষ্ট্রসংজ্ঞা রাষ্ট্রবিজ্ঞানের 'রাষ্ট্র' সংজ্ঞা অপেক্ষা ব্যাপকতর। আন্তর্জাতিক ক্ষেত্রে রাষ্ট্র বলিয়া পরিগণিত হইতে হইলে প্রত্যেক রাষ্ট্রেরই সম্পূর্ণরূপে স্বাধীন হওয়া চাই। আন্তর্জাতিক দৃষ্টিতে এই স্বাধীনতার অর্থ হইল যে, প্রত্যেক রাষ্ট্রই অন্য রাষ্ট্রের সহিত কূটনৈতিক সম্বন্ধ স্থাপন করিতে পারিবে ও নিজ ইচ্ছানুসারে চুক্তি সম্পাদন ও চুক্তির মর্যাদা রক্ষা করিবার সামর্থ্য তাহার থাকিবে। যখনই কোন রাষ্ট্র আন্তর্জাতিক ক্ষেত্রে স্বাধীনভাবে কাজ করিতে পারে ও তাহার স্বাধীনতা অন্য রাষ্ট্রগুলি কর্তৃক স্বীকৃত হয়, তখনই সে রাষ্ট্র আন্তর্জাতিক আইনের দৃষ্টিতে রাষ্ট্রমর্যাদা লাভ করে। ১৯১৭ খৃষ্টাব্দের পর বহুদিন পর্যন্ত সোভিয়েত রাশিয়া আন্তর্জাতিক ক্ষেত্রে রাষ্ট্রমর্যাদা লাভ করিতে পারে নাই। অনেক রাষ্ট্রই ইহাকে রাষ্ট্র বলিয়া স্বীকার করিতে আপত্তি করে ও ইহার সহিত কোন কূটনৈতিক সম্পর্কও স্থাপন করে না। বর্তমান সময়ে মার্কিন যুক্তরাষ্ট্র ও অপর কয়েকটি রাষ্ট্র নয়া চীনকে রাষ্ট্র বলিয়া এখনও স্বীকার করে নাই, যদিও ইংলণ্ড, ভারত, রাশিয়া প্রভৃতি অনেক দেশ ইহাকে রাষ্ট্র বলিয়া স্বীকার করিয়া ইহার সহিত কূটনৈতিক সম্পর্ক স্থাপন করিয়াছে। বর্তমানে আন্তর্জাতিক ক্ষেত্রে রাষ্ট্র বলিয়া পরিগণিত হইবার প্রধান উপায় হইল সম্মিলিত জাতিপুঞ্জের সদস্যপদ লাভ করা। নয়া চীন এখনও পর্যন্ত এই সদস্যপদ লাভ হইতে বঞ্চিত আছে।

ভারতবর্ষকে কি স্বাধীন সার্বভৌম ক্ষমতাবিশিষ্ট রাষ্ট্র বলা চলে ?

(Is India a State ?)

১৯৪৭ খৃষ্টাব্দের ১৫ই আগস্টের পূর্বে এ প্রশ্নের আদৌ কোন প্রয়োজন ছিল না। তখন ভারতবর্ষ সম্পূর্ণরূপে ব্রিটিশ শাসনের নাগপাশে আবদ্ধ ছিল। বহু জনসমষ্টি, নির্দিষ্ট ভূখণ্ড ও শক্তিশালী শাসনযন্ত্র থাকা সত্ত্বেও সার্বভৌম ক্ষমতার অভাবে ভারত স্বাধীন রাষ্ট্রের মর্যাদা লাভ করিতে পারে নাই। কিন্তু উল্লিখিত তারিখের পর হইতে ভারত, ক্যানাডা, অস্ট্রেলিয়া প্রভৃতি স্বাধীন উপনিবেশগুলির সমপর্মায়ে উন্নীত হয়। ১৯৪৮ খৃষ্টাব্দের জুন মাস হইতে চূড়ান্তভাবে ক্ষমতা হস্তান্তরের পর ভারত পূর্ণাঙ্গ স্বাধীন রাষ্ট্রমর্যাদা লাভ করিয়াছে। ভারত তাহার নিজের সংবিধান সম্পূর্ণ স্বাধীনভাবে রচনা করিয়া আভ্যন্তরীণ ও বৈদেশিক ব্যাপার নিয়ন্ত্রণ করিতেছে। ভারত যে স্বাধীন রাষ্ট্র নয় ইহার সপক্ষে একমাত্র যুক্তি হইল যে, ভারত এখনও পর্যন্ত ব্রিটিশ সাধারণতন্ত্র রাজ্যসমূহের সদস্য রহিয়াছে ও ব্রিটিশ রাজার আনুগত্য স্বীকার না করিলেও তাহার নেতৃত্ব স্বীকার করিয়া লইয়াছে।

নতুন সংবিধানে ভারতকে একটি সার্বভৌম গণতান্ত্রিক প্রজাতন্ত্র (Sovereign Democratic Republic) বলিয়া ঘোষণা করা হইয়াছে। এই রাষ্ট্রের সর্বোচ্চ ক্ষমতাবিশিষ্ট নেতা হইলেন নির্বাচিত রাষ্ট্রপতি। ব্রিটিশ রাজার ভারতসম্পর্কে আদৌ কোন ক্ষমতা নাই, এমন কি রাষ্ট্রের কোন কাজে বা রাষ্ট্রীয় কোন উৎসবেও তাহার নাম উল্লেখিত হয় না। তাহার এই নেতৃত্ব শুধু একটি ধারণামাত্র। ভারতকে ব্রিটিশ সাধারণতন্ত্র রাজ্যসমূহের সদস্য রাখিবার নিমিত্তই এই সাধারণতন্ত্র রাজ্য হইতে ‘ব্রিটিশ’ শব্দটি পরিত্যক্ত হইয়াছে। ভারত সম্মিলিত-জাতিপুঞ্জের আদি সদস্য ও এই জাতিপুঞ্জের সভ্য বহুক্ষেত্রে ভারত তাহার স্বাধীন মতামত ব্যক্ত করিয়া বৃটেনের বিপক্ষে ভোটদান করিয়াছে। ভারত যে সম্পূর্ণ স্বাধীন তাহা তাহার নিরপেক্ষ নীতির দ্বারা প্রমাণিত হইয়াছে। সক্রিয়ভাবে ভারত এখনও পশ্চিম কোন রাষ্ট্রগোষ্ঠীতে যোগদান করে নাই। কতকগুলি কারণে ভারত স্ব-ইচ্ছায় এই সাধারণতন্ত্র রাজ্যসমূহের সদস্য রহিয়াছে। ভারতের অর্থনৈতিক, রাজনৈতিক ও বৃষ্টিগত জীবন বৃটেনের সহিত বহুদিন হইতে গুতপ্রোতভাবে জড়িত ছিল। ভারতের নতুন সংবিধান বহুলাংশে বৃটেনের

সংবিধানের অঙ্গস্বরূপ করিয়াছে। এই অর্থনৈতিক ও রাজনৈতিক কারণে ভারতের আরও কিছুদিন পর্যন্ত বুটেনের সহিত বন্ধুত্ব অক্ষুণ্ণ রাখা একান্ত আবশ্যক বলিয়া ভারতরাষ্ট্রের কর্তৃপক্ষ মনে করেন। সেইজন্য ভারত সাধারণতন্ত্র রাজ্যসমূহের সহিত সম্পর্ক ছেদ করে নাই। তবে একথা স্বরণ রাখিতে হইবে যে, ভারত স্ব-ইচ্ছায় এই সাধারণতন্ত্র রাজ্যসমূহের সদস্য হইয়াছে ও স্ব-ইচ্ছায় ইহার সদস্যপদ ত্যাগ করিবার পূর্ণ স্বাধীনতা ইহার আছে। সুতরাং ভারতকে পূর্ণাঙ্গ বরাবর রাষ্ট্র না বলিবার কোন সম্ভব কারণ নাই।

সম্মিলিত জাতিপুঞ্জকে কি রাষ্ট্র বলা যাইতে পারে? (Is the United Nations a State?)

একদিক দিয়া দেখিতে গেলে সম্মিলিত জাতিপুঞ্জ প্রতিদানকে রাষ্ট্রসংঘেব (League of Nations) উত্তরাধিকারী বলা যাইতে পারে। রাষ্ট্রসংঘের ন্যায় এই প্রতিদানও ক্ষুদ্র-বহু বহু সাবভৌম রাষ্ট্রের মিলিত একটা আন্তর্জাতিক সংস্থা। রাষ্ট্রগুলির মধ্যে চিরতরে যুদ্ধের সম্ভাবনার অবসান করিয়া পারস্পরিক সম্প্রীতি ও সহযোগিতা বৃদ্ধি করাই হইল এই প্রতিষ্ঠানের উদ্দেশ্য। এখন প্রশ্ন হইল এই প্রতিষ্ঠানকে রাষ্ট্র আখ্যা দেওয়া যায় কিনা।

অনেক লেখক সম্মিলিত জাতিপুঞ্জকে রাষ্ট্রপর্যায়ভুক্ত করেন, অনেকে আবার এই প্রতিষ্ঠানটিকে রাষ্ট্রগুলির উপরে স্থান দিয়া ইহাকে একটি অভিভাবক রাষ্ট্র (Super state) রূপে গণ্য করেন।

আন্তর্জাতিক আইনের দিক দিয়া দেখিতে গেলে সম্মিলিত জাতিপুঞ্জের মধ্যে বাটের কিছু বৈশিষ্ট্য দেখা যাইতে পারে। সাধারণ রাষ্ট্রগুলিব ন্যায় এই প্রতিষ্ঠানটির শাসন বিভাগ (স্বস্তিপরিসদ), আইন বিভাগ (সাধারণ সভা) ও বিচার বিভাগ (আন্তর্জাতিক আদালত) আছে। ইহার কার্যকলাপ পরিচালনা করিবার জন্য একটি দপ্তরখানা আছে। অন্যান্য রাষ্ট্রের ন্যায় ইহার একটি প্রধান কর্মকেন্দ্র বা রাজধানী আছে ও ইহার নিজস্ব কোষাগার ও বাৎসরিক আয়-ব্যয় নিয়ন্ত্রণের ব্যবস্থা আছে। প্রত্যেক সদস্য রাষ্ট্রই সম্মিলিত জাতিপুঞ্জে তাহাদের স্থায়ী কূটনৈতিক প্রতিনিধি নিযুক্ত করে এবং সম্মিলিত জাতিপুঞ্জও সদস্য রাষ্ট্রগুলিতে স্থায়ী,

বা অস্থায়ী প্রতিনিধি নিযুক্ত করিতে পারে। বর্তমানে কাশ্মীরের অবস্থা পর্যবেক্ষণের জন্য সম্মিলিত জাতিপুঞ্জের কতিপয় প্রতিনিধি নিযুক্ত আছেন। কতিপয় বিশেষ ক্ষেত্রে এই প্রতিষ্ঠান কোন রাষ্ট্রের বিরুদ্ধে যুদ্ধ ঘোষণা ও শাস্তি চুক্তি করিতে পারে। গণতান্ত্রিক চীনের সহিত সম্মিলিত জাতিপুঞ্জের যুদ্ধ ইহার প্রকৃষ্ট উদাহরণ।

বাস্তব দিক দিয়া দেখিতে গেলে সম্মিলিত জাতিপুঞ্জকে রাষ্ট্র বলা যায় না। যে কয়টি উপাদান লইয়া রাষ্ট্র গঠিত তাহার কোনটিই সম্যকরূপে এই প্রতিষ্ঠানে দেখিতে পাওয়া যায় না। প্রথমতঃ, এই প্রতিষ্ঠানের কোন নির্দিষ্ট ভূখণ্ড নাই বা ইহার নিজস্ব নাগরিক নাই। অন্যতম রাষ্ট্রের শাসনযন্ত্রের অঙ্গরূপ শাসনযন্ত্র থাকিলেও এই প্রতিষ্ঠানের শাসনযন্ত্র কতক বিধিনিষেধ সদস্য রাষ্ট্রগুলির পূর্ণ সম্মতি ও সাহায্য ব্যতীত কোন ব্যক্তির উপর প্রয়োগ করা যায় না। এই প্রতিষ্ঠানের যুদ্ধ ঘোষণা করিবার যে ক্ষমতা উল্লেখ করা হয় তাহার অর্থ হইল যে, এই প্রতিষ্ঠান সদস্য রাষ্ট্রগুলিকে কোন রাষ্ট্রের বিরুদ্ধে যুদ্ধ পরিচালনা করিবার জন্য সৈন্য ও যুদ্ধের জন্য প্রয়োজনীয় সাজ-সরঞ্জাম সরবরাহ করিবার জন্য সুপারিশ করিতে পারে। কিন্তু সদস্য রাষ্ট্রগুলি সম্মিলিত জাতিপুঞ্জের এই সুপারিশ গ্রহণ না করিতেও পারে। সম্মিলিত জাতিপুঞ্জের সনদের কোথাও এ-কথার উল্লেখ নাই যে, সদস্য রাষ্ট্রগুলি তাহাদের সার্বভৌম ক্ষমতা জাতিপুঞ্জে সমর্পণ করিয়াছে। গণতান্ত্রিক চীনের বিরুদ্ধে ভারত প্রভৃতি বহু রাষ্ট্রই যুদ্ধে যোগদান করে নাই। প্রত্যেক সদস্য রাষ্ট্রই এই প্রতিষ্ঠানের সহিত সম্পর্ক ছেদ করিবার ক্ষমতার পূর্ণ অধিকারী। কোন রাষ্ট্রের অনিচ্ছা বা অসম্মতির ক্ষেত্রে এই প্রতিষ্ঠান অনিচ্ছুক রাষ্ট্রের উপর ইহার সিদ্ধান্ত বলবৎ করিতে সক্ষম নয়। সুতরাং শেষ বিশ্লেষণে দেখা যায় যে, এই প্রতিষ্ঠান সার্বভৌম ক্ষমতার অধিকারী নহে। সুতরাং ইহাকে রাষ্ট্র পণ্যভুক্ত করা চলে না। রাষ্ট্রগুলির মধ্যে বিবাদে ক্ষেত্রে এই প্রতিষ্ঠান মধ্যস্থতা বা সালিসি করিতে পারে, কিন্তু মধ্যস্থতা করিবার ক্ষমতা ইহার অভিভাবক প্রতীতি করিতে পারে না। সুতরাং যতদিন পর্যন্ত সদস্য রাষ্ট্রগুলি পূর্ণ সার্বভৌম ক্ষমতার অধিকারী থাকিবে ততদিন পর্যন্ত সম্মিলিত জাতিপুঞ্জকে অভিভাবক রাষ্ট্র বলা দূর থাকুক, রাষ্ট্র বলিয়া আখ্যা দেওয়া চলিবে না। কয়েকটি বিশেষ

উদ্দেশ্য সাধনের নিমিত্ত প্রতিষ্ঠিত সার্বভৌম রাষ্ট্রগুলির একটি বিশেষ আন্তর্জাতিক সংস্থা ব্যতীত ইহাকে অন্য নামে অভিহিত করা যুক্তিসম্মত নয়।

রাষ্ট্র ও সমাজ (State and Society)

সাধারণতঃ বলা হয় যে, মানুষ সামাজিক জীব। এখন প্রশ্ন হইল যে, এই সামাজিক জীব অর্থে আমরা কি বুঝি। বহু জনসমষ্টি সভ্য জীবন যাপন করিবার জন্ত একসঙ্গে বাস করে। তাহারা নানা বিষয়ে পরস্পরের উপর নির্ভরশীল। এই পারস্পরিক নির্ভরশীলতার ভিত্তিতে মনুষ্যসমাজ গড়িয়া উঠিয়াছে। জনসমষ্টি যখন তাহাদের সভ্যজীবনের বিভিন্ন প্রয়োজন মিটাইবার জন্ত নানাসূত্রে একতাবদ্ধ হয় তখনই সমাজ-জীবনের সূত্রপাত হয়। এই সমাজ মানবজীবনকে প্রারম্ভ হইতে শেষ পর্যন্ত প্রত্যক্ষ ও পরোক্ষভাবে নিয়ন্ত্রিত করে। এই নিয়ন্ত্রণের জন্ত কোনরূপ লিখিত আইন-কানূনের আবশ্যক হয় না। প্রয়োজনের তাগিদে নানাধিক প্রথা, আচার, রীতি-নীতি আপনা হইতেই গড়িয়া উঠে। মানুষের জীবন বহুমুখী এবং এই বহুমুখী জীবনের বহুবিধ প্রয়োজন তৃপ্ত করিবার জন্ত মানুষ সমাজদেহের মধ্যে ক্ষুদ্র-বৃহৎ বহুবিধ সংঘ বা সংগঠন সৃষ্টি করিয়াছে। তাই সমাজমধ্যে আমরা দেখিতে পাই পরিবার, ধর্মসংগঠন, শিক্ষাকেন্দ্র, শ্রমিকসংঘ প্রভৃতি। এইরূপ বিভিন্ন সংগঠনের সমাবেশে সমাজদেহ গঠিত হইয়াছে। রাষ্ট্র সমাজ-মধ্যে এইরূপ একটি সংঘ। সার্বভৌম ক্ষমতার অধিকার বলিয়া রাষ্ট্র অন্যান্য সংঘগুলি অপেক্ষা একটি বিশিষ্ট সংগঠনের মর্যাদা লাভ করিয়াছে। কিন্তু তাহা সত্ত্বেও বলিতে হইবে যে, রাষ্ট্র সমাজের অন্তর্ভুক্ত একটি প্রতিষ্ঠান মাত্র। ইহার কার্যকলাপ সমাজগণের মধ্যেই সীমাবদ্ধ। সমাজ রাষ্ট্র অপেক্ষা অধিক ব্যাপক। সুসংবদ্ধ জীবনযাপনের জন্ত সমাজ রাষ্ট্র সৃষ্টি করিয়াছে, রাষ্ট্র সমাজকে সৃষ্টি কবে নাই। সেইজন্য সমাজ-জীবনের মূল-নীতিগুলিকে রাষ্ট্র উপেক্ষা করিতে পারে না। সমাজের সহিত রাষ্ট্রের নিম্নলিখিত পার্থক্যগুলি পরিলক্ষিত হয় :—

(ক) প্রথমতঃ, সমাজ রাষ্ট্র অপেক্ষা ব্যাপকতর। সমাজ মানুষের সমগ্র জীবন নিয়ন্ত্রিত করে। মানুষের বহিজীবন নিয়ন্ত্রণ করিবার উদ্দেশ্যে সমাজ-

মধ্যে রাষ্ট্রের জন্ম হইয়াছে। রাষ্ট্রের কার্যকলাপ শুধু মানুষের রাষ্ট্রনৈতিক জীবন-নিয়ন্ত্রণে সীমাবদ্ধ।

(খ) কোন নির্দিষ্ট ভূখণ্ড না হইলে রাষ্ট্র গঠিত হইতে পারে না, কিন্তু সাধারণভাবে বলিতে গেলে সমাজের সংজ্ঞা কোন নির্দিষ্ট ভূখণ্ডের সহিত ওতপ্রোতভাবে জড়িত নয়।

(গ) সমাজগঠনের সূত্রপাত রাষ্ট্রগঠনের বহু পূর্বে হইয়াছিল। রাষ্ট্রগঠন সমাজ-বিবর্তনের একটি অধ্যায় মাত্র। রাজনৈতিক প্রয়োজন মিটাইবার জন্ত সমাজবদ্ধ মানুষ বহু পরে রাষ্ট্র গঠন করে।

(ঘ) রাষ্ট্রনৈতিক জীবন নিয়ন্ত্রণের জন্ত রাষ্ট্রের শাসনযন্ত্রের বা সরকারের প্রয়োজন হয়। এই সরকারের মাধ্যমেই জনগণের সম্মিলিত ইচ্ছাশক্তি প্রকাশ পায়। সরকার হইল রাষ্ট্রের কার্যকরী শক্তি। কিন্তু সমাজের এরূপ কোন শাসনযন্ত্র নাই। এন্টিমো, বেহুইন প্রভৃতি এমন অনেক আদিমজাতি আছে যাহারা সমাজবদ্ধ জীবন যাপন করিলেও তাহাদের কোন শাসনযন্ত্র নাই।

(ঙ) সার্বভৌমিকতা রাষ্ট্রের একটি অপরিহার্য উপাদান। এই উপাদান ব্যতীত রাষ্ট্রের অস্তিত্ব বিলুপ্ত হয়। কিন্তু সমাজ রাষ্ট্র অপেক্ষা ব্যাপকতর হইলেও সমাজেব একপ কোন বাস্তব সার্বভৌম ক্ষমতা নাই।

(চ) পরিশেষে বলা যায় যে, উদ্দেশ্যের দিক দিয়া দেখিতে গেলে উভয়ের পার্থক্য অধিকতর স্পষ্ট। রাষ্ট্র শুধু মানুষের বহির্জীবনের আচরণ স্থির করিয়া দেয়। তাহার অন্তর্জীবন অর্থাৎ তাহার চিন্তাধারা, ইচ্ছা ও উদ্দেশ্য নিয়ন্ত্রণ করিতে পারে না। সুতরাং রাষ্ট্রের উদ্দেশ্যের সীমারেখা স্থির করা সম্ভব। কিন্তু সমাজ নানাভাবে মানুষের সমগ্র জীবনের উপর প্রভাব বিস্তার করিয়া তাহাকে নানাভাবে নিয়ন্ত্রিত করে। মানুষ সমাজের মধ্যে জন্মগ্রহণ করে ও স্নেহ, ভালবাসা, শ্রদ্ধা, ভয় প্রভৃতি সামাজিক প্রবণতার দ্বারা তাহার চরিত্র গঠিত হয়। নানাবিধ সামাজিক বিধিনিষেধ তাহার এই মহত্ত্ববিকাশে সহায়তা করে। এই সামাজিক প্রবণতা ৭৭ বিধিনিষেধগুলিকে রাষ্ট্র ব্যক্তির আত্ম-বিকাশের পথ স্তগম করিবার নিমিত্ত নিয়ন্ত্রিত করিতে পারে, কিন্তু সেগুলিকে সৃষ্টি বা সম্পূর্ণরূপে বিনষ্ট করিতে পারে না।

রাষ্ট্র ও সমাজের অন্যান্য সংঘ (State and other Associations)

সামাজিক প্রতিষ্ঠান হিসাবে রাষ্ট্র ও অন্যান্য সংঘের মধ্যে কিছু সাদৃশ্য দেখা যায়। অন্যান্য সংঘগুলিও রাষ্ট্রের মত জনসমষ্টি লইয়া গঠিত। ইহাদেরও শাসনযন্ত্রের মত কার্যকরী সমিতি ও আইন-কানুন আছে। কিন্তু এই কয়েকটি সাদৃশ্য ব্যতীত ইহাদের মধ্যে আর কোন সাদৃশ্য নাই। অধিকন্তু ইহাদের পার্থক্যগুলি অত্যন্ত গুরুত্বপূর্ণ।

(ক) প্রথমতঃ, প্রত্যেক রাষ্ট্রেরই একটি নির্দিষ্ট ভৌগোলিক সীমা আছে, আর এই ভৌগোলিক সীমার মধ্যেই রাষ্ট্রের কর্তৃত্ব পরিচালিত হয়। কিন্তু অন্যান্য সংঘ কোন নির্দিষ্ট ভূভাগে সীমাবদ্ধ নয়। নির্দিষ্ট ভূখণ্ডের বাহিরে অন্য রাষ্ট্রের সীমারেখার মধ্যেও অন্যান্য প্রতিষ্ঠানগুলি তাহাদের কার্য পরিচালনা করিতে পারে। উদাহরণস্বরূপ বলা যাইতে পারে যে, আমাদের দেশের রামকৃষ্ণ মিশন একটি বিশেষ উদ্দেশ্যমূলক সংঘ। কিন্তু ভারতের বাহিরে অন্য রাষ্ট্রের নাগরিকগণও এই সংঘের সভ্য হইতে পারেন এবং এই সংঘের কার্য অন্য রাষ্ট্রের ভূখণ্ডেও পরিচালিত হইতে পারে। এমন কি, সমস্ত পৃথিবীব্যাপী একটি সংঘ গড়িয়া উঠিতে পারে। রোমান ক্যাথলিক ধর্মসম্প্রদায়ের কায়কলাপ পৃথিবীব্যাপী প্রায় সব দেশই ব্যাপ্ত।

(খ) দ্বিতীয়তঃ, মানুষ মাত্রকেই একটা-না-একটা রাষ্ট্রের সভ্য হইতেই হইবে। জন্মকাল হইতে মানুষ রাষ্ট্রের নাগরিক হয়। সাবালক হইলে তাহার ইচ্ছানুসারে এক রাষ্ট্রের নাগরিকত্ব পরিত্যাগ করিয়া অন্য রাষ্ট্রের নাগরিক হইতে পারে। কিন্তু তাহাকে কোন-না-কোন রাষ্ট্রের নাগরিক হইতেই হইবে। কিন্তু সামাজিক অন্যান্য সংঘের সভ্য হওয়া বা না-হওয়া সম্পূর্ণ তাহার ইচ্ছাধীন। যে-কোন ছাত্র ইচ্ছা করিলে তাহার ক্রীড়াসংঘ বা বিদ্যালয় পরিত্যাগ করিতে পারে। রাষ্ট্রের সভ্য হওয়া মানুষের পক্ষে বাধ্যতামূলক ; অন্যান্য সংঘের সভ্য হওয়া সম্পূর্ণরূপে স্বেচ্ছাপ্রণোদিত।

(গ) তৃতীয়তঃ, একজন লোক একই সময়ে মাত্র একটি রাষ্ট্রের নাগরিক হইতে পারে। একই সঙ্গে দুই বা ততোধিক রাষ্ট্রের নাগরিক হওয়া আইনতঃ ও কার্যতঃ অসম্ভব। কিন্তু একটি লোক একই সময়ে অন্যান্য বহু সংঘের সভ্য হইতে পারে—তাহাতে কোন বাধা নাই।

(ঘ) চতুর্থতঃ, উদ্দেশ্যের দিক দিয়া বিচার করিলে রাষ্ট্র ও অগ্নাত সংঘগুলির মধ্যে প্রভেদ অনেক বেশী। অগ্নাত প্রতিষ্ঠানগুলি কোন বিশেষ প্রয়োজন মিটাইবার জন্ত গঠিত হয়। মানুষের আধ্যাত্মিক প্রয়োজন তৃপ্ত করিবার জন্ত ধর্মসংঘগুলির আবির্ভাব হইয়াছে, শিক্ষায়তনগুলির সৃষ্টি হইয়াছে মানুষের বুদ্ধিবৃত্তির ও নৈতিক জীবনের উন্নতি সাধনের জন্ত। অনুরূপভাবে প্রত্যেকটি সংঘের একটি নির্দিষ্ট উদ্দেশ্য থাকে। কিন্তু রাষ্ট্রের উদ্দেশ্য এইরূপ এক বা একাধিক বিষয়ে সীমাবদ্ধ নহে। মানবজীবনের সর্বাত্মক মঙ্গল সাধন করাই রাষ্ট্রের প্রধান উদ্দেশ্য। সুতরাং রাষ্ট্রের উদ্দেশ্য অগ্নাত সংঘগুলির উদ্দেশ্য অপেক্ষা অধিকতর ব্যাপক।

(ঙ) পঞ্চমতঃ, অগ্নাত প্রতিষ্ঠানগুলি দীর্ঘস্থায়ী না হইতেও পারে। যে উদ্দেশ্য-প্রণোদিত হইয়া তাহারা গঠিত হয় সেই উদ্দেশ্য সফল হইলে বা অন্য কারণে তাহারা লোপ পাইতে পারে। কিন্তু রাষ্ট্রের বিনাশ নাই। অগ্নাত সংঘগুলির রাষ্ট্রের মত স্থায়িত্ব বা ধারাবাহিকতা নাই।

(চ) ষষ্ঠতঃ, অগ্নাত সংঘগুলি অনেক সময় মানুষের বিশেষ প্রয়োজন মিটাইবার জন্ত গঠিত হয়। অনেক সময় রাষ্ট্রও এইরূপ জনহিতকর সংঘ গঠনে সহায়তা করে। কিন্তু সকল সংঘই রাষ্ট্রের কর্তৃত্বাধীন ও রাষ্ট্র ইচ্ছা করিলে তাহাদের কাৰ্যকলাপের অবসান ঘটাইতে পারে।

(ছ) পরিশেষে, রাষ্ট্রের সহিত অগ্নাত সংঘগুলির প্রধান পার্থক্য হইল যে, রাষ্ট্র সার্বভৌম ক্ষমতার অধিকারী। আর, এই ক্ষমতার বলে রাষ্ট্র তাহার নাগরিকগণের ও অগ্নাত সংঘগুলির উপর আধা কর্তৃত্ব করিতে পারে। কোন সংঘের কোন একজন সভ্য যদি সেই সংঘবিরোধী কাজ করে তাহা হইলে সেই সংঘ সেই সভাকে জরিমানা করিতে পারে বা সভ্যপদচ্যুত করিতে পারে, কিন্তু তাহাকে কোন দৈহিক শাস্তি দিবার ক্ষমতা ঐ সংঘের নাই। সার্বভৌম ক্ষমতার অধিকারী বলিয়া রাষ্ট্র তাহার সভ্যগণকে যে-কোন শাস্তি এমন কি মৃত্যুদণ্ড পর্যন্তও দিতে পারে।

সুতরাং দেখা যাউতেছে যে, সমাজগণ্ডির মধ্যে যে বহুবিধ সংঘ গড়িয়া উঠিয়াছে তাহার মধ্যে রাষ্ট্রই হইল সর্বাপেক্ষা গুরুত্বপূর্ণ সংঘ। ব্যাপকতা, উদ্দেশ্য, ক্ষমতা ও স্থায়িত্বের দিক দিয়া দেখিতে গেলে রাষ্ট্র অসীম—অগ্নাত প্রতিষ্ঠানগুলি সসীম।

রাষ্ট্র ও শাসনযন্ত্র (State and Government)

দৈনন্দিন জীবনে রাষ্ট্র ও শাসনযন্ত্র প্রায় প্রতিশব্দ হিসাবে ব্যবহার করা হয়। কিন্তু রাষ্ট্রবিজ্ঞানের সংজ্ঞা হিসাবে এই দুইটি শব্দের অর্থ সম্পূর্ণ পৃথক। যে চারিটি উপাদান লইয়া রাষ্ট্র গঠিত হয়, তাহার মধ্যে শাসনযন্ত্র একটি মাত্র। যদিও রাষ্ট্রের কার্যকরী শক্তি এই শাসনযন্ত্র দ্বারা পরিচালিত হয়, তথাপি রাষ্ট্র শাসনযন্ত্র হইতে সম্পূর্ণ পৃথক। যদিও মস্তিষ্ক দ্বারা মাত্ৰ পরিচালিত হয় তথাপি মস্তিষ্ক যেমন সমগ্র মাত্ৰ্যটিকে বুঝায় না, সেইরূপ শাসনযন্ত্র শব্দটি দ্বারা সমগ্র রাষ্ট্রসংজ্ঞাটির সম্যক পরিচয় পাওয়া যায় না। রাষ্ট্র ও শাসনযন্ত্র বা সরকারের মধ্যে অনেক বাস্তব প্রভেদ আছে।

(ক) প্রথমতঃ, রাষ্ট্র গঠিত হয় দেশের সমগ্র অধিবাসীকে লইয়া। সকল নাগরিকই রাষ্ট্রের সভ্য। কিন্তু সরকার গঠিত হয় অনেক অল্পসংখ্যক লোক লইয়া। রাষ্ট্রের শাসনকার্য পরিচালনাকালে যাহারা নিযুক্ত থাকে অর্থাৎ আইনসভাগুলির সদস্য, শাসনবিভাগীয় কর্মচারী ও বিচারবিভাগীয় কর্মচারী-বৃন্দকে লইয়া শাসনযন্ত্র গঠিত হয়। সুতরাং রাষ্ট্র সরকার অপেক্ষা ব্যাপকতর।

(খ) দ্বিতীয়তঃ, প্রত্যেক রাষ্ট্রই একটা নির্দিষ্ট ভূখণ্ডে সীমাবদ্ধ। কোন রাষ্ট্রবিশেষের কথা ভাবিতে গেলে একটা ভৌগোলিক সীমার কথা মনে পড়ে। কিন্তু সরকার বলিতে কোন নির্দিষ্ট ভূখণ্ডের কল্পনার প্রয়োজন হয় না। সরকার প্রধানতঃ শাসনকালে রত অল্পসংখ্যক লোককে বুঝায়।

(গ) তৃতীয়তঃ, রাষ্ট্র একটি চিরস্থান প্রতিষ্ঠান। ইহার বিনাশ নাই। কিন্তু রাষ্ট্রের কর্ণধার হইলেও সরকার পরিবর্তনশীল। সরকারের পরিবর্তনে রাষ্ট্রের স্থায়িত্বের কোনরূপ বিপর্যয় ঘটে না।

(ঘ) চতুর্থতঃ, রাষ্ট্র সার্বভৌম ক্ষমতার অধিকারী, সরকারের এ ক্ষমতা নাই। সরকার রাষ্ট্রের বিধানানুযায়ী রাষ্ট্রের ক্ষমতা পরিচালনা করে। কিন্তু রাষ্ট্র ইচ্ছা করিলেই সরকারকে ক্ষমতাচ্যুত করিয়া নূতন সরকার গঠন করিতে পারে।

(ঙ) পঞ্চমতঃ, সকল দেশেই একই উপাদান লইয়া রাষ্ট্র গঠিত। জুনসমষ্টি, নির্দিষ্ট ভূভাগ, শাসনযন্ত্র ও সার্বভৌম ক্ষমতা—এই চারিটি উপাদান সকল রাষ্ট্রেই বর্তমান। এ দিক দিয়া দেখিতে গেলে সব রাষ্ট্রই এক পর্যায়ভুক্ত। কিন্তু দেশভেদে শাসনযন্ত্রের রূপ বিভিন্ন হয়। রাষ্ট্র হিসাবে

গ্রেট ব্রিটেন ও আমেরিকা যুক্তরাষ্ট্র একই প্রকার। কিন্তু দুইটি দেশের শাসনযন্ত্র সম্পূর্ণ পৃথক্।

(৮) পরিশেষে, বলিতে পারা যায় রাষ্ট্র একটি মনঃকল্পিত ধারণা মাত্র ; ইহার কোন বাস্তব রূপ নাই। কিন্তু সরকারের একটি বাস্তব অস্তিত্ব আছে। রাষ্ট্র বলিলে একটি বস্তুনিরপেক্ষ কল্পনা বুঝায় আর সরকার হইল রাষ্ট্রের সক্রিয়, বহিঃপ্রকাশ। তাই সরকারের বিরুদ্ধে নাগরিকদের অভিযোগ থাকিতে পারে, কিন্তু রাষ্ট্রের বিরুদ্ধে তাহাদের অভিযোগ থাকিতে পারে না। রাষ্ট্রই হইল সকল অধিকারের উৎস।

রাষ্ট্রের বিভিন্ন প্রকাশ (Different manifestations of the State)

ইতিহাস পর্যালোচনা করিলে দেখিতে পাওয়া যায় যে, বিভিন্ন যুগে বিভিন্ন পরিবেশ ও চিন্তাধারা দ্বারা প্রভাবিত হইয়া রাষ্ট্র বিভিন্নরূপে আত্মপ্রকাশ করিয়াছে। অতীত, মধ্যযুগীয় ও আধুনিক রাষ্ট্রগুলির মধ্যে যে শুধু গঠন প্রকৃতির পার্থক্য দেখা যায় তাহা নহে, এই রাষ্ট্রগুলির শাসনব্যবস্থা, উদ্দেশ্য ও কর্মপরিধির মধ্যেও যথেষ্ট বৈষম্য পরিলক্ষিত হয়।

১। নগর-রাষ্ট্র (City-state)

প্রাচীন গ্রীস ও রোম দেশে নগরকে কেন্দ্র করিয়া রাষ্ট্র গঠিত হয়। নগর-রাষ্ট্রগুলির মধ্যে এথেন্স ও স্পার্টা সমধিক প্রসিদ্ধি লাভ করে। রাষ্ট্রের আয়তন প্রধানতঃ নগরেই সীমাবদ্ধ থাকিত বলিয়া এই জাতীয় রাষ্ট্রকে নগর-রাষ্ট্র বলা হইত। গ্রীক ও রোমক সভ্যতা এই নগর-রাষ্ট্রকে কেন্দ্র করিয়া গড়িয়া উঠে। এই নগর-রাষ্ট্রের যে সমস্ত অধিবাসীর প্রচুর অবসর ছিল, এবং যাহারা রাষ্ট্রপরিচালনা-কার্যে সক্রিয়ভাবে অংশগ্রহণ করিবার যোগ্যতার অধিকারী ছিল তাহাদিগকেই নাগরিক বলা হইত। ক্রীতদাস, দিন-মজুর ও স্বীলোকগণ রাষ্ট্রপরিচালনা-কার্যে অযোগ্য বলিয়া বিবেচিত হইত বলিয়া তাহারা নাগরিক বলিয়া গণ্য হইত না। মধ্যযুগে ও ইউরোপে ভেনিস, ফ্লোরেন্স প্রভৃতি কতিপয় নগর-রাষ্ট্রের অস্তিত্ব হয়।

প্রাচীন নগর-রাষ্ট্রের সহিত আধুনিক অতিকায় রাষ্ট্রগুলির নানাদিকৃ দিয়া পার্থক্য দেখা যায়। প্রাচীন যুগের নগর-রাষ্ট্রে প্রত্যক্ষ গণতন্ত্র প্রচলিত ছিল। পূর্ণবয়স্ক স্বাধীন নাগরিকগণ শাসনব্যবস্থায় প্রত্যক্ষ ও

সক্রিয়ভাবে অংশ গ্রহণ করিত, কিন্তু বর্তমান যুগের রাষ্ট্র পরোক্ষ বা প্রতিনিধিমূলক গণতন্ত্র দ্বারা পরিচালিত হয়। দ্বিতীয়তঃ, প্রাচীনকালের রাষ্ট্রে মুষ্টিমেয় বিশ্রামভোগী পরজীবী অভিজাত সম্প্রদায় নাগরিক স্বত্ব-স্ববিধার অধিকারী ছিল, বর্তমান রাষ্ট্রে মাঝে মাঝে এতটা ভেদ দেখা যায় না। সকলেরই সমান অধিকার রাষ্ট্র কর্তৃক স্বীকৃত হয়। তৃতীয়তঃ, প্রাচীন যুগের নগর-রাষ্ট্রকে ব্যক্তির উপর স্থান দেওয়া হইত। রাষ্ট্র কর্তৃক ব্যক্তি-স্বাধীনতা কখনও স্বীকৃত হয় নাই। বর্তমান যুগে রাষ্ট্রের অস্তিত্ব শুধু রাষ্ট্রের জন-কল্যাণ ক্ষমতার দ্বারাই সমর্থিত হয়। পরিশেষে বলা যায়, প্রাচীন যুগের রাষ্ট্রের অধিকাংশ অধিবাসী একটি নিকৃষ্ট স্তরের জীব বলিয়া পরিগণিত হইত। যে শাসনব্যবস্থায় ব্যক্তি-স্বাধীনতার কোন স্থান ছিল না, বর্তমান গণতান্ত্রিক রাষ্ট্রের মাপকাঠিতে তাহাকে প্রকৃত গণতান্ত্রিক রাষ্ট্র বলা যায় না।

২। প্রাচীন অতিকায়-রাষ্ট্র বা সাম্রাজ্য—Empire

নগর-রাষ্ট্রের অভ্যুত্থানের পূর্বে প্রতীচ্য দেশে কতিপয় অতিকায় রাষ্ট্রের আবির্ভাব হয়। স্বরাষ্ট্র ব্যতীত বহু পররাষ্ট্র বলপ্রয়োগে বিজয় দ্বারা এই সকল সাম্রাজ্য প্রতিষ্ঠিত হয়। যোগাযোগ ব্যবস্থার অসুবিধাসত্ত্বেও এই সকল সাম্রাজ্য বহুদিন পর্যন্ত বহু বিভিন্ন জাতির উপর আধিপত্য অটুট রাখিতে সমর্থ হইয়াছিল। প্রাচীন মিশর, চীন, ভারত, পারস্য ও আসিরীয়া দেশগুলি কর্তৃক এই সকল সাম্রাজ্য প্রতিষ্ঠিত হয়। এই সকল সাম্রাজ্যের বৈশিষ্ট্য ছিল যে, সহ্যাই ছিলেন সর্ব বিষয়ের অধিকতা—তাহার ইচ্ছা ছিল চরম আইন। বিজিত দেশগুলির কোনপ্রকার স্বাধীনতা ছিল না। সমগ্র সাম্রাজ্যাবাপী কেন্দ্রীয় শাসন বলবৎ ছিল। অনেক সময় বিজেতা বিজিত জাতিসমূহকে ক্রীতদাস পর্যায়ে পর্যবসিত করিত।

মিশর, পারস্য প্রভৃতি সাম্রাজ্যের পর অদ্বিতীয় বীর আলেকজান্দার কর্তৃক ম্যাসিডোনিয়ান সাম্রাজ্য প্রতিষ্ঠিত হয়। অতি অল্পকালের মধ্যে আলেকজান্দার সমগ্র গ্রীস দেশে তাহার আধিপত্য বিস্তার করিয়া দুর্বার বেগে মিশর, পারস্য ও ভারতের সিন্ধুনদ পর্যন্ত তাহার সাম্রাজ্য বিস্তার করেন। অবশ্য তাহার অকালমৃত্যুর ফলে তাহার এই বিস্তৃত সাম্রাজ্য

ধ্বংস পায়। ইহার পর রোমক সাম্রাজ্যের অভ্যুত্থান ঘটে। প্রাচীন সাম্রাজ্যগুলির মধ্যে সভ্যতার অগ্রগতিতে রোমক সাম্রাজ্যের অবদান সর্বাপেক্ষা অধিক। রোমক শাসনপদ্ধতি ও আইন পরবর্তী যুগের রাষ্ট্রব্যবস্থার পথ-নির্দেশক বলিয়া আজও পর্যন্ত পরিগণিত হয়।

অষ্টাদশ, উনবিংশ ও বিংশ শতাব্দীতে বৃটিশ, ফরাসী, রুশ ও অটোম্যান-তুর্ক সাম্রাজ্যের অভ্যুত্থান ঘটে। কিন্তু সাম্রাজ্যবাদ নিছক পশুবলের উপর প্রতিষ্ঠিত। এই ব্যবস্থায় শাসিতের ইচ্ছার কোন স্থান নাই। তাই পৃথিবীর কোন সাম্রাজ্যই চিরস্থায়ী হয় নাই।

৩। সামন্ততান্ত্রিক রাষ্ট্র—Feudal State

রোমক সাম্রাজ্যের পতনের পর সমগ্র ইউরোপ কতকগুলি সামন্ততান্ত্রিক রাষ্ট্রে বিভক্ত হয়। প্রত্যেক দেশে রাজতন্ত্র বর্তমান থাকিলেও রাজার ক্ষমতা ছিল সীমাবদ্ধ। প্রত্যেক দেশই কতকগুলি সামন্ত অঞ্চলে বিভক্ত ছিল এবং এক এক অঞ্চলের সামন্ত ছিলেন সেই অঞ্চলের প্রকৃত শাসনকর্তা। সামন্তগণ দেশের রাজাকে নির্দিষ্ট কর প্রদান ও যুদ্ধের সময় সৈন্য দিয়া সাহায্য করিতেন। ইহা ব্যতীত অন্য সর্ববিষয়ে তাঁহারা স্বাধীন ছিলেন। নিজ নিজ এলাকায় তাঁহারা সর্ববিষয়ে স্বৈরাচারী ছিলেন।

১৮৬৮ খৃষ্টাব্দের পূর্বে জাপানেও এই সামন্ততান্ত্রিক রাষ্ট্রব্যবস্থা প্রচলিত ছিল। সামন্ততান্ত্রিক ব্যবস্থার কুফল হইল যে, দেশে কোন শক্তিশালী কেন্দ্রীয় সরকার না থাকার ফলে রাষ্ট্রশক্তি দুর্বল হয়। সামন্ত নেতাদের মধ্যে ক্ষমতা লইয়া প্রতিদ্বন্দ্বিতার ফলে দেশে সর্বদা অশান্তি ঘটে। এই ব্যবস্থায় মুষ্টিমেয় শাসকশ্রেণী ব্যতীত কৃষক, শ্রমিক ও বণিক প্রভৃতি শ্রেণী লইয়া গঠিত সাধারণ শ্রেণী ভূমিদাসে পর্যবসিত হয়।

৪। জাতীয় রাষ্ট্র—Nation-State

অন্তর্জগতের ফলে যখন সামন্ততান্ত্রিক রাষ্ট্রব্যবস্থার পতন হইল, সেই সুযোগে ইউরোপের বিভিন্ন দেশের নৃপতিবর্গ ক্ষমতামূলক বণিকশ্রেণীর সাহায্যে নিজ নিজ দেশে নিরংকুশ আধিপত্য বিস্তার করিয়া জাতীয় রাষ্ট্রের গোড়া পত্তন করেন। কিন্তু এই সময়কার রাষ্ট্রগুলি জাতির ভিত্তিতে গঠিত হইলেও একমাত্র রাজাই ছিলেন রাষ্ট্রের মালিক—জনসাধারণের শাসন-

ব্যবস্থায় কোন হাত ছিল না। রাজ্যের স্বৈরাচারের বিরুদ্ধে জনসাধারণের ঐক্যবদ্ধ প্রতিবাদ ও প্রতিরোধ জাতির মধ্যে সাজাত্যবোধ সৃষ্টি করিতে সাহায্য করে। পোলাণ্ডের যথেষ্ট বিভাগ, নেপোলিয়নের খুসীমত বিভিন্ন রাষ্ট্রের সীমানা নির্ধারণ ও নেপোলিয়নের পরাজয়ের পর ভিয়েনা চুক্তির রচয়িতাগণের জাতির ভিত্তিতে রাষ্ট্র গঠনের নৈতিক কর্তব্যের প্রতি ইচ্ছাকৃত ঔদাসীন্য জনসাধারণের মধ্যে জাতীয়তাবোধ উন্মেষের সাহায্য করে। পরবর্তী কালে এই ক্রমবর্ধমান জাতীয়তাবোধ এরূপ উগ্র ও দুর্বীর রূপে আত্মপ্রকাশ করে যে, জাতির ভিত্তিতে রাষ্ট্র গঠনের অপরিহার্যতা স্বীকৃত হয়। ফলে, প্রথম বিশ্ব সমর পরিসমাপ্তির পর ভাৰ্সাই সন্ধি চুক্তিতে জাতির এই দাবী সর্বপ্রথম স্বীকৃত হইয়া জাতীয় রাষ্ট্রের অভ্যুত্থান ঘটে। জাতীয় রাষ্ট্রের ভিত্তি হইল 'এক জাতি এক রাষ্ট্র'। পোলাণ্ডের অধিবাসিগণ একই ভাষাভাষী ও একই ঐতিহ্যের অধিকারী, সুতরাং তাহাদের নিজস্ব জাতীয় রাষ্ট্র গঠনের অধিকার আছে। জার্মানী, রুশিয়া বা অস্ট্রিয়ার পোলাণ্ডের উপর কর্তৃত্ব করিবার কোন অধিকার নাই।

জাতীয় রাষ্ট্রের অভ্যুত্থান নানাদিক দিয়া কাম্য হইলেও জাতীয় রাষ্ট্র গঠনের দাবী অবাধ ও শর্তহীন নহে। যে স্থলে জাতীয় রাষ্ট্র গঠনের ফলে একদিকে আত্মকলহ ও প্রাদেশিকতার সৃষ্টি হয় এবং অপর দিকে বিশ্বশান্তি বিঘ্নিত হইবার সম্ভাবনা থাকে, সেরূপ স্থলে এই অধিকারকে অনধিকার বলা চলে।

৫। বিশ্ব-রাষ্ট্র—World State

বিশ্ব-রাষ্ট্র হইল রাষ্ট্রের আদর্শ রূপ—ইহার বাস্তব কোন অস্তিত্ব এখনও পর্যন্ত দেখা যায় না। রাজনৈতিক বিবর্তনের ফলে ঊনবিংশ শতাব্দীর মধ্যভাগ হইতে বিভিন্ন জাতিগুলির মধ্যে যে সাজাত্যবোধ জাগরিত হয়, তাহার ফলে জাতির ভিত্তিতে গঠিত জাতীয় রাষ্ট্রের অভ্যুত্থান ঘটে। জাতীয় রাষ্ট্রগুলি একদিকে যে রূপ স্বাধীনভাবে তাহাদের আত্মোন্নতির দ্বারা জগৎ-সভ্যতায় সমৃদ্ধ করিল, অপর দিকে সেইরূপ পারস্পরিক কলহ, বিবেচ ও ক্ষমতা লইয়া দ্বন্দ্ব বৃদ্ধি পাইল। উগ্র স্বাদেশিকতার ফলে যুদ্ধ অনিবার্য হইয়া উঠিল। পর পর দুইটি বিশ্ব-মহাসমর এই অত্যধিক স্বাদেশিকতার ফল।

দুইটি বিশ্ব-মহাসমরের ভয়াবহ ধ্বংসলীলায় মানবজাতি ভীত ও সন্ত্রস্ত হইয়া শান্তি ও আন্তর্জাতিকতার আদর্শে বিশ্বাসী হইয়াছে। মানুষ বুঝিতে পারিয়াছে যে, জাতীয় রাষ্ট্রই সমাজ সংগঠনের শেষ অধ্যায় নহে এবং জাতীয় রাষ্ট্রের প্রতি আত্মগতাই মানুষের শেষ কর্তব্য নহে। মানুষ বুঝিয়াছে যে, জাতিগত বৈষম্যের জন্য পরস্পর হইতে বিচ্ছিন্ন হইয়া আত্মঘাতী কলহে লিপ্ত থাকা মানবধর্ম নয়। তাই বিশ্ব-রাষ্ট্র সংগঠনের প্রচেষ্টা চলিয়াছে, আর এই প্রচেষ্টা রূপায়িত হইয়াছে পারস্পরিক সহযোগিতার ভিত্তিতে জাতিসংঘ ও সম্মিলিত জাতিপুঞ্জ সংগঠনে।

কিন্তু বিশ্ব-রাষ্ট্র গঠনের পথে প্রধান অন্তরায় হইল রাষ্ট্রের অবাধ সার্বভৌমিকতার ধারণা এবং রাষ্ট্র সঙ্ঘর্ষে এই ধারণা বজ্জিত না হওয়া পর্যন্ত বিশ্ব-রাষ্ট্রের পরিকল্পনা সফল হইতে পারে না। ভারত-পাকিস্তান বিরোধ, ইসরাইল-আরব বিরোধ, চীনের সমস্যা ও সর্বোপরি পশ্চিম ও পূর্ব গোষ্ঠীর রাষ্ট্রজোটের মারাত্মক দ্বন্দ্ব আন্তর্জাতিকতার ভিত্তিতে গঠিত বিশ্ব-রাষ্ট্র গঠনের প্রধান অন্তরায়। বিভিন্ন জাতিগুলি যে দিন বুঝিতে পারিবে যে, যে রাষ্ট্র আভ্যন্তরীণ শান্তি, শৃংখলা ও প্রগতির রক্ষক, সে রাষ্ট্রের পক্ষে বিধ্বংসী যুদ্ধ দ্বারা আন্তর্জাতিক শান্তি বিনষ্ট করা কখনই উচিত নয়—সেদিন বিশ্ব-রাষ্ট্র গঠনের পথ উন্মুক্ত হইবে।

সংক্ষিপ্তসার

রাষ্ট্রসংজ্ঞা—যখন একদল লোক কোন নির্দিষ্ট ভূভাগে আইনশৃংখলা রক্ষার জন্য সংঘবদ্ধ হইয়া শাসনযন্ত্র গঠন করে ও বহির্নিয়ন্ত্রণ হইতে সম্পূর্ণ মুক্ত হইয়া তাহাদের সামাজিক জীবন যাপন করে, তখন তাহাকে রাষ্ট্র বলা হয়।

প্রত্যেক রাষ্ট্রই চারিটি উপাদান লইয়া গঠিত; যথা, (১) জনসমষ্টি, (২) নির্দিষ্ট ভূখণ্ড, (৩) শাসনযন্ত্র ও (৪) সার্বভৌম ক্ষমতা। উপাদানগুলির মধ্যে শেষোক্তটি রাষ্ট্রগঠনে সর্বাপেক্ষা গুরুত্বপূর্ণ। ইহার অর্থ হইল আভ্যন্তরীণ ব্যাপারে রাষ্ট্রের অবাধ ও অপ্রতিহত ক্ষমতা এবং বৈদেশিক রাষ্ট্রসম্পর্কে সম্পূর্ণ স্বাধীনতা। বর্তমান রাষ্ট্রসংজ্ঞায় জনসমষ্টি ও ভূভাগের কোন নির্দিষ্ট

সীমা স্থির নাই। রাষ্ট্রের অন্তান্ত বৈশিষ্ট্যের মধ্যে ইহার স্থায়িত্ব, ধারাবাহিকতা ও অন্ত রাষ্ট্রের সহিত সমানাধিকার উল্লেখযোগ্য। আন্তর্জাতিক আইনের বিচারে রাষ্ট্রপদবাচ্য হইতে হইলে অন্ত রাষ্ট্রকর্তৃক স্বীকৃতির প্রয়োজন হয়। বর্তমানে সম্মিলিত জাতিপুঞ্জের সদস্য হইলে আন্তর্জাতিক ক্ষেত্রে রাষ্ট্র বলিয়া পরিগণিত হওয়া যায়।

জনসমষ্টি ও নির্দিষ্ট ভূভাগ লইয়া রাষ্ট্রের বাস্তব অস্তিত্ব প্রকাশ পায়। কিন্তু রাষ্ট্রের একটা অবাস্তব রূপ আছে—যাহার সহিত যৌথ কারবারের অস্তিত্বের তুলনা করা যাইতে পারে।

অনেক লেখক আবার রাষ্ট্রকে একটা আদর্শ ভিত্তির উপর প্রতিষ্ঠিত করিতে চাহেন। আদর্শ রাষ্ট্র একটা মনঃকল্পিত ধারণা যাহার সহিত বর্তমান ভ্রমশ্রমাদপূর্ণ রাষ্ট্রের তুলনা করা চলে না। অনেক লেখক বিশ্ব-রাষ্ট্রগঠন-পরিকল্পনাকেই আদর্শ রাষ্ট্রের বাস্তব পরিণতি বলিয়া মনে করেন।

ভারত কি স্বাধীন রাষ্ট্র?—বৃটিশ সরকার কতক ক্ষমতা হস্তান্তরের পর ভারতকে স্বাধীন না বলিবার কোন সঙ্গত হেতু নাই। যদিও ভারত নামমাত্র বৃটিশরাজের নেতৃত্ব স্বীকার করে তথাপি ভারতের নূতন সংবিধান ভারতকে একটি সার্বভৌম গণতান্ত্রিক প্রজাতন্ত্ররূপে প্রতিষ্ঠিত করিয়াছে। ভারতসম্পর্কে ইংলণ্ডের বাজার কোন ক্ষমতা নাই। ভারত কতকগুলি সুবিধার জন্য সাধারণতন্ত্র রাষ্ট্রসমূহের সদস্য রহিয়াছে। যে-কোন মুহূর্তে ভারত এই সাধারণতন্ত্র রাষ্ট্রসমূহের সদস্যপদ নিজের ইচ্ছায় পরিত্যাগ করিতে পারে।

রাষ্ট্র ও সমাজ—মানুষের বহুবিধ প্রয়োজন মিটাইবার জন্য সমাজের সৃষ্টি। সমাজ নানাবিধ সংঘ গঠন করিয়া ইহাদের মধ্য দিয়া এই প্রয়োজন তৃপ্ত করে,—রাষ্ট্র সমাজের অন্তর্ভুক্ত একটি প্রতিষ্ঠান মাত্র। কিন্তু ইহাদের মধ্যে বিশেষ পার্থক্য দেখা যায়।

১। সমাজ রাষ্ট্র অপেক্ষা ব্যাপকতর। রাষ্ট্র সমাজের একটি প্রতিষ্ঠান মাত্র।

২। নির্দিষ্ট ভূখণ্ড না হইলে রাষ্ট্র গঠিত হয় না, কিন্তু সমাজগঠনে ইহার প্রয়োজন হয় না।

৩। রাষ্ট্রজন্মের বহু পূর্বে সমাজ গঠিত হয়।

৪। শাসনযন্ত্র বা সরকার ছাড়া রাষ্ট্র চলিতে পারে না, কিন্তু সমাজের গঠনে সরকারের প্রয়োজন হয় না।

৫। রাষ্ট্রের অস্তিত্ব নির্ভর করে সার্বভৌম ক্ষমতার উপর; সমাজের এ ক্ষমতার প্রয়োজন হয় না।

৬। রাষ্ট্র অপেক্ষা সমাজের উদ্দেশ্য অধিকতর ব্যাপক। মানুষের সর্বাঙ্গীণ উন্নতি সাধন করাই সমাজের কাজ।

রাষ্ট্র ও অন্যান্য সংঘ—১। রাষ্ট্রের নির্দিষ্ট ভূখণ্ড চাই, সংঘের ভূখণ্ড না হইলেও চলে।

২। রাষ্ট্র একটি স্থায়ী সংঘ; অন্যান্য সংঘগুলি স্থায়ী না হইতেও পারে।

৩। রাষ্ট্রের উদ্দেশ্য বহুমুখী; রাষ্ট্র মানুষের বহির্জীবন নিয়ন্ত্রণ করিয়া তাহার সর্ববিধ উন্নতিসাধনে সহায়তা করে, অন্যান্য সংঘগুলি দুই একটি বিষয়ে মানুষের উন্নতির সাহায্য করে।

৪। রাষ্ট্র সার্বভৌম ক্ষমতার অধিকারী বলিয়া রাষ্ট্রাভ্যন্তরীণ সকলের উপর অবাধ কর্তৃত্ব করিতে পারে, অন্যান্য সংঘগুলির অবাধ ক্ষমতা নাই।

৫। মানুষ ইচ্ছামত এক বা একাধিক সংঘের সভ্য হইতে পারে বা সভ্যপদ ত্যাগ করিতে পারে, কিন্তু কোন-না কোন একটি রাষ্ট্রের সভ্য তাহাকে হইতেই হইবে—নাগরিক হওয়া বাধ্যতামূলক।

রাষ্ট্র ও শাসনযন্ত্র—শাসনযন্ত্র বা সরকার রাষ্ট্রগঠনের একটি উপাদান মাত্র। রাষ্ট্রের সহিত ইহার পার্থক্য আছে।

১। রাষ্ট্রাভ্যন্তরীণ সকল অধিবাসীই রাষ্ট্রের সভ্য, কিন্তু সরকার গঠিত হয় অল্পসংখ্যক লোক লইয়া—আইনসভার, শাসনবিভাগের ও বিচারবিভাগের কর্মীদের লইয়া সরকার গঠিত হয়।

২। রাষ্ট্র স্থায়ী সংঘ, সরকার পরিবর্তনশীল।

৩। রাষ্ট্র বলিতে একটা নির্দিষ্ট ভূখণ্ডের ধারণা হয়, কিন্তু শাসনযন্ত্র বলিতে শুধু কার্যরত কতকগুলি বিশেষ লোকের সমষ্টি বুঝায়।

৪। রাষ্ট্র সার্বভৌম ক্ষমতার অধিকারী, সরকার রাষ্ট্রকর্তৃক প্রদত্ত ক্ষমতা পরিচালনা করে।

৫। সকল রাষ্ট্রেই একই বৈশিষ্ট্য, কিন্তু দেশভেদে শাসনব্যবস্থার পার্থক্য দেখা যায়।

৬। রাষ্ট্র সর্ববিধ নাগরিক অধিকারের উৎস। কিন্তু নাগরিক অধিকার রক্ষার ভার সরকারের উপর। তাই নাগরিকগণের রাষ্ট্রের বিরুদ্ধে কোন অভিযোগ থাকিতে পারে না—অভিযোগ হইল সরকারের বিরুদ্ধে।

৭। রাষ্ট্রের কোন বাস্তব রূপ নাই, ইহা একটি ধারণা মাত্র। সরকার হইল রাষ্ট্রের বাস্তব বহিঃপ্রকাশ।

রাষ্ট্রের বিভিন্ন প্রকাশ—১। নগর-রাষ্ট্র, ২। সাম্রাজ্য, ৩। সামন্ত রাষ্ট্র, ৪। জাতীয় রাষ্ট্র ও ৫। বিশ্ব-রাষ্ট্র।

প্রশ্নাবলী

1. Distinguish between (a) State and Government, and (b) State and other Associations.

2. How do you define a State? Do the following come under your definition of State: (a) Hyderabad, (b) New York, (c) League of Nations? Give reasons for your answer. (C. U. 1936)

3. Distinguish between State and Society.

4. Differentiate between the idea of the state and the concept of the state. In which category would you place the following

(a) City-state, (b) World-state, (c) Dynastic state and (d) United Nations? (C. U. Hons. 1951)

5. (a) State sovereignty is personal.

(b) State sovereignty is territorial.

Critically examine the statements.

6. How do you distinguish the State from other kinds of Associations? (C. U. 1955)

7. Discuss the *significance* and *meaning* of "territory" as a constituent element of the state. What are the exceptions to the principle of exclusive jurisdiction of a state over its own territory?

তৃতীয় অধ্যায়

রাজ্যের উৎপত্তি ও প্রকৃতি সম্বন্ধে মতবাদ

Theories about the Origin and Nature of the State

‘উৎপত্তি বিষয়ক বিভিন্ন মত—কোন সময়ে বা কি পদ্ধতিতে রাজ্যের জন্ম হইয়াছে তাহা আমাদের অপরিজ্ঞাত। কোন পূর্বনির্দিষ্ট পরিকল্পনা-অনুযায়ী যে রাজ্যের গঠনকার্য হইয়াছে ইতিহাসও এরূপ সাক্ষ্য দেয় না; সুতরাং রাজ্যের উৎপত্তিসম্বন্ধে কোন সঠিক সিদ্ধান্ত করা সম্ভব নয়। বিভিন্ন লেখক রাজ্যের উৎপত্তি বিচার করিতে গিয়া বিভিন্ন মত প্রকাশ করিয়াছেন। ইহাদের কোনটিকেই একক সম্পূর্ণরূপে গ্রহণ করা যায় না। যে সমস্ত চিন্তাশীল লেখক রাজ্যের উৎপত্তি-সম্বন্ধে গবেষণা করিয়াছেন, তাঁহারা প্রধানতঃ দুইটি পদ্ধতি অবলম্বন করিয়া রাজ্যের উৎপত্তি বিচার করিয়াছেন। প্রথমটি হইল, দর্শনমূলক পদ্ধতি ও দ্বিতীয়টি হইল, ঐতিহাসিক পদ্ধতি। রাজ্যের উৎপত্তিসম্বন্ধে কোনরূপ সঠিক ঐতিহাসিক প্রমাণের অভাবে আমাদের উপরি-উক্ত দুইটি পদ্ধতি অবলম্বন করিয়া রাজ্যের উৎপত্তি বিচার করা ছাড়া গত্যন্তর নাই। প্রথমোক্ত পদ্ধতির ভিত্তিতে রাজ্যের উৎপত্তিবিষয়ে তিনটি মতবাদ প্রচলিত আছে; যথা, রাষ্ট্র বিধাতার সৃষ্টি—মতবাদ; বলপ্রয়োগে বিজয় ও অধিকারের ভিত্তিতে রাজ্যের উৎপত্তি—মতবাদ; সামাজিক চুক্তি—মতবাদ। দ্বিতীয় পদ্ধতি অনুসারে দুইটি মতবাদ প্রচলিত হইয়াছে; যথা, পরিবারের ক্রম-সম্প্রসারণের ফলে রাজ্যের উৎপত্তি—মতবাদ ও ক্রমবিবর্তনের ফলে রাজ্যের উৎপত্তি—মতবাদ।

ঐশ্বরিক উৎপত্তি অথবা রাষ্ট্র বিধাতার সৃষ্টি—মতবাদ (Theory of Divine Origin of the State)

রাজ্যের উৎপত্তিসম্বন্ধে যতগুলি মতবাদ প্রচলিত আছে তন্মধ্যে এই মতবাদটি সর্বাপেক্ষা প্রাচীন বলিয়া অনেকে মনে করেন। এই মতবাদে

বলা হয়, ভগবান্ স্বয়ং রাষ্ট্র সৃষ্টি করিয়া মানুষকে সংঘবদ্ধ জীবনযাপন করিতে অনুপ্রেরণা দিয়াছেন। রাজা বিধাতার প্রতিনিধি হিসাবে রাষ্ট্রকার্য পরিচালনা করেন। বিধাতার অভিপ্রায় মানবসমাজে রাজার মাধ্যমে প্রচারিত হয়। এই মতবাদের চারিটি উপ-সিদ্ধান্ত আছে। প্রথমতঃ, একমাত্র রাজতন্ত্র হইল ঈশ্বরানুমোদিত শাসনপদ্ধতি অর্থাৎ শাসনকার্য পরিচালনার জন্য স্বয়ং ভগবান্ রাজাকে মনোনীত করিয়াছেন। দ্বিতীয়তঃ, রাজার অবর্তমানে তাঁহার জ্যেষ্ঠ পুত্র সিংহাসনের অধিকারী। তৃতীয়তঃ, রাজা তাঁহার কার্যের জন্য একমাত্র ভগবানের নিকট দায়ী, কোন পার্থিব শক্তির নিকট দায়ী নহেন। চতুর্থতঃ, প্রজাসাধারণের একমাত্র কর্তব্য হইল বিনা বিচারে রাজ-আজ্ঞা পালন করা।

পূর্বেই বলা হইয়াছে যে, এই মতবাদটি অতি প্রাচীন। ভারত, মিশর, চীন প্রভৃতি প্রতীচ্য দেশসমূহে অতি পুরাকাল হইতে এই মতবাদ প্রচলিত ছিল। কিন্তু প্রাচীন গ্রীক বা রোমকগণ এই মতবাদ প্রত্যক্ষভাবে গ্রহণ করেন নাই। খৃষ্টধর্ম প্রবর্তন হওয়ার সঙ্গে সঙ্গে এই মতবাদ শক্তি সঞ্চয় করিয়া ক্রমশঃ লোকসমাজে প্রভাব বিস্তার করিতে থাকে। মধ্যযুগে যখন ধর্মগুরু পোপ ও রাষ্ট্রনায়ক সমাটের মধ্যে সর্বাধিনায়কত্ব লইয়া বিরোধ শুরু হয়, সেই সময়ে পোপ এই মতবাদটির বলে নিজ অবাধ প্রভুত্ব অক্ষুণ্ণ রাখিবার প্রয়াস পাইয়াছিলেন। রাজার সমর্থকগণ রাজাকেই ঈশ্বরপ্রেরিত প্রতিনিধি বলিয়া প্রচার করিতে লাগিলেন। অন্য দিকে পোপের সমর্থকগণ পোপকেই ঈশ্বরানুমোদিত প্রতিনিধি বলিয়া মানিয়া লইতে জনসাধারণকে অনুরোধ করিলেন। এই যুদ্ধে শেষ পর্যন্ত অবশ্য পোপের পরাজয় ঘটিল। পোপের ক্ষমতায় অবসান ঘটিলে রাজা নিজ ক্ষমতায় সুপ্রতিষ্ঠিত হইয়া ক্রমশঃই স্বৈচ্ছাচারী হইয়া উঠিলেন। এই সময়ে জনসাধারণের ক্রমবর্ধমান রাজনৈতিক চেতনাসঞ্চারের ফলে গণতান্ত্রিক শক্তির অভ্যুত্থানের বিরুদ্ধে রাজতন্ত্র সুপ্রতিষ্ঠিত রাখিবার উদ্দেশ্যে এই মতবাদ প্রয়োগ করা হয়। ঈশ্বরের প্রতিনিধি বলিয়া রাজার কাহারও নিকট দায়ী হওয়ার প্রসঙ্গ ছিল না। এই মতবাদটি ইংরাজ লেখক স্যার রবার্ট ফিল্মারও সমর্থন করেন। এতদ্ব্যতীত ইংলণ্ডের রাজা প্রথম জেমস্ এই মতবাদের একজন প্রধান সমর্থক ছিলেন। তিনি এই মতবাদ সমর্থন করিয়া একখানি পুস্তকও রচনা

করেন। এমন কি ঊনবিংশ শতাব্দীতেও এই মতবাদ একেবারে বিলুপ্ত হয় নাই। ১৮১৫ খৃষ্টাব্দে প্রুশিয়া, অস্ট্রিয়া ও রাশিয়া এই তিনটি দেশের শাসকগণ মিলিতভাবে ঘোষণা করেন যে, তাঁহারা তাঁহাদের প্রজাবৃন্দের মঙ্গলসাধনের নিমিত্ত ভগবানের আদেশে এক পবিত্র সন্ধিস্থত্রে আবদ্ধ হইয়াছেন। কিন্তু বর্তমান যুগে কিছুদিন পূর্ব পর্যন্ত এক তির্যক দেশ ব্যতীত অন্য কোন দেশে এই মতবাদটি আর কার্যকর ছিল না। অধুনা নবগঠিত পাকিস্তান রাষ্ট্রকে ধর্ম-নিরপেক্ষ রাষ্ট্র বলা চলে না। এই রাষ্ট্রের ভিত্তি ইসলাম ধর্মের মূলনীতির উপর প্রতিষ্ঠিত। এতদ্ব্যতীত ইসলাম ধর্মে বিশ্বাসী একমাত্র মুসলমান ব্যতীত কোন অ-মুসলমান নাগরিক এই রাষ্ট্রের রাষ্ট্রপতি নির্বাচিত হইতে পারেন না। সামাজিক চুক্তি—মতবাদটির আবির্ভাবের ফলে এই বহু প্রাচীন মতবাদটি বিলুপ্ত হইয়াছে।

সমালোচনা—এই মতবাদটির বিপক্ষে অনেক যুক্তি দেখান যাইতে পারে। প্রথমতঃ, বলা যায় যে, রাষ্ট্র একটি মানবীয় প্রতিষ্ঠান। মানুষ নিজ ইচ্ছানুসারে ও নিজের সুবিধার জন্য ইহার সৃষ্টি করিয়াছে। ভগবান এ সমস্ত পার্থিব ব্যাপারে হস্তক্ষেপ করেন না। দ্বিতীয়তঃ, এই মতবাদ শুধু রাজতন্ত্র সমর্থন করে। গণতন্ত্র, সমাজতন্ত্র বা নির্বাচিত রাষ্ট্রপতিদ্বারা শাসিত রাষ্ট্রের উৎপত্তি স্বত্ত্বে এই মতবাদ আলোকসম্পাত করিতে পারে না। বর্তমান যুগে রাজতন্ত্র একরূপ বিলোপের পথে। সুতরাং শাসন-ব্যবস্থার যে নব নব রূপ বর্তমান রাষ্ট্রসমূহে দেখা যায়, এই মতবাদের ভিত্তিতে সেগুলির উৎপত্তি বিচার সম্ভব হয় না। তৃতীয়তঃ, এ মতবাদটির পরিণতি অতি বিপজ্জনক ও কার্যতঃ দেখা গিয়াছে যে-সমস্ত রাজা এই মতবাদের ভিত্তিতে শাসনকার্য পরিচালনা করিয়াছেন তাঁহাদের অধিকাংশই স্বেচ্ছাচারী হইয়া উঠিয়াছিলেন। রাজা ভগবৎপ্রেরিত প্রতিনিধি এই অন্ধ বিশ্বাসের বশবর্তী হইয়া অনেক শাসক প্রজার ইচ্ছা, অনিচ্ছা বা সুখ-দুঃখের প্রতি দৃকপাত না করিয়া স্বীয় ক্ষমতার ঔদ্ধত্যে প্রজার উপর অমানুষিক অত্যাচার করিতেন। রাজাকে ভগবৎপ্রেরিত প্রতিনিধি বলিয়া স্বীকার করিয়া লইলেও অত্যাচারী শাসকের অস্তিত্ব এই মতবাদদ্বারা সমর্থিত হয় না। কারণ, ভগবান্ হইলেন সর্বমঙ্গল-বিধায়ক ও সর্ববিধ গুণের আকর। সুতরাং যিনি ভগবানের প্রতিনিধিত্ব করিবেন তিনি

কখনই জনসাধারণের অহিত করিতে পারেন না। ফলে, এই মতবাদ শাসকবর্গকে দায়িত্বজ্ঞানশূন্য করিয়া তুলিয়াছিল।

ঐশ্বরিক উৎপত্তি মতবাদের অবসান (Decline of the Divine Right Theory)

নানাকারেণে বর্তমান বিংশ শতাব্দীতে আর কেহ এই মতবাদে বিশ্বাস করে না। ঐশ্বরিক উৎপত্তি মতবাদ অবসানের প্রধান কারণ হইল সামাজিক চুক্তি মতবাদের আবির্ভাব। সামাজিক চুক্তি মতবাদ রাষ্ট্রকে একটি মনুষ্য-সৃষ্ট প্রতিষ্ঠান বলিয়া প্রচার করিল এবং এই প্রচারের ফলে রাষ্ট্রের ঐশ্বরিক উৎপত্তি ও অতি-মানবীয় রূপ পরিবর্তিত হইল। দ্বিতীয়তঃ, ‘রিফরমেশন’ আন্দোলনের ফলে জনসাধারণের মনে মধ্যযুগীয় ধর্মসম্বন্ধে ধারণার আমূল পরিবর্তন ঘটিল। ইহার ফলে পোপের অবাধ ক্ষমতা হ্রাস পাইয়া শাসক-গণের ক্ষমতা বৃদ্ধি পাইল। শাসনব্যাপারে রাজার ক্ষমতা বৃদ্ধি পাইবার ফলে রাষ্ট্র ঐশ্বরিক প্রতিষ্ঠান হইতে জাগতিক প্রতিষ্ঠানে পরিণত হইল। তৃতীয়তঃ, উনবিংশ শতাব্দীর মধ্যভাগ হইতে গণতান্ত্রিক আদর্শ প্রচার ও প্রসারের ফলে জনসাধারণের উপর ধর্মের বন্ধন শিথিল হইতে লাগিল। অন্ধ ধর্মবিশ্বাস ও কুসংস্কার মুক্ত জনসাধারণ ক্রমশঃই রাষ্ট্রকে একটি মনুষ্যসৃষ্ট জনহিতকর প্রতিষ্ঠানরূপে গ্রহণ করিল।

মূল্য-নির্ধারণ (Evaluation of the Theory)

রাষ্ট্রের উৎপত্তিবিষয়ে এই মতবাদে অধুনা কেহই আস্থা স্থাপন করে না। কিন্তু নিরপেক্ষভাবে বিচার করিলে দেখা যায় যে, এই মতবাদটি কোন কোন বিষয়ে মানবসমাজে প্রভূত হিতসাধন করিয়াছিল। বর্তমানযুগে অসার ও অল্পপযোগী বলিয়া প্রতিপন্ন হইলেও যে যুগে এই মতবাদের আবির্ভাব হইয়াছিল, সে যুগে ইহার কার্যকারিতা ও প্রভাব অস্বীকার করিলে সত্যের অপলাপ হইবে।

- প্রথমতঃ, বলা যায় যে, প্রাচীনকালের মানুষ বর্তমান যুগের মানুষের মত সুসংবদ্ধ হইয়া সামাজিক জীবন যাপন করিতে অভ্যস্ত ছিল না। সংঘবদ্ধ জীবনযাপনের প্রধান ভিত্তি হইল আইন-শৃংখলা মানিয়া চলিবার কর্তব্যবুদ্ধি। এইবুদ্ধি যখন স্বেচ্ছাপ্রণোদিত না হয় তখন অন্য উপায়ে এই বুদ্ধি সমাজদেহে

সঞ্চালিত করিতে হয় নতুবা সংঘবদ্ধ সামাজিক জীবন অচল হইয়া যায়। রাষ্ট্র বিধাতার সৃষ্টি ও রাজা ভগবানের মনোনীত প্রতিনিধি—এই বিশ্বাস রাজনৈতিক চেতনাবিহীন প্রাচীন সমাজে প্রচার করিয়া এই মতবাদটি রাষ্ট্রগঠনের প্রথম যুগে প্রভূত সহায়তা করিয়াছিল। প্রজারা রাজাকে ঈশ্বরের দূত মনে করিয়া তাঁহার নির্দেশ মানিয়া চলিত। এইরূপে অন্ধ-বিশ্বাসের মধ্য দিয়া মানুষের রাজনৈতিক চেতনা ক্রমশঃ বিকাশ লাভ করিয়াছে। দ্বিতীয়তঃ, এই মতবাদের সাহায্যে রাষ্ট্রশক্তি মধ্যযুগীয় ধর্ম-ব্যবহার নাগপাশ হইতে নিজেকে মুক্ত করিয়া পার্থিব ব্যাপারের নিয়ামক-রূপে স্বপ্রতিষ্ঠিত হইতে সমর্থ হইয়াছে। রাজনীতি, ধর্ম ও নীতিশাস্ত্রের প্রভাব হইতে মুক্ত হইয়া প্রথম আত্মপ্রকাশ করিতে সমর্থ হইল। এই মতবাদের সহায়তায় রাষ্ট্রের ধর্মনিরপেক্ষ স্বাধীন সত্তা স্বীকৃত হইল। সুতরাং এই মতবাদ হইতে বর্তমান গণতন্ত্রের সূত্রপাত হইল বলিলে বোধ হয় অত্যুক্তি হয় না। তৃতীয়তঃ, এই মতবাদের একটা অন্তর্নিহিত সত্য আছে যাহা যুগে যুগে রাষ্ট্রব্যবহার পরিবর্তনের মধ্য দিয়া প্রকটিত হইয়াছে। রাষ্ট্র মানবীয় প্রতিষ্ঠান হইলেও ইহার একটা নৈতিক উদ্দেশ্যও আছে। জন-সমাজের নৈতিক ও আধ্যাত্মিক উন্নতি সাধন হইল রাষ্ট্রের প্রধান উদ্দেশ্য। আর এই নৈতিক বুদ্ধি দ্বারা পরিচালিত হইয়া যদি শাসকগণ শাসনকার্য পরিচালনা করেন, তাহা হইলে রাষ্ট্রের ভিত্তি দৃঢ়তর হয়। এই মতবাদের আরও একটি সত্য হইল যে, শাসকবর্গ যদি মনে করেন যে, আইনের কাছে দায়িত্ব ছাড়াও তাঁহাদের অতিরিক্ত একটা নৈতিক দায়িত্ব আছে তাহা হইলে শাসনব্যবস্থা উন্নততর হয়।

পরিবারের ক্রমসম্প্রসারণের ফলে রাষ্ট্রের উৎপত্তি মতবাদ

(ক) পিতৃতান্ত্রিক মতবাদ—(Patriarchal Theory)

এই মত অনুসারে রাষ্ট্রকে পরিবারের সম্প্রসারিত রূপ বলিয়া মনে করা হয়। কতকগুলি পরিবারকে লইয়া গোষ্ঠীর সৃষ্টি হয়, কয়েকটি গোষ্ঠী লইয়া জাতি এবং অবশেষে রাষ্ট্রের উৎপত্তি হয়। পারিবারিক সংগঠনের ক্রমিক সম্প্রসারণের ফলে রাষ্ট্রের উৎপত্তি—এই মতবাদের মূল কথা হইলেও

পরিবারের কর্তৃত্ব লইয়া লেখকগণের মধ্যে মতভেদ আছে। স্ত্রী হেনরি মেইনের মতে আদিম মানব পরিবারগুলি পিতৃতান্ত্রিক (Patriarchal) ভিত্তিতে গঠিত ছিল। এই পিতৃতান্ত্রিক পরিবারগুলি হইল প্রাচীনতম সামাজিক সংগঠন এবং এই সংগঠনের কর্তা ছিলেন সর্বাপেক্ষা বয়োজ্যেষ্ঠ পুরুষ। ইনি পিতৃশ্রেষ্ঠ (Patriarch) রূপে পরিচিত ছিলেন ও পরিবারের অন্যান্য ব্যক্তির উপর ইহার অবাধ কর্তৃত্ব ছিল। পরিবারের মধ্যে ইনি ছিলেন সর্বময় কর্তা ও সমগ্র পরিবার ইহার নির্দেশে পরিচালিত হইত। পরিবার সম্প্রসারিত হইয়া যখন গোষ্ঠীতে পরিণত হইল তখন সেই গোষ্ঠীর সর্বাপেক্ষা বয়োজ্যেষ্ঠ ব্যক্তি হইতেন গোষ্ঠীপতি। এইরূপে কতকগুলি গোষ্ঠী মিলিত হইয়া কালক্রমে রাষ্ট্রে পরিণত হয় ও পিতৃশ্রেষ্ঠ রাষ্ট্রনায়কের পদে অভিষিক্ত হন। সুতরাং পিতৃশ্রেষ্ঠের নেতৃত্বে একদিন যে পরিবার সংগঠিত হইয়াছিল, তাহার মধ্যেই বর্তমান রাষ্ট্রের অঙ্কুর নিহিত ছিল বলিয়া এই মতবাদে ধরা হয়।

স্ত্রী হেনরি মেইনের বহুপূর্বে অ্যাবিস্টটল্ পরিবার হইতে যে রাষ্ট্রের উৎপত্তি হইয়াছে, এই মতবাদ প্রচার কবিয়াছিলেন। স্ত্রী রবার্ট ফিল্মার এই মতবাদের একজন প্রধান সমর্থক ছিলেন।

সমালোচনা (Criticism)—ম্যাকলীনান, মর্গান প্রভৃতি লেখকগণ এই মতবাদের যৌক্তিকতাসম্বন্ধে সন্দেহ প্রকাশ করিয়া বলেন যে, প্রাচীন রোম ও আরও কতিপয় দেশে পিতৃতান্ত্রিক পরিবারের অস্তিত্ব প্রমাণিত হইলেও এই জাতীয় পরিবার সর্বদেশে প্রবর্তিত ছিল না। বহু দেশে বহু জাতির মধ্যে পরিবার গঠিত হইত মাতৃতান্ত্রিক ভিত্তিতে। বর্তমান যুগেও এমন অনেক জাতি আছে যাহাদের মধ্যে মাতৃতান্ত্রিক পরিবার প্রবর্তিত আছে। তাহা ছাড়া, মাতৃতান্ত্রিক পরিবারের উদ্ভব হইয়াছিল পিতৃতান্ত্রিক পরিবার উদ্ভবের বহুপূর্বে। অনেক লেখক আবার মেইনের মতের বিরুদ্ধে সমালোচনা করিয়া বলিয়াছেন যে, এমন অনেক জাতি দেখিতে পাওয়া যায় যাহারা পরিবার সংগঠন না করিয়া দলবদ্ধভাবে সমষ্টিগত জীবন যাপন করে। কাজেই পরিবারের পরিব্যাপ্তিতে যে রাষ্ট্র গঠিত হইয়াছে একথা বলা অসম্ভব সত্য হইতে পারে না।

(খ) মাতৃতান্ত্রিক মতবাদ (Matriarchal Theory)

পিতৃতান্ত্রিক মতবাদের সত্যতা মূলতঃ সমর্থন করিলেও পারিবারিক সংগঠনের দিক দিয়া দেখিতে গেলে মাতৃতান্ত্রিক মতবাদ পিতৃতান্ত্রিক মতবাদ হইতে পৃথক্। মাতৃতান্ত্রিক মতবাদ প্রমাণ করিতে চায় যে, আদিম পরিবারগুলি মাতৃশ্রেষ্ঠাকে (Matriarch) কেন্দ্র করিয়া সংগঠিত হইয়াছিল। পুরুষের পরিবর্তে নারীই ছিল পরিবারের সর্বময়ী কত্রী। ম্যাক্স লীনাম্, জেংকস্ প্রমুখ এই মতবাদের সমর্থকগণ বলেন যে, প্রাচীনকালে মানবসমাজে বিবাহপ্রথা প্রবর্তন হওয়ার পূর্বে মাতাই ছিলেন সন্তান-সন্ততিদের রক্ষক ও অভিভাবক। নির্দিষ্ট পিতার অবর্তমানে মাতার পরিচয়ে সন্তান-সন্ততিদের পরিচয় পাওয়া যাইত। সুতরাং মাতাকে কেন্দ্র করিয়া পরিবার গঠিত হইত। প্রাচীন গ্রীক ও জার্মান জাতিদের মধ্যে একরূপ মাতৃসম্বন্ধীয় জাতি-নির্ণয়-পদ্ধতি প্রচলিত ছিল। ভারতে মালাবারের নাইরদিগের মধ্যে এখনও পর্যন্ত এই মাতৃতান্ত্রিক পরিবার সংগঠনের নিদর্শন দেখিতে পাওয়া যায়।

সমালোচনা (Criticism)—পিতৃকর্তৃত্বীয় পরিবারের মতবাদের মত মাতৃকর্তৃত্বীয় মতবাদসম্পর্কেও একথা বলা চলে যে, এই মতবাদের সমর্থনে কোন ইতিহাস নাই। হেনরি মেইনের মতবাদের সমালোচনা করিয়া জেংকস্ বলিয়াছেন যে, পরিবার হইতে জাতির ক্রমপরিণতির যে মতবাদ মেইন প্রচার করিয়াছেন, কার্যতঃ দেখা যায় যে, পরিণতি হইয়াছে ঠিক বিপরীত দিক হইতে। জেংকসের মতে প্রথম ও আদি দল ছিল জাতি (Tribe), এই জাতি ভাঙ্গিয়া কতকগুলি উপজাতির (Clan) সৃষ্টি হয়, উপজাতি ভাঙ্গিয়া কতকগুলি গোষ্ঠী হইল ও অবশেষে গোষ্ঠী ভাঙ্গিয়া বহুসংখ্যক পরিবারের সৃষ্টি হইল। পারিবারিক বন্ধন শিথিল হইয়া পড়িলে ব্যক্তি একক ও নিঃসঙ্গ হইয়া পড়িল। এই অবস্থায় প্রত্যেক ব্যক্তি আবার সংঘবদ্ধ জীবনযাপনের জন্ত সমাজগঠনের প্রাথমিক উপাদান হইয়া দাঁড়াইল।

রাষ্ট্র পরিবার-সম্প্রসারণের কালে উদ্ভূত হইয়াছে এই মতবাদ হইতে রাষ্ট্র উৎপত্তির একটা সম্পূর্ণ ঐতিহাসিক বিবরণ পাওয়া যায় না। পারিবারিক সংগঠন ও পিতৃশ্রেষ্ঠ অথবা মাতৃশ্রেষ্ঠার কর্তৃত্ব আত্মীয়তা-বন্ধনের ভিত্তির উপর প্রতিষ্ঠিত। কিন্তু রাষ্ট্রের অধিবাসিগণ যে বন্ধনের ভিত্তিতে এক সার্বভৌম ক্ষমতার অধীনে সংগঠিত হয়, তাহা পারিবারিক বন্ধন অপেক্ষা

অধু পৃথক নয়, আরও হৃদয় ভিত্তির উপর প্রতিষ্ঠিত। স্বতরাং জাতিত্ব বা স্বগোষ্ঠীয় বন্ধনের ক্রমপরিণতিই যে রাষ্ট্র-উদ্ভবের একমাত্র কারণ একথা বলা সমীচীন নয়।

বলপ্রয়োগ মতবাদ (Theory of Force)

রাষ্ট্রের উৎপত্তিসম্বন্ধে কল্পনাপ্রসূত যে মতবাদগুলি প্রচলিত আছে, বলপ্রয়োগ মতবাদ তাহাদের মধ্যে অন্যতম। রাষ্ট্রসম্বন্ধে দুইটি গুরুত্বপূর্ণ বিষয়ের আলোচনা এই মতবাদে পাওয়া যায়। প্রথমতঃ, রাষ্ট্রের উৎপত্তি-সম্বন্ধে এই মতবাদ একটা নির্দিষ্ট অভিমত দেয় ; দ্বিতীয়তঃ, রাষ্ট্রের প্রকৃতি ও এই মতবাদদ্বারা ব্যাখ্যাত হইয়াছে।

এই মতবাদের সারমর্ম হইল যে, শক্তিশালী লোক বা শক্তিশালী জাতি দুর্বল লোক বা দুর্বল জাতিকে শারীরিক শক্তির দ্বারা পরাস্ত করিয়া নিজে কর্তৃত্বের অধীনে আনিয়া রাষ্ট্রের গোড়া পত্তন করিয়াছে। এই মতবাদে মানবচরিত্রের মধ্যে যে স্বাভাবিক কলহপ্রিয়তা ও ক্ষমতালোভের প্রবণতা আছে তাহার উপর গুরুত্ব আরোপ করা হইয়াছে। সত্য বটে যে, মানুষ একদিকে সামাজিক জীব, কিন্তু সমাজে বাস করিয়াও মানুষ তাহার আদিম ও স্বাভাবিক কলহপ্রিয়তা ও ক্ষমতালিপ্সার প্রবৃত্তি জয় করিতে পারে নাই। তাই কি ব্যক্তিগত জীবনে কি সংঘবদ্ধ জীবনে মানুষ এই প্রবৃত্তির দ্বারা পরিচালিত হইয়া দুর্বলের উপর তাহার প্রভাব-প্রতিপত্তি প্রতিষ্ঠিত করিতে চায়। এই প্রভাব-প্রতিপত্তির আকাঙ্ক্ষাই অস্তিত্ব ও আন্তর্জাতিক সংঘের অন্যতম কারণ। প্রাচীন মানবসমাজ নানা গোষ্ঠী, দল ও উপজাতিতে বিভক্ত ছিল। গোষ্ঠীপতি বা দলপতি নিজের অহুচরদের পূর্ণ আত্মগত্যা ও সক্রিয় সহযোগিতার বলে অগ্র দলকে পরাস্ত করিয়া বিজিত দলের উপর আপন আধিপত্য বিস্তার করিত। এইরূপে যখন কোন দলপতি তাহার অহুচরদের সাহায্যে যথেষ্ট আয়তনের কোন নির্দিষ্ট ভূভাগে স্থায়ী আধিপত্য বিস্তার করিয়া শাসনকার্য আরম্ভ করে, তখনই রাষ্ট্রের স্বরূপতে হয়। স্বতরাং যুদ্ধ রাষ্ট্রগঠনের একটা প্রধান উপায়।

‘জোর বার মূলক তার,’ Might is right,’ ‘বীরভোগ্যা বসুন্ধরা’—
‘None but the brave deserves the fair’, প্রভৃতি প্রবাদবচনগুলি

সব দেশেই প্রচলিত আছে ও এইগুলি, রাষ্ট্র যে তাহার অস্তিত্বের প্রথম পর্যায়ে অপরিহার্যরূপে বলপ্রয়োগ-নীতির উপর প্রতিষ্ঠিত হইয়াছিল তাহার সাক্ষ্য দেয়।

বলপ্রয়োগদ্বারা রাষ্ট্রের গোড়াপত্তন হইলেই বলপ্রয়োগের কার্যকারিতার অবসান ঘটে না। প্রতিষ্ঠিত রাষ্ট্রকে বাঁচাইয়া রাখিবার জগৎ বলপ্রয়োগ প্রয়োজন। দুর্বল বা অপেক্ষাকৃত অল্পবুদ্ধিসম্পন্ন বিজিত লোকজন স্ববিধা পাইলে বিজিতার অধীনতাপাশ হইতে যাহাতে মুক্তিলাভ করিতে না পারে, সেজন্য বলপ্রয়োগের ব্যবস্থা সব সময়েই রাখা একান্ত আবশ্যক। এইজন্য আভ্যন্তরীণ শান্তি-শৃংখলারক্ষা ও বহিরাক্রমণ হইতে রাষ্ট্রকে রক্ষাকল্পে সব বিজ্ঞেতাকেই পশুবলের উপর নির্ভর করিতে হয়। সুতরাং এই মতবাদ অনুসারে রাষ্ট্রের উৎপত্তি, ভিত্তি, সম্প্রসারণ ও অস্তিত্ব পশুবলের উপর প্রতিষ্ঠিত বলিয়া ধারণা করা হয়।

রাষ্ট্রের উৎপত্তি-বিশ্লেষণ ও রাষ্ট্রের ভিত্তি নির্ণয় করিতে এই মতবাদ বহুদিন পূর্ব হইতে প্রবর্তিত আছে। কিন্তু বিভিন্ন যুগে বিভিন্ন লেখক বিভিন্ন উদ্দেশ্যে এই মতবাদ ব্যবহার করিয়াছেন। মধ্যযুগে খৃষ্টধর্মের মহিমা ও অবাধ প্রতিপত্তি-স্থাপনের উদ্দেশ্যে ধর্মযাজকগণ এই যুক্তির অবতারণা করেন যে, রাষ্ট্রশক্তি পশুবলের উপর প্রতিষ্ঠিত, আর পোপের ক্ষমতা ঈশ্বরানুমোদিত। ব্যক্তিস্বাতন্ত্র্যবাদীরাও এই মতের ভিত্তিতে রাষ্ট্রকে ব্যক্তি-স্বাধীনতা-বিরোধী অকল্যাণকর প্রতিষ্ঠান আখ্যা দিয়া রাষ্ট্রের কার্যকলাপ ক্ষুদ্র গণ্ডির মধ্যে সীমাবদ্ধ করিতে চান। প্রকৃতির বিধানানুযায়ী জীবন-সংগ্রামে একমাত্র যোগ্যতমেরই বাঁচিয়া থাকিবার অধিকার আছে। রাষ্ট্র দুর্বলকে সাহায্য করিয়া জীবনযুদ্ধের ক্ষেত্র সংকুচিত করে ও তদ্বারা প্রকৃতির বিধান কার্যকর হইতে বাধা দেয়। সমাজতত্ত্ববাদী মতের একদল উগ্র সমর্থক বলেন যে, রাষ্ট্র মূলতঃ পশুবলের উপর প্রতিষ্ঠিত এবং রাষ্ট্র পশুবল প্রয়োগ করিয়া দুর্বল শ্রমিকশ্রেণীকে শোষণপূর্বক ধীরে ধীরে তাহাদের ধ্বংস সাধন করিতেছে। কার্ল মার্ক্স, লেলিন প্রমুখ উগ্র সমাজতত্ত্ববাদিগণের মতে রাষ্ট্র শেষ পর্যন্ত স্বয়ংক্রিয় পদ্ধতিতে বিলীন হইয়া যাইবে। উনবিংশ শতাব্দীর শেষার্ধ্বে একদল জার্মান দার্শনিক এই বলপ্রয়োগনীতির এক অভিনব ব্যাখ্যা প্রদান করেন। তাহাদের মতে একমাত্র রাষ্ট্রই হইল শক্তির

নিদর্শন ও বলপ্রয়োগের দ্বারা রাষ্ট্রের অস্তিত্ব ও সক্রিয়তা প্রমাণিত হয়। তাঁহারা জগৎ জুড়িয়া জাতীয় প্রভাব ও প্রতিপত্তি পরিব্যাপ্ত করিবার উদ্দেশ্যে বলপ্রয়োগনীতিকে রাষ্ট্র পরিচালনার অপরিহার্য নীতি বলিয়া মনে করিতেন। রাষ্ট্র-জীবনদর্শনে এই নীতি কার্যকরী হওয়ার ফলে জার্মান জাতিকে বহুবার প্রতিবেশী রাষ্ট্রের সহিত মারাত্মক সংগ্রামে লিপ্ত হইতে হইয়াছে।

সমালোচনা—রাষ্ট্রগঠনে পশুবলের দান উপেক্ষণীয় নহে, এ কথা স্বীকার করিয়া লইলেও একমাত্র শারীরিক শক্তির দ্বারা যে রাষ্ট্র গঠিত হইয়াছে একথা বলা যায় না। এই মতবাদের প্রধান ত্রুটি হইল যে, ইহা বলপ্রয়োগ নীতিকে রাষ্ট্রগঠনের একমাত্র উপাদান বলিয়া মনে করে। কিন্তু রাষ্ট্র কেবল শারীরিক শক্তির ভিত্তিতে গড়িয়া উঠিতে পারে না। এ সম্বন্ধে রুশো বলেন, যে অধিকার পশুবলের উপর প্রতিষ্ঠিত, তাহা চিরস্থায়ী হইতে পারে না। বলের অবসানের সঙ্গে অধিকারেরও অবসান ঘটে। ইতিহাসের ঘটনাবলীতেও এই কথা সত্যতা প্রমাণিত হয়। দ্বিতীয়তঃ, সমাজ-জীবনের বিভিন্ন শক্তি বিভিন্ন রূপে রাষ্ট্রগঠনের সহায়তা করিয়াছে। তাহাদের মধ্যে শারীরিক শক্তি যে একমাত্র গুরুত্বপূর্ণ উপাদান ইহা মনে করিলে সত্যের অপলাপ হইবে। সমাজ-বিবর্তনের ঐতিহাসিক ঘটনাবলীর ঘাত-প্রতিঘাত হইতে রাষ্ট্রের উৎপত্তি হইয়াছে, শারীরিক বলই রাষ্ট্রগঠনের একমাত্র উপাদান নহে। তৃতীয়তঃ, নৈতিক দিক দিয়া দেখিতে গেলেও এই মত সমর্থনযোগ্য নহে। যে মহান উদ্দেশ্য সাধন করিবার নিমিত্ত রাষ্ট্রের উদ্ভব হইয়াছে পশুবলের ভিত্তিতে গঠিত রাষ্ট্র সে উদ্দেশ্য কখনও সফল করিতে পারে না। মানুষের সর্বাত্মক কল্যাণসাধন করা যদি রাষ্ট্রের প্রধান উদ্দেশ্য বলিয়া ধরা যায়, তাহা হইলে শুধু পশুবলের উপর প্রতিষ্ঠিত কোন সংগঠনই এই মহান আদর্শদ্বারা অসুপ্রাণিত হইতে পারে না। চতুর্থতঃ, এই মতবাদ গণতন্ত্র-বিরোধী। গণতন্ত্রের ভিত্তি জনমতের ও সহযোগিতার উপর প্রতিষ্ঠিত। গণতন্ত্র মানুষের স্বাধীনতা, সাম্য ও মৈত্রীতে বিশ্বাস করে; কিন্তু এই মতবাদ মানবচরিত্রের উচ্চ প্রযুক্তিগুলিকে উপেক্ষা করিয়া শুধু ক্ষুদ্রতার উপর গুরুত্ব দেয়। ‘জোর যার মুল্লুক তার’—এই নীতি প্রযুক্ত হইলে শুধু যে স্বাধীনতা, সাম্য, মৈত্রীভাব বিনষ্ট হইবে তাহা নহে, আন্তর্জাতিক ক্ষেত্রেও ইহার ভীষণ প্রতিক্রিয়া দেখা দিবে। ক্ষুদ্র রাষ্ট্রগুলির স্বাধীনতা লোপ

পাইবে। একমাত্র যুদ্ধদ্বারাই আন্তর্জাতিক সমস্যাগুলির সমাধান হইবে। কলে, মানুষের বহুযুগের কষ্টার্জিত সভ্যতা ও কৃষ্টি ধ্বংস হইয়া পৃথিবীতে এক অসহনীয় বস্ত্র পরিবেশের সৃষ্টি হইবে।

উপরি-উক্ত সমালোচনা হইতে ইহাই প্রতীয়মান হয় যে, বলপ্রয়োগ নীতি আদৌ সমর্থনযোগ্য নয়। কিন্তু সমর্থনযোগ্য না হইলেও একথা মানিয়া লইতে হইবে যে, পৃথিবীর বৃহৎ বৃহৎ সাম্রাজ্যগুলি এই বলপ্রয়োগ-দ্বারাই গঠিত হইয়াছিল ও বর্তমান যুগের রাষ্ট্রগুলিও শেষ পর্যন্ত এই শক্তির উপরই প্রতিষ্ঠিত। তাহা না হইলে পুলিশ ও সেনাবিভাগ স্থায়ীভাবে রাখিবার আদৌ কোন প্রয়োজন হইত না। সমস্ত রাষ্ট্রই এই দুইটি বিভাগের বিলোপ সাধন করিয়া রাষ্ট্রের ব্যয়সংকোচ দ্বারা অন্ত্যাত্ম বহু জনহিতকর কার্য করিতে পারিত। আসল কথা হইল যে, রাষ্ট্রকে অন্তর্ঘাতী কার্যকলাপ ও বহিরাক্রমণ হইতে রক্ষাকল্পে পশুবলের প্রয়োজন অপরিহার্য। কিন্তু সকলেরই রক্ষক ও পালক হিসাবে রাষ্ট্র শুধু শিষ্টের পালন ও দুঃস্থের দমনের জন্য এই পশুবল প্রয়োগ করবে এবং এই বলপ্রয়োগ জনগণদ্বারা সমর্থিত হইবে। জনগণের ইচ্ছাই হইল রাষ্ট্রের মূল ভিত্তি। গণতন্ত্র আজ সুপ্রতিষ্ঠিত ও গণতন্ত্র প্রতিষ্ঠিত হওয়ার সঙ্গে সঙ্গে এ সত্য আজ মানিয়া লইতে হইবে যে, জনসাধারণের সমর্থন ব্যতীত কোন রাষ্ট্রই স্থায়ী হইতে পারে না। ১৬৮৮ খৃষ্টাব্দের ইংলণ্ডের ‘গোরবময় বিপ্লব’, ১৭৮৯ খৃষ্টাব্দের ‘ফরাসী বিপ্লব’ ও ১৯১৭ খৃষ্টাব্দের ‘রুশ বিপ্লব’ স্বৈরাচারী রাজতন্ত্রের অবসান করিয়া পশুবলের ভিত্তিতে গঠিত রাষ্ট্রের সমাধি রচনা করিয়াছে। স্বতরাং দেখা যায় যে, জনসাধারণ শুধু শান্তি বা পীড়নের ভয়ে রাষ্ট্রকর্তৃক স্বীকার করে তাহা নয়, স্বীকার করে এই কারণে যে, রাষ্ট্রের শক্তি জনসাধারণের সম্মতির উপর প্রতিষ্ঠিত আইন অনুসারে জনসাধারণের অধিকার রক্ষার জন্য প্রযুক্ত হয়। তাই বলা হয় জনসাধারণের ইচ্ছা বা সম্মতিই রাষ্ট্রের ভিত্তি—শক্তি নয় (“Will, not force, is the basis of modern state.”)

সামাজিক চুক্তি মতবাদ (The Social Contract Theory)

c

রাষ্ট্রের উৎপত্তিসম্বন্ধে ষতগুলি মতবাদ প্রচলিত আছে তাহাদের মধ্যে এই মতবাদটিতে বিশেষ গুরুত্ব আরোপ করা হয়। এই মতবাদটি যে শুধু

রাষ্ট্রের উৎপত্তি বিচার করে তাহা নহে, রাষ্ট্রের প্রকৃতি-বিশ্লেষণেও এই মতবাদটি সহায়তা করে।

রাষ্ট্র একটি সামাজিক চুক্তির ফলে গঠিত হইয়াছে—ইহাই এই মতবাদের প্রতিপাদ্য বিষয়। রাষ্ট্র একটি মানবীয় প্রতিষ্ঠান ও মানুষের পারস্পরিক চুক্তির ভিত্তিতে গঠিত হইয়াছে। এই মতবাদের সারমর্ম হইল যে, মানুষ একদিন সমাজগণের বাহিরে বাস করিত। সমাজগঠনের পূর্বে মানুষ এমন একটা অবস্থায় বাস করিত যেখানে মনুষ্য-প্রণীত কোন আইন-কানুন ছিল না। মানুষ নিজের ইচ্ছামত তাহার দৈনন্দিন জীবন পরিচালিত করিত। রাষ্ট্র-উৎপত্তির পূর্বে মানুষের এই প্রাক-সামাজিক অবস্থাটি 'প্রাকৃতিক পরিবেশ' বা 'প্রাকৃতিক রাজত্ব' (State of Nature) বলিয়া অভিহিত হইয়াছে। কিন্তু এই প্রকৃতির রাজত্বে মানুষ ক্রমশঃই অতিষ্ঠ হইয়া উঠিল। দুর্বলের উপর সবল অত্যাচার করিলে দুর্বলকে রক্ষা করিবার কোনরূপ আইনসম্বন্ধ ব্যবস্থা ছিল না। তাই মানুষ তার আদিম জীবনযাত্রা-প্রণালী পরিবর্তন করিয়া সুসংবদ্ধ জীবনযাপনমানসে নিজেদের মধ্যে একটা চুক্তিতে আবদ্ধ হইল। এই পারস্পরিক চুক্তি অনুযায়ী রাষ্ট্র গঠিত হইল। চুক্তির ফলে মানুষ সমাজবদ্ধ হইল, রাজনৈতিক চেতনা লাভ করিয়া রাষ্ট্ররূপ সংঘ গঠন করিল ও প্রকৃতির রাজত্বের অনিচ্ছয়তার হাত হইতে আত্মরক্ষা করিল।

এই মতবাদটি বহু প্রাচীন। ভারতীয় দার্শনিক কোটিল্য এবং গ্রীক দার্শনিক প্লেটো ও অ্যারিস্টটল প্রভৃতি এই মতবাদ সম্বন্ধে বিশদ আলোচনা করিয়াছেন। শেথোক লেখকদ্বয় এই মতবাদটি যুক্তি দ্বারা খণ্ডন করিবার চেষ্টা করেন। রোমক লেখকগণ বিশেষ করিয়া পলিবিয়াস এই মতবাদ সমর্থন করেন। তাঁহার মতে রাজার নির্দেশ জনসাধারণ আইন বলিয়া মান্য করে, তাহার কারণ রাজশক্তির উৎস হইল জনসাধারণ। রাজা জনসাধারণের প্রতিনিধি মাত্র। মধ্যযুগে রাজতন্ত্রবিরোধী লেখকগণদ্বারা এই মতবাদটি বিশেষভাবে সমর্থিত হয়। তাঁহাদের মতে অত্যাচারী রাজাকে সিংহাসনচ্যুত এক্ষণে কি হত্যা করিবার অধিকারও প্রজাসাধারণের আছে। কেন না, জনসাধারণের প্রদত্ত ক্ষমতার বলেই রাজা বলীয়ান ও সেই ক্ষমতার অপব্যবহার করিলে রাজাকে শাস্তি দিবার অধিকার জনসাধারণের আছে।

এইরূপে ষোড়শ শতাব্দী হইতে অষ্টাদশ শতাব্দী পর্যন্ত অনেক বিশিষ্ট চিন্তানায়ক এই মতবাদ নানারূপে প্রচার করিয়াছিলেন। এই লেখকগণের মধ্যে ইংরাজ লেখক হব্‌স্ ও লক্ এবং ফরাসী লেখক রুশো এই মতবাদের সমর্থনকারী হিসাবে সমধিক প্রসিদ্ধি লাভ করিয়াছেন। ইহাদের পরেও জার্মান দার্শনিক ইমানুয়েল্ কান্ট ও ইংরাজ রাজনীতিবিদগণ বার্ক ও এই মতবাদের আলোচনা করেন। বর্তমান যুগে এই মতবাদটির আলোচনা করিতে গেলে স্বভাবতই হব্‌স্, লক্ ও রুশোর অভিমত লইয়া আলোচনা করিতে হয়, কারণ এই তিন ব্যক্তির চুক্তির ভিত্তিতে রাষ্ট্র গঠিত হইয়াছে— এই মতবাদটি বিশেষ গুরুত্বের সহিত প্রচার করিয়াছেন।

হব্‌সের অভিমত

‘লেভিয়াথান’ নামক বিখ্যাত গ্রন্থে হব্‌স্ তাঁহার চুক্তিবাদী মত ব্যাখ্যা করিয়াছেন। তাঁহার মতে রাষ্ট্রজন্মের পূর্বে মানুষ এক প্রাকৃতিক পরিবেশের মধ্যে বাস করিত। এই প্রাকৃতিক পরিবেশে মনুষ্যসৃষ্ট কোনরূপ আইন-শৃংখলা ছিল না—প্রাকৃতিক আইনের দ্বারা মানুষের জীবন নিয়ন্ত্রিত হইত। ‘জোর যার মুল্লুক তার’—এই নীতিদ্বারাই মানুষের অধিকার নির্ধারিত হইত। হব্‌সের মতে মানুষ স্বভাবতই অসদ্বৈচল্যপ্রণোদিত হইয়া কাজ করে। তাহার নিজের স্বার্থ রক্ষা করাই তাহার প্রধান প্রবৃত্তি। এই প্রবৃত্তির তাড়নায় মানুষ প্রাকৃতিক পরিবেশে সব সময়েই পরিচালিত হইত। মানুষের জীবন, ধন ও মানের কোন নিরপত্তা ছিল না। মানুষ সব সময়ে পরস্পরের সহিত কলহ করিয়া নিজ শ্রেষ্ঠতর শক্তির বলে স্বীয় স্বার্থ রক্ষা করিত। শ্রেষ্ঠতর শক্তি ছাড়া মানুষের স্বেচ্ছাচারী ক্ষমতায় বাধা দিবার অস্ত কোন পন্থা ছিল না। সুতরাং হব্‌সের মতে রাষ্ট্রের উৎপত্তির পূর্বে মানুষ এমন একটা বন্য অবস্থায় ছিল যেখানে তাহার জীবনযাত্রা-প্রণালী একদল রক্তপিপাসু নেকড়ে বাঘের জীবনযাত্রা-প্রণালীর অনুরূপ ছিল। এইরূপ ভীষণ প্রাকৃতিক পরিবেশে মানুষের জীবন যখন অসহনীয় হইয়া উঠিল তখন তাহারা একযোগে মিলিত হইয়া এই ভয়াবহ অবস্থার অবসান ঘটাইতে ইচ্ছুক হইল। তাহারা সকলেই প্রাকৃতিক পরিবেশে যে অবাধ স্বাধীনতার অধিকারী ছিল, সেই অবাধ স্বাধীনতা একটা পারস্পরিক চুক্তির

দ্বারা বিনা শর্তে, নিঃশেষে ও পুনঃপ্রাপ্তির দাবী না রাখিয়া তাহাদের নিজেদের একজনের হস্তে সমর্পণ করিল। এই লোকটি সমাজে রাজা বলিয়া পরিচিত হইল ও সমস্ত লোকের জীবন ও সম্পত্তি রক্ষার ভার প্রাপ্ত হইল। জনসাধারণের উপর তাহার অসীম ক্ষমতা প্রতিষ্ঠিত হইল।

হব্‌সের মতে মানুষ প্রাকৃতিক পরিবেশের দুর্বিষহ অবস্থা হইতে পরিভ্রাণ পাইবার নিমিত্ত সকলে মিলিয়া একটা চুক্তি করিল—যে চুক্তির ফলে একজন শাসনকর্তার আবির্ভাব হইল। সুতরাং শাসক চুক্তির একটি পক্ষ নহে। মানুষ নিজেদের মধ্যে চুক্তি করিয়া একজন শাসনকর্তা নিয়োগ করে—যাহার হস্তে তাহারা তাহাদের তথাকথিত প্রাকৃতিক সমস্ত অধিকার বিনা শর্তে সমর্পণ করে। রাজা জনগণ কর্তৃক প্রদত্ত ক্ষমতাবলে সম্পূর্ণ নিজ ইচ্ছানুসারে শাসনকার্য অর্থাৎ জনগণের জীবন ও সম্পত্তিরক্ষার ব্যবস্থা করিবেন। এইজন্য প্রজাগণ রাজার নিকট কোন কৈফিয়ৎ চাহিতে পারিবে না বা রাজার বিরুদ্ধে বিদ্রোহ ঘোষণা করিতে পারিবে না। সুতরাং হব্‌সের মতে রাজা প্রজার উপর কোনরূপ অবিচার করিতে পারেন না। অবিচার করার অর্থ হইল চুক্তি ভঙ্গ করা। রাজা কোনরূপ চুক্তি করেন নাই, কাজেই কোন চুক্তিদ্বারা তিনি বাধ্য নহেন। জনগণই নিজেদের মধ্যে চুক্তি করিয়া রাজার হস্তে সমস্ত ক্ষমতা সমর্পণ করে। সুতরাং প্রজাগণ যদি রাজার নির্দেশ অমান্য করে বা বিদ্রোহ করে, তাহা হইলে প্রজাগণই চুক্তিভঙ্গের দোষে দায়ী হইবে। আর যে চুক্তিদ্বারা মানুষ প্রাকৃতিক পরিবেশের অবস্থা হইতে পরিভ্রাণ পাইয়াছে, সে চুক্তি ভঙ্গ করিলে পুনরায় প্রাকৃতিক পরিবেশের অনিশ্চয়তার মধ্যে ফিরিতে হইবে। চুক্তিভঙ্গের ফলে সমাজ, রাষ্ট্র ও শাসনযন্ত্র বিকল হইবে।

উপরি-উক্ত যুক্তিদ্বারা হব্‌স জনসাধারণের উপর রাজার অব্যাহত ক্ষমতা প্রতিষ্ঠিত করিবার চেষ্টা করেন। তাঁহার মতে রাজার আদেশই হইল আইন। সুতরাং তাঁহার মতবাদ দ্বারা তিনি স্বৈরাচার সমর্থন করেন। নিজের ব্যক্তিগত জীবনের ঘটনাবলী হব্‌সের এই মতবাদের উপর অনেক আলোকসম্পাত করিয়াছে। তিনি ইংলণ্ডের রাজা দ্বিতীয় চার্লসের গৃহ-শিক্ষক ছিলেন ও তাঁহার এই মতবাদ দ্বারা ষ্টুয়ার্ট রাজবংশের যথেষ্ট শাসন-ব্যবস্থার সমর্থন করেন। তাঁহার পুস্তকের নামকরণও বিশেষ তাৎপর্যপূর্ণ।

‘লেভিয়াথান’ শব্দটির অর্থ হইল অতিকায় সামুদ্রিক জীববিশেষ। এই জীবের শক্তিও অপরিমীম। চুক্তির দ্বারা যে রাজশক্তি প্রতিষ্ঠিত হইল তাহার ক্ষমতাও এই সামুদ্রিক জীববিশেষের ক্ষমতার মত অবাধ ও অপরিমীম। হব্‌স্‌ এমন একটি মতবাদ প্রচার করিলেন, যে মতবাদ মানুষকে অতি নিকৃষ্ট স্থরের জীব বলিয়া চিত্রিত করিল। প্রাকৃতিক রাজত্বে মানুষ যখন বাস করিত তখন তাহার জীবন ছিল “নিঃসঙ্গ, দীন, কদর্ব, পাশব ও স্বল্পায়ু”। চুক্তির দ্বারা সামাজিক জীবন লাভ করিয়াও মানুষের অবস্থার কোন উন্নতি হইল না। প্রাকৃতিক পরিবেশের অরাজকতা হইতে পরিজ্ঞান পাইয়া মানুষ স্বৈরাচারী শাসনের নিষ্পেষণে পূর্ববৎ জর্জরিত হইতে লাগিল। হব্‌সের মতে একটিমাত্র চুক্তি দ্বারা সমাজ, রাষ্ট্র ও শাসনযন্ত্র সৃষ্ট হইয়াছিল। তিনি চুক্তিদ্বারা প্রতিষ্ঠিত আইনসম্মত রাজশক্তির প্রাধান্য ঘোষণা করিলেন, কিন্তু যাহারা চুক্তি করিয়া এই রাজশক্তির সৃষ্টি করিল, সেই গণশক্তিকে তিনি অস্বীকার করিলেন। হব্‌স তাঁহার পরিকল্পিত রাষ্ট্রব্যবস্থার দ্বারা ব্যক্তি-স্বাধীনতার সমাধি রচনা করিয়াছিলেন।

এস্থলে একটি কথা স্মরণ রাপিতে হইবে যে, হব্‌স যদিও তাঁহার মতবাদ দ্বারা স্বৈরতন্ত্র সমর্থন করিয়াছিলেন তথাপি গণশক্তি যে সমস্ত রাজনৈতিক শক্তির উৎস তাহা বিশেষ গুরুত্বের সহিত বলিয়াছেন। তাঁহার মতে স্বৈরাচারী রাজশক্তিও জনসাধারণের ইচ্ছার ভিত্তির উপর প্রতিষ্ঠিত। হব্‌স একটি বিশেষ উদ্দেশ্য-প্রণোদিত হইয়া তাঁহার পুস্তকে এই গণবিরোধী মতবাদ প্রচার করিয়াছিলেন। তাঁহার সময়ে সমগ্র ইউরোপ মহাদেশ ও বিশেষ করিয়া তাঁহার স্বদেশ ইংলণ্ডে অস্থিবিপ্লব দেশের মধ্যে অরাজকতা সৃষ্টি করিয়া লোকের অর্থশাস্তি নষ্ট করিয়া দিয়াছিল। হব্‌স এমন একটি রাজশক্তি স্প্রতিষ্ঠিত করিতে চাহিয়াছিলেন, যে শক্তি স্বীয় ক্ষমতাবলে রাজনৈতিক বিবাদের অবসান ঘটাইয়া দেশে শান্তি-শৃংখলা স্থাপন করিতে পারে।

লকের অভিমত

জন লক্‌ও এই সামাজিক চুক্তি-মতবাদের বিশদ ব্যাখ্যা করিয়াছেন। হব্‌স-প্রবর্তিত মতবাদের মূল সূত্রগুলির সহিত লকের মতবাদের মূল

স্বতন্ত্রতার সাদৃশ্য থাকিলেও দেখা যায় যে, এই উভয় লেখকের দৃষ্টিভঙ্গী ও প্রতিপাদ্য বিষয় সম্পূর্ণ পৃথক্।

লকের মতে রাষ্ট্রগঠনের পূর্বে সমাজের বাহিরে এমন একটি অবস্থায় মানুষ বাস করিত, যে অবস্থাকে তিনিও প্রাকৃতিক পরিবেশ বা প্রকৃতির রাজত্ব বলিয়া আখ্যা দিয়াছেন। কিন্তু এই প্রাকৃতিক পরিবেশকে লক্-প্রাক-সামাজিক (Pre-social) যুগ না বলিয়া প্রাক-রাষ্ট্র (Pre-political) যুগ বলিয়া অভিহিত করিয়াছেন। এই প্রাকৃতিক পরিবেশে মানুষ যুক্তি ও বিবেকের অনুশাসন দ্বারা পরিচালিত হইত। লকের মতে মানুষ স্বাভাবিকই হ্রস্বপ্রকৃতি নহে। প্রাক-রাষ্ট্র যুগে মানুষ যে স্বাধীনতার অধিকারী ছিল, তাহা শুধু শ্রেষ্ঠতর শারীরিক বলের উপর প্রতিষ্ঠিত ছিল না। ভ্রাতৃত্ববোধ ও প্রাকৃতিক আইনের দ্বারা মানুষের কার্য নিয়ন্ত্রিত হইত। এই প্রাকৃতিক পরিবেশে সমস্ত মানুষই ছিল স্বাধীন ও সমপৰ্যায়ভুক্ত। কিন্তু কতকগুলি বিশেষ অঙ্গবিধার জন্ত মানুষ বাধ্য হইয়া এই শাস্তিময় প্রাকৃতিক পরিবেশ পরিত্যাগ করিয়া রাষ্ট্র গঠন করিল। প্রথমতঃ, প্রাকৃতিক পরিবেশে যে সমস্ত অসংবদ্ধ প্রাকৃতিক নিয়মদ্বারা মানুষের জীবন নিয়ন্ত্রিত হইত, সেগুলি সম্বন্ধে মতভেদ হইলে মীমাংসা করিবার কোন নির্দিষ্ট পদ্ধতি ছিল না। দ্বিতীয়তঃ, প্রাকৃতিক নিয়ম ভঙ্গ করিলে দোষীকে শাস্তি দিবার নিরপেক্ষ কোন বিচারক ছিল না। তৃতীয়তঃ, বিচারব্যবস্থা বলবৎ করিবার জন্ত কোন শাসন বিভাগও ছিল না। প্রাকৃতিক পরিবেশের এই অনিশ্চয়তা দূর করিয়া একটি বিধিসম্মত শাসনব্যবস্থা প্রবর্তনের প্রয়োজন মানুষ উপলব্ধি করিল। এই উপলব্ধির ফলে মানুষ নিজেদের মধ্যে একটি পারস্পরিক চুক্তি করিয়া রাষ্ট্র গঠন করিল। তাহার পর তাহারা দ্বিতীয় চুক্তিদ্বারা একজনকে রাজা করিল। প্রথম চুক্তির দ্বারা একটি রাষ্ট্র গঠিত হইল ও দ্বিতীয় চুক্তির দ্বারা একটি সরকার—রাজতন্ত্র প্রতিষ্ঠিত হইল। রাজার সহিত তাহাদের এই চুক্তি হইল যে, তিনি আইন প্রণয়ন করিয়া লোকের জীবন, ধন ও মানের নিরাপত্তা বজায় রাখিবেন ও প্রজারা এই নিমিত্ত তাঁহার অনুশাসন মানিয়া তাঁহার আনুগত্য স্বীকার করিবে। লকের মতে রাজা চুক্তির একজন পক্ষ ও তিনি যতদিন চুক্তির শর্ত মানিয়া কাজ করিবেন ততদিন তিনি জনগণের সমর্থন পাইবেন। চুক্তির শর্ত ভঙ্গ করিলে অর্থাৎ,

স্বেচ্ছায় অথবা নিজের অক্ষমতাহেতু শাসনকার্য পরিচালনা করিতে না পারিলে তাঁহার রাজনৈতিক অধিকারও হারাইবেন। এই মতবাদদ্বারা লক্ ১৬৮৮ খৃষ্টাব্দে ইংলণ্ডের ‘গৌরবময় বিপ্লব’ সমর্থন করেন।

লক্ তাঁহার স্বদেশের ক্রমবর্ধমান গণতান্ত্রিক আদর্শের প্রতি লক্ষ্য রাখিয়া তাঁহার মতবাদটির ব্যাখ্যা করেন। হব্‌সের মত তিনি মানবচরিত্রকে এত নীচ প্রকৃতির বলিয়া মনে করেন নাই। লকের মতে পর পর দুইটি চুক্তি-দ্বারা রাষ্ট্র ও সরকার গঠিত হইয়াছিল। ইহাদ্বারা বুঝা যায় যে, তিনি রাষ্ট্র ও শাসনযন্ত্রের পার্থক্যসম্বন্ধে সচেতন ছিলেন, কিন্তু হব্‌স্‌ এবিষয়ে মারাত্মক ভুল করিয়াছিলেন। লকের মতে মানুষ নিঃশেষে সমস্ত ক্ষমতা বিনা শর্তে সরকারের হস্তে অর্পণ করে নাই। জনসাধারণের হস্তেই শেষ পর্যন্ত সার্বভৌম ক্ষমতা থাকে, যে ক্ষমতার বলে জনসাধারণ অত্যাচারী রাজাকে ক্ষমতাচ্যুত করিতে পারে। লকের মতে আইন রাজার নির্দেশ নহে। আইনের উৎস হইল জনমত এবং এই জনমত যুক্তির উপর প্রতিষ্ঠিত হওয়া চাই। সুতরাং লক্ তাঁহার মতবাদদ্বারা ব্যক্তি-স্বাধীনতার ভিত্তি সুদৃঢ় করেন। কিন্তু তিনি এই ব্যক্তি-স্বাধীনতার উপর এতটা গুরুত্ব আরোপ করেন যে, তাহার ফলে শাসনব্যবস্থা দুর্বল ও অস্থায়ী হইয়া ওঠে। হব্‌সের মতবাদের ভিত্তিতে গঠিত রাষ্ট্রে যেরূপ ব্যক্তি-স্বাধীনতা ক্ষুণ্ণ হয়, লকের পরিকল্পিত রাষ্ট্রে সেইরূপ সরকারের স্থায়িত্ব নষ্ট হয়—সরকারের স্থায়িত্ব জনসমষ্টির খামখেয়ালোর উপর নির্ভর করে। হব্‌স্‌ গণশক্তিকে উপেক্ষা করিয়া রাজশক্তিতে গুরুত্ব আরোপ করিয়াছিলেন। লক্ রাজশক্তিকে উপেক্ষা করিয়া গণশক্তিকেই সর্বশক্তির आधार বলিয়া ঘোষণা করিলেন। কিন্তু রাজনৈতিক জীবনের উদ্দেশ্য হইল এই রাষ্ট্রশক্তি ও গণশক্তির মধ্যে যথাযথ সামঞ্জস্য বিধান করিয়া সমাজের রাজনৈতিক জীবনধারা অব্যাহত রাখা। এই উদ্দেশ্য-প্রণোদিত হইয়া ফরাসী দার্শনিক রুশো এই মতবাদের ব্যাখ্যা করেন।

রুশোর অভিমত

১৭৬২ খৃষ্টাব্দে রুশো তাঁহার ‘কন্ট্রাক্ট সোসাল’ গ্রন্থে সামাজিক চুক্তি-সম্বন্ধে অভিমত ব্যক্ত করেন। রুশোর এই সামাজিক চুক্তি-মতবাদ সম্বন্ধে

বলা হইয়াছে যে, তিনি হব্‌সের পদ্ধতিতে লকের মতবাদের সম্যক পরিবর্ধন করেন। তিনিও হব্‌স ও লকের প্রাকৃতিক পরিবেশ হইতে মানুষের জীবনের সূত্রপাত করেন। কিন্তু তাঁহার মতে প্রকৃতির রাজ্যে ছিল আদর্শ ব্যবস্থা। এই ব্যবস্থায় মানুষের মধ্যে কোনরূপ কলহ-বিবাদ ছিল না। তাহারা পরস্পরের সহিত পরম সুখে ও সম্প্রীতিতে জীবন যাপন করিত। মানুষের পারস্পরিক সম্বন্ধ কোনরূপ কৃত্রিম বন্ধন বা বাধ্যবাধকতা দ্বারা নিয়ন্ত্রিত হইত না। মানুষ সম্পূর্ণ স্বাধীনভাবে মুক্ত জীবন যাপন করিত। প্রকৃতির রাজ্যের এই সহজ, সরল ও স্বাভাবিক জীবনযাত্রাকে রুশো মর্ত্যের স্বর্গ বলিয়া বর্ণনা করিয়াছিলেন। কিন্তু জনসংখ্যা-বৃদ্ধির সঙ্গে সঙ্গে মানুষকে অনেক জটিল সমস্যার সম্মুখীন হইতে হইল। এই জনসংখ্যা-বৃদ্ধির ফলে তাহাদের নানারূপ সংঘ প্রতিষ্ঠিত করিয়া নতন সমস্যাগুলির সমাধান করিবার প্রয়োজন হইল। ব্যক্তিগত সম্পত্তি-প্রবর্তনের ফলে মানুষের আদিম সরলতা ও পূর্ণ সাম্য অন্তর্হিত হইল। যেদিন হইতে মানুষ এই সমস্ত সমস্যা-সমাধানের জন্ত চিন্তা করিতে শিখিল, সেইদিন হইতে তাহাদের অধঃপতন হইল (“The man who reflects is corrupt”)। মানুষ ক্রমে ক্রমে আপন পর বিচার করিতে শিখিয়া স্বর্গরাজ্যের শাস্তিময় ও পূর্ণ সাম্য ও স্বাধীনতা-বিশিষ্ট জীবন হইতে বঞ্চিত হইল। ইহার ফলে মানুষের মধ্যে উচ্চ-নীচ ভেদবুদ্ধির আবির্ভাব হইল। শেষ পর্যন্ত এই ভেদবুদ্ধি মানুষের মধ্যে স্বার্থপরতা, আত্মকলহ ও নানারূপ নীচতার সৃষ্টি করিয়া মানুষকে হব্‌স-বর্ণিত অসহনীয় প্রাকৃতিক অবস্থায় পর্ববসিত করিল। এই অবস্থা হইতে পরিজ্ঞান পাইবার নিমিত্ত মানুষ নিজেদের মধ্যে একটা চুক্তি সম্পাদন করিয়া রাষ্ট্র সৃষ্টি করিল। এই রাষ্ট্রের মধ্য দিয়া মানুষ প্রাকৃতিক জীবনের পরবর্তী অধ্যায়ের ভয়াবহ অবস্থা হইতে মুক্তি পাইল। অতরাং এ দিক দিয়া হব্‌স-বর্ণিত প্রাকৃতিক পরিবেশ ও রুশো-বর্ণিত প্রাকৃতিক পরিবেশের দ্বিতীয় পর্যায়ের মধ্যে সাদৃশ্য রহিল।

রুশোর মতে মানুষ নিজেদের মধ্যে একটিমাত্র চুক্তি সম্পাদন করিয়া রাষ্ট্র গঠন করিল, কিন্তু রাষ্ট্রের সার্বভৌম ক্ষমতা হব্‌স বা লকের মতামতানুযায়ী তাহারা বাহিরের কোন কর্তৃপক্ষের হস্তে সমর্পণ করিল না। মানুষ নিজেদের মধ্যে এই মর্মে চুক্তি করিল যে, তাহারা প্রত্যেকে ব্যক্তিগতভাবে যে ক্ষমতা

প্রয়োগ করিত তাহা প্রত্যেকে স্বাধীনভাবে প্রয়োগ না করিয়া সমষ্টিগতভাবে প্রয়োগ করিবে অর্থাৎ প্রত্যেকেই ব্যক্তিগত ক্ষমতাকে সমষ্টিগত ইচ্ছার নির্দেশের অধীনে সমর্পণ করিল। সমষ্টিগত এই ইচ্ছাকেই রুশো সাধারণ ইচ্ছা (General Will) আখ্যা দিয়াছেন। রুশো কোন ব্যক্তিবিশেষের বা কতিপয় জনসমষ্টির উপর রাষ্ট্রের সার্বভৌম ক্ষমতা অর্পণ না করিয়া সমষ্টির এই সাধারণ ইচ্ছাকে সার্বভৌম ক্ষমতার অধিকারী করিয়াছেন। কিন্তু রুশো-বর্ণিত এই সাধারণ ইচ্ছার সহিত হব্‌স্-বর্ণিত অবাধ রাজতন্ত্রের মূলতঃ কোন পার্থক্য নাই। হব্‌সের 'লেভিয়াথান' যেরূপ অসীম, চূড়ান্ত ও অপ্রতিদ্বন্দ্বিত ক্ষমতার অধিকারী, রুশোর সাধারণ ইচ্ছাও তদ্রূপ অপ্রতিদ্বন্দ্বিত ক্ষমতার অধিকারী। রুশো রাজার হস্তে ক্ষমতা সমর্পণ না করিলেও যে সমষ্টিগত বা সাধারণ ইচ্ছায় ক্ষমতা সমর্পণ করিয়াছিলেন তাহা কার্যতঃ স্বৈরাচারী শাসকের স্থান গ্রহণ করিয়াছিল। এ দিক দিয়া দেখিতে গেলে বলা যায় যে, রুশো হব্‌সের মতবাদ দ্বারা বিশেষভাবে প্রভাবিত হইয়াছিলেন।

সাধারণ ইচ্ছা (General Will)—রুশো তাঁহার এই সমষ্টিগত সাধারণ ইচ্ছার নিজস্ব ব্যাখ্যা করিয়াছেন। প্রাকৃতিক অবস্থায় মানুষ নিজেদের মধ্যে যে পারস্পরিক চুক্তি করে, সেই চুক্তির ফলে এই সাধারণ ইচ্ছার জন্ম। এই চুক্তির কোন দ্বিতীয় পক্ষ নাই। এই চুক্তির দ্বারা প্রত্যেক ব্যক্তি তাহার সমস্ত ক্ষমতা পরিহার করিয়া সাধারণ ইচ্ছায় সমর্পণ করিল। ব্যক্তিগত ইচ্ছা বা ক্ষমতাকে সমষ্টিগত ইচ্ছা বা ক্ষমতায় সমর্পণ করিলেও ব্যক্তি-স্বাধীনতা বা সাম্যনীতির অবসান ঘটিল না। প্রত্যেক ব্যক্তিই নবগঠিত রাষ্ট্রের অপরিহার্য অংশ হিসাবে ব্যক্তিগতভাবে যাহা সমর্পণ করিয়াছিল, তাহা ফিরিয়া পাইল। চুক্তিগত ক্ষমতা সমর্পণ করিয়া কেহই পরাধীন হইল না। পূর্বেই বলা হইয়াছে যে, চুক্তিদ্বারা গঠিত এই সমষ্টিগত ইচ্ছাতে রুশো সার্বভৌম ক্ষমতা আরোপ করিয়াছেন। এই ক্ষমতার বৈশিষ্ট্য হইল যে, ইহা অবিভাজ্য ও হস্তান্তরের অযোগ্য। একমাত্র সমষ্টিই প্রত্যক্ষভাবে ঐ-ক্ষমতা প্রয়োগের অধিকারী। রাষ্ট্রের নীচে সমষ্টির এই ইচ্ছা হইল চূড়ান্ত ও অপ্রতিদ্বন্দ্বিত। এই চূড়ান্ত ও অপ্রতিদ্বন্দ্বিত ইচ্ছার উদ্দেশ্য হইল সমষ্টির মঙ্গলসাধন করা। সাধারণের মঙ্গলসাধন করা যে

ইচ্ছার উদ্দেশ্য নয়, সে ইচ্ছা সমষ্টিগত হইলেও তাহাকে রুশো সাধারণের ইচ্ছা বলিয়া মনে করেন না। হব্‌সের মত তিনি এই সাধারণের ইচ্ছাকেই সর্বশক্তিময়, অবাধ ও অপ্রতিহত কর্তৃত্বের আধার বলিয়াছেন। যদি ব্যক্তিগত ইচ্ছার সহিত সাধারণের ইচ্ছার সংঘর্ষ হয় তাহা হইলে সাধারণের ইচ্ছাই বলবৎ হইবে। বুঝিতে হইবে যে, ব্যক্তি তাহার প্রকৃত ইচ্ছার দ্বারা পরিচালিত না হইয়া ভ্রান্ত ইচ্ছার বশবর্তী হইয়াছে ও এরূপ স্থলে সাধারণের ইচ্ছা বলপ্রয়োগদ্বারা ব্যক্তির উপর বলবৎ করা যাইবে। কারণ সাধারণের ইচ্ছা যে শুধু অবাধ কর্তৃত্বের অধিকারী তাহা নয়, ইহা সব সময়েই অভ্রান্ত ও সমষ্টির মঙ্গলবিধায়ক। সুতরাং রুশোর মতবাদ অনুসারে সরকারের কোন নিজস্ব ক্ষমতা নাই। সরকার সাধারণ ইচ্ছার দ্বারা প্রতিষ্ঠিত ও সাধারণ ইচ্ছার নিয়ন্ত্রণাধীন শাসনযন্ত্র মাত্র। সরকার সাধারণ ইচ্ছার নির্দেশে সাধারণ ইচ্ছাপ্রদত্ত ক্ষমতা প্রয়োগ করে।

লাস্কি প্রভৃতি অনেক লেখক রুশোর এই মতবাদের সমালোচনা করিয়াছেন। প্রথমতঃ, বলিতে পারা যায় যে, কার্যতঃ এই সাধারণের ইচ্ছা সংখ্যাগরিষ্ঠের ইচ্ছা ব্যতীত আর কিছুই নয়। সুতরাং রাষ্ট্রীয় ব্যাপারে সংখ্যালঘিষ্ঠের কার্যতঃ কোন কর্তৃত্ব নাই। সংখ্যালঘিষ্ঠেরা যদি সংখ্যাগরিষ্ঠের কার্যে আপত্তি করিয়া বাধা দেয় তাহা হইলে সংখ্যালঘিষ্ঠেরা তাহাদের প্রকৃত ইচ্ছা জানে না বলিয়া বলপূর্বক তাহাদিগকে সংখ্যাগরিষ্ঠের মত অনুসারে কার্য করিতে বাধ্য করা যায়। ইহাতে সংখ্যালঘিষ্ঠের স্বাধীনতা ক্ষুণ্ণ হইবার সম্ভাবনা রহিয়াছে। দ্বিতীয়তঃ, এই মতের বিরুদ্ধে বলা চলে যে, ইহা রাজনৈতিক ক্ষেত্রে বলপ্রয়োগের সমর্থন করিয়া সংখ্যাগরিষ্ঠের স্বৈচ্ছাচারিতার প্রদর্শন দেয়। এদিক দিয়া দেখিতে গেলে রুশোর সাধারণ ইচ্ছা হব্‌সের 'লেভিয়াথানের' মতই স্বৈরাচারী। তবে রুশোর কল্পিত চুক্তিতে রাজার কোন স্থান নাই। হব্‌সের মত তিনি রাজাকে অপ্রতিহত স্বৈরাচারী ক্ষমতার অধিকারী না করিয়া সংখ্যাগরিষ্ঠের স্বৈরাচার সমর্থন করেন। পূর্বেই বলা হইয়াছে যে, হব্‌স ও লকের মতবাদের—রাষ্ট্রের সার্বভৌম ক্ষমতা ও ব্যক্তি-স্বাধীনতা—সম্বন্ধের উদ্দেশ্যে রুশো লেখনী ধারণ করিয়াছিলেন, কিন্তু তাহার উদ্দেশ্য সকল হয় নাই। লাস্কি বলেন যে, বর্তমান রাষ্ট্রজীবনে প্রত্যক্ষভাবে এই সাধারণ ইচ্ছা প্রয়োগ করাও সম্পূর্ণ অসম্ভব।

সমালোচনা—এই মতবাদের বিরুদ্ধে আজ পর্যন্ত বহু সমালোচনা হইয়াছে। এই মতবাদের প্রধান ত্রুটি হইল যে, চুক্তির দ্বারা আজ পর্যন্ত পৃথিবীতে কোন রাষ্ট্রই গঠিত হয় নাই। ১৬২০ খৃষ্টাব্দে সম্পাদিত মে-ফ্রাওয়ার চুক্তির নজির দেখাইয়া অনেক লেখক ইহার সত্যতা প্রমাণ করিতে চেষ্টা করিয়াছেন। কিন্তু উক্ত চুক্তির সম্পাদনকারীরা এই মতবাদে বর্ণিত প্রাকৃতিক পরিবেশে কোন দিনই বাস করেন নাই বা তাঁহারা চুক্তির দ্বারা কোন নতন রাষ্ট্রও গঠন করিতে পারেন নাই। তাঁহারা রাষ্ট্রনৈতিক চেতনামস্পন্ন নাগরিক হিসাবে এক দেশ হইতে অন্য দেশে গিয়াছিলেন মাত্র। দ্বিতীয়তঃ, এই মতবাদ অধৌক্তিকও বটে। সভ্যতার নির্দিষ্ট স্তরে রাষ্ট্র গঠিত হইয়াছে। যে সমস্ত রাষ্ট্রনৈতিক চেতনাবিহীন আদিম মানব প্রকৃতিরাজ্যে বাস করিত তাহারা যে রাষ্ট্রব্যবস্থা সম্বন্ধে হঠাৎ সচেতন হইয়া রাষ্ট্র গঠন করিল ইহা সম্পূর্ণ ভুল। তৃতীয়তঃ, এই মতবাদে বলা হইয়াছে যে, প্রকৃতির রাজ্যে মানুষ সম্পূর্ণ স্বাধীন ছিল। এখানে তাহার প্রাকৃতিক অধিকার (Natural Right) ছিল। কিন্তু এই স্বাধীনতা ও অধিকার প্রকৃতির রাজ্যে থাকা সম্পূর্ণ অসম্ভব, কেন না প্রাকৃতিক পরিবেশে এমন কোন কর্তৃপক্ষের অস্তিত্ব বিद्यমান ছিল না যিনি মানুষের স্বাধীনতা ও অধিকার রক্ষা করিতে পারিতেন। ইহা ছাড়া, চুক্তি বলবৎ করিতে গেলে আইনের প্রয়োজন হয়। প্রাকৃতিক আইন কখনও চুক্তির মর্যাদা রক্ষা করিতে পারে না। এদিক দিয়া দেখিতে গেলে এই মতবাদের মধ্যে গুরুতর অসংগতি দেখা যায়। চতুর্থতঃ, স্তর হেনরি মেইন-এর মতে আদিম মনুষ্যসমাজগুলি জন্মগত অধিকারের ভিত্তির উপর প্রতিষ্ঠিত ছিল, তখন সমাজ মধ্যে মানুষের পদমর্যাদা স্থির হইত। জন্মগত অধিকারের ভিত্তিতে, চুক্তি বা প্রতিযোগিতার ভিত্তিতে নয়। সেই অবস্থার বিবর্তনের ক্রমপরিণতি হইল চুক্তিদ্বারা নিয়ন্ত্রিত সমাজব্যবস্থা। সুতরাং চুক্তি হইল সামাজিক অগ্রগতির পরিণতির নিদর্শন, এই মত অনুযায়ী ইহার গোড়াপত্তনের নিদর্শন হইতে পারে না। পঞ্চমতঃ, এই মতবাদে জনমতকে অত্যধিক প্রাধান্য দেওয়া হইয়াছে। জনমত সব সময়ই যে নির্ভুল সিদ্ধান্ত করিবে তাহার কোন নিশ্চয়তা নাই। জনমত যে সব সময়েই বিবেকবুদ্ধির দ্বারা পরিচালিত হয় তাহাও নয়, পরন্তু অনেক সময় দেখা যায় যে, যুক্তিহীন উত্তেজনাদ্বারা পরিচালিত হইয়া জনমত

শৈশৱাচারী শাসক অপেক্ষাও দেশের ও দশের অনেক অনিষ্ট সাধন করে। ফরাসী বিপ্লবে ও রুশ বিপ্লবে স্বাধীনতা, সাম্য ও মৈত্রীর নামে যে সব অস্ত্রায়, অবিচার ও নৃশংস হত্যাকাণ্ড অহুষ্ঠিত হইয়াছিল তাহা দ্বারা অতি সহজেই অল্পমেয় যে, জনমতের ভিত্তিতে গঠিত রাষ্ট্র যে সর্বাঙ্গসুন্দর হইবে তাহার কোন নিশ্চয়তা নাই। ষষ্ঠতঃ, এই মতবাদে রাষ্ট্রকে একটি অংশীদারী কারবারের সমপর্যায়ভুক্ত করা হয়। অংশীদারী কারবার যেরূপ কতকগুলি লোক তাহাদের সুবিধার জন্য ইচ্ছামত ভান্দিয়া দিতে পারে, রাষ্ট্রও সেইরূপ কতকগুলি লোকের খামখেয়ালের উপর প্রতিষ্ঠিত বলিয়া ধরা হয়। কিন্তু অংশীদারী ব্যবসায়ের অংশীদারেরা যে উদ্দেশ্যে কারবার গঠন করে, রাষ্ট্রের উদ্দেশ্য উদ্দেশ্যে বহু গুণে ব্যাপক ও রাষ্ট্রের সহিত ব্যক্তির সম্পর্ক আরও স্বদৃঢ় ভিত্তির উপর প্রতিষ্ঠিত। মানুষ নাগরিক হইয়াই জন্মগ্রহণ করে ও রাষ্ট্রের সভ্য হিসাবেই তাহার জীবনের বহুমুখী প্রবণতা সার্থকতা লাভ করে। পরিশেষে, এই মতবাদের বিরুদ্ধে ইহা বলা যায় যে, যদিও আদিম পিতৃপুরুষগণ একটা চুক্তির দ্বারা রাষ্ট্র গঠন করিয়া থাকেন তাহা হইলে সেই চুক্তিদ্বারা উত্তর-পুরুষদের বাধ্য থাকিবার কোন সংগত কারণ নাই। বর্তমান প্যারীমেন্ট সভা আইন করিয়া যেমন ভবিষ্যৎ প্যারীমেন্ট সভাকে সেই আইনের দ্বারা বাধ্য রাখিতে পারে না, সেইরূপ আইনের দৃষ্টিতে অতীত যুগে পিতৃপুরুষদের মধ্যে সম্পাদিত চুক্তি বর্তমান বংশধরদিগকেও বাধ্য করিতে পারে না।

মতবাদের মূল্য নির্ধারণ ও ইহার বাস্তব গুরুত্ব (Evaluation and Practical Importance of the Social Contract Theory)

এই মতবাদ অমৌক্তিক, বিপজ্জনক ও ইতিহাস দ্বারা আদৌ সমর্থিত হয় না, সুতরাং রাষ্ট্র উৎপত্তির ব্যাখ্যা সম্পর্কে এই মতবাদ কোনরূপ নূতন আলোকসম্পাত করিতে পারে না। কিন্তু রাষ্ট্রের উৎপত্তি-বিষয়ক মতবাদ হিসাবে পরিত্যক্ত হইলেও অতীতকাল দিয়া এই মতবাদের যথেষ্ট সার্থকতা আছে ও যে যুগে এই মতবাদ কার্যকর ছিল সে যুগে ও তৎপরবর্তী কালে এই মতবাদ মানুষের রাজনৈতিক জীবনের উপর প্রভূত প্রভাব বিস্তার করিয়াছে। রাষ্ট্র মানবীয় প্রতিষ্ঠান ও জনগণের সম্মতি ও সহযোগিতার

ভিত্তির উপর স্থাপিত—এই সত্যকে সুপ্রতিষ্ঠিত করিয়া মতবাদটি বর্তমান গণতন্ত্রের গোড়াপত্তন করে। কোন রাজশক্তি যে ঐশ্বরিক বিধান বা শক্তিবাদের উপর স্থায়ী হইতে পারে না, এই মতবাদ তাহাই প্রচার করিল। ঐশ্বরিক উৎপত্তি মতবাদ রাজার হস্তে অবাধ ও দায়িত্বহীন ক্ষমতা অর্পণ করিয়া স্বৈরাচারের প্রবর্তন করে, সামাজিক চুক্তি মতবাদ জনগণের ইচ্ছাকে রাজনৈতিক ক্ষমতার একমাত্র ভিত্তি বলিয়া প্রচার দ্বারা স্বৈরতন্ত্রের অবসান ঘটাইতে সাহায্য করে। এই মতবাদের উপর নির্ভর করিয়া ইংলণ্ডের গৌরবময় বিপ্লব অহুষ্ঠিত হয়, বাহার ফলে ইংলণ্ডে স্বৈরাচারের অবসান হইয়া গণতন্ত্রের ভিত্তি স্থাপিত হয়। ফরাসী বিপ্লবের স্বাধীনতা, সাম্য ও মৈত্রী বাণীর উৎসও হইল এই মতবাদটি। আমেরিকার উপনিবেশগুলির স্বাধীনতা-সংগ্রামের প্রেরণা দিয়াছিল এই মতবাদটি ও তদবধি আজ পর্যন্ত এই মতবাদটি নিপীড়িত মানবসম্প্রদায়কে আশার বাণী যোগাইতেছে। রাষ্ট্র কোন-একটা বাস্তব চুক্তি দ্বারা গঠিত না হইলেও এই পারস্পরিক চুক্তির ধারণা শাসক-শাসিতের সম্পর্ক নির্ধারণ করিয়া এই মতবাদটি রাষ্ট্রব্যবস্থায় স্থিতিবস্থা আনিতে সক্ষম হইয়াছে। ব্যক্তির ব্যক্তির উপর যথাযথ গুরুত্ব আরোপ করিয়া এই মতবাদ ব্যক্তিকে তাহার অধিকার ও কর্তব্যসম্বন্ধে আত্মসচেতন করিতে সাহায্য করিয়াছে। সুতরাং রাষ্ট্রনৈতিক জীবন-বিবর্তনের ইতিহাসে এই মতবাদের অবদান উপেক্ষণীয় নহে। বলপ্রয়োগনীতির অবসান ঘটাইয়া শাসক-শাসিতের সম্পর্ক স্থির করিয়া এই মতবাদটি লোকায়ত্ত শাসন প্রবর্তন করিতে সাহায্য করিয়াছে। বস্তুতঃ, এই মতবাদটিকে বর্তমান গণতন্ত্রের অগ্রদূত বলিলেও অত্যুক্তি হয় না।

চুক্তিবাদিগণ আধুনিক সার্বভৌমিকতা সংজ্ঞার রূপায়ণে সাহায্য করেন। হব্‌সের মতবাদের মধ্যে আইনগত সার্বভৌমিকতা ধারণার অংকুর দেখা যায় বাহা পরবর্তী কালে জন আট্টিন অস্পষ্টভাবে বিবৃত করেন। লক্‌ রাজনৈতিক সার্বভৌমিকতা সম্পর্কে বিশদ আলোচনা করেন। আর রুশো লোকায়ত্ত সার্বভৌমিকতার উপর বিশেষ গুরুত্ব আরোপ করেন। লক্‌ পরোক্ষভাবে ক্ষমতা স্বাতন্ত্র্যবিধান নীতিও আলোচনা করেন বাহা পরবর্তী কালে ফরাসী লেখক মণ্টেস্কু বিশদভাবে আলোচনা করেন।

হব্‌স্‌, লক্‌ ও রুশোর মতবাদের মধ্যে সাদৃশ্য ও বৈসাদৃশ্য (Points of Agreement and Difference between Hobbes, Locke and Rousseau)

সাদৃশ্য—১। উপরি-উক্ত তিনজন লেখকই সামাজিক চুক্তি মতবাদের ভিত্তিতে রাষ্ট্রের উৎপত্তি ব্যাখ্যা করিয়া শাসন-শাসিতের পারস্পরিক সম্পর্ক নির্ণয় করিবার প্রয়াস পাইয়াছেন।

২। রাষ্ট্র জন্মের পূর্বে মানুষ এক প্রাকৃতিক পরিবেশে বাস করিত—এ বিষয়েও তিনজন লেখক একমত।

৩। প্রাকৃতিক পরিবেশের অনিশ্চয়তা ও অসুবিধা দূর করিবার উদ্দেশ্যে মানুষ সম্মিলিতভাবে একটি চুক্তি সম্পাদন করে—এ বিষয়েও হব্‌স্‌, লক্‌ ও রুশোর মধ্যে একমত দৃষ্ট হয়।

৪। এই পারস্পরিক চুক্তির ফলে রাষ্ট্রের উদ্ভব—একথা তিনজন লেখকই সপ্রমাণিত করিয়াছেন।

সামাজিক চুক্তি মতবাদের ভিত্তিতে রাষ্ট্রের উৎপত্তি ব্যাখ্যা করিলেও এই তিনজন লেখক বিভিন্ন উদ্দেশ্য-প্রণোদিত হইয়া এই মতবাদের বিশ্লেষণ করেন। তাঁহাদের প্রতিপাদ্য বিষয়ও ছিল বিভিন্ন। এইজন্য উপরি-উক্ত সাদৃশ্য থাকা সত্ত্বেও তাঁহাদের মতবাদের মধ্যে মূলগত বৈসাদৃশ্য পরিদৃষ্ট হয়।

বৈসাদৃশ্য—১। তিনজন লেখকই প্রাকৃতিক পরিবেশ হইতে মানব-জীবনের সূত্রপাত করেন। কিন্তু প্রাকৃতিক পরিবেশ সম্পর্কে তিনজন লেখকই তিনটি পৃথক মত পোষণ করিতেন ও সেইজন্য তিনটি পৃথক চিত্র অঙ্কিত করিয়াছেন।

হব্‌স্‌র মতে প্রাকৃতিক পরিবেশে মানুষের জীবন ছিল দুর্বিষহ। তাঁহার মতে মানুষ স্বভাবতই দুর্বৃত্তপ্রকৃতি এবং সর্বদাই অস্ত্রের ক্ষতিসাধন করিয়া স্বীয় ইষ্টসাধনে তৎপর। প্রাকৃতিক পরিবেশে মানুষের স্বীয় শ্রেষ্ঠতর শক্তি ব্যতীত অধিকার রক্ষা করিবার জন্য কোনপ্রকার আইনসম্মত উপায় ছিল না। লক্‌ ও রুশো উভয় লেখকই রাষ্ট্র-উৎপত্তির পূর্বে প্রাকৃতিক পরিবেশের উল্লেখ করিয়াছেন। লকের মতে প্রাকৃতিক পরিবেশে মানুষের জীবন অসুখ-দুঃখ দ্বারা দুর্বিষহ হয় নাই পরন্তু মানুষ স্বখে-শান্তিতে বাস করিত।

রুশো প্রাকৃতিক পরিবেশকে মর্ত্যের স্বর্গ বলিয়া বর্ণনা করিয়াছেন। আদিম মানব প্রাকৃতিক পরিবেশে স্বাধীনতা, সাম্য ও মৈত্রীভাব বজায় রাখিয়া বাস করিত। কিন্তু মানুষের চিন্তাশক্তি বৃদ্ধি ও জনসংখ্যা বৃদ্ধির ফলে তাহাদের জীবনযাত্রা ক্রমশই ভটিলতর হইয়া মানুষের আদিম সরলতা ও সাম্যভাব দূরীভূত হইলে সমাজে উচ্চ-নীচ ভেদজ্ঞান দেখা দিল। এই ভেদ-বুদ্ধির আবির্ভাবের ফলে প্রাকৃতিক পরিবেশের শেষ অধ্যায়ে মানুষ হব্-স্-বর্ণিত প্রাকৃতিক পরিবেশের দুর্বিষহ অবস্থায় উপনীত হইল।

২। হব্‌সের মতে প্রাকৃতিক পরিবেশে মনুষ্যকৃত কোন আইন ছিল না। প্রাকৃতিক নিয়মেই মানুষের জীবন পরিচালিত হইত। মানুষ অবাধ স্বাধীনতার অধিকারী ছিল এবং অবাধ স্বাধীনতা প্রাকৃতিক পরিবেশে উচ্ছৃঙ্খলতা ও স্বেচ্ছাচারিতা আনয়ন করিয়া মানুষের জীবন দুর্বিষহ করিয়া তুলিল। হব্‌সের মতে প্রাকৃতিক পরিবেশ ছিল মানুষের প্রাক্-সামাজিক অবস্থা। লকের মতে প্রাকৃতিক পরিবেশে, প্রাকৃতিক নিয়মে মানুষের জীবন পরিচালিত হইত। মানুষ স্বাধীনতা ও সাম্যের অধিকারী ছিল। মানুষের জীবন হব্‌স-বর্ণিত ‘নিঃসঙ্গ, কদর্য, পাশবিক ও স্বল্পায়ু’ ছিল না। লকের মতে প্রাকৃতিক পরিবেশ ছিল প্রাক্-রাজনৈতিক অবস্থা। রুশোর মতেও প্রাকৃতিক পরিবেশের প্রথম পর্যায়ে মানুষ সম্পূর্ণ স্বাধীন ছিল। তাহাদের মধ্যে সাম্যভাব প্রতিষ্ঠিত ছিল। কিন্তু প্রাকৃতিক পরিবেশের দ্বিতীয় পর্যায়ে সভ্যতা বৃদ্ধির ফলে মানুষের জীবন কৃত্রিম হইয়া তাহাদের জীবন দুর্বিষহ হইল।

৩। হব্‌সের মতে প্রাকৃতিক পরিবেশের ভয়াবহ অনিশ্চয় অবস্থা হইতে পরিভ্রাণ পাইবার জন্ত মানুষ নিজেদের মধ্যে চুক্তিতে আবদ্ধ হইয়া রাষ্ট্র সৃষ্টি করিল। লকের মতে প্রাকৃতিক পরিবেশের কয়েকটি অসুবিধা দূর করিবার জন্ত মানুষ চুক্তিবদ্ধ হইল।

রুশোর মতে প্রাকৃতিক পরিবেশের দ্বিতীয় পর্যায়ের ভয়াবহ অবস্থা দূরীকরণের উদ্দেশ্যে মানুষ চুক্তিবদ্ধ হইয়া রাষ্ট্র সৃষ্টি করিল।

৪। হব্‌সের মত অনুসারে একটিমাত্র চুক্তিদ্বারা রাষ্ট্র ও শাসনপদ্ধতি প্রতিষ্ঠিত হইয়াছিল।

লকের মতে প্রথমে একটি সামাজিক চুক্তি (Social Contract) দ্বারা

রাষ্ট্র গঠিত হয়। তৎপরে দ্বিতীয় একটি রাজনৈতিক চুক্তি (Political or Governmental Compact) দ্বারা সসীম ক্ষমতাবিশিষ্ট একটি শাসনযন্ত্র (রাজতন্ত্র) প্রতিষ্ঠিত হয়।

হব্‌সের মত অনুসরণ করিয়া রুশোও বলেন, একটিমাত্র চুক্তিদ্বারা রাষ্ট্র প্রতিষ্ঠিত হয় ও তৎপরে জনসাধারণ আইন প্রণয়ন করিয়া রাষ্ট্রের নিছক প্রতিনিধি হিসাবে একটি শাসনযন্ত্রের সৃষ্টি করে।

৫। ইহা হইতে প্রতীয়মান হয় যে, হব্‌স বাষ্ট্র ও শাসনযন্ত্রের মধ্যে যে পার্থক্য বিদ্যমান সে বিষয়ে অবহিত ছিলেন না। লক্ ও রুশো রাষ্ট্র ও সরকারের মধ্যে পার্থক্য সম্বন্ধে সম্পূর্ণ সচেতন ছিলেন।

৬। হব্‌সের মতে মানুষের মধ্যে একটি একতরফা চুক্তির ফলে রাষ্ট্রের জন্ম হয়। রাজা চুক্তির কোন পক্ষ ছিলেন না—চুক্তির ফলেই রাজতন্ত্রের আবির্ভাব হয়। লকের মতে রাজা হইলেন চুক্তির একটি পক্ষ। রাষ্ট্রযন্ত্রের পর যে দ্বিতীয় চুক্তি হয় তাহা রাজা ও প্রজার মধ্যে অনুষ্ঠিত হয়।

রুশোর মতে মানুষের মধ্যে একটি পারস্পরিক চুক্তি হয়—ইহাতে রাজ-তন্ত্রের কোন স্থান নাই।

৭। হব্‌সের মতে মানুষ বিনা শর্তে নিঃশেষে তাহাদের সমুদয় ক্ষমতাই রাজতন্ত্রে সমর্পণ করে—এমন কি রাজার বিরুদ্ধে বিদ্রোহ করিবার অধিকারও তাহারা সমর্পণ করে।

লকের মতে মানুষ শর্তসাপেক্ষে রাজার হস্তে আংশিকভাবে তাহাদের কতিপয় অধিকার সমর্পণ করে। কিন্তু বিদ্রোহ করিবার ক্ষমতা তাহারা নিজ হস্তে রাখে।

রুশোর মতে মানুষ কোন রাজতন্ত্রে অধিকার সমর্পণ না করিয়া তাহাদের সমবেত সাধারণ ইচ্ছার (General Will) হস্তে অধিকার সমর্পণ করে।

৮। হব্‌সের মতে রাজা (সরকার) চুক্তির পক্ষ না হওয়ার জন্য জনসাধারণের রাজার বিরুদ্ধে কোন অভিযোগ থাকিতে পারে না। রাজতন্ত্র এককর্তার প্রতিষ্ঠিত হইলে তাহার বিনাশ নাই। জনগণের রাজতন্ত্রের বিরুদ্ধে বিদ্রোহ করিবার কোন আইনসম্মত অধিকার নাই—কারণ জনগণ, নিঃশেষে বিনাশভে সমুদয় ক্ষমতা পুনঃপ্রাপ্তির দাবী না রাখিয়া রাজতন্ত্রে সমর্পণ

করিয়েছে। সুতরাং রাজার বিরুদ্ধাচরণ করার অর্থ হইল চুক্তি ভঙ্গ করা-
আর চুক্তিভঙ্গের ফলে রাষ্ট্র ও শাসনযন্ত্র বিকল হইলে মানুষকে পুনরায়
প্রাকৃতিক পরিবেশে প্রত্যাবর্তন করিতে হইবে।

লকের মতে যেহেতু রাজা চুক্তির একটি পক্ষ, সেইহেতু তিনি চুক্তির শর্ত-
দ্বারা বাধ্য। তাঁহার মতে রাজা অক্ষমতাহেতু বা অন্য কোন কারণে চুক্তি
ভঙ্গ করিলে রাজার বিরুদ্ধে বিদ্রোহ করিয়া তাঁহাকে ক্ষমতাহীন করিবার
আইনসম্মত অধিকার জনসাধারণের আছে। সুতরাং বিদ্রোহ দ্বারা
সরকারের পরিবর্তন হইলেও রাষ্ট্রের অস্তিত্ব অব্যাহত থাকে।

রুশোর মতেও সরকার চুক্তির পক্ষ নহে—সুতরাং চুক্তি বা সার্বভৌম
ক্ষমতার সহিত সরকারের কোন সম্পর্ক নাই। লোকায়ত্ত সার্বভৌম ইচ্ছা
করিলেই সরকারের পরিবর্তন সাধন করিতে পারে।

৯। হব্‌সের মতে চুক্তিদ্বারা বহু ব্যক্তি এক ব্যক্তির হস্তে (রাজার) বা
একটি সংসদের হস্তে ক্ষমতা সমর্পণ করিয়া দাসত্বের শৃঙ্খল পরিধান করে।

লকের মতে জনগণ আংশিকভাবে ক্ষমতা সমর্পণ করিয়া তাহাদের
স্বাধীনতা অক্ষুণ্ণ রাখে।

রুশোর মতে চুক্তির পূর্বে মানুষ সাম্যের অধিকারী ছিল ও চুক্তিদ্বারা রাষ্ট্র
সৃষ্টি করিয়া মানুষই তাহাদের প্রাকৃতিক পরিবেশের স্বাধীনতা ও সাম্যভাব
দৃঢ়তর ভিত্তির উপর প্রতিষ্ঠিত করিল। রুশোর মতে জনগণের সমবেত
সাধারণ ইচ্ছার হস্তে ক্ষমতা সমর্পিত হইল ও এই সাধারণ ইচ্ছার অবিচ্ছেদ্য
অংশরূপে প্রত্যেক মানুষ ক্ষমতা-হস্তান্তরের পরও স্বাধীন ও সমান রহিল।

১০। হব্‌স তাঁহার মতবাদ দ্বারা ষ্টুয়ার্ট রাজবংশের স্বৈরাচার সমর্থনের
প্রয়াস পান।

লক্‌ তাঁহার মতবাদ দ্বারা ১৬৮৮ খ্রীষ্টাব্দের ইংলণ্ডের ‘গৌরবময় বিপ্লব’
সমর্থন করেন।

রুশো তাঁহার মতবাদ দ্বারা ফরাসী বিপ্লবের গোড়াপত্তন করেন।

১১। হব্‌স তাঁহার মতবাদ দ্বারা সার্বজনীন সার্বভৌমকে উপেক্ষা
করিয়া আইনানুগ সার্বভৌমত্বে সমুদয় ক্ষমতা আরোপ করেন—ফলে ব্যক্তি-
স্বাধীনতার সমাধি রচিত হয়।

লক্‌ তাঁহার মতবাদ দ্বারা সার্বজনীন সার্বভৌমত্বে সমুদয় ক্ষমতা আরোপ

করিয়া আইনানুগ সার্বভৌমকে উপেক্ষা করেন। ফলে, শাসনযন্ত্র দুর্বল ও অস্থায়ী হয় এবং জনসাধারণের খামখেয়ালের দ্বারা পরিচালিত হয়।

কশো তাঁহার মতবাদ দ্বারা স্বাধীনতা, সাম্য ও মৈত্রীর বাণী প্রচার করিয়া লোকায়ত্ত সরকার প্রতিষ্ঠার প্রয়াস পান। কিন্তু বাস্তবক্ষেত্রে তাঁহার মতবাদ সফল হয় না।

সামাজিক চুক্তি মতবাদের গুরুত্ব হ্রাস (Decline of the Social Contract Theory)

প্রত্যেক রাজনৈতিক মতবাদের ক্ষেত্রে দেখা যায় যে, সমসাময়িক অবস্থার বিশেষ প্রয়োজন মিটাইতে নতুন নতুন মতবাদের সৃষ্টি হয় এবং প্রচলিত অবস্থার পরিবর্তনের ফলে পূর্বতন মতবাদের পরিবর্তে নতুন মতবাদের জন্ম হয়। ঐশ্বরিক উৎপত্তি মতবাদ ও বলপ্রয়োগ মতবাদ দুইটিকে প্রতিরোধ করিবার জন্য সামাজিক চুক্তি মতবাদের আবির্ভাব হয়। কিন্তু মানুষের চিন্তাধারা ও পারিপার্শ্বিক অবস্থা পরিবর্তনের ফলে সামাজিক চুক্তি মতবাদও একসময়ে অলৌকিক ও অসার বলিয়া প্রতিপন্ন হইল। যে সমস্ত কারণে সামাজিক চুক্তি মতবাদ পরিত্যক্ত হইয়াছিল তন্মধ্যে ঐতিহাসিক অহুসঙ্কান পদ্ধতি আবিষ্কার হইল প্রধান। গবেষণার ক্ষেত্রে মানুষ কল্পনার আশ্রয় পরিত্যাগ করিয়া ইতিহাসের আশ্রয় গ্রহণ করিল। এই ঐতিহাসিক দৃষ্টিভঙ্গী ও ঐতিহাসিক অহুসঙ্কিৎসা বৃদ্ধি পাওয়ার ফলে রাষ্ট্রের উৎপত্তি সম্বন্ধে মানুষের যে সকল মনঃকল্পিত ধারণা ছিল তাহার আশ্রয় পরিবর্তন ঘটিল। ফলে, রাষ্ট্র সম্পর্কে গবেষণার ক্ষেত্রে যখন এই ঐতিহাসিক দৃষ্টিভঙ্গী প্রযুক্ত হইল তখন কল্পনা সাহায্যে গঠিত সামাজিক চুক্তি মতবাদের অসারতা প্রতিপন্ন হইল।

দ্বিতীয়তঃ, ডারউইন-প্রবর্তিত বিবর্তনবাদের (Theory of Evolution) আবির্ভাবের ফলে উনবিংশ শতাব্দীতে জ্ঞান ও বিজ্ঞানের সর্বক্ষেত্রে এই বিবর্তনবাদ গৃহীত হইল। রাষ্ট্রের উৎপত্তি ও প্রকৃতি বিশ্লেষণ ক্ষেত্রেও এই মতবাদ প্রয়োগ করিয়া বলা হইল, রাষ্ট্র মানব-সমাজের ক্রমবিবর্তনের ফল। কোন নির্দিষ্ট পরিকল্পনা অহুযায়ী একদিনে বা একটি উপাদানের

সাহায্যে রাষ্ট্র গঠিত হয় নাই। সুতরাং বিবর্তনবাদ আবির্ভাবের ফলে কষ্ট-কল্পিত সামাজিক চুক্তি মতবাদের গুরুত্ব হ্রাস পাইল।

তৃতীয়তঃ, পরবর্তী কালে যখন গণ-সার্বভৌমত্ব মতবাদ (Theory of Popular Sovereignty) স্বীকৃত ও সুপ্রতিষ্ঠিত হইল তখন সামাজিক চুক্তি মতবাদের আর প্রয়োজনীয়তা থাকিল না। কারণ, সামাজিক চুক্তি মতবাদের সাহায্যে যে সত্য অস্পষ্টভাবে আত্মপ্রকাশ করিয়াছিল গণ-সার্বভৌমত্ব মতবাদ সে সত্যকে স্পষ্টতর ও অধিকতর শক্তিশালী করিয়া প্রকাশ করিল।

সামাজিক চুক্তি মতবাদ ও গণতন্ত্রের অভ্যুদয় (Social Contract Theory and the Development of Democracy)

ব্যক্তি-স্বাধীনতা ও সাম্য এই দুইটি হইল গণতন্ত্রের মূলকথা। সরকার বা শাসন-ব্যবস্থার প্রয়োজনীয়তা সমাজ-জীবনে অপরিহার্য। কিন্তু এই শাসন-ব্যবস্থা ব্যক্তির স্বাধীন ইচ্ছা ও সম্মতির উপর প্রতিষ্ঠিত হইলে ইহার স্থায়িত্ব ও শক্তি বৃদ্ধি পায়। সুতরাং গণতন্ত্র প্রত্যেক ব্যক্তির ব্যক্তিত্বের উপর যথাযথ গুরুত্ব আরোপ করিয়া সমাজে সাম্য প্রতিষ্ঠা করে। এদিক দিয়া দেখিতে গেলে বলা যায় যে, গণতন্ত্রের মূলভিত্তি অর্থাৎ স্বাধীনতা ও সাম্য সামাজিক চুক্তি মতবাদেরই পরিণতি। রাষ্ট্রের উৎপত্তি ব্যাখ্যা হিসাবে এই মতবাদে বলা হয় যে, প্রাকৃতিক পরিবেশে মানুষের স্বেচ্ছা-প্রণোদিত পারস্পরিক চুক্তির ফলে রাষ্ট্রের জন্ম হয়। সুতরাং গণতন্ত্রের মূল কথা সামাজিক চুক্তি মতবাদের সহিত গুণপ্রোতভাবে জড়িত।

স্বৈরাচারী শাসনের বিরুদ্ধে এই মতবাদ ব্যক্তির আয়তনসংগত অধিকার-গুলির রক্ষাকবচ হিসাবে কাজ করে। ১৬৮৮ সালের ইংলণ্ডের গৌরবময় বিপ্লব, ১৭২২ সালের ফরাসী বিপ্লব, ১৮৮৯ সালের আমেরিকার স্বাধীনতা-সংগ্রাম ও ১৯১৭ সালের রুশ বিপ্লবও পরোক্ষভাবে এই সামাজিক চুক্তি মতবাদের মূলনীতির দ্বারা প্রভাবিত হয়। স্বাধীনতা ও সাম্যের এই বাণী যুগে যুগে বিভিন্ন দেশে নিপীড়িত জনসাধারণের মানবিক অধিকার প্রতিষ্ঠা ও সংরক্ষণে বিশিষ্ট ভূমিকা গ্রহণ করিয়াছে।

লকের সামাজিক চুক্তি মতবাদ আমেরিকার স্বাধীনতা-সংগ্রামের উপর

প্রভূত প্রভাব বিস্তার করে। লকের মতবাদ গ্রহণ করিয়া আমেরিকার বিপ্লবীগণ বলেন যে, মানুষ তাহার প্রাকৃতিক অধিকারসমূহ বিশেষ করিয়া সম্পত্তির অধিকার রক্ষা করিবার উদ্দেশ্যে যে সরকারের আশ্রয় স্বীকার করে, সে সরকার কখনই তাহাদের বিনা সম্মতিতে তাহাদিগকে প্রাকৃতিক অধিকার হইতে বঞ্চিত করিতে পারে না। ইহা ছাড়া, লক্ স্পষ্টভাবে সরকারের সহিত জনসাধারণের সম্পর্ক বুঝাইয়াছেন। তাহার মতে সরকার হইল জনগণের ইচ্ছা ও সম্মতির উপর প্রতিষ্ঠিত। সুতরাং সরকারের কাজ জনসাধারণের ইচ্ছা ও সম্মতির দ্বারা পবিচালিত হইবে। সরকার আইন অনুসারে শাসন পরিচালনা করিবে এবং বে-আইনী কাজ করিলে জনসাধারণ আইনভঙ্গকারী সরকার বাতিল করিয়া নতুন সরকার গঠন করিতে পারিবে। আধুনিক গণতন্ত্রের সংজ্ঞা হইল : জনসাধারণকে লইয়া জনসাধারণের কল্যাণে জনসাধারণ কর্তৃক যে শাসন-ব্যবস্থা পরিচালিত হয়, তাহাকেই গণতন্ত্র বলা হয়। সুতরাং বলা যায় যে, আধুনিক গণতন্ত্রের সংজ্ঞা লকের সামাজিক চুক্তি মতবাদের উপর প্রতিষ্ঠিত। আধুনিক গণতন্ত্রের আর একটি বৈশিষ্ট্য হইল শাসন ও আইন-প্রণয়ন কার্যেব পৃথকীকরণ। লক্ তাহাব সামাজিক চুক্তি মতবাদে এই বিষয়টির উপর যথাযথ গুরুত্ব প্রদান করিয়াছেন।

ফরাসী বিপ্লবেব মন্ত্রণাক্ষর রুশোর সামাজিক চুক্তি মতবাদ আলোচনা করিলে দেখা যায় যে, তিনি জনসাধারণের সাধাবণ ইচ্ছাকেই রাষ্ট্রের সার্বভৌম শক্তির আধাব বলিয়াছেন। তিনি বলেন শাসন-ব্যবস্থা যখন সাধারণ ইচ্ছার দ্বারা পরিচালিত হয়, তখন তাহাকে আত্ম-শাসন বলা হয়। রুশো জনসাধারণের সম্মতিকেই শাসন-ব্যবস্থার ভিত্তি বলিয়া বর্ণনা করেন। তাহাব মতে সরকার হইল সমাজেব প্রতিনিধিমাাত্র এবং সরকার যতদিন সমাজের আস্থাভাজন থাকে ততদিন কাজ কবে। কিন্তু রুশোর এই গণতন্ত্র ও সমষ্টির স্বৈরাচার দোষে দুষ্ট।

সামাজিক চুক্তি মতবাদের অগত্যম প্রচারক হব্‌স্ গণতন্ত্র-বিরোধী ছিলেন। হব্‌স্ রাষ্ট্র ও শাসন-ব্যবস্থাকে অভিন্ন করিয়া স্বৈরতন্ত্র প্রতিষ্ঠা করেন। জনসাধারণের স্বেচ্ছাকৃত চুক্তিদ্বারা যে শাসন-ব্যবস্থা গঠিত হয় তাহাতে হব্‌স্ অসীম ও অবাধ ক্ষমতা আরোপ করিয়া ব্যক্তি-

স্বাধীনতার সমাধি রচনা করেন। তবে একটি কথা স্মরণ রাখিতে হইবে যে, এমন কি চরম স্বৈরতন্ত্র সমর্থক হব্‌স্‌ও বলেন যে, রাজার অসীম ক্ষমতার একমাত্র উৎস হইল জনগণ বাহারা চুক্তি দ্বারা বিনাশর্তে নিঃশেষে পুনঃ-প্রাপ্তির দাবী না রাখিয়া রাজতন্ত্রে ক্ষমতা সমর্পণ করে। সুতরাং হব্‌স্‌ের প্রতিক্রিয়াশীল মতবাদও গণতন্ত্রের অভ্যুদয়ে পরোক্ষভাবে সাহায্য করিয়াছে।

ঐতিহাসিক মতবাদ বা বিবর্তনবাদ (Historical or Evolutionary Theory)

রাষ্ট্রের উৎপত্তি-বিষয়ক মতবাদগুলি বিশ্লেষণ করিলে দেখা যায় যে, কোন নির্দিষ্ট সময়ে বা কোন নির্দিষ্ট পরিকল্পনাভাষায়ী রাষ্ট্র গঠিত হয় নাই। কোন উপাদানই একক রাষ্ট্র গঠন করে নাই। এ সম্বন্ধে প্রকৃত তথ্য গার্গীর বলিয়াছেন। তিনি সকল রকম মতবাদ আলোচনা করিয়া এই সিদ্ধান্তে উপনীত হইয়াছেন যে, রাষ্ট্র ঈশ্বর কর্তৃক সৃষ্ট নহে, অথবা শুধু পশুবলের ফল নহে, পারস্পরিক চুক্তিদ্বারা বা পরিবারের সম্প্রসারণদ্বারাও ইহার সৃষ্টি হয় নাই। রাষ্ট্র মানব-সমাজের ক্রমপ্রগতির ফল। আদিম যুগ হইতে আরম্ভ করিয়া বর্তমান যুগ পর্যন্ত এক বিরামহীন বিবর্তনের মধ্য দিয়া রাষ্ট্র ধীরে ধীরে নব নব রূপ পরিগ্রহ করিতেছে। গঠনের প্রথম পর্যায়ে রাষ্ট্রের স্বত্বপাত হইয়াছিল অতি সাধারণভাবে, কিন্তু তারপর সামাজিক প্রয়োজনের তাগিদে ইহা ক্রমশই জটিলতর হইতে লাগিল।

রাষ্ট্রের স্বত্বপাত কিভাবে হইয়াছিল তাহা সম্পূর্ণ অপরিজ্ঞাত। তবে বর্তমান যুগে জাতিতত্ত্ব, ভাষাতত্ত্ব প্রভৃতি কতকগুলি শাস্ত্রের আলোচনা হইতে রাষ্ট্রের উৎপত্তি সম্বন্ধে কয়েকটি সিদ্ধান্ত করা যাইতে পারে। এই সিদ্ধান্তগুলির ভিত্তিতে রাষ্ট্রের উৎপত্তি-বিষয়ক মতবাদগুলি বিশ্লেষণ করিয়া রাষ্ট্র গঠনের কয়েকটি অপরিহার্য উপাদান এবং এই দীর্ঘদিনব্যাপী বিবর্তনের বিভিন্ন স্তরগুলির সম্বন্ধে একটা ধারণা করা সম্ভব হইয়াছে। এইজন্য ঐতিহাসিক মতবাদ রাষ্ট্রের উৎপত্তির ব্যাখ্যা হিসাবে একটি গ্রহণযোগ্য মতবাদ বলিয়া পরিগণিত হয়।

প্রথমতঃ, মানুষ সামাজিক জীব, তাই দলবদ্ধভাবে বাস করিতে-চায়।

মাহুষের এই সমষ্টিগতভাবে বাস করিবার স্বভাবের মধ্যেই রাষ্ট্রগঠনের বীজ উপস্থিত আছে। রাষ্ট্রগঠনের প্রাথমিক উপাদান হিসাবে পরিবারের যথেষ্ট গুরুত্ব রহিয়াছে। আদি সমাজে রক্তসম্পর্কের বন্ধন (Kinship) মাহুষকে পরিবার বা গোষ্ঠীতে একত্রিত করিতে সাহায্য করিয়াছে। পরিবার ও গোষ্ঠী সম্প্রসারিত হইয়া বৃহত্তর উপজাতি বা জাতিতে পরিণত হইয়াছে। এইরূপে রক্তসম্বন্ধের ভিত্তিতে গঠিত ক্ষুদ্র পরিবার হইতে বৃহত্তর ও জটিলতর জাতির উদ্ভব হইয়াছে।

দ্বিতীয়তঃ, প্রাচীনকালে ধর্মের বন্ধন (Religion) রাষ্ট্রগঠনে বিশেষ সাহায্য করিয়াছিল। আদিম মানবজাতি নৈসর্গিক শক্তিগুলিকে শ্রদ্ধামিশ্রিত ভয়ের চক্ষে দেখিত। সমাজের কতকগুলি অপেক্ষাকৃত চতুর্ব ব্যক্তি নিজেদের এই নৈসর্গিক শক্তিগুলিকে আয়ত্ত করিবার ক্ষমতার অধিকারী বলিয়া প্রচার করিয়া অল্প লোকগুলির উপর তাহাদের আধিপত্য বিস্তার করিল। এই লোকগুলি সমাজেব রক্ষক বা নেতা বলিয়া পরিচিত হইলেন। কালক্রমে যখন ধর্মীয় সংগঠনগুলির সৃষ্টি হইল তখন ইহারা ফ্যাবাও, পোপ বা খাল্ফা নাম ধারণ করিয়া সমাজে ধর্মগুরু পদমর্যাদা লাভ করিলেন। এইজন্যই দেখা যায় যে, প্রাচীনকালের রাজারা অধিকাংশ ক্ষেত্রে ধর্মগুরু বলিয়াও অভিহিত হইতেন। বর্তমান যুগেও ইংলণ্ডের রাজা প্রচলিত ধর্মমহামণ্ডলের অধিকর্তা (Head of the Established Church) বলিয়া পরিচিত। এইরূপে রাজনৈতিক চেতনা-উন্মেষের পূর্বে ধর্মই মাহুষের মনে ভয়মিশ্রিত শ্রদ্ধার ভাব জাগরিত করিয়া রাষ্ট্রেব বশুতা ও আনুগত্য স্বীকার করিতে শিক্ষা দিয়াছে।

তৃতীয়তঃ, রাষ্ট্রগঠনের কোন এক স্তরে পাশবিক বলের (Force) কার্যকারিতার প্রয়োজন দেখা দিয়াছিল। মাহুষ যখন তাহাদের ভ্রাম্যমাণ জীবন পরিত্যাগ করিয়া তাহাদের দলপতির নিয়ন্ত্রণাধীনে নির্দিষ্ট ভূভাগে বসবাস আরম্ভ করিল তখনই ব্যক্তিগত সম্পত্তির মালিকানা সম্বন্ধে তাহারা সচেতন হইল। ব্যক্তিগত সম্পত্তি সমাজে প্রবর্তিত হইলে এই সম্পত্তি রক্ষার প্রয়োজন দেখা দেয়। এই প্রয়োজনের জন্যই মাহুষের আভ্যন্তরীণ শান্তি ও শৃংখলা এবং বহিঃশত্রুর আক্রমণ হইতে নিজেদের ধন, মান ও সম্পত্তি রক্ষার ব্যবস্থা করিতে হইয়াছিল। ফলে, প্রত্যেক সমাজে একজন

দলপতির উদ্ভব হইয়াছে আর এই দলের স্বার্থ অক্ষুণ্ণ রাখিবার নিমিত্ত শারীরিক শক্তির উপর নির্ভর করিতে হইয়াছে। যুদ্ধকালে যিনি নেতা বা দলপতি নির্বাচিত হইতেন শান্তির সময়েও তাঁহার কর্তৃত্ব কালক্রমে স্বীকৃত হইল। এইরূপে সামরিক প্রয়োজনে মানুষ নির্দিষ্ট নেতৃত্বের অধীনে ক্রমশঃ এক্যবদ্ধ ও সুশৃংখল জীবনযাপনে অভ্যস্ত হইয়া উঠিল।

রাষ্ট্র-উৎপত্তির ইতিহাসে ‘শাসিতের ইচ্ছা ও সহযোগিতা’ (Consent of the people) বোধ হয় সর্বাপেক্ষা গুরুত্বপূর্ণ ভূমিকা গ্রহণ করিয়াছিল। সমাজের কতকগুলি চিন্তাশীল ব্যক্তি তাঁহাদের জ্ঞান ও বুদ্ধির দ্বারা রাষ্ট্রের উৎপত্তির মূল ও রাষ্ট্রের তাৎপর্য ব্যাখ্যা করিয়া, রাষ্ট্র যে জনগণের সম্মতি ও সহযোগিতার ভিত্তিতে গঠিত—এই মতবাদ জনসমাজে প্রচার করিলেন। ফলে, জনসমাজ তাহাদের নাগরিক অধিকার ও কর্তব্য সম্বন্ধে সচেতন হইয়া উঠিল। এই রাজনৈতিক চেতনা (Political Consciousness) জনসমাজে সঞ্চারিত হওয়ার ফলে শক্তির ভিত্তিতে গঠিত রাষ্ট্র জনমতের ভিত্তিতে রূপায়িত হইল।

এতদ্ব্যতীত আরও অনেকগুলি ঐতিহাসিক ঘটনার ঘাত-প্রতিঘাতে রাষ্ট্রের পরিবর্তন সাধিত হইতেছে। জনসমাজে জাতীয়তাবোধ (Principle of nationality) যতই শক্তিশালী হইয়া উঠিল, সঙ্গে সঙ্গে জাতির দাবী স্বীকৃত হইয়া রাষ্ট্রগুলি ‘একজাতি একরাষ্ট্র’ ভিত্তির উপর প্রতিষ্ঠিত হইল। সেইজন্ম বর্তমান যুগে বিশালায়তন সাম্রাজ্যের পরিবর্তে জাতীয় রাষ্ট্র গঠিত হইয়াছে। বর্তমান যুগে সভ্য রাষ্ট্রগুলির মধ্যে নানাদিক দিয়া পারস্পরিক নির্ভরশীলতা এত বৃদ্ধি পাইয়াছে যে, কোন রাষ্ট্রের পক্ষেই আর সম্পূর্ণ আত্মনির্ভরশীল হইয়া তাহার স্বাধীন সার্বভৌম ক্ষমতা বজায় রাখা সম্ভবও নয়, আর প্রয়োজনের দিক দিয়াও অপরিহার্য নয়। তাই এক শতাব্দী পূর্বের স্বাধীন সার্বভৌম ক্ষমতার পূর্ণ অধিকারী রাষ্ট্র আজ তাহার নিজের ও পারস্পরিক প্রয়োজনের তাগিদে (Internationalism) তাহার অবাধ ও অপ্রতিহত ক্ষমতা অস্বতঃ আংশিকভাবে পরিত্যাগ করিয়া বৃহত্তর মানব-গোষ্ঠীর এক অবিচ্ছেদ্য অংশরূপে পরিগণিত হইতে চলিয়াছে।

অর্থনৈতিক কারণগুলিও (Economic Forces) রাষ্ট্রের বিবর্তনে বিশেষ প্রভাব বিস্তার করিয়াছে। ব্যক্তিগত সম্পত্তি-উদ্ভবের ফলে সম্পদের

উৎপাদন, বিনিময় ও বন্টনের নীতি নির্ধারণ করা। বর্তমান রাষ্ট্রের একটি অবশ্য কর্তব্য বলিয়া বিবেচিত হয়। অর্থনৈতিক ব্যবস্থা স্ফূট ভিত্তির উপর প্রতিষ্ঠিত না হইলে কোন রাষ্ট্রই তাহার উদ্দেশ্য সার্থক করিতে পারে না। এই অর্থনৈতিক কারণে বর্তমান রাষ্ট্রগুলি ব্যক্তি স্বাতন্ত্র্যবাদী রাষ্ট্র হইতে ক্রমশঃই সমাজতন্ত্রবাদী রাষ্ট্রে পরিণত হইতেছে।

উপরি-উক্ত আলোচনা হইতে ইহাই প্রতীয়মান হয় যে, রাষ্ট্র একদিনে বা একটি উপাদানে গঠিত হয় নাই। মানুষের মনে রাষ্ট্রের ধারণা ও কার্য-কারিতা জন্মিতে দীর্ঘদিন অতিবাহিত হইয়াছে। প্রথম পর্ষায়ে হয়ত পরিবারের মতন সহজ ও সরল সংগঠনের মধ্য দিয়া রাষ্ট্র গঠিত হইয়াছিল, তারপর রাজনৈতিক চেতনা-উন্মেষের সঙ্গে সঙ্গে রাষ্ট্র বিভিন্ন উপাদানের প্রভাবে বিভিন্ন বিকাশের মধ্য দিয়া অগ্রসর হইতেছে। তবে একথা স্মরণ রাখিতে হইবে যে, রাষ্ট্রগঠনে এই বিভিন্ন উপাদানগুলি যে সব সময়ে পৃথক-ভাবে কাজ করিয়াছে তাহা নয়। রাষ্ট্রবিবর্তনের বিভিন্ন পর্ষায়ে এই উপাদানগুলি সম্মিলিতভাবেও রাষ্ট্রগঠনে সাহায্য করিয়াছে। মানুষ যতই সভ্য হইতেছে রাষ্ট্রসম্বন্ধে তাহাদের ধারণাও ততই পরিবর্তিত হইয়া রাষ্ট্র আজ এক অভূতপূর্ব সংগঠনে রূপায়িত হইয়াছে। মানবজীবনে বর্তমানে রাষ্ট্রের প্রভাব যে শুধু স্ফূটপ্রসারী তাহা নয়, মানুষ আজ রাষ্ট্রকে সমাজ-জীবনের অপরিহার্য অঙ্গ বলিয়া মনে করে। সুতরাং রাষ্ট্র-উৎপত্তি সম্পর্কে ডাঃ গার্নার ও বার্জেসের অভিমত প্রণিধানযোগ্য।

“The state is neither the handiwork of God, nor the result of superior physical force, nor the creation of resolution or convention, nor a mere expansion of the family.” (Garner)

এখন দ্বিজ্ঞান হইল যে, রাষ্ট্র যদি ঈশ্বর, পশুবল, চুক্তি বা পরিবার সম্প্রসারণ দ্বারা সৃষ্ট না হয় তাহা হইলে ইহার উৎপত্তির উৎস কোথায়? বার্জেস এই প্রশ্নের যথার্থ উত্তর প্রদান করিয়াছেন : “The state is a continuous development of human society out of grossly imperfect beginning through crude but improving forms of manifestation towards a perfect and universal organisation of mankind.” (Burgess)

রাষ্ট্র হইল মানবসমাজের দীর্ঘদিনব্যাপী বিবর্তনের ক্রমোন্নত ফল।

রাষ্ট্রের প্রকৃতি সম্বন্ধে মতবাদ

(Theories of the Nature of the State)

বিভিন্ন শ্রেণীর দার্শনিকগণ বিভিন্ন দৃষ্টিকোণ হইতে রাষ্ট্রের প্রকৃতি নির্ণয় করিতে প্রয়াস পাইয়াছেন। সমাজবিজ্ঞানিগণ রাষ্ট্রকে একটি সামাজিক প্রতিষ্ঠান বলিয়া চিত্রিত করিয়াছেন। ঐতিহাসিকগণ বলেন রাষ্ট্র একটি ঐতিহাসিক বিবর্তন-প্রসূত সংগঠন মাত্র। নীতিশাস্ত্রবিদগণ রাষ্ট্রকে একটি নৈতিক উদ্দেশ্য সাধনের সহায়ক সংগঠন বলিয়া বর্ণনা করেন। রাষ্ট্র-বিজ্ঞানিগণ রাষ্ট্রকে শাসনকার্য পরিচালনার উদ্দেশ্যে গঠিত একটি রাজনৈতিক প্রতিষ্ঠান বলিয়া মনে করেন, অপর পক্ষে ব্যবহারশাস্ত্রবিদগণ রাষ্ট্রকে আইন-প্রণয়ন ও আইনসংগত অধিকার রক্ষার উদ্দেশ্যে গঠিত একটি আইন-মূলক সংগঠন বলিয়া বিবেচনা করেন। উপরি-উক্ত বিভিন্ন শ্রেণীর দার্শনিকগণ তাঁহাদের কল্পনা-প্রসূত রাষ্ট্রে এরূপ গুণ ও উদ্দেশ্য আরোপিত করিয়াছেন যাহাতে রাষ্ট্র সম্পর্কিত তাঁহাদের নিজস্ব দৃষ্টিভঙ্গী সমর্থিত হয়। এইরূপে বিভিন্ন চিন্তাধারার ফলে রাষ্ট্রের মৌলিক প্রকৃতি সম্বন্ধে নানা মতবাদের সৃষ্টি হইয়াছে। নিম্নে রাষ্ট্র সম্পর্কে কয়েকটি বিভিন্ন মতের আলোচনা করা হইল।

১। ইতালীয় দার্শনিক ম্যাকিয়াভেলী সর্বপ্রথম 'রাষ্ট্র' শব্দটি প্রবর্তন করেন। তিনি রাষ্ট্রকে শক্তি-ভিত্তিক বলিয়া বর্ণনা করেন। বান'হার্ডি, ট্রিসকে প্রভৃতি জার্মান লেখকগণও রাষ্ট্রকে শক্তির একমাত্র ধারকরূপে কল্পনা করিয়া রাষ্ট্রে অবাধ ক্ষমতা আরোপ করিয়াছিলেন। কিন্তু রাষ্ট্রের এই একমাত্র শক্তি-ভিত্তিক পরিকল্পনা সমর্থনযোগ্য নহে। শক্তি রাষ্ট্র অস্তিত্বের একমাত্র ভিত্তি বলিয়া পরিগণিত হইতে পারে না। কারণ, রাষ্ট্র-শক্তি বখন-গ্ৰাহ্য অধিকার রক্ষায় প্রযুক্ত হয়, একমাত্র তখনই তাহা সমর্থনযোগ্য।

২। আইনবিদগণ রাষ্ট্রকে আইন-প্রণয়ন ও গ্ৰাহ্য অধিকার রক্ষা করিবার উদ্দেশ্যে সৃষ্ট একটি প্রতিষ্ঠান রূপে কল্পনা করেন। কিন্তু এই মতবাদের বিরুদ্ধে বলা হয় যে, আইন-প্রণয়ন ও আইন-বলবৎ করা রাষ্ট্রের একমাত্র কর্তব্য নহে। এতদ্ব্যতীত রাষ্ট্রের আরও বহু উচ্চতর উদ্দেশ্য আছে। সুতরাং আইনবিদগণের এই মতবাদ ভ্রান্ত না হইলেও অসম্পূর্ণ।

৩। অ-রাষ্ট্রতন্ত্রী ও ব্যক্তি-স্বাতন্ত্র্যবাদিগণ রাষ্ট্রকে মানবজীবনের একটি অভিশাপরূপে গণ্য করেন এবং যতশীঘ্র রাষ্ট্র ধ্বংসপ্রাপ্ত হয়, ব্যক্তির পক্ষে ততই মঙ্গল। তাঁহাদের মতে রাষ্ট্র ব্যক্তিগত জীবনে অব্যাহিতরূপে হস্তক্ষেপ দ্বারা ব্যক্তির স্বাভাবিক ও সাবলীল ব্যক্তিঅবিকাশের অন্তরায় ঘটায়। সুতরাং রাষ্ট্রের আদৌ কোন প্রয়োজনীয়তা নাই। রাষ্ট্রের কার্যকলাপ সম্পর্কে এরূপ অতিরঞ্জিত বিরোধী মনোভাব কোনমতেই সমর্থনযোগ্য নহে। ব্যক্তিগত জীবনে রাষ্ট্রীয় হস্তক্ষেপ কোন কোন ক্ষেত্রে অব্যাহিত প্রমাণিত হইলেও এ যাবৎ ব্যক্তিগত জীবনের উৎকর্ষ সাধনে রাষ্ট্র যে সাহায্য কবিয়াছে তাহা অনস্বীকার্য।

৪। বহুত্ববাদিগণ (Pluralists) বলেন, রাষ্ট্র সমাজস্থিত বহুবিধ সংঘের অন্ততম। নিখবিত্তালয়, শ্রমিক সংঘ, ধর্মীয় ও সামাজিক অন্তান্ত সংঘগুলির দ্বারা রাষ্ট্রও একটি সংঘ। প্রত্যেকটি সংঘের ক্ষমতা ইহার কায়েব আলুপাতিক হইবে। যেহেতু রাষ্ট্রের কায নির্দিষ্ট ক্ষেত্রে সীমাবদ্ধ, সেইহেতু রাষ্ট্রকে অবাধ ক্ষমতার অধিকারী করা যুক্তিযুক্ত নয়। বহুত্ববাদিগণের মতে সমাজস্থিত অন্তান্ত সংঘগুলির উপর অবাধ কর্তৃত্ব করিবার রাষ্ট্রের কোন অধিকার থাকিতে পারে না। কিন্তু বহুত্ববাদিগণের রাষ্ট্রবিরোধী এই চরম মতবাদ গ্রহণযোগ্য নহে। সমাজ-জীবনে ঐক্য ও শৃংখলা না থাকিলে ব্যক্তিত্ব বিকাশ সম্ভব নহে। সামাজিক জীবনের এই ঐক্য ও শৃংখলা একমাত্র রাষ্ট্র সৃষ্টি ও বক্ষা করিতে পারে। সুতরাং সামাজিক জীবনের অসংখ্য বৈচিত্র্যের মধ্যে ঐক্য প্রতিষ্ঠার উদ্দেশ্যে রাষ্ট্রের শ্রেষ্ঠত্ব ও কর্তৃত্ব অপরিহার্য।

৫। কার্ল মার্কস প্রমুখ সমাজতন্ত্রবাদিগণ রাষ্ট্রকে শ্রেণীবিশেষের স্বার্থে সৃষ্ট একটি সংগঠন বলিয়া বর্ণনা করেন। তাঁহাদের মতে রাষ্ট্র-সংগঠনের সাহায্যে ধনী দ্বিতীকে এবং সবল দুর্বলকে শোষণ করে। সমাজে যে সম্প্রদায়ের হস্তে অর্থনৈতিক ক্ষমতা কেন্দ্রীভূত, সেই সম্প্রদায়ই বাজনৈতিক ক্ষমতা হস্তগত কবিয়া অন্তান্ত সম্প্রদায়ের উপর কর্তৃত্ব করে। সুতরাং শ্রেণীগত স্বার্থ রক্ষাই রাষ্ট্রের প্রধান কাজ। উপবি-উক্ত মতবাদ আদৌ সমর্থনযোগ্য নহে, কারণ, কোন কোন রাষ্ট্র হয়ত সময় বিশেষে শ্রেণী-স্বার্থের ভিত্তিতে গঠিত হইলেও সব রাষ্ট্রকেই শ্রেণী-স্বার্থের রক্ষক বলিয়া বিবেচনা করা সমীচীন

নহে। শ্রেণী-স্বার্থের ভিত্তিতে গঠিত রাষ্ট্রকে স্বাভাবিক রাষ্ট্র না বলিয়া বিকৃত রাষ্ট্র বলা যাইতে পারে। স্বাভাবিক অবস্থায় সকল রাষ্ট্রই সাধারণ স্বার্থের রক্ষক বলিয়া বিবেচিত হয়।

৬। স্বৈরাচারী একনায়কত্বে রাষ্ট্রে অতিমানবীয় ব্যক্তিত্ব আরোপ করিয়া ব্যক্তিমানবকে উপেক্ষা করা হয়। এরূপ রাষ্ট্রে রাষ্ট্র ছাড়া ব্যক্তির কোন স্বতন্ত্র অস্তিত্ব স্বীকৃত হয় না এবং ব্যক্তিগত জীবনের বিভিন্ন দিক রাষ্ট্র-কর্তৃক নিয়ন্ত্রিত হয়। ইতালীর একনায়ক মুসোলিনি স্পষ্টভাবে এই মতবাদ নিম্নলিখিতরূপে ব্যক্ত করিয়াছিলেন—“সকলেই রাষ্ট্রের অন্তর্ভুক্ত, কেহই রাষ্ট্রের বাহিরে নয়, কেহই রাষ্ট্রের বিরুদ্ধে নয়।” (“All within the state, none outside the state, none against the state.”) এই মতবাদ সম্পর্কে বলা যায় যে, যে মতবাদ ব্যক্তির স্বতন্ত্র অস্তিত্ব স্বীকার করে না, যে মতবাদে ব্যক্তি-স্বাধীনতা লোপ পায়, সে মতবাদ আদৌ গ্রহণযোগ্য নহে। ব্যক্তিত্ববিকাশে সাহায্য করাই হইল রাষ্ট্রের প্রধান উদ্দেশ্য। যদি রাষ্ট্র ব্যবহার দ্বারা সেই উদ্দেশ্য বিফল হয় তাহা হইলে রাষ্ট্র অস্তিত্বের কোন সমর্থন নাই।

রাষ্ট্র সম্পর্কে উপরি-উক্ত মতবাদগুলি বিশ্লেষণ করিয়া দেখা যায় যে, কোন মতবাদই এককভাবে রাষ্ট্র অস্তিত্বের যুক্তিসম্মত সমর্থন বলিয়া পরিগণিত হইতে পারে না। স্বতরাং প্রশ্ন হইল তাহা হইলে রাষ্ট্রের প্রকৃত উদ্দেশ্য কি?

এ প্রশ্নের উত্তরে বলা যায় যে, রাষ্ট্র হইল মানুষের সামাজিক জীবনের সর্বশ্রেষ্ঠ ও চরম সংগঠন। এই সংগঠনের সাহায্যেই মানুষ স্বাধীন ও স্বাবলম্বী হইতে পারে। গ্রীক দার্শনিক অ্যারিস্টটল সত্যই বলিয়াছেন, ‘আইন ও ন্যায়বোধ দ্বারা মার্জিত মানুষই হইল শ্রেষ্ঠ জীব। আর আইন ও ন্যায়বোধবিহীন মানুষ হইল নিকৃষ্ট জীব।’ রাষ্ট্র মানুষের মধ্যে এই আইনানুগতাবাদ ও ন্যায়বোধ সৃষ্টি করিতে সাহায্য করে। রাষ্ট্রের অদ্বিতীয় বৈশিষ্ট্য হইল যে, এই সংগঠন কোন শ্রেণী-স্বার্থের ধারক নহে, ইহা সাধারণ স্বার্থের রক্ষক। সামাজিক অন্ত্যান্ত সংঘগুলির উদ্দেশ্য হইল সংঘগোষ্ঠীর সদস্যগণের বিশেষ স্বার্থ সংরক্ষণ করা, অপর পক্ষে রাষ্ট্র হইল সার্বজনীন স্বার্থের প্রতিনিধি ও রক্ষক। সার্বজনীন স্বার্থের রক্ষক হিসাবে রাষ্ট্র সামাজিক

সমুদয় সংঘের পারস্পরিক সম্পর্ক এরূপভাবে নিয়ন্ত্রণ করে যে, বিভিন্ন স্বার্থের সংঘাতে সামাজিক জীবনে কোন বিশৃংখলা ঘটিতে না পারে। বিরোধের অবসান ঘটাইয়া বহুর মধ্যে ঐক্য ও সমন্বয় সাধনপূর্বক সার্বজনীন স্বার্থের উৎকর্ষ সাধন করাই হইল রাষ্ট্রের প্রধান কর্তব্য। মানবজীবনের পারস্পরিক সম্পর্ক যতই জটিল আকার ধারণ করিতেছে, সামগ্রিকভাবে সামাজিক অগ্রগতির দিকে লক্ষ্য রাখিয়া এই জটিল সম্পর্কের চরম নিয়ন্ত্রণকর্তা হিসাবে রাষ্ট্রের কর্তব্য ও দায়িত্ব ততই বৃদ্ধি পাইতেছে। এই কারণে বর্তমান যুগে ব্যক্তিগত ব্যাপারে রাষ্ট্রীয় হস্তক্ষেপের মাত্রা বৃদ্ধি পাইতেছে।

রাষ্ট্র মানবজীবনের চরম উদ্দেশ্য—এই গ্রীক মতবাদ গ্রহণযোগ্য না হইলেও বলা যায় যে, রাষ্ট্র হইল সামাজিক জীবনের শ্রেষ্ঠ ও সর্বোৎকৃষ্ট সংগঠন—একমাত্র যে সংগঠনের সাহায্যে সার্বজনীন কল্যাণ সাধিত হইতে পারে। মানুষের হিতসাধনের উদ্দেশ্যেই রাষ্ট্রের সৃষ্টি, সুতরাং যে রাষ্ট্র এই মহান উদ্দেশ্য সাধনে অক্ষম, সে রূপ রাষ্ট্রের অস্তিত্বের সমর্থন দূরের কথা, সে রাষ্ট্র ইহার নাগরিকগণের আত্মগত্যা বা বশুতার দাবী করিতে পারে না। পুলিশি রাষ্ট্রের ধারণার পরিবর্তে আজ কল্যাণ-ব্রতী রাষ্ট্রের ধারণা সুপ্রতিষ্ঠিত হইয়াছে এবং রাষ্ট্রের কর্তব্য হইল ব্যক্তি নির্বিচারে প্রত্যেক মানুষের সামগ্রিক কল্যাণ সাধন করা।

আইনমূলক মতবাদ—Juristic or Juridical Theory

অনেক রাষ্ট্রবিজ্ঞানীর মতে রাষ্ট্রের অস্তিত্ব আইনের উপর প্রতিষ্ঠিত। আইন ছাড়া রাষ্ট্রের কোন পৃথক অস্তিত্ব বা সম্ভা নাই। সুতরাং রাষ্ট্র হইল একটি আইনগত প্রতিষ্ঠান এবং এই প্রতিষ্ঠানের বাস্তবীকরণ কার্যকলাপ শাসন-তান্ত্রিক আইন দ্বারা বিধিবদ্ধ।

আইনমূলক মতবাদ সম্পর্কেও বিভিন্ন শ্রেণীর আইনবিদগণ একমত নহেন। বিশ্লেষণমূলক শ্রেণীর আইনবিদগণের (Analytical Jurists) মতে রাষ্ট্রই হইল আইনের একমাত্র উৎস। রাষ্ট্রের কার্য হইল আইন প্রণয়ন করা, ব্যাখ্যা করা ও আইন বলবৎ করা। যে আইন রাষ্ট্র কর্তৃক সৃষ্ট বা স্বীকৃত বা প্রযুক্ত হইবার নির্দেশ পায় নাই তাহা বিচার বিভাগ কর্তৃক আইনরূপে প্রযুক্ত বা কার্যকর হইতে পারে না। অপরপক্ষে ঐতিহাসিক

আইনবিদগণের (Historical Jurists) মতে রাষ্ট্রই আইনের একমাত্র উৎস হইলেও সব আইনই যে রাষ্ট্র কর্তৃক আনুষ্ঠানিকভাবে বিধিবদ্ধ হইতে হইবে ইহার কোন প্রয়োজন নাই। তাঁহারা বলেন দেশে প্রচলিত চির-চরিত প্রথাগুলি রাষ্ট্র কর্তৃক আনুষ্ঠানিকভাবে বিধিবদ্ধ না হইলেও সর্বত্র আইন বলিয়া গণ্য হয়। ডুগুই প্রভৃতি লেখকগণ আইনকে রাষ্ট্রের উপরে স্থান দিয়া বলেন যে, রাষ্ট্র-জন্মের পূর্বেও আইনের অস্তিত্ব ছিল। সুতরাং রাষ্ট্র আইন-নিরপেক্ষ এবং রাষ্ট্রের আইনের বিধান লংঘন বা অবহেলা করিবার কোন অধিকার নাই।

অনেক লেখক আবার রাষ্ট্রে আইনগত ব্যক্তিত্ব আরোপ করিয়াছেন। ব্যক্তির যেমন আইনগত অধিকার ও কর্তব্য আছে রাষ্ট্রেরও তদ্রূপ অধিকার ও কর্তব্য আছে এবং এই অধিকার রক্ষার জন্ত রাষ্ট্র বিচারালয়ে অভিযোগ করিতে পারে ও নিজেও অভিযুক্ত হইতে পারে। এ দিক দিয়া দেখিতে গেলে রাষ্ট্রের আইনমূলক ব্যক্তিত্ব রহিয়াছে কিন্তু এই ব্যক্তিত্ব কল্পনা-প্রসূত—বাস্তব নহে। কারণ, রাষ্ট্রান্তর্গত জনসমষ্টির ব্যক্তিত্ব ছাড়া রাষ্ট্রের কোন স্বতন্ত্র ব্যক্তিত্ব বা ইচ্ছা নাই।

জৈব মতবাদ (Organic or Organismic Theory)

সামাজিক চুক্তি প্রভৃতি রাষ্ট্রের উৎপত্তি-বিষয়ক যে সমস্ত মতবাদ রাষ্ট্রের কল্পিত প্রমাণ করিতে প্রয়াস পাইয়াছিল, সেই মতবাদগুলির অসারতা প্রতিপন্ন করিবার জন্ত একদল লেখক এই জৈব মতবাদ প্রবর্তন করেন। এই মতবাদে রাষ্ট্রকে একটি জীবদেহ বা উদ্ভিদদেহের সহিত তুলনা করিয়া উভয়ের মধ্যে কতকগুলি প্রকৃতিগত ও গঠনগত সমতা প্রতিষ্ঠিত করা হইয়াছে। জীবদেহের সজীবতা হইতে শুরু করিয়া জন্ম, বিকাশ ও মৃত্যু, এবং দেহের বিভিন্ন অঙ্গ-প্রত্যঙ্গ সকলই অমূরূপভাবে রাষ্ট্রদেহে দেখা যায়। এই সাদৃশ্যগুলি হইতে এই মতবাদে সিদ্ধান্ত করা হয় যে, রাষ্ট্র প্রাণবন্ত জীবদেহের অমূরূপ একটি দেহী ও রাষ্ট্রের প্রকৃতি প্রাণবন্ত জীবের প্রকৃতির অমূরূপ।

রাষ্ট্রকে জীবদেহের সহিত তুলনা করিবার প্রয়াস মাহুষের রাজনৈতিক চিন্তাধারার প্রথম পর্যায় হইতে শুরু হইয়াছিল। গ্রীক দার্শনিক প্লেটো ও রোমান দার্শনিক সিসারোর লেখার মধ্যে ইহার স্পষ্ট ইঙ্গিত দেখিতে

পাওয়া যায়। মধ্যযুগের মারসিগ্লিও, অক্‌হাম প্রভৃতি দার্শনিকেরা এই মতবাদের উপর বিশেষ গুরুত্ব আরোপ করেন। তারপর সামাজিক চুক্তি-মতবাদের লেখক হব্‌স্ ও রুশো এই মতবাদের সমর্থক ছিলেন। হব্‌স্ রাষ্ট্রকে একটি অতিকায় সামুদ্রিক জীবের সহিত তুলনা করিয়া তাঁহার পুস্তকের নামকরণ করিয়াছিলেন ‘লিভিয়াথান’। রুশোর মতে জীবদেহের মত রাষ্ট্রের অঙ্গ-প্রত্যঙ্গ আছে। সরকার হইল রাষ্ট্রের মস্তিষ্ক, আর রাজ্য হইল ইহার শোণিত।

উনবিংশ শতাব্দীর প্রারম্ভ হইতে এই মতবাদ এক নূতন রূপ পরিগ্রহ করে। পূর্ববর্তী লেখকগণ রাষ্ট্রের সহিত জীবদেহ বা উদ্ভিদদেহের সাদৃশ্য বর্ণনা করিয়া ক্ষান্ত ছিলেন, কিন্তু পরবর্তী লেখকগণ রাষ্ট্রকে জীবদেহের অনুরূপ একটি দেহী বলিয়া রাষ্ট্র ও জীবদেহের অভিন্নতা সপ্রমাণিত করিবার প্রয়াস পান। এই উদ্দেশ্য-প্রণোদিত হইয়া এই মতবাদের উগ্র সমর্থকগণ রাষ্ট্র ও জীবদেহের মধ্যে যে সাদৃশ্য বিদ্যমান তাহা বিস্তারিতভাবে বিশ্লেষণ করেন। জার্মানীতেই সর্বপ্রথম এই জৈব মতবাদ ইহার চরম রূপ পরিগ্রহ করে। জার্মান দার্শনিক ব্লুনৎস্লি এই মতবাদের বিশদ ব্যাখ্যা করিয়া রাষ্ট্র ও জীবদেহের অভিন্নতা প্রমাণ করিবার চেষ্টা করেন। ব্লুনৎস্লির মতে রাষ্ট্র মানুষের প্রতিষ্ঠা। তিনি রাষ্ট্রে ব্যক্তিত্ব আরোপ করিয়া রাষ্ট্রকে পুরুষ-প্রকৃতি ও ধর্মসংগঠনকে নারী-প্রকৃতি বলিয়া অভিহিত করেন। ইংরাজ দার্শনিক স্পেনসারের হস্তে এই মতবাদ পূর্ণ ও চরম রূপ পরিগ্রহ করে। স্পেনসার সর্বপ্রথম বিজ্ঞানসম্মত পদ্ধতিতে এই মতবাদের বিশ্লেষণ করিয়া বিবর্তনবাদ প্রতিষ্ঠিত করিতে প্রয়াস পান। স্পেনসার রাষ্ট্র ও জীবদেহের মধ্যে যে সাদৃশ্য আছে শুধু সেগুলির উল্লেখ করিয়া ক্ষান্ত হন নাই, উভয়ের মধ্যে যে বৈসাদৃশ্য আছে সেগুলিরও উল্লেখ করেন।

সাদৃশ্য—রাষ্ট্র ও জীবদেহের পরস্পরের মধ্যে অনেক সাদৃশ্য আছে :

- ১। জীবদেহ যেরূপ কতকগুলি জীবকোষ-দ্বারা গঠিত, রাষ্ট্রও সেইরূপ কতকগুলি ব্যক্তির সমষ্টি।
- ২। জীবদেহের প্রত্যেকটি কোষ যেমন পরস্পরের উপর নির্ভরশীল ও সমস্ত কোষ সম্পূর্ণ দেহের উপর নির্ভরশীল, তদ্রূপ রাষ্ট্রভূক্ত মানুষও প্রথমতঃ পরস্পরের উপর নির্ভরশীল ও দ্বিতীয়তঃ সমগ্রভাবে রাষ্ট্রের উপর নির্ভরশীল।
- ৩। জীবদেহ ও রাষ্ট্র উভয়েরই জীবন

আরম্ভ হয় ক্ষুদ্র জীবাণু হইতে। তাহার পর তাহারা একই নিয়মে পরিবর্তিত হইয়া ক্রমশঃই জটিল রূপ গ্রহণ করে। ৪। জীবদেহের কোন একটি কোষ-বিনষ্ট হইলে সমস্ত দেহের যেরূপ কোন ক্ষতি-হয় না, সেইরূপ ব্যক্তিবিশেষের মৃত্যু হইলে রাষ্ট্রের স্বায়ত্ত্বের কোন ব্যাঘাত ঘটে না। এতদ্ব্যতীত হার্বার্ট স্পেনসার উভয়ের মধ্যে কতকগুলি গঠনগত সাদৃশ্যের অবতারণা করেন। ৫। তাহার মতে জীবদেহের যেরূপ শিরা-উপশিরা আছে, রাষ্ট্রদেহে তদ্রূপ যাতায়াতের ব্যবস্থা আছে। জীবদেহে সমস্ত অঙ্গ-প্রত্যঙ্গ নিয়ন্ত্রণ করিবার জন্ত যেরূপ স্নায়ুব্যবস্থা আছে, রাষ্ট্রদেহের বিভিন্ন অংশকে নিয়ন্ত্রণ করিবার জন্ত তদ্রূপ সরকার আছে। ৬। রাষ্ট্র ও জীবদেহ উভয়েই ক্ষয়িষ্ণু। জীবদেহের বিভিন্ন অংশ ক্ষয়প্রাপ্ত হইলে প্রাকৃতিক নিয়মে নূতন অংশ গঠিত হইয়া ক্ষয়প্রাপ্ত অংশগুলির স্থান পূরণ হয়। রাষ্ট্রেরও তদ্রূপ বৃদ্ধি, অকর্মণ্য ও ব্যাধিগ্রস্ত লোকের স্থান নবজাত ব্যক্তির দ্বারা পূরণ হয়।

সমালোচনা

জীবদেহ ও রাষ্ট্রের মধ্যে কতকগুলি গঠনগত ও প্রকৃতিগত সাদৃশ্য থাকিলেও এই সাদৃশ্যের ভিত্তিতে উভয়ের অভিন্নতা প্রতিষ্ঠিত হইতে পারে না। কোন দুইটি জিনিসের সাদৃশ্যের ভিত্তিতে তাহাদের অভিন্নতা প্রমাণিত হয় না। একটু প্রণিধানপূর্বক দেখিলেই বুঝা যায় যে, এই মতবাদের সমর্থকগণ যে সাদৃশ্যগুলির ভিত্তিতে উভয়কে অভিন্ন বলিয়া প্রমাণ করিতে প্রয়াস পাইয়াছেন সেই সাদৃশ্যগুলি শুধু বাহ্যিক, মূলগত নয়। জীবদেহ ও রাষ্ট্রের মধ্যে একদিকে যেরূপ বাহ্যিক সাদৃশ্য দেখা যায়, অপর দিকে সেইরূপ বহু মূলগত বৈসাদৃশ্য রহিয়াছে এবং সেই বৈসাদৃশ্যগুলি এত সম্যক্ পরিষ্কৃত যে, রাষ্ট্রকে কোন মতেই জীবদেহের অনুরূপ বলা চলে না।

১। প্রথম বলা যায় যে, জীবদেহের কোন একটি কোষকে জীবদেহ হইতে বিচ্ছিন্ন করিলে তাহার আর কোন স্বতন্ত্র অস্তিত্ব থাকে না। কিন্তু রাষ্ট্রভুক্ত প্রত্যেক মানুষেরই একটা পৃথক সত্তা আছে ও রাষ্ট্রের বহির্ভূত হইলেও তাহার পৃথক সত্তা বজায় থাকে।

২। জীবদেহের কোষগুলির কোন স্বতন্ত্র অস্তিত্ব নাই—জড়বস্তুর মত তাহাদের কোন নিজস্ব বুদ্ধি বা পৃথক ইচ্ছা নাই। কিন্তু প্রত্যেক মানুষেরই

একটা স্বীয় বুদ্ধি বা পৃথক ইচ্ছাশক্তি আছে এবং এই ইচ্ছাশক্তি দ্বারাই মানুষ স্বীয় কার্যকলাপ নিয়ন্ত্রিত করে।

৩। স্পেন্সার নিজেই বলিয়াছেন যে, জীবদেহের প্রত্যেকটি জীবকোষ পরস্পরের সহিত দৃঢ় সম্পর্কযুক্ত, কিন্তু সমাজে মানুষ পরস্পরের সহিত জীবকোষগুলির মত দৃঢ় সম্বন্ধযুক্ত নয়। তাহারা বিচ্ছিন্নভাবে বাস করে।

৪। জীবদেহের চেতনা শুধু তাহার মস্তিষ্কে কেন্দ্রীভূত আর রাষ্ট্রের চেতনা রাষ্ট্রের বিভিন্ন অংশে বিক্ষিপ্ত আছে।

৫। পরিশেষে বলা যায় যে, জীবদেহ পূর্ববর্তী কোন জীবদেহ হইতে জন্মলাভ করিয়া আভ্যন্তরীণ শক্তির বলে প্রাকৃতিক নিয়মে বৃদ্ধিপ্রাপ্ত হয় কিন্তু রাষ্ট্রের উৎপত্তিসম্বন্ধে একথা বলা চলে না। অনেক রাষ্ট্র শক্তির ভিত্তিতে গঠিত হইয়াছে। সুতরাং জীবদেহের জন্ম, বিকাশ ও মৃত্যুর সঙ্গে রাষ্ট্রের জন্ম, বিকাশ ও মৃত্যুর তুলনা করা যুক্তিযুক্ত নয়। জীবদেহের পরিণতি অবশুস্তাবী মৃত্যু, কিন্তু রাষ্ট্রের বিনাশ নাও হইতে পারে।

অধিকন্তু এই মতবাদের অনেক সমর্থক রাষ্ট্রকে জীবদেহের সহিত তুলনা করিয়া রাষ্ট্রের শ্রেষ্ঠত্ব ও অগ্রাধিকার প্রতিষ্ঠিত করিবার প্রয়াস পান। ফলে রাষ্ট্রভুক্ত মানুষের ব্যক্তিত্ব ক্ষুণ্ণ হয়।

মূল্যনির্ধারণ ও কার্যকারিতা

বর্তমান যুগে এই মতবাদ অসার, অলীক ও বিপজ্জনক বলিয়া পরিত্যক্ত হইলেও ইহার কিছু অন্তর্নিহিত সত্য আছে ও সে সত্যকে একেবারে উপেক্ষা করা চলে না। দেহের ন্যায় রাষ্ট্রও বিভিন্ন অঙ্গ-প্রত্যঙ্গগুলির উপর নির্ভরশীল এবং এই বিভিন্ন অঙ্গ-প্রত্যঙ্গগুলির উৎকর্ষের উপর রাষ্ট্রের উৎকর্ষ নির্ভর করে। মানবদেহের কোন অংশ ব্যাধিগ্রস্ত হইলে যেমন সমস্ত দেহ অসুস্থ হয়, সেইরূপ রাষ্ট্রের কোন অংশ ব্যাধিগ্রস্ত হইলে সমগ্র রাষ্ট্র-ব্যবস্থা দূষিত হয়। সুতরাং এই মতবাদে রাষ্ট্রভুক্ত জনগণের পারস্পরিক নির্ভরশীলতা ও রাষ্ট্রের অপরিহার্য এক্যের উপর গুরুত্ব আরোপ করা হইয়াছে।

এই মতবাদ দুইটি বিভিন্ন দিক দিয়া রাষ্ট্রের কর্মক্ষেত্রের উপর প্রভাব বিস্তার করিয়াছে। প্রথমতঃ, স্পেন্সার প্রমুখ লেখকগণ এই মতবাদের

ভিত্তিতে ব্যক্তির ব্যক্তিত্বের উপর অত্যধিক গুরুত্ব আরোপ করিয়া তাঁহাদের ব্যক্তিস্বাতন্ত্র্যবাদ প্রতিষ্ঠিত করিয়াছেন। ব্যক্তিস্বাতন্ত্র্যবাদ অল্পসারে রাষ্ট্রের কর্মক্ষেত্র সংকুচিত হয়। জনগণের জীবন ও সম্পত্তি রক্ষা করা ছাড়া রাষ্ট্রের আর করণীয় কিছুই থাকে না। অপর পক্ষে এই মতবাদ রাষ্ট্রের শ্রেষ্ঠত্ব প্রতিষ্ঠা করিয়াছে। ফলে, সমাজতন্ত্রবাদের উৎপত্তি হইয়া রাষ্ট্রের কর্মক্ষেত্র সম্প্রসারিত হইয়াছে। জার্মান দার্শনিকেরা এই মতবাদের ভিত্তিতে তাঁহাদের আদর্শবাদ প্রচার করিয়া রাষ্ট্রকে একটি অপৌরুষেয় প্রতিষ্ঠান ও সর্বশক্তির আধার বলিয়া বর্ণনা করিয়াছেন। এই সিদ্ধান্তের ফলে ব্যক্তি-স্বাধীনতা সম্পূর্ণরূপে বিনষ্ট হয়।

আদর্শবাদ (Idealist or Absolute Theory)

রাষ্ট্র সম্বন্ধে ষতগুলি মতবাদ প্রচলিত আছে তন্মধ্যে এই মতবাদটি হইল সম্পূর্ণ বাস্তবতাবর্জিত কল্পনা মাত্র। মানুষের কল্পনায় রাষ্ট্রের আদর্শ রূপ কি হইতে পারে এই মতবাদটি তাহার একটি প্রকৃষ্ট উদাহরণ। রাষ্ট্রের দার্শনিক তত্ত্বমূলক ব্যাখ্যা করিয়া এক আদর্শ ভিত্তির উপর এই পরিকল্পনা করা হইয়াছে।

গ্রীক দার্শনিক প্লেটোকে এই মতবাদের জন্মদাতা বলা হয়। প্লেটো তাঁহার বিখ্যাত ‘রিপাবলিক্’ গ্রন্থে এই মতবাদের ভিত্তিতে এক স্বয়ংসম্পূর্ণ আদর্শ রাষ্ট্রের পরিকল্পনা করেন। এই রাষ্ট্র ন্যায়পরায়ণতার উপর প্রতিষ্ঠিত ও মানুষ এই রাষ্ট্রের নাগরিক হিসাবে তাহার জীবনকে সর্বদুঃস্বপ্নের করিয়া পূর্ণ পরিণতির পথে চালিত করিতে পারে। প্লেটোর মত আদর্শবাদ সম্পূর্ণ গ্রহণ না করিলেও অ্যারিস্টটল্ সম্বন্ধে বলা যায় যে, তিনিও রাষ্ট্রের এই আদর্শ-পরিণতির সমর্থক ছিলেন। কিন্তু তাঁহার পরিকল্পিত রাষ্ট্র একেবারে বাস্তবতাবর্জিত কল্পনা মাত্র ছিল না।

জার্মান দার্শনিক কাণ্ট, ফিচে ও বিশেষ করিয়া হেগেলের হস্তে এই মতবাদ এক অভিনব রূপ পরিগ্রহ করে। হেগেল রাষ্ট্রে দেবত্ব আরোপ করেন। তাঁহার মতে রাষ্ট্র এক অতিমানবীয় প্রতিষ্ঠান ও এই প্রতিষ্ঠানের রাষ্ট্রভুক্ত জনসমষ্টির ব্যক্তিত্ব ছাড়া একটি স্বতন্ত্র ব্যক্তিত্ব আছে—যে ব্যক্তিত্ব সকল ব্যক্তিত্বের উর্ধ্বে। এই ব্যক্তিত্বের আবার একটা নির্দিষ্ট নৈতিক মান

আছে। এই নৈতিক মানের মাপকাঠিতে ব্যক্তিগত ইচ্ছা, অধিকার ও সমস্ত প্রচেষ্টার পরিমাপ করিতে হইবে। রাষ্ট্রের এই ব্যক্তিত্ব শুধু আত্মসচেতন নয়, ইহা সমস্ত কর্মপ্রেরণা ও কর্মপ্রচেষ্টার উৎস। ব্যক্তিগত ইচ্ছা বা স্বার্থ কখনই এই রাষ্ট্রের ইচ্ছার পরিপন্থী হইতে পারে না, কারণ রাষ্ট্র হইল সকল সভ্যতা, কৃষ্টি এবং ব্যক্তিগত অধিকার ও প্রচেষ্টার উৎস। রাষ্ট্রের নির্দেশ পালন করাই হইল জনগণের একমাত্র পবিত্র কর্তব্য, কারণ রাষ্ট্রের এই অপ্রতিহত ক্ষমতা ভগবৎপ্রদত্ত।

হেগেলের শিষ্য বার্ণহাডি ও ট্রিটস্কের হস্তে এই মতবাদ চরম পরিণতি লাভ করে। তাঁহারা রাষ্ট্রকে শুধু একটি অপরিণামী শক্তির আধার বলিয়া বর্ণনা করেন এবং এই শক্তির নিয়ত প্রয়োগদ্বারা রাষ্ট্রের অস্তিত্ব ও শ্রেষ্ঠত্ব বজায় রাখিবার প্রয়োজনীয়তার উপর বিশেষ গুরুত্ব আরোপ করেন। ক্ষুদ্র রাষ্ট্রগুলিকে যুদ্ধের দ্বারা করায়ত্ত করিয়া বৃহৎ রাষ্ট্রের আদর্শে অল্পপ্রাণিত করা রাষ্ট্রের এক মহান কর্তব্য বলিয়া তাঁহারা মনে করিতেন। তাঁহাদের মতে যুদ্ধ না করিলে রাষ্ট্রের পৌরুষের হানি হয়, সুতরাং রাষ্ট্রের পক্ষে যুদ্ধ অপরিহার্য ও অবশ্যজ্ঞাবী। অনেকে মনে করেন যে, এই আদর্শবাদী জীবনদর্শনের জগুই জার্মান জাতি এতটা রাষ্ট্রভক্ত ও যুদ্ধপ্রিয় হইয়া উঠিয়াছিল। পর পর দুইটি মহাসমরে জার্মান জাতির অপেক্ষাকৃত ক্ষুদ্র ও শক্তিহীন রাষ্ট্রজয়ের তীব্র আকাঙ্ক্ষা ও জার্মান জনসাধারণের নিবিচারে রাষ্ট্রনির্দেশ পালন করিবার কর্তব্যবোধ প্রমাণিত হয়।

ইংলণ্ডেও আদর্শবাদী রাষ্ট্রদর্শনের আলোচনা হয়। এই আলোচনা সম্পর্কে গ্রীন, ব্রাডলে ও বোসাকের নাম উল্লেখযোগ্য। তবে ইহারা জার্মান আদর্শবাদকে সম্পূর্ণরূপে গ্রহণ করেন নাই। তাঁহাদের অনেকের মতে রাষ্ট্র সর্বপ্রধান সংগঠন ও সর্বশক্তির মূল উৎস হইলেও ইহার কার্যক্ষেত্রের ও শক্তির একটা সীমা আছে। মোট কথা, ইংরাজ আদর্শবাদীরা রাষ্ট্ররূপ দেবতার পাদপীঠতলে ব্যক্তিকে বলিদান দিতে চাহেন নাই।

সমালোচনা

এই মতবাদের বহু বিরুদ্ধ সমালোচনা হইয়াছে। রাষ্ট্র সমাজ হইতে শুধু ভিন্ন নয় পরন্তু রাষ্ট্রের কর্মক্ষেত্র সমাজের গণ্ডি অপেক্ষা অনেক সংকীর্ণতর।

এই মতবাদে রাষ্ট্রকে সমাজের উর্ধ্বে স্থান দেওয়া হইয়াছে। দ্বিতীয়তঃ, এই মতবাদে রাষ্ট্রকে সর্বময় সর্বাঙ্গিক বলিয়া ধারণা করা হইয়াছে। কি আভ্যন্তরীণ ব্যাপারে কি পররাষ্ট্র ব্যাপারে রাষ্ট্রের ইচ্ছাই হইল সব ইচ্ছার উর্ধ্বে। এই ধারণার বশবর্তী হইলে একদিকে যেমন ব্যক্তি-স্বাধীনতার সমাধি রচিত হয়, আন্তর্জাতিক ক্ষেত্রেও তদ্রূপ ক্ষুদ্র রাষ্ট্রগুলির অস্তিত্ব লোপ পায়। এই মতবাদে রাষ্ট্রের যে স্বাধীনতা ও সর্বময় কর্তৃত্বের কথা বলা হয়, তাহা স্বৈরাচার ব্যতীত আর কিছুই নয়। আর স্বৈরাচারের পরিণতি হইল যুদ্ধবাদ।

মূল্যনির্ধারণ—এই মতবাদের অন্তর্নিহিত সত্য হইল যে, সংঘ হিসাবে ইহা রাষ্ট্রের উপর বিশেষ গুরুত্ব আরোপ করিয়াছে। রাষ্ট্রের সভ্য হিসাবেই যে নাগরিকগণ তাহাদের অধিকার ভোগ করে ও তাহাদের পারস্পরিক সম্পর্ক নিয়ন্ত্রিত করিয়া নাগরিক অধিকার ভোগে সহায়তা করে—এই সত্যটি এই মতবাদে বিশেষ জোরের সহিত বলা হইয়াছে। সুতরাং নাগরিক অধিকারের স্রষ্টা ও রক্ষক হিসাবে রাষ্ট্র নাগরিকদের নিকট চরম আনুগত্য ও ত্যাগস্বীকার দাবী করিতে পারে। এতদ্ব্যতীত এই মতবাদ একটি আদর্শ রাষ্ট্রের পরিকল্পনা করিয়া মানুষকে আদর্শ নাগরিক হইতে অনুপ্রাণিত করিবার প্রয়াস পাইয়াছে।

রাষ্ট্র সম্বন্ধে মার্কসীয় মতবাদ (Marxist Concept of the State)

রাষ্ট্র সম্পর্কে মার্কসের মতবাদ জানিতে হইলে মার্কস-প্রবর্তিত সমাজ-তত্ত্ববাদ সম্পর্কে একটু পরিচয় আবশ্যক। ইতিহাসের জড়বাদী ব্যাখ্যা ও শ্রেণী-সংগ্রামের উপরই মার্কস প্রধানতঃ তাহার সমাজতত্ত্ববাদের ভিত্তি স্থাপন করেন। মার্কসের মতবাদ তাহার ‘সাম্যবাদী ইস্তাহার’ (Communist Manifesto) ও ‘মূলধন’ (Capital) নামক দুইখানি গ্রন্থ হইতে জানিতে পারা যায়। মার্কস কর্তৃক যে নূতন জীবনদর্শন ও নূতন রাজনৈতিক মতবাদ প্রচারিত হইল তাহার ফলে পূর্বতন সমাজ-ব্যবস্থার আয়ুর্-সংস্কার সাধিত হইল। ডারউইন যে রূপ জৈব বিবর্তনবাদ উদ্ভাবন করিয়া জীব জগতের উৎপত্তির ইতিহাসে যুগান্তর আনয়ন করিয়াছিলেন, মার্কসও

সেইরূপ মানব ইতিহাসের বিবর্তনবাদ আবিষ্কার করিয়া মানব ইতিহাসে নবযুগের সূচনা করেন।

মার্কসীয় মতবাদের মূল সূত্র হইল যে, মানবজীবনে উচ্চাঙ্গ জীবন-যাপনের প্রয়োজনীয়তা অপেক্ষা খাদ্য, বস্ত্র এবং বাসস্থানের প্রয়োজনীয়তা অধিকতর গুরুত্বপূর্ণ অর্থাৎ মানুষের অর্থনৈতিক চাহিদাগুলি অন্ত জাতীয় চাহিদা অপেক্ষা তীব্রতর এবং মানুষের মানসিক, আধ্যাত্মিক প্রভৃতি অন্তঃস্থ চাহিদাগুলির প্রয়োজনীয়তার গুরুত্ব উপেক্ষা না করিয়াও বলা যাইতে পারে যে, মানুষের অর্থনৈতিক চাহিদাগুলির পরিতৃপ্তি সর্বাগ্রে প্রয়োজন। উপরি-উক্ত সূত্রের ভিত্তিতে মার্কস্ সিদ্ধান্ত করেন যে, মানুষের সমাজ ব্যবস্থায় যুগে যুগে যে পরিবর্তন দেখা যায়,—তাহার মূল কারণ হইল পারিপার্শ্বিক অবস্থার পরিবর্তন। অর্থনৈতিক জীবনে উৎপাদন-ব্যবস্থা প্রভূতভাবে মানুষের সামাজিক, রাজনৈতিক ও আধ্যাত্মিক জীবনধারা নিয়ন্ত্রিত ও প্রভাবিত করে। সূত্রটি একটি নির্দিষ্ট কালে একটি সমাজ ইহার কলা, দর্শন, আইন, ধর্ম, আচার, রীতি-নীতিসহ যে বিশিষ্ট রূপ গ্রহণ করে এবং রাষ্ট্রনৈতিক ব্যবস্থা যে ধাঁচে গঠিত হয়, তাহা তৎকালীন অর্থনৈতিক ব্যবস্থা বিশেষ করিয়া উৎপাদন-ব্যবস্থাকে প্রতিকলিত করে। অর্থাৎ উৎপাদন-ব্যবস্থাই সামাজিক ও রাজনৈতিক কাঠামো স্থির করে। তিনি আরও বলেন যে, যুগে যুগে প্রচলিত অর্থনৈতিক ব্যবস্থার সহিত সামঞ্জস্য রাখিয়া অল্পরূপ একটি সমাজ-ব্যবস্থা ও অল্পরূপ শ্রেণী-প্রাধান্যের অভ্যুদয় ঘটে। অর্থনৈতিক ব্যবস্থার পরিপ্রেক্ষিতে মানব ইতিহাসের ব্যাখ্যা করাকেই ইতিহাসের অর্থনৈতিক ভাষা বলা হয়।

মানব ইতিহাসের এই জড়বাদী ব্যাখ্যা মার্কস্ ইতিহাসের দৃষ্টান্ত সাহায্যে বুঝাইতে চেষ্টা করিয়াছেন। শিকার যুগকেই মার্কস্ মানবসমাজ বিবর্তনের আদি অধ্যায় আখ্যা দিয়াছেন। এই যুগে শিকারের যত্নপাতি ও শিকারলব্ধ পশু সাধারণ সম্পত্তি বলিয়া পরিগণিত হইত। শিকার যুগের এই অপরিণত সমাজতান্ত্রিক অর্থনৈতিক ব্যবস্থার ভিত্তিতে সমাজব্যবস্থাও অপরিণত সাম্যবাদী ধাঁচে গঠিত ছিল।

শিকারবৃত্তি পরিত্যাগ করিয়া মানুষ যখন পশুপালন বৃত্তি গ্রহণ করিল তখন এই অর্থনৈতিক ব্যবস্থা পরিবর্তনের ফলে সামাজিক কাঠামোর

পরিবর্তন ঘটিল। পশুপালন যুগে সমাজে দুইটি বিভিন্ন শ্রেণীর আবির্ভাব হইল—পশুর মালিক শ্রেণী ও পশুর মালিকানা-বিহীন শ্রেণী। এই যুগে সর্বপ্রথম বিত্তবান ও বিত্তহীন শ্রেণীর আবির্ভাবের ফলে সমাজ-ব্যবস্থায় অসাম্য প্রতিষ্ঠিত হইয়া শ্রেণী-সংগ্রামের সূত্রপাত হয়।

‘পশুপালন বৃত্তি গ্রহণের ফলে মানবসমাজে যে অসাম্যের সূত্রপাত হয়, পরবর্তী কৃষিযুগে এই অসাম্য আরও বৃদ্ধি পায়। কৃষিযুগে কৃষিকাষাই ছিল ধনোৎপাদনের প্রধান উপায় এবং এই কারণে জমির মালিকগণ সমস্ত ক্ষমতা হস্তগত করিয়া ভূমিহীন শ্রেণীকে একান্তরূপে নিঃসহায় ও জমির মালিকগণের উপর নির্ভরশীল করিয়া তুলে। এই ব্যবস্থার ফলে সমাজে ভূমিদাস (Serfs) শ্রেণীর আবির্ভাব হয় এবং জনির মালিক শ্রেণী ও ভূমিদাস শ্রেণীর মধ্যে স্বার্থের সংঘাত ঘটিতে থাকে।

উৎপাদনে যন্ত্রপাতি ব্যবহারের ফলে উৎপাদন-ব্যবস্থায় যে আমূল পরিবর্তন সাধিত হয়, তাহার ফলে সমাজের অর্থনৈতিক কাঠামোর রূপান্তর ঘটে। যন্ত্র সাহায্যে উৎপাদন-ব্যবস্থায় প্রভূত পরিমাণ মূলধন প্রয়োজন। এই কারণে যান্ত্রিক যুগে মূলধনের মালিক কৃষিযুগের জমিদার শ্রেণীর স্থান গ্রহণ করিল। অর্থের বলে মূলধনের মালিকগণ উৎপাদন-ব্যবস্থায় তাহাদের একচ্ছত্র কর্তৃত্ব প্রতিষ্ঠা করিবার ফলে বিত্তহীন শ্রেণী অন্তোপায় হইয়া জীবিকা সংস্থানের উদ্দেশ্যে মালিক শ্রেণীর নিকট তাহাদের শ্রম বিক্রয় করিতে বাধ্য হইল। মালিক শ্রেণী এই বিত্তহীন শ্রমজীবী সম্প্রদায়ের নিঃসহায় অবস্থার স্বযোগ গ্রহণ করিয়া শ্রমজীবীগণকে তাহাদের শ্রমদ্বারা উৎপাদিত দ্রব্যের বাজার মূল্য অপেক্ষা কম মূল্য শ্রমিকগণের পারিশ্রমিক হিসাবে দিতে লাগিল। শ্রমদ্বারা উৎপাদিত দ্রব্যের বাজার মূল্য ও শ্রমিককে প্রদত্ত মজুরি এই উভয়ের পার্থক্যকেই মার্কস্ ‘উদ্ধৃত মূল্য’ (Surplus Value) আখ্যা দিয়াছেন। এই উদ্ধৃত মূল্যের সমগ্র পরিমাণই শ্রমিক শ্রেণীকে বঞ্চিত করিয়া মালিক শ্রেণী আত্মসাৎ করেন। এইরূপে অর্থনৈতিক ক্ষমতা হস্তগত করিয়া মালিক শ্রেণী রাজনৈতিক ক্ষমতাও অধিকার করেন। রাষ্ট্রনৈতিক ক্ষমতার বলে তাহারা সাহিত্য, কলা, ইতিহাস, দর্শন, আইন প্রভৃতি তাহাদের শ্রেণীস্বার্থের সুবিধা অহুসারে সৃষ্টি

করেন। এ যুগেও ধনতান্ত্রিক অর্থনৈতিক ব্যবস্থার ফলে রাষ্ট্রব্যবস্থাও ধনতান্ত্রিক রূপ গ্রহণ করে।

মার্কস্ ভবিষ্যদ্বাণী করেন যে, যান্ত্রিক যুগের উন্নত অবস্থায় বিভিন্ন শিল্প-প্রতিষ্ঠানের মধ্যে উৎকর্ষ প্রতিযোগিতার ফলে বৃহৎ শিল্পপ্রতিষ্ঠানগুলি অধিক পরিমাণ মুনাফা লাভের উদ্দেশ্যে সংযুক্ত হইয়া অতিকায় শিল্প প্রতিষ্ঠানে পরিণত হইয়া একচেটিয়া কারবার স্থাপন করিবে। ইহার ফলে একদিকে যেরূপ ধনিক-মালিকের মুনাফা পরিমাণ বৃদ্ধি পাইবে, অপরদিকে তদ্রূপ শ্রমিক শ্রেণীর আয় হ্রাস পাইতে থাকিবে। এই শোষণ পদ্ধতির ফলে দেশের সম্পদ নৃষ্টিমেয় লোকের হস্তে কেন্দ্রীভূত হইবে এবং অধিকাংশ লোক দারিদ্র্য-পীড়িত হইবে। এইরূপে পশুপালন যুগে অর্থনৈতিক কারণে মানবসমাজে শ্রেণীভেদের ফলে যে অসাম্যের বীজ উৎপন্ন হয়, উন্নত যান্ত্রিক যুগে সেই ক্রমবর্ধমান অসাম্য তীব্রতর হইয়া উগ্র শ্রেণী-সংগ্রামে পর্যবসিত হইবে। সমস্ত দেশের ধনিক শ্রেণী তাহাদের কায়মনো স্বার্থ সংরক্ষণের উদ্দেশ্যে সংযুক্ত হইবে, অপরপক্ষে পৃথিবীর সমগ্র শ্রমজীবী মালিক শ্রেণীবিরুদ্ধে এক আন্তর্জাতিক শ্রমিক সংঘ গঠন করিয়া মিলিত হইবে।

সুতরাং মার্কসীয় ইতিহাসের ভাষা অনুসারে বলা যায় যে, সামাজিক বিবর্তনের বিভিন্ন যুগে রাষ্ট্রের কাঠামো সমাজের অর্থনৈতিক ব্যবস্থার দ্বারা ই স্থিরীকৃত হইয়াছে। অর্থনৈতিক ব্যবস্থার ফলে বিভিন্ন যুগে বিত্তবান ও বিত্তহীন—এই দুইটি শ্রেণীর বিপ্লবাত্মক স্বার্থের সংঘাত ঘটিয়াছে। বিত্তবান শ্রেণী ইহার স্বার্থ রক্ষাকল্পে নানারূপ উপায় অবলম্বন করিয়াছে। রাষ্ট্ররূপ সংগঠন হইল এই উপায়গুলির অন্ততম। এই সংগঠনের সাহায্যে বিত্তবান শ্রেণী বিত্তহীন শ্রেণীকে অবদমিত রাখিতে চেষ্টা কবে। বিত্তবান শ্রেণী রাষ্ট্রীয় পুলিশ ও সেনাবাহিনীর সাহায্যে শোষিত শ্রেণীর উপর ইহার কঠোর প্রভাব প্রতিষ্ঠিত করে। সুতরাং মার্কসের মতে রাষ্ট্রের উৎপত্তি ও অস্তিত্ব পশুবলের উপর প্রতিষ্ঠিত এবং একমাত্র এই পশুবল প্রয়োগ করিয়াই রাষ্ট্র সমাজের শ্রেণীগত কাঠামো অব্যাহত রাখিতে সমর্থ হয়। এই কারণে মার্কস্ রাষ্ট্রকে শ্রেণী স্বার্থের ধারক এবং শ্রেণী স্বার্থের পৃষ্ঠপোষক বলিয়া বর্ণনা করিয়াছেন।

মার্কসীয় মতবাদের সমালোচনা (Criticism of the Marxian Concept of the State)

মার্কসীয় মতবাদের বিরুদ্ধে অনেক সমালোচনা হইয়াছে। প্রথমতঃ, বলা হয় যে, সমাজ বিবর্তনের ক্ষেত্রে মার্কস্ শুধু অর্থনৈতিক প্রভাবের উপর অধিক গুরুত্ব আরোপ করিয়াছেন। কার্যতঃ দেখা যায় যে, সমাজ বিবর্তনে অর্থনৈতিক পরিবেশ ছাড়াও ধর্ম, ন্যায়, নীতি, কলা, কুষ্টি প্রভৃতি উপাদানগুলির প্রভাব অনস্বীকার্য।

দ্বিতীয়তঃ, দুইটি বিষয়ে মার্কসের ভবিষ্যদ্বাণী সত্য বলিয়া প্রমাণিত হয় নাই। তিনি বলিয়াছিলেন যে, শোষণের ফলে দরিদ্র শ্রেণী দরিদ্রতর হইবে। কিন্তু শিল্পের উন্নতির ফলে প্রায় সকল দেশেই দরিদ্র শ্রেণীর অর্থনৈতিক অবস্থার ক্রমোন্নতি দেখা যায়। মার্কস্ আরও বলিয়াছিলেন যে, বিত্তহীনের কর্তৃত্ব প্রতিষ্ঠিত হইলে কালক্রমে রাষ্ট্র সংগঠন বিলীন হইবে। রুশ দেশে সাম্যবাদ প্রতিষ্ঠিত হইলেও রাষ্ট্রের এখনও অবসান ঘটে নাই।

তৃতীয়তঃ, মার্কস যে সাম্যবাদী রাষ্ট্রের কথা বলিয়াছেন, সে রাষ্ট্র হিংসা-দ্বন্দ্ববর্জিত ও মানবসমাজের পারস্পরিক সহযোগিতার ভিত্তির উপর প্রতিষ্ঠিত। এরূপ শান্তিপূর্ণ রাষ্ট্র কখনও বিপ্লব বা শ্রেণী-সংগ্রামের দ্বারা প্রতিষ্ঠিত হইতে পারে না। সুতরাং তাঁহার মতামতের বিভিন্ন অংশ পরস্পর-বিরোধী।

পরিশেষে বলা যায় যে, মার্কস্ শ্রমিক শ্রেণীর বিশ্বব্যাপী একতার উপর তাঁহার মতবাদ প্রতিষ্ঠিত করিয়াছিলেন এবং সকল শ্রেণীর শ্রমিককে একতাবদ্ধ হইতে উদ্বুদ্ধ আহ্বান জানাইয়াছিলেন। কিন্তু তাঁহার আন্তরিক আহ্বানসত্ত্বেও বিভিন্ন দেশের শ্রমিক শ্রেণী আজও পর্যন্ত জাতীয়তাবোধ পরিহার করিয়া আন্তর্জাতিক আদর্শ গ্রহণ করে নাই।

কিন্তু এই বিরুদ্ধ সমালোচনাসত্ত্বেও বলিতে হইবে যে, মার্কস্ তাঁহার মতবাদ প্রচার দ্বারা শ্রমজীবীগণকে তাহাদের ন্যায় অধিকার সম্বন্ধে সচেতন করিয়া সম্মিলিত প্রচেষ্টার দ্বারা তাহাদের অধিকার প্রতিষ্ঠিত করিতে সাহায্য করিয়াছেন। মার্কসের ইতিহাসের জড়বাদী ব্যাখ্যা গ্রহণযোগ্য না হইলেও একথা মানিয়া লইতে হইবে যে, মানুষের অর্থনৈতিক প্রয়োজন-জনিত কর্ম-প্রচেষ্টা মানুষের ইতিহাসের গতিকে অনেক পরিমাণে প্রভাবিত করিয়াছে।

[দ্বাদশ অধ্যায় দ্রষ্টব্য]

সংক্ষিপ্তসার

রাষ্ট্রের উৎপত্তিবিষয়ক মতবাদ

রাষ্ট্রের উৎপত্তি সম্বন্ধে কোনরূপ নির্দিষ্ট ইতিহাস নাই। সমাজবদ্ধ জীবনের প্রতি মানুষের স্বাভাবিক প্রবণতা ও ক্রমবর্ধমান রাজনৈতিক চেতনাই রাষ্ট্র-উৎপত্তির মূল সূত্র বলিয়া ধরা যায়। এ সম্বন্ধে পাঁচটি বিভিন্ন মতবাদ প্রচলিত আছে। যথা—

১। **ঐশ্বরিক মতবাদ**—এই মতবাদ রাষ্ট্রকে ভগবানের সৃষ্ট সংগঠন বলিয়া মনে করে ও রাজা ভগবৎ-প্রেরিত প্রতিনিধি হিসাবে একমাত্র ভগবানের কাছে দায়ী থাকিয়া রাষ্ট্র পরিচালনা করেন। প্রাচীনকালের অনেক দেশে এই মতবাদ প্রচলিত ছিল ও এই মতবাদ রাষ্ট্রগঠনের প্রথম অধ্যায়ে মানুষকে ধর্মভয়ের মাধ্যমে রাষ্ট্রের প্রতি আনুগত্য ও বশ্যতা স্বীকার করিবার শিক্ষা দিয়াছিল। কিন্তু এই মতবাদের প্রধান ত্রুটি হইল যে, ইহা রাজার স্বৈরাচারের প্রশ্রয় দেয় ও বর্তমান যুগের রাজতন্ত্র ব্যতীত বিভিন্ন রকম সরকারের ভিত্তিতে প্রতিষ্ঠিত রাষ্ট্রের উৎপত্তির ব্যাখ্যা করিতে পারে না।

২। **বলপ্রয়োগ মতবাদ**—এই মতবাদে ‘জোর বার মুখুক তার’ এই প্রবচনের যুক্তি-যুক্ততার ভিত্তিতে রাষ্ট্র গঠিত হইয়াছে বলিয়া মনে করা হয়। সবল দুর্বলের উপর আধিপত্য বিস্তার করিয়া রাষ্ট্রের গোড়াপত্তন করে ও রাষ্ট্রের অস্তিত্বও এই পশুবলের সহায়তায় বজায় রাখে। রাষ্ট্রগঠনে ও রাষ্ট্রের অস্তিত্ব বজায় রাখিবার জন্য শারীরিক শক্তির প্রয়োজন। ঐতিহাসিক ও বাস্তব দৃষ্টি দিয়া দেখিতে গেলে একথা অনস্বীকার্য হইলেও, রাষ্ট্র যে একমাত্র পশুবলের উপর প্রতিষ্ঠিত একথা বলা যায় না। পশুবলের ভিত্তিতে প্রতিষ্ঠিত কোন রাষ্ট্রই চিরস্থায়ী হয় না। শাসিতের সম্মতি ও সহযোগিতার ভিত্তির উপর রাষ্ট্র প্রতিষ্ঠিত।

৩। **সামাজিক চুক্তি মতবাদ**—রাষ্ট্র মানবীয় প্রতিষ্ঠান ও মানুষের সম্পাদিত চুক্তিদ্বারা ইহার উদ্ভব হইয়াছে—এই মতবাদের ইহাই প্রতিপাত্ত বিষয়। রাষ্ট্রের আবির্ভাবের পূর্বে মানুষ এক প্রাক-সামাজিক অবস্থায় বাস করিত। এই অবস্থাকে প্রকৃতির রাজত্ব বলা হইয়াছে। এখানে মানুষের জীবন অসহনীয় হইয়া উঠিলে তাহারা নিজেদের মধ্যে একটা চুক্তি সম্পাদন

করিয়া রাষ্ট্র সৃষ্টি করিল। স্বতরাং রাষ্ট্র চুক্তিধারা গঠিত। হব্‌স্, লক্ ও রুশো এই মতবাদের প্রধান সমর্থক। এই তিনজন লেখক একই বিষয়ে আলোচনা করিলেও তাঁহাদের উদ্দেশ্য বিভিন্ন ছিল। হব্‌স্ তাঁহার মতবাদ-দ্বারা রাজশক্তির অবাধ কর্তৃত্ব প্রতিষ্ঠা করিতে চাহিয়াছিলেন। লক্ এই মতবাদকে ব্যক্তি-স্বাধীনতার রক্ষাকবচ হিসাবে ব্যবহার করিয়াছিলেন, আর রুশোই হস্তে এই মতবাদ লোকায়ত্ত সরকারের রূপ গ্রহণ করিল।

এই মতবাদটি অনৈতিহাসিক, অযৌক্তিক ও বিপজ্জনক বলিয়া পরিত্যক্ত হইলেও ইহার অন্তর্নিহিত সত্য হইল যে, জনগণের সম্মতি ও সহযোগিতার উপর রাষ্ট্র প্রতিষ্ঠিত। এই মতবাদে ঐশ্বরিক উৎপত্তি মতবাদের ও বল-প্রয়োগ মতবাদের বিলোপ সাধন করিয়া বর্তমান গণতন্ত্রের অগ্রগতির পথ সুগম করিয়া দেয়।

৪। পারিবারিক সম্প্রসারণ মতবাদ—মাতৃতান্ত্রিক অথবা পিতৃতান্ত্রিক পরিবার সম্প্রসারিত হইয়া রাষ্ট্র কালক্রমে ইহার বর্তমান রূপ লইয়াছে, এই মতবাদে ইহাই বলা হয়। পরিবার হইতে গোষ্ঠী, গোষ্ঠী হইতে জাতি এইভাবে সহজ ও সরল সংগঠনের মধ্য দিয়া রাষ্ট্র ক্রমশঃই জটিলতাপূর্ণ হইয়াছে। জাতিবদ্ধন রাষ্ট্রগঠনের সহায়তা করিয়াছে একথা স্বীকার করিলেও বলা যায় না যে, একমাত্র পারিবারিক সম্প্রসারণের ফলে রাষ্ট্রের উদ্ভব হইয়াছে। ইহা ছাড়াও মানুষের আদিম সংগঠন যে পরিবার হইতে আরম্ভ হয় তাহারও কোন নিশ্চিত নিদর্শন নাই।

৫। বিবর্তন বা ঐতিহাসিক মতবাদ—রাষ্ট্রের উৎপত্তিবিষয়ক মতবাদগুলির মধ্যে এইটিই হইল বিজ্ঞানসম্মত মতবাদ। এই মতবাদের বিশেষত্ব হইল যে, ইহা রাষ্ট্রগঠনের কোন একটি বিশেষ উপাদান বা রাষ্ট্র-উৎপত্তির কোন একটি নির্দিষ্ট স্তরের উপর গুরুত্ব আরোপ না করিয়া সবগুলির সমন্বয়ে একটি সম্ভাব্য মতবাদ নির্ণয়ের চেষ্টা করে। রাষ্ট্র বহু যুগ ধরিয়া বহু ঐতিহাসিক ঘটনার ঘাত-প্রতিঘাতে বিবর্তনের মধ্য দিয়া বর্তমান রূপ পরিগ্রহ করিয়াছে। রাষ্ট্রগঠনের রক্তসঞ্চয়, ধর্ম, শারীরিক শক্তি, রাজনৈতিক চেতনা, জাতীয়তাবোধ, অর্থনৈতিক কারণ প্রভৃতি বহুশক্তি কার্যকরী হইয়াছে। রাষ্ট্র একদিনে নির্দিষ্ট পরিকল্পনা-দ্বারা বা একটি উপাদানে গঠিত হয় নাই।

রাষ্ট্রের প্রকৃতিবিষয়ক মতবাদ

১। জৈব মতবাদ—এই মতবাদে রাষ্ট্রকে একটি জীবদেহের সহিত তুলনা করিয়া একটি সজীব ও সচেতন দেহী বলিয়া ধারণা করা হইয়াছে। জীবদেহ যেরূপ কতকগুলি জীবকোষের সমন্বয়ে গঠিত ও এই জীবকোষগুলি যেরূপ পরস্পরের সহিত অবিচ্ছিন্নভাবে জড়িত, তদ্রূপ রাষ্ট্রও কতকগুলি মানুষের সমন্বয়ে গঠিত ও এই মানুষগুলি পরস্পরের উপর নির্ভরশীল। জীবকোষগুলি যেরূপ সমস্ত দেহের উপর নির্ভরশীল, জনগণও সেইরূপ রাষ্ট্রের উপর নির্ভরশীল। ব্রুনস্‌সি স্পেন্সার এই মতবাদের প্রধান সমর্থক ছিলেন।

রাষ্ট্র ও জীবদেহের মধ্যে যে সাদৃশ্যগুলির কথা বলা হয় সেগুলি বাহ্যিক, মূলগত নয়, তাহা ছাড়া ইহাদের মধ্যে এত মূলগত প্রভেদ আছে যে-জন্ত রাষ্ট্রকে জীবদেহের অমুরূপ বলা আদৌ যুক্তিযুক্ত নয়।

২। আদর্শবাদ—এই মতবাদে রাষ্ট্রের বাস্তবতাব্যবহিত আদর্শ পরিকল্পনা করিয়া রাষ্ট্রে এক নৈতিক ও অতিমানবীয় ব্যক্তিত্ব আরোপ করা হইয়াছে, যাহার ফলে রাষ্ট্র সর্বময় ক্ষমতার অধিকারী হইয়া ব্যক্তি স্বাধীনতা ক্ষুণ্ণ করিতে পারে ও আন্তর্জাতিক ক্ষেত্রে বিপর্যয় ঘটাইতে পারে।

মার্কসীয় মতবাদ—সাম্যবাদী ইতিহাসের ও মূলধন নামক গ্রন্থ দুখানি হইতে রাষ্ট্রসম্পর্কে মার্কসের মতবাদ জানিতে পারা যায়। ইতিহাসের জড়বাদী ব্যাখ্যা, উদ্ধৃতমূল্যের স্বত্ব ও শ্রেণীসংগ্রাম—এই তিনটি সিদ্ধান্তের উপর ভিত্তি করিয়া মার্কস তাঁহার মতবাদ প্রতিষ্ঠিত করেন। তাঁহার মতে শিকারযুগ হইতে আরম্ভ করিয়া বর্তমান শিল্পযুগ পর্যন্ত বিভিন্ন যুগে যে সামাজিক ও রাজনৈতিক ব্যবস্থা দেখা যায় তাহা তৎকালীন অর্থনৈতিক ব্যবস্থা বিশেষ করিয়া উৎপাদন ব্যবস্থাকে প্রতিফলিত করে। অর্থনৈতিক ক্ষমতা অর্থাৎ উৎপাদন ব্যবস্থা সমাজের যে শ্রেণীর অধিকারে থাকে, সেই শ্রেণীই প্রাধান্য লাভ করিয়া সমগ্র সামাজিক ব্যবস্থা নিয়ন্ত্রণ করে। ফলে সমাজে দুইশ্রেণীর আবির্ভাব হয় ক্ষমতাসীন বিত্তবান শ্রেণী ও ক্ষমতাহীন বিত্তহীন শ্রেণী। একদল শাসক ও শোষক, আর একদল শাসিত ও শোষিত। এই শোষণের প্রতিবাদে শোষক ও শোষিতের সংঘর্ষ অনিবার্য। শোষিত শ্রেণী সংখ্যাগরিষ্ঠতার বলে শোষক শ্রেণীর হস্ত হইতে বলপ্রয়োগে ক্ষমতা গ্রহণ করে। প্রথম পর্যায়ে শোষিত শ্রেণীর দ্বারা রাষ্ট্র ব্যবস্থা পরিচালিত হইলেও শেষপর্যন্ত শোষক শ্রেণী যখন নিমূল হয়,

তখন এক শ্রেণীহীন সমাজ ব্যবস্থা গঠিত হয় যেখানে উচ্চ-নীচ, ধনী-দরিদ্রের কোন পার্থক্য থাকে না। মার্কসের মতে বিত্তবান শ্রেণী রাষ্ট্ররূপ সংগঠনের সাহায্যে অর্থাৎ রাষ্ট্রের সেনা-বাহিনী ও পুলিশ সাহায্যে তাহাদের ক্ষমতা স্থায়ী করিতে চেষ্টা করে। সুতরাং রাষ্ট্রের শক্তি পশুবলের উপর প্রতিষ্ঠিত। শোষিত শ্রেণী রাষ্ট্রের এই ক্ষমতা শোষক শ্রেণীর হস্ত হইতে বলপ্রয়োগ সাহায্যে হস্তগত করিয়া শ্রেণী ভিত্তিক রাষ্ট্রকে শ্রেণীহীন রাষ্ট্র ব্যবস্থায় পরিবর্তিত করে।

মার্কসের মতবাদ সম্পূর্ণ গ্রহণযোগ্য না হইলেও ইহার মূল সূত্র গ্রহণযোগ্য। শ্রেণী সংগ্রামের সাহায্যে বিত্তহীন শ্রমজীবীগণ যে তাহাদের বহু ক্ষায্য অধিকার অর্জন করিতে সমর্থ হইয়াছে, ইহা অনস্বীকার্য।

প্রশ্নাবলী

1. Discuss critically the Idealist Theory of the State.
2. "Government rests on force" "Government rests on opinion." Discuss the statements carefully. (C. U. 1941)
3. Discuss the practical importance of the Social Contract Theory in actual political development. (C. U. 1949)
4. Rousseau tries to combine the theories of Hobbes and Locke. Elucidate. (C. U. 1951)
5. "The accepted theory of the origin of the state in modern Political Science is the Historical or Evolutionary Theory." Discuss. (C. U. 1952)
6. Comment on the statement, "Will, not force is the basis of the state." (C. U. 1956)
7. State the points of agreement and difference between Hobbes and Locke as expounders of Social Contract Theory. (C. U. 1957)
8. Discuss the points of agreement and difference between Hobbes and Rousseau as expounders of the Social Contract Theory. (C. U. 1959)
9. Explain how Rousseau in his theory of Social Contract seeks to combine the theories of Hobbes and Locke.

10. "The state is a living organism, not a lifeless instrument." Discuss the soundness of this view.

11. Discuss the Idealist theory regarding the nature of the State.

12. State and examine the theory of force as an explanation of the origin of the state. Do you discover any element of value in it? Give your reasons fully.

13. Examine the Marxist conception of the state.

14. Discuss critically the Organismic theory regarding the nature of the state.

15. Explain with reference to the views of Hobbes, Locke and Rousseau the Social Contract Theory regarding the origin of the state. What are the defects of the theory?

চতুর্থ অধ্যায় সার্বভৌমিকতা (Sovereignty)

সার্বভৌমিকতার অর্থ (Its meaning)

রাষ্ট্রের সার্বভৌম ক্ষমতা বলিলে বুঝা যায় রাষ্ট্রের সেই সব মৌলিক, সর্বোচ্চ ও অসীম ক্ষমতা, যাহা ব্যক্তি, সংসদ বা রাষ্ট্রের অন্তর্ভুক্ত যে কোন বস্তুর উপর অবাধভাবে প্রয়োগ করা চলে। এই ক্ষমতার বলে রাষ্ট্র তাহার এলাকার মধ্যবর্তী যে কোন ব্যক্তি বা সংসদের উপর আধিপত্য করিতে পারে ও তাহাদের নিকট হইতে অথও আহুগত্য ও বশ্যতা আদায় করিতে পারে। নিজের এলাকার মধ্যে রাষ্ট্রের এই সার্বভৌমত্ব পূর্ণ হওয়া চাই। যদি কোন রাষ্ট্র অন্য রাষ্ট্রের নির্দেশের উপর নির্ভর করে তাহা হইলে তাহার রাষ্ট্রীয় মর্যাদা ক্ষুণ্ণ হয়। সুতরাং রাষ্ট্রের এই ক্ষমতা হইল সর্বোচ্চ ক্ষমতা। ইহার উপর আর কোন ক্ষমতা নাই। এই ক্ষমতা রাষ্ট্র অন্য কোন উচ্চতর কর্তৃপক্ষের নিকট হইতে প্রাপ্ত হয় নাই। ইহা রাষ্ট্রের মৌলিক ক্ষমতা—যাহার বলে রাষ্ট্র নিজ ইচ্ছানুসারে ইহার কার্যাবলী পরিচালিত করিতে পারে, ও যে ক্ষমতার বলে এক রাষ্ট্র অন্যান্য রাষ্ট্রের নিয়ন্ত্রণ হইতে মুক্ত থাকে।

সার্বভৌমত্বের বৈশিষ্ট্য (Characteristics of Sovereignty)

প্রথমতঃ, রাষ্ট্রের এই ক্ষমতা আদিম বা মৌলিক (original) : দ্বিতীয়ত, এই ক্ষমতা কোন উচ্চতর ক্ষমতার নিয়ন্ত্রণাধীন হইতে পারে না। ইহা রাষ্ট্রের স্বৈর (absolute) ক্ষমতা। তৃতীয়তঃ, এই ক্ষমতা অসীম (unlimited)। রাষ্ট্রের এই ক্ষমতা আভ্যন্তরীণ ব্যাপার নিয়ন্ত্রণে ও বৈদেশিক ক্ষেত্রে অবাধভাবে প্রয়োগ করা হয়। চতুর্থতঃ, এই ক্ষমতা অবিভাজ্য (indivisible)। একটি মাত্র কেন্দ্রীয় প্রতিষ্ঠান হইল এই ক্ষমতার অধিকারী। একাধিক প্রতিষ্ঠান একযোগে আংশিকভাবে এই ক্ষমতার পরিচালনা করিতে পারে না। সমাজ-ব্যবস্থার ঐক্য বজায় রাখিবার নিমিত্তই সার্বভৌমত্বের এই অবিভাজ্যতা অপরিহার্য বলিয়া পরিগণিত হয়।

একই সমাজে একাধিক প্রতিষ্ঠান এই ক্ষমতার অধিকারী থাকিলে সমাজ-ব্যবস্থার কোন কিছুই চূড়ান্ত নিষ্পত্তি হইতে পারে না। ফলে, সমাজ-ব্যবস্থা ব্যাহত হইতে পারে। তাই সমাজ-ব্যবস্থার সংহতি অক্ষুণ্ণ রাখিবার নিমিত্ত সার্বভৌম শক্তির আবিভাজ্যতা প্রয়োজন। পঞ্চমতঃ, এই ক্ষমতা স্থায়ী (permanent)। রাষ্ট্র ব্যতীত এই ক্ষমতার অস্তিত্ব থাকিতে পারে না, আবার এই ক্ষমতা ব্যতীত রাষ্ট্র থাকিতে পারে না। সুতরাং রাষ্ট্রের অস্তিত্বের সহিত এই ক্ষমতা ওতপ্রোতভাবে জড়িত। শাসনযন্ত্রের পরিবর্তনে এই ক্ষমতার অস্তিত্বের কোন হানি হয় না। ষষ্ঠতঃ, এই ক্ষমতা হস্তান্তরযোগ্য নহে (inalienable)। কোন মানুষ যেমন নিজের জীবন অপরকে দান করিয়া নিজে বাঁচিয়া থাকিতে পারে না, তদ্রূপ সার্বভৌমত্ব ছাড়া রাষ্ট্রও বাঁচিতে পারে না। সার্বভৌমত্বের অবমানের সঙ্গে রাষ্ট্রের বিলুপ্তি ঘটে। কিন্তু রাষ্ট্র নিজ ইচ্ছায় তাহার ভূখণ্ডের কোন অংশ অন্য রাষ্ট্রকে হস্তান্তর করিতে পারে। এই কার্য দ্বারা রাষ্ট্রের সার্বভৌমত্বের কোন হানি হয় না। সপ্তমতঃ, রাষ্ট্রের এই ক্ষমতা আইনানুসঙ্গিত অপ্রতিষিষ্ট (imprescriptible)। দীর্ঘকাল ভোগদখল-বিশিষ্ট রাষ্ট্রের এই ক্ষমতা সাময়িক অপপ্রয়োগ বা অব্যবহারের কারণে নষ্ট হইতে পারে না।

সার্বভৌমত্বের বিভিন্ন রূপ (Different Aspects of Sovereignty)

রাষ্ট্রের সার্বভৌম ক্ষমতার প্রকৃত অধিকারী কে বা কাহারও কাহার দ্বারা এই শক্তি প্রযুক্ত হয় এ সম্বন্ধে রাষ্ট্রবিজ্ঞানীদের মধ্যে মতভেদ থাকিবার ফলে সার্বভৌম ক্ষমতার বিভিন্ন রূপ দেখা যায়। বিভিন্ন লেখকগণ বিভিন্ন দৃষ্টিভঙ্গী লইয়া ইহার আলোচনা করিয়াছেন। সেইজন্য এই ক্ষমতার প্রকারভেদ দেখা যায়।

কার্যকরী বা প্রকৃত সার্বভৌমত্ব ও নামমাত্র সার্বভৌমত্ব (Actual and Titular Sovereignty)

● রাষ্ট্রের মধ্যে যে বা যাহারা রাষ্ট্রের আদিম, স্থায়ী ও চরম ক্ষমতার অধিকারী ও যাহারা এই ক্ষমতাকে বলবৎ করিতে পারে, তাহাকে বা তাহাদিগকে বাস্তব সার্বভৌমত্বের অধিকারী বলা হয়। আর যাহার নামে

এই ক্ষমতা বলবৎ করা হয় অথচ প্রকৃতপক্ষে যিনি কার্যক্ষেত্রে এই ক্ষমতা নিজ ইচ্ছানুসারে প্রয়োগ করিতে পারেন না, তাঁহাকে নামমাত্র সার্বভৌম ক্ষমতার অধিকারী বলা হয়। সার্বভৌমত্বের এই দুইটি দিকের পার্থক্য বৃটিশ শাসন-ব্যবস্থায় বেশ পরিস্ফুট হইয়াছে। ইংলণ্ডের রাজা নামমাত্র সার্বভৌম শক্তির অধিকারী। শাসন-ব্যাপারের সকল কিছুই তাঁহার নামে কার্যকরী করা হয়। কিন্তু প্রকৃতপক্ষে ইংলণ্ডের কেবিনেট সভাই হইল প্রকৃত ক্ষমতার অধিকারী ও প্রয়োগকারী।

বাস্তব সার্বভৌমত্ব ও আইনানুমোদিত সার্বভৌমত্ব (De facto and De jure Sovereignty)

যে শক্তির বলে কোন কর্তৃপক্ষ বৈধভাবে বা অবৈধভাবে জনসাধারণের নিকট হইতে আত্মগত্যা লাভ করে ও তাহার নির্দেশ বলবৎ করিতে পারে, তাহাকে বাস্তব সার্বভৌম বলা হয়। বাস্তব সার্বভৌমত্ব আইনের দ্বারা প্রতিষ্ঠিত না হইয়া শক্তির উপর প্রতিষ্ঠিত হইতেও পারে। জনসাধারণ ভয় বা কুসংস্কারের জন্ত এই সার্বভৌম শক্তির নির্দেশ মানিতে বাধ্য হয়। আইনানুমোদিত সার্বভৌম শক্তি আইনসম্মতভাবে প্রতিষ্ঠিত হয়। এই সার্বভৌম শক্তি আইনানুমোদিতভাবে রাষ্ট্রের জনসাধারণের নিকট হইতে আত্মগত্যা দাবী করিতে পারে এবং এই সার্বভৌম শক্তির জনগণকে আদেশ দিবার ক্ষমতা আইনের উপর প্রতিষ্ঠিত। আইনানুমোদিত সার্বভৌম ক্ষমতা বৈধ উপায়ে সংগৃহীত ও আইনানুমোদিতভাবে এই ক্ষমতার প্রয়োগ হয়। অপরপক্ষে, বাস্তব সার্বভৌম ক্ষমতা বৈধভাবে সংগৃহীত নাও হইতে পারে ও আইনানুমোদিতভাবে ইহার প্রয়োগ না হইয়া বলের দ্বারা এই ক্ষমতা কার্যকরী হইতে পারে।

দ্বিতীয় মহাযুদ্ধের সময় জার্মানী পোল দেশ অধিকার করিয়া সেই দেশের চূড়ান্ত ক্ষমতার অধিকারী হইয়াছিল ও বাস্তবক্ষেত্রে জার্মান কর্তৃপক্ষ এই চূড়ান্ত ক্ষমতা সাময়িকভাবে পোল দেশে প্রয়োগ করিত। পোল দেশের অধিবাসিগণ জার্মান কর্তৃপক্ষের আদেশ ও নির্দেশ মানিতে বাধ্য হইয়াছিল। পোল দেশের জাতীয় কর্তৃপক্ষ ইংলণ্ডে আশ্রয় গ্রহণ করিয়াছিল। সুতরাং পোল দেশে অবস্থিত জার্মান কর্তৃপক্ষকে যুদ্ধকালীন অবস্থায় বাস্তব সার্বভৌম

শক্তির অধিকারী বলা যায়। কিন্তু বাস্তব ক্ষমতার অধিকারী হইলেও জার্মান কর্তৃপক্ষের ক্ষমতা আইনানুমোদিত ছিল না। উচ্চতর সামরিক শক্তির বলে তাহারা পোল জনসাধারণের নিকট হইতে আত্মগত্যা আদায় করিত। পোল দেশের জাতীয় কর্তৃপক্ষই ছিল আইনানুমোদিত সার্বভৌম শক্তির অধিকারী, যদিও সাময়িকভাবে এই কর্তৃপক্ষ বাস্তবক্ষেত্রে তাহাদের সার্বভৌম শক্তি প্রয়োগ করিতে অক্ষম ছিল। কিন্তু জার্মানীর পরাজয়ের পর আইনানুমোদিত পোল কর্তৃপক্ষ পুনরায় বাস্তব সার্বভৌম শক্তির অধিকারী হইল। স্পেন দেশে জেনারেল ফ্রাংকো প্রজাতন্ত্রী কর্তৃপক্ষকে পরাজিত ও বিতাড়িত করিয়া বলপূর্বক সার্বভৌম শক্তির অধিকারী হইয়াছিলেন। আইনানুমোদিত প্রজাতন্ত্রী কর্তৃপক্ষের ক্ষমতার অবসান হইয়া নূতন সার্বভৌম শক্তি প্রতিষ্ঠিত হইল ও বলপূর্বক এই সার্বভৌম শক্তি কার্যকরী করা হইল। নূতন কর্তৃপক্ষ আইনানুমোদিত না হইলেও বাস্তব সার্বভৌম শক্তির অধিকারী হইল। বাস্তব সার্বভৌম শক্তি কালক্রমে নির্বাচন দ্বারা জনগণের সমর্থন লাভ করিতে পারিলে আইনানুমোদিত সার্বভৌম শক্তিরূপে পরিগণিত হইতে পারে। সুতরাং দেখা যাইতেছে যে, বাস্তব ও আইনানুমোদিত সার্বভৌম শক্তি দুইটি পৃথক শক্তি নহে—সার্বভৌম শক্তির দুইটি বিভিন্ন প্রকাশ মাত্র। বাস্তব সার্বভৌম শক্তি হািয়িত লাভ করিয়া জনগণের নৈতিক সমর্থনের ফলে আইনানুমোদিত শক্তিতে পরিণত হইতে পারে, অপরপক্ষে আইনানুমোদিত সার্বভৌম শক্তি কালক্রমে কার্যকরী ক্ষমতা লাভ করিয়া বাস্তব সার্বভৌম শক্তিতে রূপায়িত হইতে পারে।

আইনগত সার্বভৌম শক্তি ও রাজনৈতিক সার্বভৌম শক্তি (Legal and Political Sovereignty)

সার্বভৌম রাষ্ট্রের প্রধান বৈশিষ্ট্য হইল, কি আভ্যন্তরীণ ব্যাপারে, আর কি বৈদেশিক ব্যাপারে—ইহার সর্বময় কর্তৃত্ব। আভ্যন্তরীণ ও বহিঃস্থ সার্বভৌমত্ব সহজে বুঝা যায়। কিন্তু আইনগত ও রাজনৈতিক সার্বভৌমত্বে জটিলতার সৃষ্টি হইয়াছে। রাষ্ট্রের মধ্যে এই সার্বভৌম শক্তির অধিকারী কর্তৃপক্ষের স্থান নির্দেশ করা একটি জটিল সমস্যা এবং এই সমস্যা সমাধানকল্পে দুইটি বিভিন্ন সার্বভৌম শক্তির উল্লেখ করা হইয়া থাকে।

জন আইন রাষ্ট্রের আইনগত সার্বভৌম শক্তিতে সমধিক গুরুত্ব আরোপ করিয়াছেন। তাহার মতে প্রত্যেক রাষ্ট্রের মধ্যে এরূপ একটি নির্দিষ্ট কর্তৃপক্ষ থাকিবেন যিনি এই চরম ক্ষমতার অধিকারী ও বাহ্যিক মাধ্যমে এই চরম ক্ষমতা বলবৎ করা হইবে। রাষ্ট্রের অস্তিত্ব ও স্থায়িত্ব নির্ভর করে জনসমষ্টিকে সুসংবদ্ধ করিয়া তাহার সমষ্টিগত ইচ্ছাকে সুনিয়ন্ত্রিতভাবে পরিচালনা করিবার উপর। সমষ্টিগত ইচ্ছাকে সুনিয়ন্ত্রিতভাবে পরিচালিত করিবার জন্য প্রত্যেক রাষ্ট্রই এক বা একাধিক ব্যক্তির সমন্বয়ে গঠিত চরম ক্ষমতাবিশিষ্ট এক কর্তৃপক্ষ থাকে। আইনের দিক দিয়া দেখিতে গেলে এই নির্দিষ্ট কর্তৃপক্ষ হইল রাষ্ট্রের সার্বভৌমত্বের অধিকারী। এই কর্তৃপক্ষের আদেশ ও নির্দেশ আইন বলিয়া অভিহিত হয় এবং রাষ্ট্রের অন্তর্ভুক্ত প্রত্যেক ব্যক্তি বা ব্যক্তিসমষ্টি এই আদেশ মানিতে বাধ্য থাকে। রাষ্ট্রের মধ্যে এরূপ সর্বজনগ্রাহ্য আইন-প্রণয়ন করিবার অধিকারী যে কর্তৃপক্ষ, তাহাকেই আইনগত সার্বভৌম বলা হয়। আইনজীবীগণ এই সার্বভৌম ক্ষমতার নির্দেশকে আইন বলিয়া গ্রহণ করেন ও বিচারালয়গুলি এই আইনের ব্যাখ্যা ও প্রয়োগ করে। এই আইনগত সার্বভৌমের নির্দেশ অযৌক্তিক বা জনমত-বিরোধী হইতে পারে কিন্তু তাহা সত্ত্বেও ইহার বৈধতাসম্বন্ধে প্রশ্ন করিবার মত কোন উচ্চতর কর্তৃপক্ষ রাষ্ট্রের মধ্যে নাই। উদাহরণস্বরূপ বলা যাইতে পারে যে, ইংলণ্ডে রাজাসহ পার্লামেন্ট সভাকে এই আইনগত সার্বভৌম শক্তির অধিকারী বলা যাইতে পারে। রাজাসহ পার্লামেন্ট সভা কর্তৃক রচিত আইন-ইংলণ্ডের সর্বত্র অবাধভাবে প্রযোজ্য।

রাষ্ট্রের সর্বোচ্চ ক্ষমতা আইনতঃ একটি নির্দিষ্ট কর্তৃপক্ষের হস্তে থাকিতে পারে কিন্তু বাস্তবক্ষেত্রে অনেক সময় দেখা যায় ভিন্ন এক কর্তৃপক্ষ এই ক্ষমতার প্রয়োগ করিতেছে। আইনগত সার্বভৌমকে সব সময় রাষ্ট্রের চরম ক্ষমতার অধিকারী বলিয়া স্বীকার করিলেও সম্পূর্ণ সত্য প্রকাশ পায় না। আইনগত সার্বভৌম শক্তির নির্দেশদানের ক্ষমতা রাষ্ট্রের অন্তর্ভুক্ত অনেক কিছুর উপর নির্ভর করে। আইন-প্রণয়ন ব্যাপারে এই আইনগত সার্বভৌম কর্তৃপক্ষকে অনেক বিষয় চিন্তা করিয়া আইন প্রণয়ন করিতে হয়। হিঙ্ক খামখেয়ালের দ্বারা পরিচালিত হইয়া আইনগত সার্বভৌম কোন আইন প্রণয়ন করিতে পারে না। সুতরাং দেখা যায় যে, আইনগত সার্বভৌম

কর্তৃপক্ষের আড়ালে এমন আর একটি শক্তি লুকায়িত আছে বাহার অভিমতকে আইনগত সার্বভৌম কর্তৃপক্ষ উপেক্ষা করিতে ঘিণা করে। আইনগত সার্বভৌম কর্তৃপক্ষের পিছনে অবস্থান করিয়া যে শক্তি আইনগত সার্বভৌমের উপর প্রত্যক্ষ ও পরোক্ষভাবে প্রভাব বিস্তার করিতেছে, সেই শক্তিকে রাজনৈতিক সার্বভৌম শক্তি বলা হয়। এই রাজনৈতিক সার্বভৌমের অধিকারী হইল রাষ্ট্রের নির্বাচকমণ্ডলী বাহাদিগকে আইনগত সার্বভৌমের স্রষ্টা বলা যাইতে পারে। আর এই রাজনৈতিক সার্বভৌমের নিকট আইনগত সার্বভৌম দায়ী। আইনগত সার্বভৌমের নির্দেশগুলি যদি যুক্তি-বিরোধী বা নীতিজ্ঞান-বিরোধী হয়, তাহা হইলে রাজনৈতিক সার্বভৌম শক্তি আইনগত সার্বভৌম কর্তৃপক্ষকে ক্ষমতাচ্যুত করিয়া পরবর্তী নির্বাচনকালে নূতন আইনগত সার্বভৌম কর্তৃপক্ষকে সৃষ্টি করিতে পারে। নানাভাবে জনমত সংগঠন ও শক্তিশালী করিয়া রাজনৈতিক সার্বভৌম শক্তি আইনগত সার্বভৌম শক্তির উপর কার্যকরী প্রভাব বিস্তার করিতে পারে। শেষ পর্বন্ত এই রাজনৈতিক সার্বভৌমের হস্তে বিদ্রোহ করিবার ক্ষমতা আছে। অগ্র পন্থা বিফল হইলে বিদ্রোহের মাধ্যমে রাজনৈতিক সার্বভৌম তাহাদের সমষ্টিগত ইচ্ছা আইনগত সার্বভৌমের উপর বলবৎ করিতে পারে। সুতরাং আইনগত সার্বভৌমকে শেষ পর্বন্ত রাজনৈতিক সার্বভৌমের নিকট নতি স্বীকার করিতেই হইবে।

কিন্তু স্মরণ রাখিতে হইবে যে, রাজনৈতিক সার্বভৌম চরম ক্ষমতার অধিকারী হইলেও কার্যতঃ তাহারা এই ক্ষমতাপ্রয়োগের অধিকারী নহে। রাজনৈতিক সার্বভৌম অর্থাৎ নির্বাচকমণ্ডলী যদি একত্রিত হইয়া সম্মিলিতভাবে কোন নির্দেশ দেয়, সেই নির্দেশ আইন বলিয়া পরিগণিত হইতে পারে না। কোন বিচারালয়ই এই নির্দেশকে আইনের মর্যাদা দিয়া সেই আইনের প্রয়োগ করিতে পারে না। রাজ্যসহ পার্লামেন্ট সভা ইংলণ্ডের আইনগত সার্বভৌম, আর নির্বাচকমণ্ডলী হইল রাজনৈতিক সার্বভৌম। রাজনৈতিক সার্বভৌম তাহাদের ইচ্ছাকে কার্যকরী করিতে গেলে আইনগত সার্বভৌমের মাধ্যমে ব্যতীত অগ্র উপায়ে করিতে পারে না। আর আইনগত সার্বভৌম রাজনৈতিক সার্বভৌমের ভোটের উপর নির্ভরশীল বলিয়া আইন-প্রণয়ন ব্যাপারে তাহাকে নির্বাচকমণ্ডলীর অভিমত সম্বন্ধে সচেতন থাকিতে হয়।

উপরি-উক্ত আলোচনা হইতে স্বভাবতঃই ইহা মনে হয় যে, রাষ্ট্রের দ্বিবিধ সার্বভৌমিকতা আছে—একটি হইল আইনগত, অপরটি হইল রাজনৈতিক। বস্তুতঃ রাষ্ট্রের সার্বভৌম ক্ষমতা একক ও অবিভাজ্য। আইনগত ও রাজনৈতিক সার্বভৌমত্ব সার্বভৌম রাষ্ট্রের দুই বিভিন্ন রূপ মাত্র। প্রথমটি আইনগ্রাহ্য। দ্বিতীয়টি আইনগ্রাহ্য নয়, স্তূতরাং আইনের চক্ষে ইহাকে সার্বভৌম বলা যুক্তিযুক্ত বলিয়া বিবেচিত হয় না।

গণ বা সার্বজনীন সার্বভৌমত্ব মতবাদ (The theory of Popular Sovereignty)

রাষ্ট্রের উৎপত্তি-বিষয়ক মতবাদগুলি আলোচনাকালে দেখা গিয়াছে যে, রাষ্ট্র স্বৈরতন্ত্র হইতে বিবর্তনের ফলে বর্তমানে গণতন্ত্রের ভিত্তিতে সুপ্রতিষ্ঠিত হইয়াছে। স্বৈরতন্ত্র হইতে রাষ্ট্রকে গণতন্ত্রে উন্নীত করিবার জন্য যতগুলি শক্তি কার্যকরী হইয়াছিল, তাহাদের মধ্যে গণ-সার্বভৌমত্ব মতবাদটি সর্বাপেক্ষা উল্লেখযোগ্য। এই মতবাদে বলা হয় যে, রাষ্ট্রের অধা, অ-প্রতিহত ও চূড়ান্ত ক্ষমতার একমাত্র অধিকারী হইল জনগণ। জনগণের ইচ্ছাই হইল রাষ্ট্রের ভিত্তি আর জনগণের নির্দেশই হইল আইন। রাষ্ট্রের মধ্যে এই গণশক্তির উর্ধ্বে অত্র কোন শক্তির অস্তিত্ব এই মতের সমর্থকগণ স্বীকার করেন না। প্রাচীন গ্রীস ও রোম দেশে এই গণ-সার্বভৌমত্ব প্রত্যক্ষ গণতন্ত্র-ব্যবস্থার মাধ্যমে আত্মপ্রকাশ করিয়াছিল।

রাষ্ট্রব্যবস্থা-প্রবর্তনের প্রথম যুগে সার্বজনীন সার্বভৌমত্বের দাবী স্বীকৃত হয় নাই। তখন কোন ব্যক্তিবিশেষ ঈশ্বরের অহুমোদিত প্রতিনিধি বলিয়া এই শক্তির অধিকারী হইতেন। কালক্রমে রাজনৈতিক চেতনা-সঞ্চারণের ফলে এই সার্বভৌম শক্তির বিকেন্দ্রীকরণ শুরু হইল। এককেন্দ্রীয় সার্বভৌমশক্তি একাধিক ব্যক্তির হস্তে লুপ্ত হইল। গণ-জাগরণের সঙ্গে সঙ্গে এই সার্বভৌম শক্তি জনগণের অধিকারে পূর্ববসিত হইল। ফরাসী লেখক রুশোর হস্তে এই গণ-সার্বভৌম মতবাদটি একটি বিশিষ্ট রূপ পরিগ্রহ করিল। রুশোর মতে জনগণই হইল রাষ্ট্রের ক্ষমতার প্রকৃত অধিকারী। সরকারের কোন নিজস্ব ক্ষমতা নাই, সরকার শুধু সাধারণের ইচ্ছাকে কার্যকরী করে। এই সাধারণ ইচ্ছা প্রয়োজন হইলে সরকারের পরিবর্তন সাধন করিতে পারে।

এই মতবাদটি একটি মহান আদর্শের উপর প্রতিষ্ঠিত। ‘জনগণের অভিমতই হইল ভগবানের অভিমত’ *Vox populi vox die*—‘Voice of the people is the voice of God’. রুশো তাঁহার যুক্তিতর্কের দ্বারা এই মতবাদটি সুপ্রতিষ্ঠিত করিয়া বর্তমান জগতে গণতন্ত্রের গোড়াপত্তনে সহায়তা করেন। আধুনিক লেখকদের মধ্যে অধ্যাপক রীচি এই মতবাদটিকে সম্পূর্ণভাবে সমর্থন করিয়াছেন। কিন্তু রীচি গণ-সার্বভৌমত্বের দাবী উচ্চতর শারীরিক শক্তির উপর প্রতিষ্ঠিত করিয়াছেন। তাঁহার মতে রাষ্ট্রের সার্বভৌমত্ব শেষ পর্যন্ত শক্তির উপর প্রতিষ্ঠিত। সমষ্টিগতভাবে জনগণের শারীরিক শক্তি সরকারের শক্তি অপেক্ষা শ্রেষ্ঠতর। সুতরাং সরকারের বলপ্রয়োগ নীতি যদি একটি সম্ভাব্য সীমা অতিক্রম করিয়া জনগণের উপর বলবৎ করা হয় তাহা হইলে জনগণও তাহাদের সমষ্টিগত ক্ষমতা প্রয়োগ করিয়া সরকারের উচ্ছেদ সাধন করিতে পারে। চূড়ান্ত বিশ্লেষণে দেখা যায় যে, জনগণ সরকার অপেক্ষা অধিক ক্ষমতালালী, সুতরাং অধিকতর ক্ষমতার অধিকারী বলিয়া জনগণের সার্বভৌমত্বের দাবী সমর্থনযোগ্য।

সমালোচনা

এই মতবাদের বিরুদ্ধে কতকগুলি যুক্তির অবতারণা করা হইয়াছে। মতবাদটির সত্যাসত্য নির্ণয় করিবার জন্ত ইহার বিরুদ্ধে প্রদর্শিত যুক্তিগুলির বিশদ আলোচনা করা প্রয়োজন। প্রথমতঃ, বলা হইয়াছে যে, হুসংবদ্ধ নাগরিক জীবনযাপন করিতে সহায়তা করা যদি রাষ্ট্রের একটি অবশ্যকর্তব্য বলিয়া বিবেচিত হয় তাহা হইলে রাষ্ট্রের মধ্যে এমন একটি নির্দিষ্ট সংগঠন থাকা দরকার বাহার নির্দেশ অল্পসারে রাষ্ট্রের অন্তর্ভুক্ত প্রত্যেক ব্যক্তির কার্যাবলী নিয়ন্ত্রিত হওয়া প্রয়োজন। নাগরিক জীবন নিয়ন্ত্রিত হয় রাষ্ট্রপ্রণীত আইনের দ্বারা। যে কর্তৃপক্ষ সর্বসাধারণের জন্ত এই আইন প্রণয়ন করিবেন, সেই কর্তৃপক্ষের একটি নির্দিষ্ট সংগঠনের মাধ্যমে আইন প্রণয়ন করিয়া সেগুলিকে হুসংবদ্ধ জীবনযাপনের জন্ত প্রয়োগ করিতে হইবে। এই কর্তৃপক্ষ-সম্বন্ধে কোনরূপ অস্পষ্টতা থাকিলে আইন-প্রণয়নে ও আইনগুলি বলবৎ করিতে অনেক অল্পবিধার সম্মুখীন হইতে হয়। সেইজন্য প্রত্যেক রাষ্ট্রে একটি করিয়া আইনসভা থাকে বাহার নির্দেশগুলি সকলে মান্য করে।

আইনসভা একটা নির্দিষ্ট ও সুস্পষ্ট সংগঠন, সুতরাং আইনসভার পক্ষে আইন প্রণয়ন করা সম্ভব, কিন্তু তাই বলিয়া একটা রাষ্ট্রের সমস্ত নাগরিক মিলিতভাবে এই আইনসভার হান অধিকার করিয়া আইন প্রণয়ন করিতে পারে না। সুতরাং এ কথা বলা যাইতে পারে যে, যেহেতু জনসমষ্টি সুসং-বদ্ধভাবে তাহাদের অভিমত ব্যক্ত করিতে অক্ষম, সেইহেতু তাহাদের অসংবদ্ধ ইচ্ছাকে আইনরূপে কার্যকরী করিয়া দৈনন্দিন জীবন নিয়ন্ত্রিত করা যায় না।

দ্বিতীয়তঃ, জনগণ সুসংবদ্ধ হইয়া যদি সুস্পষ্টরূপে তাহাদের অভিমত ব্যক্ত করিতে সক্ষম হয়, তাহা হইলেও এই জনমত আইন হিসাবে পরিগণিত হইতে পারে না। কোন বিচারালয়ই এই জনমতের নির্দেশ অনুসারে বিচারকার্য পরিচালনা করিতে বাধ্য নয়। সুতরাং গণ-সার্বভৌমত্বের দাবী সমর্থন করা যায় না।

তৃতীয়তঃ, অধ্যাপক রীচির মতে জনগণই হইল বৃহত্তর শক্তির অধিকারী, সুতরাং শক্তির পরীক্ষা দ্বারাও গণ-সার্বভৌমত্ব সমর্থিত হয়। কিন্তু কার্যক্ষেত্রে দেখা যায় যে, সরকার অস্ত্রশস্ত্র সুসজ্জিত একদল সৈনিকের সাহায্যে বহু-সংখ্যক লোককে বশতা স্বীকার করিতে বাধ্য করিতে পারে। সুতরাং জনগণকে অধিকতর শক্তির অধিকারী বলাও সম্ভব নয়।

চতুর্থতঃ, বলা হইয়াছে যে, প্রতিনিধি নির্বাচন করিয়া জনগণ তাহাদের সার্বভৌম শক্তিকে কার্যকরী করে। ভোটের দ্বারা প্রতিনিধি নির্বাচিত করিয়া জনগণ সরকার গঠন করে, আবার ভোট দ্বারাই তাহারা ইচ্ছামত সরকার পরিবর্তন করিতে পারে। সুতরাং চূড়ান্ত বিশ্লেষণে দেখা যায় যে, এই ভোটদান-ক্ষমতার মাধ্যমে জনগণ তাহাদের সার্বভৌমত্ব প্রতিষ্ঠিত করিতে সক্ষম হয়। এই যুক্তির বিরুদ্ধে বলা হয় যে, রাষ্ট্রের অতি অল্প সংখ্যক লোকই এই ভোটদান ক্ষমতার অধিকারী। বর্তমান সার্বজনীন ভোটাধিকারের যুগেও জনসমষ্টির শতকরা ৫০ জনের বেশী এই অধিকার লাভ করিতে পারে নাই। সুতরাং ভোটদান-ক্ষমতা সার্বভৌমত্বের নিদর্শন ধরিয়া লইলেও ইহাকে সার্বজনীন সার্বভৌমত্ব আখ্যা দেওয়া চলে না। আবার এই ভোট-দাতৃগণ বর্তমান দলগত রাজনীতির যুগে নিজেদের অভিমত বিসর্জন দিয়া দলীয় নেতার অভিমতের প্রতিধ্বনি করিতে বাধ্য হন। সুতরাং এ দিক

দিয়াও গণ-সার্বভৌমত্ব প্রমাণিত না হইয়া দলীয় নেতৃত্বের সার্বভৌমত্ব প্রমাণিত হয়।

সুতরাং বাস্তব দিক্ দিয়া দেখিতে গেলে গণ-সার্বভৌমত্ব মতবাদটি সমর্থনযোগ্য নয়। কোন রাষ্ট্রই জনগণ দ্বারা পরিচালিত হয় না বা পরিচালিত হইতে পারে না। জনগণ যখন রাষ্ট্রনৈতিক চেতনার দ্বারা উদ্বুদ্ধ হইয়া রাষ্ট্র গঠন করে তখন রাজনৈতিক চেতনাসম্পন্ন জনসংঘকে সার্বভৌম শক্তির অধিকারী বলা হয়। কিন্তু রাষ্ট্রনৈতিকভাবে সংঘবদ্ধ জনসমষ্টিকে রাষ্ট্র আখ্যা দেওয়া হয়, সুতরাং এ দিক্ দিয়া দেখিতে গেলেও রাষ্ট্রই হইল সার্বভৌম শক্তির প্রকৃত অধিকারী।

গণ-সার্বভৌমত্ব মতবাদের অন্তর্নিহিত সত্য হইল যে, জনমত যদি সুসংবদ্ধ হইয়া জনহিতকর কার্যের উদ্দেশ্যে পরিচালিত হয় তাহা হইলে এই জনমতের শক্তিকে কোন রাষ্ট্রই উপেক্ষা করিতে পারে না। সুসংবদ্ধ জনমত সর্বদেশে ব্যক্তি-স্বাধীনতার রক্ষাকবচ বলিয়া পরিগণিত হয়। আইনজীবীগণ এই গণ-সার্বভৌমত্বকে অস্বীকার করিতে পারেন, কিন্তু রাষ্ট্রের মধ্যে এই গণ-সার্বভৌমত্ব হইল একমাত্র শক্তি যে শক্তি সরকারের যথেষ্টাচারিতা প্রতিরোধ করিতে পারে। অধ্যাপক লাক্সির মতে গণ-সার্বভৌমত্বের প্রকৃত তাৎপর্য হইল, যে শক্তির দ্বারা জনসাধারণের স্বার্থের উৎকর্ষ সাধিত হয়, তাহাই হইল গণ-সার্বভৌম শক্তি।

জাতীয় সার্বভৌমিকতা (National Sovereignty)

ফরাসী বিপ্লবের পরবর্তী কালে ফরাসী দেশে জাতীয় সার্বভৌমিকতা তত্ত্বের জন্ম হয়। এই মতবাদে বলা হয় যে, জাতিই হইল রাষ্ট্রের সার্বভৌম ক্ষমতার আবাসস্থল ও একমাত্র অধিকারী। সামাজিক চুক্তি মতবাদ ও মাহুকের প্রাকৃতিক অধিকার মতবাদ হইতেই জাতীয় সার্বভৌমিকতা ধারণার সৃষ্টি হয়। এই মতবাদ পরোক্ষভাবে গণ-সার্বভৌমিকতা তত্ত্বের সমর্থন করিলেও কার্ষতঃ জাতীয় সার্বভৌমিকতা ও গণ-সার্বভৌমিকতা প্রকারার্থবোধক নহে। রাজনৈতিক ক্ষেত্রে জনমতের প্রভাব উপেক্ষণীয় না হইলেও আইনের দিক্ দিয়া জনমতের প্রাধান্য স্বীকৃত হয় না। আইনগত সার্বভৌমিকতা সব সময়েই সমগ্রভাবে জাতির মধ্যে নিহিত থাকে। আর

এই জাতিই হইল জনমতের উৎস। সুতরাং এই জাতীয় স্বাধীনতা ধারণার সাহায্যে জনমতকে একটা সুস্পষ্ট রূপ ও আইনসম্মত ক্ষমতা দেওয়া যাইতে পারে। কিন্তু জাতীয় সার্বভৌমিকতা তত্ত্বের বিরুদ্ধে বলা যাইতে পারে যে, এই তত্ত্বের সাহায্যে সমগ্রভাবে জাতির প্রাধান্ত ঘোষণা করা হইলেও বাস্তব ক্ষেত্রে এই ধারণার কোন কার্যকারিতা নাই। জাতীয় স্বাধীনতা একটা কল্পনামাত্র—ইহার কোন বাস্তব অস্তিত্ব নাই। সুতরাং ইহা আইন-প্রণয়নে অক্ষম।

সার্বভৌমিকতা ও শাসনতান্ত্রিক আইন (Sovereignty and Constitutional Law)

রাষ্ট্রের অবাধ সার্বভৌমিকতার বিরুদ্ধে অনেক লেখক বলেন যে, সার্বভৌমিকতা শাসনতান্ত্রিক আইন দ্বারা সীমাবদ্ধ, কেননা রাষ্ট্রীয় কার্যকলাপ শাসনতান্ত্রিক আইন অনুসারে পরিচালিত হয় এবং রাষ্ট্র এই আইন ইচ্ছামত লঙ্ঘন করিতে পারে না। কিন্তু এই মতবাদের বিরুদ্ধে বলা হয় যে, রাষ্ট্র ইচ্ছা করিলে শাসনতন্ত্র পরিবর্তন করিতে পারে। সুতরাং রাষ্ট্রের সার্বভৌমিকতা শাসনতান্ত্রিক আইনের দ্বারা সীমাবদ্ধ হইতে পারে না—শাসনতান্ত্রিক আইন প্রকৃতপক্ষে সরকারের ক্ষমতা নিয়ন্ত্রণ করে—রাষ্ট্রের নহে। শাসনতান্ত্রিক আইন সার্বভৌমের ইচ্ছার প্রকাশ মাত্র—সার্বভৌমের বাধা হইতে পারে না।

উপরি-উক্ত মতবাদের বিরুদ্ধে বর্তমানে এক শক্তিশালী মতবাদ গঠিত হইয়াছে। এই মতবাদে বলা হয় যে, সাধারণ আইন ও শাসনতান্ত্রিক আইনের মধ্যে মূলগত পার্থক্য দেখা যায়। সাধারণ আইন সাধারণ সম্প্রদায় সামাজিক আচরণ নিয়ন্ত্রণ করে এবং সেইজন্য রাষ্ট্রই এই আইন-গুলির অনুমোদন অধিকর্তা। অপর পক্ষে শাসনতান্ত্রিক আইন রাষ্ট্রের গঠন-প্রকৃতি ও ইহার আচরণ-বিধি নিয়ন্ত্রণ করে বলিয়া এই আইনের অধিকর্তা হইল সমাজ নিজে। এই মতবাদে বলা হয় যে, রাষ্ট্র সমাজের অসংখ্য সংঘের মধ্যে একটি মাত্র সংঘ—ইহার উদ্দেশ্যও সীমাবদ্ধ। এ দিক দিয়া দেখিতে গেলে রাষ্ট্র সমাজের অধীন। শাসনতন্ত্র সামাজিক সাধারণ ইচ্ছার বিশেষ রূপায়ণ ও প্রকাশ। সুতরাং রাষ্ট্র এই সামাজিক

সাধারণ ইচ্ছার দ্বারা সীমাবদ্ধ এবং শাসনতান্ত্রিক আইন রাষ্ট্রীয়ক্ষমতার প্রকৃত বাধা স্বরূপ। সুইজারল্যান্ড, মার্কিন যুক্তরাষ্ট্র প্রভৃতি অনেক দেশে শাসনতন্ত্র পরিবর্তন করিতে হইলে ভোটদাতাগণের বা বিশেষ সভার মতামত গ্রহণ করিতে হয়। ইহার দ্বারা প্রমাণ হয় যে, রাষ্ট্র ইচ্ছামত শাসনতন্ত্র পরিবর্তন করিতে পারে না। রাষ্ট্রের উর্ধ্বতন কর্তৃপক্ষ হইল সমাজ।

অস্টিনের সার্বভৌমত্ব মতবাদ (Austin's Theory of Sovereignty)

সার্বভৌমত্ব সম্বন্ধে যত লেখক আলোচনা করিয়াছেন তাঁহাদের মধ্যে অস্টিন একটি বিশিষ্ট স্থান অধিকার করিয়া আছেন। তাঁহার মতবাদ বুঝিতে হইলে একটি কথা স্মরণ রাখিতে হইবে যে, তিনি আইনবিদ ছিলেন ও আইনবিদের দৃষ্টিভঙ্গী লইয়া তিনি সার্বভৌমত্বের ব্যাখ্যা করিয়াছিলেন। তাঁহার মতে সার্বভৌমত্ব বলিতে শুধু আইনানুসঙ্গিত সার্বভৌমকে বুঝায়। অস্টিন আইনশাস্ত্রের বিশদ আলোচনা করেন ও আইনের সংজ্ঞা নির্দেশ করিতে গিয়া প্রসঙ্গক্রমে সার্বভৌমত্বের আলোচনা করেন। তাঁহার পূর্ববর্তী লেখক হব্‌স ও বেইনামকে অনুসরণ করিয়া অস্টিন আইন ও সার্বভৌমের সংজ্ঞা নির্দেশ করেন। তিনি বলেন, যদি কোন সমাজে এক নির্ধারিত উচ্চ মানবীয় কর্তৃপক্ষ (কোন নির্দিষ্ট ব্যক্তি বা ব্যক্তি-সংসদ) সমাজের অন্ত কোন উচ্চতর কর্তৃপক্ষের আনুগত্য বা বশতা স্বীকার না করেন কিন্তু এই নির্ধারিত কর্তৃপক্ষ সমাজের অধিকাংশের নিকট হইতে স্বভাবজাত আনুগত্য প্রাপ্ত হন, তাহা হইলে সেই সমাজে ঐ নির্ধারিত উচ্চতর কর্তৃপক্ষ হইলেন সার্বভৌম এবং ঐ উচ্চতর কর্তৃপক্ষকে লইয়া ঐ সমাজকে রাজনৈতিকভাবে গঠিত স্বাধীন সমাজ বলা হয়। (“If a determinate human superior, not in a habit of obedience to a like superior, receive habitual obedience from the bulk of a given society, that determinate superior is the sovereign in that society and that society, including the determinate superior, is a society political and independent.”)

অষ্টনের সার্বভৌম সংজ্ঞা বিশ্লেষণ করিলে নিম্নলিখিত বৈশিষ্ট্যগুলি দেখা যায় :

(ক) প্রত্যেক রাষ্ট্রে কোন-না-কোন ব্যক্তি বা ব্যক্তি-সংসদ লইয়া গঠিত এমন একটি কর্তৃপক্ষ থাকিবে যাহার আদেশ ও নির্দেশ আইন বলিয়া সেই সমাজে পরিগণিত হইবে। এইরূপ নির্দিষ্ট কর্তৃপক্ষই হইলেন সেই সমাজের সার্বভৌমত্বের অধিকারী। অষ্টনের মতবাদের প্রধান বৈশিষ্ট্য হইল যে, সার্বভৌম সব সময়েই সুস্পষ্টভাবে নির্দেশযোগ্য হওয়া চাই। জনমত বা ক্রোধ-প্রবর্তিত সাধারণের ইচ্ছা প্রভৃতি অ-ব্যক্তিবাচক সংজ্ঞাগুলিতে সার্বভৌমত্ব আরোপ করা চলে না।

(খ) সার্বভৌম ক্ষমতার অধিকারী হইল সমাজের উচ্চতম কর্তৃপক্ষ। এই কর্তৃপক্ষ অত্র কোন কর্তৃপক্ষের নির্দেশ দ্বারা পরিচালিত হয় না বা অত্র কোন উচ্চতর কর্তৃপক্ষের আনুগত্য স্বীকার করে না, পরন্তু সমাজের অত্র সকলে তাহার আনুগত্য স্বীকার করে। অষ্টনের মতে এই কর্তৃপক্ষই হইলেন সার্বভৌম ও এই সার্বভৌম চরম ও অসীম ক্ষমতার অধিকারী।

(গ) এই ক্ষমতার অধিকারীকে মানবীয় হইতে হইবে। এই ক্ষমতা ঈশ্বরের প্রদত্ত ক্ষমতা নয়।

(ঘ) সমাজে অধিক সংখ্যক লোক যদি সার্বভৌমের নির্দেশ পালন করে তাহা হইলেই যথেষ্ট। সার্বভৌম বলিয়া পরিগণিত হইবার জন্য সমাজের সমস্ত ব্যক্তিরই আনুগত্যের প্রয়োজন হয় না। তবে এই আনুগত্য স্বভাবজাত হওয়া চাই।

(ঙ) আইন হইল সার্বভৌমের নির্দেশ। এই নির্দেশ ছাড়া আইনের অন্ত কোন উৎস নাই।

অষ্টনপ্রদত্ত সার্বভৌমত্বের প্রধান বৈশিষ্ট্য হইল যে, সার্বভৌম ক্ষমতার অধিকারী হইবেন একটি সুনির্দিষ্ট কর্তৃপক্ষ আর এই সুনির্দিষ্ট কর্তৃপক্ষের আদেশই আইন বলিয়া পরিগণিত হয়। এই ক্ষমতা অসীম, স্থির ও অবিভাজ্য।

সমালোচনা

একাধিক লেখক অষ্টনের সার্বভৌমত্বের কঠোর সমালোচনা করিয়া এই মতবাদের অসারতা প্রতিপন্ন করিবার চেষ্টা করিয়াছেন। প্রথমতঃ,

অষ্ট্রিনের মতবাদ বর্তমান গণতন্ত্রের আদর্শ-বিরোধী। তিনি আইন-প্রণয়ন ব্যাপারে রাষ্ট্রের স্বৈরাচারী ক্ষমতা প্রতিষ্ঠিত করিয়া সার্বজনীন সার্বভৌমকে অস্বীকার করিয়াছেন। দ্বিতীয়ত, আইনামুগ সার্বভৌমের অবাধ ক্ষমতা প্রতিষ্ঠিত করিবার জন্য রাজনৈতিক সার্বভৌমকে সম্পূর্ণরূপে উপেক্ষা করিয়াছেন। আইনামুগ সার্বভৌম আইন-প্রণয়ন ব্যাপারে অবাধ ক্ষমতার অধিকারী হইলেও কার্যতঃ আইনামুগ সার্বভৌমের ক্ষমতা রাজনৈতিক সার্বভৌমের নির্দেশ দ্বারা সীমাবদ্ধ। আইনবিদগণের নিকট রাজনৈতিক সার্বভৌমের বিশেষ কোন তাৎপর্য না থাকিলেও বাস্তবক্ষেত্রে আইনামুগ সার্বভৌমের কার্যকলাপের উপর রাজনৈতিক সার্বভৌমের প্রভাব অস্বীকার করা যায় না। তৃতীয়তঃ, এই মতবাদের বিরুদ্ধে শ্রু হেনরী মেইনের সমালোচনা উল্লেখযোগ্য। তিনি বলেন যে, সার্বভৌম কোন ক্ষেত্রেও অসীম ক্ষমতার অধিকারী নয় বা হইতে পারে না। স্বৈরাচারী শাসকদিগের মধ্যে বাহাকে অধিতীয় বলা যায় এরূপ শাসককেও অনেক সময় জনমতের নিকট নতি স্বীকার করিতে হয়। কোন দেশের স্বৈরাচারী শাসকও লোকাচার এবং প্রথাগত নিয়মগুলিকে বাতিল করিতে সাহসী হয় না। মেইন পাঞ্জাব-কেশরী রণজিৎ সিংহের স্বৈরাচারী ক্ষমতা বিশ্লেষণ করিয়া বলিয়াছিলেন যে, স্বৈরাচারী শাসকের অন্ততম রণজিৎ সিংহের পক্ষে তাঁহার নিজ হুই আইন নহে এরূপ বহু প্রথাগত লোকাচার ও নিয়ম মান্ত করা ছাড়া গত্যস্তর ছিল না। চতুর্থতঃ, প্রত্যেক দেশেই এমন কতকগুলি আইন আছে যেগুলিকে সার্বভৌমের নির্দেশ বলিয়া স্বীকার করা যায় না। সরকার আইন প্রণয়ন করিয়া জনগণকে ভোটাধিকার প্রদান করেন। এই ভোটাধিকার আইনের মধ্যে নির্দেশের কোন বৈশিষ্ট্য দেখা যায় না। পঞ্চমতঃ, অষ্ট্রিনের মতানুসারে যুক্তরাষ্ট্র-ব্যবস্থায় সার্বভৌম ক্ষমতার অধিকারী একটি সুনির্দিষ্ট কর্তৃপক্ষের অস্তিত্ব সম্পূর্ণ অসম্ভব। কিন্তু যুক্তরাষ্ট্র-ব্যবস্থা সার্বভৌমবিহীন হইতে পারে না। পরিশেষে বলা যায়, অষ্ট্রিন্ একটি সুনির্দিষ্ট মানবীয় কর্তৃপক্ষের উপর সার্বভৌমত্ব আরোপ করিয়াছিলেন। সুতরাং তাঁহার মতে সার্বভৌমত্ব হইল সীমাকারের একটি প্রধান বৈশিষ্ট্য কিন্তু রাষ্ট্রবিজ্ঞানে সার্বভৌমত্ব রাষ্ট্রের প্রধান বৈশিষ্ট্য বলিয়া পরিগণিত হয়।

উপরি-উক্ত বিরুদ্ধ সমালোচনা সত্ত্বেও বলিতে হইবে যে, অষ্ট্রিনের

সার্বভৌমতত্ত্ব সম্পূর্ণ অসার নহে। অষ্টিনপ্রদত্ত মতবাদের সমালোচনা করিতে গেলে মনে রাখিতে হইবে যে, তিনি একজন আইনবিদ ছিলেন ও আইনবিদের দৃষ্টিভঙ্গী লইয়াই তিনি সার্বভৌমতত্ত্বের আলোচনা করিয়াছিলেন। সার্বভৌমতত্ত্বের আলোচনা হিসাবে পূর্ববর্তী লেখকগণ অপেক্ষা তাঁহার মতবাদের মধ্যে একটা নূতনত্ব দেখা যায়। তিনি আইনানুগ সার্বভৌমকে রাজনৈতিক সার্বভৌম হইতে পৃথক করিয়া বিশদরূপে তাহার ব্যাখ্যা করেন। অষ্টিনের পূর্বে সার্বভৌমত্ব সম্বন্ধে কোন হুম্পট ধারণা ছিল না। অষ্টিনই সর্বপ্রথম সার্বভৌমত্বের একটা নির্দিষ্ট রূপ প্রদান করেন। তাঁহার মতবাদের প্রধান ত্রুটি হইল যে, তিনি রাজনৈতিক সার্বভৌমকে উপেক্ষা করিয়া আইনানুগ সার্বভৌমেব উপর সমস্ত গুরুত্ব আরোপ করিয়াছিলেন। সুতরাং তাঁহার মতবাদ অসম্পূর্ণতা দোষে ছুটি কিস্তি ভ্রান্ত নহে।

অষ্টিনের সার্বভৌমতত্ত্বের পুনঃ সংজ্ঞা নির্দেশ (Austin's theory of Sovereignty redefined)

অষ্টিনপ্রদত্ত সার্বভৌমতত্ত্বের বিরুদ্ধে বহু বিরূপ সমালোচনার উল্লেখ করা হইয়াছে। এই সমালোচকগণের মতে অষ্টিনের সার্বভৌমতত্ত্ব মূলতঃ শক্তিভিত্তিক অর্থাৎ পশুবলের উপর প্রতিষ্ঠিত—জনগণের ইচ্ছা বা সহযোগিতার সহিত ইহার কোন সম্পর্ক নাই। জনৈক সমালোচক এ সম্পর্কে মন্তব্য করিয়াছেন যে, অষ্টিন এরূপ একটি সার্বভৌম শক্তির অবতারণা করিয়াছেন যাহার অস্তিত্ব বাস্তব কোন রাজনৈতিক সংগঠনে দেখা যায় না। এরূপ সার্বভৌম শক্তির অস্তিত্ব একমাত্র দাস ব্যবসায়ের উপনিবেশে সম্ভব।

কিন্তু অষ্টিনপ্রদত্ত সার্বভৌমতত্ত্ব সম্পর্কে এইরূপ অত্যধিক বিরুদ্ধ সমালোচনা বাস্তবতা-বঞ্চিত বলিয়া মনে হয়। একটু গভীরভাবে অষ্টিনের মতবাদ আলোচনা করিলে বুঝিতে পারা যায় যে, তিনি শুধু আইনবিদের দৃষ্টিভঙ্গী লইয়া সার্বভৌমতত্ত্বের ব্যাখ্যা করেন নাই, পরন্তু হিতবাদী আইনবিদের দৃষ্টিভঙ্গী লইয়া বিধিবদ্ধ আইনগুলির পশ্চাতে যে সমস্ত প্রভাব কার্যকরী সেগুলিরও বখাবথ অহুসঙ্কান করিয়াছিলেন। সমাজের অধিকাংশ লোক সরকারের প্রতি যে স্বভাজাত আনুগত্য প্রদর্শন করে, তাহার কারণ বিশ্লেষণ করিয়া অষ্টিন বলেন, লোকে যে অরাজকতা অপেক্ষা যে কোন

শাসনব্যবস্থা অধিকতর পছন্দ করে তাহা সমাজের অধিকাংশ লোকের সরকারের প্রতি এই স্বভাবজাত আস্থগত প্রদর্শনের দ্বারা প্রমাণিত হয়। যেহেতু একটি নির্দিষ্ট শাসনব্যবস্থা জনগণের আস্থগতের উপর প্রতিষ্ঠিত এবং যেহেতু এই আস্থগত জনগণের স্বেচ্ছা-প্রণোদিত, সেই হেতু বলা যায় যে, প্রত্যেক শাসনব্যবস্থাই জনগণের সম্মতির উপর প্রতিষ্ঠিত—শুধুমাত্র পশ্চবলের উপর প্রতিষ্ঠিত নহে। এইরূপ যুক্তি প্রদর্শন করিয়া অধ্যাপক স্টি. এন. বন্দোপাধ্যায় মহাশয় অষ্টনের সার্বভৌমতত্ত্ব সম্পর্কে পূর্ববর্তী বিরুদ্ধ মতবাদ নিরসন করিবার চেষ্টা করিয়াছেন।

সার্বভৌম ক্ষমতা কি বিভাজ্য? (Theory of Divided Sovereignty)

অধিশাসন-ব্যবস্থা (Mandated Territories), দ্বি-রাষ্ট্রীয়ত্ব শাসন-ব্যবস্থা (Condominium) প্রভৃতি উদ্ভবের ফলে সার্বভৌম শক্তির বিভাজ্যতা প্রমাণিত হয় বলিয়া অনেকের ধারণা। অধিশাসন-ব্যবস্থায় একটি পশ্চাদ্গত জাতি কয়েকটি বিষয়ে এক বা একাধিক সভ্য রাষ্ট্রের তত্ত্বাবধানে শাসিত হয়। এরূপ ক্ষেত্রে সার্বভৌম শক্তি দুইটি ভিন্ন কর্তৃপক্ষ দ্বারা পরিচালিত হয় বলিয়া মনে হয়। দ্বি-রাষ্ট্রীয়ত্ব শাসন-ব্যবস্থায় একটি রাজ্যের শাসন-ব্যবস্থা যুগপৎ দুইটি রাষ্ট্র দ্বারা মিলিতভাবে পরিচালিত হয়। সুদান দেশের শাসনকার্য যুগপৎ ইজিপ্ট ও গ্রেট ব্রিটেন কর্তৃক পরিচালিত হইত। এ ক্ষেত্রেও বলা হয় যে, সার্বভৌম ক্ষমতার অধিকারী হইল দুইটি বিভিন্ন রাষ্ট্র। যুক্তরাষ্ট্রীয় শাসনব্যবস্থা প্রবর্তিত হওয়ার পর সার্বভৌম ক্ষমতার বিভাজ্যতা সম্বন্ধে আর সন্দেহের অবকাশ রহিল না। কারণ, যুক্তরাষ্ট্র-ব্যবস্থায় জাতীয় (কেন্দ্রীয়) সরকার ও প্রাদেশিক সরকারগুলির মধ্যে ক্ষমতার ভাগ হয় ও উভয় সরকার শাসনতন্ত্র নির্ধারিত গণ্ডির মধ্যে অবাধ কর্তৃত্বের অধিকারী বলিয়া বিবেচিত হয়।

সমালোচনা

কিন্তু উপরি-উক্ত মতবাদ সম্পূর্ণ ভ্রমাত্মক। এই মতবাদের সমর্থকেরা রাষ্ট্র ও সরকারের মধ্যে রাষ্ট্রবিজ্ঞানে যে পার্থক্য নির্দেশ করা হয় সে সম্বন্ধে

সম্পূর্ণ উদাসীন বলিয়া এই ভুল ধারণা পোষণ করেন। যুক্তরাষ্ট্রীয় শাসন-ব্যবস্থায় সরকার কর্তৃক যে সমুদয় ক্ষমতা পরিচালিত হয়, সেগুলি বিভক্ত হইয়া কেন্দ্রীয় সরকার ও প্রাদেশিক সরকারের হস্তে স্তম্ভ হইয়া ও এই দুইটি সরকার শাসন-কার্যের উৎকর্ষের জন্য পরস্পরের প্রভাবমুক্ত হইয়া নির্ধারিত বিষয়গুলির উপর কর্তৃত্ব করে। যুক্তরাষ্ট্র-ব্যবস্থার প্রকৃত তথ্য হইল যে, সরকারের ক্ষমতাগুলিকে ভাগ করা হয়, রাষ্ট্রের সার্বভৌম শক্তির ভাগ হয় না। জেলিনেকের উক্তির উদ্ধৃতি করিয়া গার্পার এই মতবাদ খণ্ডন করিয়াছেন। জেলিনেকের মতে যুক্তরাষ্ট্রে শাসন-ব্যবস্থায় সার্বভৌম ক্ষমতার ভাগ হয় না। যে বিষয়গুলির উপর শাসনক্ষমতা প্রযুক্ত হয়, সেই বিষয়গুলিকে দুই ভাগে বিভক্ত করিয়া কেন্দ্রীয় সরকার ও প্রাদেশিক সরকারগুলির মধ্যে বন্টন করিয়া দেওয়া হয়। প্রত্যেক যুক্তরাষ্ট্রেই প্রতিরক্ষা, পররাষ্ট্রীয় সম্পর্ক, অর্থ সংক্রান্ত ব্যবস্থা প্রভৃতি বিষয়গুলি কেন্দ্রীয় সরকার কর্তৃক পরিচালিত হয়, আর, কৃষি, শিক্ষা, স্বাস্থ্য প্রভৃতি স্থানীয় ব্যাপারগুলির শাসন প্রাদেশিক সরকারগুলি কর্তৃক পরিচালিত হয়। সুতরাং যুক্তরাষ্ট্রে সার্বভৌম ক্ষমতার ভাগ হয় বলিলে মারাত্মক ভুল হইবে। সার্বভৌম ক্ষমতা অবিভাজ্য। ইহাকে ভাগ করিলে ইহার বিনাশ অবশ্যজ্ঞাবী।

সার্বভৌম ক্ষমতা কি সীমাবদ্ধ? (Theory of Limited Sovereignty)

অনেক লেখক রাষ্ট্রকে অসীম ও অবাধ ক্ষমতার অধিকারী আখ্যা দিতে অস্বীকার করেন। তাঁহাদের মতে রাষ্ট্রের সার্বভৌম ক্ষমতা দুই দিক দিয়া সীমাবদ্ধ। আভ্যন্তরীণ ব্যাপারে সার্বভৌম ক্ষমতা ঐশ্বরিক বিধান, জনমত ও শাসনতান্ত্রিক আইনের দ্বারা সীমাবদ্ধ, আর বৈদেশিক ব্যাপারে এই ক্ষমতা আন্তর্জাতিক আইন দ্বারা সীমাবদ্ধ।

সার্বভৌম ক্ষমতার উপরি-উক্ত বাধাগুলির প্রকৃতি বিশ্লেষণ করিলে দেখা যায় যে, কোন রাষ্ট্রই ঐশ্বরিক বিধান বা জনমত অনুসারে কার্য করিতে বাধ্য নয়। অবস্থার চাপে অনেক সময় রাষ্ট্রকর্তৃক নীতিজ্ঞানবিরোধী আইনও প্রবর্তিত ও প্রযুক্ত হয় এবং জনসাধারণও তাহা মানিয়া চলে। শাসনতান্ত্রিক আইনগুলি রাষ্ট্রীয় সরকারের কার্যকলাপের সীমারেখা স্থির করিয়া দেয় বটে,

কিন্তু রাষ্ট্র নিজ ইচ্ছা অনুসারে শাসনতন্ত্রের পরিবর্তন করিতে পারে। আর্থানীতে হিটলার শাসনভার স্বহস্তে গ্রহণ করিয়া পূর্বতন শাসনতন্ত্র বাতিল করিয়া দিয়া জনমত ও ব্যক্তি-স্বাধীনতার সমাধি রচনা করিয়াছিলেন। আন্তর্জাতিক আইনের যে বাধার উল্লেখ করা হইয়াছে তাহাও সব সময়ে কার্যকরী হয় না। আন্তর্জাতিক আইন অনুসারে পারস্পরিক সম্পর্ক স্থির করা বা না করা সম্পূর্ণরূপে রাষ্ট্রের নিজ ইচ্ছার উপর নির্ভর করে। এইজন্য আন্তর্জাতিক আইন বহুক্ষেত্রে ভঙ্গ হয়। আন্তর্জাতিক আইন বলবৎ করিবার মত উচ্চতর ক্ষমতাবিশিষ্ট কোন কর্তৃপক্ষ নাই বলিয়া আন্তর্জাতিক আইনের বাধ্যবাধকতা অনেক পরিমাণে শিথিল হইয়া পড়িয়াছে।

এই আলোচনা হইতে প্রতীয়মান হয় যে, সার্বভৌম ক্ষমতার কোন সীমা নাই। বাস্তবক্ষেত্রে শাসনকার্য পরিচালনার সুবিধার জন্য হয়ত রাষ্ট্র জনমতবিরোধী অথবা নীতিজ্ঞানবিরোধী কার্যকলাপগুলিকে সম্ভবমত পরিহার করিয়া চলে, কিন্তু আইনতঃ রাষ্ট্র সব কিছুই করিতে পারে। পারস্পরিক স্বার্থসংরক্ষণের জন্য সাধারণতঃ রাষ্ট্রগুলি আন্তর্জাতিক আইন মানিয়া চলিলেও আন্তর্জাতিক আইন বাধ্যতামূলকভাবে সার্বভৌম ক্ষমতার সীমারেখা স্থির করিয়া দেয়, একথা বলা চলে না। স্তত্রাং দেখা যায় যে, নিজ অভিকৃতি অনুসারে রাষ্ট্র অনেক সময় অবাধ ও চূড়ান্ত ক্ষমতার প্রয়োগে বিরত থাকে, কিন্তু আইনতঃ রাষ্ট্রের সার্বভৌম ক্ষমতার কোন সীমা নাই—এই ক্ষমতা অসীম, অপ্রতিহত ও চূড়ান্ত।

সার্বভৌম ক্ষমতার বহুত্ববাদ (Pluralistic Conception of Sovereignty)

রাষ্ট্রের সার্বভৌমিকতার অবাধ, অসীম ও অনিয়ন্ত্রিত ক্ষমতার প্রতিক্রিয়া-রূপে বহুত্ববাদের আবির্ভাব হয়। ব্যবহারিক জগতে যেদ্রুপ কোন বিষয়ের আতিশয্য ঘটিলে তাহার প্রতিক্রিয়া দেখা যায়, চিন্তাজগতেও তদ্রূপ কোন চিন্তাধারার আতিশয্যের ফলে প্রতিক্রিয়া দেখা দিয়া বিপরীতমুখী চিন্তাধারার প্রবর্তন হয়। উনবিংশ শতাব্দীর শেষভাগ পর্যন্ত সকল সম্প্রদায়ের রাজনীতিবিশারদগণ রাষ্ট্রকে প্রত্যক্ষ বা পরোক্ষভাবে অসীম ও অনিয়ন্ত্রিত ক্ষমতার অধিকারী বলিয়া মতবাদ প্রচার করিয়াছিলেন। ইহার

ফলে রাষ্ট্র সর্বশক্তিমান হইল এবং এই সর্বশক্তিমান রাষ্ট্রের কর্তৃত্বাধীনে ব্যক্তি-স্বাধীনতা ও সমাজের অন্ত্যস্ত সংঘগুলির অস্তিত্ব পৰ্বস্ত বিপন্ন হইয়া উঠিল। রাষ্ট্রের এই ক্ষমতা যখন চরম রূপ পরিগ্রহ করিল তখন রাষ্ট্রের অবাধ ক্ষমতার প্রতিবাদস্বরূপে বহুত্ববাদের আবির্ভাব হইল। গিয়াকি মেইটল্যাণ্ড, বার্কার, লাক্সি, ম্যাকাইডার প্রভৃতি লেখকগণ এই মতবাদের সাহায্যে রাষ্ট্রের অসীম ক্ষমতা প্রতিরোধ করিবার প্রয়াস পাইয়াছেন। তাঁহাদের মতে রাষ্ট্র অসীম ক্ষমতার অধিকারী হইতে পারে না। তাঁহার নিয়নিলিখিত বুদ্ধির অবতারণা করিয়া সার্বভৌম ক্ষমতার সীমারেখা স্থির করিতে চেষ্টা করিয়াছেন।

মানুষ সামাজিক জীব। সামাজিক মানুষের জীবন বহুমুখী। এই বহুমুখী জীবনের পূর্ণবিকাশের জন্ত রাষ্ট্রেরও বেরূপ প্রয়োজন, সমাজের অন্ত্যস্ত সংঘগুলিরও সেইরূপ প্রয়োজন আছে। তাই মানুষ পরিবার, ধর্মসংস্থা, বিশ্ববিদ্যালয়, শ্রমিকসংঘ প্রভৃতি নানাবিধ প্রতিষ্ঠান সৃষ্টি করিয়াছে। এই প্রতিষ্ঠানগুলির প্রত্যেকটির একটি উদ্দেশ্য আছে ও প্রত্যেকটি মানুষের ব্যক্তিত্ব-বিকাশের অপরিহার্য অঙ্গ বলিয়া বিবেচিত হয়। সুতরাং ব্যক্তির আত্মগত্যা শুধু রাষ্ট্রের প্রতি সীমাবদ্ধ থাকিতে পারে না। তাহাকে সমভাবেই সমস্ত প্রতিষ্ঠানগুলির আত্মগত্যা স্বীকার করিতে হয়। মানুষ শুধু নাগরিক জীবন লইয়া থাকিতে পারে না, তাহার সামাজিক, অর্থনৈতিক, ধর্মীয়, ক্রুটিগত জীবনও আছে। বহুমুখী জীবনের এই বিভিন্ন প্রয়োজন মিটাইবার জন্ত অন্ত্যস্ত প্রতিষ্ঠানগুলির উদ্ভব হইয়াছে। সুতরাং এই প্রতিষ্ঠানগুলি নানাভাবে মানুষের জীবনে উপযোগিতা সৃষ্টি করিয়া তাহার ব্যক্তিত্ববিকাশে সাহায্য করে। রাষ্ট্রও সমাজের মধ্যে এইরূপ একটি বৃহৎ প্রতিষ্ঠান, কিন্তু রাষ্ট্রকে সমাজের একমাত্র প্রতিষ্ঠান বলিয়া গণ্য করিলে মারাত্মক ভুল হইবে।

বহুত্ববাদীরা আরও বলেন যে, প্রত্যেক প্রতিষ্ঠানের ক্ষমতার একটা সীমা আছে—আর ক্ষমতার এই সীমা নির্ধারিত হয় সেই প্রতিষ্ঠানের করণীয় কার্যকলাপের দ্বারা। রাষ্ট্রের কার্যকলাপের প্রকৃতি বিশ্লেষণ করিলে ইহা প্রমাণিত হয় যে, রাষ্ট্র শুধু মানুষের বহিজীবনের একটি প্রধান অংশ নিয়ন্ত্রিত করে—মানুষের সমগ্র জীবন নিয়ন্ত্রিত করিবার ক্ষমতা রাষ্ট্রের নাই। তাই মানুষের অন্তর্জীবন ও বহিজীবনের অন্ত্যস্ত অংশ নিয়ন্ত্রিত করিবার জন্ত

সামাজিক অস্ত্রাস্ত্র সংঘগুলির সৃষ্টি হইয়াছে। রাষ্ট্র এরূপ একটি বৃহৎ প্রতিষ্ঠান, যাহা মানুষের সৃষ্ট অস্থিভূতিগুলির উপর কোন প্রভাব বিস্তার করিতে পারে না। এ সম্পর্কে ম্যাকাইভার বলেন যে, একখানি কুঠার ঘেরূপ একটি পেনসিল কাটিবার পক্ষে অহুপযোগী অস্ত্র, মানুষের অন্তর্জীবনের অতি সূক্ষ্ম অস্থিভূতিগুলির উন্নয়নে রাষ্ট্রও সেইরূপ অহুপযোগী। এই বিশ্লেষণের দ্বারা বহুত্ববাদীরা প্রমাণ করেন যে, রাষ্ট্রের কার্যকলাপ একটা নির্দিষ্ট গণ্ডির মধ্যে সীমাবদ্ধ। ক্ষমতা যদি কার্যের অহুপাতিক হয় তাহা হইলে রাষ্ট্রকার্যকলাপের একটি নির্দিষ্ট সীমা আছে বলিয়া তাহাকে অবাধ ক্ষমতা দেওয়া চলে না। সুতরাং সসীম রাষ্ট্রকে অসীম ক্ষমতার অধিকারী করা কোন মতেই যুক্তিযুক্ত নয়।

উপরি-উক্ত যুক্তির অবতারণা করিয়া বহুত্ববাদীরা রাষ্ট্রকে অসীম ক্ষমতার অধিকার হইতে বঞ্চিত করিতে প্রয়াস পাইয়াছেন। তাঁহাদের মতে একমাত্র রাষ্ট্রই সার্বভৌম ক্ষমতার অধিকারী নহে। সমাজের অন্ত্রাস্ত্র প্রতিষ্ঠানগুলি, যথা বিশ্ববিদ্যালয়, ধর্মসংগঠন, শ্রমিকসংঘ প্রভৃতি উপযোগী সংগঠনগুলিও নিজ নিজ কার্যক্ষেত্রে সম্পূর্ণ স্বাধীন ও স্বাবলম্বী। এই প্রতিষ্ঠানগুলির উপর রাষ্ট্রের একাধিপত্য করিবার কোন সম্ভব কারণ নাই। সার্বভৌম ক্ষমতা শুধু রাষ্ট্রের একচেটিয়া অধিকার বলিয়া বিবেচিত হইতে পারে না। এইরূপে বহুত্ববাদীরা রাষ্ট্রকে অস্ত্রাস্ত্র প্রতিষ্ঠানগুলির সমপর্যায়ভুক্ত করিতে চাহেন।

তাঁহাদের মতে আভ্যন্তরীণ ব্যাপারে রাষ্ট্রের অবাধ ক্ষমতা ঘেরূপ অন্ত্রাস্ত্র প্রতিষ্ঠানের অধিকার দ্বারা সীমাবদ্ধ, বৈদেশিক ব্যাপারেও রাষ্ট্রের অবাধ ক্ষমতা তদ্রূপ অন্ত রাষ্ট্রের অধিকার দ্বারা সীমাবদ্ধ। প্রত্যেক রাষ্ট্রের পক্ষে আন্তর্জাতিক আইন মানিয়া চলা বাধ্যতামূলক। আভ্যন্তরীণ ব্যাপারে রাষ্ট্র অসীম ও অপ্রতিহত ক্ষমতার অধিকারী বলিয়া পরিগণিত হইলে ব্যক্তি-স্বাধীনতা ও সমাজস্থিত অন্ত্রাস্ত্র সংঘগুলির অস্তিত্ব ঘেরূপ রাষ্ট্রের স্বৈরাচারী ক্ষমতা দ্বারা ক্ষুণ্ণ হইবার সম্ভাবনা থাকে পররাষ্ট্র সম্পর্কেও রাষ্ট্রের এই অসীম ক্ষমতা স্বীকৃত হইলে তদ্রূপ বিশ্বশান্তি বিঘ্নিত হইবার সম্ভাবনা থাকে। এই অসীম ক্ষমতার বলে শক্তিশালী রাষ্ট্র দুর্বল রাষ্ট্রের স্বাধীনতা হরণ করিতে পারে। এই ক্ষমতার অবাধ প্রয়োগ আন্তর্জাতিক

ক্ষেত্রে যুদ্ধ অনিবার্য করিয়া অরাজকতার সৃষ্টি করে। ফলে মানব সভ্যতা ধ্বংস প্রাপ্ত হয়। বিগত দুইটি বিশ্ব মহাসমর ইহার জলন্ত দৃষ্টান্ত। আভ্যন্তরীণ শান্তি ও শৃংখলার রক্ষক এবং সভ্যতার অগ্রগতির সহায়ক যে রাষ্ট্র সে রাষ্ট্রের পক্ষে আন্তর্জাতিক ক্ষেত্রে অশান্তি সৃষ্টি ও সভ্যতাবিরোধী কার্যকলাপ করিবার ক্ষমতা কোন মতেই সমর্থনযোগ্য নহে। সুতরাং কোন রাষ্ট্রবিশেষের যে সমস্ত কার্যকলাপ আন্তর্জাতিক শান্তিপরিস্থিতি বা মানব সভ্যতা-বিরোধী সে সম্পর্কে রাষ্ট্রবিশেষের সিদ্ধান্ত চূড়ান্ত বলিয়া পরিগণিত হইতে পারে না। যে সমস্ত বিষয়গুলি আন্তর্জাতিক স্বার্থ-সম্পর্কিত সে সমস্ত বিষয়গুলি সম্পর্কে চূড়ান্ত সিদ্ধান্ত করিবার ক্ষমতা কোন রাষ্ট্রবিশেষের হস্তে কোন মতেই ন্যস্ত থাকিতে পারে না। এই সমস্ত বিষয়ের সিদ্ধান্ত রাষ্ট্রসংঘ দ্বারা নির্ধারিত হইবে। সুতরাং আন্তর্জাতিক আইন বাধ্যতামূলক করিয়া রাষ্ট্রের পররাষ্ট্র-সম্পর্কিত ক্ষমতা নিয়ন্ত্রণ করা একান্ত আবশ্যিক। এইরূপে বহুত্ববাদীরা রাষ্ট্রের সাবভৌমিকতার আভ্যন্তরীণ ও পররাষ্ট্র-সম্পর্কিত ক্ষমতার সীমারেখা নির্ধারণ করেন।

সমালোচনা

বহুত্ববাদীদের মত আংশিক সত্য হইলেও সম্পূর্ণ সত্য বলিয়া গ্রহণ করা যায় না। তাঁহাদের মতে সমাজহিত প্রত্যেকটি প্রতিষ্ঠান হইল স্বাবলম্বী, স্বাধীন ও রাষ্ট্র-প্রভাবমুক্ত। তাহা হইলে জিজ্ঞাস্য হইতেছে যে, এই বিভিন্ন প্রতিষ্ঠানগুলির মধ্যে অবশ্যস্বাভাবী প্রতিদ্বন্দিতার ক্ষেত্রে সার্বভৌম রাষ্ট্রের অবর্তমানে এরূপ কোন শক্তি থাকিবে না, যাহা প্রতিষ্ঠানগুলির প্রতিদ্বন্দ্বিতা প্রশমিত করিতে সমর্থ হইবে। এই প্রতিদ্বন্দ্বিতা গুরুতর আকার ধারণ করিলে সমাজ-ব্যবস্থা ভাঙ্গিয়া পড়িবার সম্ভাবনা। এই সমালোচনার উত্তরে বহুত্ববাদীরা বলেন যে, অগ্নাজ্ঞ প্রতিষ্ঠানগুলির মধ্যে মতবিরোধ বা কলহ ঘটিলে রাষ্ট্র নিরপেক্ষ বিচারকের ভূমিকা গ্রহণ করিয়া কলহ-বিবাদে অবসান ঘটাইবে। বহুত্ববাদীরা শেষ পর্যন্ত রাষ্ট্রকে নিরপেক্ষ বিচারকের মর্যাদা দান করিয়া অন্ত্যস্ত প্রতিষ্ঠানগুলির পক্ষে রাষ্ট্রের নির্দেশ অবশ্যপালনীয় বলিয়া স্বীকার করিয়াছেন। সুতরাং বহুত্ববাদিগণ প্রত্যক্ষভাবে না হইলেও পরোক্ষভাবে রাষ্ট্রের শ্রেষ্ঠত্ব ও অগ্রাধিকার স্বীকার করিয়া লইয়াছেন। এদিক দিয়া

দেখিতে গেলে বলা যায় যে, বহুত্ববাদ দ্বারা রাষ্ট্রের সার্বভৌমিকতা সম্পূর্ণ-রূপে বিনষ্ট হয় নাই, শুধুমাত্র পরিবর্তিত হইয়াছে (modified but not rejected)।

দ্বিতীয়তঃ, বহুত্ববাদিগণের মতে ব্যক্তিস্বাধীনতার ক্ষেত্র প্রসারণের উদ্দেশ্যেই রাষ্ট্রক্ষমতার সংকোচন আবশ্যক। কিন্তু ব্যক্তিকে রাষ্ট্রে নিয়ন্ত্রণ-মুক্ত করিয়া ক্ষুদ্র ক্ষুদ্র সংঘগুলির কর্তৃত্বাধীন করিবার ফলে সংঘগুলির ক্ষমতা বৃদ্ধি পাইয়া ব্যক্তিস্বাধীনতা বৃদ্ধির পরিবর্তে সংকুচিত হইবার সম্ভাবনা অধিক।

তৃতীয়তঃ, লাক্সি পরবর্তীকালে বহুত্ববাদ সম্পর্কে তাঁহার পূর্বমত সংশোধন করিয়া বলেন যে, যতদিন পর্যন্ত উৎপাদন ব্যবস্থা সমাজতান্ত্রিক ধাঁচে পুন-বিন্যাস করিয়া শ্রেণীহীন সমাজ ব্যবস্থা গঠন না করা যায় ততদিন পর্যন্ত রাষ্ট্রের সার্বভৌমিকতা ক্ষুণ্ণ করা সমীচীন নয়।

পরিশেষে বলা যায় যে, বর্তমান রাষ্ট্রের জনকল্যাণমূলক কার্যাবলীর পরিধি এত দ্রুত প্রসার লাভ করিতেছে যে, এই কল্যাণমূলক কার্যগুলির সাফল্যের জন্য সর্বাঙ্গক কেন্দ্রীয় পরিকল্পনা অপরিহার্য। ইহা ছাড়াও বর্তমান যুগের সর্বাঙ্গক যুদ্ধের সময়ও জাতীয় স্বার্থ রক্ষাকল্পে রাষ্ট্রের অবাধ কর্তৃত্ব প্রমাণীত। সুতরাং বর্তমান যুগে বহুত্ববাদের প্রয়োগ ক্ষেত্র অতি সীমাবদ্ধ।

বহুত্ববাদের অন্তর্নিহিত সত্য হইল যে, এই মতবাদ সমাজের অন্ত্যস্ত সংঘগুলির কার্যকারিতার উপর ষষ্ঠাধোগ্য গুরুত্ব আরোপ করিয়া সেইগুলির উপযোগিতা প্রমাণিত করিয়াছে। বহুত্ববাদীরা আরও বলেন যে, এই সমাজহিতকর প্রতিষ্ঠানগুলি তাহাদের নিজ নিজ ব্যাপারে সম্পূর্ণ স্বাধীন। রাষ্ট্র বিনা কারণে তাহাদের কার্যকলাপের উপর কর্তৃত্ব করিতে পারিবে না। সুতরাং বহুত্ববাদ রাষ্ট্রের আভ্যন্তরীণ সার্বভৌমিকতার কিছু পরিবর্তন সাধন করিয়াছে—সার্বভৌমিকতাকে একেবারে বিনষ্ট করিতে পারে নাই। রাষ্ট্রের সার্বভৌমিকতা স্বীকার না করিলেও রাষ্ট্রের প্রাধান্ত তাহাদের স্বীকার করিতে হইয়াছে। কিন্তু আন্তর্জাতিক ক্ষেত্রে রাষ্ট্রগুলির মধ্যে স্থায়ী শান্তি ও সম্প্রীতি রক্ষার জন্য সার্বভৌমিকতার বিলোপ সাধন করিয়াছেন।

সার্বভৌম ক্ষমতার অবস্থিতি (Location of Sovereignty)

রাষ্ট্রের মধ্যে সার্বভৌম ক্ষমতার অবস্থিতি নির্ণয় করা এক জটিল সমস্যা।

এ সম্পর্কে বিভিন্ন লেখক বিভিন্ন মত প্রকাশ করিয়াছেন। বিভিন্ন মতগুলির সারমর্ম নিম্নে প্রদত্ত হইল :

প্রথমতঃ, বহু লেখক গণ বা সার্বজনীন সার্বভৌমত্ব প্রচার করিয়াছেন। তাঁহাদের মতে জনসাধারণই হইল সার্বভৌম ক্ষমতার প্রকৃত অধিকারী। কিন্তু পূর্বেই বলা হইয়াছে যে, জনসাধারণ এই ক্ষমতার অধিকারী হইতে পারে না বা কার্যক্ষেত্রে এই ক্ষমতা প্রয়োগ করিতে অসমর্থ। সুতরাং এই মতবাদ গ্রহণযোগ্য নহে।

দ্বিতীয়তঃ, বলা হয় যে, রাষ্ট্রের মধ্যে যে কর্তৃপক্ষ শাসনতন্ত্র পরিবর্তন ও পরিবর্তনের অধিকারী, সেই কর্তৃপক্ষই হইল রাষ্ট্রের প্রকৃত সার্বভৌম শক্তি। এই মত অনুসারে গ্রেট ব্রিটেনের রাজাসহ পার্লামেন্ট সভা হইল সার্বভৌম ক্ষমতার অধিকারী, কারণ ইহা সাধারণ আইন-প্রণয়ন-পদ্ধতিতেই শাসন-তান্ত্রিক আইন পরিবর্তন করিবার পূর্ণ অধিকারী। কিন্তু মার্কিন যুক্তরাষ্ট্রের ক্ষেত্রে জাতীয় মহাসভা কংগ্রেস বা রাজ্য আইনসভাগুলি এককভাবে শাসন-তন্ত্র পরিবর্তন করিবার অধিকারী নহে। মার্কিন যুক্তরাষ্ট্রে শাসনতন্ত্রের নিয়মতান্ত্রিক পরিবর্তন-পদ্ধতি অত্যধিক পরিমাণে জটিল। মার্কিন যুক্তরাষ্ট্রে শাসনতন্ত্র পরিবর্তনের প্রস্তাব কংগ্রেস সভার ৩ সংখ্যা সদস্যের দ্বারা অথবা রাজ্য আইনসভাগুলির ৩ সংখ্যক সদস্যের প্রস্তাবে আহৃত একটি বিশেষ সভার দ্বারা সম্মতি হইয়া রাজ্য আইনসভাগুলির ৪ অথবা আহৃত বিশেষ সভার ৫ এর সম্মতি লাভ করিলে বলবৎ হইতে পারে। মার্কিন যুক্তরাষ্ট্রে সরকারের ক্ষমতা জাতীয় সরকার ও রাজ্য সরকারগুলির মধ্যে বিভক্ত হওয়ার ফলে উভয় সরকারই শাসনতন্ত্র-নির্ধারিত গতির মধ্যে সম্পূর্ণ স্বাধীন। সুতরাং অনেক লেখক বলেন যে, যুক্তরাষ্ট্রীয় শাসনব্যবস্থায় সার্বভৌম ক্ষমতা উভয় সরকারের নিয়ন্ত্রণাধীন—সুতরাং বিভাজ্য। কিন্তু এ মতবাদ সম্পূর্ণ অশৌক্তিক। যুক্তরাষ্ট্রে উভয়বিধ সরকারের অবস্থিতি থাকিলেও একটি মাত্র রাষ্ট্রের অবস্থিতি স্থচিত হয়। যুক্তরাষ্ট্রে সরকারের ক্ষমতার ভাগ হয়, সার্বভৌম ক্ষমতা অবিভাজ্য থাকে। মার্কিন যুক্তরাষ্ট্রে কংগ্রেসসভা, রাজ্য আইনসভা বা বিশেষ আহৃত সভাগুলি সার্বভৌম ক্ষমতার অধিকারী হইতে পারে না—কারণ, এই সভাগুলি সরকারের বিশেষ কর্মবিভাগ মাত্র এবং সাময়িক কালের জন্য আহৃত হয়। অপর পক্ষে, সার্বভৌম শক্তি শুধু

অবিভাজ্য নহে—ইহা চিরন্তন। এইজন্য অধ্যাপক লাক্সি বলিয়াছেন যে, যুক্তরাষ্ট্রে সার্বভৌম ক্ষমতার অবস্থিতি নির্ণয় করা এক দুঃসাহসিক কার্য।

তৃতীয়তঃ, গেটেল রাষ্ট্রের মধ্যে অবস্থিত আইনসভাসমষ্টির উপর সার্বভৌমত্ব আরোপ করিয়াছেন। আইনসভা বলিতে অবশ্য তিনি কেন্দ্রীয়, প্রাদেশিক ও স্থানীয় আইনসভার উল্লেখ করিয়াছেন। এতদ্ব্যতীত শাসন বিভাগীয় কর্তৃপক্ষ ও বিচারবিভাগও আইন প্রণয়ন করে। অনেক দেশে ভোটদাতৃগণ গণভোট, গণ-নির্দেশাদিকার প্রভৃতি উপায়গুলির দ্বারা প্রত্যক্ষভাবে আইন-প্রণয়নকাণ্ডে অংশ গ্রহণ করে। সুতরাং গেটেলের মতে দেশের সমুদয় আইনসভা, শাসনবিভাগ, বিচারবিভাগ এবং বিশেষ ক্ষেত্রে জনসাধারণই হইল সার্বভৌম ক্ষমতার অধিকারী।

উপরি-উক্ত মতবাদ আদৌ গ্রহণযোগ্য নহে। কেন না, আইনসভা বা শাসনবিভাগ প্রভৃতি শাসনযন্ত্রের বিভিন্ন অংশ মাত্র। সার্বভৌমত্ব হইল একমাত্র রাষ্ট্রের অপরিহার্য বৈশিষ্ট্য—শাসন-যন্ত্র এই ক্ষমতার অধিকারী হইতে পারে না। সুতরাং শেষ বিশ্লেষণে দেখা যায় যে, রাষ্ট্রই হইল সার্বভৌম ক্ষমতার অধিকারী।

সংক্ষিপ্তসার

সার্বভৌমিকতা ও ইহার বৈশিষ্ট্য—রাষ্ট্রের সর্বোচ্চ, অসীম ও অপ্রতিহত ক্ষমতাকে সার্বভৌম ক্ষমতা বলা হয়। এই ক্ষমতাবলে রাষ্ট্র সকল অধিবাসী ও সংগগুলির উপরে একাধিপত্য বিস্তার করিয়া তাহাদের আত্মগত্যা আদায় করে। বৈদেশিক ব্যাপারেও রাষ্ট্র সম্পূর্ণ স্বাধীন। সার্বভৌমের বৈশিষ্ট্য হইল যে, এই ক্ষমতা অসীম, অবিভাজ্য, স্থায়ী ও অবিদ্বন্দ্ব।

সার্বভৌমত্বের বিভিন্ন রূপ—সার্বভৌম ক্ষমতার বিভিন্ন রূপ দেখা যায়, যথা প্রকৃত সার্বভৌমত্ব ও নামমাত্র সার্বভৌমত্ব। ইংলণ্ডের রাজা নামমাত্র সার্বভৌম, প্রকৃত সার্বভৌম হইল কেবিনেট সভা। দ্বিতীয়তঃ, বাস্তব ও আইনানুসঙ্গিত সার্বভৌমত্ব। আইনানুসঙ্গিত সার্বভৌম ক্ষমতার প্রকৃত অধিকারী হইলেও কার্যতঃ ক্ষমতার প্রয়োগ করিতে সমর্থ নাও

হইতে পারে। বাস্তব সার্বভৌম আইনামুখোদ্ভিত না হইয়াও কার্যতঃ ক্ষমতার প্রয়োগ করে। তৃতীয়তঃ, আইনগত ও রাজনৈতিক সার্বভৌম শক্তি। আইনগত সার্বভৌম আইন-প্রণয়নে সর্বসর্ব। হইলেও রাজনৈতিক সার্বভৌমের নিকট দায়ী। রাজনৈতিক সার্বভৌম আইনগত সার্বভৌমের স্রষ্টা হইলেও তাহাদের নির্দেশ আইনের মর্যাদা লাভ করিতে পারে না।

গণ-সার্বভৌমত্ব—এই মতবাদে জনসাধারণকে সার্বভৌম ক্ষমতার অধিকারী বলিয়া প্রচার করা হয়। এই মতবাদের প্রধান সমর্থক ছিলেন রুশো। জনগণ সার্বভৌম ক্ষমতার অধিকারী হইলেও কার্যক্ষেত্রে এই অধিকার তাহারা প্রয়োগ কবিত্তে অসমর্থ। অনেকে বলেন, ভোটদান-ক্ষমতাই হইল সার্বভৌম শক্তি-প্রয়োগের একটা পন্থা। কিন্তু এই ভোটদানের অধিকারী সকলে নয়। ইহা ছাড়া, জনগণ সমবেতভাবে তাহাদের ইচ্ছা প্রকাশ করিলেও সেই ইচ্ছা আইন বলিয়া বিচারালয় কর্তৃক গৃহীত হইতে পারে না।

গণ-সার্বভৌমত্ব প্রকৃতপক্ষে অসংবদ্ধ জনমতের বিজয় ঘোষণা করে। কোন রাষ্ট্রই জনমতের দাবী উপেক্ষা করিতে সাহসী হয় না।

অষ্ট্রিনের সার্বভৌমত্ব মতবাদ—অষ্ট্রিন আইনবিদের দৃষ্টি লইয়া সার্বভৌমত্বের বিশ্লেষণ করিয়াছিলেন। তিনি সমাজের একটি সুনির্দিষ্ট মানবীয় কর্তৃপক্ষের উপর আইনগত সার্বভৌমত্ব আরোপ করিয়া তাহার নির্দেশকে আইন আখ্যা দিয়াছিলেন। তিনি রাজনৈতিক সার্বভৌম উপেক্ষা করিয়া আইনগত সার্বভৌমকে সর্বশক্তিমান বলিয়া বর্ণনা করিয়াছিলেন। আইনগত সার্বভৌমের অস্পষ্ট ব্যাখ্যা হিসাবে গ্রহণীয় হইলেও তাহার মতবাদ সার্বভৌমত্ববিষয়ে পূর্ণাঙ্গ তত্ত্ব বলিয়া বিবেচিত হইতে পারে না।

সার্বভৌম ক্ষমতা কি বিভাজ্য?—অনেকে মনে করেন যে, যুক্ত-রাষ্ট্র-ব্যবস্থায় সার্বভৌম ক্ষমতা বিভক্ত হইয়া কেন্দ্রীয় ও প্রাদেশিক সরকার-গুলি কর্তৃক পরিচালিত হয়। কিন্তু কার্যতঃ ইহা সত্য নয়। যুক্তরাষ্ট্র-ব্যবস্থায় সার্বভৌম শক্তি স্বয়ং শাসন করিবার বিষয়গুলি ভাগ করিয়া দেয়। সার্বভৌম শক্তির কোন বিভাগ হয় না।

সার্বভৌম ক্ষমতা কি সীমাবদ্ধ?—ঐশ্বরিক বিধান, জনমত ও শাসন-তান্ত্রিক আইনকে অনেকে রাষ্ট্রের আভ্যন্তরীণ সার্বভৌম ক্ষমতার সীমা

বলিয়া মনে করেন। বৈদেশিক ব্যাপারেও আন্তর্জাতিক আইনকে রাষ্ট্রের স্বাধীনতার সীমা বলিয়া ধরা হয়। এইগুলিকে প্রকৃতপক্ষে সার্বভৌম ক্ষমতার সীমা বলা চলে না। কারণ, আইনতঃ কোন রাষ্ট্রই এইগুলি মানিতে বাধ্য নয়, তবে কার্যক্ষেত্রে অনেক সময় রাষ্ট্র তাহার কার্যকলাপ এরূপভাবে নিয়ন্ত্রিত করে যাহাতে ঐ নীতিগুলি উপেক্ষিত না হয়।

বহুত্ববাদ—রাষ্ট্রের অবাধ ও অসীম সার্বভৌম ক্ষমতার প্রতিবাদ হিসাবে এই মতবাদের উদ্ভব হইয়াছে। এই মতবাদে বলা হয় যে, রাষ্ট্র সমাজের অন্তর্বর্তী বহু সংঘের মধ্যে একটি সংঘ মাত্র। বিশ্ববিদ্যালয়, শ্রমিকসংঘ প্রভৃতির মত রাষ্ট্র একটি সামাজিক প্রতিষ্ঠান। সকল প্রতিষ্ঠানেরই সমাজ-জীবনে উপযোগিতা আছে। প্রতিষ্ঠান হিসাবে রাষ্ট্রমানব-জীবনের বহির্ভাগ নিয়ন্ত্রণ করে, স্বতরাং ইহার কার্যকারিতা সীমাবদ্ধ। কাজেই কার্যের অনুপাতে ইহা অসীম ক্ষমতার অধিকারী বলিয়া বহুত্ববাদীরা রাষ্ট্রকে সার্বভৌম ক্ষমতা হইতে বঞ্চিত করিতে চাহেন। তাহারা বলেন যে, সমাজের প্রত্যেকটি প্রতিষ্ঠান নিজ গণ্ডির মধ্যে সম্পূর্ণ স্বাধীন। এই প্রতিষ্ঠানগুলির উপর কর্তৃত্ব করিবার রাষ্ট্রের কোন অধিকার থাকিতে পারে না। কিন্তু এই মতবাদের বিরুদ্ধে বলা হইয়াছে যে, সমাজের বিভিন্ন প্রতিষ্ঠানগুলির মতবিরোধ ও বিবাদ অবসান করিবার জন্য রাষ্ট্রের প্রাধান্য অপরিহার্য।

সার্বভৌম ক্ষমতার অবস্থিতি—সার্বভৌম ক্ষমতার অবস্থিতি সম্পর্কে বহু মতভেদ দৃষ্ট হয়, বিশেষতঃ যুক্তরাষ্ট্রের ক্ষেত্রে ইহা একজটিল সমস্যা। অনেকের মতে জনসাধারণই হইল সার্বভৌম ক্ষমতার প্রকৃত অধিকারী; আবার অনেকে বলেন, যে কর্তৃপক্ষ শাসনতন্ত্র পরিবর্তনের অধিকারী, তাহারাই হইলেন প্রকৃত সার্বভৌম ক্ষমতার অধিকারী। গেটেলের মতে আইন-প্রণয়ন ক্ষমতার অধিকারী সমষ্টিকে সার্বভৌম ক্ষমতার ধারক বলা যাঠিতে পারে। কিন্তু প্রকৃত তথ্য হইল যে, সার্বভৌম ক্ষমতা অবিভাজ্য ও চিরন্তন, স্বতরাং একমাত্র রাষ্ট্রই ইহার প্রকৃত অধিকারী।

প্রশ্নাবলী

1. Differentiate between :—(i) Legal and Political sovereignty (ii) De Facto and De Jure sovereignty. (C. U. 1951)

2. Explain clearly the Doctrine of Popular Sovereignty. What are its limitations ? (C. U. 1949)
3. What are the characteristics of sovereignty ? When we speak of 'limited sovereignty', do we understand physical or legal limitations ? (C. U. Hon. 1928)
4. Discuss the question of sovereignty. (C. U. 1952)
5. What do you understand by sovereignty ? Discuss the Pluralistic criticism of the classical theory of sovereignty. (C. U. 1954)
6. Discuss the nature of sovereignty. In the light of your discussion, distinguish between legal and political sovereignty. (C. U. 1956)
7. "The state is limited within, it is also limited without" Examine the statement. Discuss in this connexion the essential attributes of sovereignty. (C. U. 1957)
8. How is *Legal Sovereignty* usually distinguished from *Political Sovereignty* ? Illustrate your answer. (C. U. 1958)
9. Discuss the nature of sovereignty, and distinguish between (a) Legal and Political sovereignty, and (b) *De Jure* and *De Facto Sovereignty*. (C. U. 1960)
10. Define sovereignty. What are its attributes ?
11. Write an analytical note on the attacks upon the Monistic Theory of Sovereignty.
12. Write a critical note on the Austinian Theory of Sovereignty.
13. Distinguish between (a) Popular Sovereignty and Political Sovereignty, and (b) *De Jure* and *De Facto* Sovereignty.
14. Distinguish between the legal and political aspects of sovereignty with examples.

পঞ্চম অধ্যায়

আইন

(Law)

আইনের সংজ্ঞা ও প্রকৃতি (Definition and Nature of Law)

‘আইন’ শব্দটি একাধিক অর্থে ব্যবহৃত হয়। সমাজ-জীবনে মানুষকে অনেক বিধি-নিষেধ মানিয়া চলিতে হয়। এই বিধি-নিষেধগুলিকে সাধারণতঃ সামাজিক আইন বলা হয়। সভ্য জীবনযাপনের জন্য মানুষকে যে নৈতিক বিধি মানিয়া চলিতে হয়, তাহাকে নৈতিক আইন বলা হয়। বিজ্ঞানবিশয়ক শাস্ত্রগুলিতে আইন শব্দটির প্রয়োগ দেখা যায়। রসায়নশাস্ত্র, পদার্থবিজ্ঞা প্রভৃতি বিজ্ঞানে কার্যকারণের সম্পর্ক বুঝাইতে ‘আইন’ শব্দটি ব্যবহৃত হইয়া থাকে। কিন্তু রাষ্ট্রবিজ্ঞানে ‘আইন’ সম্পূর্ণ ভিন্ন অর্থে ব্যবহৃত হয়।

আইনের সংজ্ঞানির্দেশে বিভিন্ন সম্প্রদায়ের লেখকগণের মধ্যে মতভেদ দেখা যায়। জন অষ্টিন ও তাঁহার অনুগামীদের মতে আইন হইল সার্বভৌমের নির্দেশ। উর্বতন কর্তৃপক্ষের আদেশ অধস্তন ব্যক্তিরা আইন বলিয়া গণ্য করিতে বাধ্য। আইন যেক্ষেপেই প্রচারিত হউক না কেন, ইহার একমাত্র উৎস হইল সার্বভৌম শক্তি। সুতরাং এই মত অনুসারে ধরা হয় যে, আইন একটা নির্দিষ্ট কর্তৃপক্ষ কর্তৃক রচিত হয় ও আইন বলবৎ করিবার জন্য এক সার্বভৌম শক্তির প্রয়োজন অপরিহার্য। এই মতবাদের সমালোচনা করিয়া হেনরি মেইন্ বলেন যে, আইন শুধুমাত্র সার্বভৌমের আদেশ বলিয়া পরিগণিত হইতে পারে না। প্রত্যেক দেশে আইনানুগ সার্বভৌম-রচিত আইন ছাড়াও নানারূপ প্রচলিত প্রথা, বিচারালয়ের সিদ্ধান্ত প্রভৃতি আইন বলিয়া অভিহিত হয়। মেইনের মতে সার্বভৌমের নির্দেশ আইনের একমাত্র

উৎস নহে। সামাজিক নানাপ্রকার শক্তির দ্বারা আইন প্রভাবিত হয়। প্রথা, আচার, ধর্মীয় বিধি-নিষেধ, বিচারালয়ের সিদ্ধান্ত প্রভৃতি নানাপ্রকার সামাজিক শক্তি আইনের পরিবর্তনে সহায়তা করে। সুতরাং আইনকে একটা স্থিতিশীল শক্তি না বলিয়া গতিশীল শক্তিরূপে পরিগণিত করা

উপরি-উক্ত সমালোচনার সহিত সামঞ্জস্য বিধানকল্পে অষ্টিনের অহুগামিগণ অষ্টিন-প্রদত্ত আইনের সংজ্ঞার কিছু পরিবর্তন করেন। তাহারা নিম্নলিখিতরূপে আইনের সংজ্ঞা নির্দেশ করেন : আইন হইল সমাজে মানুষের প্রচলিত চিন্তাধারা ও অভ্যাসের সেই অংশ, যে অংশ কতকগুলি নির্দিষ্ট নিয়মের আকারে সমাজ কর্তৃক স্বীকৃত হয় ও যে নিয়মগুলি শাসন-কর্তৃপক্ষ তাহাদের শক্তি ও প্রভাব দ্বারা বলবৎ করে।

হল্যাণ্ড-প্রদত্ত আইনের সংজ্ঞাই আইনের শ্রেষ্ঠ সংজ্ঞা বলিয়া পরিগণিত হয়। তিনি বলেন আইন হইল মানুষের বহির্জীবন-সম্পর্কিত কতকগুলি বিধি-নিষেধ, যাহা রাষ্ট্রীয় সার্বভৌম শক্তি কর্তৃক বলবৎ করা হয়। সুতরাং অষ্টিনের অহুগামিগণ দুই দিক্ দিয়া অষ্টিন-প্রদত্ত সংজ্ঞার পরিবর্তন করেন। প্রথমতঃ, আইন শুধু সার্বভৌমের নির্দেশ নয়, স্বভাবজাত প্রথা, বিচারালয়ের সিদ্ধান্ত প্রভৃতির সমাবেশে আইনের সৃষ্টি হয়। দ্বিতীয়তঃ, উর্ব্বতন কর্তৃপক্ষ আইনের স্রষ্টা নয়, এই কর্তৃপক্ষ আইন বলবৎ করে মাত্র। উর্ব্বতন কর্তৃপক্ষও আইন মানিতে বাধ্য। তাহারা আইনের আওতার বাহিরে নয়।

বর্তমানে আইনের সংজ্ঞা সম্পূর্ণ পরিবর্তিত হইয়াছে। আধুনিক লেখকগণ বলেন, আইন হইল বহির্জীবন-নিয়ন্ত্রণের কতকগুলি বিধি-নিষেধ, যাহা, জনসাধারণের সম্মতির উপর প্রতিষ্ঠিত। যে আইন জনসাধারণের সমর্থনপুষ্ট নয়, সে আইন কখনও বলবৎ করা যায় না। আইনের বাধ্য-বাদকতা নির্ভর করে আইনের প্রকৃতির উপর। আইন মান্ত করিলে ব্যক্তিগত স্বার্থ ও সমষ্টিগত স্বার্থ সংরক্ষিত হয়—এই বিবেচনা দ্বারা চালিত হইয়া সাধারণতঃ লোকে আইন মান্ত করে। যে আইন ব্যক্তির বা সমষ্টির পক্ষে

কল্যাণকর নয়, তাহা অধিকাংশ ক্ষেত্রেই লোকে মানিতে চায় না। স্বতরাং আইন মান্ত করা বা না-করা জনসাধারণের আইনের প্রকৃতিসম্বন্ধে ধারণার উপর নির্ভর করে—রাষ্ট্রের সার্বভৌম ক্ষমতার উপর নির্ভর করে না। আর রাষ্ট্র শুধু এই সার্বভৌম ক্ষমতার ধারক মাত্র। এই ক্ষমতা জনসাধারণই রাষ্ট্রকে প্রদান করিয়াছে। স্বতরাং রাষ্ট্র জনসাধারণের সম্মতি অনুসারেই এই ক্ষমতার প্রয়োগ করিতে পারে।

এখন প্রশ্ন উঠিতে পারে, আইন যদি জনসাধারণের সম্মতির অভিব্যক্তি হয় তাহা হইলে আইন মান্ত করাইবার জন্ত বলপ্রয়োগের কি প্রয়োজন? একটু প্রাণধানপূর্বক দেখিলেই এই প্রশ্নের সহুত্তর পাওয়া যাইতে পারে। রাষ্ট্রীয় আইনের বৈশিষ্ট্য হইল যে, এই আইনগুলি ব্যক্তিনির্বিচারে প্রযোজ্য। সকলেই সব সময় আইন মানিতে বাধ্য। উড্রো উইলসন্ এই সম্পর্কে বলিয়াছেন যে, আইন মানুষের চিন্তাধারার দর্পণস্বরূপ। ইহা একটি সক্রিয় শক্তি। ইহা শারীরিক ও নৈতিক শক্তির মাধ্যমে কার্যকরী হয়। মানুষের চিন্তাধারার অগ্রগতির সঙ্গে আইনেরও পরিবর্তন ঘটে। চিন্তাধারার উৎকর্ষ বা অপকর্ষ আইনে প্রতিফলিত হয়। একটা দেশের আইন বিশ্লেষণ করিলে সে দেশের তৎকালীন সামাজিক চিন্তাধারার গতি ও প্রকৃতি জানা যায়। যেহেতু আইন মানুষকে একটা নির্ধারিত পদ্ধতিতে তাহার জীবনযাত্রা পরিচালিত করিতে বাধ্য করে, সেইহেতু ইহাকে সক্রিয় শক্তি বলা হইয়াছে। আইনের অবর্তমানে মানুষ তাহার খুশিমত জীবনযাপন করিতে পারে। আইন ব্যক্তির স্বেচ্ছাচারিতা বন্ধ করে। কিন্তু প্রত্যেক সমাজে নানা স্তরের লোক থাকে। একদল নৈতিকবুদ্ধি-প্রণোদিত হইয়া কর্তব্যবোধে আইন মান্ত করে। নৈতিকজ্ঞানই তাহাদের আইন মানিতে বাধ্য করে। কিন্তু সমাজে এমন অনেক লোক থাকে যাহারা স্বার্থপ্রণোদিত বুদ্ধি দ্বারা পরিচালিত হইয়া আইন মান্ত করে। তাই যখন কোন আইন এই সমস্ত লোকের স্বার্থ-বিরোধী হয় তখন তাহারা আইন মান্ত করিতে দ্বিধা করে। এই শেষোক্ত দলের জন্তই শক্তিপ্রয়োগের প্রয়োজন। রাষ্ট্রীয় আইন সকলের উপর সমানভাবে প্রযোজ্য। যখন নৈতিক শক্তি আইন মান্ত করাইতে ব্যর্থ হয়, তখন শারীরিক শক্তির প্রয়োগে আইন বলবৎ করা অপরিহার্য হইয়া উঠে।

আইনের সমর্থন (Sanction behind Law)

উপরি-উক্ত আলোচনা হইতে ইহাই প্রতীয়মান হয় যে, আইনের সমর্থন ইহার বৈধতা ও নৈতিক মূল্যের (Validity and value) উপর নির্ভর করে। আইনের বৈধতা রাষ্ট্রের শক্তির দ্বারা বলবৎ করা হয়। আইনের বৈশিষ্ট্য হইল যে, ইহা সকলেই মান্য করিবে। যে আইন সকলে মান্য করে না, সে আইনকে সার্বজনীন বাধ্যতামূলক আইন বলা যায় না—আর যে আইন ইহার সার্বজনীন ও বাধ্যতামূলক বৈশিষ্ট্যবিহীন হয়, সে আইন প্রকৃত আইন বলিয়া পরিগণিত হইতে পারে না। কিন্তু আইনের এই সার্বজনীন ও বাধ্যতামূলক প্রকৃতি শুধুমাত্র রাষ্ট্রশক্তির উপর নির্ভর করে না। রাষ্ট্রশক্তি আইনকে বৈধ করিতে পারে, কিন্তু রাষ্ট্র কর্তৃক প্রণীত আইনের যদি কোন নৈতিক মূল্য না থাকে তাহা হইলে রাষ্ট্র শুধু বলপ্রয়োগ দ্বারা আইন বলবৎ করিতে পারে না। শুধুমাত্র শক্তিমান রাষ্ট্র কর্তৃক প্রণীত বলিয়াই লোকে আইন মান্য করে না—আইন গ্রাহ্যবোধের উপর প্রতিষ্ঠিত—আইন সার্বজনীন স্বার্থের ধারক ও রক্ষক—এই ধারণার দ্বারা পরিচালিত হইয়াই লোকে আইন মানে। সুতরাং যে আইন যত পরিমাণে নীতিজ্ঞানের উপর প্রতিষ্ঠিত হইবে, সে আইন ততই সার্বজনীন ও বাধ্যতামূলক হইবে। সুতরাং আইনের বৈধতা নীতিজ্ঞান-নিরপেক্ষ নহে। আইনের নৈতিক মূল্যই ইহাকে বৈধ করিতে সাহায্য করে। সুতরাং আইনের সার্বজনীন ও বাধ্যতামূলক প্রকৃতি অর্থাৎ সমর্থন ইহার বৈধতা ও নৈতিক মূল্যের উপর একান্ত-ভাবে নির্ভর করে।

আইনের উৎস (Sources of Law)

আইনের প্রকৃতি বিশ্লেষণ করিলে দেখা যায়, কোন দেশেরই প্রচলিত আইন শুধু রাষ্ট্র কর্তৃক সৃষ্ট হয় নাই। নানাবিধ সামাজিক শক্তি আইন-গঠনে কার্যকরী হইয়াছে। কিন্তু আইনের উৎস যাহা হউক না কেন, প্রত্যেকটি আইন রাষ্ট্রের সার্বভৌম শক্তি কর্তৃক প্রচারিত, স্বীকৃত ও কার্যকরী হওয়া চাই। আইন-গঠনে নিম্নলিখিত শক্তিগুলি কার্যকরী হইয়াছে :

১। প্রথা (Custom)

প্রত্যেক দেশের প্রচলিত আইনগুলির মধ্যে কতকগুলির প্রথাগত বিধি-নিষেধ দেখা যায়। এই প্রথাগুলি আইনামুগ্ধ সার্বভৌম কর্তৃক রচিত হয় না। ইহারা আপনা হইতেই প্রয়োজনের তাগিদে গড়িয়া উঠে। রাষ্ট্র-উদ্ভবের পূর্ব হইতে এগুলি ধীরে ধীরে প্রবর্তিত হইয়া মানুষের সমাজ-জীবনকে নিয়ন্ত্রিত করে। রাষ্ট্র-উদ্ভবের পরবর্তী কালে এই প্রচলিত প্রথার অনেকগুলি রাষ্ট্র কর্তৃক স্বীকৃত হয়। এই স্বীকৃতির ফলেই প্রথাগুলি আইনের মর্যাদা প্রাপ্ত হয়।

২। ধর্ম (Religion)

প্রথার মতই ধর্মীয় আইনগুলিও আইন-সৃষ্টিতে সহায়তা করিয়াছে। এই অনুশাসনগুলি সমাজ-জীবনকে নানাভাবে সুসংবদ্ধ করিয়া সমষ্টিগত জীবনে শৃঙ্খলা ও নিয়মানুবর্তিতার শিক্ষা দিয়াছে। এই অনুশাসনগুলি রাষ্ট্রীয় ব্যাপার পরিচালনার কার্যে সহায়ক বলিয়া রাষ্ট্র এগুলিকে সমর্থন করিয়া আইনের মর্যাদা দিয়াছে। হিন্দু ও মুসলমান উভয় সমাজের আইনের মধ্যে ধর্মীয় অনুশাসন একটা বিশিষ্ট স্থান অধিকার করিয়াছে।

৩। বিচারালয়ের সিদ্ধান্ত (Adjudication)

বিচারালয়ের আইনসম্পর্কিত সিদ্ধান্তগুলিও নূতন আইনের সৃষ্টিকার্যে অনেক সাহায্য করিয়াছে। বিচারকেরা শুধু আইনের প্রয়োগ করেন না, তাঁহারা প্রয়োজনমত আইনের ব্যাখ্যা ও বিশ্লেষণ করেন। আইনের অর্থ যদি স্পষ্ট না হয় তাহা হইলে বিচারকেরা ব্যাখ্যা করিয়া আইনের যে সিদ্ধান্ত করেন তাহাই সঠিক আইন বলিয়া পরিগণিত হয়। একজন বিচারক কর্তৃক ব্যাখ্যাত আইনের সিদ্ধান্ত যখন অন্যান্য বিচারকগণ কর্তৃক অনুসৃত হয়, তখন এই নূতন সিদ্ধান্ত আইনে পরিণত হয়।

৪। ত্রাণপরতা (Equity)

আইনের অসম্পূর্ণতার জন্ত অনেক সময় বিচারকদের নিজেদের ত্রাণ ও বিবেকবুদ্ধি প্রয়োগ করিয়া বিচারকার্য পরিচালনা করিতে হয়। বিচারকার্য

যাহাতে শাস্ত্রধর্ম অহুসারে পরিচালিত হয়, সেজন্য বিচারকেরা এই নীতি অহুসরণ করিয়া থাকেন। এই শাস্ত্রধর্মের ভিত্তিতেও অনেক আইনের সৃষ্টি হইয়াছে। সুতরাং বিচারকগণ দুই প্রকারে আইন সৃষ্টিতে সহায়তা করেন। প্রথমতঃ, আইনের ব্যাখ্যা দ্বারা ও দ্বিতীয়তঃ, আইন-প্রয়োগে শাস্ত্রধর্মের অহুসরণ করিয়া।

৭

৫। আইনবিদগণের আলোচনা (Scientific discussion)

অভিজ্ঞ আইনবিদগণ তাঁহাদের ব্যাখ্যা-বিশ্লেষণ দ্বারা অনেক সময় নূতন আইনের সৃষ্টি ও প্রচলিত আইনের পরিবর্তন বা পরিবর্ধনের সহায়তা করেন। সমষ্টিগত জীবনে কোন্টি আইনরূপে পরিগণিত হওয়া উচিত ও কোন্টি বর্জনীয় এ বিষয়ে আইনবিদ পণ্ডিতগণের সিদ্ধান্ত প্রায় সকল সভ্য দেশেই মানিয়া লওয়া হয়। রাষ্ট্রের স্বীকৃতি ও সমর্থন লাভ করিয়া এই সিদ্ধান্তগুলি আইনে পরিণত হয়।

৬। আইন-প্রণয়ন (Legislation)

অধুনা আইন-পরিষদই আইনের প্রধান উৎস বলিয়া বিবেচিত হয়। আইন পরিষদ নির্ধারিত পদ্ধতিতে আইন প্রণয়ন করিয়া রাষ্ট্রপরিচালন কার্য সহজ করিয়াছে।

ওপেনহাইম, হল্ প্রভৃতি প্রসিদ্ধ আইনবিদ পণ্ডিতগণ উপরি-উক্ত বিষয়-গুলিকে আইনের বিভিন্ন উৎস বলিয়া গণ্য করিতে আপত্তি করেন। তাঁহাদের মতে জনসাধারণের সমবেত ইচ্ছাই হইল আইনের প্রধান উৎস। এই সমবেত ইচ্ছার বহিঃপ্রকাশ নানা প্রণালীতে হইতে পারে। রাষ্ট্রনৈতিক চেতনাবিহীন মানব-সমাজে এই সমবেত ইচ্ছা প্রথা বা ধর্মীয় অহুশাসনের মাধ্যমে প্রকাশিত হয়। সমাজ যখন রাষ্ট্রনৈতিক ভিত্তির উপর প্রতিষ্ঠিত হয়, তখন এই সমবেত ইচ্ছা প্রতিনিধিমূলক আইন-পরিষদের মাধ্যমে আইনরূপে প্রকাশিত হয়। সুতরাং উক্ত পণ্ডিতগণের মতে প্রথা, ধর্মীয় অহুশাসন, বিচারকের সিদ্ধান্ত প্রভৃতিকে আইনের উৎস না বলাই যুক্তিসম্মত।

রাষ্ট্রীয় আইন ও অন্যান্য আইন

প্রাকৃতিক আইন (Law of Nature)

সামাজিক চুক্তিমতবাদ আলোচনাকালে দেখা গিয়াছে যে, অনেক লেখক রাষ্ট্র-জন্মের পূর্বে মানুষ যে পরিবেশে বাস করিত তাহাকে প্রাকৃতিক পরিবেশ অথবা প্রকৃতির রাজ্য বলিয়া আখ্যা দিয়াছেন। এই প্রাকৃতিক পরিবেশে মানুষ যে সমস্ত আইন মান্ত করিত সেগুলিকে প্রাকৃতিক আইন বলিয়া বর্ণনা করা হইয়াছে।

গ্রীক দার্শনিকদের লেখার মধ্যে এই প্রাকৃতিক নিয়মের প্রথম উল্লেখ দেখা যায়। তাঁহাদের মতে প্রকৃতির রাজ্যে যে নিয়মানুবর্তিতা ও সামঞ্জস্য বিद्यমান, মানবসমাজের নিয়মগুলি ঐ ভিত্তির উপর প্রতিষ্ঠিত হওয়া উচিত। মনুষ্যকৃত আইনগুলি প্রাকৃতিক নিয়মগুলির অমুরূপ হইলে সেগুলিকে প্রাকৃতিক নিয়ম বলা হইত। প্লেটো ও অ্যারিস্টটল্ উভয়েই প্রাকৃতিক আইনের নজির দেখাইয়া তাঁহাদের অনেক মতবাদ সমর্থনের প্রয়াস পাইয়াছিলেন। ষ্টোয়িক দার্শনিকগণ প্রাকৃতিক নিয়মগুলির বিশদ ব্যাখ্যা করেন। তাঁহাদের মতে প্রকৃতির রাজ্যে যে সামঞ্জস্য-সমন্বিত নিয়ম বিद्यমান, মানুষের বিবেকবুদ্ধি ও যুক্তি দ্বারা সেগুলির ব্যাখ্যা করিয়া সমাজোপযোগী করিতে হয়। বিবেকবুদ্ধি দ্বারা ব্যাখ্যাত প্রাকৃতিক নিয়মগুলি এইরূপে আইনের মর্যাদা পায়। রোমকগণ এই প্রাকৃতিক আইনের ভিত্তিতে তাঁহাদের আন্তর্জাতিক আইন (*Jus gentium*) সৃষ্টি করেন। উহা বর্তমান যুগে পূর্ণ আন্তর্জাতিক আইনরূপে গণ্য হয়।

প্রাকৃতিক নিয়মের বিপক্ষে এই যুক্তি দেখান হয় যে, ইহার পশ্চাতে কোন আইনের অমুমোদন নাই। শুধুমাত্র নৈতিক অমুমোদনের উপর প্রতিষ্ঠিত বলিয়া এই নিয়মগুলি কার্যকরী করা যায় না। প্রাকৃতিক নিয়মগুলি একটা নৈতিক আদর্শের মান স্থির করে। কিন্তু মানুষের দৈনন্দিন কার্যকলাপে এই নৈতিক মান বলবৎ করা সম্ভবপর নয়।

● প্রাকৃতিক নিয়মের এই ক্রটিসত্ত্বেও বাস্তব রাষ্ট্রীয় ব্যাপারে এই নিয়মগুলির প্রভাব প্রভূত পরিমাণে অনুভূত হয়। জুরির দ্বারা বিচারপদ্ধতি, বিচারকালে বিচারকদের ত্রায় ও ধর্মনীতি অনুসরণ, আন্তর্জাতিক আইনের

ক্রমবর্ধমান প্রভাব প্রভৃতিকে প্রাকৃতিক নিয়মেরই পরোক্ষ প্রয়োগ বলা যাইতে পারে।

সামাজিক আইন (Social Law)

সামাজিক আইনগুলি মানুষের সমষ্টিগত জীবনের কার্যকলাপের একটা মান-স্থির করিয়া দেয়। প্রত্যেক সমাজেই এইরূপ কতকগুলি নিয়ম থাকে যাহা সমাজভুক্ত ব্যক্তিমাঝেই সাধারণতঃ মানিয়া চলে। জন্ম, মৃত্যু, বিবাহ প্রভৃতি ব্যাপারে কতকগুলি নিয়ম প্রত্যেক সমাজে দেখিতে পাওয়া যায়, কিন্তু রাষ্ট্রীয় আইন এগুলি সম্পর্কে সাধারণতঃ নিরপেক্ষ। কিন্তু বর্তমান যুগে প্রগতিশীল রাষ্ট্রগুলি বহু ক্ষেত্রে আইন প্রণয়ন করিয়া মানুষের পূর্বতন সামাজিক ব্যবস্থার পরিবর্তন সাধন করিতেছে। মানুষের সামাজিকতা-বোধের উপরই প্রধানতঃ ইহার অহুমোদন নির্ভর করে।

ধর্মীয় আইন (Religious Law)

ধর্মীয় আইন বলিতে ধর্মের কতকগুলি অহুমোদন বুঝায়। প্রত্যেক ধর্মের বিভিন্ন অহুমোদন থাকে। এই অহুমোদনগুলি সাধারণতঃ সংশ্লিষ্ট ধর্মাবলম্বীসম্প্রদায়ের মানিয়া চলেন। কেহ যদি এই অহুমোদনগুলি অমান্য করেন তাহা হইলে তিনি নিন্দনীয় হইবেন, অথবা সংশ্লিষ্ট ধর্মাবলম্বীসম্প্রদায়ের দ্বারা সমাজচ্যুত হইবেন। কিন্তু এজন্ত রাষ্ট্র তাঁহাকে কোনরূপ দৈহিক শাস্তি প্রদান করিবে না। ধর্মীয় অহুমোদন পালন করা বা না করা সম্পূর্ণরূপে ব্যক্তিগত ইচ্ছার উপর নির্ভর করে। গণতান্ত্রিক আদর্শ প্রতিষ্ঠিত হইবার ফলে ধর্মের বন্ধন সকল সমাজেই শিথিল হইয়া পড়িতেছে।

নৈতিক আইন (Moral or Ethical Law)

সমাজবদ্ধ হইয়া বাস করিতে হইলে প্রত্যেক মানুষের অপরাপর লোকের সম্পর্কে আসিতে হয়। দৈনন্দিন জীবনে মানুষের এই পারস্পরিক সম্পর্ক কতকগুলি বাস্তব কার্যকরী নিয়ম দ্বারা নিয়ন্ত্রিত হয়। এই বাস্তব নিয়মগুলি ছাড়া আরও অনেকগুলি নিয়মের কল্পনা করা যায়, যে নিয়মগুলি সারা মানুষের এই পারস্পরিক সম্পর্ক একটা আদর্শ ভিত্তির উপর প্রতিষ্ঠিত হইতে পারে। শেষোক্ত এই নিয়মগুলি মানুষের ঐচ্ছিকবোধ ও নীতিজ্ঞানের দ্বারা

নির্ধারিত হয়। শুধুমাত্র জীবন ধারণ করা মানবজীবনের চরম উদ্দেশ্য নয়। মানুষ চায় যাহাতে তাহার নৈতিক জীবনেরও উৎকর্ষ সাধিত হয়। নৈতিক জীবনে উৎকর্ষ লাভ করিতে হইলে মানুষের নীতিসম্মত জীবনযাপন করিতে হইবে। এইজন্য প্রত্যেক সমাজে মানুষের ঔচিত্যবোধকে ভিত্তি করিয়া কতকগুলি বিধি-নিষেধ সৃষ্ট হইয়াছে। এই বিধি-নিষেধগুলি মানুষের চিন্তাধারা ও কার্যকলাপের আদর্শ মান স্থির করিয়া দেয়। নীতিজ্ঞানের উপর প্রতিষ্ঠিত বলিয়া এইগুলিকে নৈতিক আইন বলা যায়।

আইন ও নৈতিক নিয়মের সম্পর্ক (Relation between Law and Morality)

রাষ্ট্রপ্রবর্তিত আইন ও নৈতিক আইনের মধ্যে পার্থক্য সুস্পষ্ট। আইন শুধু মানুষের বহির্জীবন নিয়ন্ত্রণ করে, অপর পক্ষে মানুষের নৈতিক ধারণা তাহার সমগ্র জীবনকে—চিন্তাধারা, কার্যকলাপের উদ্দেশ্য ও বাস্তব কার্য-কলাপ নিয়ন্ত্রিত করে। সুতরাং নৈতিক আইনের কার্যক্ষেত্র ব্যাপকতর। দ্বিতীয়তঃ, রাষ্ট্রপ্রবর্তিত আইন শক্তিপ্রয়োগে বলবৎ করা হয়। আইন-ভঙ্গকারী শাস্তি পায়, কিন্তু নৈতিক অপরাধ রাষ্ট্র কর্তৃক দণ্ডনীয় নয়। নৈতিক অপরাধীকে শুধু বিবেকদংশন অথবা লোকনিন্দা সহ্য করিতে হয়। তৃতীয়তঃ, রাষ্ট্রপ্রবর্তিত আইন সুসংবদ্ধ ও সুস্পষ্ট এবং ব্যক্তিনির্বিচারে সব সময়ে প্রযোজ্য, কিন্তু নৈতিক নিয়মগুলি সুসংবদ্ধ বা সুস্পষ্ট নয় এবং দেশ-কাল-পাত্র-ভেদে এগুলি সম্বন্ধে মানুষের ধারণার পরিবর্তন ঘটে ও প্রয়োগেরও ব্যতিক্রম হয়। চতুর্থতঃ, নৈতিক নিয়মগুলি মানুষের ঔচিত্য, অনৌচিত্য, স্তায় ও অন্তায়বোধের একটা নির্দিষ্ট মান দ্বারা নির্ধারিত হয়। রাষ্ট্রীয় আইনের ক্ষেত্রে এরূপ কোন নির্দিষ্ট মান নাই। সাধারণের সুবিধা-অসুবিধা বিবেচনা করিয়া রাষ্ট্রীয় আইন প্রবর্তিত হয়। রাষ্ট্রীয় আইন নৈতিক জ্ঞানের উপর সব সময়ে প্রতিষ্ঠিত হয় না। অকৃতজ্ঞতা, বিদ্বৈষবুদ্ধি প্রভৃতি নৈতিক অপরাধ, কিন্তু এগুলি দণ্ডনীয় অপরাধ বলিয়া বিবেচিত হয় না। রাষ্ট্রিকালে বাড়ি না জালিয়া দ্বিচক্রবান চালনা করা নৈতিক অপরাধ না হইলেও বে-আইনী বলিয়া ঘোষিত। যুদ্ধকালে গৃহের অভ্যন্তরস্থিত আলোক অনাচ্ছাদিত রাখা দণ্ডনীয় অপরাধ, কিন্তু শান্তির সময়ে উহা অপরাধ বলিয়া

গণ্য হয় না। সুতরাং দেখা যায় যে, নীতিবিগর্হিত বলিয়াই যে মানুষের আচরণ বেআইনী ঘোষিত হয় সব সময়ে তাহা সত্য নহে। জনস্বার্থসংরক্ষণের জন্য রাষ্ট্র মানুষের অনেক আচরণকে বে-আইনী ঘোষণা করিতে পারে।

অনেক লেখক বলেন যে, রাষ্ট্রের অস্তিত্ব ও অখণ্ডতা রক্ষাকল্পে রাষ্ট্র যে-কোন আইন—এমন কি নীতিজ্ঞানবিরোধী আইনও প্রবর্তিত করিতে পারে। (“The safety of the state is its first law and to realise this end it must be above morality.”) কিন্তু এই মতবাদ বিনা শর্তে গ্রহণ করা যায় না। ব্যক্তির তায় রাষ্ট্রেরও নিম্ন অস্তিত্ব ও স্বাধীনতা রক্ষা করিবার সম্পূর্ণ অধিকার আছে মানিয়া লইলেও রাষ্ট্রকে অবাধ ক্ষমতার অধিকারী বলিয়া স্বীকার করা যায় না। অস্তিত্ব ও অখণ্ডতা রক্ষা করিবার নিমিত্ত রাষ্ট্র সাময়িকভাবে নীতিজ্ঞানবিরোধী আইন প্রবর্তন করিতে পারে। কারণ, ব্যক্তি-স্বাধীনতার রক্ষক হইল রাষ্ট্র ও সেই রাষ্ট্রের অস্তিত্ব যদি বিপদাপন্ন হয় তাহা হইলে ব্যক্তি-স্বাধীনতারও অবসান ঘটিতে পারে; এইরূপ বিবেচনা করিয়া রাষ্ট্রকে আপংকালে বিশেষ ক্ষমতার অধিকারী বলিয়া স্বীকার করিতে কোন আপত্তির কারণ থাকিতে পারে না। সেইজন্য অন্তর্বিপ্লব অথবা যুদ্ধকালীন অবস্থায় রাষ্ট্র অনেক নীতিজ্ঞানবিরোধী আইনের বলে স্বীয় অস্তিত্ব বজায় রাখিতে সক্ষম হয়। কিন্তু স্বাভাবিক অবস্থায় ব্যক্তিগত সম্পত্তির অবাধ অধিকার বা বিভালয়গৃহকে আন্তাবলে পরিণত করিবার অধিকার প্রভৃতি নীতিজ্ঞানবিরোধী আইন-প্রণয়নের ক্ষমতা রাষ্ট্রকে দেওয়া যাইতে পারে না। এইরূপ অবাধ ক্ষমতার বলে রাষ্ট্র স্বৈরাচারী হইয়া ব্যক্তি-স্বাধীনতার সমাধি রচনা করিতে পারে। সুতরাং রাষ্ট্রের নীতিজ্ঞান-বিরোধী আইন করিবার অধিকার শর্তসাপেক্ষ।

এতগুলি পার্থক্য থাকা সত্ত্বেও বলিতে হইবে যে, নৈতিক নিয়ম ও আইনের মধ্যে ঘনিষ্ঠ সম্পর্ক আছে। উভয় নিয়মই মানুষের ধর্মগত ধারণা হইতে উদ্ভূত হইয়াছে। মানুষের নৈতিক জ্ঞান রাষ্ট্রপ্রবর্তিত আইনের মধ্যে প্রতিকলিত হয়। রাষ্ট্রপ্রবর্তিত কোন আইন যদি প্রচলিত নীতিজ্ঞানবিরোধী হয় অথবা প্রচলিত নীতিজ্ঞান হইতে বেশী অগ্রবর্তী বা পশ্চাদ্গত হয়, তাহা হইলে সে আইন লোকে মান্ত করে না। সুতরাং প্রচলিত নীতিজ্ঞানের সহিত সামঞ্জস্য রাখিয়া রাষ্ট্রের আইন প্রবর্তন করা প্রয়োজন। রাষ্ট্রের প্রধান উদ্দেশ্য

হইল মানুষের নৈতিক উৎকর্ষসাধনে সহায়তা করিয়া স্ব-নাগরিক সৃষ্টি করা। স্বতরাং রাষ্ট্রের কর্তব্য হইল এমন আইন সৃষ্টি করা যেগুলি মানুষের নৈতিক জীবনের উন্নতিসাধন করিয়া তাহাদের মধ্যে বিচারবুদ্ধি সঞ্চারিত করিতে পারে। এইজন্য অনেক সময় রাষ্ট্রকে পুরাতন আইন বা সামাজিক আচার-প্রথার সংস্কার অথবা বিলোপসাধন করিয়া নতন আইন প্রবর্তন করিতে হয়। নতন আইনের দ্বারা রাষ্ট্র মানুষের ঐচ্ছিক্যবোধ বৃদ্ধি করাইতে পারে। উদাহরণস্বরূপ বলা যাইতে পারে, যে, প্রায় এক শতাব্দী পূর্বে লর্ড উইলিয়াম বেন্টিক তৎকালে প্রচলিত সতীদাহ-প্রথা বে-আইনী বলিয়া ঘোষণা করিয়া তাহার বিলোপসাধন করেন। আইনের দ্বারা এই কু-প্রথার বিলোপসাধন হওয়াতে কালক্রমে লোকের নৈতিক বুদ্ধিও পরিবর্তিত হইতে লাগিল। সতীদাহ-প্রথা শুধু বে-আইনী হওয়ায় পরিত্যক্ত হইয়াছে বলিয়া বর্তমান কালের লোকে বিবেচনা করে না—তাহারা মনে করে এই প্রথা নীতি-বিগর্হিত, তাই পরিত্যক্ত হইয়াছে। স্বতরাং আইনের মাধ্যমে লোকের নীতিজ্ঞান বৃদ্ধি করা রাষ্ট্রের কর্তব্য। নৈতিক নিয়ম ও রাষ্ট্রীয় আইনের মধ্যে সীমারেখা সর্বত্র সুস্পষ্ট নহে।

আন্তর্জাতিক আইন (International Law)

ব্যক্তিগত জীবনে প্রত্যেক মানুষের যেমন অপরাপর লোকের সংস্পর্শে আসিতে হয়, বর্তমান যুগে প্রত্যেক রাষ্ট্রেরও তদ্রূপ অপরাপর রাষ্ট্রের সংস্পর্শে আসিতে হয়। তাহার কারণ হইল কোন রাষ্ট্রই স্বয়ংসম্পূর্ণ নয়। এক রাষ্ট্রকে অর্থনৈতিক, রাজনৈতিক প্রভৃতি নানা কারণে অপরাপর রাষ্ট্রের উপর নির্ভর করিতে হয়। অধুনা যোগাযোগ-ব্যবস্থায় অভূতপূর্ব উন্নতি হওয়ার ফলে সভ্য রাষ্ট্রগুলির মধ্যে অনেক যোগসূত্র স্থাপিত হইয়া নানাবিধ আদান-প্রদান সম্ভব হইয়াছে। এইরূপ আদান-প্রদানের ফলে পারস্পরিক সম্পর্ক স্থাপিত হয়, আর এই পারস্পরিক সম্পর্ক স্থিতিশীল হয় কতকগুলি সর্ববাদিসম্মত নিয়মে। এই নিয়মগুলিকে আন্তর্জাতিক আইন বলা হয়।

রাষ্ট্রীয় আইনের অরূপ প্রথায় আন্তর্জাতিক আইনের সৃষ্টি হইয়াছে। আন্তর্জাতিক প্রথা, আন্তর্জাতিক বিচারালয়ের সিদ্ধান্ত, আন্তর্জাতিক পরামর্শ-

সভার সিদ্ধান্ত ও খ্যাতনামা আইনবিদ পণ্ডিতগণের ব্যাখ্যা-বিশ্লেষণ দ্বারা আন্তর্জাতিক আইন পরিপুষ্ট হইয়াছে। আন্তর্জাতিক বিচারালয় সৃষ্টিকারী আইন অল্পসংখ্যায় নিম্নলিখিত উৎসগুলি আন্তর্জাতিক আইনের প্রকৃত উৎস বলিয়া পরিগণিত হয়। (ক) আন্তর্জাতিক প্রথাগত বিধান (conventions), (খ) আন্তর্জাতিক প্রথা, (গ) সভা জাতিসমূহ কর্তৃক স্বীকৃত আইনের নীতি, (ঘ) বিচারালয়ের সিদ্ধান্ত ও বিশেষ যোগ্যতাসম্পন্ন আন্তর্জাতিক আইনবিদের অভিমত। কিন্তু আন্তর্জাতিক বিচারালয় বিচারপ্রার্থী পক্ষগুলির সম্মতিক্রমে উপরি-উক্ত উৎসগুলি নিরপেক্ষভাবে ইহার ত্রায়বোধ (equity) প্রয়োগ করিয়া বিচার করিতে পারে। এই আইন এক রাষ্ট্রের সহিত অপর রাষ্ট্রের শান্তির সময়ে, যুদ্ধকালে বা নিরপেক্ষতা নীতি অবলম্বনকালে কি সম্পর্ক হইবে তাহা স্থির করিয়া আন্তর্জাতিক শান্তি ও সম্প্রীতি রক্ষা করে। আন্তর্জাতিক আইন প্রণয়ন করিবার জন্য কোন নির্দিষ্ট কর্তৃপক্ষ নাই। রাষ্ট্রগুলির সম্মতিই হইল ইহার প্রধান অনুমোদন। রাষ্ট্রগুলি এই আইনানুসারে তাহাদের কার্যকলাপ পরিচালিত করিয়া পরোক্ষভাবে এই আইনের সমর্থন করে। আবার অনেক সময় এই আইনের সহিত সামঞ্জস্য রাখিয়া পারম্পরিক চুক্তির দ্বারা প্রত্যক্ষভাবে ইহার সমর্থন করে।

আন্তর্জাতিক আইনকে প্রকৃত আইন বলা হইবে, কি কতকগুলি নৈতিক নিয়মের সমষ্টি বলা হইবে, এ বিষয়ে গুরুতর মতভেদ দেখা যায়। অষ্টিন আইনের যে সংজ্ঞা নির্দেশ করিয়াছিলেন, সে সংজ্ঞা অল্পসংখ্যায় আন্তর্জাতিক আইনকে প্রকৃত আইন বলিয়া অভিহিত করা যায় না। প্রত্যেক আইনের পশ্চাতে একটি সার্বভৌম শক্তির উপস্থিতি অপরিহার্য বলিয়া মনে করিলে এই আইনকে আইন আখ্যা দেওয়া যায় না। কারণ আন্তর্জাতিক আইন বলবৎ করিবার মত কোন সার্বভৌম শক্তি ইহার পশ্চাতে নাই। আইন অমান্য করা দণ্ডনীয় অপরাধ, কিন্তু আন্তর্জাতিক আইনভঙ্গকারী রাষ্ট্রকে দণ্ড দিবার উপযুক্ত কোন উচ্চতর কর্তৃপক্ষ এখনও পর্যন্ত অবর্তমান। রাষ্ট্রগুলি অধিকাংশ ক্ষেত্রেই এই আইন মান্য করে না। সুতরাং যে আইন মান্য করা বা না-করা আইনভঙ্গকারীদের স্বাধীন ইচ্ছার উপর নির্ভর করে, সে আইনকে প্রকৃত আইন বলা যুক্তিযুক্ত নয়।

আন্তর্জাতিক আইন অনেক সময় রাষ্ট্রগুলি মান্য করে না—এই যুক্তিতে

ইহাকে প্রকৃত আইন বলিতে আপত্তি করা হয়। রাষ্ট্রীয় আইনও বহু ক্ষেত্রে ভঙ্গ হয়। রাষ্ট্রীয় আইন ক্ষেত্রবিশেষে ভঙ্গ হইলেও যদি সেগুলিকে আইন আখ্যা দিতে আপত্তি না থাকে, তাহা হইলে আন্তর্জাতিক আইন সময় বিশেষে ভঙ্গ হয় বলিয়া ইহাকে আইন বলিয়া স্বীকার না করা অধোক্তিক। দ্বিতীয়তঃ, সাধারণতঃ রাষ্ট্রগুলি আন্তর্জাতিক আইনের বিধি অল্পসারে তাহাদের কার্যকলাপ পরিচালিত করিয়া থাকে। ইচ্ছাপূর্বক আন্তর্জাতিক আইন অমান্য করিয়াছে বলিয়া কোন রাষ্ট্রই স্বীকার করে না। আন্তর্জাতিক আইনভঙ্গকারী বলিয়া যখনই কোন রাষ্ট্রের বিরুদ্ধে অভিযোগ আনীত হয় তখনই অভিযুক্ত রাষ্ট্র তাহার প্রতিবাদ করিয়া দোষ-ফালনের নিমিত্ত সন্তোষজনক কৈফিয়ৎ দিয়া সে যে আন্তর্জাতিক আইন ভঙ্গ করে নাই ইহা প্রমাণ করিতে প্রয়াস পায়। রাষ্ট্রের এই আচরণের দ্বারা প্রমাণিত হয় যে, প্রত্যেক সভ্য রাষ্ট্রই আন্তর্জাতিক আইনের প্রতি শ্রদ্ধাবান ও ঐ আইন অল্পসারে তাহার কার্য পরিচালিত করিতে যত্নবান। তৃতীয়তঃ, কোন সভ্য রাষ্ট্রই আন্তর্জাতিক আইন-বিরোধী কোন আইন প্রণয়ন করে না। অধিকন্তু ইংলও প্রভৃতি কয়েকটি দেশ আন্তর্জাতিক আইনকে জাতীয় আইনের একটি অংশ বলিয়া বিবেচনা করে।

চতুর্থতঃ, অনেক ক্ষেত্রে আন্তর্জাতিক আইন ভঙ্গকারী রাষ্ট্রকে শাস্তি ভোগ করিতে হয়। কোরিয়ার যুদ্ধকালে ও ইংরাজ-ফরাসী কর্তৃক ইজিপ্ট আক্রমণকালে সম্মিলিত জাতিপুঞ্জ কর্তৃক অর্থনৈতিক চাপ-দৃষ্টি ও সশস্ত্র হস্তক্ষেপ আন্তর্জাতিক বিরোধ দূর করিতে ফলপ্রসূ হয়। সুতরাং আন্তর্জাতিক আইনকে প্রকৃত আইন বলা যাইতে পারে। এতদ্ব্যতীত বলা হয় যে, আইন হইল কতকগুলি নিয়মের সমষ্টি যাহা সর্বসাধারণের সম্মতির উপর প্রতিষ্ঠিত। সার্বভৌম শক্তির প্রয়োজন হয় আইনকে বলবৎ করিবার নিমিত্ত, আইনের অস্তিত্বের নিমিত্ত সার্বভৌম ক্ষমতা অপরিহার্য নহে। বিখ্যাত আন্তর্জাতিক আইনবিশারদ পণ্ডিত হল ও ওপেনহাইম্ এই আইনকে প্রকৃত আইন বলিয়া অভিহিত করিয়াছেন রাষ্ট্রীয় আইনের ত্রায় আন্তর্জাতিক আইনের পশ্চাতেও আন্তর্জাতিক জনমতের অল্পমোদন ও সমর্থন আছে। জনমতের এই অল্পমোদন ও সমর্থন যত বেশী শক্তিশালী হইয়া উঠিবে আন্তর্জাতিক আইন

অল্পরূপভাবে তত শক্তিশালী হইবে। বর্তমানে আন্তর্জাতিক জনমত অপেক্ষাকৃত দুর্বল বলিয়া আন্তর্জাতিক আইনের বাধ্যবাধকতা পূর্ণতালাভ করিতে পারে নাই। সুতরাং আন্তর্জাতিক আইনকে এখনও পর্যন্ত রাষ্ট্রীয় আইনের মত সকল ক্ষেত্রে কার্যকর করা সম্ভব হয় নাই। সম্মিলিত জাতিপুঞ্জ প্রভৃতি আন্তর্জাতিক প্রতিষ্ঠানগুলির মাধ্যমে রাষ্ট্রগুলি অধিকতররূপে সম্ভব হইলে আন্তর্জাতিক আইনের বাধ্যবাধকতা আরও বৃদ্ধি পাইবে। জাতীয় স্বার্থসংরক্ষণের নিমিত্ত এবং বিশ্বশান্তি ও মৈত্রী বজায় রাখিবার নিমিত্ত আন্তর্জাতিক আইনকে বাধ্যতামূলক করিয়া আইনের মর্যাদা দেওয়া বর্তমান যুগে অপরিহার্য বলিয়া বিবেচিত হয়।

আইনের শ্রেণীবিভাগ (Classification of Law)

দুইটি বিভিন্ন পদ্ধতিতে আইনের শ্রেণী ভাগ করা হয়। প্রথমতঃ, যে কর্তৃপক্ষের দ্বারা আইন রচিত হয়, সেই কর্তৃপক্ষের পার্থক্যের ভিত্তিতে ; দ্বিতীয়তঃ, আইন কাহাদের সহিত সম্পর্কযুক্ত তাহা দেখিয়া ইহার শ্রেণী ভাগ করা হয়।

প্রথম পদ্ধতি অনুসারে আইনের নিম্নলিখিত শ্রেণী ভাগ করা হয় ; যথা—

১। আইনপরিষদ রচিত লিখিত আইন—Statutes.

এই আইনগুলি নিয়মতান্ত্রিক পদ্ধতিতে আইনপরিষদ কর্তৃক রচিত হয়। বর্তমানে সব দেশেই এইরূপ আইনের প্রাধান্য দেখা যায়।

২। শাসনবিভাগীয় নির্দেশ—Ordinances.

এইগুলি শাসনবিভাগীয় উর্ধ্বতন কর্তৃপক্ষ কর্তৃক বিশেষ অবস্থায় প্রবর্তিত হয় বলিয়া উহাদিগকে শাসনবিভাগীয় নির্দেশ বলা হয়। এই নির্দেশগুলি বিশেষক্ষেত্রে স্বল্পস্থায়ীভাবে প্রয়োগ করা হয়।

৩। সচরাচরিক প্রথা—Common Law.

এই নিয়মগুলি লোকাচার হইতে উদ্ভূত হইলেও বিচারালয় কর্তৃক প্রযুক্ত ও বলবৎ করা হয়।

৪। শাসনতান্ত্রিক আইন—Constitutional Law.


এই আইনগুলি রাষ্ট্রের কার্য নিয়ন্ত্রণ করিয়া শাসক-শাসিতের সম্পর্ক নির্ধারণ করে। যে দেশের শাসনতন্ত্র অনমনীয়, সেই দেশেই শুধু শাসনতান্ত্রিক আইন ও সাধারণ আইনের মধ্যে পার্থক্য করা হয়।

৫। আন্তর্জাতিক আইন—International Law.

এই আইন সভ্য রাষ্ট্রগুলির পারস্পরিক সম্পর্ক নির্ধারণ করিয়া রাষ্ট্রগুলির মধ্যে সম্প্রীতি ও বিশ্বশান্তি-সংরক্ষণে সহায়তা করে।

দ্বিতীয়তঃ, আইনকে প্রধানতঃ দুই শ্রেণীতে ভাগ করা হয়; যথা—

১। রাষ্ট্রীয় আইন—Municipal Law ও ২। আন্তর্জাতিক আইন—International Law. রাষ্ট্রীয় আইন রাষ্ট্রের সীমার মধ্যে সার্বভৌম শক্তি কর্তৃক প্রযুক্ত ও বলবৎ হয়। রাষ্ট্রের বাহিরে অন্য রাষ্ট্রে ইহার প্রয়োগ হয় না। আন্তর্জাতিক আইনের প্রয়োগ হয় সকল সদস্য রাষ্ট্রের উপর। রাষ্ট্রীয় আইনকে পুনরায় দুইটি ভাগে ভাগ করা হয়; যথা— (ক) ব্যক্তি-সম্পর্কিত আইন—Private Law ও (খ) সাধারণ-সম্পর্কিত আইন—Public Law. ব্যক্তি-সম্পর্কিত আইন জনসাধারণের পারস্পরিক সম্পর্ক নির্ধারণ করিয়া ব্যক্তি-স্বাধীনতা রক্ষা করে। সাধারণ-সম্পর্কিত আইন ব্যক্তির সহিত সরকারের সম্পর্ক স্থির করিয়া শাসন-ব্যবস্থা দ্বারা ব্যক্তি-স্বাধীনতা যাহাতে ক্ষুণ্ণ না হয় সেই ব্যবস্থা করে। সরকার-সম্পর্কিত আইনকে আবার দুই শ্রেণীতে ভাগ করা হয়; যথা—(১) শাসনতান্ত্রিক আইন—Constitutional Law ও (২) শাসনবিভাগীয় আইন—Administrative Law. শাসনতান্ত্রিক আইন সরকারের কার্যসমূহ স্থির করিয়া তাহার সীমারেখা টানিয়া ব্যক্তি-স্বাধীনতার ক্ষেত্র স্থির করে। শাসনবিভাগীয় আইনগুলি সরকারী কার্যে নিযুক্ত কর্মচারীদের কর্তব্য নির্ধারণ করে।



রাষ্ট্র ও আইন (State and Law)

রাষ্ট্রের সহিত আইনের কি সম্পর্ক তাহাই বিচার্য বিষয়। একদল লেখক বলেন যে, রাষ্ট্র হইল আইনের উৎস। রাষ্ট্র সমাজের প্রতিনিধি হিসাবে আইন প্রণয়ন করে এবং জনসাধারণ ও সরকারী কর্মচারীগণ বাহাতে আইনানুমোদিতভাবে কার্য পরিচালনা করে, সেজন্য আইন বলবৎ করে ও আইনভঙ্গকারীকে শাস্তি প্রদান করে। এইরূপে রাষ্ট্রস্বষ্ট আইন সমাজে শান্তি-শৃঙ্খলার পরিবেশ সৃষ্টি করিয়া ব্যক্তিত্ববিকাশের অন্তরায়গুলি দূর করে। এ দিক দিয়া দেখিতে গেলে রাষ্ট্রকে আইনের স্রষ্টা বা জনক বলা যাইতে পারে।

মতান্তরে ডুগুই (Duguit), ক্রাব্ (Krabbe) প্রভৃতি লেখকগণ আইনকে রাষ্ট্রের উর্ধ্বে স্থান দেন। তাঁহাদের মতে আইন রাষ্ট্র-নিরপেক্ষ-ভাবে অবস্থান করে। রাষ্ট্র শুধু আইনকে স্বীকৃতি দান করে এবং আইন বলবৎ করে। তাঁহাদের মতে এমন কি সর্বশক্তিমান রাষ্ট্রও আইন দ্বারা বাধ্য। রাষ্ট্রের অস্তিত্বও আইনের ভিত্তির উপর প্রতিষ্ঠিত। এ দিক দিয়া দেখিতে গেলে রাষ্ট্রকে আইনের আজ্ঞাবহ বলিয়া মনে হয়।

যে সমস্ত লেখক আইনের উপর প্রাধান্য আরোপ করিয়া আইনকে রাষ্ট্রের উর্ধ্বে স্থান দেন তাঁহারা রাষ্ট্র ও সরকারের মধ্যে যে পার্থক্য বিद्यমান সে সম্পর্কে সম্পূর্ণ অবহিত নহেন। সরকার হইল রাষ্ট্রের সক্রিয় বহিঃপ্রকাশ। রাষ্ট্রের কার্যকলাপ সরকার কর্তৃক পরিচালিত হয়, সেইজন্য সরকারের কার্যকলাপের নিয়ন্ত্রণ একান্ত অপরিহার্য। সরকারের কার্যকলাপ যদি নিয়ন্ত্রিত না হয় তাহা হইলে সরকারের স্বৈচ্ছাচারতা দ্বারা ব্যক্তি-স্বাধীনতা ক্ষুণ্ণ হইতে পারে। এই নিমিত্ত সমস্ত সভ্য দেশেই পৃথক এক শ্রেণীর আইন দ্বারা সরকারের কার্যকলাপের পরিধি স্থির করিয়া দেওয়া হয়। এই আইনগুলিকে শাসনতান্ত্রিক আইন বলা হয়। সরকারী কার্যকলাপের দ্বারা যদি ব্যক্তি-স্বাধীনতা ব্যাহত হয় তাহা হইলে নাগরিকগণ শাসনতান্ত্রিক আইন অনুসারে সরকারের বিরুদ্ধে অভিযোগ আনয়ন করিয়া জাহার প্রতিকার বিধান করিতে পারে। কিন্তু এস্থলে একটি কথা স্মরণ রাখিতে হইবে যে, রাষ্ট্র ইচ্ছা করিলে এই শাসনতান্ত্রিক আইনও পরিবর্তন করিতে

পারে। সুতরাং শেষ বিশ্লেষণে দেখা যায় যে, সরকারই আইন দ্বারা বাধ্য, রাষ্ট্রের কোন বাধ্যবাধকতা নাই।

সংক্ষিপ্তসার

আইন

আইনের সংজ্ঞা ও প্রকৃতি—‘আইন’ শব্দটি নানা অর্থে প্রযুক্ত হয়, যথা—সামাজিক আইন, প্রাকৃতিক আইন, নৈতিক আইন, ধর্মীয় আইন ইত্যাদি। রাষ্ট্রবিজ্ঞানে আইন বলিতে বুঝায় কতকগুলি নিয়মের সমষ্টি, যে নিয়মগুলি ব্যক্তিগত জীবনে পারস্পরিক আচরণের মান নির্ণয় করে। আইনগুলির পিছনে রাষ্ট্রের সার্বভৌম শক্তির অঙ্গুমোদন আছে বলিয়া জনসাধারণ এগুলিকে মান্ত করে। অষ্টিন আইনকে সার্বভৌমের নির্দেশ বলিয়া আখ্যা দিয়াছিলেন। কিন্তু অষ্টিনপ্রদত্ত সংজ্ঞায় প্রথাগত নিয়ম, বিচারালয়ের সিদ্ধান্ত প্রভৃতির স্থান নাই বলিয়া পরবর্তী লেখকগণ উহার পরিবর্তন করিয়া আইনের নতুন সংজ্ঞা নির্ধারণ করিয়াছেন। বর্তমানে আইন জনমতের ভিত্তির উপর প্রতিষ্ঠিত বলিয়া পরিগণিত হয়। রাষ্ট্রের সার্বভৌম শক্তি জনমত অনুসারেই এই আইনগুলিকে বলবৎ করে।

আইন একদিকে যেমন সামাজিক চিন্তাধারার পরিচায়ক, অন্যদিকে তদ্রূপ একটি কার্যকরী শক্তি বলিয়া পরিগণিত হয়। আইন মানুষের কর্তব্যাকর্তব্য নির্ধারণ করিয়া মানুষের কার্যকলাপ একটা নির্ধারিত পথে পরিচালিত করে।

আইনের উৎস—প্রথা, ধর্মীয় অনুশাসন, বিচারালয়ের সিদ্ধান্ত, ন্যায়নীতি, আইনবিদগণের আলোচনা ও আইনপরিষদ কর্তৃক নিয়মতান্ত্রিক পদ্ধতিতে আইন-প্রণয়ন—এইগুলিই হইল আইনের জন্মদাতা। বর্তমানে অধিকাংশ আইনই শেখোক্ত পদ্ধতিতে রচিত হয়।

প্রাকৃতিক আইন—প্রাকৃতিক নিয়মগুলির সহিত সামঞ্জস্য রাখিয়া মানুষের স্বাধীন বিবেকবুদ্ধির প্রয়োগে যে নিয়মগুলি দ্বারা নিজেদের পারস্পরিক সম্পর্ক নিয়ন্ত্রিত করিত সেগুলি সাধারণতঃ প্রাকৃতিক আইন বলিয়া পুরাকালে অভিহিত হইত। প্রাকৃতিক নিয়মগুলির পিছনে আইনের কোন

সমর্থন নাই বলিয়া এগুলিকে কার্যকরী করা চলে না। পরবর্তী যুগে আইন-গঠন ব্যাপারে প্রাকৃতিক আইনের প্রভাব অনেক ক্ষেত্রে দেখা যায়।

সামাজিক ও ধর্মীয় আইন—এই নিয়মগুলিও সাধারণতঃ সমাজ-ব্যবস্থায় ও ধর্মসম্প্রদায়ের সংগঠনে লোকে মানিয়া চলে। কিন্তু এগুলিও কার্যকরী করা যায় না।

নৈতিক নিয়ম—সমাজে মানুষের আদর্শ আচরণ কি হওয়া উচিত, নৈতিক নিয়মগুলি তাহা নির্ধারণ করে। এই নিয়মগুলি মানুষের চিন্তাধারা ও কার্যে তাহার বহিঃপ্রকাশ উভয়ই নিয়ন্ত্রণ করে। বিবেকের কশাঘাত বা লোকনিন্দাই হইল ইহার অন্তিমোদন। নৈতিক নিয়ম ও রাষ্ট্রীয় আইনের মধ্যে নিম্নলিখিত পার্থক্য দেখা যায়।

১। নৈতিক আইন মানুষের অন্তর্জীবন ও বহির্জীবন উভয়কেই নিয়ন্ত্রণ করে—রাষ্ট্রীয় আইন শুধু মানুষের বহির্জীবনের একটা প্রধান অংশ নিয়ন্ত্রণ করে।

২। নৈতিক নিয়ম মানুষের বিবেক বা জনমত দ্বারা অন্তিমোদিত হয়। রাষ্ট্রীয় আইন রাষ্ট্রের সার্বভৌম শক্তির দ্বারা বলবৎ করা হয়।

৩। নৈতিক নিয়মগুলি অপেক্ষাকৃত অসংবদ্ধ ও অস্পষ্ট; অপরপক্ষে রাষ্ট্র-প্রণীত আইন সুসংবদ্ধ ও সুস্পষ্ট।

৪। নৈতিক নিয়মগুলি মানুষের ঐচ্ছিক্যবোধের মান দ্বারা স্থিরীকৃত হয়, রাষ্ট্রীয় আইনের ক্ষেত্রে এরূপ কোন নির্দিষ্ট মান নাই। সমাজের স্ববিধা-অস্ববিধা বিবেচনা করিয়া রাষ্ট্রীয় আইন পরিবর্তিত হইতে পারে।

৫। নীতিজ্ঞান-বিরোধী কার্যকলাপ সব সময়ে বে-আইনী বলিয়া পরিগণিত হয় না, অপরপক্ষে নীতিজ্ঞান-বিরোধী না হইলেও অনেক কার্যকলাপ বে-আইনী হইতে পারে।

উপরি-উক্ত পার্থক্য থাকা সত্ত্বেও রাষ্ট্রীয় আইন ও নৈতিক নিয়ম ঘনিষ্ঠ সম্পর্কযুক্ত। প্রচলিত নীতিজ্ঞান-সম্মত না হইলে কোন রাষ্ট্রীয় আইনই জনমতের সমর্থন লাভ করিতে পারে না। মানুষের নৈতিক জীবনের উৎকর্ষ সাধন করাই হইল উভয়বিধ আইনের প্রধান উদ্দেশ্য।

আন্তর্জাতিক আইন—এই আইনগুলি সভ্য রাষ্ট্রসমূহের পারস্পরিক সম্পর্ক নির্ধারণ করিয়া রাষ্ট্রগুলির মধ্যে সম্প্রীতি ও শান্তি রক্ষা করে।

আন্তর্জাতিক আইন কোন উচ্চতর কর্তৃপক্ষ কর্তৃক সৃষ্ট হয় নাই—রাষ্ট্রগুলির সর্ববাদিসম্মত মতের উপর ইহা প্রতিষ্ঠিত। এই আইনগুলিকে বলবৎ করিবার পক্ষে শক্তিশালী কোন উচ্চতর কর্তৃপক্ষও অবর্তমান। সেইজন্য অনেকে ইহাকে প্রকৃত আইনের মর্যাদা দিতে অস্বীকার করেন। কিন্তু বর্তমান যুগে আন্তর্জাতিক আইনের সপক্ষে একটি পৃথিবীব্যাপী শক্তিশালী জনমতের সৃষ্টি হইয়া ইহাকে শক্তিশালী করিয়া তুলিতেছে।

আইনের শ্রেণীবিভাগ—দুইটি পদ্ধতি দ্বারা আইনের শ্রেণীবিভাগ করা হয়। প্রথমতঃ, আইনপ্রবর্তনের কর্তৃপক্ষ দ্বারা, দ্বিতীয়তঃ আইন কাহাদের সম্পর্কিত তাহা নির্ধারণ দ্বারা।

রাষ্ট্র ও আইন—আইনের স্রষ্টা ও আইন বলবৎ করিবার অধিকারী বলিয়া রাষ্ট্রকে আইনের উর্ধ্বে স্থান দেওয়া হয়। অপর পক্ষে বলা হয় যে, আইনের স্থান রাষ্ট্রের উর্ধ্বে, কেন না, রাষ্ট্রও আইনসম্মত কার্য করিতে বাধ্য। প্রকৃত তথ্য হইল যে, সরকারের কাংক্ষলাপ শাসনতাত্ত্বিক আইন দ্বারা নির্ধারিত হয়, স্ততরাং সরকার আইন দ্বারা বাধ্য—রাষ্ট্র বাধ্য নয়।

প্রশ্নাবলী

1. Discuss the nature and sanction of law. How far is it correct to use such expressions as 'the laws of Nature,' 'the laws of Morality' and 'International law'?

(C. U. 1950)

2. 'The safety of the state is its first law and to realise this end it must be above morality'.—Comment.

(C. U. 1942)

3. "A law is a command which obliges a person or persons to a course of conduct." Comment on the definition, considering particularly the cases of (a) Customary Law, (b) Equity, and (c) International Law. (C. U. 1930).

4. "Law is the expression of the general will of the community."

Discuss the statement. (C. U. 1955)

5. Discuss the nature and sanction of Law. Can International law be regarded as Law in the strict sense of the term?

Give reasons for your answer. (C. U. 1958)

6. Is it enough to say about Law that it is the Command of the sovereign?

7. Define Law, and point out the distinction and relation between Law and Morality.

8. Analyse the concepts of the Natural Law and Natural Rights.

9. Discuss the relationship between law and morality. Illustrate your answer.

রাষ্ট্র ও জাতীয়তাবাদ

(State and Nationalism)

স্বজাতীয় মানুষ, জাতীয় জনসমাজ, জাতি ও জাতীয়তাবোধ—
(People, Nationality, Nation and Nationalism)

রাষ্ট্রবিজ্ঞানের সংজ্ঞায় স্বজাতীয় মানুষ বলিতে বুঝা যায়, একই ঐতিহ্য-
দ্বারা পরিপুষ্ট একদল লোক যাহারা একই নির্দিষ্ট ভূভাগে বাস না করিতেও
পারে অথবা এক ভাষাভাষী নাও হইতে পারে। কিছুদিন পূর্ব পর্যন্তও
ইহুদি জাতির কোন নির্দিষ্ট মাতৃভূমি ছিল না। তাহারা বিভিন্ন দেশে বাস
করিত ও সেইজন্য তাহাদের ভাষাগত কোন ঐক্য ছিল না। কিন্তু বিভিন্ন
দেশের নাগরিক হইলেও সমষ্টিগতভাবে এক অতি সুপ্রাচীন ঐতিহ্যের
অধিকারী বলিয়া ইহুদি জাতির মধ্যে এক গভীর ঐক্যবোধ ছিল। সমগ্র
ইহুদি জাতি এই ঐক্যবোধদ্বারা আজ পর্যন্ত অনুপ্রাণিত হইয়া নিজেদের
সকলকেই জাতীয় মানুষ বলিয়াই মনে করে।

জাতীয় জনসমাজ গঠিত হয় তখনই, যখন স্বজাতীয় একদল লোক আরও
গভীরতর ঐক্যবোধদ্বারা অনুপ্রাণিত হইয়া নিজেদের অন্ত জনসমাজ হইতে
সম্পূর্ণ স্বতন্ত্র মনে করে। জাতীয় জনসমাজের মধ্যে ভাষাগত, বংশগত,
ধর্মগত বা কৃষ্টিগত ঐক্য বিद्यমান থাকে। রক্তের, ভাষার, ধর্মের বা কৃষ্টির
আভিন্নতা এই একতাবোধকে শক্তিশালী করিয়া জাতীয় জনসমাজের মধ্যে
রাজনৈতিক চেতনা উন্মেষের সহায়তা করে।

জাতীয় জনসমাজ যখন রাষ্ট্রনৈতিকভাবে সম্পূর্ণ আত্মসচেতন হয় ও
নিজেদের বহিঃশাসন হইতে মুক্ত করিয়া এক স্বাধীন রাষ্ট্রের মাধ্যমে তাহাদের
নিজস্ব জাতিগত বৈশিষ্ট্য বজায় রাখিবার প্রয়াস পায়, তখন জাতীয়
জনসমাজ জাতিতে রূপান্তরিত হয়।

উপরি-উক্ত আলোচনা হইতে ইহাই প্রতীয়মান হয় যে, রাজনৈতিক
চেতনার ক্রমবিকাশের ফলে স্বজাতীয় মানুষ জাতীয় জনসমাজ বলিয়া

পরিচিত হয় এবং স্বাধীন সার্বভৌম রাষ্ট্রগঠনের ফলে জাতীয় জনসমাজ জাতিতে পরিণত হয়। স্বজাতীয় মানুষ অপেক্ষা জাতীয় জনসমাজের মধ্যে ঐক্যবোধ গভীরতর আর এই ঐক্যবোধ রাজনৈতিক চেতনার জন্মদাতা। রাজনৈতিক চেতনা যখন গভীরতর হয় তখন জাতীয় জনসমাজ জাতিতে রূপান্তরিত হয়। সুতরাং জাতীয়তাবোধে অনুপ্রাণিত একদল লোক যখন নিজেদের রাষ্ট্রগঠনে সক্ষম হয়, তখন তাহাদের রাজনীতির ভাষায় জাতি বলা হয়। জাতীয়তাবোধ+রাষ্ট্র=জাতি। সুতরাং স্বজাতীয় মানুষ ও জাতীয় জনসমাজ জাতিগঠনের দুইটি প্রাথমিক স্তর বলিয়া পরিগণিত হইতে পারে।

জাতীয় জনসমাজ অনেক সময় একটি ভিন্ন অর্থে ব্যবহৃত হয়। একটি বৃহৎ জাতির ক্ষুদ্র এক অংশকে বুঝাইতে উপজাতি অর্থে ইহা ব্যবহৃত হয়। যেমন, ব্রিটিশ জাতির একটি অংশ হইল স্কট্ উপজাতি।

রাষ্ট্র ও জাতি (State and Nation)

অনেক সময় জাতি শব্দটি ও রাষ্ট্র শব্দটি পরস্পরের প্রতিশব্দ হিসাবে ব্যবহৃত হয়, যেমন বলা হয়, সম্মিলিত জাতিপুঞ্জ (United Nations)। কিন্তু বাস্তব ক্ষেত্রে সম্মিলিত জাতিপুঞ্জের প্রকৃত অর্থ হইল সার্বভৌম ক্ষমতা-সম্পন্ন রাষ্ট্রসমূহের আন্তর্জাতিক একটি সংঘ। বস্তুতঃ রাষ্ট্র ও জাতি একার্থবোধক নহে।

নির্দিষ্ট ভূভাগের মধ্যে আইন ও শৃংখলার সহিত সংঘবদ্ধ জনসমষ্টিকেই রাষ্ট্র বলা হয়। জনসমষ্টি, নির্দিষ্ট ভূখণ্ড, শাসনব্যবস্থা ও সর্বোপরি সার্বভৌমিকতা এই চারটিই হইল রাষ্ট্র অস্তিত্বের লক্ষণ। কিন্তু জাতির সংজ্ঞা রাষ্ট্র সংজ্ঞা হইতে শুধু পৃথক নয়, গভীরতরও বটে। জাতি বলিয়া পরিগণিত হইতে হইলে রাষ্ট্রভুক্ত জনসমষ্টির মধ্যে একাত্মবোধ থাকা অপরিহার্য। রাষ্ট্র ও জাতি একার্থবোধক হয় তখন যখন রাষ্ট্রভুক্ত সমগ্র জনসমষ্টি একই ঐতিহ্যে বিশ্বাসী ও একই আদর্শে অনুপ্রাণিত হয়। একাত্মবোধের অবর্তমানে একটি রাষ্ট্র গঠিত হওয়া সম্ভব কিন্তু একজাতি গঠিত হইতে পারে না। উদাহরণস্বরূপ বলা যাইতে পারে যে, প্রথম বিশ্বযুদ্ধ-পূর্ববর্তী কালে অস্ট্রো-হাঙ্গেরীয় সাম্রাজ্য একটি মাত্র রাষ্ট্র বলিয়া পরিগণিত

হইলেও ইহা একজাতি ছিল না। কৃষিয়ার জারের সাম্রাজ্য সম্পর্কেও এ কথা বলা চলে। এক শাসনব্যবস্থাক্ত হইলেও এই রাষ্ট্রগুলির জনসমষ্টির মধ্যে কোন একাত্মবোধ ছিল না এবং এই একাত্মবোধের অভাবে ইহার জাতি পদবাচ্য হইতে পারে নাই।

কিন্তু ইহা সবেও বলিতে হইবে যে, রাষ্ট্র ও জাতি এই দুইটি সংজ্ঞা পরস্পর-বিরোধী নয়, পরস্পর একটি অপরের পরিপূরক। একই রাষ্ট্রের মধ্যে দীর্ঘদিনব্যাপী বাস করিলে একই শাসন, আইন ও শিক্ষাব্যবস্থার ফলে বিভিন্ন জাতি ক্রমশই একাত্মবোধে উদ্ভূত হইয়া এক জাতিতে পরিণত হয়। সুইস দেশে এইরূপে তিনটি জাতি একই শাসনব্যবস্থার অধীনে এক জাতিতে পরিণত হইয়াছে। অপর পক্ষে যখন একদল লোক জাতীয়তাবোধে উদ্ভূত হইয়া তাহাদের নিজস্ব রাজনৈতিক জীবন, কৃষ্টি, ভাষা ও অর্থনৈতিক স্বার্থ-রক্ষা করিতে দৃঢ়সংকল্প হয়, তখন এই একাত্মবোধই তাহাদের জাতির ভিত্তিতে রাষ্ট্র গঠন করিতে সাহায্য করে। ইতিহাসে ইহার ভূরিভূরি প্রমাণ পাওয়া যায়। পোলাও দেশ ইহার জলন্ত দৃষ্টান্ত। এইজন্য বলা হয় যে, রাষ্ট্র জাতি সৃষ্টি করে, আবার জাতিও রাষ্ট্র সৃষ্টি করে। “The state creates the nation : the nation creates the state.”

কিন্তু এখানে একটি কথা স্মরণ রাখিতে হইবে যে, রাষ্ট্রের অস্তিত্ব সম্পূর্ণরূপে জাতিভিত্তিক নয়। রাষ্ট্রগঠনের প্রধান উপাদান হইল সার্বভৌমিকতা এবং রাষ্ট্রভুক্ত জনসমষ্টির মধ্যে জাতীয়তাবোধ যতই শক্তিশালী ও গভীর হউক না কেন, সার্বভৌমিকতার অবিচ্ছিন্ন এই এক্যবদ্ধ জাতি রাষ্ট্র বলিয়া পরিগণিত হইতে পারে না। দ্বিতীয় বিশ্বযুদ্ধান্তর কালের বিদেশী অধিকৃত জাপান-জার্মানী ইহার প্রত্যক্ষ দৃষ্টান্ত।

জাতীয় জনসমাজ বা জাতি গঠনের উপাদান (Elements of Nationality)

জাতীয় জনসমাজ রাষ্ট্রনৈতিক চেতনাসম্পন্ন হইলে জাতিতে পরিণত হয়। সুতরাং যে উপাদানগুলি জাতীয় জনসমাজ গঠনে সহায়তা করে, সেইগুলিই জাতিগঠনেরও সহায়ক। একমাত্র রাজনৈতিক চেতনার বিত্তমানতা বা অভাবের উপর ইহাদের পার্থক্য প্রতিষ্ঠিত। জাতিগঠনের উপাদানগুলিকে

দুইটি শ্রেণীতে ভাগ করা যায়—যথা, বাহ্যিক উপাদান ও ভাবগত উপাদান। এই উপাদানগুলি বিশ্লেষণ করিলে জাতিগঠনে ইহার প্রত্যেকটির কার্য-কারিতা উপলব্ধি করা যায়।

কুলগত ঐক্য (Racial Unity)

অনেকে মনে করেন জাতিগঠনে কুলগত ঐক্য অপরিহার্য। যখন জাতীয় জনসমাজের সমস্ত মানুষ নিজেদের এক বংশোদ্ভব বলিয়া মনে করে তখনই জাতির-সৃষ্টি হয়। কিন্তু এ কথা সব সময় সত্য নয়। উদ্ভবের দিক দিয়া দেখিতে গেলে জার্মান ও ইংরাজ একই টিউটন বংশোদ্ভব, কিন্তু জাতি হিসাবে ইহারা দুইটি সম্পূর্ণ পৃথক জাতির সৃষ্টি করিয়াছে। অপর পক্ষে, ইংরাজ ও স্কট্ এক বংশোদ্ভব না হইলেও এক জাতিতে পরিণত হইয়াছে। সুইজারল্যান্ডে তিনটি সম্পূর্ণ পৃথক বংশোদ্ভব মানুষ—জার্মান, ইতালীয় ও ফরাসী একজাতি বলিয়া পরিচিত। সুতরাং অভিন্ন কুল জাতিগঠনের একমাত্র উপাদান বা অপরিহার্য বলিয়া মনে করিলে ভুল হইবে। এতদ্ব্যতীত ইতিহাস পর্যালোচনা করিলে দেখা যায় যে, বিভিন্ন জাতির মধ্যে যুগযুগান্তর ধরিয়া রক্তের যে সংমিশ্রণ চলিয়াছে তাহার ফলে কোন জাতিই আজ আর অবিমিশ্র জাতি বলিয়া দাবী করিতে পারে না। কিন্তু এককুলোদ্ভব হইলে জাতীয় ঐক্য দ্রুত প্রতিষ্ঠিত হয় এ কথা অস্বীকার করা যায় না।

ভাষাগত ঐক্য (Sameness of Language)

কুলগত ঐক্য যে রূপ জাতিগঠনে অপরিহার্য নয়, ভাষাগত ঐক্যও সেরূপ অপরিহার্য নয়। সুইজারল্যান্ডে তিনটি বিভিন্ন ভাষাভাষী লোক বাস করে, কিন্তু তাহাদের ভাষাগত বিভেদ জাতিগঠনের অন্তরায় হয় নাই। পরন্তু এই ভাষার পার্থক্য থাকা সত্ত্বেও তাহারা এক আদর্শ জাতীয়তাবোধে অল্পপ্রাণিত হইয়া একই রাষ্ট্রে একজাতি হিসাবে বসবাস করিতেছে। ভাষা ভাবের আদান-প্রদানে সহায়তা করিয়া ঐক্যবোধ বৃদ্ধি করিতে সাহায্য করে। সুতরাং ভাষাগত ঐক্য জাতিগঠনে সহায়তা করে একথা অনস্বীকার্য হইলেও ভাষাগত ঐক্যের অভাবে যে জাতির সৃষ্টি হইতে পারে না একথা বলা যায় না।

ধর্মগত ঐক্য (Religious Unity)

মধ্যযুগে ধর্মগত ঐক্য জাতিগঠনের একটি প্রধান উপাদান বলিয়া বিবেচিত হইলেও বর্তমান ধর্মনিরপেক্ষ রাষ্ট্রসমূহে ইহার প্রভাব অনেক হ্রাস পাইয়াছে। একমাত্র মধ্য-প্রাচ্যের মুসলমান রাষ্ট্রগুলি ব্যতীত অল্প কোথায়ও ধর্মের ভিত্তিতে জাতি গঠিত হয় নাই। ধর্মগত ঐক্যের ভিত্তিতে ভারতবর্ষে স্বাধাভিক্ত হইয়া পাকিস্তানের সৃষ্টি হইয়াছে। ইয়ুরোপে অনেক জাতি আছে বাহাদের মধ্যে ধর্মগত ঐক্য জাতিগঠনের অন্তরায় হয় নাই। সোভিয়েত যুক্তরাষ্ট্রে খৃষ্টান, মুসলমান, বৌদ্ধ, ইহুদি প্রভৃতি বহু বিভিন্ন ধর্মাবলম্বী লোকের সমন্বয়ে একটি শক্তিশালী জাতির উৎপত্তি হইয়াছে। সুতরাং বর্তমান যুগে রাষ্ট্রনৈতিক ক্ষেত্রে ধর্মের প্রভাব জাতিগঠনের উপাদান বলিয়া গণ্য হয় না।

ভৌগোলিক ঐক্য (Geographical Unity)

কতকগুলি লোক এক ভৌগোলিক সীমার মধ্যে নির্দিষ্ট ভূভাগে বাস করিলে তাহারা একজাতিতে পরিণত হয়। ভৌগোলিক ঐক্য জাতিগঠনের এক গুরুত্বপূর্ণ উপাদান বলিয়া ধরিয়া লইলেও ইহাকে অপরিহার্য বলা চলে না। বহুদিনব্যাপী এক ভৌগোলিক ঐক্যের মধ্যে বসবাস করিয়াও ভারতের অধিবাসী হিন্দু-মুসলমান একজাতিতে পরিণত হয় নাই। আবার বিভিন্ন ভৌগোলিক সীমার মধ্যে বাস করিয়াও ইহুদি জাতি তাহাদের একজাতিত্ব হারায় নাই।

ভাবগত ঐক্য (Spiritual Unity)

উপরি-উক্ত আলোচনা হইতে এই সিদ্ধান্ত স্বাভাবিক যে, জাতিগঠনে বাহ্যিক উপাদানগুলি সব সময়ে বিশেষ কার্যকর হয় না। এগুলির অবিচ্ছিন্নভাবে জাতির উদ্ভব সম্ভব। জাতীয় জনসমাজ বা জাতিগঠন প্রধানতঃ নির্ভর করে জাতির এক বিশেষ মনোভাবের উপর। যখন জাতীয় জনসমাজের প্রত্যেক ব্যক্তিই তাহাদের মূলগত ঐক্যে একান্ত আস্থাবান হইয়া একজাতিত্ববোধে অনুপ্রাণিত হয়, তখনই কূলগত, ভাষাগত বা ধর্মগত পার্থক্য থাকি সত্ত্বেও তাহারা একজাতিতে পরিণত হয়। এখন প্রশ্ন হইল, এই ভাবগত ঐক্য কি ?

ভাবগত ঐক্য একটা মানসিক অহুত্বের ব্যাপার। এই অহুত্ব বাহ্যিক ঐক্য অপেক্ষা মানসিক ঐক্যের দ্বারা বেশী প্রভাবিত হয়। একদল লোকের মধ্যে কুলগত বা ভাষাগত বা আরও অনেক প্রকার সামাজিক বিভিন্নতা থাকিতে পারে, কিন্তু অতীতে যদি একই ইতিহাসের ঘটনাবলীর পথে তাহাদের জীবন গঠিত হইয়া থাকে, যদি তাহারা একই ঐতিহ্য বা সভ্যতার অধিকারী ও একই সুখদুঃখের অংশ গ্রহণকারী হইয়া থাকে এবং ভবিষ্যতে একই অর্থনৈতিক ও রাজনৈতিক আদর্শে উপনীত হইবার জন্য তাহারা দলবদ্ধ হয়, তাহা হইলে এইরূপ মনোভাবসম্পন্ন একদল লোক নিজেদের অগ্নাত্ত সকল দল হইতে পৃথক বলিয়া মনে করে। অতীতের এই সম-সুখদুঃখভোগের স্মৃতি ও ভবিষ্যতের আদর্শ এই জনসমষ্টির মধ্যে ঐক্যবোধ জাগরিত করিয়া সকলকে একতার সূত্রে গ্রথিত করে। সময়ের অগ্রগতির ফলে এই ভাবগত ঐক্যের বন্ধন তাহাদের মধ্যে দৃঢ়তর হয় ও বিভিন্ন ক্ষুদ্র সম্প্রদায়গুলিকে সম-সুখদুঃখ ও সম-স্বার্থের ভিত্তিতে একত্রিত করিয়া একজাতিতে পরিণত করে। সুইস-জাতির অতীত ইতিহাস পর্যালোচনা করিলে এই কথাটির সত্যতা প্রমাণিত হয়।

বাহ্যিক ও ভাবগত ঐক্যের ফলে যখন একদল লোক নিজেদের ঐক্যবদ্ধ করিয়া পৃথিবীর অগ্নাত্ত জনসমাজ হইতে নিজেদের পৃথক মনে করে, তখনই তাহাদের জাতীয় ভাবের উদয় হয়। এই জাতীয় ভাব বা সাজাত্যবোধ (Nationalism) জাতিগঠনের চরম পরিণতি। সাজাত্যবোধ ছুটি পরস্পর-বিরোধী মনোভাবের উপর গড়িয়া উঠে। একটি দ্বারা সম-সুখদুঃখভোগী ও সম-আদর্শে অহুপ্রাণিত একদল লোক পরস্পরের প্রতি আকৃষ্ট হইয়া ঐক্যবদ্ধ জাতিতে পরিণত হয়। অপরটি অসম-সুখদুঃখভোগী ও অসম-আদর্শে অহুপ্রাণিত জনসমষ্টিকে বিচ্ছিন্ন করিয়া বিভেদের সৃষ্টি করে ও বিভিন্ন জাতিতে পরিণত করে।

জাতীয়ভাবের উৎপত্তি (Growth of Nationalism)

জাতীয় ভাব আদিম মানবসমাজে অত্যন্ত স্থলভাবে বিद्यমান ছিল। যুক্তিবিহীন এক অন্ধ প্রবৃত্তির তাড়নায় মাহুষ জাতিস্ববন্ধন বা গোষ্ঠীবন্ধনে ঐক্যবদ্ধ হইত। তাহার রাষ্ট্রনৈতিক চেতনার উন্মেষের ফলে এই অন্ধ

প্রবৃত্তি একটি ধারণায় পৰ্যবসিত হয়। মধ্যযুগের বিভিন্ন দেশে বংশানুক্রমিক রাজতন্ত্র স্থপ্রতিষ্ঠিত হওয়ার পরে প্রজাসাধারণের উপর উৎপীড়ন আরম্ভ হইলে মানুষের এই আদিম প্রবৃত্তি তাহাদিগকে অত্যাচারী রাজতন্ত্রের বিরুদ্ধে ঐক্যবদ্ধভাবে প্রতিবাদ করিবার অহুপ্রেরণা আনিয়া দেয়। অষ্ট্রিয়া, প্রুশিয়া, ও রাশিয়া এই তিনটি রাষ্ট্র যখন যুক্তভাবে পোল জাতির স্বাধীনতা হরণ করিয়া তাহাদের এই সাজাত্যবোধ বিনষ্ট করিবার প্রয়াস পাইল, তখন হইতে এই অহুপ্রেরণা একটা জাতীয় আকাজক্ষার মাধ্যমে কার্যকরী রাষ্ট্রনৈতিক শক্তিতে পরিণত হইল। এই রাষ্ট্রনৈতিক শক্তি সমস্ত নিপীড়িত জাতিকে আত্মসচেতন করিয়া তাহাদের মধ্যে সাজাত্যবোধ-জাগরণে সহায়তা করিল। নেপোলিয়নের পরাজয়ের পরে ইউরোপের রাষ্ট্রধুরন্ধরেরা যখন ভিয়েনায় শান্তিবেঠকে মিলিত হন তখনও পর্যন্ত তাহারা এই সাজাত্যবোধের কার্যকরী শক্তিকে উপেক্ষা করেন। ফলে, এই উপেক্ষিত সাজাত্যবোধ বিপ্লবের মূর্তিতে আত্মপ্রকাশ করিয়া জাতির ন্যায়সম্মত দাবী প্রতিষ্ঠিত করিতে সমর্থ হয়। গ্রীস, বুলগেরিয়া, রুমানিয়া প্রভৃতি দেশের ক্ষুদ্র জাতিগুলি তুরস্কের অধীনতাপাশ হইতে নিজেদের মুক্ত করিয়া স্বাধীন জাতি বলিয়া ঘোষণা করিল। পশুবলের দ্বারা এই সাজাত্যবোধ দমন করা প্রথম মহা-সমরের একটি অন্ততম কারণ বলিয়া বিবেচিত হয়। প্রথম মহাসমর সমাপ্তির পর ভার্সাই সন্ধিবেঠকে সর্বপ্রথম এই সাজাত্যবোধকে স্বীকৃতি দেওয়া হয় ও সাজাত্যবোধ-ভিত্তিতে কতকগুলি নূতন রাষ্ট্র গঠিত হয়। চেকোস্লোভাকিয়া, যুগোস্লাভিয়া, আলবেনিয়া, পোল্যান্ড প্রভৃতি দেশের জাতিগুলি এই সাজাত্যবোধ-ভিত্তির উপর তাহাদের স্বাধীন রাষ্ট্র গঠন করিবার অধিকার অর্জন করে। বর্তমান যুগে এই সাজাত্যবোধ এমনই এক গভীরতর ঐক্যভাবের উপর প্রতিষ্ঠিত হইয়া এত শক্তি সঞ্চয় করিয়াছে যে, পশুবলের প্রয়োগে এই শক্তিকে প্রতিরোধ করা যায় না। প্রথম মহাসমরের পর ইউরোপে সাজাত্যবোধের যে বিজয় অভিধানের সূত্রপাত হইয়াছিল, দ্বিতীয় মহাসমর পরিসমাপ্তির সঙ্গে সঙ্গে পৃথিবীর সর্বত্র বিশেষ করিয়া এশিয়া মহাদেশের নিপীড়িত জাতিগুলির মধ্যে এই অহুভূতি একটি দুর্বার কার্যকরী শক্তিরূপে আত্মপ্রকাশ করিল। ভারত, বর্মা, সিংহল, ইন্দোনেশিয়া প্রভৃতি দেশগুলিও স্বাধীন রাষ্ট্র গঠন করিয়া এক স্বয়ংসম্পূর্ণ জাতি বলিয়া স্বীকৃত হইল। এই রূপে

মাহুঘের আদিম অন্ধ প্রবৃত্তি রাষ্ট্রনৈতিক চেতনার উন্মেষ ও ইতিহাসের ঘাত-প্রতিঘাতে বর্ধিত হইয়া রাজনৈতিক জীবনের চরম পরিণতির পথ সুগম করিল।

এক জাতি এক রাষ্ট্র (One Nation one state)

উপরি-উক্ত আলোচনা হইতে প্রতীয়মান হয় যে, যখন একদল লোক বাহ্যিক বা ভাবগত এক্কেয় দ্বারা নিজেদের পৃথক সত্তা স্বন্ধে আত্মসচেতন হয়, তখনই তাহারা তাহাদের পৃথক সত্তা এক পৃথক রাষ্ট্রনৈতিক সংগঠনের মাধ্যমে বজায় রাখিতে সচেষ্ট হয়। প্রত্যেক আত্মসচেতন জাতি তাহাদের নিজস্ব রাষ্ট্র গঠন করিয়া তাহাদের জাতীয় বৈশিষ্ট্যগুলিকে বাঁচাইতে চায়। জাতির এই দাবী স্বীকৃত হইলে প্রত্যেক রাষ্ট্র মাত্র একটি সম-অনুভূতি-সম্পন্ন জাতি লইয়া গঠিত হইবে—একটি রাষ্ট্রের মধ্যে একাধিক বিরোধী-মনোভাবাপন্ন জাতির সমন্বয় উভয় জাতির বৈশিষ্ট্য রক্ষা করিবার অন্তরায় হইবে। বৈরিভাব, আত্মকলহ প্রভৃতি মুক্ত হইয়া যাহাতে প্রত্যেক জাতি পরস্পরের সহিত শান্তি ও সম্প্রীতিতে বাস করিয়া নিজের সভ্যতা ও কৃষ্টির অবদানে জগৎ-সভ্যতার উন্নতি করিতে পারে সেজন্য রাষ্ট্রগুলি ‘এক জাতি এক রাষ্ট্র’ এই ভিত্তির উপর প্রতিষ্ঠিত হওয়া যুক্তিসঙ্গত। ঊনবিংশ শতাব্দীতে ইংলণ্ডের চিন্তাবীর জন ষ্টুয়ার্ট মিল জাতির ভিত্তিতে গঠিত রাষ্ট্রের একজন প্রধান সমর্থক ছিলেন।

ভারতীয়গণকে কি এক জাতি বলা যাইতে পারে (Is India a Nation ?)

১২৪৭ সালে স্বাধীনতা লাভ করিবার পূর্বে ভারতকে অনেকে একজাতি বলিয়া গণ্য করিতেন না। বিশেষ করিয়া মুসলীম লীগ প্রচারিত দ্বি-জাতি তত্ত্বের ভিত্তিতে ভারতীয়গণকে এক জাতি বলিয়া পরিগণিত করা যুক্তি-সম্মত ছিল না। দেশবিভাগের পরবর্তী কালে পূর্ণ স্বাধীনতা অর্জনের পর ভারতকে আর এক জাতি বলিয়া স্বীকার না করা অসঙ্গত। সত্য সত্যে, ভারতে কুলগত, ভাষাগত, ধর্মগত প্রভৃতি জাতিগঠনের বিভিন্ন বাহ্যিক এক্কেয় অভাব। কিন্তু ভারতবাসী আজ এক গভীরতর ভাবগত এক্কেয়

বন্ধনে আবদ্ধ হইয়া এক ‘সার্বভৌম গণতান্ত্রিক সাধারণতন্ত্র’ প্রতিষ্ঠা করিয়াছে। আর এই স্বাধীন সার্বভৌম রাষ্ট্রের মাধ্যমে ভারতের হিন্দু, বৌদ্ধ, মুসলমান, শিখ, খৃষ্টান প্রভৃতি বিভিন্ন জাতি এক ভাবগত ঐক্যের দ্বারা অল্পপ্রাণিত হইয়া বিশ্বের দরবারে তাহাদের এক্য সুপ্রতিষ্ঠিত করিতে সক্ষম হইয়াছে। অসংখ্য বৈচিত্র্যের মধ্যে এক্য স্থাপন করাই হইল ভারতীয় সভ্যতার মূল আদর্শ। এই আদর্শ স্বাধীন ভারতীয় রাষ্ট্রের মাধ্যমে আজ সফল হইতে চলিয়াছে। সুতরাং তিন জাতি-সম্বিত স্বইসদেশ ও বহু জাতি-সম্বিত সোভিয়েত দেশের মত ভারতীয়গণও আজ এক অখণ্ড জাতিতে পরিণত হইয়াছে।

আত্মনির্ধারণের নীতি ও ইহার সপক্ষে ও বিপক্ষে যুক্তি (Right of Self-determination and arguments for and against it)

প্রথম মহাযুদ্ধের পর যখন প্রত্যেক জাতির স্বতন্ত্র রাষ্ট্রগঠনের দাবী মার্কিন যুক্তরাষ্ট্রের ভূতপূর্ব রাষ্ট্রপতি উড্রো উইলসনের নির্বন্ধাতিশয়ে স্বীকৃত হইল, তখন এই নীতিতে ইয়ুরোপীয় রাষ্ট্রগুলিকে জাতির ভিত্তিতে পুনঃসংগঠিত করিবার একটা প্রচেষ্টা চলিল। প্রত্যেক জাতির স্বতন্ত্র রাষ্ট্রগঠনের এই দাবীকে আত্মনির্ধারণের নীতি বলিয়া আখ্যা দেওয়া হয়। এই নীতির ভিত্তিতেই ‘এক জাতি এক রাষ্ট্র’ মতবাদ সমর্থিত হয়। যে সমস্ত জাতি তাহাদের রাজনৈতিক স্বাধিকার হইতে অন্তায়ভাবে বঞ্চিত হইয়া নিজেদের জাতীয় বৈশিষ্ট্য বিলোপের শেষ ধাপে উপনীত হইয়াছিল, এই আত্মনির্ধারণ-নীতি সেই সমস্ত নষ্টগোরব জাতিকে তাহাদের ভাব, ভাষা, ধর্ম, তাহাদের ব্যবসায়-বাণিজ্য, তাহাদের রাজনৈতিক স্বাধিকার ও ঐতিহ্য পুনরুদ্ধারে সহায়তা করে। সুতরাং এই নীতি প্রয়োগের উপর একটা মুখ্য জাতির জীবনমরণ নির্ভর করে। বাস্তবক্ষেত্রে ইহার প্রযোজ্যতা অস্বীকার করা যায় না। কারণ প্রত্যেক ব্যক্তিরই যেমন নিজস্ব কতকগুলি বৈশিষ্ট্য থাকে, সেইরূপ প্রত্যেক জাতিরই কতকগুলি নিজস্ব বৈশিষ্ট্য থাকে। এই বৈশিষ্ট্যগুলির সম্যক বিকাশের জন্য ব্যক্তি ও জাতির পক্ষে পরপ্রভাবমুক্ত স্বাধীন পরিবেশের প্রয়োজন। ভারতের দৃষ্টিভঙ্গী, ঐতিহ্য ও কৃষ্টি ইংলণ্ড হইতে সম্পূর্ণ পৃথক। সুতরাং ভারতের নিজস্ব বৈশিষ্ট্যগুলির যথাযথ

প্রাক্টনের জন্ত ইংলণ্ডের শাসনপাশ মুক্ত হইয়া স্বাধীন রাষ্ট্র গঠন করিবার প্রয়োজনীয়তা অনস্বীকার্য। নতুবা ভারতের জাতীয় উন্নতি সম্ভব নয়।

এইরূপে প্রত্যেক জাতিই যদি স্বাধীনভাবে তাহার নিজস্ব বৈশিষ্ট্যগুলি বিকাশ করিতে পারে তাহা হইলে প্রত্যেক জাতির জ্ঞান-বিজ্ঞানের অবদানে মানবজাতি সমৃদ্ধ হয়। প্রত্যেক জাতিই অপর জাতির অবদানে লাভবান হয়। এই পারস্পরিক নির্ভরশীলতার ফলে আন্তর্জাতিক বিদ্বেষের স্থলে আন্তর্জাতিক সৌহার্দ্য বৃদ্ধি পায় ও যুদ্ধের আশংকা হ্রাস পায়। কারণ পারস্পরিক নির্ভরশীলতা রাষ্ট্রগুলির মধ্যে বিরোধের মনোভাব দূর করিয়া সহযোগিতার মনোভাব সৃষ্টি করিতে সাহায্য করে। সুতরাং রাজনৈতিক স্বাধিকারের ভিত্তি বহুজাতি না হইয়া একজাতি হওয়া উচিত।

কিন্তু বাস্তবক্ষেত্রে এই আত্মনির্ধারণের নীতি অবাধভাবে প্রয়োগ করা সম্ভব কিনা ও ইহার অবাধ প্রয়োগ জাতীয় স্বার্থের অনুরূপ কি প্রতিকূল তাহা বিবেচনা করা উচিত। যাহারা সর্বক্ষেত্রে এই নীতির অবাধ প্রয়োগ সমর্থন করেন না, তাঁহারা এই নীতির বিরুদ্ধে কতকগুলির যুক্তির অবতারণা করেন। প্রথমতঃ, বলা হয় যে, সর্বক্ষেত্রে এই নীতি প্রয়োগ করা সম্ভব নয়, বাঞ্ছনীয়ও নয়। যে সমস্ত ক্ষেত্রে কতকগুলি ক্ষুদ্র ক্ষুদ্র জাতি বহুদিন হইতে এক নির্দিষ্ট ভৌগোলিক ভূভাগে এক্যবদ্ধভাবে বসবাস করিবার ফলে সম-স্বত্বদুঃখভোগী হইয়া এক আদর্শে অনুপ্রাণিত হইয়াছে, পরবর্তী কালে কোন আকস্মিক কারণে সেই ক্ষুদ্র জাতিগুলিকে আত্মনির্ধারণ নীতির ভিত্তিতে পৃথক রাষ্ট্র গঠন করিবার অধিকার দেওয়া জাতিগুলির স্বার্থের প্রতিকূল হইবে। অপর পক্ষে, যদি একটি জাতির দুইটি অংশ সমুদ্র, পর্বত বা অন্ত কোন নৈসর্গিক ব্যবধানে দুইটি পৃথক ভৌগোলিক ভূভাগের বাসিন্দা হয়, তাহা হইলেও তাহাদের এক রাষ্ট্রের অন্তর্ভুক্ত করিয়া একত্র সমাবেশ দ্বারা আত্মনির্ধারণের নীতি কার্যকরী করা বাঞ্ছনীয় নয়। কিন্তু যাহাকে পূর্বে অসম্ভব ও অবাঞ্ছনীয় বলা হইত, ঘটনাচক্রে বর্তমান শতাব্দীতে তাহা সম্ভব, সুতরাং বাঞ্ছনীয় বলিয়া অভিহিত হইয়াছে। প্রথম মহাসমরের পর গ্রীস ও তুরস্কের মধ্যে প্রথম লোক-বিনিময়ের সূত্রপাত হয়। তুরস্কের গ্রীক অধিবাসিগণ গ্রীসে ফিরিয়া আসে আর গ্রীসের তুর্ক অধিবাসিগণ তুরস্কে প্রত্যাবর্তন করে। লোক-বিনিময়ের মাধ্যমে আত্মনির্ধারণ-নীতির প্রয়োগ

স্বারা 'এক জাতি এক রাষ্ট্র' এই সমস্তার সমাধান জার্মানি ও চেকোস্লোভাকিয়া এবং জার্মানি ও পোল্যান্ডের ক্ষেত্রেও অসম্ভব হয়। ইদানীং কালে ভারত-বিভাগের ফলে লোক-বিনিময় অনেক স্থলে পরোক্ষভাবে বাধ্যতামূলকরূপে দেখা দিয়াছে। এরূপ অধিক সংখ্যায় ও অনিয়ন্ত্রিতভাবে লোক-বিনিময় বোধহয় অন্য কোন দেশে ইতিপূর্বে আর কখনও হয় নাই।

দ্বিতীয়তঃ, প্রতিষ্ঠিত পুরাতন রাষ্ট্রগুলির ক্ষেত্রে যদি এই নীতির অবাধ প্রয়োগ হয় তাহা হইলে বর্তমান আটশটি রাষ্ট্রের পরিবর্তে ইউরোপে প্রায় আটবড়িটি রাষ্ট্রের উদ্ভব হইবে। ক্ষুদ্র সুইস দেশ ও ইংলও প্রত্যেকটি তিন ভাগে বিভক্ত হইয়া তিনটি অতি ক্ষুদ্র রাষ্ট্রে পরিণত হইবে। এই তিনটির কোনটিই স্বয়ংসম্পূর্ণ বা আত্মনির্ভরশীল হইতে পারিবে না। পরন্তু, দেশ-বিভাগের ফলে অর্থনৈতিক ও অন্যান্য যে সমস্ত সমস্যা দেখা দিবে, সেগুলির সম্ভাব্যজনক সমাধান না হইলে ক্ষুদ্র ক্ষুদ্র রাষ্ট্রগুলি সর্বদাই আত্মকলহে লিপ্ত থাকিয়া তাহাদের সভ্যতা ও কৃষ্টির অগ্রগতিতে ষড়্বান হইতে পারিবে না।

তৃতীয়তঃ, স্বতন্ত্র রাষ্ট্র গঠন করিতে পারিলেই যে ক্ষুদ্র ক্ষুদ্র রাষ্ট্রগুলি সম্পূর্ণ আত্মনির্ভরশীল হইয়া তাহাদের সর্বাঙ্গীণ উন্নতি সাধন করিতে পারিবে ইহার কোন নিশ্চয়তা নাই। অধিকাংশ ক্ষেত্রে এই ক্ষুদ্র জাতিগুলির অচিরে কোন সাম্রাজ্যবাদী রাষ্ট্রের তাঁবেদার হইবার সম্ভাবনা থাকে।

চতুর্থতঃ, এই নীতির ভিত্তিতে রাষ্ট্র-পুনর্গঠন কার্য একবার আরম্ভ হইলে ইহার আর পরিসমাপ্তি হইবে না। প্রত্যেকটি ক্ষুদ্র জাতি এই আত্মনির্ধারণ-নীতির ভিত্তিতে স্বতন্ত্র-রাষ্ট্র গঠন করিবার দাবী করিবে। ফলে, একব্যবস্থ বহু রাষ্ট্রের বিলোপ ঘটিবে। রাজনীতি গ্রাম্য দলীয় মনোভাবে পর্যবসিত হইবে। আন্তর্জাতিক ক্ষেত্রেও ইহার ভয়াবহ প্রতিক্রিয়া দেখা দিবে। জাতিগুলির মধ্যে আত্মকলহ, ক্ষমতালিপ্সা, প্রতিশোধ-স্পৃহা প্রভৃতি প্রবল আকার ধারণ করিয়া যুদ্ধ অনিবার্য করিয়া তুলিবে। ফলে শান্তির পরিবর্তে জগতে এক অশান্তির রাজত্ব প্রতিষ্ঠিত হইবে।

পঞ্চমতঃ, এই নীতির অবাধ প্রয়োগের বিরুদ্ধে বলা যায় যে, বহু জাতির সমন্বয়ে গঠিত রাষ্ট্রগুলি (Poly-national States) যে এক জাতির ভিত্তিতে গঠিত রাষ্ট্রগুলি অপেক্ষা অনগ্রসর বা অপেক্ষাকৃত দুর্বল, একথা

ঠিক নয়। অধিকন্তু অনেক ক্ষেত্রে দেখা যায় যে, বহু জাতির সমন্বয়ে গঠিত রাষ্ট্র জ্ঞানবিজ্ঞানে, সভ্যতায়, কৃষ্টিতে ও শক্তিসামর্থ্যে অনেক এক জাতির ভিত্তিতে গঠিত রাষ্ট্র (Mono-national States) অপেক্ষা অধিক অগ্রসর ও শক্তিশালী। মার্কিন যুক্তরাষ্ট্র, সোভিয়েত রুশিয়া, সুইস দেশ, গ্রেট ব্রিটেন প্রভৃতি রাষ্ট্রগুলি ইহার সত্যতা প্রমাণ করে।

এতদ্ব্যতীত এই আত্মনির্ধারণ-নীতি রাষ্ট্রের অন্তর্ভুক্ত কোন একটি অসমৃষ্ট জাতির দাবীর দ্বারা স্বীকৃত হইতে পারে না—ইহার স্বীকৃতি ও ইহার প্রয়োগ-ক্ষমতা নির্ভর করে জাতীয় রাষ্ট্রের সার্বভৌম ক্ষমতার ইচ্ছার উপর। সুতরাং এই আত্মনির্ধারণের নীতি একটি নৈতিক দাবী মাত্র, কাজেই ইহাকে একটি আইনসম্মত দাবী বলা চলে না। ১৯২০ খ্রীষ্টাব্দে আলাও দ্বীপ এই আত্মনির্ধারণ-নীতির ভিত্তিতে যখন ফিনল্যান্ডে দেশ হইতে বিচ্ছিন্ন হইয়া সুইডেনের সহিত মিলিত হইবার দাবী জানাইল, তখন লীগ অব নেশন্সের সিদ্ধান্ত অনুযায়ী ঐ জাতির এই দাবী শুধু নৈতিক দাবী বলিয়া স্বীকৃত হইয়াছিল।

সুতরাং এই দাবীসম্পর্কে বলা যায় যে, ইহা সর্বক্ষেত্রে অবাধভাবে প্রযোজ্য নহে। কোন কোন ক্ষেত্রে, বিশেষ করিয়া যখন একটি প্রাচীন ঐতিহ্যবিশিষ্ট জাতিকে বলপূর্বক অপর একটি জাতি তাহার পদানত করিয়াছে বা সংখ্যালঘিষ্ঠ হইলেও সমগ্র জনসমষ্টির এক বিশাল অংশ তাহাদের পৃথক ঐতিহ্যের ভিত্তিতে এই স্বাধিকার দাবী করে—সেই সকল ক্ষেত্রে আত্মনির্ধারণ-নীতি প্রয়োগ করা একান্ত আবশ্যক। পোল্যান্ড, ফিনল্যান্ড, ভারত, বর্মা ও কোরিয়ার এই দাবী নৈতিক ও আইনসম্মত ভিত্তির উপর প্রতিষ্ঠিত ছিল। পশুবলের সাহায্যে জাতির এই আত্মনির্ধারণের দাবী চিরদিন দমিত রাখা সম্ভব নয়—ইতিহাস তাহার সাক্ষ্য।

জাতির অন্ত্যাত্ম দাবী (Other Rights of Nationalities)

আত্মনির্ধারণের দাবী সর্বক্ষেত্রে প্রযোজ্য না হইলেও জাতির অন্ত্যাত্ম দাবীগুলি পূরণ করা উচিত। বহু জাতির সমন্বয়ে গঠিত রাষ্ট্রে সংখ্যালঘিষ্ঠ সম্প্রদায়গুলি অন্ত্যাত্ম কতকগুলি অধিকারের দাবী করিতে পারে। এই অধিকারগুলি পূরণ করিতে জাতীয় রাষ্ট্রের যত্নবান হওয়া উচিত।

(ক) জাতীয় বৈশিষ্ট্য বজায় রাখিবার অধিকার (Right to Exist)

একটি রাষ্ট্রের অন্তর্ভুক্ত প্রত্যেক সম্প্রদায়ের লোকগুলিকে তাহাদের নিজস্ব বৈশিষ্ট্যগুলি বজায় রাখিবার অধিকার দেওয়া উচিত। জাতীয় রাষ্ট্র এমন কোন নীতি বা আইন বলবৎ করিবে না, যাহাতে প্রত্যক্ষভাবে বা পরোক্ষভাবে বিভিন্ন সম্প্রদায়গুলির বৈশিষ্ট্য বিনষ্ট হইতে পারে।

(খ) ভাষা রক্ষার অধিকার (Right to Language)

একটি রাষ্ট্রে বিভিন্ন ভাষাভাষী সংখ্যালঘিষ্ঠ সম্প্রদায় বাস করিতে পারে। এই সংখ্যালঘিষ্ঠ সম্প্রদায়গুলি তাহাদের নিজেদের ভাষার মাধ্যমে যাহাতে ভাবের আদান-প্রদান, শিক্ষাকার্য বা সাহিত্য ও কৃষ্টির পুষ্টিসাধন করিতে পারে, তজ্জন তাহাদের পূর্ণ সুযোগ দেওয়া উচিত। বলপূর্বক সংখ্যালঘিষ্ঠের ভাষার ব্যবহার বন্ধ করিয়া তাহাদের উপর সংখ্যাগরিষ্ঠের ভাষা বাধ্যতামূলক করা উচিত নয়। কিন্তু তাই বলিয়া সংখ্যালঘিষ্ঠ সম্প্রদায় তাহাদের মাতৃভাষাকে রাষ্ট্রভাষার মর্যাদা দান করিবার দাবী করিতে পারে না।

(গ) সংখ্যালঘিষ্ঠের স্থানীয় আচার ও প্রথা রক্ষার অধিকার (Right to Retention of Local Laws and Customs)

সংখ্যালঘিষ্ঠ সম্প্রদায়ের এই অধিকারের দাবী লীগ অব নেশন্স কর্তৃক স্বীকৃত হয়। প্রত্যেক জাতির সামাজিক জীবন কতকগুলি আচার, রীতি-নীতি ও প্রথার দ্বারা অনেক পরিমাণে নিয়ন্ত্রিত হয়। জাতীয় জীবনের অনেকখানি স্থান এই সামাজিক প্রথাগুলি অধিকার করিয়া থাকে। কোন সম্প্রদায়ের এই সামাজিক প্রথাগুলি যদি সমগ্র জাতীয় জীবনের বা জাতীয় নৈতিক জ্ঞানের পরিপন্থী না হয় তাহা হইলে এই প্রথাগুলি সর্বতোভাবে সংরক্ষণ করা রাষ্ট্রের কর্তব্য।

(ঘ) আইনগত ও রাজনৈতিক সাম্যের অধিকার (Right to Legal and Political Equality)

● জাতি-বর্ণ-ধর্ম-নির্বিশেষে প্রত্যেক সম্প্রদায়ের লোক এই দুই প্রকার অধিকারের দাবী করিতে পারে। যোগ্যতা থাকিলে প্রত্যেক নাগরিকই—সে যে সম্প্রদায়ের লোক হউক না কেন, ভোট দিবার ক্ষমতা বা সরকারের

সর্ববিধ কার্যে যোগদান করিবার অধিকার অর্জন করে। সংখ্যাগরিষ্ঠ বা সংখ্যালঘিষ্ঠ সম্প্রদায়ের লোক বলিয়া কাহারও অধিকারের কোন তারতম্য হওয়া উচিত নয়। আইনের চক্ষে সব নাগরিকই সমান। কিন্তু সংখ্যালঘিষ্ঠ বলিয়া কোন সম্প্রদায় রাষ্ট্রের নিকট হইতে কোনরূপ বিশেষ অধিকার ভোগের দাবী করিতে পারে না।

জাতীয়তাবাদ (Nationalism)

পূর্বেই বলা হইয়াছে যে, সাজাত্যবোধ একটা মানসিক অহুভূতির উপর প্রতিষ্ঠিত। এই মানসিক অহুভূতির সক্রিয় বহিঃপ্রকাশের ফলে কতকগুলি জাতির সমন্বয়ে গঠিত রাষ্ট্র ভাঙ্গিয়া এক জাতির ভিত্তিতে ক্ষুদ্র ক্ষুদ্র রাষ্ট্র গঠিত হইয়াছে। এই অহুভূতি মানুষকে তাহার অধিকারগুলি সম্বন্ধে আত্মসচেতন করিয়া নির্ধারিত পরাধীন জাতিগুলির মুক্তিলাভের পথের সন্ধান আনিয়া দেয়। প্রত্যেক মুক্ত জাতি তাহার নিজ ইচ্ছা অনুযায়ী পৃথক রাষ্ট্র গঠন করিয়া জগৎসভায় তাহার ত্রাণ্য আসন লাভ করিতে পারে। জাতীয়তাবোধ উন্মেষের সঙ্গে সঙ্গে প্রত্যেক জাতি তাহার নিজস্ব স্বাভাবিক রক্ষা করিয়া নিজ অভিপ্রায় অনুযায়ী তাহার জাতীয় জীবন সংগঠন করিতে পারে। জাতীয়তাবোধ মানুষকে শিক্ষা দিয়াছে যে, জাতির অন্তর্ভুক্ত প্রত্যেকটি লোক তাহার সমষ্টিগত জাতীয় জীবনের প্রতি নির্বিচারে আনুগত্য স্বীকার করিবে, কেন-না, জাতির স্বার্থের সহিত ব্যক্তির স্বার্থ অবিচ্ছিন্নভাবে জড়িত। সুতরাং জাতীয় স্বার্থের সংরক্ষণ ও ইহার উন্নতিবিধান প্রত্যেক মানুষের পবিত্র কর্তব্য। রাষ্ট্রনৈতিক জীবনের জাতীয় রাষ্ট্রগঠনই হইল প্রথম ও শেষ অধ্যায়।

সুতরাং রাষ্ট্রবিজ্ঞানে জাতীয়তাবোধ একটি মহান্ আদর্শ বলিয়া পরিগণিত হয়। যদি ব্যক্তিত্বের পূর্ণ বিকাশের জন্য ব্যক্তিস্বাধীনতা অপরিহার্য হয়, তাহা হইলে ব্যক্তিসমষ্টির সমন্বয়ে যে জাতি গঠিত হয়, সেই সমষ্টিগত জীবনের পক্ষেও জাতীয় স্বাধীনতা অপরিহার্য। মানবসভ্যতা বিকাশের জন্যই প্রত্যেক প্রকৃত স্বতন্ত্র জাতির এই অধিকার থাকা প্রয়োজন। এই অধিকারের বলে প্রত্যেক জাতি তাহার নিজস্ব গুণাবলী, সভ্যতা ও সংস্কৃতির পুষ্টিসাধন করিয়া জগৎ সভ্যতাকে উন্নততর করিতে সহায়তা করে।

রাষ্ট্রনীতিতে জাতীয়তাবাদের আবির্ভাবের কলে বহু দেশে একনায়কত্বের অবসান হইয়া গণতন্ত্র প্রতিষ্ঠিত হইয়াছে। জাতীয়তাবাদ জাতির মধ্যে আত্মপ্রত্যয় সঞ্চারিত করিয়া একটা মহৎ কিছু করিবার অনুপ্রেরণা দেয়।

বিকৃত জাতীয়তাবাদ (Perverted Nationalism)

কিন্তু এই জাতীয়তাবাদ যদি বিকৃত হয়, তাহা হইলে জাতির পক্ষে তাহার পরিণাম ভয়াবহ। জাতীয়তাবাদের বিকৃতি দুইটি কারণে ঘটিতে পারে। প্রথম কারণটি জাতির আভ্যন্তরীণ ব্যবস্থা হইতে উদ্ভূত হয়, আর দ্বিতীয়টি নির্ভর করে এক জাতির সহিত অন্ত্র জাতির সম্পর্কের উপর। কতকগুলি ক্ষুদ্র উপজাতি বা সম্প্রদায়ের সমন্বয়ে একটি পূর্ণ জাতি গঠিত হয়। মূলগত ঐক্য থাকিলেও এই সম্প্রদায়গুলি বিভিন্ন ভাষাভাষী বা বিভিন্ন ধর্মাবলম্বী হইতে পারে, বা বিভিন্ন আচার-প্রথার দ্বারা তাহাদের সামাজিক জীবন নিয়ন্ত্রিত হইতে পারে। অনেক সময় দেখা যায় যে, এইরূপ এক বা একাধিক সম্প্রদায় মূল জাতি হইতে তাহাদের স্বাভাব্য পৃথকভাবে প্রতিষ্ঠা করিবার জন্য সাম্প্রদায়িক ভাষা, ইতিহাস ও কৃষ্টির উপর গুরুত্ব আরোপ করিয়া এক পৃথক স্বাধীন রাষ্ট্র গঠন করিতে সচেষ্ট হয়। এই মনোভাবের দ্বারা প্ররোচিত হইয়া ক্যারেন জাতি বর্মী হইতে স্বাভাব্য দাবী করিতেছে। স্লোভাক ও স্লোভেনিস্ সম্প্রদায়গুলিও চেকোস্লোভাকিয়া হইতে পৃথক হইবার দাবী জানাইতেছে। এই মনোভাবকে বিকৃত ও সংকীর্ণ জাতীয়তাবাদ বলা চলে। এই মনোভাবের ফলে একটি সুপ্রতিষ্ঠিত জাতি তাহার সমষ্টিগত সংহতি ও ঐতিহ্য হারাইয়া ছিন্ন-ভিন্ন হইয়া যাইতে পারে—স্বদেশপ্রেম প্রাদেশিকতায় পর্যবসিত হয়। ভারতেও কোন কোন সম্প্রদায়ের মধ্যে এই স্বার্থপ্রণোদিত ভেদবুদ্ধি কিছু কার্যকরী হইয়াছে। এইরূপ মনোভাব জাতীয় জীবনের পক্ষে ভয়ানক ক্ষতিকর। সুতরাং অঙ্কুরেই ইহার বিনাশসাধন না করিলে জাতীয় জীবনে ইহা সংক্রামক ব্যাধির মত পরিব্যাপ্ত হইতে পারে।

দ্বিতীয়তঃ, যখন কোন জাতি স্বীয় ঐতিহ্য ও কৃষ্টিতে অত্যধিক আত্মবিশ্বাস হইয়া অপর জাতিকে অবজ্ঞা করিতে শিখে এবং নিজের শ্রেষ্ঠত্ব ছলে-বলে-কৌশলে অপেক্ষাকৃত অনগ্রসর জাতির উপর চাপাইতে চায়, তখন এই জাতীয়তাবাদ আক্রমণাত্মক মূর্তি ধারণ করিয়া বিশ্বশান্তির অন্তরায় হইয়া

উঠে। এইরূপ বিকৃত জাতীয়তাবোধের বৈশিষ্ট্য হইল যে, ইহা শুধু নিজ জাতির প্রতি ভালবাসা বা আত্মরূপে প্রকাশ না পাইয়া অন্য জাতির প্রতি ঘৃণা ও বিদ্বেষে পরিণত হয়। ফলে, শক্তিশালী জাতিসমূহ নিজেদের জাতীয় গর্ব ও শক্তি প্রচার করিবার মানসে দুর্বল জাতিগুলির স্বাধীনতা হরণ করে। বর্তমান যুগে এই আক্রমণাত্মক জাতীয়তাবাদ জাতির অর্থনৈতিক উদ্দেশ্য সাধন করিবার জন্য পৃথিবী ব্যাপিয়া ইহার প্রভাব বিস্তার করিতে উদ্যত হইয়াছে। বড় বড় জাতিগুলি শিল্পের জন্য কাঁচামাল সংগ্রহ ও উৎপাদিত শিল্পজাত দ্রব্য অতিরিক্ত মুনাফায় বিক্রয় করিবার জন্য দুর্বল রাষ্ট্রগুলিতে উপনিবেশ স্থাপন করে। ব্যবসা-বাণিজ্য-প্রসারের উদ্দেশ্যে অথবা খ্রীষ্টধর্ম-প্রচারের অজুহাতে ইউরোপীয় জাতিসমূহ এশিয়া, আফ্রিকা প্রভৃতি মহাদেশের বহু ক্ষুদ্র জাতির স্বাধীনতা হরণ করিয়া বিশাল সাম্রাজ্য প্রতিষ্ঠা করিয়াছে। অনেক সময় এই উপনিবেশ খুঁজিতে গিয়া দুই বা ততোধিক বৃহৎ জাতির মধ্যে সংঘর্ষ অনিবার্য হইয়া উঠিয়াছে। এইরূপ বিদ্বেষমূলক ও আক্রমণাত্মক জাতীয়তাবোধের জন্য প্রত্যেক জাতীয় রাষ্ট্রকে সর্বদা প্রতিদ্বন্দ্বী রাষ্ট্রের সহিত অথবা বিজিত জাতিগুলির সহিত যুদ্ধের জন্য প্রস্তুত থাকিতে হয়। মেজাজ বিরাট সামরিক বাহিনী ও রণসম্ভার রাখা প্রয়োজন; কিন্তু ইহার ফলে আন্তর্জাতিক অবস্থা এমন হইয়া দাঁড়ায় যে, সামান্য কোন কারণেই জাতিগুলির মধ্যে বিদ্রোহী যুদ্ধ বাধিয়া যায়। বড় বড় রাষ্ট্রগুলির সংকীর্ণ ও স্বার্থপ্রণোদিত জাতীয়তাবাদের পরিণামে যে সংঘর্ষ উপস্থিত হয় তাহাতে ক্ষুদ্র রাষ্ট্রগুলির অস্তিত্ব বিপদাপন্ন হয়। স্বার্থের হানাহানির কি ভীষণ পরিণাম, বিগত দুইটি মহাসমর তাহার জলন্ত দৃষ্টান্ত। অধুনা আবার কয়েকটি বৃহৎ বিত্তশালী রাষ্ট্র অর্থসাহায্য দিয়া দুর্বল রাষ্ট্রগুলির উপর কর্তৃত্ব স্থাপন করিবার প্রয়াস পাইতেছে। ক্ষুদ্র রাষ্ট্রগুলি যদি অর্থনৈতিক ব্যাপারে বৃহৎ রাষ্ট্রের উপর নির্ভরশীল হয়, তাহা হইলে শেষ পর্যন্ত এই অর্থনৈতিক নির্ভরশীলতা তাহাদের রাজনৈতিক স্বাধীনতা নষ্ট করিয়া তাহাদিগকে বৃহৎ শক্তিশালী রাষ্ট্রের তাঁবেদার রাষ্ট্রে পরিণত করিতে পারে।

জাতীয়তাবাদ একটা মহান আদর্শ। এই আদর্শে প্রত্যেক জাতিকেই প্রগতির পথে অগ্রসর হইতে সহায়তা করে। ইহার মূলনীতি হইল—আপনি বাঁচ ও অপরকে বাঁচিতে দাও। কিন্তু আদর্শত্রয় জাতীয়তাবাদ

একটা সংকীর্ণ মনোভাবের পরিচায়ক এবং যখন এই জাতীয়তাবাদ ইহার মহান আদর্শভ্রষ্টে হইয়া আক্রমণাত্মক হইয়া উঠে তখন ইহা যুদ্ধবাদে পরিণত হয় আর যুদ্ধবাদ সাম্রাজ্যবাদেরই জন্মদাতা।

সাম্রাজ্যবাদ (Imperialism)

আক্রমণাত্মক জাতীয়তাবাদ হইতে সাম্রাজ্যবাদের উৎপত্তি হয়। যখন কোন শক্তিশালী জাতীয় রাষ্ট্র বলপূর্বক দুর্বল রাষ্ট্রগুলিকে গ্রাস করিয়া তাহাদের উপর আধিপত্য বিস্তার করে ও নানাভাবে এই দুর্বল রাষ্ট্রগুলিকে স্বীয় স্বার্থসাধনের জন্ত শোষণ করে, তখনই সাম্রাজ্যবাদের অভ্যুদয় হয়। বিজিত রাষ্ট্রগুলির স্বাধীনতা নষ্ট করিয়া তাহাদের ঐতিহ্য, রুষ্টি, শিক্ষাদীক্ষা, কৃষি ও শিল্প-বাণিজ্য বিজেতাগণ তাহাদের ইচ্ছানুসারে নিয়ন্ত্রিত করে। সাম্রাজ্য ব্যাপিয়া একই শাসনব্যবস্থা ও একই আইন বলবৎ করা হয়। ইংলও, জার্মানি, ইতালি, জাপান প্রভৃতি রাষ্ট্রগুলি এমন কি ক্ষুদ্রকায় ও অপেক্ষাকৃত অল্প শক্তিশালী রাষ্ট্র বেলজিয়াম ও হল্যান্ড পররাজ্য গ্রাস করিয়া সাম্রাজ্যবাদের প্রসার করিতে দ্বিধা করে নাই।

সাম্রাজ্যবাদীরা আন্তর্জাতিক ক্ষেত্রে তাহাদের এই লুণ্ঠনকার্য সমর্থনের অভিপ্রায়ে অনেক দার্শনিক তত্ত্বেরও অবতারণা করিয়া থাকে। তাহারা বলে যে, দুর্বল ও অক্ষম জাতিগুলির পক্ষে তাহাদের নিজেদের অগ্রগতির জন্ত সবল ও বৃদ্ধমান জাতির সংস্পর্শে আসা উচিত বা সভ্য জাতিগুলি অনগ্রসর জাতিগুলিকে সভ্যতার উচ্চস্তরে পৌঁছিয়া দিবার জন্ত তাহাদের শাসনভার গ্রহণ করিয়াছে। সুতরাং, সভ্য জাতিগুলি নিঃস্বার্থে এই গুরুভার বহন করিতেছে।

সাম্রাজ্যবাদের পিছনে যে-কোন দার্শনিক তত্ত্ব থাকুক না কেন, সাম্রাজ্যবাদ যে একটা সর্বনাশা প্রলয়ংকর শক্তি ইহা আজ অবিসংবাদী সত্যরূপে প্রমাণিত হইয়াছে। সাম্রাজ্যবাদের ফলে যুদ্ধ অনিবার্য হইয়া উঠে, মানবসভ্যতা ও প্রগতি বাধাপ্রাপ্ত হয়। বিভিন্ন জাতির মধ্যে বিদ্বেষানল প্রজ্জ্বলিত করিয়া সাম্রাজ্যবাদ পৃথিবীর সভ্যতার পক্ষে বিপদস্বরূপ হইয়া দাঁড়ায়। তাই আজ পৃথিবীতে সাম্রাজ্যবাদের বিরুদ্ধে আন্দোলন চলিয়াছে।

যুক্তরাষ্ট্রীয় শাসনব্যবস্থার প্রচলন করিয়া সাম্রাজ্যবাদের কঠোরতা হ্রাসত কিছু প্রশমিত করা যায়। এই ব্যবস্থা দ্বারা সাম্রাজ্যের অন্তর্ভুক্ত উপনিবেশ-

গুলিতে স্বায়ত্তশাসন-ব্যবস্থা চালু করিলে ক্ষুদ্র ক্ষুদ্র জাতিগুলি তাহাদের জীবনযাত্রা-প্রণালী অন্ততঃ কিছু পরিমাণে নিজেরাই নিয়ন্ত্রণ করিতে পারে।

আন্তর্জাতিকতা (Internationalism)

আন্তর্জাতিকতা শুধু একটা রাষ্ট্রনৈতিক অহুত্বের ব্যাপার নহে, ইহার একটা আধ্যাত্মিক তাৎপর্যও আছে। এই অহুত্বটি হৃদয়ঙ্গম করিতে পারিলে দেশ-কাল-পাত্র প্রভৃতি ক্ষুদ্র গতির বন্ধন ছিন্ন করিয়া মানুষ বিশ্বমানবতার স্তরে উপনীত হইতে পারে। আত্মপ্রীতি ও আত্মপ্রত্যয় মানুষের শ্রেষ্ঠ গুণ, কিন্তু পরবিদ্বেষ ও অবিশ্বাসের মনোভাব পোষণ করা দূষণীয়। স্বার্থসম্বন্ধে তৎপর হওয়া মানুষের ধর্ম, কিন্তু স্বার্থপরতা সর্বথা পরিত্যাজ্য। ব্যক্তিগত জীবনে যদি এই নীতি প্রযোজ্য হয়, তাহা হইলে জাতীয় জীবনেও ইহার প্রয়োগ অস্বীকার করা যায় না। জাতীয় জীবনে এই নীতি কার্যকরী হইলে আন্তর্জাতিক বিদ্বেষ ও আন্তর্জাতিক কলহের আর সম্ভাবনা থাকে না। স্বাধীনতা, সাম্য ও মৈত্রীভাব—এই মহান্ আদর্শ কোন জাতিবিশেষের জন্ত রচিত হয় নাই, পরন্তু ইহা সর্বজাতির আদর্শ—এই মনোভাবের উদয় হইলে আন্তর্জাতিকতা প্রতিষ্ঠা করা সহজসাধ্য হয়। আন্তর্জাতিকতার প্রধান উদ্দেশ্য হইল, প্রত্যেক স্বতন্ত্র জাতিকে তাহার স্বাভাব্য বজায় রাখিবার সুযোগ দিয়া পরস্পরের মধ্যে আদর্শগত ও কৃষ্টিগত ভাবের আদান-প্রদান সম্ভব করিয়া বিশ্বমৈত্রী প্রতিষ্ঠা করা। প্রত্যেক জাতি যদি তাহার জাতিগত বৈশিষ্ট্য বজায় রাখিতে পারে, তাহা হইলে আন্তর্জাতিক বিদ্বেষ ও বিবাদের অবসান ঘটবে। আন্তর্জাতিক বাণিজ্য, আন্তর্জাতিক নীতিজ্ঞান ও আন্তর্জাতিক আইন বর্তমান যুগে রাষ্ট্রগুলিকে নানাভাবে পরস্পরের সংস্পর্শে আনিয়া আন্তর্জাতিকতা সৃষ্টির সহায়তা করিতেছে। আন্তর্জাতিকতা-বৃদ্ধির পথে একমাত্র অন্তরায় হইল রাষ্ট্রের সার্বভৌম শক্তির প্রচলিত ভ্রান্ত ধারণা। রাষ্ট্রের এই সার্বভৌম শক্তির প্রয়োজনীয়তা নির্ভর করে রাষ্ট্রের কতকগুলি মহান্ কর্তব্য পালনের উপর। রাষ্ট্রের এই কর্তব্য হইল আভ্যন্তরীণ শান্তি-শৃংখলা রক্ষা করিয়া মানুষের সর্বাঙ্গিক অগ্রগতিতে সাহায্য করা। যে সার্বভৌম শক্তির বলে রাষ্ট্র আভ্যন্তরীণ শান্তি-শৃংখলার রক্ষক বলিয়া পরিগণিত হয়, আন্তর্জাতিক ক্ষেত্রে যুদ্ধবাদের দ্বারা বিশ্বশান্তি-বিনাশে সেই

সার্বভৌম ক্ষমতার প্রয়োগ হইতে পারে না—মানুষ যেদিন এই সত্য সম্যক উপলব্ধি করিতে পারিবে সেদিন জাতীয়তাবাদ ও আন্তর্জাতিকতার মধ্যে কোনরূপ বিরোধ থাকিবে না—‘দিবে আর নিবে, মিলাবে মিলিবে’—এই নীতির দ্বারাই জাতীয় জীবন পরিচালিত হইবে। পারস্পরিক মদিচ্ছা ও সহযোগিতার উপর আন্তর্জাতিকতার ভিত্তি প্রতিষ্ঠিত করিতে হইবে। বর্তমান জগতে এই নৈতিক মনোভাবের উদয় না হইলে পৃথিবীতে চিরস্থায়ী শান্তি স্থাপন করা সম্ভব নয়।

সম্মিলিত জাতিপুঞ্জ (United Nations)

পারস্পরিক সহযোগিতা যে আন্তর্জাতিক ক্ষেত্রে প্রত্যেক জাতির পক্ষে অপরিহার্য এই সত্য প্রথম বিশ্বযুদ্ধ অবসানের পর অনেক জাতি বুঝিতে পারিয়াছিল। তাহারা জাতীয়তাবাদের মূল প্রকৃতি চরম সার্বভৌমত্বের দাবী আংশিকভাবে পারিত্যাগ করিয়া আন্তর্জাতিক শাসনব্যবস্থা প্রবর্তন করাইবার জন্য লীগ অব নেশন্সের প্রতিষ্ঠা করে। কিন্তু এই প্রতিষ্ঠানের গঠনগত ও প্রকৃতিগত ত্রুটি থাকায় সম্পূর্ণরূপে ইহার উদ্দেশ্য সাধন করিতে বিফলকাম হয়। বিশেষ করিয়া মার্কিন যুক্তরাষ্ট্রের মত প্রতিপত্তিশালী রাষ্ট্র ইহার সদস্য না থাকায় ইহার মর্যাদা ও কার্যকারিতা অনেকাংশে ক্ষুণ্ণ হইয়াছিল। কয়েক বৎসর আংশিক সাফল্যের সহিত কাজ করিবার পর ইতালির সহিত আভিসিনিয়ার যুদ্ধের সময় এই প্রতিষ্ঠানের দুর্বলতা বিশেষরূপে প্রকটিত হয় এবং ইহার নিষ্ক্রিয়তার ফলে দ্বিতীয় মহাযুদ্ধ ভরাস্থিত হইয়া ইহার ব্যর্থতা প্রমাণিত করে।

দ্বিতীয় মহাযুদ্ধের ভয়াবহতা আরও ভীষণ আকার ধারণ করিয়াছিল। যুদ্ধে লিপ্ত জাতিগুলি ও নিরপেক্ষ জাতিগুলি এবার বুঝিতে পারিল যে, একটা আন্তর্জাতিক সংস্থা গঠন করিয়া তাহার মাধ্যমে এই সর্বনাশা যুদ্ধব্যবসায় বন্ধ না করিতে পারিলে মানুষের আর পরিত্রাণের পথ নাই। তাই যুদ্ধকালীন অবস্থায় যুদ্ধরত জাতিগুলির মধ্যে যুদ্ধশেষে একটা আন্তর্জাতিক শাসনব্যবস্থা প্রবর্তন করিবার ইচ্ছা তীব্র হইয়া উঠে। প্রধানতঃ মার্কিন যুক্তরাষ্ট্রের ভূতপূর্ব রাষ্ট্রপতি রুজভেল্টের চেষ্টায় এবং ব্রিটিশ ও সোভিয়েত রাষ্ট্রের প্রধানদের সহযোগিতায় এই আন্তর্জাতিক সংস্থা

সম্মিলিত জাতিপুঞ্জ (United Nations) নামে গঠিত হয়। কিন্তু এই প্রতিষ্ঠান গঠন ব্যাপারে বিজিত জাতিগুলির কোনপ্রকার প্রভাব ছিল না।

সম্মিলিত জাতিপুঞ্জের উদ্দেশ্য (Objectives of the U. N.)

লীগ অব নেশন্সের ত্রায় সম্মিলিত জাতিপুঞ্জও এক মহান আদর্শের ভিত্তির উপর প্রতিষ্ঠিত হইয়াছে। এই প্রতিষ্ঠানের প্রধান উদ্দেশ্য হইল শান্তিপূর্ণ পন্থায় আন্তর্জাতিক শান্তি ও নিরাপত্তা রক্ষা করা এবং নানাভাবে জাতিপুঞ্জ সদস্যদের মধ্যে সহযোগিতা বৃদ্ধি করা। ইহা ছাড়াও এই প্রতিষ্ঠান বিভিন্ন দেশের জনগণের মৌলিক অধিকার, তাহার মর্যাদা এবং মূল্য-সংরক্ষণ, জনগণের অর্থনৈতিক ও সামাজিক উন্নতিবিধান সম্মিলিত প্রচেষ্টার দ্বারা করিবে বলিয়া স্থির করিয়াছে। জাতিপুঞ্জের সনদের ভূমিকায় ক্ষুদ্র-বৃহৎ সকল জাতির সমানাধিকার স্বীকৃত হইয়া যাহাতে সকল জাতি পরস্পরের সহিত বন্ধুভাবাপন্ন প্রতিবেশীর ত্রায় বাস করিতে পারে তাহার জন্য জাতিপুঞ্জ সংকল্প করিয়াছে। সংকল্প কার্যে পরিণত হইলে স্থায়ী শান্তি প্রতিষ্ঠা সুনিশ্চিত। প্রায় ১০০টি রাষ্ট্র লইয়া সম্মিলিত জাতিপুঞ্জ গঠিত।

সংগঠন—সাধারণ সভা (General Assembly), স্বস্তিপরিসদ বা নিরাপত্তা পরিষদ (Security Council), আন্তর্জাতিক বিচারালয় (International Court of Justice), অছি পরিষদ (Trusteeship Council), দপ্তরখানা (Secretariat) এবং আরও কতকগুলি শাখাসমিতি লইয়া সম্মিলিত জাতিপুঞ্জ গঠিত।

সাধারণ সভা (General Assembly)

এই সভার বৎসরে একটিমাত্র অধিবেশন বসে তবে বিশেষ ক্ষেত্রে বিশেষ অধিবেশন বসিতে পারে।

ইহা ছাড়া, এই সভা সামাজিক, সাংস্কৃতিক ও অর্থনৈতিক ক্ষেত্রে আন্তর্জাতিক সহযোগিতার বিষয় সম্পর্কে আলোচনা করিতে পারে।

প্রত্যেক সদস্য রাষ্ট্রের পাঁচজন প্রতিনিধি সাধারণ সভায় যোগদান করিতে পারেন, কিন্তু কোন রাষ্ট্রের একটির বেশী ভোট দিবার ক্ষমতা নাই।

আন্তর্জাতিক সমস্ত্রাসমূহের আলোচনা করা ও সেই সম্পর্কে সুপারিশ করা সাধারণ সভার কাজ।

নিরাপত্তা বা স্বস্তি পরিষদ (Security Council)

পাঁচজন স্থায়ী (জাতীয় চীন, ফ্রান্স, সোভিয়েত রাশিয়া, গ্রেট ব্রিটেন ও মার্কিন যুক্তরাষ্ট্র) সদস্য ও দুই বৎসরের জন্য সাধারণ সভা কর্তৃক নির্বাচিত দশ জন—মোট পনের জন সদস্য লইয়া স্বস্তি পরিষদ গঠিত। এই পরিষদের প্রধান কার্য হইল শান্তিপূর্ণ উপায়ে আন্তর্জাতিক কলহের সমাধান করা। বিশ্বশান্তি রক্ষার উদ্দেশ্যে এই পরিষদ আন্তর্জাতিক বিবাদ সম্পর্কে নিম্নলিখিত পদ্ধতিগুলি অবলম্বন করিতে পারে। ১। যে-কোন আন্তর্জাতিক পরিস্থিতি সম্পর্কে অতুসন্ধান করিতে, ২। বিরোধী রাষ্ট্রগুলির মধ্যে পারস্পরিক আলাপ-আলোচনার দ্বারা মীমাংসা করিবার ব্যবস্থা করিতে পারে, ৩। মধ্যস্থতার দ্বারা মীমাংসা করিতে পারে, ৪। সালিশী ব্যবস্থার সুপারিশ করিতে পারে, অথবা ৫। স্বস্তি পরিষদ নিজে মীমাংসা করিতে পারে। শান্তিপূর্ণ উপায় ব্যর্থ হইলে এই পরিষদের বলপ্রয়োগ দ্বারা শান্তি-স্থাপনের ক্ষমতা আছে। এই পরিষদের যে-কোন সিদ্ধান্ত পরিষদের স্থায়ী পাঁচজন সদস্যের একজনের অসম্মতিতে বলবৎ করা যায় না।

কর্মসংস্থা (Secretariat)

একজন প্রধান-সচিবের অধীনে আটটি বিভাগ দ্বারা দপ্তরখানার কার্য পরিচালিত হয়। প্রধান-সচিব স্বস্তি পরিষদের সুপারিশক্রমে সাধারণ সভা কর্তৃক নির্বাচিত হন।

আন্তর্জাতিক বিচারালয় (International Court of Justice)

আন্তর্জাতিক বিচারালয় হল্যান্ডের হেগ শহরে প্রতিষ্ঠিত। সাধারণ সভা কর্তৃক নির্বাচিত পনের জন বিচারপতিকে লইয়া এই বিচারালয় গঠিত। আন্তর্জাতিক আইন-সংক্রান্ত বিষয়গুলির মীমাংসা করা এই আদালতের প্রধান কার্য।

অছি পরিষদ (Trusteeship Council)

অছি পরিষদের উদ্ভব হয় লীগ অব নেশন্সের সময়ে। কিছু পরিবর্তিত আকারে এই পরিষদ নূতনভাবে সংগঠিত হইয়া অনগ্রসর জাতিসমূহের তদারক করে। নিরাপত্তা পরিষদের স্থায়ী সদস্যগণ, অছি শাসনের ভারপ্রাপ্ত রাষ্ট্রগুলি ও সাধারণ সভা কর্তৃক তিন বৎসরের জন্য নির্বাচিত অছি শাসনের ভারপ্রাপ্ত রাষ্ট্রগুলির সমান সংখ্যক সদস্য লইয়া এই পরিষদ গঠিত।

অর্থনৈতিক ও সামাজিক পরিষদ (Economical and Social Council)

জাতিগুলির মধ্যে অর্থনৈতিক ও বিভিন্ন ধরনের সামাজিক সহযোগিতা বৃদ্ধি করিবার উদ্দেশ্যে এই প্রতিষ্ঠান গঠিত হইয়াছে। সাধারণ সভা এই পরিষদের মোট ২৭ জন সদস্য নির্বাচন করে। এই সভার কার্য ইহার অন্তর্ভুক্ত কয়েকটি গুরুত্বপূর্ণ সংস্থার দ্বারা পরিচালিত হয়। আন্তর্জাতিক শ্রমিক সংঘ, কৃষি সংস্থা, বিশ্ব ব্যাংক, মানবীয় অধিকার সংস্থা প্রভৃতি হইল এইরূপ কয়েকটি সংস্থা।

বিগত কয়েক বৎসরের সম্মিলিত জাতিপুঞ্জের কার্যের আলোচনা করিলে দেখা যায় যে, সামাজিক ও অর্থনৈতিক ক্ষেত্রে আন্তর্জাতিক সহযোগিতা বৃদ্ধি করিতে এই সংগঠন অনেকটা সাফল্য অর্জন করিয়াছে। কিন্তু আন্তর্জাতিক শান্তি ও নিরাপত্তা রক্ষার ক্ষেত্রে ইহার সাফল্য সম্বন্ধে সন্দেহের উদ্রেক হয়। ভারত-পাকিস্তান বিরোধ, ইসরাইল-আরব সীমান্ত-সমস্যা, ইরানের তৈল লইয়া বিরোধ ও কোরিয়ার গৃহযুদ্ধ, ভিয়েতনামের যুদ্ধ প্রভৃতি সমস্যাগুলির স্থায়ী সমাধান সম্মিলিত জাতিপুঞ্জ এখনও পর্যন্ত করিতে পারে নাই। যে জাতীয় চীন সরকারের চীনের মূল ভূখণ্ডে কোন অস্তিত্ব পর্যন্ত নাই, সেই চীন সম্মিলিত জাতিপুঞ্জের সদস্য, আর বাস্তব চীন সাধারণ-তন্ত্র সরকার ইংলণ্ড, রাশিয়া, ভারত প্রভৃতি রাষ্ট্র কর্তৃক স্বীকৃত হইয়াও জাতিপুঞ্জের সদস্যপদ হইতে বঞ্চিত আছে। জার্মানি, জাপান প্রভৃতি প্রথম শ্রেণীর রাষ্ট্রগুলিকে প্রতিহিংসার বশবর্তী হইয়া যে অবস্থায় রাখা হইয়াছে তাহাতে স্বর্ভাবতই জাতিপুঞ্জের উদ্দেশ্যের প্রতি কাহারও বিশেষ আস্থা থাকিতে পারে না। স্বস্তি পরিষদের পাঁচটি স্থায়ী পদ চারিটি শক্তিশালী রাষ্ট্র ও একটি নামসর্বস্ব

উবেদার রাষ্ট্র কর্তৃক অধিকৃত আছে। এই নীতি ক্ষুদ্র-বৃহৎ রাষ্ট্রগুলির সমানাধিকারের পরিচায়ক নহে। আণবিক শক্তি ও হাইড্রোজেন বোমা নিয়ন্ত্রণ করিতে এখনও পর্যন্ত এই সংগঠন সমর্থ হয় নাই।

সংক্ষিপ্তসার

রাষ্ট্র ও জাতীয়তাবাদ

স্বজাতীয় মানুষ, জাতীয় জনসমাজ, জাতি ও জাতীয়তাবাদ : রাষ্ট্রনৈতিক চেতনাবিহীন কিন্তু একই ঐতিহ্য দ্বারা এক্যবদ্ধ একদল মানুষকে স্বজাতীয় মানুষ বলা যাইতে পারে। যখন এই স্বজাতীয় মানুষ বংশগত, ভাষাগত বা অন্য কোন এক্য দ্বারা আরও গভীরভাবে একতাবদ্ধ হয়, তখন তাহাদের জাতীয় জনসমাজ বলা হয়। এই জাতীয় জনসমাজের মধ্যে রাষ্ট্র-নৈতিক চেতনার উন্মেষ হইলে যখন তাহারা স্বতন্ত্রভাবে তাহাদের ইচ্ছামত স্বাধীনভাবে রাষ্ট্র গঠন করে, তখন জাতীয় জনসমাজ জাতিতে রূপান্তরিত হয়।

কুলগত, ভাষাগত, ধর্মগত বা ভাবগত এক্য—এইগুলিকে সাধারণতঃ জাতিগঠনের উপাদান বলা হয়। কিন্তু জাতিগঠনে বাহ্যিক উপাদান অর্থাৎ কুলগত বা ভাষাগত এক্য অপেক্ষা ভাবগত এক্য অর্থাৎ সম স্ব-দুঃখবোধ ও সম আদর্শে অনুপ্রাণিত এক্য অধিক সহায়ক।

জাতীয়তা বা সাক্ষাত্যবোধ একটা মানসিক অনুভূতির ব্যাপার। ইহা প্রধানতঃ ভাবগত এক্যের উপর প্রতিষ্ঠিত। এই ভাবগত এক্য আছে বলিয়া সুইস্ জাতি কুল বা ভাষার পার্থক্য সত্ত্বেও এক শক্তিশালী ও দেশপ্রেমিক জাতিতে পরিণত হইয়াছে। এই জাতীয়তার ভিত্তিতে প্রত্যেক জাতি ইহার নিজস্ব রাজনৈতিক আদর্শে উপনীত হইবার জন্য পৃথক্ রাষ্ট্রগঠনের দাবী করে। জাতির এই স্বাভাবিকবোধের ভিত্তিতে রাষ্ট্রগঠন হইলে জাতিগুলির মধ্যে বিবাদ-বিসংবাদ অনেক হ্রাস পাইবে। প্রত্যেক জাতি নিজ আদর্শ অনুযায়ী তাহার জ্ঞান-বিজ্ঞান, শিল্পকলা ও ব্যবসায়-বাণিজ্যের উন্নতি সাধন করিতে সাহায্য করিতে পারে।

আত্মনির্ধারণের নীতি : ‘এক জাতি এক রাষ্ট্র’—এই নীতি অহুযায়ী রাষ্ট্রগঠনের যে দাবী তাহাকে জাতির আত্মনির্ধারণের দাবী বলা হয়। সম্পূর্ণ পৃথক্ ঐতিহ্যবিশিষ্ট জাতির ক্ষেত্রে এই আত্মনির্ধারণের দাবী প্রযোজ্য হইলেও সকল ক্ষেত্রে ইহার অবাধ প্রয়োগ সম্ভব নয়, যুক্তিযুক্তও নয়। জাতির এই দাবী দ্বিধাশূন্যভাবে স্বীকৃত হইলে বহু প্রতিষ্ঠিত ও প্রাচীন রাষ্ট্র ভাঙ্গিয়া ক্ষুদ্র ক্ষুদ্র রাষ্ট্রের সৃষ্টি হইবে। ক্ষুদ্র রাষ্ট্রগুলি সম্পূর্ণভাবে আত্মনির্ভরশীল হইয়া তাহাদের স্বাধীনতা রক্ষা করিতে পারিবে না। পরস্পরের সহিত কলহবিবাদে বিশ্বশান্তিও নষ্ট হইবার সম্ভাবনা আছে।

কোন জাতিকে সম্পূর্ণ আত্মনির্ধারণের অধিকার না দিলেও তাহার জাতীয় বৈশিষ্ট্য, ভাষা, সামাজিক প্রথা, ধর্মাহুঠান প্রভৃতি বিষয়গুলিতে স্বাধীনতা দেওয়া প্রয়োজন।

জাতীয়তাবাদ : প্রকৃত জাতীয়তাবাদ একটা উচ্চ আদর্শ। এই আদর্শ মানুষকে স্বদেশপ্রেমে অহুপ্রাণিত করে ও মহৎ কিছু করিবার অহুপ্রেরণা ঘোগায়। জাতীয় সংস্কৃতির উন্নতি করিয়া এই স্বদেশপ্রেম মানুষকে বিশ্ব-মানবতার ভাবে উদ্বুদ্ধ করে। কিন্তু জাতীয়তাবাদ যখন বিকৃত হয়—স্বদেশপ্রেম যখন ভিন্ন দেশের প্রতি বিদ্বেষে পর্যবসিত হইয়া ভিন্ন ভিন্ন জাতির জাতীয়তাবোধকে নষ্ট করিতে উদ্যত হয় তখন এই জাতীয়তাবোধ মারাত্মক হইয়া দাঁড়ায়। এই বিকৃত জাতীয়তাবোধ হইতে যুদ্ধবাদের উৎপত্তি হইয়া ইহা শেষ পর্যন্ত ক্ষুদ্র ক্ষুদ্র জাতিগুলিকে করায়ত্ত করিয়া সাম্রাজ্যবাদে পরিণত হয়। এই সাম্রাজ্যবাদ মানবসভ্যতার পরম শত্রু। যুক্তরাষ্ট্রীয় শাসনব্যবস্থার দ্বারা সাম্রাজ্যবাদের দোষগুলি কিছু পরিমাণে দূর করা সম্ভব।

আন্তর্জাতিকতা : মানুষের রাষ্ট্রনৈতিক জীবনে আন্তর্জাতিকতা হইল শ্রেষ্ঠ আদর্শ। এই আদর্শ প্রত্যেক জাতিকে তাহার স্বতন্ত্র বৈশিষ্ট্য বজায় রাখিয়া বন্ধুত্বের সহিত অপরাপর জাতির সহিত বাস করিবার শিক্ষা দেয়। পারস্পরিক সহযোগিতা ও সদিচ্ছার উপর এই আন্তর্জাতিকতার ভিত্তি। লীগ অব নেশন্স ও সম্মিলিত জাতিপুঞ্জ সংগঠন দ্বারা জাতিসমূহ এই আদর্শে উপনীত হইবার চেষ্টা করিতেছে।

সম্মিলিত জাতিপুঞ্জ : দ্বিতীয় মহাযুদ্ধ চলিবার কালেই সম্মিলিত জাতিপুঞ্জ প্রতিষ্ঠান গঠন করিবার কল্পনা করা হয়। মার্কিন যুক্ত-

যুক্তরাষ্ট্রের তদানীন্তন রাষ্ট্রপতি রুজভেল্টের আগ্রহাতিশয্যে যুদ্ধ শেষে বিজেতা ও নিরপেক্ষ জাতিসমূহকে লইয়া এই প্রতিষ্ঠান গঠিত হয়। জগতে স্থায়ী শান্তি স্থাপনা ও আন্তর্জাতিক সৌহার্দ্য ও সহযোগিতা বৃদ্ধি করা হইল এই প্রতিষ্ঠানের প্রধান উদ্দেশ্য। বর্তমানে প্রায় একশত জাতি এই আন্তর্জাতিক সংস্থার সদস্যভুক্ত।

নিম্নলিখিত বিভাগগুলি লইয়া এই প্রতিষ্ঠান গঠিত :

১। সাধারণ সভা—সদস্য জাতিসমূহ হইতে পাঁচজন করিয়া প্রতিনিধি লইয়া এই সভা গঠিত হইলেও প্রত্যেক জাতির একটি নাত্র ভোট আছে।

২। স্থিতি পরিষদ—পাঁচজন স্থায়ী ও দশজন অস্থায়ী—মোট পনের জন সদস্য লইয়া এই পরিষদ গঠিত। এই পরিষদই হইল জাতিপুঞ্জের শাসন-বিভাগ। কোন রাষ্ট্রের বিরুদ্ধে যুদ্ধ ঘোষণা করিতে হইলে সমস্ত স্থায়ী সদস্যের সম্মতি প্রয়োজন।

৩। অছি পরিষদ—আত্মনির্ধারণের অধিকারহীন জাতিসমূহের শাসন ব্যাপারে এই পরিষদ তত্ত্বাবধায়কের কাজ করে।

৪। অর্থনৈতিক ও সামাজিক পরিষদ—নাতাশজন সদস্য লইয়া এই পরিষদ গঠিত। জাতিসমূহের সামাজিক ও অর্থনৈতিক সমস্যা সম্পর্কে এই পরিষদ আলোচনা করে।

৫। আন্তর্জাতিক আদালত—আন্তর্জাতিক আইন-সম্পর্কিত বিষয় সম্পর্কে এই আদালত মীমাংসা করে।

ইহা ছাড়াও খাদ্য, স্বাস্থ্য, শ্রমিক-সম্পর্কিত বিষয়গুলির সমাধান করিবার জন্য বহু শাখা-সমিতি আছে।

জাতিগুলির মধ্যে অর্থনৈতিক ও কুষ্টিগত সহযোগিতা বৃদ্ধি করিতে সাফল্য লাভ করিলেও এই প্রতিষ্ঠান বিভিন্নজাতির মধ্যে রাজনৈতিক হৃন্দ ও প্রতিযোগিতা নিরোধ করিতে এখনও পর্যন্ত সফলকাম হইতে পারে নাই।

প্রশ্নাবলী

1. What are the factors that tend to create a Nationality ?
How does a nation come into being in a country of diverse Nationalities ?
(C. U. 1957)

2. Discuss the problem of Nationalism and Internationalism.

3. Discuss the value and limitation of Nationalism as a Political ideal. (C. U. Hon. 1954)

4. What are the rights of Nationalities ?

5. What do you mean by the doctrine of self-determination ? Discuss in this connexion the value and limitations of this doctrine.

6. What are the objectives of the United Nations ? How far has it been able to promote these objectives ?

7. Explain the meanings of Nation, Nationality and Nationalism.

Is nationality a satisfactory basis of modern states ?

8. What are the essential elements of nationality ? Can nationality act as a basis of statehood ? Give reasons for your answer.

9. What do you mean by the Right of Self determination of nations ? Is it a desirable ideal ? Give reasons for your answer.

10. "The future of civilization lies in a synthesis of nationalism and internationalism". Explain fully and give your views with reasons thereof.

সপ্তম অধ্যায় নাগরিকতা (Citizenship)

নাগরিক সংজ্ঞা (Definition of a citizen)

সাধারণ অর্থে নগরের অধিবাসীকে নাগরিক বলা হয়। কলিকাতা, বোম্বাই প্রভৃতি শহরে যাহারা বাস করে তাহাদের ঐ শহরের নাগরিক বলা হয় ও নাগরিক হিসাবে তাহারা কতকগুলি সুযোগ-সুবিধার অধিকারী হয়। কিন্তু বর্তমান যুগে নাগরিক শব্দটি একটি ব্যাপক অর্থে ব্যবহৃত হয়। নাগরিক শব্দটির একটি প্রকৃত অর্থ নির্ধারণ করিতে গেলে দেখিতে পাওয়া যায় যে, প্রাচীন গ্রীক ও রোমকগণ নাগরিক শব্দটির উপর বিশেষ গুরুত্ব আরোপ করিয়াছিলেন। তাহারা ক্ষুদ্র ক্ষুদ্র নগর-রাষ্ট্রে বাস করিতেন। এই নগর-রাষ্ট্রের সকল অধিবাসীই নাগরিক বলিয়া পরিগণিত হইত না। যে সমস্ত অধিবাসীর প্রত্যক্ষ ও সক্রিয়ভাবে রাজনৈতিক কার্যকলাপে যোগদান করিবার যোগ্যতা ও অপরাপ্ত সময় ছিল, তাহাদিগকেই নাগরিক আখ্যা দেওয়া হইত। সমাজের অবশিষ্টাংশ, যথা, ক্রীতদাস, মজুরশ্রেণী, স্ত্রীলোক প্রভৃতি যাহারা পরনির্ভরশীল বলিয়া বিবেচিত হইত, তাহাদিগকে নাগরিক বলিয়া গণ্য করা হইত না। এই জাতীয় নিয়ন্ত্রণের লোকগুলিকে সমাজের অপরিহার্য অঙ্গ বলিয়া গণ্য করা হইত না ও সেইজন্য তাহারা নাগরিক অধিকার হইতেও বঞ্চিত থাকিত। সক্রিয়ভাবে রাষ্ট্রপরিচালনাকার্যে অংশ গ্রহণ করিবার যোগ্যতাই ছিল নাগরিকতার প্রধান বৈশিষ্ট্য।

বর্তমানকালে নাগরিক শব্দের ব্যবহার আর ক্ষুদ্র গণ্ডির মধ্যে আবদ্ধ নাই। বর্তমান রাষ্ট্রগুলি প্রাচীন নগর-রাষ্ট্রগুলি অপেক্ষা আয়তনে ও জনসংখ্যায় বহুগুণ বৃহত্তর। নাগরিক বলিয়া পরিগণিত হইতে গেলে আর পূর্বের মতন কোন ব্যক্তির বিশেষ কোন যোগ্যতার প্রয়োজন হয় না। কোন রাষ্ট্রের সদস্য হইলেই তাহাকে বর্তমান নাগরিক বলা হয়। যে লোক একটি রাষ্ট্রে স্থায়ীভাবে বাস করিয়া সেই রাষ্ট্রের আত্মগত স্বীকার করিয়া

লইয়াছে তাহাকে সেই রাষ্ট্রের নাগরিক বলা হয়। নাগরিক বলিয়া পরিগণিত হইলে প্রত্যেক ব্যক্তিই রাষ্ট্রের সদস্যরূপে কতকগুলি সুযোগ-সুবিধার অধিকারী হয় এবং অন্তর্দিকে তাহাকে কতকগুলি কর্তব্য সম্পাদন করিতে হয়। সুতরাং বর্তমান রাষ্ট্র তাহাদের নাগরিকদের নিকট হইতে সক্রিয়ভাবে কোন কর্তব্যপালনের দাবী করে না। কিন্তু তাই বলিয়া যদি এ কথা মনে করা যায় যে, বর্তমান নাগরিকগণ শুধু কতকগুলি সুযোগ-সুবিধার অধিকারী, রাষ্ট্রসম্পর্কে তাহাদের কোনরূপ কর্তব্যসম্পাদনের বাধ্যবাধকতা নাই তাহা হইলে মারাত্মক ভুল হইবে। জনসমষ্টি লইয়াই রাষ্ট্র গঠিত হয়। প্রত্যেকটি লোক রাষ্ট্রের অবিচ্ছেদ্য অংশ। সুতরাং রাষ্ট্রের উন্নতিসাধন করিয়া উন্নততর সমাজ-জীবন প্রবর্তনের জন্ত প্রত্যেক নাগরিকেরই তৎপর হওয়া প্রয়োজন। সমষ্টিগত জীবন যাহাতে রাষ্ট্রের মাধ্যমে একটা আদর্শ স্তরে উন্নীত হইতে পারে সেইজন্ত প্রত্যেক নাগরিকই এরূপভাবে তাহার ব্যক্তিগত কার্যকলাপ পরিচালিত করিবে যাহাতে ব্যক্তি ও সমষ্টি উভয়েরই মঙ্গল সাধিত হয়। সক্রিয়ভাবে রাষ্ট্রনৈতিক কার্যকলাপে যোগদান না করিলেও প্রত্যেক নাগরিকেরই কিছু পরিমাণে ক্রিয়শীল থাকা চাই। প্রত্যেক নাগরিকই তাঁহার বিদ্যা, বুদ্ধি ও স্বাধীন চিন্তাশক্তি প্রয়োগ করিয়া সমষ্টিগত জীবনকে উন্নততর করিবার জন্ত যত্নবান হইবে। সুতরাং শেষ বিশ্লেষণে দেখা যায় যে, নাগরিকতা হইল ব্যক্তির মধ্যে কতকগুলি গুণের সমাবেশ—যে সমাবেশে সমাজ-জীবন সহজ ও সুগম হয়। এইজন্ত অধ্যাপক ল্যাক্সি নাগরিকতার সংজ্ঞা নির্দেশ করিতে গিয়া বলিয়াছেন যে, নাগরিকতার সারমর্ম হইল—সাধারণের হিতার্থে ব্যক্তির শিক্ষা-দ্বারা-প্রাপ্ত মাজিত বুদ্ধির প্রয়োগ। (Citizenship “is the contribution of one’s instructed judgment to public good.”) সমাজের প্রত্যেক নাগরিক এরূপভাবে তাঁহার চিন্তাধারা ও কার্যাবলী পরিচালিত করিবে যাহাতে জনকল্যাণ সাধিত হয়। এইজন্ত অবশ্য প্রত্যেক নাগরিকেরই উপযুক্ত শিক্ষা পাওয়া চাই।

নাগরিক ও বিদেশী (Citizen and Alien)

নাগরিক ও বিদেশীর মধ্যে পার্থক্য সুস্পষ্ট। বিদেশী ভিন্নদেশবাসী ও ভিন্ন রাষ্ট্রের আত্মগত্যা স্বীকার করে। যে দেশে বিদেশী কার্যব্যপদেশে

সাময়িকভাবে বাস করে, সে দেশের সাধারণ বিধি-নিষেধ তাহাকে মানিতে হয় ও সেই দেশের প্রবর্তিত করণ ও তাহাকে দিতে হয়। বিদেশী কতকগুলি পৌর অধিকার ভোগ করিলেও তাহার কোন রাজনৈতিক অধিকার জন্মে না ; বা সে দাবী করিতে পারে না। বিদেশীকে অসদাচরণের জন্য দেশ হইতে বহিষ্কার করা যায়। কিন্তু বিদেশীকে বলপূর্বক যুদ্ধে যোগদান করিতে বাধ্য করা যায় না। বিদেশী সাময়িকভাবে যে দেশে বাস করে সে দেশ পরিশ্রম করিলে তাহার জীবন ও সম্পত্তির নিরাপত্তা সম্বন্ধে সে রাষ্ট্রের আর কোন দায়িত্ব থাকে না। কিন্তু নাগরিক জীবন সম্পূর্ণভাবে রাষ্ট্র কর্তৃক পরিচালিত হয়। নাগরিক স্বদেশেই থাকুক আর বিদেশেই থাকুক, সর্বত্রই তাহার নিজ রাষ্ট্র তাহার নিরাপত্তা রক্ষা করে। নাগরিক পৌর ও রাজনৈতিক অধিকার সম্পূর্ণভাবে উপভোগ করে ও নাগরিক জীবনের সমস্ত দায়িত্ব—এমন কি প্রয়োজন হইলে যুদ্ধে যোগদান—তাহাকে পালন করিতেই হইবে।

পূর্ণ নাগরিক ও অসম্পূর্ণ নাগরিক (Citizen and National)

অনেক সময় ভোটদান-ক্ষমতাকে নাগরিকত্বের প্রধান বৈশিষ্ট্য বলিয়া মনে করা হয়। যাহাদের এই ক্ষমতা আছে তাহাদিগকে নাগরিক বলা হয় আর যাহারা এই ক্ষমতার অধিকারী নয় তাহাদিগকে নাগরিক বলা হয় না। কিন্তু এ কথা সব সময় সত্য নয়। প্রত্যেক রাষ্ট্রে একটা নির্দিষ্ট বয়সের জনগণ ভোটদানের অধিকারী হয়। ভারতবর্ষে একুশ বৎসর বয়স্ক স্ত্রী-পুরুষের ভোটাধিকার জন্মে। একুশ বৎসর বয়সের কম কোন স্ত্রী-পুরুষের এই ভোটদানের অধিকার নাই, সুতরাং উপরি-উক্ত মত অনুসারে তাহারা নাগরিক নহে। কিন্তু প্রকৃতপক্ষে ভারতের স্থায়ী অধিবাসী প্রত্যেকেই এই রাষ্ট্রের নাগরিক। একুশ বৎসরের কম বলিয়া তাহাদিগকে অপ্রাপ্তবয়স্ক বলা হয়। তাহারা পূর্ণ নাগরিক না হইলেও নাগরিক পদবাচ্য। এইরূপ অপ্রাপ্তবয়স্ক ভোটদান-ক্ষমতাবিহীন নাগরিককে অসম্পূর্ণ নাগরিক (National) বলা হয়।

নাগরিক ও নির্বাচক (Citizen and Elector)

অনেক রাষ্ট্র বিদেশীকে কোন কোন বিশেষ ক্ষেত্রে ভোটদান-ক্ষমতা প্রদান করে। বিদেশী ভোটদান করিতে পারে বলিয়া তাহাকে সেই রাষ্ট্রের

নাগরিক বলা চলে না, আর অপ্রাপ্তবয়স্ক নাগরিক ভোটদান ক্ষমতাবিহীন বলিয়া তাহাকে নাগরিক বলিয়া গণ্য না করা কোন মতে সমীচীন নয়।

নাগরিক ও প্রজা (Citizen and Subject)

নাগরিক ও প্রজা উভয়েই রাষ্ট্রের অধিবাসী। কিন্তু নাগরিক শব্দটির সহিত একটা পদমর্যাদা ও কতকগুলি শ্রায়সঙ্গত অধিকারের দাবী ওভপ্রোত-ভাবে জড়িত আছে, কিন্তু প্রজাপদবাচ্য লোকের সেইরূপ কোন মর্যাদা বা অধিকারের দাবী স্বীকৃত হয় না। স্বৈরাচারী শাসনে জগৎগণের উপর শাসক তাহার নিজ ইচ্ছাকে বলপূর্বক কার্যকরী করে। স্বৈরাচারী শাসন-ব্যবস্থায় শাসিতের ইচ্ছার কোন স্থান নাই। শাসিত শাসকের সম্পূর্ণ পদানত। এই ব্যবস্থায় শাসিতের কোন অধিকার থাকে না আর অধিকার থাকিলেও সেগুলি শাসকের ইচ্ছার উপর সম্পূর্ণ নির্ভর করে। স্বৈরাচারী শাসনব্যবস্থার অন্তর্গত জনসাধারণকে সাধারণতঃ প্রজা আখ্যা দেওয়া হয়। ইংরাজ শাসনকালে ভারতীয়েরা ব্রিটিশ রাজ্যের প্রজা বলিয়া অভিহিত হইত। বর্তমান গণতান্ত্রিক যুগে এরূপ নিকৃষ্ট পদবাচ্য প্রজা শব্দটি ধীরে ধীরে বিলুপ্ত হইতে চলিয়াছে।

নাগরিক অর্জনের পদ্ধতি (Modes of acquisition of Citizenship)

নাগরিক অধিকার দুই উপায়ে পাওয়া যায় :—প্রথম, জন্মাদিকারে এবং দ্বিতীয়, অর্জনের দ্বারা। জন্মাদিকার দুই প্রকার—একটি হইল রক্তগত অধিকার (*Jus Sanguinis*), অপরটি হইল জন্মভূমিগত অধিকার (*Jus Soli*)। প্রথমোক্ত নীতি অনুযায়ী কোন ব্যক্তির জন্মকালে তাহার পিতা যে দেশের নাগরিক ছিল সে সেই দেশের নাগরিক হইবে, তাহার জন্মস্থান যে-কোন দেশেই হউক না কেন। ভারতীয় পিতামাতার সন্তান পৃথিবীর যে-কোন দেশে জন্মগ্রহণ করুক না কেন ভারতীয় বলিয়া পরিগণিত হইবে। দ্বিতীয় নিয়মানুসারে যদি কোন ভারতীয় পিতামাতার সন্তান আমেরিকা যুক্তরাষ্ট্রে জন্মগ্রহণ করে তাহা হইলে সে সন্তান তাহার পিতামাতা ভারতীয় হওয়া সত্ত্বেও যুক্তরাষ্ট্রের নাগরিক বলিয়া বিবেচিত হইবে। এই নিয়মে জন্মভূমি বিচার করিয়া নাগরিকত্ব স্থির হয়।

যদি কোন রাষ্ট্র একই সঙ্গে এই দুইটি নীতি প্রয়োগ করিয়া নাগরিকত্ব স্থির করে, তাহা হইলে একই ব্যক্তি একই সময়ে দুইটি বিভিন্ন রাষ্ট্রের নাগরিক বলিয়া কথা উঠিতে পারে। মার্কিন যুক্তরাষ্ট্রের নাগরিক শিতামাতার সন্তান পৃথিবীর যে-কোন দেশে জাত হউক না কেন রক্তগত অধিকারের ভিত্তিতে তাহাকে যুক্তরাষ্ট্রের নাগরিক বলিয়া গণ্য করা হয়। অপর পক্ষে ভিন্ন দেশের শিতামাতার সন্তান মার্কিন যুক্তরাষ্ট্রে জাত হইলে 'ভূমিগত অধিকারের বলে তাহাকেও যুক্তরাষ্ট্রের নাগরিক বলিয়া দাবী করা হয়। এরূপ ক্ষেত্রে নাগরিক সাবালক হইয়া এক দেশের নাগরিকত্ব পরিত্যাগ করিয়া নিজ ইচ্ছানুসারে অন্য দেশের নাগরিক হইতে পারে।

স্ত্রীলোকগণ বিবাহের দ্বারা তাহাদের স্বামীর নাগরিকত্ব পায়। বৈবাহিক সম্বন্ধ ছাড়াও বিভিন্ন রাষ্ট্রের সরকারের অধীনে চাকুরী লইয়া, বহুদিন অপর রাষ্ট্রে বসবাস করিয়া বা ভিন্ন রাষ্ট্রে সম্পত্তি ক্রয় করিয়া ও সামরিক বাহিনীতে যোগদান করিয়া নূতন নাগরিকের অধিকার পাওয়া যায়।

সকল রাষ্ট্রই বিদেশীর উপর নাগরিকত্ব অর্পণ করে। এইরূপে কোন দেশের জন্মগত নাগরিক যদি ভিন্ন রাষ্ট্রের অধিত নাগরিকত্ব অর্জন করে, তাহা হইলে তাহাকে অর্জিত নাগরিকত্ব (Naturalized citizenship) বলা হয়। বিবাহ, সম্পত্তি-ক্রয় বা সেনানিভাগে যোগদান—সবগুলি উপায়ই হইল নাগরিক অধিকার অর্জনের বিভিন্ন পদ্ধতি, কিন্তু এই পদ্ধতিগুলির মধ্যে অধিত নাগরিকত্ব একটি সংকীর্ণ অর্থে ব্যবহৃত হয়। কোন রাষ্ট্রের নাগরিকত্ব অর্জন করিতে হইলে বিদেশীকে কতকগুলি শর্ত পালন করিতে হয়। বিদেশী যে রাষ্ট্রের নাগরিক হইতে ইচ্ছুক সে রাষ্ট্রের নিয়মানুযায়ী বিদেশীর সে দেশে একটি নির্দিষ্ট সময় বসবাস করিতে হয় ও তাহাকে সংস্কারাপন্ন বলিয়া প্রমাণিত করিতে হয়। সে দেশের ভাষাভাষী হওয়ারও অনেক সময় প্রয়োজন হয়। এই শর্তগুলি পূরণ হইলে রাষ্ট্র ইহার ইচ্ছামত বিদেশীর উপর নাগরিকত্ব প্রদান করিতে পারে। এইরূপে নাগরিকত্ব অর্জন করিতে হইলে বিদেশীকে আবেদন করিতে হইবে এবং কোন বিচারালয় বা শাসন-বিভাগীয় উচ্চতর কর্তৃপক্ষ ঐ আবেদন বিচার করিয়া নাগরিকত্ব প্রদান সম্বন্ধে সিদ্ধান্ত করে।

এইরূপে নাগরিকত্ব অর্জিত হইলে বিদেশীও সেই দেশের জাত

নাগরিকদের সমপর্যায়ভুক্ত হইয়া নাগরিক অধিকার ও বাধ্যবাধকতার দ্বারা আবদ্ধ হয়। সাধারণতঃ এই দুই শ্রেণীর নাগরিকদের মধ্যে কোন পার্থক্য করা হয় না। কিন্তু আমেরিকা যুক্তরাষ্ট্র প্রভৃতি কয়েকটি দেশ কোন বিদেশী যুক্তরাষ্ট্রের নাগরিকত্ব অর্জন করিলেও তাহাকেও সমস্ত রাজনৈতিক অধিকার প্রদান করে না। যুক্তরাষ্ট্রের রাষ্ট্রপতি ও উপ-রাষ্ট্রপতির পদ জন্মমুখে নাগরিকত্ব প্রাপ্ত নাগরিক ব্যতীত অন্য কোন নাগরিক পাইতে পারে না।

যুক্তরাষ্ট্রীয় ব্যবস্থার নাগরিকত্ব (Citizenship in a Federal State)

যুক্তরাষ্ট্রীয় -ব্যবস্থায় দ্বিবিধ শাসনতন্ত্রের—কেন্দ্রীয় ও স্থানীয়—অস্তিত্ব বর্তমান। সুতরাং যুক্তরাষ্ট্রের নাগরিকগণকে যুগপৎ কেন্দ্রীয় সরকার ও স্থানীয় সরকারের আত্মগত স্বীকার করিতে হয়। নাগরিকগণ উভয় সরকার-প্রণীত আইন দ্বারা বাধ্য থাকে এবং উভয় সরকার প্রবর্তিত কর তাহাদিগকে প্রদান করিতে হয়।

মার্কিন যুক্তরাষ্ট্রের নাগরিকগণের এইরূপ দ্বিবিধ নাগরিকত্ব দেখিতে পাওয়া যায়। তাহারা যে রাজ্যে বাস করে সেই রাজ্যের অধিবাসী হিসাবে তাহারা সেই রাজ্যের নাগরিক বলিয়া পরিচিত হয় এবং সেই রাজ্য-সম্পর্কিত নির্ধারিত অধিকার ও কর্তব্য দ্বারা তাহাদের পরিচালিত হইতে হয়। এতদ্ব্যতীত তাহারা সমগ্র যুক্তরাষ্ট্রের নাগরিক বলিয়া বিবেচিত হয়। এখন প্রশ্ন হইল যে, এই দ্বিবিধ নাগরিকত্বের কোনটি মৌলিক ও শ্রেষ্ঠতর? মার্কিন যুক্তরাষ্ট্রের শাসনতন্ত্রের চতুর্দশ সংশোধন আইন এ সম্পর্কে চূড়ান্ত সিদ্ধান্ত করিয়াছে। এই সংশোধন আইন অনুসারে যুক্তরাষ্ট্রীয় নাগরিকত্বে অগ্রাধিকার প্রদান করা হইয়াছে। নাগরিকগণ প্রথমতঃ ও প্রধানতঃ যুক্তরাষ্ট্রের নাগরিক বলিয়া বিবেচিত হইয়া থাকে এবং তাহারা যুক্তরাষ্ট্রের নাগরিক বলিয়াই যে রাজ্যে বসবাস করে, সেই রাজ্যের নাগরিক বলিয়া বিবেচিত হয়। নাগরিকগণ এক রাজ্যবিশেষের নাগরিকত্ব বর্জন করিয়া অন্য রাজ্যের নাগরিক হইতে পারে। শুধুমাত্র বাসস্থান দ্বারাই রাজ্যবিশেষের নাগরিকত্ব স্থির হয়। যুক্তরাষ্ট্রের নাগরিকত্ব অর্জ বা বর্জন করিতে হইলে নির্ধারিত আইনানুযায়ী পদ্ধতিতে তাহা সম্পন্ন করিতে হয়, কিন্তু কোন রাজ্যবিশেষের নাগরিকত্ব অর্জন বা বর্জন করিতে কোনরূপ আইনানুমোদিত পদ্ধতির আশ্রয় গ্রহণ

করিতে হয় না। শুধুমাত্র বাসস্থান পরিভ্রমণ করিয়া এক রাজ্যের নাগরিকত্ব বর্জন করিয়া অন্য রাজ্যের নাগরিকত্ব অর্জন করা হয়।

সুইস যুক্তরাষ্ট্রের নাগরিক হইতে হইলে প্রথমে কোন ক্যান্টনের নাগরিক হইতে হয়। ক্যান্টনের নাগরিক হইলেই স্বভাবতই সুইস যুক্তরাষ্ট্রের নাগরিক বলিয়া গণ্য হওয়া যায়। সুতরাং সুইস যুক্তরাষ্ট্রে ক্যান্টনের নাগরিকত্ব হইল মুখ্য আর যুক্তরাষ্ট্রের নাগরিকত্ব হইল গোণ।

জার্মানীতে ওয়াইমার শাসনতন্ত্র অনুসারে যুক্তরাষ্ট্রীয় নাগরিকত্ব মৌলিক ও প্রধান বলিয়া পরিগণিত হইত।

ভারতে যুক্তরাষ্ট্রীয় শাসনব্যবস্থা প্রবর্তিত হইলেও সমগ্র ভারতে মাত্র একদফা ভারতীয় নাগরিক অধিকার স্বীকৃত হইয়াছে। মার্কিন যুক্তরাষ্ট্রে প্রভৃতি দেশে যেখানে বিবিধ নাগরিক অধিকার স্বীকৃত হয়, সে সমস্ত দেশে ভোটাধিকার ও সরকারী কার্যে লোকনিয়োগ প্রভৃতি ব্যাপারে প্রত্যেক রাজ্য নিজ নিজ নাগরিকগণের প্রতি পক্ষপাতিত্ব প্রদর্শন করিতে পারে। কিন্তু ভারতে এক-নাগরিকত্ব স্বীকৃত হওয়ার ফলে নাগরিকগণের মধ্যে বৈষম্যমূলক আচরণ হওয়ার সম্ভাবনা অপেক্ষাকৃত কম।

সোভিয়েত যুক্তরাষ্ট্রেও নাগরিকগণকে প্রথমতঃ ও প্রধানতঃ সোভিয়েত নাগরিক বলিয়া গণ্য করা হয়।

নাগরিক অধিকারের অবসান (Loss of Citizenship)

নতুন নাগরিকত্ব অর্জন করিলে পূর্ব নাগরিকত্বের অবসান ঘটে। বিবাহের দ্বারা স্ত্রীলোকের পূর্ব নাগরিকত্ব নষ্ট হয়। অপর দেশে জমি খরিদ বা বিদেশী সরকারের চাকুরীগ্রহণ, দীর্ঘকাল স্বদেশে অস্থিতি বা গুরুতর অপরাধে স্বদেশ হইতে বহিষ্কার, প্রভৃতি কারণে নাগরিক অধিকারের বিলুপ্তি ঘটিতে পারে।

পূর্ণ নাগরিক জীবনের অন্তরায় (Hindrances to good Citizenship)

নাগরিক জীবনের চরম সার্থকতা নির্ভর করে ব্যক্তিগত জীবনে কতকগুলি গুণের সমাবেশে। যে গুণগুলি থাকিলে স্ব-নাগরিক হওয়া যায় সেগুলি হইল

বুদ্ধিমত্তা, আত্মসংযম, বিচারবুদ্ধি ও সমাজচেতনা। নাগরিককে সকল সময়ে নিজের অধিকার ও কর্তব্যসম্বন্ধে সমানভাবে সজাগ থাকিতে হইবে। অধিকারসম্বন্ধে অত্যধিক উৎসাহী আর কর্তব্যসম্বন্ধে সম্পূর্ণ উদাসীন হইলে নাগরিক জীবন কখনও পূর্ণতা প্রাপ্ত হইতে পারে না। স্ব-নাগরিক নিজের অধিকার সম্বন্ধে যেকোন সচেতন, অন্যের অধিকার সম্বন্ধেও তাহার অনুরূপ সজ্ঞাবান হওয়া উচিত। এইরূপ পারস্পরিক নির্ভরশীলতা ও সম-সুখদুঃখ-বোধের দ্বারাই নাগরিক জীবন পূর্ণতা প্রাপ্ত হয়। ইহার অভাবে নাগরিক জীবন আদর্শত্যাগ হইয়া ক্ষুদ্র দলাদলি ও কলহে লিপ্ত হইয়া উঠে। পূর্ণ-নাগরিক জীবনের যে সকল অন্তরায় আছে তন্মধ্যে উদাসীনতা (Indolence) হইল প্রধান। উদাসীনতার কারণ হইল কর্তব্যবোধের অভাব। নাগরিক জীবন যে শুধু কতকগুলি অধিকারের সমষ্টি নয়, একথা প্রত্যেক নাগরিকেরই স্মরণে রাখিতে হইবে। কি সাধারণ নাগরিক কি সরকারী কর্মচারী প্রত্যেকেরই স্বীয় কর্তব্যসম্বন্ধে সর্বদা সচেতন থাকিতে হইবে। সাধারণ নাগরিকের হয়ত অনেক ক্ষেত্রে রাষ্ট্রের বৃহৎ ও জটিল সমস্যাগুলির সমাধানে অংশ গ্রহণ করিবার যোগ্যতা না থাকিতে পারে; কিন্তু নিরপেক্ষভাবে ভোটদান করা, রাষ্ট্রের সাধারণ সমস্যাগুলির সমাধানে স্বাধীন মত ব্যক্ত করিয়া অংশ গ্রহণ করা, বা যুদ্ধের সময় প্রত্যক্ষ বা পরোক্ষভাবে রাষ্ট্রের নিরাপত্তা রক্ষা করিতে সাহায্য করা বিষয়ে কোন নাগরিকেরই উদাসীন থাকা উচিত নয়। নাগরিকেরা যদি তাহাদের মতামত ব্যক্ত করিয়া রাষ্ট্রপরিচালনা-কার্যে সাহায্য না করে, তাহা হইলে গণতন্ত্র একনায়কত্বে পরিণত হইয়া নাগরিক অধিকার পর্যন্ত ক্ষুণ্ণ করিতে পারে। আধুনিক গণতন্ত্র জনমত ও জনসহযোগিতার ভিত্তির উপর প্রতিষ্ঠিত। জনগণ যদি এই সহযোগিতা-প্রদানে কার্পণ্য করে, তাহা হইলে রাষ্ট্রের ভিত্তি দুর্বল হওয়া স্বাভাবিক।

দ্বিতীয়তঃ, নাগরিকগণ যদি অতিমাত্রায় আত্মকেন্দ্রিক হইয়া স্বার্থান্বেষণে ব্যস্ত থাকে তাহা হইলে এই স্বার্থপরতা (Private Self-interest) তাহাদের আদর্শ নাগরিক জীবনের প্রতিবন্ধক হইয়া দাঁড়াইবে। সমগ্র জীবনের বৃহত্তর স্বার্থের খাতিরে ব্যক্তিগত বা দলগত স্বার্থকে বলি দিতে হইবে। নাগরিকগণ অনেক সময় যোগ্যতা বিচার না করিয়া আত্মীয়তা,

বন্ধনের জন্ত অথবা অর্থলোভে অযোগ্য লোককে প্রতিনিধি নির্বাচন করে। সরকারী চাকুরীতেও অনেক সময়ে যোগ্যব্যক্তির নিয়োগ না হইয়া ব্যক্তিগত বা দলগত স্বার্থসিদ্ধির জন্ত অযোগ্য লোককে নিয়োগ করা হয়। এরূপ স্বার্থপ্রণোদিত কার্যের দ্বারা দেশের ও দলের অনিষ্ট করা হয়। এতদ্ব্যতীত দলগত রাজনীতি প্রবর্তিত হওয়ার ফলে দলীয় স্বার্থও (Party spirit) নাগরিক জীবনের এক অভিশাপরূপে দেখা দিয়াছে। দলীয় স্বার্থ যখন প্রবল হইয়া দেখা দেয় তখন জাতীয় স্বার্থ নষ্ট হয়। দলীয় স্বার্থের হানাহানিতে অনেক দেশে বৃহত্তর জনকল্যাণের পথ চিরদিনের জন্ত রুদ্ধ হইয়াছে। এই দলীয় স্বার্থের প্রাবল্যে আয়ারল্যান্ড, ভারত প্রভৃতি দেশ দ্বিধাবিভক্ত হইয়াছে।

অস্তরায়গুলির প্রতিকার (Remedies)

পূর্ণ নাগরিক জীবনের অস্তরায়গুলিকে দূর করিতে পারিলে আদর্শ নাগরিক হওয়া যায়। লর্ড ব্রাইস এই সম্পর্কে দুইটি উপায়ের কথা বলিয়াছেন। প্রথম হইল, শাসন-ব্যবস্থার উৎকর্ষসাধন এবং দ্বিতীয় হইল জনসাধারণের জীবনযাত্রার নৈতিক মানের উন্নয়ন। শাসন-ব্যবস্থার উৎকর্ষ সাধন বলিতে আমরা বুঝি প্রত্যেক ব্যক্তিকে ভোট দানে বাধ্য করা, নাগরিকগণ কর্তৃক প্রত্যক্ষভাবে আইন প্রণয়ন করা, অল্প সময়ের ব্যবধানে প্রতিনিধি নির্বাচন, অবিশ্বস্ত বা অযোগ্য সরকারী কর্মচারীদের শাস্তিবিধান, ইত্যাদি। শাসন-ব্যবস্থায় এইগুলি বলবৎ করা হইলে লোকের উদাসীনতা, দলীয় মনোভাব ও স্বার্থপরতা অনেক পরিমাণে দূর হইয়া তাহাদিগকে রাষ্ট্রের কার্যপরিচালনায় সক্রিয় করিয়া তুলিবে। কিন্তু ইহা অপেক্ষাও অধিকতর প্রয়োজন হইল লোক-চরিত্রের উৎকর্ষ সাধন করা। মানুষের মনে কর্তব্যবোধ জাগরিত করিতে হইবে। কর্তব্যবোধে অনুপ্রাণিত হইয়া মানুষ যখন কাজ করে তখন তাহার দ্বারা মহৎ অনেক কিছু সম্ভব হয়। মানুষের মধ্যে কর্তব্যবোধ সঞ্চারিত করিবার জন্ত চাই শিক্ষার প্রসার। এই শিক্ষার ফলে নাগরিকগণ সমস্ত ক্ষুদ্রতা ও ব্যক্তিগত স্বার্থের উর্ধ্বে উঠিয়া সমাজ-জীবনকে উন্নততর করিতে পারে। প্রকৃত শিক্ষা ফলপ্রসূ হইতে হয়ত দীর্ঘ সময় অতিবাহিত হইতে পারে, কিন্তু শিক্ষার বীজ সমাজদেহে একবার প্রোথিত

হইলে আজই হউক আর কালই হউক রাজনৈতিক জীবনে সোনার ফসল ফলাইবে। ভারতীয় জনগণের নৈতিক মান যে আজ এত নীচু হইয়াছে তাহার প্রধান কারণ হইল প্রকৃত শিক্ষার অভাব।

৫

সংক্ষিপ্তসার

নাগরিকতা—একটি রাষ্ট্রের আত্মগত্বে বদ্ধ স্থায়ী বাসিন্দাকে নাগরিক বলা হয়। নাগরিকগণ রাষ্ট্রের সদস্য হিসাবে কতকগুলি সুযোগ-সুবিধা পাইয়া থাকে ; আর তাহাদের কতকগুলি দায়িত্বও আছে।

বিদেশী হইল ভিন্নদেশবাসী। যে রাষ্ট্রে বিদেশী সাময়িকভাবে বাস করে সেখানকার কর্তৃপক্ষ তাহার অবস্থানকালে তাহাকে রক্ষণাবেক্ষণ করিলেও বিদেশী সর্বপ্রকার নাগরিক অধিকার বিশেষ করিয়া রাজনৈতিক অধিকার দাবী করিতে পারে না। বিদেশীকে দেশ হইতে বহিস্কার করা যায়, কিন্তু সেনাবাহিনীতে যোগদান করিতে বাধ্য করা যায় না।

নাগরিক হইলেই নির্বাচক হওয়া যায় না। অপ্রাপ্তবয়স্ক নাগরিকদের ভোটদান করিবার অধিকার না থাকিলেও অল্প সকল রকম সুযোগ-সুবিধা তাহারা পায়। আবার বিশেষ আইনের বলে বিদেশীও অনেক সময় নাগরিকদের মত ভোটদান অধিকার অর্জন করিতে পারে। বিদেশী শাসনে বা স্বৈরাচারী শাসনে জনগণের শাসনব্যাপারে বিশেষ কোন অধিকার থাকে না বলিয়া তাহাদের প্রজা বলা হয়।

নাগরিকতা অর্জনের উপায়—পুত্রকন্নাগণ পিতৃত্বের ভিত্তিতে অথবা জন্মস্থানের ভিত্তিতে নাগরিকতা প্রাপ্ত হয়। কোন কোন দেশ উভয় নীতিই প্রয়োগ করিয়া থাকে। তাহাতে অনেক অসুবিধা হয়। ইহা ছাড়া, বিবাহের দ্বারা স্ত্রীলোকদিগের নাগরিকত্ব নির্ধারিত হয়। ভিন্ন রাষ্ট্রে সম্পত্তি ক্রয় করিয়া, বা সরকারী চাকুরী গ্রহণ করিয়া, বা নিয়মতান্ত্রিক উপায়ে আবেদন করিয়া নূতন নাগরিকত্ব লাভ করা যায়। এই পদ্ধতিগুলির দ্বারা পূর্বতন নাগরিকত্ব বিনষ্ট হয় ও নূতন নাগরিকত্ব সৃষ্ট হয়।

পূর্ণ-নাগরিক জীবনের অন্তরায় ও তাহার প্রতিকার—নাগরিক জীবনের পূর্ণতাপ্রাপ্তির পথে প্রধান অন্তরায় হইল সাধারণের কাজে

উদাসীনতা, স্বার্থপরতা ও দলগত স্বার্থবুদ্ধি। শাসন-ব্যবহার উৎকর্ষসাধন ও শিক্ষা-বিস্তারের দ্বারা নাগরিকদের নৈতিক উন্নতিসাধন করিতে পারিলে অন্তরায়গুলি দূর হইয়া স্ব-নাগরিক গঠন সম্ভব হইবে।

প্রশ্নাবলী

1. Differentiate between People, Citizens, Subjects and Electors. (C. U. 1925)
2. Distinguish between a natural-born and a naturalised citizen. What are the elements of good citizenship ?
3. What are the hindrances to good citizenship ? How can you remove them ?
4. What do you understand by a citizen ? In what way is the position of a citizen superior to that of an alien ? What important differences concerning the acquisition of citizenship exist in the law of the various states ? (C. U. 1930)
5. Explain carefully the rights and duties of citizenship. (C. U. 1948)

অষ্টম অধ্যায়

স্বাধীনতা, সাম্য ও অধিকার

(Liberty, Equality and Right)

স্বাধীনতা—সমাজভুক্ত প্রত্যেক ব্যক্তিই নিজ ইচ্ছানুসারে আপন জীবন নিয়ন্ত্রিত করিতে চায়। অতঃপর নির্দেশ পালন করিয়া কেহই পরনির্ভরশীল হইতে চায় না। ব্যক্তির এই আত্মনিয়ন্ত্রণের ক্ষমতাকে সাধারণতঃ স্বাধীনতা আখ্যা দেওয়া হয়। রাষ্ট্রবিজ্ঞানে এই ‘স্বাধীনতা’ শব্দটি এত বিভিন্ন অর্থে ব্যবহৃত হইয়াছে যে, এই শব্দটির একটি সুনির্দিষ্ট সংজ্ঞা নির্দেশ করা প্রয়োজন। সুনির্দিষ্ট সংজ্ঞানির্দেশের পূর্বে কি কি বিভিন্ন অর্থে এই শব্দটি ব্যবহৃত হয় তাহার আলোচনা করা যাইতে পারে।

প্রথমতঃ, ‘স্বাধীনতা’-শব্দটি প্রাকৃতিক স্বাধীনতা (Natural Liberty) অর্থে ব্যবহৃত হয়। এই প্রাকৃতিক স্বাধীনতার অর্থ হইল প্রত্যেক মানুষের অবাধ কার্যক্ষমতা। প্রাকৃতিক স্বাধীনতাবাদের সমর্থকগণ বলেন যে, রাষ্ট্রসৃষ্টির পূর্বে মানুষ যখন প্রকৃতির রাজ্যে বাস করিত তখন প্রাকৃতিক নিয়মগুলিকে মানুষ তাহার বিচারবুদ্ধি দ্বারা বিশ্লেষণ করিয়া সেইগুলির দ্বারা তাহাদের জীবন নিয়ন্ত্রিত করিত। প্রকৃতির রাজ্যে এই প্রাকৃতিক নিয়মের দ্বারা নির্ধারিত যে স্বাধীনতার অধিকারী মানুষ ছিল, সেই স্বাধীনতাকে প্রাকৃতিক স্বাধীনতা বলা হয়। প্রকৃতির রাজ্যে স্বাধীনতা সুনিয়ন্ত্রিত করিবার বা স্বাধীনতা রক্ষা করিবার কোন কর্তৃপক্ষ ছিল না। সুতরাং এই প্রাকৃতিক স্বাধীনতা বলিতে সবলের স্বেচ্ছাচারিতা ব্যতীত আর কিছু বুঝায় না।

দ্বিতীয়তঃ, পৌর স্বাধীনতা (Civil Liberty) অর্থে এই শব্দটি ব্যবহার করা হইয়া থাকে। নিছক ব্যক্তিগত ব্যাপারে কতকগুলি অধিকার ভোগ করা ব্যক্তির দৈনন্দিন জীবনের পক্ষে অপরিহার্য। এই স্বাধীনতা ব্যক্তির ব্যক্তিত্বের পূর্ণ বিকাশের সহায়ক বলিয়া পরিগণিত হয়। প্রত্যেক রাষ্ট্রই তাহার নাগরিকগণকে এই পৌর স্বাধীনতা ভোগ করিবার সম্পূর্ণ

স্ববিধা প্রদান করিয়া থাকে। ব্যক্তিগত সম্পত্তির মালিকানা, স্বাধীনভাবে চলাফেরা করা, বাক্‌স্বাধীনতা, ধর্মমতের স্বাধীনতা প্রভৃতি কতকগুলি অধিকারের সমষ্টিকে পৌর স্বাধীনতা বলা হয়; প্রত্যেক রাষ্ট্র ব্যক্তির চরিত্রবিকাশের অপরিহার্য সহায়ক বলিয়া এই স্বাধীনতা আইনের মাধ্যমে রক্ষা করিবার জন্ত সচেষ্ট থাকে।

তৃতীয়তঃ, স্বাধীনতা বলিতে রাজনৈতিক স্বাধীনতা (Political Liberty) ও বুঝায়। রাজনৈতিক ক্ষেত্রে শাসনপরিচালনা ব্যাপারে অংশ গ্রহণ করিবার অধিকারসমষ্টিকে রাজনৈতিক স্বাধীনতা আখ্যা দেওয়া হয়। প্রত্যেক বয়স্ক ও যোগ্য ব্যক্তির ভোট দিবার ও ভোট পাইবার ক্ষমতা যোগ্যতাসম্পন্ন হইলে রাজকার্যে নিযুক্ত হইবার অধিকার ও সরকারের অন্তর্ভুক্ত নীতির নিরপেক্ষ সমালোচনা করিবার অধিকারগুলি রাজনৈতিক স্বাধীনতাপর্যায়ভুক্ত। এই স্বাধীনতা মানুষকে রাজনৈতিক চেতনাসম্পন্ন করিয়া তাহার অধিকার ও দায়িত্বসম্বন্ধে সজাগ করে। সুতরাং এই স্বাধীনতা ব্যক্তিবিকাশের পক্ষে বিশেষ সহায়ক।

চতুর্থতঃ, স্বাধীনতা বলিতে বর্তমান যুগে অর্থনৈতিক স্বাধীনতার (Economic Liberty) ও উল্লেখ করিতে হয়, নতুবা স্বাধীনতার সংজ্ঞা অসম্পূর্ণ থাকিয়া যায়। অর্থনৈতিক স্বাধীনতাব প্রকৃত অর্থ হইল যে, প্রত্যেক মানুষকে তাহার নিজের শিক্ষা ও সামর্থ্যানুযায়ী কায করিয়া জীবিকা অর্জনের সম্পূর্ণ সুযোগ দিতে হইবে। অনশনের ভয় বা বেকার হইবার ভয় থাকিলে মনুষ্যত্ব নষ্ট হইয়া যায়। পৌর স্বাধীনতা বা রাজনৈতিক স্বাধীনতা একদিকে যেমন মানুষকে তাহার অধিকার সম্বন্ধে আত্মসচেতন করে অপর দিকে তদ্রূপ অর্থনৈতিক স্বাধীনতা মানুষকে আত্মনির্ভরশীল করিয়া তাহার অন্তর্বিধ স্বাধীনতাকে সার্থক কবিয়া তুলে। সমাজে এই অর্থনৈতিক স্বাধীনতা সুপ্রতিষ্ঠিত করিতে গেলে প্রত্যেক ব্যক্তির জীবনধারণের একটা মান স্থির করিতে হইবে। জীবনধারণে এই নির্ধারিত মান অল্পযাচী বাহাতে প্রত্যেক ব্যক্তি জীবনযাপন করিতে পারে, রাষ্ট্রের সেই ব্যবস্থা করিতে হইবে। কাজ করিয়া জীবিকা অর্জনের অধিকার, নির্দিষ্ট সময় কাজ করিয়া উপযুক্ত পারিশ্রমিকেব অধিকার, অসুস্থ বা বেকার অবস্থায় ভাতা পাইবার অধিকার প্রভৃতিকে সাধারণতঃ অর্থনৈতিক স্বাধীনতা

বলা হয়। প্রায় প্রত্যেক সভ্য দেশের শাসনতন্ত্রে এই অধিকারগুলি স্থান পাইয়াছে।

পঞ্চমতঃ, স্বাধীনতা শব্দটি জাতীয় স্বাধীনতা (National Liberty) অর্থেও ব্যবহার করা হইয়া থাকে। জাতীয় স্বাধীনতার অর্থ হইল ভিন্ন রাষ্ট্রে নিয়ন্ত্রণমুক্ত স্বাধীন সমষ্টিগত জীবন পরিচালনা করিবার অধিকার। এই স্বাধীনতার অবর্তমানে কোন ক্ষতিই পৌর স্বাধীনতা, রাজনৈতিক স্বাধীনতা প্রভৃতির অধিকারী হইতে পারে না। যে স্বাধীনতা অপরের অস্বাধীনতার উপর নির্ভর করে সে স্বাধীনতা কখনও পূর্ণ স্বাধীনতা হইতে পারে না। ব্রিটিশ-শাসিত ভারতে ব্যক্তি-স্বাধীনতা সব দিক দিয়াই ক্ষুণ্ণ হইয়াছিল। দেশ স্বাধীন হইবার পর ব্যক্তি-স্বাধীনতা পুনঃপ্রতিষ্ঠিত হইতে চলিয়াছে।

স্বাধীনতা সংজ্ঞার মধ্যে দ্বন্দ্ব (Contradiction in the Notion of Liberty)

স্বাধীনতা সংজ্ঞাটির বিভিন্ন অর্থ সমাজ সম্পর্কে ব্যক্তির বিভিন্ন পরিচয় বুঝায়। স্বাধীনতার প্রধানতঃ তিনটি রূপ দেখা যায়, যথা, পৌর, রাজনৈতিক ও অর্থনৈতিক স্বাধীনতা। স্বাধীনতার এই প্রত্যেকটি রূপই সমাজ সম্পর্কে ব্যক্তির কতকগুলি নির্দিষ্ট অধিকার সূচিত করে।

পৌর স্বাধীনতা হইল নিছক ব্যক্তিগত (personal) অধিকার। নিছক ব্যক্তিগত ব্যাপারে যে কোন ব্যক্তি সামাজিক মানুষ হিসাবে এই অধিকার-গুলি ভোগ করিতে পারে। রাজনৈতিক অধিকারগুলি হইল সাধারণ সম্পর্কিত। নাগরিক হিসাবেই এই সুবিধাগুলি পাওয়া যাইতে পারে। শ্রমিক বা কর্মী হিসাবে ব্যক্তি যে অধিকারগুলি দাবী করিতে পারে, তাহাকে অর্থনৈতিক স্বাধীনতা বলা হয়। সুতরাং স্বাধীনতা সংজ্ঞাটির এই তিনটি বিভিন্ন রূপ হইতে ইহার জটিল প্রকৃতির পরিচয় পাওয়া যায়। কারণ ব্যক্তি হিসাবে মানুষ নাগরিক বা কর্মী হিসাবে মানুষ হইতে সব সময়ে পৃথক নাও হইতে পারে। কিন্তু স্বাধীনতা সংজ্ঞাটির এই বিভিন্ন রূপগুলির মধ্যে ঐক্য থাকিলেও প্রায়শই বিরোধ ঘটে। পৌর, রাজনৈতিক ও অর্থনৈতিক স্বাধীনতা অনেক সময় একে অন্নের প্রতিকূল আচরণ করে। আইনের সহিত স্বাধীনতার যে বিরোধ তাহা অনেক সময় নিষ্পত্তিযোগ্য। কিন্তু

স্বাধীনতার এই তিনটি রূপের মধ্যে যে অন্তর্ভুক্ত তাহার সন্তোষজনক সমাধান সম্ভব নহে। স্বাধীনতা ও মতামত প্রকাশের স্বাধীনতা বিশেষ গুরুত্বপূর্ণ বলিয়া সব দেশেই বিবেচিত হয়। কিন্তু রাজনৈতিক স্বাধীনতার স্রষ্টা ও ধারক শাসন কর্তৃপক্ষ যদি মনে করে ব্যক্তিগত এই পৌর স্বাধীনতার দ্বারা রাষ্ট্রের শান্তি ও শৃংখলা বিঘ্নিত হইতেছে তাহা হইলে সরকার ব্যক্তিগত এই পৌর স্বাধীনতা সংকুচিত অথবা বিনষ্ট করিতে পারে। এক্ষেত্রে ব্যক্তিগত বা সমষ্টিগত ব্যক্তি-স্বাধীনতার সহিত সরকারের রাজনৈতিক স্বাধীনতার সংঘর্ষ ঘটে।

অপর পক্ষে পৌর স্বাধীনতা ও অর্থনৈতিক স্বাধীনতার মধ্যে সংঘাত ঘটিতে পারে। আধুনিক শিল্প-প্রধান উৎপাদন-ব্যবস্থায় শ্রমিক-মালিক বিরোধ সচরাচর ঘটিয়া থাকে। মালিক পৌর স্বাধীনতার বলে নির্দিষ্ট শর্তে শ্রমিক নিয়োগ করিতে পারেন। আবার শ্রমিক অর্থনৈতিক স্বাধীনতার বলে তাহার মজুরী পরিমাণ ও কার্যের অন্তান্ত শর্তাদি সম্পর্কে দর কষাকষি করিতে পারে। এইরূপে পৌর ও অর্থনৈতিক স্বাধীনতার মধ্যে সংঘাতের সূত্রপাত হয়। এই বিরোধ যদি উভয় পক্ষের আপস দ্বারা মীমাংসিত না হয়, তাহা হইলে রাজনৈতিক স্বাধীনতার অভিভাবক সরকারের হস্তক্ষেপ অবশ্যসম্ভাবী। সরকারী হস্তক্ষেপ এই বিরোধ বৃদ্ধি বা আপস করিতে পারে, অথবা সরকার নিজে এই বিরোধে জড়িত হইতে পারেন।

স্বাধীনতার প্রকৃত তাৎপর্য ও আইনের সহিত ইহার সম্পর্ক (True Liberty and its relation to Law and Authority)

সাধারণ অর্থে স্বাধীনতা বলিতে বুঝায় মানুষের নিজ ইচ্ছানুসারে কার্য করিবার অবাধ ক্ষমতা। ব্যক্তিগত এই অবাধ ক্ষমতাপ্রয়োগের ফলে সমাজে বিশৃঙ্খলার সৃষ্টি হয়। সর্বল ব্যক্তির স্বাধীনতা দুর্বল ব্যক্তির স্বাধীনতা হরণ করিতে পারে। অধিক বলশালী রাষ্ট্র দুর্বল রাষ্ট্রগুলিকে পদানত করিতে পারে। এইরূপ অবাধ স্বাধীনতার ফলে সমাজে মুষ্টিমেয় অধিকতর শক্তিশালী বা চতুর ব্যক্তি স্বাধীনতার অধিকারী হইবে; অপরপক্ষে, দুর্বল ও নিরীহপ্রকৃতির লোকদের কোন স্বাধীনতা থাকিবে না। স্বাধীনতা শেষ পর্যন্ত স্বেচ্ছাচারিতায় পর্যবসিত হইবে। এ কথা স্মরণ রাখিতে হইবে যে,

স্বাধীনতা শুধু ব্যক্তিবিশেষ বা সম্প্রদায়বিশেষের একচেটিয়া অধিকারের বস্তু নয়। সমাজের প্রত্যেক নাগরিকই এই স্বাধীনতার সম-অধিকারী। প্রত্যেক ব্যক্তি যাহাতে রাষ্ট্রের সদস্য হিসাবে নিরঙ্কুশভাবে স্বাধীনতা ভোগ করিয়া তাহার ব্যক্তিত্বের চরম বিকাশের সুযোগ পায়, সেইজন্য রাষ্ট্রের উদ্ভব হইয়াছে। রাষ্ট্র প্রত্যেক নাগরিকের অভিভাবক হিসাবে স্বাধীনতা ভোগ করিবার মত অবস্থা সমাজে সৃষ্টি করে। একজনের স্বাধীন ইচ্ছাপ্রয়োগের ফলে যাহাতে অপরের স্বাধীনতা নষ্ট না হয়, সেজন্য রাষ্ট্র ব্যক্তির অবাধ স্বাধীনতা প্রয়োগকে কতকগুলি বিধি-নিষেধ সৃষ্টি দ্বারা সীমাবদ্ধ করে। এই বিধি-নিষেধগুলিকে আইন বলা হয়, আর আইনের উদ্দেশ্য হইল প্রত্যেক ব্যক্তিকে অপরের স্বাধীনতার হানি না করিয়া নিজ স্বাধীনতা ভোগের সুযোগ দেওয়া। রাষ্ট্র যদি এই বিধি-নিষেধগুলি দ্বারা সমাজ-জীবন নিয়ন্ত্রিত না করিত, তাহা হইলে মানব-সমাজের অবস্থা হব্-সু-বর্ণিত প্রাকৃতিক পরিবেশের 'জোর যার মূলুক তার' অবস্থার অনুরূপ হইত। সুতরাং প্রকৃত স্বাধীনতার অর্থ স্বেচ্ছাচারিতা নয়। প্রত্যেক ব্যক্তি তাহার স্বাধীন ইচ্ছা এইরূপভাবে প্রয়োগ করিবে যাহাতে সমাজের অন্ত লোকের অনুরূপ স্বাধীনতা কোনরূপে ব্যাহত না হয়। স্বেচ্ছাচারিতা বন্ধ করিয়া পারস্পরিক সুবিধা-অসুবিধাবোধের ভিত্তির উপর প্রকৃত স্বাধীনতা প্রতিষ্ঠিত করিতে রাষ্ট্র সাহায্য করে। আর এইজন্যই রাষ্ট্রের সার্বভৌমত্বের প্রয়োজন।

সুতরাং দেখা যাইতেছে যে, প্রকৃত স্বাধীনতার অধিকারী হইতে হইলে এই সার্বভৌম শক্তিকে মানিয়া লইতে হইবে। নতুবা একজনের স্বাধীনতা অধিকতর বলশালী বা চতুর ব্যক্তির ইচ্ছার উপর নির্ভর করিবে। সুতরাং সার্বভৌম শক্তি ও ব্যক্তি-স্বাধীনতা পরস্পর-বিরোধী নয় (Sovereignty and liberty are not contradictory)। আইন হইল রাষ্ট্রের প্রধান অস্ত্র, যাহার দ্বারা রাষ্ট্র স্বেচ্ছাচারিতা বন্ধ করিয়া সমাজে এমন একটি পরিবেশের সৃষ্টি করে যে-পরিবেশে প্রত্যেক ব্যক্তি রাষ্ট্র-নির্ধারিত গণ্ডির মধ্যে নিজ ইচ্ছামত কার্য করিতে পারে। সমষ্টিগত জীবনের কল্যাণ-সাধনের জগুই রাষ্ট্র আইনের দ্বারা ব্যক্তি-স্বাধীনতার সীমারেখা নির্ধারণ করে। আইনের দ্বারা রাষ্ট্র তিন প্রকারে ব্যক্তি-স্বাধীনতা অক্ষুণ্ণ রাখে ও ব্যক্তি-স্বাধীনতা ভোগের ক্ষেত্র প্রসারিত করে। প্রথমতঃ, ব্যক্তিবিশেষের স্বাধীনতা

যদি অন্য ব্যক্তির অধিকতর শক্তির জন্ত ব্যাহত হয়, তাহা হইলে আইন তাহাকে রক্ষা করে। দ্বিতীয়তঃ, শাসকসম্প্রদায়ের স্বৈচ্ছাচারিতায় বাহাতে ব্যক্তি-স্বাধীনতা বিনষ্ট না হইতে পারে, সেজন্যও রাষ্ট্র বিশেষ ধরনের আইন-প্রণয়ন ও প্রয়োজনমত প্রয়োগ করিয়া থাকে। তৃতীয়তঃ, আইনের দ্বারা রাষ্ট্র সমাজে এমন একটি পরিবেশের সৃষ্টি করে যে-পরিবেশে প্রত্যেক ব্যক্তি এই স্বাধীনতা ভোগের সুযোগ পাইয়া ব্যক্তিদের পূর্ণ বিকাশ সাধন করিতে পারে। এই সুযোগসৃষ্টির জন্তই বর্তমান রাষ্ট্রগুলি শিক্ষা, স্বাস্থ্য, শিশুপালন ও শিশুরক্ষা, মাদকদ্রব্য-বর্জন প্রভৃতি বিষয়ক জনহিতকর আইন প্রবর্তন করিতেছে। সুতরাং আইন ও স্বাধীনতার মধ্যে কোনরূপ বিরোধ থাকিতে পারে না। একে অন্তের পরিপূরক। এইজন্যই বলা হয় যে, আইন হইল প্রকৃত স্বাধীনতা নির্ধারক ও রক্ষক (Law is the condition of liberty)।

স্বাধীনতা ও সাম্য (Liberty and Equality)

স্বাধীনতা ও সাম্য—রাজনৈতিক জীবনের এই দুইটি মহান আদর্শ সম্পূর্ণ পৃথক্ নয়। প্রকৃতপক্ষে ইহাণা একটি আদর্শের দুইটি বিভিন্ন রূপ। সাম্য-নীতি প্রবর্তিত না হইলে প্রকৃত স্বাধীনতা কার্যকরী হইতে পারে না, আর স্বাধীনতার অভাবে সমাজে সামান্যতঃ প্রবর্তিত হইতে পারে না।

সাম্য শব্দটির সাধারণ অর্থ হইল সকল মানুষই সমান। এই নীতি মানুষে মানুষে কোন পার্থক্য করে না। সুতরাং এই অর্থে ব্যবহৃত হইলে প্রত্যেক ব্যক্তি অন্তের সমান আয় করিবার ও সমান আচরণ পাইবার অধিকারী হয়। কিন্তু সাম্যের প্রকৃত অর্থ সমানত্ব নয়। বাস্তব-জীবনে দেখা যায় কি শারীরিক, কি মানসিক গঠনে কোন দুই ব্যক্তিই সমান নয়। মানুষ অসমান হইয়াই জন্মগ্রহণ করে। বয়োগ্রাণ্ডির পরও তাহাদিগের মধ্যে এই সমানত্বের অভাব থাকিয়া যায়। সুতরাং সাম্যনীতির প্রয়োগ করিয়া শ্রেষ্ঠকে নিকৃষ্টের পর্যায়ে বা নিকৃষ্টকে শ্রেষ্ঠের পর্যায়ে পরিণত করা সমাজের পক্ষে মঙ্গলজনক হইতে পারে না। সকল ব্যক্তিকেই যে সমান হইতে হইবে বা সমান করিতে হইবে এ অর্থেও সাম্য শব্দটি ব্যবহার করা যায় না। সাম্যের প্রকৃত অর্থ হইল, সমাজের প্রত্যেক ব্যক্তিকে তাহার বংশ, পদমর্যাদা, জাতি-ধর্ম-নির্বিশেষে সমান সুযোগ দিতে হইবে। একদিকে যেমন রাষ্ট্র

সকলকে তাহার ব্যক্তিত্বের চরম বিকাশের জন্য সমান সুযোগের অধিকার দান করিবে, অল্প দিকে তদ্রূপ ব্যক্তিবিশেষ বা সম্প্রদায়বিশেষকে পার্থক্য-মূলক সুযোগ দান করিতে পারিবে না। রাষ্ট্র সকল নাগরিককেই সমান চক্ষে দেখিবে। কোন কারণে কাহাকেও বিশেষ সুযোগের অধিকারী করিবে না, আর কোন কারণে কাহাকেও ক্ষায়া সুযোগ হইতে বঞ্চিত করিবে না। এই বিষয়ে রাষ্ট্রের সম্পূর্ণ নিরপেক্ষ নীতি অবলম্বন করা অবশ্য কর্তব্য। সমান সুযোগ পাইলেই যে প্রত্যেকে সেই সুযোগের সদ্যবহার করিয়া পূর্ণনাগরিক হইতে পারিবে তাহার কোন নিশ্চয়তা নাই। কিন্তু ব্যক্তির চরিত্রবিকাশের পথে যে সমস্ত অন্তরায় থাকে, রাষ্ট্র এই সমান সুযোগ দান করিয়া ব্যক্তিত্ব বিকাশের পথেই সেই অন্তরায়গুলি দূর করিতে সাহায্য করে। সমান সুযোগ দান করিবার পরও যদি কোন ব্যক্তি তাহার ব্যক্তিত্বের উন্নতি করিতে না পারে সেজন্য রাষ্ট্র দায়ী হইতে পারে না। সেক্ষেত্রে ব্যক্তিরও অসমানত্ব প্রমাণিত হইয়া তাহার যোগ্যতানুযায়ী কার্যে তাহাকে সঙ্কটে রাখিবে। সমাজ-জীবনে অধিকতর উপযোগী কার্য সম্পাদনের জন্য মানুষে মানুষে যে পার্থক্য করা হয় একমাত্র তাহাই সমর্থনযোগ্য।

সাম্যনাতির উদ্ভব ও বাস্তবক্ষেত্রে এই নীতির প্রয়োগ (Origin of the Ideal of Equality and its application to Modern States)

মানুষে মানুষে এত পার্থক্য থাকা সত্ত্বেও মানুষ কেন সাম্যের দাবী করে—এই বিষয়টির আলোচনা প্রয়োজন। মানুষের এই সাম্যের দাবী ঐতিহাসিক ও নৈতিক ভিত্তির উপর প্রতিষ্ঠিত। প্রাচীন মানব-সমাজ—স্বাধীন মানুষ ও ক্রীতদাস, অভিজাত সম্প্রদায় ও সাধারণ প্রজা, ব্রাহ্মণ ও শূদ্র প্রভৃতি উচ্চ শ্রেণী ও নিম্ন শ্রেণী এই দুই ভাগে বিভক্ত ছিল। সময়ের পরিবর্তনে এই নির্ধারিত নিম্ন শ্রেণীর লোক উচ্চ শ্রেণীর লোকদের স্বত্ব-সুবিধার সম-অংশীদার হইবার দাবী জানাইল ও কালক্রমে উভয় শ্রেণীর পার্থক্য দূরীভূত হওয়ায় তাহারা সমান পর্যায়ে উপনীত হইতে লাগিল।

নৈতিক দিক দিয়া দেখিতে গেলেও সাম্যের এই দাবী স্বীকার করা যায় না। প্রত্যেক মানুষই অল্পবিস্তর বুদ্ধির অধিকারী। এদিক দিয়া দেখিতে গেলে একটি পশুর সঙ্গে একজন মানুষের যে পার্থক্য আছে

অন্ত একজন মানুষের সঙ্গে সে পার্থক্য নাই। বুদ্ধিজীবী বলিয়া সকল মানুষই সমান ও পশুজগৎ হইতে পৃথক্। সমাজে সকল মানুষের বুদ্ধি সমান হয় না। মানুষে মানুষে বুদ্ধির তারতম্য থাকিতে পারে। কিন্তু সমষ্টিগত জীবন স্ফূর্তভাবে পরিচালিত করিবার নিমিত্ত বুদ্ধিমান ও জ্ঞানবান লোকের কর্তব্য হইল তাহার অল্পবুদ্ধিসম্পন্ন ও অনগ্রসর প্রতিবেশীকে স্নাহায্য করা। সমাজে সকলকে সমান স্তরে না আনিতে পারিলে সামাজিক জীবনের সর্বাঙ্গীণ মঙ্গলসাধন সম্ভব নয়। তাই অসমর্থ লোককে সমর্থ করিয়া তোলা সমর্থ ব্যক্তির একটি নৈতিক কর্তব্য বলিয়া সকল সমাজেই পরিগণিত হয়। সুতরাং নৈতিক দিক্ দিয়াও এই সাম্যের দাবী সমর্থিত হয়। সমাজে প্রকৃত সাম্য প্রতিষ্ঠিত করিতে হইলে শুধু রাজনৈতিক সাম্য অর্থাৎ প্রাপ্তবয়স্কদের সমান ভোটদানক্ষমতা প্রদান করিলেই চলিবে না, সাম্যনীতি সমাজ-জীবনের প্রত্যেক ক্ষেত্রে প্রয়োগ করিতে হইবে। কিন্তু আজ পর্যন্ত কোন দেশেই সমগ্রভাবে এই সাম্যনীতি প্রবর্তিত হইতে পারে নাই। সমাজব্যবস্থায় যতদিন জাতিভেদ থাকিবে ততদিন জীবনের কোন ক্ষেত্রেই এই সাম্যভাব কার্যকরী হইতে পারে না। ইংলও দেশে অভিজাত ও সাধারণ সম্প্রদায় থাকিলেও তাহাদের মধ্যে জন্মগত পার্থক্য খুব কম। ফরাসী বিপ্লবের পর ফরাসী দেশ হইতে মানুষে মানুষে এই প্রভেদ অনেক হ্রাস পাইয়াছে। রাজনৈতিক ক্ষেত্রে সাম্যভাব এখনও প্রায় কোন দেশেই স্থপ্রতিষ্ঠিত হইতে পারে নাই। অর্থনৈতিক ক্ষেত্রে এই সাম্যনীতির অভাব বিশেষরূপে দেখা যায়। অর্থনৈতিক সাম্যের অভাবে রাজনৈতিক বা সামাজিক সাম্য কার্যকরী হইতে পারে না। অর্থনৈতিক সাম্য না থাকিলে জনগণ আইনের দিক্ দিয়াও স্বেচ্ছাচার পাইতে পারে না। বিত্তশালী ব্যক্তিগণ অস্ত্রায় করিয়াও অর্থের বলে শাস্তি এড়াইতে পারে। দরিদ্র ব্যক্তিগণ অর্থের অভাবে স্ফূর্তভাবে তাহাদের মামলা পরিচালনা না করিতে পারায় অনেক সময় স্তম্ভ বিচার হইতে বঞ্চিত হয়। সুতরাং দেখা যাইতেছে যে, সামাজিক জীবনের সর্বক্ষেত্রে এই সাম্যনীতি প্রবর্তিত না হইলে ব্যক্তির বক্তৃত্ত্বের পূর্ণ বিকাশ ব্যাহত হয়। রাষ্ট্রের কর্তব্য হইল সমাজে এই সাম্যপ্রতিষ্ঠার পথে যে সকল অন্তরায় আছে তাহা দূর করিয়া পূর্ণ সাম্য প্রতিষ্ঠা করা।

নাগরিক অধিকার ও কর্তব্য (Rights and Duties of Citizenship)

সাধারণ অর্থে নাগরিক অধিকার বলিতে আমরা বুঝি নাগরিকের স্ব-ইচ্ছায় কিছু করিবার বা না-করিবার অবাধ ক্ষমতা। এই ক্ষমতা বাহ্যতে কার্যকরী হইতে পারে সে বিষয়ে লক্ষ্য রাখা রাষ্ট্রের কর্তব্য। সাধারণ অর্থে ব্যবহৃত এই নাগরিক অধিকার আর রাষ্ট্রনৈতিক অধিকারের মধ্যে পার্থক্য স্পষ্ট। তত্ত্ব মনে করে চৌর্ধ্বভিত্তিতে তাহার অধিকার আছে। কিন্তু সমাজ যদি তত্ত্বের এই অধিকার স্বীকার করিয়া লয়, তাহা হইলে সমাজ-জীবন অচল হইয়া উঠিবে। তাই রাষ্ট্রব্যবস্থায় তত্ত্বের এই অধিকারকে অনধিকার বলা হয়। রাষ্ট্র তত্ত্বের এই অধিকার স্বীকার করা দূরে থাকুক তাহা খর্ব করিয়া দেয়। পূর্বেই বলা হইয়াছে যে, রাষ্ট্রের উদ্দেশ্য হইল আইনের দ্বারা সমাজে এরূপ পরিবেশের সৃষ্টি করা যে-পরিবেশে ব্যক্তির পূর্ণ বিকাশ সম্ভব করিয়া সমষ্টিগত জীবনের উন্নতি সাধন করিতে পারা যায়। এই উদ্দেশ্য সাধনের জন্ত যে সকল অধিকার প্রয়োজন, সেগুলিকে রাষ্ট্রনৈতিক অধিকার বলা হয়। অধ্যাপক ল্যাক্সি বলেন, অধিকার হইল মানুষের সামাজিক জীবনের সেই সকল ক্ষমতা যেগুলির অভাবে মানুষ পূর্ণতাপ্রাপ্ত হইতে পারে না। সুতরাং যে ক্ষমতাগুলি ব্যক্তির পূর্ণতাপ্রাপ্তির সহায়ক সেইগুলি প্রকৃত অধিকার, আর যেগুলি পূর্ণতাপ্রাপ্তির পথে অন্তরায় সেগুলিকে অধিকার বলিয়া স্বীকার করা যায় না। মানুষ রাষ্ট্রের প্রতি আনুগত্য প্রদর্শন করে এই অধিকারের দাবীতে। রাষ্ট্র এই অধিকারগুলি অক্ষুণ্ণ রাখে ও পরিবর্তে নাগরিকগণ রাষ্ট্রের বশতা স্বীকার করে।

অধিকার ও কর্তব্যের পারস্পরিক সম্পর্ক (Correlation of Rights and Duties)

কোন নাগরিক অধিকারই অবাধ বা অসীম নয়। সমাজ-জীবনে প্রত্যেকটি অধিকার একটি নির্দিষ্ট গণ্ডির মধ্যে প্রয়োগ করিতে হয়, আর এই গণ্ডির সীমারেখা স্থির হয় অল্প লোকের অধিকারের দ্বারা। নাগরিকের যেমন কতকগুলি অধিকার আছে, সেইরূপ কতকগুলি কর্তব্য ও দায়িত্বও আছে। অধিকার ও কর্তব্য পরস্পর ঘনিষ্ঠ সম্পর্কযুক্ত। আমার যেমন

বাঁচিয়া থাকিবার, স্বাধীনভাবে চলাফেরা করিবার ও ধনসম্পত্তির নিরাপত্তার অধিকার আছে, অস্ত্রেরও সেইরূপ অধিকার আছে। আমি বাঁচিয়া থাকিতে চাই বলিয়া অস্ত্রের বাঁচিয়া থাকিবার অধিকারকে ক্ষুণ্ণ করিতে পারি না। আমার যেমন অধিকার আছে, সমাজের অগ্র সকলেরও এইরূপ অধিকার আছে এবং অস্ত্রের সেই সকল অধিকারে হস্তক্ষেপ না করিবার দায়িত্ব আমার রহিয়াছে। আমার অধিকার রক্ষা করা যেমন অস্ত্রের কর্তব্য, অস্ত্রের অধিকারে হস্তক্ষেপ না-করা তেমনি আমার কর্তব্য। তাই অধিকার ও কর্তব্য অঙ্গাঙ্গিভাবে জড়িত। একটিকে বাদ দিয়া অপরটি থাকিতে পারে না। শেষ বিশ্লেষণে দেখা যায়, অধিকার ও কর্তব্য একই আদর্শের দুইটি বিভিন্ন রূপ। প্রথমতঃ, বলা যায়, আমার যেটি অধিকার অস্ত্রের পক্ষে তাহা কর্তব্য। আমার বাঁচিয়া থাকিবার অধিকার আছে, এ কথার অর্থ হইল যে, অপর সকলের কর্তব্য হইল আমার জীবননাশ না-করা। দ্বিতীয়তঃ, অস্ত্রের যাহা অধিকার আমার তাহা কর্তব্য। অগ্র লোকের জীবনের অধিকার ক্ষুণ্ণ না-করা আমার কর্তব্য। তৃতীয়তঃ, আমার ও অগ্র লোকের অধিকারগুলিকে রক্ষা করা রাষ্ট্রের কর্তব্য। সুতরাং ব্যক্তিগত অধিকারগুলি রক্ষা করা রাষ্ট্রের পক্ষে কর্তব্য বলিয়া বিবেচিত হয়। চতুর্থতঃ, যেহেতু রাষ্ট্রই আমাদের অধিকারগুলির স্রষ্টা ও রক্ষক সেই হেতু আমাদের সকলের কর্তব্য হইল রাষ্ট্রের প্রতি আনুগত্য প্রদর্শন করা, সময়মত কর দেওয়া ও সর্বতোভাবে রাষ্ট্রের নিরাপত্তা রক্ষা করা। ব্যক্তির পক্ষে যাহা কর্তব্য রাষ্ট্রের পক্ষে সেগুলি অধিকার। সুতরাং প্রত্যেক ব্যক্তি তাহার অধিকারগুলি একরূপভাবে প্রয়োগ করিবে যাহাতে অস্ত্রের অধিকার কোনমতে ক্ষুণ্ণ না হয়। অধিকারের এইরূপ প্রয়োগই ব্যক্তিদের পূর্ণ বিকাশ করিয়া সামাজিক জীবনের অগ্রগতির পথ সুগম করিয়া দেয়।

নাগরিক অধিকারের প্রকারভেদ (Classification of Rights)

যে অধিকারগুলি রাষ্ট্র কর্তৃক স্বীকৃত হয় ও যেগুলি রাষ্ট্র আইন দ্বারা রক্ষা করে, সেইগুলিকে আইনগত অধিকার (Legal Rights) বলা হয়। এই আইনগত অধিকার ছাড়াও মানুষের কতকগুলি নৈতিক অধিকারের কথাও বলা হইয়া থাকে, যেমন বৃদ্ধ ও অক্ষম পিতামাতা পুত্রের দ্বারা পালিত হইবেন

—এই অধিকার তাঁহারা দাবী করিতে পারেন। কিন্তু এই অধিকার নীতিজ্ঞানের উপর প্রতিষ্ঠিত। ইহা ভঙ্গ করিলে আইনতঃ কেহ শাস্তি পায় না। সেইজন্য এইগুলিকে নৈতিক অধিকার (Moral Rights) বলা হয়।

প্রাকৃতিক অধিকার (Natural Rights)

এতদ্ব্যতীত আরও কতকগুলি অধিকারের উল্লেখ করা হয়, যেগুলি সাধারণতঃ প্রাকৃতিক বা মানুষের স্বভাবজাত অধিকার বলিয়া পরিচিত।

প্রাকৃতিক অধিকার মতবাদের সমর্থকগণ বলেন যে, প্রত্যেক মানুষই কতকগুলি সহজাত, চিরন্তন ও অপরিত্যাগ্য অধিকার লইয়া জন্মগ্রহণ করে এবং এই অধিকারগুলি সেই সমাজ বা রাষ্ট্র-নিরপেক্ষভাবে উপভোগ করে। মানুষের গাত্রচর্মের বর্ণ ও মানুষের চলৎশক্তি বেরূপ তাহার অবিচ্ছেদ্য অংশ প্রাকৃতিক অধিকারগুলিও তদ্রূপ মানুষের প্রকৃতির অংশ—“They are as much a part of his nature as the colour of his skin and the power of locomotion.” মানুষের এই সহজাত ও অপরিত্যাগ্য অধিকারগুলির মধ্যে ‘জীবনের অধিকার, স্বাধীনতার অধিকার ও সুখের অনুসরণ করিবার অধিকার’ উল্লেখযোগ্য।

গ্রীক দার্শনিকগণের লেখার মধ্যে এই মতবাদের উল্লেখ থাকিলেও এই মতবাদ চুক্তিবাদী দার্শনিক হব্‌স্, লক্ ও রুশো কর্তৃক সুস্পষ্টভাবে আলোচিত হয়। উপরি-উক্ত তিনজন লেখক রাষ্ট্রজন্মের পূর্বে এক প্রাকৃতিক পরিবেশ হইতে মানব-জীবনের সূত্রপাত করেন। এই প্রাকৃতিক পরিবেশে মানুষের যে অধিকার ছিল, তাহাকে ইহারা প্রাকৃতিক বা স্বভাবজাত অধিকার বলিয়া বর্ণনা করিয়াছেন। কিন্তু হব্‌স্ মানুষের যে অধিকারের উল্লেখ করিয়াছেন তাহা কোন দিক্ দিয়াই গ্রহণযোগ্য নহে। তাঁহার মতে প্রাকৃতিক পরিবেশে মানুষের যে অধিকার ছিল তাহা শুধু শ্রেষ্ঠতর শক্তির উপর প্রতিষ্ঠিত ছিল এবং স্বীয় স্বার্থসাধনের নিমিত্ত মানুষ এই অধিকারগুলির প্রয়োগ করিত। হব্‌স্-বর্ণিত প্রাকৃতিক স্বাধীনতা স্বৈচ্ছাচারিতার নামান্তর মাত্র।

লকের মতে প্রাকৃতিক পরিবেশে মানুষ পূর্ণ সাম্য ও স্বাধীনতার অধিকারী ছিল এবং এই স্বাধীনতা যুক্তির উপর প্রতিষ্ঠিত ছিল। প্রাকৃতিক-অধিকার-গুলিকে সূনিয়ন্ত্রিত করিবার যে অসুবিধা ছিল তাহা দূর করিবার নিমিত্তই

মানুষ চুক্তিবদ্ধ হইয়া রাষ্ট্র গঠন করিল। তাহারা অপেক্ষাকৃত গুরুত্বপূর্ণ অধিকারগুলিকে—যথা, জীবন, ধন ও স্বাধীনতা—সুরক্ষিত করিবার উদ্দেশ্যে প্রাকৃতিক পরিবেশের অবশিষ্ট অধিকারগুলি সমর্পণ করিল।

রুশোর মতেও প্রাকৃতিক পরিবেশে মানুষ যে পূর্ণ সাম্য ও স্বাধীনতার অধিকারী ছিল চুক্তি দ্বারা তাহারা সেই অধিকারগুলি সমষ্টিগত ইচ্ছায় (General will) সমর্পণ করিয়া সমষ্টির অবিচ্ছেদ্য অংশ হিসাবে প্রত্যেকে পুনঃপ্রাপ্ত হইল। রুশোর মতে প্রাকৃতিক অধিকারগুলি অপরিরত্যা জ্য নহে। সমষ্টিই হইল সকল অধিকারের উৎস।

মার্কিন যুক্তরাষ্ট্রের ও ফরাসী দেশের স্বাধীনতার ঘোষণায় এই প্রাকৃতিক অধিকার একটি বিশিষ্ট স্থান অধিকার করিয়া আছে। মার্কিন দেশের স্বাধীনতার ঘোষণায় সুস্পষ্টভাবে বলা হইয়াছিল যে, শ্রেষ্ঠ কর্তৃক মানুষের উপর কতকগুলি অপারত্যা জ্য অধিকার অপিত হইয়াছে। (“endowed by their creator with certain inalienable rights”)। ফরাসী দেশে স্বাধীনতার ঘোষণায় প্রস্তাবনায় বলা হইয়াছে যে, সকল মানুষই স্বাধীন ও সমান হইয়া জন্মগ্রহণ করে এবং রাষ্ট্রের প্রধান কর্তব্য হইল মানুষের এই জন্মগত সাম্য ও সমানাধিকার সংরক্ষণ করা। এই অধিকারগুলির মধ্যে স্বাধীনতার অধিকার, সম্পত্তি ও নিরাপত্তার অধিকার এবং অত্যাচার প্রতিরোধ করিবার অধিকার বিশেষভাবে উল্লেখযোগ্য।

আধুনিক কালের সমাজ-বিজ্ঞানিগণ এই মতবাদের এক নূতন ব্যাখ্যা প্রদান করিয়াছেন। সমাজ-বিজ্ঞানীদের মধ্যে গিডিংস (Giddings) বলেন যে, প্রাকৃতিক অধিকার হইল সেই সমস্ত অধিকার যে অধিকারগুলি সামাজিক সম্পর্কের ক্ষেত্রে প্রাকৃতিক নির্বাচনের নিয়ম দ্বারা প্রযুক্ত সমাজের গাঞ্জে প্রয়োজনের অধিকার এবং শেষ পর্যন্ত দেগা যায় যে, আইনামুহমোদিত অধিকারগুলি যদি উপরি-ব্যাখ্যাত প্রাকৃতিক অধিকারগুলির ভিত্তির উপর প্রতিষ্ঠিত না হয় তাহা হইলে তাহারা স্থায়িত্বলাভ করিতে পারে না। সুতরাং গিডিংসের মতে প্রাকৃতিক অধিকারগুলি সহজাত, চিরন্তন বা অপরিরত্যা জ্য হইতে পারে না। সমাজে মানুষের পারস্পরিক সম্পর্কনির্ণয়ের ক্ষেত্রেই একমাত্র এইগুলি প্রযোজ্য। সমাজনীতির সহিত সামঞ্জস্য বিধান করিয়া এই অধিকারগুলি উপভোগ করা যায়।

সমালোচনা (Criticism)

প্রাকৃতিক অধিকারগুলির বিরুদ্ধে বহু সমালোচনা উপস্থিত করা হইয়াছে। প্রথমতঃ, 'প্রাকৃতিক' শব্দটির কোন সর্বজনগ্রাহ্য বা সর্ববাদিসম্মত সংজ্ঞা নাই। বিভিন্ন লেখক বিভিন্ন অর্থে এই শব্দটি ব্যবহার করিয়াছেন। দ্বিতীয়তঃ, 'প্রাকৃতিক' শব্দটির একটি নির্দিষ্ট সংজ্ঞার অবর্তমানে কোন্ কোন্ অধিকারগুলি মানুষের প্রাকৃতিক অধিকার-পর্যায়ভুক্ত তাহা নির্ধারণ করা অসম্ভব। উদাহরণস্বরূপ বলা যাইতে পারে যে, বর্তমান বিংশ শতাব্দী পর্যন্ত স্ত্রী ও পুরুষের সমানাধিকারের দাবী সম্পর্কে গুরুতর মতভেদ দেখা যায়। তৃতীয়তঃ, চুক্তিবাদী লেখকগণ রাষ্ট্রজন্মের পূর্বে যে অধিকারগুলি উল্লেখ করিয়াছেন তাহা সমর্থনযোগ্য নহে। অবাধ ও অনিয়ন্ত্রিত ব্যক্তি-স্বাধীনতা স্বেচ্ছাচারিতার নামান্তর মাত্র। সত্য বটে যে, মানুষ জন্মের সময় হইতে কতকগুলি অধিকার লইয়া ভূমিষ্ঠ হয়, কিন্তু অধিকারগুলিকে প্রকৃত অধিকার না বলিয়া শক্তিসম্পন্ন কতকগুলি ক্ষমতা বলা অধিকতর সমীচীন। মানুষের এই সহজাত ক্ষমতাগুলি সমাজ-জীবনের প্রয়োজনে অধিকারে রূপান্তরিত হয়। মানুষ সামাজিক পরিবেশে তাহার ব্যক্তিত্বের পূর্ণ বিকাশ সাধন করিতে সমর্থ হয়। মানুষের সহজাত ক্ষমতাগুলি সমাজ কর্তৃক স্বীকৃত ও সমর্থিত হইয়া অধিকারে পর্যবসিত হয় এবং এই অধিকারগুলি যুগপৎ ব্যক্তিগত ও সমষ্টিগত-জীবনের উৎকর্ষসাধনে সহায়ক হয়। মানুষের সমাজ-জীবনের দ্বারা পরিবর্তনশীল—সমাজের পরিবর্তনের সঙ্গে সঙ্গে মানুষের অধিকারগুলির পরিবর্তন সাধিত হইয়াছে। পূর্বে যাহা অধিকার বলিয়া স্বীকৃত হইত বর্তমানে তাহা শুধু অনধিকার বলিয়া বিবেচিত হয় না—বর্তমানে সেগুলি দণ্ডনীয় অপরাধ বলিয়া গণ্য হয়। পূর্বে ভূম্যধিকারিগণের কৃষিভৃত্য রাখিবার অধিকার সমাজ কর্তৃক স্বীকৃত হইয়াছিল, কিন্তু বর্তমান যুগে ভূম্যধিকারিগণের এই অধিকার অত্যাচার ও অপরাধজনক বলিয়া বিবেচিত হয়।

উপরি-উক্ত সমালোচনা হইতে ইহাই প্রতীয়মান হয় যে, সমাজ-নিরপেক্ষ কোন অবাধ বা চিরন্তন অধিকার মানুষের থাকিতে পারে না। সমাজ হইল সকল অধিকারের উৎস ও রক্ষক। যে সামাজিক পরিবেশে মানুষ তাহার ব্যক্তিত্বের পূর্ণ বিকাশসাধনে সক্ষম হয়, সেই পরিবেশের সৃষ্টি ও সংরক্ষণ হইল রাষ্ট্রের কর্তব্য। সুতরাং প্রাকৃতিক অধিকার হইল 'সেই

অধিকারগুলি যে অধিকারগুলির সাহায্যে একটি বিশেষ সামাজিক অবস্থায় সমষ্টির কল্যাণের সহিত সামঞ্জস্য বিধান করিয়া ব্যক্তিগত কল্যাণসাধন করা সম্ভব হয়।

পৌর ও রাজনৈতিক অধিকার

আইনগত অধিকারগুলিকে দুই ভাগে ভাগ করা হয় ; যথা—পৌর অধিকার (Civil Rights) ও রাজনৈতিক অধিকার (Political Rights)। পৌর অধিকারগুলি মানুষের সভ্য জীবন যাপন করিবার পক্ষে অপরিহার্য বলিয়া বিবেচিত হয়। এগুলির অভাবে মানুষ তাহার চরিত্রের পূর্ণ বিকাশ সাধন করিতে সমর্থ হয় না। রাজনৈতিক অধিকারের দ্বারা মানুষ দেশের শাসন-পরিচালনা-কার্যে অংশ গ্রহণ করিতে পারে।

পৌর অধিকার (Civil Rights)

নাগরিকগণের যে-সমস্ত পৌর অধিকারের দাবী স্বীকৃত হইয়াছে, সেগুলির তালিকা নিম্নে দেওয়া হইল :

১। জীবনরক্ষার অধিকার (The Right to Life). ২। স্বাধীনভাবে চলাফেরা করিবার অধিকার (The Right to personal Freedom). ৩। কাজ করিবার অধিকার (The Right to Work). ৪। সম্পত্তির অধিকার (The Right to Property). ৫। স্বাধীনভাবে আইনসম্মত চুক্তি করিবার অধিকার (The Right to Contract). ৬। বাক্-স্বাধীনতা ও সংবাদপত্রের স্বাধীনতা (The Right to Speech, Press and Assembly). ৭। ধর্মচরনের অধিকার (The Right to Religion and Conscience). ৮। বিবাহ করিয়া পরিবার গঠনের অধিকার (The Right to Marriage and Family life). ৯। শিক্ষার অধিকার (The Right to Education)

১। জীবন রক্ষার অধিকার—বাঁচিয়া থাকিবার অধিকারই হইল মানুষের সর্বপ্রথম ও সর্বপ্রধান অধিকার। অন্যান্য অধিকারগুলির ভোগ এই অধিকারটির উপর নির্ভর করে। এই কারণে আত্মহত্যা করা সর্বদেশে দণ্ডনীয় অপরাধ বলিয়া পরিগণিত হয়। আত্মরক্ষা করিবার অধিকারও

জীবন ধারণের অধিকারের একটি অত্যাবশ্যকীয় অঙ্গ। কোন জীলোক যদি নিজের সম্মান রক্ষার জন্ত কোন আততায়ীর জীবন নাশ করে, তাহা হইলে সেই জীলোক হত্যাকারী বলিয়া বিবেচিত হয় না। মানবজাতির অস্তিত্ব বাহাতে বজায় থাকে, সেজন্ত বিবাহ করিয়া বংশ বিস্তার করাও জীবন রক্ষার অধিকারের অন্তর্ভুক্ত বলিয়া পরিগণিত হয়। কিন্তু যে সমস্ত লোক পৈতৃক বা হুরারোগ্য রোগে আক্রান্ত, রাষ্ট্র সে সমস্ত লোকের বিবাহ করিয়া বংশ বিস্তার করিবার অধিকার হইতে বঞ্চিত করিতে পারে।

২। ব্যক্তিগত অধিকার—এই অধিকারটির তাৎপর্য হইল স্বাধীনভাবে চলা-ফেরা ও দৈনন্দিন জীবনের কার্যসূচী স্থির করিবার অধিকার। মানুষের যদি এই অধিকারটি না থাকে তাহা হইলে তাহার ব্যক্তিত্বের পূর্ণ বিকাশ ঘটিতে পারে না। এই অধিকারটির নর্থ হইল যে, কোন ব্যক্তিকে আইনসম্মত পদ্ধতি ব্যতীত অন্য কোনভাবে গ্রেপ্তার বা আটক রাখা চলিবে না। শাসনকর্তৃপক্ষ যদি বে-আইনীভাবে কাহাকে গ্রেপ্তার করিয়া তাহার স্বাধীনতা ক্ষুণ্ণ করিতে উত্তত হয়, তাহা হইলে বিচারালয়ের সাহায্যে (Writ of Habeas Corpus) শাসনকর্তৃপক্ষের কাজে বাধা দিবার ব্যবস্থা থাকে। তবে আপৎকালে বিচারালয়ের সাহায্য গ্রহণ আংশিকভাবে বা সম্পূর্ণভাবে বন্ধ থাকিতে পারে।

৩। কাজ করিবার অধিকার—কাজ করিয়া জীবিকা অর্জনের অধিকার জীবন রক্ষার অধিকারের সহিত অঙ্গাঙ্গিভাবে জড়িত। সমর্থ বেকার লোক সমাজের গলগ্রহস্বরূপ। সুতরাং রাষ্ট্রের কর্তব্য হইল সমস্ত সমর্থ লোকের হিতকর কর্মসংস্থান সাহায্যে সকলকেই বাঁচিয়া থাকিবার এই প্রাথমিক অধিকারটি দান করা। যে রাষ্ট্র নাগরিকগণকে এই অধিকার দানে অক্ষম সে রাষ্ট্র নাগরিকগণের আহুগত্য দাবী করিতে পারে না। দেশের অর্থনৈতিক ব্যবস্থা একরূপভাবে রাষ্ট্র কর্তৃক বিগত হওয়া উচিত, যে ব্যবস্থায় ধনী ও দরিদ্রের ব্যাপক পার্থক্য দূর হইয়া সকলেরই গ্রামাচ্ছাদনের ব্যবস্থা সম্ভব হয়। শ্রমিকের কর্মদক্ষতা অক্ষুণ্ণ রাখিবার অল্পকূল পরিবেশে নির্ধারিত সময় কাজ করিয়া উপযুক্ত পরিমাণ মজুরি পাইবার অধিকারও কাজ করিবার অধিকারের অন্তর্ভুক্ত। বহু দেশে বেকার সমস্যা সমাধান-কল্পে নানা উপায় অবলম্বিত হইলেও এক শোভিয়েত যুক্তরাষ্ট্র ব্যতীত অন্য

কোন দেশে কাজ করিবার অধিকার আইনসম্মত অধিকার বলিয়া স্বীকৃত হয় নাই।

৪। সম্পত্তির অধিকার—এই অধিকারের বলে লোকে তাহার আয়ত্বাধীন প্রবাসস্থ স্বাধীনভাবে ভোগ-ব্যবহার করিতে পারে। সম্পত্তির ভোগ-দখল ব্যতীতও লোকের নিজ সম্পত্তি দান, বিক্রয় ও হস্তান্তর করিবার ক্ষমতাও এই অধিকারটির অন্তর্ভুক্ত। বর্তমান যুগে এই অধিকারটি সম্পর্কে প্রশ্ন উঠিয়াছে যে, যেহেতু এই অধিকারটি সমাজে অসাম্য সৃষ্টি করিয়া প্রমথিত এক নিকর্ম। সম্প্রদায়ের কায়মী স্বার্থ চিরস্থায়ী করে, সেইহেতু এই অধিকারটির কোন নৈতিক সমর্থন থাকিতে পারে না। কিন্তু এই যুক্তির প্রত্যুত্তরে বলা যাইতে পারে যে, অসদুপায়ে অর্জিত সম্পত্তি সমর্থনযোগ্য না হইলেও সমাজহিতকর কার্য সম্পাদনের পারিশ্রমিকরূপে যে সম্পত্তি অর্জিত হয়, তাহা সর্বক্ষেত্রে সমর্থনযোগ্য। সুতরাং অর্জিত সম্পত্তির ভোগ-দখলের অধিকার স্বীকৃত না হইলে লোকের কাজের অহুপ্রেরণা নষ্ট হইবে এবং গঠনমূলক কার্যের মধ্য দিয়া বিভিন্ন লোকের বৈচিত্র্যময় ব্যক্তিত্ব স্ফুরণের সম্ভাবনা রহিত হইবে। সুতরাং ব্যক্তিগত সম্পত্তির সম্পূর্ণ বিলোপ সাধন না করিয়া সম্পত্তির গ্রাষ্য বণ্টন ও ভোগ-ব্যবস্থা প্রবর্তন করা প্রয়োজন। এমন কি, সাম্যবাদী সোভিয়েত দেশেও নির্দিষ্ট সীমার মধ্যে সম্পত্তির অধিকার স্বীকৃত হইয়াছে। তবে এই অধিকারও অবাধ নহে। সরকার কর্তৃক ধার্য করিয়া সম্পত্তির অংশ গ্রহণ করিতে পারে। সম্পত্তির মালিকানা ও ভোগ-দখল সরকার নিয়ন্ত্রণ করিতে পারে। জাতীয় সংকটকালে সরকার ব্যক্তিগত সম্পত্তি সাময়িকভাবে ব্যবহার করিতে পারে।

৫। চুক্তি করিবার অধিকার—এই অধিকারের ভিত্তিতে লোকে অপরের সহিত সমানভাবে ত্রায়সম্মত চুক্তিতে আবদ্ধ হইতে পারে। এই অধিকারটি হইল আভ্যন্তরীণ আন্তর্জাতিক বাণিজ্যের ভিত্তি এবং এই অধিকার সাগাধ্যেই একটি জাতি অর্থনৈতিক ক্ষেত্রে শক্তিশালী হইতে পারে। কিন্তু উৎকোচ গ্রহণ বা দাস-ব্যবসায় প্রভৃতি বে-আইনী চুক্তি করিবার অধিকার রাষ্ট্র কর্তৃক স্বীকৃত হয় না।

৬। বাক-স্বাধীনতা ও সংবাদপত্রের স্বাধীনতা—বাক-স্বাধীনতা সর্বদেশে একটি গুরুত্বপূর্ণ নাগরিক অধিকার বলিয়া পরিগণিত হয়, কারণ,

এই অধিকারটি ব্যতীত মানুষের চিন্তাশক্তি ও কর্মক্ষমতার পূর্ণ বিকাশ হইয়া মানুষ পূর্ণ নাগরিকত্ব অর্জন করিতে পারে না। এই অধিকারটির অবর্তমানে মানুষ চিন্তা ও ভাবের পারস্পরিক আদান-প্রদান দ্বারা উন্নত সমাজব্যবস্থা গঠন করিতে পারে না, ফলে সামাজিক অগ্রগতি ব্যাহত হয়। গণতান্ত্রিক শাসনব্যবস্থার সাফল্যের একটি অপরিহার্য উপাদান হইল বাক্-স্বাধীনতা—যে স্বাধীনতা প্রয়োগ করিয়া জনগণ তাঁহাদের ভ্রাতৃ অধিকার রক্ষা ও সরকারী অত্যাচারের প্রতিরোধ করিতে সমর্থ হয়।

বাক্-স্বাধীনতার একটি অপরিহার্য অঙ্গ হইল সংবাদপত্রের স্বাধীনতা। বাক্-স্বাধীনতা ও মতামত প্রকাশের স্বাধীনতার তাৎপর্য হইল যে, লোকে যাহা সত্য ও ভ্রাতৃ বলিয়া বিবেচনা করে তাহা প্রকাশ করিবার ক্ষমতা। সংবাদপত্রের মধ্য দিয়াই দেশের এই মতামত অধিক সংখ্যক লোকের মধ্যে প্রচারিত হওয়া সম্ভব। এইজন্য সংবাদপত্রের স্বাধীনতা ও সভা-সমিতির স্বাধীনতা গণতান্ত্রিক শাসনব্যবস্থার অপরিহার্য উপাদান বলিয়া পরিগণিত হয়।

অনেকের মতে যুদ্ধের সময় এই বাক্-স্বাধীনতা ও সংবাদপত্রের স্বাধীনতা দেশের বৃহত্তর স্বার্থ রক্ষাকল্পে সংকুচিত বা স্থগিত রাখা যাইতে পারে। কিন্তু এ যুক্তি শর্তহীনভাবে সমর্থনযোগ্য নহে। কোন সরকার যদি অত্যাচারে বা দলীয় স্বার্থসাধনের উদ্দেশ্যে অহেতুক যুদ্ধে লিপ্ত হয়, তাহা হইলে নাগরিকগণের কর্তব্য হইল এই সরকারের কার্য প্রতিরোধ করা। কোন ব্যক্তিকে বলপূর্বক সরকারী নীতি বা সরকারী কর্মপদ্ধতি সমর্থন করিতে বাধ্য করা গণতান্ত্রিক আদর্শসম্মত ব্যবস্থা বলা যাইতে পারে না। অধ্যাপক ল্যান্সির মতে যুদ্ধাবস্থায়ও নাগরিকগণের এই বাক্-স্বাধীনতার কোনরূপ বাধা স্থাপন করা সমর্থনযোগ্য নহে।

নানাবিধ সংঘ গঠন করা ও সভা-সমিতিতে একত্রিত হইয়া আলাপ-আলোচনা করা মানুষের একটা স্বাভাবিক প্রবৃত্তি, কারণ মানুষ সামাজিক জীব। সমাজের সাধারণ স্বার্থের উপরই এই অধিকারটি প্রতিষ্ঠিত। কিন্তু রাষ্ট্র শান্তি-শৃংখলা রক্ষাকল্পে লোকের এই অধিকার সংকুচিত করিতে পারে।

৭। ধর্মচরণের অধিকার—ইহার অর্থ হইল যে, অন্তরের ধর্মমতে হস্তক্ষেপ না করিয়া বা শান্তি-শৃংখলা বা প্রচলিত নীতিবোধ লঙ্ঘন না করিয়া লোকে যে-কোন ধর্মমত পোষণ বা প্রচার করিতে পারে। ধর্ম হইল

ব্যক্তিগত জীবনের একটি নিজস্ব ব্যাপার এবং এই কারণে রাষ্ট্র সাধারণতঃ লোকের ধর্মীয় জীবনে হস্তক্ষেপ করে না।

৮। বিবাহ করিয়া পরিবার গঠনের অধিকার—পরিবার গঠনের অধিকারের অর্থ হইল বিবাহ করিয়া সন্তান-সন্ততির পিতা হওয়া এবং পারিবারিক সম্পর্কের পবিত্রতা অক্ষুণ্ণ রাখা। ইহা একটি গুরুত্বপূর্ণ অধিকার, কারণ পরিবারই হইল সমাজের প্রাথমিক সংগঠন এবং এই পারিবারিক সম্পর্কের অলংঘনীয়তা ও পবিত্রতার উপর সামাজিক জীবনের শান্তি-শৃংখলা নির্ভর করে। কিন্তু সামাজিক শান্তি-শৃংখলার পরিপন্থী কোন পারিবারিক অধিকার রাষ্ট্র কর্তৃক স্বীকৃত হয় না। এই কারণে রাষ্ট্র অস্থায়ী বিবাহ-বন্ধন (Temporary Marriage) অনুমোদন করে না এবং অনেক রাষ্ট্র বহু-বিবাহ সমর্থন করে না। রাষ্ট্র কতকগুলি পারিবারিক অধিকার স্বীকার করিলেও বিবাহিত জীবনের কতকগুলি বিশেষ করিয়া সন্তান-পালন সম্পর্কে কর্তব্য বলবৎ করে।

৯। শিক্ষার অধিকার—শিক্ষা ব্যতীত মানবচরিত্রের পূর্ণ বিকাশ সম্ভব নহে, তাই বর্তমান যুগে এই অধিকারটি বিশেষ গুরুত্বপূর্ণ অধিকার বলিয়া সভ্যদেশে পরিগণিত হয়। শিক্ষা ব্যতীত নাগরিক চেতনার উন্মেষ হয় না। তাই রাষ্ট্রের কর্তব্য হইল প্রত্যেক ব্যক্তিকে তাহার স্বাভাবিক প্রবণতা ও সামর্থ্য অনুযায়ী শিক্ষার সুবিধা দান করা।

উপরি-উক্ত অধিকারগুলি প্রত্যেক ব্যক্তিই আইনতঃ ও ন্যায়সঙ্গতভাবে দাবী করিতে পারে, কিন্তু একটি কথা স্মরণ রাখিতে হইবে যে, এই অধিকার-গুলির কোনটিই অবাধভাবে প্রয়োগ করা চলে না। প্রত্যেক অধিকারই কর্তব্যের গণ্ডির দ্বারা সীমায়িত। আমার বাঁচিয়া থাকিবার অধিকার আছে সত্য, কিন্তু আমি যদি অস্ত্রের জীবননাশ করি তাহা হইলে আমার বাঁচিয়া থাকিবার অধিকার হইতে আমি বঞ্চিত হইব। আমি স্বাধীনভাবে চিন্তা করিয়া বাহা সত্য বলিয়া মনে করি তাহা ব্যক্ত করিবার অধিকার আছে, কিন্তু আমার স্বাধীন মতামত একরূপভাবে ব্যক্ত করিতে হইবে বাহাতে অস্ত্রের মতামত অভিব্যক্তির পথে অন্তরায় না হয়, বা অস্ত্রের স্তন্যম নষ্ট না হয়, বা

সমাজের শান্তিভঙ্গের সম্ভাবনা না থাকে। সেইরূপ ক্ষেত্রে রাষ্ট্র আমার এই স্বাধীন মতামত ব্যক্ত করিবার অধিকার হইতে আমাকে বঞ্চিত করিতে পারে। জাতির বৃহত্তর স্বার্থরক্ষাকল্পে সরকার অনেক সময় এই অধিকার-গুলিকে সংকুচিত করিতে পারে। যে অধিকারগুলি প্রয়োণের ফলে সমাজ-বিরোধী হিংসাত্মক-কার্যকলাপ অহুষ্ঠিত হইতে পারে বা শান্তি-শৃংখলাভঙ্গের সম্ভাবনা থাকে, জনকল্যাণের জন্ত সরকার সে অধিকারগুলিও খর্ব করিতে পারে।

বর্তমান যুগে নাগরিক অধিকার-সম্পর্কিত ধারণার আবুল পরিবর্তন সাধিত হইয়াছে। অধিকার সম্পর্কে গুরুত্বপূর্ণ বিষয় হইল যে, কোন অধিকারই অবাধ বা সমাজ-নিরপেক্ষ নহে। এতদ্ব্যতীত আরও একটি কথা স্মরণ রাখিতে হইবে, সর্বকালের জন্ত স্থনির্দিষ্টভাবে এই অধিকারগুলির সংজ্ঞা নির্ণয় করা বা এইগুলির প্রয়োগের ক্ষেত্র স্থির করা যায় না। যেহেতু এই অধিকারগুলি একটা নির্দিষ্ট সামাজিক অবস্থায় স্বীকৃত ও সমর্থিত হয়, সেই হেতু সামাজিক অবস্থার পরিবর্তনের সহিত অধিকারগুলিরও পরিবর্তন ঘটে। মানুষের শিক্ষার অধিকার বা জীবিকা অর্জনের অধিকার পূর্বে স্বীকৃতিলাভ করে নাই বা বর্তমান জগতে বহুদেশে এই অধিকারগুলি স্বীকৃত হয় নাই, কিন্তু কালের বিবর্তনে বহুদেশে এই অধিকার স্বীকৃতি লাভ করিয়া মৌলিক অধিকারের পর্যায়ে উন্নীত হইয়াছে। সুতরাং অধিকারগুলি গতিশীল—স্থিতিশীল নহে।

মৌলিক অধিকার (Fundamental Rights)

অধিকারগুলি পর্যালোচনা করিলে এই সিদ্ধান্তে উপনীত হওয়া যায় যে, অধিকারগুলি আপেক্ষিক ও প্রত্যেকটি অধিকার অন্তের অহুরূপ অধিকার ও সামাজিক হিতবোধ দ্বারা সীমায়িত—অর্থাৎ প্রত্যেকটি অধিকার ব্যক্তি কর্তৃক একটি নির্দিষ্ট গতির মধ্যে প্রযুক্ত হইবে। অধিকারগুলি অবাধ, অসীম বা চিরন্তন না হইলেও মানুষের এমন কতকগুলি প্রাথমিক অধিকার আছে, যেগুলি ব্যক্তিবিকাশের অপরিহার্য অবস্থা বলিয়া সর্বদেশে স্বীকৃত হয় এবং এইজন্য এই অধিকারগুলির উপর বিশেষ গুরুত্ব আরোপ করা হয়। জীবনের অধিকার, স্বাধীনতার অধিকার, সম্পত্তির অধিকার, স্বাধীন ধর্মমত

পোষণ করিবার অধিকার প্রভৃতি এই পর্যায়ভুক্ত। বর্তমান যুগে এই অধিকার-গুলি সকল সভ্য দেশের রাষ্ট্র কর্তৃক স্বীকৃত হইয়াছে এবং এই অধিকারগুলি সংরক্ষণের জন্য রাষ্ট্রগুলি যথোপযুক্ত ব্যবস্থা অবলম্বন করিয়াছে। এই অধিকারগুলি বাহাতে অল্প ব্যক্তি বা শাসনকর্তৃপক্ষের স্বৈচ্ছাচারিতায় ব্যাহত না হয় তজ্জন্ত অনেক দেশে শাসনতন্ত্রে একটি অধিকারের সনদ (Bill of Rights) সংযোজন করা হয়। অধিকারের সনদে মানুষের এই প্রাথমিক অধিকারগুলি—যেগুলির অভাবে কোন মানুষেরই ব্যক্তিত্ব সম্পূর্ণরূপে বিকাশ লাভ করিতে পারে না—স্থান পায়। এই অধিকারগুলিকে বিশেষ মর্যাদা ও গুরুত্ব প্রদান করিবার উদ্দেশ্যে অল্পাধিক অধিকার হইতে পৃথক করিয়া শাসনতন্ত্রে সন্নিবিষ্ট করা হয়। এইজন্য এই অধিকারগুলিকে মৌলিক অধিকার (Fundamental Rights) বলা হয়। যদি কোন কারণে এই অধিকারগুলি ক্ষুণ্ণ হওয়ার সম্ভাবনা থাকে তাহা প্রতিরোধ করিবার জন্য শাসনতান্ত্রিক উপায়ে প্রতিকারের ব্যবস্থা থাকে। মার্কিন যুক্তরাষ্ট্র, ভারত প্রভৃতি যে সমস্ত দেশে লিখিত শাসনতন্ত্রে অধিকারের সনদ দ্বারা অধিকার-গুলি সুরক্ষিত হইয়াছে, সে সমস্ত দেশে প্রধান বিচারালয়েও বিচার-বিভাগীয় ব্যাখ্যা ও সিদ্ধান্তের উপর এই অধিকারগুলির নিরাপত্তা অনেক পরিমাণে নির্ভর করে। গ্রেট ব্রিটেনে ব্যক্তি-স্বাধীনতা লিখিত শাসনতন্ত্র দ্বারা সুরক্ষিত না হইলেও সে দেশের প্রচলিত আইন ব্যক্তি-স্বাধীনতার রক্ষাকবচ হিসাবে কার্য করে। আইনের দ্বারা জনসাধারণের নিরাপত্তা রক্ষা করা হয়। গ্রেট ব্রিটেনের জাতীয় জীবনের নানারূপ ষাট-প্রতিঘাতের মধ্য দিয়া নাগরিক অধিকারগুলি আত্মপ্রকাশ করিয়াছে এবং বিচারালয়গুলি এই স্বতঃস্ফূর্ত অধিকারগুলিকে স্বীকার করিয়া স্থপ্রতিষ্ঠিত ও সুদৃঢ় করিয়াছে। শাসনতন্ত্র কর্তৃক সংরক্ষিত হওয়া সত্ত্বেও অনেক ক্ষেত্রে এই অধিকারগুলি ব্যাহত হইতে পারে—এ কথা স্বীকার করিয়া লইলেও বলা যায় যে, শাসনতন্ত্র কর্তৃক স্বীকৃত ও সংরক্ষিত অধিকারগুলি সম্পর্কে ব্যক্তি যেরূপ অবহিত ও সচেতন থাকে, অল্পদিকে সেইরূপ শাসনকর্তৃপক্ষও এই অধিকারগুলিকে কোনক্রমে ব্যাহত করিতে বিরত থাকে। এইরূপে শাসক-শাসিতের সম্পর্ক নির্ণয় করিয়া লিখিত শাসনতন্ত্র ব্যক্তিগত অধিকার ও শাসনকর্তৃপক্ষের ক্ষমতার সামঞ্জস্যবিধানে সহায়তা করে।

রাজনৈতিক অধিকার (Political Rights)

নাগরিকগণ নিম্নলিখিত রাজনৈতিক অধিকারগুলি ভোগ করিয়া থাকেন :—

১। প্রতিনিধি নির্বাচনের অধিকার (Right to vote). ২। সরকারী কার্যে নিযুক্ত হইবার অধিকার (Right to hold Public Offices). ৩। সরকারের অহুসৃত নীতি ও কার্যপদ্ধতির সমালোচনা করিবার অধিকার (Right to criticise the Government).

১। ভোটদান করিবার অধিকার—এই অধিকারের অর্থ হইল যে, প্রত্যেক সাবালক ব্যক্তি নির্বাচনকালে ভোটদান করিয়া কোন্ ব্যক্তি সরকারী কার্যে উপযুক্ত তাহা স্থির করিতে পারিবে। ভোটদান ক্ষমতা হইল গণতান্ত্রিক শাসনব্যবস্থার মূল নীতি। কিন্তু গণতান্ত্রিক শাসনব্যবস্থায়ও এই ভোটদান অধিকার সকল নাগরিকের উপর অপিত হয় না। সাবালক, দেউলিয়া, কয়েক শ্রেণীর দুর্বৃত্ত এবং অনেক দেশে স্ত্রীলোকগণকে এই অধিকার হইতে বঞ্চিত করা হয়। কিন্তু আদর্শ গণতান্ত্রিক শাসনব্যবস্থায় জাতি-বর্ণ-ধর্ম ও স্ত্রী-পুরুষ বা শিক্ষা ও সম্পত্তির মালিকানা-নির্বিচারে এই ভোটদান ক্ষমতা অপিত হওয়া উচিত। যে শাসনব্যবস্থায় ভোটদানের অধিকার নির্দিষ্ট সংখ্যক লোকের মধ্যে সীমাবদ্ধ, সে শাসনব্যবস্থায় সার্বজনীন কল্যাণ ব্যাহত হয়।

২। সরকারী কার্যে নিযুক্ত হইবার অধিকার—উপযুক্ত যোগ্যতা-সম্পন্ন হইলে জাতি, ধর্ম ও স্ত্রী-পুরুষ-নির্বিশেষে যে-কোন ব্যক্তি যে-কোন সরকারী কার্যে নিযুক্ত হইতে পারে। সকলেরই এ সম্পর্কে সমান অধিকার দান করিতে হইবে। রাষ্ট্রের সর্বোচ্চ পদের জন্য উপযুক্ত যোগ্যতাসম্পন্ন হইলে একজন দরিদ্র ব্যক্তি একজন ধনী ব্যক্তির সমান বিবেচিত হইবে।

৩। প্রতিনিধি নির্বাচিত হইবার অধিকার—প্রাপ্তবয়স্ক ব্যক্তির যে-রূপ ভোটদান করিবার অধিকার আছে, তদ্রূপ তাহার ভোট পাইবার অধিকারও আছে। আইনসভায় বা স্থানীয় শাসন প্রতিষ্ঠানগুলির সভায় প্রত্যেক ব্যক্তিই নির্বাচিত হইতে পারে। তবে নির্বাচিত হইলে গেলে তাহাদের একটা নির্দিষ্ট বয়স্ক হওয়া চাই ও প্রয়োজনীয় অন্ত্র যোগ্যতায় অধিকারী হইতে হয়।

৪। সরকারী কাজের সমালোচনা করিবার অধিকার—নাগরিকগণ অভাব-অভিযোগের প্রতিকারের জন্ত ও শাসনব্যবহার উন্নতির জন্ত আইন-সম্বন্ধভাবে সরকারের কার্যের সমালোচনা করিতে পারে। গণতান্ত্রিক শাসনব্যবস্থায় শাসকবর্গ শেষ পর্যন্ত শাসিতের নিকট দায়ী। সুতরাং শাসক-শ্রেণী শাসিতের গ্রামসম্বন্ধে অভাব-অভিযোগ উপেক্ষা করিতে পারে না।

অর্থনৈতিক অধিকার (Economic Rights)

বর্তমান যুগে মানুষের অর্থনৈতিক অধিকারগুলির উপর অধিকতর গুরুত্ব আরোপ করা হয়। এই অধিকারগুলি ব্যতীত রাজনৈতিক অধিকার সার্থক হইতে পারে না। মানুষ যদি সর্বদা অনশন, বেকার ও আশ্রয়হীন হইবার ভয়ে সন্ত্রস্ত থাকে তাহা হইলে এরূপ ব্যক্তির নিকট ভোটাদিকার বিড়ম্বনা মাত্র।

যোগ্যতা অনুসারে কার্যে নিযুক্ত হইবার, নির্ধারিত সময় কাজ করিয়া উপযুক্ত পারিশ্রমিক পাইবার ও উপযুক্ত অবসর লাভের দাবী অর্থনৈতিক অধিকারের অন্তর্ভুক্ত। অনশনক্রিষ্ট ব্যক্তির ভোটদান ক্ষমতা থাকিলেও সে ক্ষমতা সে যথাযথভাবে প্রয়োগ করিতে অক্ষম। তাহার পক্ষে জাতীয় বা স্থানীয় আইনসভাগুলিতে সদস্য নির্বাচিত হওয়া অসম্ভব। সুতরাং কাজ করিয়া জীবিকা অর্জনের অধিকার সুপ্রতিষ্ঠিত না হইলে মতামত প্রকাশের স্বাধীনতা বা ধর্মাচরণের স্বাধীনতা মূলাহীন।

অর্থনৈতিক অধিকার সুপ্রতিষ্ঠিত করিতে হইলে সমাজে এরূপ অবস্থা সৃষ্টি করিতে হইবে যাহাতে সকলের জন্ত উপযুক্ত পরিমাণে অভাব পূরণের সামগ্রী না হওয়া পর্যন্ত মৃষ্টিমেয়ের জন্ত প্রাচুর্য থাকিতে পারিবে না। এরূপ সমাজব্যবস্থায় কোন শ্রেণীবিশেষের আধিপত্য থাকিতে পারিবে না। অর্থনৈতিক অধিকার-বৃত্ত সমাজব্যবস্থায় শ্রমিক শুধু শ্রমের বিক্রেতা ও অপরের আজ্ঞাবহ বলিয়া পরিগণিত হয় না। এরূপ সমাজব্যবস্থায় শ্রমিক সমাজ হিতকর উৎপাদক হিসাবে একটি বিশিষ্ট স্থান অধিকার করে। সুতরাং অর্থনৈতিক অধিকারের তাৎপর্য হইল উৎপাদন ব্যবস্থায় গণতন্ত্রের প্রবর্তন। উৎপাদন ব্যবস্থায় গণতান্ত্রিক আদর্শের প্রবর্তন দুইটি অবস্থায় উপর নির্ভর করে। প্রথমতঃ, শ্রমিকগণের কাজ করিয়া উপযুক্ত মজুরি

পাইবার, বিশ্রামলাভের, অস্থি, বেকার বা আকস্মিক বিপদ অবস্থায় সাহায্য পাইবার, শ্রমিক সংঘ গঠন করিবার প্রভৃতি অধিকার। দ্বিতীয়তঃ, শ্রমিক-গণের উৎপাদন ব্যবস্থা নিয়ন্ত্রণ করিবার অধিকার। শ্রমিকগণের যদি উৎপাদন ব্যবস্থা নিয়ন্ত্রণের কোন অধিকার না থাকে তাহা হইলে তাহাদের কর্মে অল্পপ্রেরণা নষ্ট হইয়া তাহারা উৎসাহহীন নিষ্কর্মীতে পর্যবসিত হইবে। যে উৎপাদন ব্যবস্থা অনশন বা বেকার ভয়ে ভীত কর্মিবৃন্দ দ্বারা পরিচালিত হয়, সে উৎপাদন ব্যবস্থা কখনই দক্ষ বা স্বয়ং-সম্পূর্ণ হইতে পারে না। এরূপ ব্যবস্থায় মানবিক অধিকার সুপ্রতিষ্ঠিত না হইয়া শুধু ক্ষুণ্ণ হয়।

অধিকারের আইনগত ভিত্তি—Legal basis of Rights

রাষ্ট্রের সার্বভৌমিকতা অর্থাৎ অবাধ ও অসীম ক্ষমতা হইল ব্যক্তিগত অধিকারের একমাত্র উৎস। এই মতবাদে বলা হয় যে, ব্যক্তির অধিকারের অর্থ হইল ব্যক্তির এমন কতিপয় দাবী যাহা বিচারালয়ের নির্দেশে রাষ্ট্র কর্তৃক বলবৎ করা হয়। সুতরাং দেখা যায় যে, রাষ্ট্রই ব্যক্তিগত অধিকারের সংজ্ঞা নির্দেশ করিয়া ইহার পরিধি ও কার্যক্ষেত্র স্থির করিয়া দেয়। ইহা হইতে বুঝা যায় যে, অধিকারগুলি রাষ্ট্র হইতেই উদ্ভূত এবং রাষ্ট্র ব্যতীত কার্যকর করা যায় না। রাষ্ট্র আইন প্রণয়ন করিয়া এই আইনের সাহায্যে অধিকারগুলি ব্যক্তির পক্ষে সহজলভ্য করে। যেহেতু আইনের সাহায্যে অধিকারগুলির সৃষ্টি হয় এবং বলবৎ করা হয়, সেই হেতু আইনের বিষয়বস্তুর পরিবর্তন ঘটিলে, অধিকারগুলির প্রকৃতি ও তাৎপর্ষের পরিবর্তন ঘটে। সুতরাং অধিকারগুলি একান্তভাবে আইনের উপর নির্ভরশীল।

অধিকারের উপরি-উক্ত নিছক আইন-ভিত্তিক ব্যাখ্যা দ্বারা অধিকার-গুলির পূর্ণ পরিচয় পাওয়া সম্ভব নহে। কোন নির্দিষ্ট কালে কোন সমাজে ব্যক্তি যে অধিকারগুলি আইনের বলে কার্যতঃ ভোগ করিতে পারে তাহা নিশ্চয়ই তাহার যে সমুদয় অধিকার ভোগ করা উচিত তাহার সমান নাও হইতে পারে। বর্তমানে শিক্ষার অধিকার একটি মৌলিক অধিকার বলিয়া সকল সভ্য সমাজে স্বীকৃতি লাভ করিয়াছে। কিন্তু অনেক সমাজে শিক্ষার এই অধিকার আইনের সাহায্যে সৃষ্টি হয় নাই বা স্বীকৃতি লাভ করে নাই।

সুতরাং ব্যক্তির ব্যক্তিগত বিকাশের জন্য যে সমুদয় অধিকার একান্তভাবে অপরিহার্য তাহা শুধুমাত্র আইন দ্বারা সৃষ্ট ও স্বীকৃত অধিকারের দ্বারা পূরণ করা সম্ভব নয়। ইহা ব্যতীত বলা যায় যে, মানুষ প্রকৃতি ও প্রয়োজনের তাগিদে সমাজ মধ্যে বহুবিধ সংঘ গঠন করিয়াছে। এই বিভিন্ন সংঘগুলি সম্পর্কেও মানুষের বিভিন্ন অধিকার আছে যে অধিকারগুলিও তাহার ব্যক্তিগত বিকাশে সাহায্য করে। সুতরাং একমাত্র রাষ্ট্রীয় আইন দ্বারা স্বীকৃত অধিকারগুলি ব্যক্তিগত বিকাশের পক্ষে যথেষ্ট বলিয়া পরিগণিত হইতে পারে না। পরিশেষে বলা যায় যে, অধিকারের ধারণার প্রকৃত উৎস হইল সামগ্রিকভাবে সামাজিক হিতাহিত বোধ। আইন নির্দিষ্ট সময়ের সামাজিক চিন্তাধারার প্রতিবিম্ব মাত্র। সুতরাং অধিকারগুলিও এই সামাজিক চিন্তাধারার অভিব্যক্তি মাত্র—রাষ্ট্রীয় আইন দ্বারা সৃষ্ট নহে।

শেষ বিশ্লেষণে দেখা যায় যে, অধিকারের নিছক আইন-ভিত্তিক ব্যাখ্যা সম্পূর্ণ নহে। আইন-ভিত্তিক অধিকার ব্যতীতও নৈতিক অধিকার সমগ্র সমাজ ব্যবস্থায় অপরিহার্য।

অধিকারের অর্থনীতিভিত্তিক সংজ্ঞা—Economic View of Rights

বিভিন্ন সম্প্রদায়ের লেখকগণ বিভিন্ন দৃষ্টিকোণ হইতে অধিকার সংজ্ঞাটির বিশ্লেষণ করিয়াছেন। যে-কোন দৃষ্টিভঙ্গী লইয়া অধিকার সংজ্ঞাটি ব্যাখ্যা করা হউক না কেন, অধিকার সম্পর্কে প্রধান কথাটি হইল যে, যেহেতু রাষ্ট্র-প্রণীত আইন সাহায্যে অধিকারগুলি স্বীকৃত ও বলবৎ করা হয়, সেই হেতু অধিকারগুলির রূপ ও প্রকৃতি আইনের দ্বারা বিশেষভাবে প্রভাবিত হয়। সুতরাং অধিকারগুলির প্রকৃতি জানিতে হইলে আইনগুলির প্রকৃতি জানা প্রয়োজন।

কোন দেশে একটি নির্দিষ্ট সময়ে প্রচলিত আইনগুলির কোন সার্বজনীন রূপ নাই বলিলেও অতুক্তি হয় না। কার্ল মার্কস প্রভৃতি সমাজতত্ত্ববাদী লেখকদের মতে আইন হইল একটি নির্দিষ্ট সময়ে শ্রেণীবিশেষের স্বার্থে রচিত কতিপয় আচরণ-বিধি। যে শ্রেণী রাজনৈতিক ক্ষমতার উপর প্রভাব বিস্তার করিতে সক্ষম সেই শ্রেণীর স্বার্থেই আইন রচিত হয়। সাধারণভাবে

বলিলে বলা যায় যে, যে শ্রেণীর হস্তে অর্থনৈতিক ক্ষমতা কেন্দ্রীভূত, সেই শ্রেণীই রাষ্ট্রনৈতিক ক্ষমতা দখল করিয়া তাহাদের স্বার্থে আইন প্রণয়ন করে। ইহাদের মতে দেশের ধনবটন ব্যবহার উপরই আইনের কাঠামো নির্ভর করে। অর্থনৈতিক ক্ষমতা যদি স্বল্প সংখ্যক ভূম্যধিকারী ও ধনিক শ্রেণীর হস্তে কেন্দ্রীভূত হয় তাহা হইলে এই শ্রেণী রাজনৈতিক ক্ষমতা দখল করিয়া তাহাদের শ্রেণীস্বার্থ পুষ্ট করিবার উদ্দেশ্যে প্রয়োজনীয় আইন প্রণয়ন করে। এরূপ ক্ষেত্রে অধিকারের অর্থ হইল শ্রেণীবিশেষের আইন দ্বারা সুরক্ষিত কতকগুলি বিশেষ স্ববিধা। এক্ষেত্রে বিত্তহীন শ্রেণীর অধিকার বিশেষভাবে সংকুচিত হয়। একমাত্র সমাজতান্ত্রিক ভিত্তিতে সমাজ ব্যবস্থা গঠিত না হইলে সার্বজনীন অধিকার প্রতিষ্ঠিত হইতে পারে না।

অধিকারের উপরি-উক্ত ব্যাখ্যা সাহায্যে ধনবটন ব্যবস্থায় যে গুরুতর বৈষম্য আছে তাহা সহজেই অনুমান করা যায় এবং এই বৈষম্য দূরীভূত না হইলে অধিকারের সার্বজনীন রূপায়ণ সম্ভব নয় তাহা বিশেষভাবে বুঝিতে পারা যায়। তবে একটি কথা মনে রাখিতে হইবে যে, বর্তমান যুগে অধিকার-গুলির স্রষ্টা ও প্রবর্তনকারী আইন শুধু একটি মাত্র শ্রেণীর প্রভাবে রচিত হয় না। আইন প্রণয়নে অল্পবিস্তর পরিমাণে সামাজিক অগ্রান্ত শক্তিরও প্রভাব দেখা যায়। তাই প্রায় সব দেশেই আইন প্রণয়নে বর্তমান সমাজতান্ত্রিক প্রবণতা দেখা যায়।

নাগরিকের কর্তব্য (Duties of Citizens)

নাগরিক কর্তব্য বলিতে বুঝায়, যে কর্তব্যগুলি নাগরিকের পক্ষে অবশ্য করণীয়—যেগুলি পালন না করিলে আইনসম্মতভাবে শাস্তি পাইতে হয়। নাগরিক যেরূপ রাষ্ট্রের নিকট হইতে অধিকার দাবী করে, রাষ্ট্রও তদ্রূপ নাগরিকের নিকট কতকগুলি কর্তব্যপালনের দাবী করিতে পারে। এই কর্তব্যগুলি হইল—

আনুগত্য (Allegiance)

প্রত্যেক নাগরিকেরই কর্তব্য হইল রাষ্ট্রের প্রতি একনিষ্ঠভাবে আনুগত্য প্রদর্শন করা। আনুগত্যের অর্থ হইল, রাষ্ট্রের কার্যে বাধা না দিয়া

সর্বতোভাবে রাষ্ট্রকে সাহায্য করা। অপরাধ নিবারণ ও অপরাধীদের গ্রেপ্তার কার্যে, শাস্তি-শৃংখলারক্ষার কার্যে, অন্তর্বিপ্লব ও বহিরাক্রমণ হইতে রাষ্ট্ররক্ষা কার্যে সাহায্য করা প্রত্যেক নাগরিকেরই গুরুদায়িত্ব বলিয়া সর্বদেশে বিবেচিত হয়।

রাষ্ট্রের আইন মান্য করিয়া চলা (Obedience to laws)

রাষ্ট্র আইনের দ্বারা ব্যক্তি-স্বাধীনতা রক্ষা করে। সুতরাং ব্যক্তিগত ও সামাজিক স্বার্থের জন্ত প্রত্যেক নাগরিকের আইন মানিয়া চলা উচিত। কোন ব্যক্তির বা সম্প্রদায়ের মতে যদি কোন আইন অন্যায় বা অসঙ্গত বলিয়া মনে হয়, তাহা হইলে জনমত স্থগিত করিয়া নিয়মতান্ত্রিক উপায়ে সে আইনের বিরুদ্ধে আন্দোলন করিতে হইবে।

করপ্রদান (Payment to taxes)

আইন-শৃংখলা বজায় রাখা ও জনহিতকর কার্যসম্পাদনের জন্ত রাষ্ট্রের প্রভূত অর্থের প্রয়োজন। জনগণের প্রদত্ত কর হইতে এই অর্থ সংগৃহীত হয়। সুতরাং রাষ্ট্র পরিচালনা-কাণ্ডে যাহাতে স্বচ্ছভাবে সম্পন্ন হয় সেইজন্য প্রত্যেকের দেয় কর সময়মত রাষ্ট্রকে প্রদান করিতে হইবে।

এতদ্ব্যতীত প্রত্যেক নাগরিকের ভোটদান-ব্যাপারে অবহিত হইতে হইবে। ভোটদান করা শুধু একটা নাগরিক অধিকার নয়, ইহা নাগরিকের পক্ষে একটা গুরু দায়িত্ব বলিয়া বিবেচিত হওয়া উচিত। সুতরাং সততা ও সুবিবেচনাসহকারে এই দায়িত্ব পালন করা প্রত্যেক নাগরিকের কর্তব্য। সমাজ-জীবন যাহাতে উন্নততর হয় সেজন্য নাগরিকগণের সর্বদা সচেতন থাকা উচিত। প্রয়োজনমত সরকারী কার্যে সাহায্য করা নাগরিকদের অবশ্য কর্তব্য। এইজন্য সর্বদেশে জরুরী বিচার প্রবর্তিত আছে। রাষ্ট্রের নিরাপত্তা কোন কারণে বিপন্ন হইলে নাগরিকগণের কর্তব্য হইল নিজের জীবন তুচ্ছ করিয়া রাষ্ট্রকে রক্ষা করা। রাষ্ট্র সকল অধিকারের উৎস। রাষ্ট্রের অবর্তমানে ব্যক্তি-স্বাধীনতা থাকিতে পারে না। তাই রাষ্ট্রকে রক্ষা করা প্রত্যেক নাগরিকেরই অবশ্য কর্তব্য।

ব্যক্তি-স্বাধীনতা রক্ষা করিবার বিভিন্ন উপায় (Safeguards of Liberty)

স্বাধীনতা ব্যক্তিবিকাশের অপরিহার্য সহায়ক বলিয়া সর্বদেশে বিবেচিত হয়, সেইজন্য সকল দেশেই এই ব্যক্তি-স্বাধীনতা রক্ষার ব্যবস্থা করা হইয়া থাকে।

আমেরিকা যুক্তরাষ্ট্র, ভারত প্রভৃতি দেশে একটা সুনির্দিষ্ট লিখিত শাসন-তন্ত্রের সাহায্যে নাগরিকগণের মৌলিক অধিকারগুলি রক্ষার ব্যবস্থা করা হইয়াছে। শাসনতন্ত্রে নাগরিকগণের মৌলিক অধিকারগুলি সুসংবদ্ধভাবে লিখিত হইয়াছে। এই অধিকারগুলির কোনটি যদি শাসন-কর্তৃপক্ষের কার্য দ্বারা ব্যাহত হয় তাহা হইলে নাগরিকগণ সুপ্রীম কোর্টে ইহার বিরুদ্ধে অভিযোগ করিতে পারে ও এই আদালতের নির্দেশ অনুসারে শাসন-কর্তৃপক্ষের কার্য পরিচালনা করিতে হইবে। সুতরাং অনেক দেশে লিখিত শাসনতন্ত্র ও উচ্চ বিচারালয় ব্যক্তি-স্বাধীনতার রক্ষাকবচ হিসাবে কাজ করে।

কিন্তু ইংলণ্ডে কোন লিখিত শাসনতন্ত্র নাই বা সেখানকার উচ্চ বিচারালয়ের শাসন-কর্তৃপক্ষ বা আইনসভার কার্যের বৈধতা বিচার করিবার ক্ষমতা নাই। ইংলণ্ডে কতিপয় অ-লিখিত আইন ও নিরপেক্ষ বিচার-ব্যবস্থা নাগরিক অধিকারগুলিকে অক্ষুণ্ণ রাখিতে সাহায্য করে। ইংলণ্ডের শাসন-ব্যবস্থার আইনের প্রাধান্য ও আইনের নিরপেক্ষতা নীতি (Rule of Law) বিশেষ কার্যকরী হইয়া নাগরিক অধিকার সুরক্ষিত করিয়াছে। যদি কোন নাগরিক বিনা বিচারে শাসন-কর্তৃপক্ষ কর্তৃক বন্দী হয়, তাহা হইলে বন্দী ব্যক্তির আবেদনক্রমে বিচারালয় ঐ ব্যক্তির বিচার করিবার জন্ত তাহাকে আদালতে উপস্থিত করিবার আদেশ দিতে পারে। বিনা বিচারে কাহারও ব্যক্তি-স্বাধীনতা নষ্ট হইতে পারে না। ইংলণ্ডে আইনের চক্ষে সকল নাগরিকই সমান।

ক্ষমতার বিভাগ করিয়া (Separation of Powers) অনেক সময় ব্যক্তি-স্বাধীনতা রক্ষা করিবার চেষ্টা করা হইয়াছে। কিন্তু ক্ষমতার এই বিভাগ ব্যক্তি-স্বাধীনতা রক্ষার একটি অপরিহার্য উপকরণ বলিয়া সর্বত্র গণ্য হইতে পারে না। গ্রেট ব্রিটেনে ক্ষমতার বিশেষ কোন বিভাগ নাই, তাহা সত্ত্বেও ইংলণ্ডবাসী স্বাধীন।

নিরপেক্ষ ও স্বাধীন বিচার-ব্যবস্থার দ্বারা (Independence of the Judiciary) ব্যক্তি-স্বাধীনতা রক্ষা করা সম্ভব বলিয়া অনেকে অভিমত প্রকাশ করেন। বিচারালয়গুলি যদি শাসনবিভাগ ও আইনসভার নিয়ন্ত্রণ হইতে মুক্ত হয় তাহা হইলে জায়বিচার সম্ভব হয়। জায়বিচারের দ্বারা ব্যক্তি-স্বাধীনতা যে অনেক পরিমাণে অক্ষুণ্ণ রাখা যায় ইহা অনস্বীকার্য। •

গণতান্ত্রিক শাসনব্যবস্থায় (Democracy) ব্যক্তি-স্বাধীনতা সর্বতোভাবে রক্ষিত হয়। এই শাসনব্যবস্থা প্রবর্তনের ফলে প্রত্যেক ব্যক্তি সাম্যের অধিকারী হইয়া স্বীয় অধিকার সম্বন্ধে সর্বদা সজাগ থাকে। স্বাধীনতা কোন দিক্ দিয়া একটু বিপন্ন হইলে নিজেই তাহা প্রতিরোধ করিতে সমর্থ হয়। এইজন্যই বলা হয় নাগরিকগণের আত্মচেতনভাবই হইল তাহাদের স্বাধীনতার প্রধান রক্ষাকবচ।

সংক্ষিপ্তসার

স্বাধীনতা, সাম্য ও অধিকার

স্বাধীনতা—স্বাধীনতা শব্দটি প্রাকৃতিক স্বাধীনতা, পৌর স্বাধীনতা, রাজনৈতিক স্বাধীনতা, অর্থনৈতিক স্বাধীনতা, জাতীয় স্বাধীনতা প্রভৃতি অর্থে ব্যবহৃত হইয়া থাকে। স্বাধীনতার অর্থ স্বেচ্ছাচারিতা নয়। তাহা হইলে সমাজে অধিক শক্তিশালী ব্যক্তি ব্যতীত অপর কাহারও স্বাধীনতা থাকিতে পারে না। স্বাধীনতার প্রকৃত অর্থ হইল নিয়ন্ত্রিত স্বাধীনতা, যে স্বাধীনতার প্রয়োগে অপরের স্বাধীনতা ক্ষুণ্ণ হয় না। এইজন্য রাষ্ট্র কতকগুলি বিধি-নিষেধ সৃষ্টি করিয়া প্রত্যেক ব্যক্তির অবাধ স্বাধীনতা সীমায়িত করে। রাষ্ট্র কর্তৃক নির্দিষ্ট গণ্ডির মধ্যে যে স্বাধীনতা প্রয়োগ করা যায় তাহাই হইল প্রকৃত স্বাধীনতা, কেন-না স্বাধীনতা প্রয়োগের এই সীমারেখা স্থির করিয়া রাষ্ট্র সকল ব্যক্তিকেই স্বাধীনতা উপভোগের সুযোগ দেয়। সুতরাং আইন না থাকিলে স্বাধীনতার অস্তিত্ব বিপন্ন হয়। রাষ্ট্র আইন-প্রণয়ন দ্বারা ব্যক্তি-স্বাধীনতার পরিবেশ সৃষ্টি করে, স্বাধীনতা অক্ষুণ্ণ রাখে ও স্বাধীনতা বৃদ্ধি করে।

সাম্য—সাম্য বলিতে সকলেই সমান এ কথা বুঝায় না বা সকলকেই সমান হইতে হইবে ইহাও সাম্যের প্রকৃত অর্থ নয়। সাম্যের প্রকৃত অর্থ হইল, সকলকেই সমান সুযোগ দিয়া তাহার ব্যক্তিবিকাশের অন্তরায়-গুলি দূর করা। সমাজে সাম্যনীতি সুপ্রতিষ্ঠিত করিতে হইলে, প্রথমতঃ, রাষ্ট্রপরিচালনায় কোন ব্যক্তিবিশেষ বা সম্প্রদায়বিশেষের জন্ত কোনরূপ বিশেষ সুযোগ-সুবিধার ব্যবস্থা থাকিবে না। দ্বিতীয়তঃ, রাষ্ট্র সকলকেই সমান চক্ষে দেখিবে। আভিজাত্য, ধর্ম বা বিত্ত প্রভৃতির ভিত্তিতে মানুষে মানুষে কোন ভেদ থাকিবে না। একমাত্র সমাজকল্যাণকর অধিকতর যোগ্যতা ব্যতীত মানুষে মানুষে কোন পার্থক্য করা হইবে না। তাহা হইলেই পূর্ব-স্বাধীনতা ও সাম্য প্রতিষ্ঠিত হইতে পারে। বহু রাষ্ট্রে রাজনৈতিক সাম্যনীতি প্রতিষ্ঠিত হইয়াছে, কিন্তু সামাজিক সাম্য ও অর্থনৈতিক সাম্যনীতির অভাবে রাজনৈতিক সাম্য কার্যকরী হইতে পারে না।

অধিকার—অধিকারের সাধারণ অর্থ হইল ক্ষমতা। কিন্তু অবাধ ক্ষমতার প্রয়োগ ব্যক্তিগত জীবনে ও সমাজ-জীবনে বিশৃংখলা আনয়ন করে। সেইজন্য এই ক্ষমতাগুলি কতকগুলি কর্তব্যের দ্বারা সীমায়িত করা হয়। এই অধিকারগুলি ব্যক্তির চরম বিকাশের জন্ত অপরিহার্য। কিন্তু এগুলি একরূপভাবে প্রয়োগ করিতে হইবে যাহাতে সমাজের অন্ত লোকের অধিকার ক্ষুণ্ণ না হয়। কাজেই ব্যক্তিবিশেষের অধিকারপ্রয়োগ অন্তের প্রতি তাহার কর্তব্যবোধ দ্বারা সীমাবদ্ধ। এক ব্যক্তির যাহা অধিকার, অন্তের তাহা কর্তব্য। এই পারস্পরিক সম্বন্ধ রাষ্ট্র আইনের দ্বারা অব্যাহত রাখে।

নাগরিক অধিকার ও কর্তব্য—অধিকারগুলিকে দুই ভাগে ভাগ করা হয়; যথা—পৌর অধিকার ও রাজনৈতিক অধিকার। জীবন-ধনসম্পত্তির অধিকার, বাক-স্বাধীনতা, ধর্মচরণের স্বাধীনতা প্রভৃতি পৌর অধিকার। ভোটদান-ক্ষমতা, সরকারী কাজে নিযুক্ত হইবার অধিকার প্রভৃতিকে রাজনৈতিক অধিকার বলা হয়। কিন্তু এই অধিকারগুলির কোনটিই শর্তহীন নয়।

রাষ্ট্রের প্রতি আনুগত্য স্বীকার করা, যথাযথভাবে ভোটদান করা,

সময়মত কর প্রদান করা ও প্রয়োজনমত অন্তর্ভাবে রাষ্ট্রকে সাহায্য করা, নাগরিকদের কর্তব্য বলিয়া বিবেচিত হয় এবং এই সকল কর্তব্যপালনে উদাসীন হইলে অধিকারের দাবী রাষ্ট্র কর্তৃক স্বীকৃত হয় না।

ব্যক্তি-স্বাধীনতা রক্ষার উপায়—লিখিত শাসনতন্ত্র, নিরপেক্ষ বিচার-ব্যবস্থা, আইনের অমুশাসন, ক্ষমতার স্বাতন্ত্র্যিকরণ প্রভৃতি নাগরিক অধিকার রক্ষার উপায় বলিয়া বিবেচিত হয়। কিন্তু স্বাধীনতা রক্ষা করিবার ঐকান্তিক ইচ্ছাই হইল স্বাধীনতা রক্ষার প্রধান উপায়।

প্রশ্নাবলী

1. Distinguish between Civil and Political rights. How are civil rights guaranteed in (a) U.S.A. (b) England and (c) India ? (C. U. 1945)

2. Enumerate the more important fundamental rights which a citizen in a modern state enjoys. (C. U. 1951)

3. "The liberty of an individual is not always in inverse ratio to the amount of state legislation." Examine and illustrate this statement.

4. What is meant by the concept of Liberty ? "Sovereignty and Liberty are not contradictory terms." Examine the proposition. (C. U. 1957)

5. Explain the concept of liberty. What are the methods for safeguarding individual liberty ?

নবম অধ্যায়

রাষ্ট্র সমবায় ও সরকারের বিভিন্ন রূপ

(Union of States and Forms of Government)

প্রত্যেকটি রাষ্ট্র একই উপাদানে গঠিত বলিয়া রাষ্ট্রের শ্রেণীবিভাগ করা সম্ভব নয়। কিন্তু বিভিন্ন দেশে সরকারের প্রকারভেদ দেখা যায়। এই প্রকারভেদ সম্বন্ধে বিশদ আলোচনা করেন গ্রীক দার্শনিক অ্যারিস্টটল। তাঁহার রচনায় দুই প্রকারের শাসনব্যবহার উল্লেখ দেখা যায়; যথা— স্বাভাবিক ও বিকৃত (Normal and Perverted)। জনকল্যাণের জন্য যে শাসন-ব্যবস্থা পরিচালিত হয়, সেই ব্যবস্থাকে তিনি স্বাভাবিক আখ্যা দেন, আর যেগুলি শুধু শাসকশ্রেণীর স্বার্থের জন্য পরিচালিত হয়, সেগুলিকে তিনি বিকৃত আখ্যা প্রদান করেন। তারপর রাষ্ট্রের সার্বভৌম শক্তির প্রয়োগ-কারীদের সংখ্যাহুসারে তিনি স্বাভাবিক ও বিকৃত এই দুইটি প্রধান শ্রেণীকে আরও কয়েকটি বিভিন্ন শ্রেণীতে ভাগ করেন।

অ্যারিস্টটলের শ্রেণীবিভাগ নিম্নলিখিতভাবে বিভিন্ন আকার গ্রহণ করে :—

সার্বভৌমত্ব পরিচালনাকারীর সংখ্যা	স্বাভাবিক	বিকৃত
এক ব্যক্তি	রাজতন্ত্র	সৈরাচার
একাধিক ব্যক্তি (একটি সংসদ)	অভিজাততন্ত্র	ধনিকতন্ত্র
বহু ব্যক্তি (জনসাধারণ)	গণতন্ত্র	বিকৃত গণতন্ত্র

অ্যারিস্টটলের এই শ্রেণীবিভাগের বিরুদ্ধে অনেক কঠোর সমালোচনা হইয়াছে। প্রথমতঃ, এই শ্রেণীবিভাগ কোন মূল নীতির উপর প্রতিষ্ঠিত নয়। শুধু ক্ষমতা পরিচালনাকারীর সংখ্যাহুসারে এই শ্রেণীবিভাগ করা হইয়াছে। দ্বিতীয়তঃ, এ যুগে সার্বভৌম ক্ষমতার অধিকারী এক বা কতিপয় ব্যক্তি হইতে পারে না। সুতরাং এই শ্রেণীবিভাগ-নীতি বর্তমান রাষ্ট্রীয় সরকারের ক্ষেত্রে প্রযোজ্য নহে।

প্রকৃতপক্ষে অ্যারিস্টটলের শ্রেণীবিভাগ নৈতিক ভিত্তির উপর প্রতিষ্ঠিত ছিল। শাসনব্যবস্থার প্রকৃত উদ্দেশ্যের দিক লক্ষ্য রাখিয়া অ্যারিস্টটল এই শ্রেণীবিভাগ করিয়াছিলেন। যে শ্রেণীর শাসনব্যবস্থা জনকল্যাণের উদ্দেশ্যে পরিচালিত হয় সেগুলিকে তিনি স্বাভাবিক বলিয়াছিলেন, আর যেগুলি শাসকের স্বার্থলিপ্তির জন্ত পরিচালিত হয় সেগুলিকে তিনি বিকৃত আখ্যা দিয়াছিলেন। বার্কারের মতে অ্যারিস্টটলের নৈতিক ভিত্তি বর্তমান যুগেও একেবারে অচল হইয়া যায় নাই। বর্তমান যুগে যখন বিভিন্ন রাষ্ট্রের পরিচিতির জন্ত বিভিন্ন নামকরণ করা হয়, যথা—কল্যাণ রাষ্ট্র, যুদ্ধবাদী রাষ্ট্র, পুলিশ রাষ্ট্র, বাণিজ্যিক রাষ্ট্র, তখন পরোক্ষভাবে অ্যারিস্টটলেরই নৈতিক মান প্রয়োগ করা হয়।


বর্তমানকালে নিম্নলিখিত প্রকারে শাসনব্যবস্থার প্রকারভেদ করা হয়:—

১। রাজতন্ত্র—Monarchy. ২। অভিজাততন্ত্র—Aristocracy.

৩। গণতন্ত্র—Democracy. ৪। আমলাতন্ত্র—Bureaucracy

৫। একনায়কতন্ত্র—Dictatorship

লিঙ্ক তাঁহার গ্রন্থে নিম্নলিখিতরূপে সরকারের প্রকারভেদ করিয়াছেন:—



রাজতন্ত্র (Monarchy)

যে শাসনব্যবস্থায় সরকারের সমস্ত শাসনক্ষমতা এক ব্যক্তির হস্তে ন্যস্ত থাকে, সেই শাসনব্যবস্থাকে রাজতন্ত্র বলা হয়। এই ব্যবস্থায় রাজাই হইলেন শাসনব্যবস্থার নীৰ্ব্বাহনীয়। রাজতন্ত্র সাধারণতঃ জন্মগত উত্তরাধিকারের উপর নির্ভর করে। কদাচিৎ রাজা জনসাধারণের দ্বারা নির্বাচিত হইতে পারেন। প্রাচীন রোম ও পোল্যান্ড দেশে এইরূপ নির্বাচিত রাজতন্ত্রের অস্তিত্ব দেখা যায়।

রাজতন্ত্র দুই প্রকারের হইতে পারে; অসীম ক্ষমতাবিশিষ্ট বা অবাধ রাজতন্ত্র (Absolute Monarchy) ও নিয়মতান্ত্রিক বা সীমাবদ্ধ রাজতন্ত্র (Constitutional or Limited Monarchy)। অসীম ক্ষমতাবিশিষ্ট রাজতন্ত্রে একমাত্র রাজার ইচ্ছায় শাসনকার্য পরিচালিত হয়। এই শাসনব্যবস্থায় শাসিতের ইচ্ছার কোন স্থান নাই। এই শাসনব্যবস্থার প্রকৃত স্বরূপ ফরাসী দেশের রাজা চতুর্দশ লুইয়ের উক্তি হইতে বুঝা যায়। তিনি বলিয়াছিলেন—‘আমি রাষ্ট্র’; সুতরাং রাজা ও রাষ্ট্রে এই শাসনব্যবস্থায় কোনও ভেদ থাকে না।

অবাধ রাজতন্ত্রের প্রধান গুণ হইল যে, রাষ্ট্রীয় চরম ক্ষমতা এক হস্তে ন্যস্ত থাকার ফলে শাসনব্যাপারে দ্রুত চূড়ান্ত সিদ্ধান্ত করা সম্ভব হয়। রাজা প্রজাবৎসল হইলে তাহার স্বকীয় উত্তম তত্ত্ব তিনি প্রজার বহু হিতসাধন করিতে পারেন। ব্যক্তিত্বসম্পন্ন রাজা জনগণের মনে ভয়মিশ্রিত শ্রদ্ধার ভাব উদ্বেক করিয়া তাহাদিগকে আইনশৃংখলা মানিবার শিক্ষা দিতে পারেন।

কিন্তু এতগুলি গুণ থাকা সত্ত্বেও একথা বলিতে হইবে যে, শাসনব্যবস্থায় যতগুলি প্রকারভেদ আছে তন্মধ্যে এইটিই হইল নিকৃষ্টতম। তাহার কারণ, এই শাসনব্যবস্থায় ব্যক্তিত্ববিকাশের কোন সুযোগ নাই। রাজা প্রজার সর্ববিধ হিতসাধন করিলেও স্বাধীনতা ও সাম্যের অভাবে তাহাদের ব্যক্তিত্ব পূর্ণতাপ্রাপ্ত হইতে পারে না। শাসনকার্যে প্রজাসাধারণের অংশ গ্রহণ করিবার ক্ষমতা না থাকায় তাহাদের রাজনৈতিক চেতনা ও রাজনৈতিক বুদ্ধি পরিষ্কৃত হয় না। সুতরাং এই শাসনব্যবস্থায় স্ব-নাগরিকের সৃষ্টি হইতে পারে না। আত্মসম্মানবোধ ও আত্মপ্রত্যয়ের অভাবে জনসাধারণ ক্রীতদাসের পর্যায়ে পরিণত হয়।

নিয়মতান্ত্রিক রাজতন্ত্রে একজন রাজা শাসনব্যবস্থার শীর্ষদেশে অবস্থান করেন সত্য, কিন্তু কার্যতঃ তাঁহার কোন ক্ষমতা থাকে না। তিনি নামসর্বস্ব রাজারূপে বিরাজ করেন। তাঁহার সমস্ত ক্ষমতাই জনগণ-নির্বাচিত প্রতিনিধিদের দ্বারা গঠিত মন্ত্রিপরিষদ কর্তৃক পরিচালিত হয়। রাজার ক্ষমতা ও পদমর্যাদা শাসনতন্ত্র কর্তৃক নির্ধারিত হয়। এইজন্য এই শাসনব্যবস্থা সম্পর্কে বলা হয়—রাজা রাজত্ব করেন কিন্তু তিনি শাসন করেন না।

অভিজাততন্ত্র (Aristocracy)

দেশের শাসনব্যবস্থা যখন জ্ঞানী ও গুণী ব্যক্তিদের দ্বারা পরিচালিত হয়, তখন তাহাকে অভিজাততন্ত্র বলা হয়। গ্রীক দার্শনিকগণ বিশেষ করিয়া অ্যারিস্টটল এই অভিজাততন্ত্রকে সর্বোৎকৃষ্ট শাসনব্যবস্থা বলিয়া গণ্য করিতেন। জ্ঞানী ও গুণী ব্যক্তির সংখ্যা স্বভাবতই কম, সেজন্য অনেক সময় অভিজাততন্ত্রকে অল্পসংখ্যক ব্যক্তির দ্বারা পরিচালিত শাসনব্যবস্থা আখ্যা দেওয়া হয়। অভিজাততন্ত্র গুণবাচক ভিত্তির উপর প্রতিষ্ঠিত ছিল। শাসনকার্যে গুণ বলিতে অনেকগুলি বৈশিষ্ট্যের সমাবেশ বুঝাইত। অভিজাত বংশে জন্মলাভ, প্রভূত বিত্তের অধিকার, সামরিক খ্যাতি প্রভৃতি নানা গুণের সমাবেশে অভিজাততন্ত্রের সৃষ্টি হয়। অভিজাততন্ত্রের পক্ষে বলা যায় যে, প্রকৃত যোগ্য ব্যক্তিগণের হস্তেই এই ব্যবস্থায় শাসনক্ষমতা ন্তস্ত থাকে। শাসকবর্গ যোগ্যতাসম্পন্ন হইলে শাসনকার্যের উন্নতি হইতে পারে। এই ব্যবস্থায় শাসনব্যাপারে শিথিলতা বা দ্রুত পরিবর্তনশীলতা আসিতে পারে না। সদগুণের ভিত্তির উপর প্রতিষ্ঠিত বলিয়া এই শাসনব্যবস্থার প্রতি জনসাধারণের আস্থা জন্মে।

আধুনিককালে আর অভিজাততন্ত্রের স্থান নাই। রাজনৈতিক চেতনা-বুদ্ধির ফলে মানুষ আর এখন শাসকের প্রাধান্ত স্বীকার করিতে চায় না—তাহারা চায় আইনের প্রাধান্ত ও আইনের শাসন। তাই গণতান্ত্রিক আদর্শ প্রতিষ্ঠিত হওয়ার ফলে রাজতন্ত্র ও অভিজাততন্ত্র সমূলে উৎসাদিত হইয়াছে। সমাজে জ্ঞানী ও গুণী ব্যক্তির অভাব না থাকিতে পারে, কিন্তু জ্ঞানী ও গুণী ব্যক্তিদিগকে নির্বাচিত করা সহজ নয়। তাহা ছাড়া, মুষ্টিমেয় লোকের হস্তে অবাধ ক্ষমতা ন্তস্ত করিলে তাহাদের পক্ষে স্বৈরাচারী হওয়া স্বাভাবিক।

অভিজাততন্ত্রের প্রভাব (Influence of Aristocracy)

বর্তমানযুগে অভিজাততন্ত্র অচল হইলেও কোন দেশের শাসনব্যবস্থাই অভিজাততন্ত্রের প্রভাবমুক্ত নহে। অতীতে ও বর্তমানে সকল দেশের শাসনব্যবস্থায় অভিজাততন্ত্রের প্রভাব দেখিতে পাওয়া যায়। অতীত যুগে রাজার হস্তে সমুদয় শাসনক্ষমতা কেন্দ্রীভূত থাকিলেও শাসনব্যাপারে রাজা তাঁহার মুষ্টিমেয় সামান্য রাজকৃত্তবর্গের পরামর্শ দ্বারা পরিচালিত হইতেন। শাসনকার্যে অধিকাংশ লোকের অংশ গ্রহণ করিবার অধিকার তখন ছিল না। সামন্তপ্রথা উচ্ছেদের পরও বহুদিন পর্যন্ত শাসনক্ষমতা সংখ্যালঘিষ্ঠের হস্তে গুপ্ত ছিল। তাহার কারণ হইল ভোটদান-ক্ষমতা প্রবর্তিত হইলেও এই ক্ষমতা সমাজের একটা নির্দিষ্ট স্তরের মধ্যে সীমাবদ্ধ ছিল।

বর্তমান গণতান্ত্রিক যুগে সার্বজনীন ভোটাধিকার প্রবর্তিত হওয়া সত্ত্বেও শাসনব্যবস্থার এই অভিজাততান্ত্রিক কাঠামোর বিশেষ পরিবর্তন ঘটিয়াছে বলিয়া মনে হয় না। আইন-প্রণয়ন ও আইন বলবৎ করিবার ক্ষমতা পূর্বের ত্রায় বর্তমান গণতান্ত্রিক যুগেও একদল লোকের হস্তে গুপ্ত থাকে—যাহারা সমগ্র জনসংখ্যার এক অতি অকিঞ্চিৎকর অংশ। অকিঞ্চিৎকর অংশ হইলেও এই দল সংখ্যাগরিষ্ঠ জনসংখ্যা অপেক্ষা অধিকতর যোগ্যতাসম্পন্ন বলিয়া বিবেচিত হয় এবং এই অধিকতর যোগ্যতার দাবীতে তাহারা শাসনকার্য পরিচালনা করে। এক সুইজারল্যান্ড ব্যতীত অন্যান্য দেশের গণতান্ত্রিক শাসনব্যবস্থা কার্যতঃ সংখ্যাগরিষ্ঠ রাজনৈতিক দলের সমর্থনে দলের নেতৃগণ কর্তৃক পরিচালিত হয়। দলীয় সংগঠন ও দলীয় নীতি একরূপভাবে পরিচালিত হয় যে, সাধারণ লোকের শাসনকার্যে অংশগ্রহণ করিবার সুযোগ খুব কমই হয়। জনসাধারণের অধিকাংশ নানাকারণে ভোটদান-ক্ষমতাবিহীন। ভোটদাতৃগণ দলের নির্দেশে প্রতিনিধি নির্বাচন করিয়া আইনসভা গঠন করে আর দলের নেতৃস্থানীয় ব্যক্তিগণ স্ব-নির্বাচিত পদ্ধতিতে মন্ত্রिमণ্ডলীর সদস্যরূপে শাসন-ক্ষমতায় অধিষ্ঠিত থাকিয়া দলের সমর্থন-পুষ্ট হইয়া তাঁহাদের শাসননীতি বলবৎ করেন। গ্রেট ব্রিটেন, মার্কিন যুক্তরাষ্ট্র, ফরাসী দেশ, রাশিয়া, ভারত প্রভৃতি দেশে উপরি-উক্ত শাসনব্যবস্থা দ্রষ্টব্য। তারতম্যের সহিত পরিলক্ষিত হয়। মুষ্টিমেয় লোক জনসাধারণের বিচারবুদ্ধি ও কর্মক্ষমতার অভাবের সুযোগ লইয়া অধিকতর যোগ্যতার দাবীতে শাসন-

ক্ষমতায় প্রতিষ্ঠিত থাকে। তবে একথা স্বীকার করিতে হইবে যে, শাসন-ব্যবস্থার কাঠামো অভিজাততান্ত্রিক হইলেও বর্তমান অভিজাততন্ত্র জনসাধারণের ইচ্ছা-শক্তিকে সম্পূর্ণরূপে উপেক্ষা করিতে পারে না।

প্রজাতন্ত্র (Republic)

যে শাসনব্যবস্থায় জনসাধারণই হইল রাষ্ট্রের চূড়ান্ত ক্ষমতার অধিকারী ও শাসনব্যবস্থায় জনসাধারণের ইচ্ছা পরোক্ষভাবে কার্যকরী হয়, তাহাকে প্রজাতন্ত্র বলা হয়। গঠনের দিক দিয়া প্রজাতন্ত্রের সহিত নিয়মতান্ত্রিক রাজতন্ত্রের একটা প্রভেদ থাকিলেও ক্ষমতার দিক দিয়া উভয় শাসনব্যবস্থায়ই সার্বজনীন সার্বভৌমত্ব সূচিত হয়। নিয়মতান্ত্রিক রাজতন্ত্রে একজন জন্মগত উত্তরাধিকারসূত্রে প্রতিষ্ঠিত রাজা থাকেন, কিন্তু তাঁহার কোন ক্ষমতা থাকে না। প্রজাতন্ত্রে নির্দিষ্টকালের জন্য নির্বাচিত একজন রাষ্ট্রনায়ক থাকেন। ভারত একটি প্রজাতান্ত্রিক রাষ্ট্র। এখানে একজন নির্বাচিত রাষ্ট্রপতি রাষ্ট্রের শীর্ষস্থানীয় বলিয়া পরিগণিত হইয়া থাকেন। কিন্তু তাঁহার বিশাল ক্ষমতা আইনসভার তত্ত্বাবধানে মন্ত্রিমণ্ডলী কর্তৃক পরিচালিত হয়।

গণতন্ত্র (Democracy)

‘গণতন্ত্র’ শব্দটি নানা অর্থে ব্যবহৃত হইতে পারে। সাধারণতঃ গণতন্ত্র গণতান্ত্রিক সরকার বুঝায়। কিন্তু কেহ কেহ আবার গণতান্ত্রিক সমাজ বা গণতান্ত্রিক রাষ্ট্র অর্থেও এই শব্দটি ব্যবহার করিয়া থাকেন। সুতরাং গণতন্ত্র শব্দটির অর্থ স্পষ্ট করিবার জন্য উপরি-উক্ত শব্দগুলির অর্থ বিশ্লেষণ করা আবশ্যিক।

গণতান্ত্রিক রাষ্ট্র (Democratic State)

যে রাষ্ট্র-ব্যবস্থায় জনসাধারণই হইল রাষ্ট্রের সার্বভৌম ক্ষমতার অধিকারী তাহাকে সাধারণতঃ গণতান্ত্রিক রাষ্ট্র বলা হয়। এই ব্যবস্থায় রাজনৈতিক ব্যাপারে জনগণই হইল চূড়ান্ত ক্ষমতার অধিকারী এবং জনগণই দেশের শাসনপদ্ধতি নির্ধারণ করিয়া থাকে। শাসকশ্রেণীর নিয়োগ, নিয়ন্ত্রণ ও পদচ্যুত করিবার ক্ষমতা জনগণের হস্তে ন্যস্ত থাকে।

গণতান্ত্রিক সমাজ (Democratic Society)

গণতান্ত্রিক সমাজ-ব্যবস্থার প্রধান বৈশিষ্ট্য হইল জাতি, বংশ, ধন বা পদমর্যাদা নির্বিচারে সকলের সমানাধিকার। এই ব্যবস্থায় মানুষ হিসাবে মানুষে মানুষে কোন পার্থক্য করা হয় না। স্ফুটরাং শ্রেণীহীন সমাজ-ব্যবস্থাই হইল গণতান্ত্রিক সমাজ-ব্যবস্থার মূল আদর্শ। ভারতে প্রকৃত গণতান্ত্রিক আদর্শ প্রতিষ্ঠিত করিবার উদ্দেশ্যে শাসনতন্ত্রে কতিপয় মূলনীতি গ্রহণ করা হইয়াছে। অস্পৃশ্যতা-বর্জন ইহাদের মধ্যে অন্যতম।

গণতান্ত্রিক সরকার (Democratic Government)

গণতান্ত্রিক শাসনব্যবস্থায় জনসাধারণ তাহাদের নির্বাচিত প্রতিনিধি-গণের মাধ্যমে শাসনব্যবস্থা পরিচালনা করে। এই ব্যবস্থায় রাজনৈতিক ব্যাপারে জনসাধারণের সমানাধিকার ও সাম্যনীতি স্বীকৃত হয়।

উপরি-উক্ত পার্থক্য করা সত্ত্বেও বলিতে হইবে যে, গণতন্ত্র এমনই একটি অখণ্ড আদর্শ যে, সমাজ-ব্যবস্থায়, রাষ্ট্র-ব্যবস্থায় বা শাসনব্যবস্থায় এই আদর্শ কার্যকরী না হইলে পূর্ণ গণতন্ত্র প্রতিষ্ঠিত হইতে পারে না। সমাজ-ব্যবস্থায় গণতান্ত্রিক আদর্শ প্রতিষ্ঠিত না হইলে রাষ্ট্র বা শাসনব্যবস্থায় গণতন্ত্র পূর্ণতা প্রাপ্ত হইতে পারে না। গণতান্ত্রিক রাষ্ট্রে অ-গণতান্ত্রিক শাসনব্যবস্থা প্রতিষ্ঠিত হইতে পারে। হিটলারের সময়ে জার্মানী, স্ট্যালিনের সময়ে রুশ দেশ গণতান্ত্রিক রাষ্ট্রে অ-গণতান্ত্রিক শাসনব্যবস্থা স্থচিত করে। অপরপক্ষে ভারতের গণতান্ত্রিক রাষ্ট্রের জরুরী অবস্থায় রাষ্ট্রপতির হস্তে যে সমুদয় বিশেষ ক্ষমতা ভ্রম করা হইয়াছে তাহাও গণতান্ত্রিক শাসনব্যবস্থা-বিরোধী বলা যাইতে পারে।

গণতন্ত্র—প্রত্যক্ষ ও পরোক্ষ (Democracy—Direct and Indirect

‘গণতন্ত্র’ শব্দটির ব্যুৎপত্তিগত অর্থ হইল গণ-শাসন অর্থাৎ যে শাসনব্যবস্থায় জনগণই হইল শাসনক্ষতার প্রকৃত অধিকারী। এই শাসনব্যবস্থার স্বরূপ এব্রাহাম লিন্কন অতি সুন্দরভাবে ব্যক্ত করিয়াছেন। তিনি বলেন, জন-সাধারণকে লইয়া জনসাধারণের কল্যাণে জনসাধারণ কর্তৃক যে শাসনব্যবস্থা পরিচালিত হয় তাহাকেই গণতন্ত্র বলা হয় (A government of the people, for the people and by the people)। জনসাধারণকে

লইয়া ও জনসাধারণের কল্যাণে শাসনব্যবস্থা পরিচালিত হইতে পারে, কিন্তু জনসাধারণ দ্বারা শাসনকার্য কিভাবে পরিচালিত হইতে পারে—ইহা চিন্তার বিষয়।

প্রাচীন গ্রীক ও রোম দেশের জনগণ প্রত্যক্ষভাবে শাসনকার্যে অংশ গ্রহণ করিত। তখনকার রাষ্ট্রগুলি ক্ষুদ্রকায় নগর-রাষ্ট্র ছিল। জনসংখ্যাও ছিল স্বল্প। আর জনসংখ্যার বেশীর ভাগ ছিল ক্রীতদাস, স্ত্রীলোক ও মজুর-শ্রেণীর লোক। ইহাদের বাদ দিয়া পূর্ণবয়স্ক স্বাধীন নাগরিকগণই আইন-সভার সদস্যরূপে রাষ্ট্রপরিচালনা-কার্যে অংশ গ্রহণ করিত। শুধু নাগরিকদের সম্পর্কে গ্রীক শাসনব্যবস্থাকে গণতান্ত্রিক বলা হইত। সুতরাং প্রত্যক্ষ গণতন্ত্রের বৈশিষ্ট্য হইল প্রত্যেক পূর্ণবয়স্ক স্বাধীন ব্যক্তির রাষ্ট্রপরিচালনায় অংশ গ্রহণ। তাহারা একত্রে মিলিত হইয়া আইন-প্রণয়ন ও কর ধার্য করিত। আধুনিককালে সুইস দেশের চারিটি অপেক্ষাকৃত ক্ষুদ্র ক্যান্টনে এই প্রত্যক্ষ গণতন্ত্র বলবৎ দেখা যায়। এই শাসনব্যবস্থায় আইনানুগ সার্বভৌম ও রাজনৈতিক সার্বভৌমের মধ্যে কোন পার্থক্য থাকে না।

বর্তমান রাষ্ট্রগুলি আয়তনে ও লোকসংখ্যায় নগর-রাষ্ট্র হইতে বহুগুণ বৃহত্তর। ইহাদের সমস্তাগুলি অনেক বেশী জটিল। লক্ষ লক্ষ লোকের পক্ষে একত্রিত হইয়া শাসনপরিচালনা-কার্যে সক্রিয়ভাবে অংশ গ্রহণ করা বর্তমান যুগে সম্ভব নয়। ইহা ছাড়া, সাধারণ নাগরিকদের সেরূপ অপর্থাগ্ন সময়ও নাই, যোগ্যতাও নাই। সেই জন্য আধুনিককালে পরোক্ষ গণতন্ত্রের আবির্ভাব হইয়াছে। পরোক্ষ গণতন্ত্রের বৈশিষ্ট্য হইল যে, এই শাসনব্যবস্থায় আইনানুগ সার্বভৌম ও রাজনৈতিক সার্বভৌম, একে অপর হইতে সম্পূর্ণ পৃথক। পরোক্ষ-গণতন্ত্রে পূর্ণবয়স্ক ও নির্দিষ্ট যোগ্যতার অধিকারী জনগণ একটি নির্দিষ্ট কালের জন্য তাহাদের প্রতিনিধি নির্বাচিত করিয়া শাসনব্যবস্থা এই নির্বাচিত প্রতিনিধিদের হস্তে স্তম্ভ করে। এই নির্বাচিত প্রতিনিধিগণ সরকার গঠন করিয়া নির্বাচকমণ্ডলীর মতামতানুযায়ী শাসনব্যবস্থা পরিচালনা করে। শাসন-কর্তৃপক্ষের কার্যে যদি নির্বাচকমণ্ডলী সন্তুষ্ট না হয় তাহা হইলে নির্দিষ্ট কার্যকাল অতিবাহিত হইলে নির্বাচকমণ্ডলী নূতন শাসন-কর্তৃপক্ষ গঠন করিতে পারে। এইরূপে জনসাধারণ পরোক্ষভাবে শাসন-ব্যবস্থায় অংশ গ্রহণ করে। সুতরাং কোন শাসনব্যবস্থাই শুধুমাত্র ভোট

দ্বারা প্রকাশিত জনগণের সম্মতির উপর প্রতিষ্ঠিত হইলেই গণতন্ত্র আখ্যা পাইতে পারে না। জনগণের এই সম্মতি সক্রিয় ও সদা-জাগ্রত হওয়া চাই। যে সমস্ত ক্ষেত্রে জনগণ সক্রিয়ভাবে শাসনব্যবস্থার উপর প্রভাব বিস্তার করিতে পারে, একমাত্র সেই সমস্ত ক্ষেত্রেই গণতান্ত্রিক আদর্শ সার্থক হয়। বর্তমান গণতন্ত্র সম্পর্কে আর একটি কথা স্মরণ রাখিতে হইবে। বর্তমানে গণিতন্ত্র বলিতে সংখ্যাগরিষ্ঠ দলের শাসন বুঝায়। সংখ্যাগরিষ্ঠের শাসন হইলেও এই শাসনব্যবস্থায় সংখ্যালঘিষ্ঠ দলের মতামত উপেক্ষিত হয় না। তাহারাই নির্ভয়ে তাহাদের আইনসম্মত অধিকার ভোগ করিতে পারে।

গণতন্ত্র প্রত্যক্ষই হউক আর পরোক্ষই হউক—ইহা এক মহান আদর্শের উপর প্রতিষ্ঠিত। এই আদর্শ হইল স্বাধীনতা, সাম্য ও মৈত্রীর আদর্শ। এই আদর্শকে সার্থক করিতে হইলে শুধু রাজনৈতিক ক্ষেত্রে স্বাধীনতা ও সাম্য প্রতিষ্ঠিত করিলে চলিবে না। সমাজ-জীবনের অস্ত্রান্ত্র ক্ষেত্রেও এই আদর্শ কার্যকরী করিতে হইবে। সমাজ-ব্যবস্থায়, অর্থনৈতিক জীবনে, শিল্পবাণিজ্যের ক্ষেত্রে এই স্বাধীনতা ও সাম্যের সম্যক উপলব্ধি হওয়া একান্ত আবশ্যক। সমাজ-ব্যবস্থায় যদি উচ্চ-নীচ ভেদ থাকে ও এই ভেদের জন্য বিশেষ সুযোগ-সুবিধার অধিকারী কোন সম্প্রদায়ের অস্তিত্ব বিद्यমান থাকে, তাহা হইলে রাজনৈতিক স্বাধীনতা বা সাম্য প্রতিষ্ঠিত হইতে পারে না। অর্থনৈতিক ক্ষেত্রে—কৃষি, শিল্প ও ব্যবসায়-বাণিজ্যের পরিচালনা ক্ষেত্রে গণতান্ত্রিক আদর্শ-প্রবর্তনের বিশেষ প্রয়োজন। ভারতে প্রকৃত গণতন্ত্র প্রতিষ্ঠাকল্পে নতুন শাসনতন্ত্রে অস্পৃশ্যতাকে অপরাধ বলিয়া গণ্য করা হইয়াছে। মন্দির প্রভৃতি দেবস্থলী সর্বসাধারণের জন্য উন্মুক্ত হইয়াছে। অর্থনৈতিক ক্ষেত্রেও জমিদারী প্রথা বিলোপসাধন, অনেক বৃহৎ শিল্পের রাষ্ট্রায়ত্তকরণ, নানাবিধ শ্রমিক-কল্যাণকর আইন-প্রণয়ন প্রভৃতি দ্বারা প্রকৃত গণতন্ত্রস্থাপনের পথ সুগম করা হইয়াছে। সুতরাং গণতন্ত্র বলিতে বুঝা যায় এমন একটি পূর্ণতাপ্রাপ্ত শাসন-ব্যবস্থা, যাহার মাধ্যমে জনগণের সর্বাত্মক কল্যাণ সাধিত হইতে পারে।

গণতন্ত্রের গুণ (Merits of Democracy)

অধুনা গণতন্ত্র সর্বোৎকৃষ্ট শাসনব্যবস্থা বলিয়া পরিগণিত হয়। তাহার প্রথম কারণ হইল যে, এই শাসনব্যবস্থায় শাসকগোষ্ঠী শাসিতের নিকট দায়ী

থাকে। ইহাতে স্বৈরাচারের সম্ভাবনা দূরীভূত হয়। জনগণ দ্বারা নির্বাচিত ও জনগণের নিকট দায়ী বলিয়া শাসক-কর্তৃপক্ষকেও সর্বদা সতর্ক থাকিয়া সুদক্ষভাবে শাসনকার্য পরিচালনা করিতে হয়।

দ্বিতীয়তঃ, এই শাসনব্যবস্থায় প্রত্যেক নাগরিকই তাহার জ্ঞাত্য অধিকার রক্ষা করিবার সুযোগ পায়। জনস্বার্থ এই শাসনব্যবস্থায় ঘেঁরুপভাবে সংরক্ষিত হয়, অত্ৰ কোন শাসনব্যবস্থায় তাহা সম্ভব হয় না।

তৃতীয়তঃ, গণতন্ত্র প্রত্যেক ব্যক্তিকেই প্রত্যক্ষ অথবা পরোক্ষভাবে শাসন-কার্যে অংশ গ্রহণ করিবার সুযোগ দিয়া তাহার ব্যক্তিত্ববিকাশের সহায়তা করে। প্রত্যেক ব্যক্তিই ভাবিতে শিখে যে, সে রাষ্ট্রের একটি অপরিহার্য অংশ। এই মনোভাবে অনুপ্রাণিত হইয়া জনগণ দেশকে ভালবাসিতে শিখে এবং তাহাদের রাজনৈতিক চেতনা পূর্ণপ্রাপ্ত হয়। ফলে, তাহাদের চরিত্রের উৎকর্ষ সাধিত হয়।

চতুর্থতঃ, এই শাসনব্যবস্থায় সমষ্টিগত জীবনের সর্বাপেক্ষা অধিক কল্যাণ সাধিত হয়। প্রত্যেক ব্যক্তি “সকলের তরে সকলে আমরা, প্রত্যেকে আমরা পরের তরে”—এই আদর্শ দ্বারা অনুপ্রাণিত হইয়া নিজ সামর্থ্যমত সমষ্টিগত কল্যাণসাধনে সাহায্য করে। ফলে, ব্যক্তি ও সমষ্টি উভয়েই লাভবান হয়।

পঞ্চমতঃ, এই শাসনব্যবস্থা মানুষের মধ্যে সাম্য ও মৈত্রীর ভাব প্রতিষ্ঠিত করিয়া মানুষে মানুষে ভেদ দূর করিতে সাহায্য করে। কোন ব্যক্তিবিশেষের বা দলবিশেষের শাসন স্থায়ী হইতে পারে না। লর্ড ব্রাইসের মতে এই শাসনব্যবস্থার প্রধান কৃতিত্ব হইল যে, মূঢ় ও মুক জনগণকে ভোটদান ক্ষমতা প্রদানপূর্বক উহা তাহাদিগকে স্ব স্ব অধিকার ও কর্তব্য সম্বন্ধে আত্ম-সচেতন করিয়া তাহাদের মনুষ্যত্ববিকাশে সাহায্য করে।

গণতান্ত্রিক দোষ (Demerits)

গণতন্ত্র সর্বোৎকৃষ্ট শাসনব্যবস্থা বলিয়া পরিগণিত হইলেও ইহা একেবারে দোষবিমুক্ত নয়। গণতন্ত্রের বিপক্ষে অনেক যুক্তির অবতারণা করা যাইতে পারে।

প্রথমতঃ বলা যায়, গণতন্ত্র সংখ্যাধিক্যের উপরই গুরুত্ব আরোপ করে

গুণের উপর নয়। গণতন্ত্র সাম্যের নীতির উপর প্রতিষ্ঠিত। এই শাসনব্যবস্থায় 'জন প্রতি এক ভোট' এই নীতি প্রবর্তিত হইয়া যোগ্যতার সমাদর হ্রাস পাইয়াছে। ফলে, এই শাসনব্যবস্থা অক্ষম বিকৃত গণতন্ত্রে পৰ্যবসিত হইয়াছে।

দ্বিতীয়তঃ, গণতন্ত্র বলিতে সংখ্যাধিক্যের শাসন বুঝায়। আর এই সংখ্যাধিক্য গঠিত হয় অক্ষম ও অশিক্ষিত লোকের দ্বারা। সুতরাং অক্ষম ও অশিক্ষিত লোক দ্বারা পরিচালিত শাসনব্যবস্থা কখনই সুস্থভাবে রাষ্ট্রকর্তব্য সম্পাদন করিতে পারে না। এই ব্যবস্থায় গণতন্ত্রের আদর্শ ক্ষুণ্ণ হয়।

তৃতীয়তঃ, গণতান্ত্রিক শাসনব্যবস্থায় কোন শ্রেণীবিভাগ স্থান পায় না। সকল মানুষই সমপর্যায়ভুক্ত বলিয়া বিবেচিত হয়। কিন্তু কার্যক্ষেত্রে দেখা যায়, গণতন্ত্রের কার্য পরিচালিত হয় নৃষ্টিমেয় চতুর ও বিবেকবর্জিত লোক দ্বারা। ইহারা ছলে-বলে-কোশলে অজ্ঞ জনসাধারণের ভোট সংগ্রহ করিয়া প্রধানতঃ নিজেদের স্বার্থসিদ্ধি করিবার জন্ত শাসনব্যবস্থা পরিচালনা করে।

চতুর্থতঃ, গণতান্ত্রিক শাসনব্যবস্থায় সার্বজনীন কল্যাণের জন্ত আইন প্রণয়ন করা হয়। কিন্তু দেখা যায় যে, যে সম্প্রদায় বা যে-দল সংখ্যাধিক্যের জোরে শাসন-ক্ষমতা অধিকার করিয়াছে তাহারাই নিজেদের সুবিধার জন্ত আইন প্রণয়ন করে। সুতরাং এইরূপ আইনের দ্বারা সার্বজনীন স্বার্থ সংরক্ষিত না হইয়া দলগত স্বার্থ সংরক্ষিত হয়।

পঞ্চমতঃ, মেইন, লেকি প্রমুখ লেখকগণ ইহার কঠোর সমালোচনা করিয়াছেন। তাঁহাদের মতে গণতান্ত্রিক অধ্যাত্ম জীবনের উৎকর্ষের প্রতিফলিত করে। সাহিত্য, কলা, বিজ্ঞান প্রভৃতি যেগুলির চর্চা অধ্যাত্ম জীবনগঠনের সহায়ক বলিয়া বিবেচিত হয়, সেগুলি গণতান্ত্রিক শাসনব্যবস্থায় সমাদৃত হয় না। অজ্ঞলোক পরিচালিত শাসনব্যবস্থায় প্রকৃত জ্ঞান ও গুণের বিকাশ সম্ভব হয় না।

ষষ্ঠতঃ, এই শাসনব্যবস্থার প্রধান দোষ হইল যে, ইহা স্থায়িত্ব লাভ করিতে পারে না। নির্বাচকদের ইচ্ছার উপর এই শাসনব্যবস্থার স্বাধীন নির্ভর করে, সুতরাং নির্বাচকমণ্ডলীর খুশিমত সরকার পরিবর্তিত হয়। স্বল্পকালস্থায়ী সরকার কোন দূরপ্রসারী নীতি বা জনহিতকর গঠনমূলক কার্য

করিতে পারে না। গ্রীক দার্শনিক অ্যারিস্টটল্ ইহাকে বিকৃত গণতন্ত্র আখ্যা দিয়াছিলেন। আধুনিককালে ওয়েল্‌স্ বলেন যে, এই শাসনব্যবস্থা এত ভঙ্গুর যে, ইহাকে পাঁচ মিনিটের মধ্যেই বিনষ্ট করা যায়।

পরোক্ষ গণতন্ত্রব্যবস্থায় প্রত্যক্ষ গণতান্ত্রিক পদ্ধতি প্রয়োগ (Methods of Direct Democracy as applied to Indirect Democracy)

প্রথম মহাযুদ্ধের পরবর্তী কাল হইতে গণতন্ত্রের প্রতি জনসাধারণের আস্থা হ্রাস পাইতে থাকে। নানাকারণে গণতন্ত্রের ভিত্তি শিথিল হইতে থাকে। প্রথম কারণ হইল, নির্বাচনের পর নির্বাচিত প্রতিনিধিগণ অনেকক্ষেত্রে নির্বাচকমণ্ডলীর ইচ্ছার বিরুদ্ধে অনেক কার্য করেন। দ্বিতীয়তঃ, অবস্থার পরিবর্তনে জনমত এত দ্রুত পরিবর্তিত হয় যে, নির্বাচিত প্রতিনিধির পক্ষেও সকল সময়ে জনমতের সহিত সমান গতিতে চলিয়া তাহাদের মতের মর্যাদা রক্ষা করা সম্ভব হয় না। এতদ্ব্যতীত শিক্ষাবিস্তারের ফলে জনমতও অনেকটা সুসংবদ্ধ ও সুশিক্ষিত হইয়া প্রত্যক্ষভাবে শাসনকার্যে অংশ গ্রহণ করিবার জন্য আগ্রহান্বিত হইয়া উঠিয়াছে। এই সমস্ত কারণে অনেক দেশেই আইন-প্রণয়নে ও শাসনকার্যে জনগণ যাহাতে প্রত্যক্ষভাবে সক্রিয় অংশ গ্রহণ করিতে পারে, সেজন্য কতকগুলি উপায় অবলম্বন করা হইয়াছে। এই উপায়ে জনগণ শাসনব্যবস্থায় প্রতিনিধিগণের উপর সম্পূর্ণ নির্ভর না করিয়া মিলিতভাবে তাহাদের মতামত কার্যকর করিবার সুযোগ পাইয়াছে। সুইজারল্যান্ড, স্বাধীন আয়ারল্যান্ড প্রভৃতি দেশের শাসনতন্ত্রে এই প্রত্যক্ষ গণতান্ত্রিক ব্যবস্থা স্থান পাইয়াছে। প্রত্যক্ষ গণতান্ত্রিক ব্যবস্থার চারটি প্রকারভেদ হইতে পারে, যথা—

গণনির্দেশাধিকার (Referendum)

ইহার অর্থ হইল যে, কতকগুলি ক্ষেত্রে আইনের খসড়াকে চূড়ান্তভাবে আইনে পরিণত করিতে হইলে সে খসড়া-আইন জনগণের সংখ্যাধিক্য দ্বারা অনুমোদিত হওয়া চাই। আইনসভা কর্তৃক প্রবর্তিত খসড়া-আইন জনসাধারণের নিকট বিবেচনার্থে প্রেরিত হয়। যদি জনসাধারণ অধিক

ভোটে খসড়াটি সমর্থন করে তাহা হইলে সেটি আইনে পরিণত হয় ; আইন-সভার আর পৃথক অমুমোদনের প্রয়োজন হয় না। জনগণের এই নির্দেশ-অধিকার বাধ্যতামূলক (Compulsory) বা ঐচ্ছিক (Optional) হইতে পারে। কোন কোন বিষয়ে এই নির্দেশাধিকার বাধ্যতামূলকভাবে ব্যবহৃত হইবে শাসনতন্ত্রে তাহার উল্লেখ থাকে। সাধারণতঃ শাসনতান্ত্রিক আইনের সংশোধন, বা গুরুত্বপূর্ণ সাধারণ আইন, বা অর্থ-সংক্রান্ত আইনের ক্ষেত্রে এই অধিকার বাধ্যতামূলকভাবে প্রয়োগ করা হয়। ঐচ্ছিক গণনির্দেশ গ্রহণ করা হয় তখনই যখন (ক) একটি নির্দিষ্টসংখ্যক নির্বাচক এই অধিকার দাবী করে, অথবা (খ) আইনসভার একাংশ ইহার দাবী করে, বা (গ) শাসন-পরিষদ এই দাবী করে।

গণ-প্রস্তাব অধিকার (Initiative)

অনেক সময় আইনসভা হয়ত কোন বিষয়ে আইন-প্রণয়ন করিতে অনিচ্ছুক বা উদাসীন থাকিতে পারে। সেজন্য জনগণই আইন-প্রণয়ন ব্যাপারে অগ্রণী হয়। নির্বাচকমণ্ডলী যদি কোন বিষয়ে আইন প্রণয়ন করা প্রয়োজন মনে করে, তাহা হইলে তাহারা সেই আইনের একটা খসড়া আইনসভায় বিবেচনার্থ পাঠাইতে পারে। আইনসভা সেই খসড়া নির্বাচক-মণ্ডলীর নিকট বিবেচনা করিবার জন্য পুনরায় পাঠাইতে পারে। যদি জন-সাধারণ সেই খসড়াটি ভোটাধিক্তে অমুমোদন করে তাহা হইলে তাহা আইনে পরিণত হইবে। আইন-প্রণয়নের এই সরাসরি অধিকার দুই প্রকারের হইতে পারে। নির্বাচকমণ্ডলী যে খসড়া-আইনটি আইনসভার নিকট পেশ করিবে, সেটি যদি পূর্ণাঙ্গ হয় অর্থাৎ বিস্তারিত বিবরণ-সম্বিত হয় তাহা হইলে তাহাকে সুপরিকল্পিত গণ-প্রস্তাব বা Formulated Initiative বলা হয়। বিস্তারিত বিবরণবজ্জিত আইনের প্রস্তাবকে অসম্পূর্ণ প্রস্তাব বা Unformulated Initiative বলা হয়। সুইজারল্যাণ্ডে শাসনতান্ত্রিক আইনের ব্যাপারে উপরি-উক্ত দুই প্রকারের গণ-প্রস্তাব প্রয়োগ করা হয়। পঞ্চাশ হাজার ভোটদাতা মিলিতভাবে যদি শাসনতান্ত্রিক আইন পরিবর্তনের কোন প্রস্তাব করে, আর এই প্রস্তাবটি যদি বিস্তারিত বিবরণ-সম্বিত খসড়া আকারে আইনসভার নিকট পেশ হয় তাহা হইলে ইহাকে সুপরিকল্পিত প্রস্তাব বলা হয়।

গণভোট (Plebiscite)

গণভোট অনেকটা গণনির্দেশাধিকারের অনুরূপ। গণভোট দ্বারা শাসন-কর্তৃপক্ষ গুরুত্বপূর্ণ বিষয়সম্পর্কে নীতি নির্ধারণ করিবার নিমিত্ত জনমত গ্রহণ করেন। সাধারণতঃ শাসনবিভাগীয় সমস্যার সমাধানকল্পে এই পদ্ধতি অবলম্বন করা হয়। আইন-প্রণয়ন ব্যাপারে জনমত গ্রহণ করা হয় গণ-নির্দেশাধিকারের মাধ্যমে। ১৯৪৭ খৃষ্টাব্দে ভারতবিভাগের সময় আসাম রাজ্যের শ্রীহট্ট জেলা ভারতের অন্তর্ভুক্ত হইবে, না পাকিস্তানের অন্তর্ভুক্ত হইবে, ইহা নির্ণয়ের জন্য গণভোট গ্রহণ করা হইয়াছিল।

প্রত্যাবর্তনের আদেশ (Recall)

কোন কোন দেশে ভোটদাতৃগণ যদি নির্বাচিত প্রতিনিধির আচরণে সন্তুষ্ট না হন বা নির্বাচিত প্রতিনিধি যদি তাঁহার প্রদত্ত প্রতিশ্রুতি রক্ষা না করেন, তাহা হইলে ভোটদাতৃগণ তাঁহার পদত্যাগ দাবী করিতে পারেন। পুনরবার ভোট গ্রহণ করিয়া এই প্রত্যাবর্তনের দাবী কার্যকরী করা হয়। ঐ প্রতিনিধিকে অপসারিত করিতে হইলে কিছু সংখ্যক ভোটদাতা তাঁহার অপসারণের দাবী করিবেন এবং যদি ভোটদাতৃগণ দ্বিতীয়বার ভোটে তাঁহাকে নির্বাচন না করিয়া অন্য প্রতিনিধি নির্বাচন করে তাহা হইলে তাঁহাকে নির্ধারিত সময়ের পূর্বে পদত্যাগ করিতে হইবে।

উপরি-উক্ত উপায়গুলি গণতন্ত্রের সাফল্য স্থচিত করে। এই উপায়গুলির মধ্যে গণনির্দেশাধিকার ও গণ-প্রস্তাব-অধিকার গণতন্ত্রকে সাফল্যমণ্ডিত করিতে সমধিক সাহায্য করিয়াছে। এই গণতান্ত্রিক উপায়গুলি সুইস দেশে বহুদিন হইতে কার্যকরী করা হইয়াছে ও সুইস আদর্শে অনুপ্রাণিত হইয়া অধুনা স্বাধীন আয়ার প্রভৃতি দেশ ইহার অনুকরণ করিয়াছে। গণনির্দেশ ও গণ-প্রস্তাব অঙ্গাঙ্গিভাবে জড়িত। একটি অন্যটির পরিপূরক। গণ-প্রস্তাবের উদ্দেশ্য হইল অপ্রস্তাবিত আইনের সূচনা করা আর গণনির্দেশের উদ্দেশ্য হইল প্রস্তাবিত আইনকে না-মঞ্জুর করা। আইনসভা যে আইন প্রণয়ন কল্পিতে অনিচ্ছুক, গণ-প্রস্তাব আইনসভাকে সেই জাতীয় আইন প্রণয়ন করিতে বাধ্য করে। অপরপক্ষে জনমতের বিরুদ্ধে যদি আইনসভা কোন আইন জনগণের উপর প্রবর্তিত করিতে উদ্যোগী হয়, তাহা হইলে গণনির্দেশ

প্রয়োগ করিয়া সেরূপ আইনকে কার্যকরী করিতে দেওয়া হয় না। সুতরাং উভয় পদ্ধতিই জনমতের বিজয় ঘোষণা করে।

গণতান্ত্রিক উপায়গুলির গুণাপগুণ (Merits and Demerits of the Direct Methods)

গণতান্ত্রিক উপায়গুলির প্রধান গুণ হইল যে, উহারা সাধারণ ব্যাপারে সম্পূর্ণ উদাসীন ব্যক্তিকেও শাসনকার্যে অধিকতর উৎসাহী করিয়া তাহাকে তাহার অধিকার ও দায়িত্ব সম্বন্ধে সচেতন করে। জনগণ যদি তাহাদের অধিকার সম্বন্ধে সতত সজাগ থাকে, তাহা হইলে আইনসভা বা শাসন-কর্তৃপক্ষ তাহাদের অধিকারে হস্তক্ষেপ করিতে সাহসী হয় না। কোন কায়েমী স্বার্থ বা দলবিশেষ তাহাদের স্বার্থসাধনের উদ্দেশ্যে কোন আইন প্রবর্তন করিতেও পারে না।

কিন্তু এই উপায়গুলি সম্পূর্ণ দোষবিমুক্ত নহে। আইন-প্রণয়নে বা শাসনকার্যে এই উপায়গুলি অবলম্বিত হইলে আইনসভার বা শাসন-কর্তৃপক্ষের আর কোন দায়িত্ব থাকে না। আইনসভা একটি বিতর্কমতায় পরিণত হয়, ফলে আইন-প্রণয়নে অনেক গলদ থাকিয়া যায়। বর্তমানকালে শাসনব্যবস্থায় এত বিভিন্ন প্রকারের জটিল সমস্যা দেখা দিয়াছে যে, সে সমস্যাগুলির সমাধান করিবার মত শিক্ষা, বুদ্ধি ও জ্ঞান সাধারণ লোকের নিকট হইতে আশা করা যায় না। আইন-প্রণয়ন ব্যাপারেও হুম্ব জ্ঞানের প্রয়োজন হয়। সেইজন্য কি শাসনব্যাপারে, কি আইন-প্রণয়নে অভিজ্ঞ ও কর্মপটু লোকের প্রয়োজন। গণপ্রবর্তিত আইন সকল সময়ে জনহিতকর নাও হইতে পারে। ক্ষুদ্রকায় সুইস দেশে এই পদ্ধতিগুলি কার্যকরী হইয়াছে বলিয়া বৃহদায়তনের অল্প দেশেও যে কার্যকরী হইবে তাহার আদৌ কোন নিশ্চয়তা নাই।

গণতন্ত্রের সাফল্যের উপাদান (Conditions essential for the success of Democracy)

গণতন্ত্র একটি বিশেষ রকমের শাসনব্যবস্থা, যে ব্যবস্থা সার্বজনীন অধিকারের বিভিন্ন উপর প্রতিষ্ঠিত। রাজতন্ত্রে, অভিজাততন্ত্রে বা একনাকয়

তত্ত্বে এক ব্যক্তির হস্তে অথবা মুষ্টিমেয় লোকের হস্তে শাসনক্ষমতা কৃত্রিম থাকে; কিন্তু গণতত্ত্বে শাসনব্যবস্থা পরিচালিত হয় জনসাধারণের দ্বারা। সুতরাং গণতত্ত্বের সাফল্য যে জনসাধারণের বিচারবুদ্ধি, দায়িত্ববোধ ও কর্মদক্ষতার উপর বহুলাংশে নির্ভর করে একথা সহজেই অনুমেয়। জন ইয়ার্ট মিলের মতে গণতত্ত্বের সাফল্য তিনটি বিষয়ের উপর নির্ভর করে : প্রথমতঃ, দেশের জনসাধারণের শাসনকার্যে সক্রিয় অংশ গ্রহণ করিবার মত সামর্থ্য ও ইচ্ছা থাকা চাই। দ্বিতীয়তঃ, নাগরিক অধিকার রক্ষাকল্পে জনসাধারণের সর্বদা সজাগ থাকিতে হইবে। তৃতীয়তঃ, জনসাধারণকে তাহাদের নাগরিক কর্তব্য-পালনের জন্ত সর্বদা প্রস্তুত থাকিতে হইবে। শেষ বিশ্লেষণে দেখা যায় যে, গণতত্ত্বের সাফল্য অনেক পরিমাণে নাগরিকদিগের অধিকার রক্ষা করিবার দৃঢ়সংকল্প ও কর্তব্য-পালনে ভৎপরতা—এই দুইটি গুণের উপর নির্ভর করে। নাগরিকগণ যদি তাহাদের কর্তব্য-পালনের কথা ভুলিয়া গিয়া শুধু অধিকার সম্বন্ধে সচেতন হয়, তাহা হইলে গণতন্ত্র কার্যকর হইতে পারে না। অপরপক্ষে, নাগরিক অধিকার সম্বন্ধে যদি তাহারা সতর্ক না হয় তাহা হইলে গণতন্ত্র ধীরে ধীরে অভিজাততন্ত্র বা একনায়কতন্ত্রে পর্যবসিত হইতে পারে। সুতরাং শেষ বিশ্লেষণে দেখা যায় যে, গণতান্ত্রিক শাসনব্যবস্থার সাফল্য জনগণের অধিকার রক্ষার দৃঢ় সংকল্প ও কর্তব্য-পালনের একান্ত ইচ্ছার উপর একান্তভাবে নির্ভরশীল। যেখানে জনগণ রাজনৈতিক ব্যাপারে উদাসীন এবং রাষ্ট্রীয় কার্যকলাপ সম্পর্কে নির্বাক দর্শকের ভূমিকা গ্রহণ করে, সেখানে গণতন্ত্র স্বৈরতন্ত্রে পর্যবসিত হয়। গণতান্ত্রিক শাসনব্যবস্থার আর একটি বৈশিষ্ট্য হইল জনগণের মধ্যে পারস্পরিক সহানুভূতি ও সহযোগিতার মনোভাব। এই মনোভাবের অবর্তমানে গণতন্ত্র সফল হইতে পারে না। জাতি-ধর্ম-ধনী-দরিদ্র-নির্বিশেষে সকলকেই সাধারণ হিতার্থে অনুপ্রাণিত হইতে হইবে। গণতন্ত্রের সাফল্যের আর একটি আবশ্যিক উপাদান হইল জনগণের মধ্যে পারস্পরিক সহনশীলতা ও আপস-মূলক মনোভাব। সমাজগরিষ্ঠ ও সংখ্যাগরিষ্ঠ দল যদি এইরূপ মনোভাব দ্বারা পরিচালিত না হয়, তাহা হইলে গণতন্ত্রের মূল আদর্শ ব্যাহত হয়। এজন্য চাই বিচার-বুদ্ধিসম্পন্ন শিক্ষিত নাগরিক। সু-শিক্ষার বিস্তার ব্যতীত সু-নাগরিকের

সৃষ্টি হইতে পারে না। সুতরাং গণতন্ত্রকে সফল করিতে হইলে দেশের জনসাধারণের মধ্যে প্রকৃত শিক্ষার বিস্তার করিয়া তাহাদের মধ্যে কর্তব্যবুদ্ধি ও বিচারবোধ সঞ্চারিত করিতে হইবে। গণতন্ত্রের ভিত্তি হইল জনমত। সুতরাং প্রকৃত শিক্ষা দ্বারা জনমতকে সুসংবদ্ধ ও শিক্ষিত করিতে পারিলে গণতন্ত্র পরিচালনার আর অন্তরায় থাকিতে পারে না।

বর্তমান যুগে ল্যাক্সি প্রমুখ অনেক লেখকের মতে অর্থনৈতিক সাম্যের অভাব গণতন্ত্রের সাফল্যের পথে একটা প্রধান অন্তরায় বলিয়া পরিগণিত হয়। ধনবর্চন-ব্যবস্থায় অত্যধিক বৈষম্য থাকিলেও গণতন্ত্র সফল হইতে পারে না। সুতরাং গণতন্ত্র বাহাতে সফল হইতে পারে সেজন্য সামাজিক, অর্থনৈতিক ও রাজনৈতিক ব্যাপারে সকলে বাহাতে সমান অধিকার পায় তাহার ব্যবস্থা করা প্রয়োজন।

গণতন্ত্রের ভবিষ্যৎ (Future of Democracy)

প্রথম মহাযুদ্ধের পরবর্তী কালে নানা কারণে গণতান্ত্রিক শাসনব্যবস্থার উপর জনসাধারণের আস্থা হ্রাস পাইয়াছিল। গণতান্ত্রিক শাসনব্যবস্থা যুদ্ধোত্তরকালীন অবস্থায় কোন দেশেই জাতীয় জটিল সমস্যা সমূহের সন্তোষজনক সমাধান করিতে সক্ষম হয় নাই। সেজন্য কোন কোন দেশে একনায়কতন্ত্রের আবির্ভাব হয়। অপরপক্ষে, কোন কোন রাষ্ট্রের শাসনব্যবস্থায় জনসাধারণ গণ-প্রস্তাব, গণনির্দেশ, গণভোট প্রভৃতি অধিকারগুলি সুপ্রতিষ্ঠিত করিতে সক্ষম হয়। এই সমস্ত কারণে লোকের মনে স্বভাবতঃই ধারণা জন্মিয়াছিল যে, গণতান্ত্রিক শাসনব্যবস্থা চিরস্থায়ী হইতে পারে না। কিন্তু উপরি-উক্ত ধারণা সম্পূর্ণ ভুল বলিয়া বর্তমানে প্রমাণিত হইয়াছে। একনায়কতন্ত্র একটা সাময়িক পরিবর্তন মাত্র। কোন দেশেই একনায়কতন্ত্র চিরস্থায়ী হইতে পারে না। আধুনিককালে জার্মানি ও ইতালী তাহার প্রকৃষ্ট প্রমাণ। সোভিয়েত যুক্তরাষ্ট্রের একনায়কতন্ত্র অনেকদিন হইতে জনকল্যাণের অঙ্কুল বলিয়া আজও পর্যন্ত তাহার অস্তিত্ব বজায় রাখিতে সমর্থ হইয়াছে। পৃথিবীতে বিভিন্ন যুগে স্বৈরতন্ত্র, অভিজাততন্ত্র, ধর্মতন্ত্র, প্রভৃতি শাসনব্যবস্থা প্রবর্তিত হইয়াছে, কিন্তু গণতান্ত্রিক শাসনব্যবস্থায় মানুষের সাধারণ অধিকারগুলি যেভাবে স্বীকৃত ও সংরক্ষিত হইয়াছে স্পষ্ট

কোন শাসনব্যবস্থায় তাহা সম্ভব হয় নাই। সত্য বটে গণতন্ত্র এখনও পর্যন্ত মানুষকে সম্পূর্ণরূপে স্বাধিকারে প্রতিষ্ঠিত করিতে সক্ষম হয় নাই, কিন্তু তাহা সবেও বলিতে হইবে এই শাসনব্যবস্থা পূর্বতন শাসনব্যবস্থাসমূহ হইতে নানাদিক দিয়া উৎকৃষ্টতর। বার্নস্ তাঁহার ‘Democracy’ নামক পুস্তকের একস্থলে বলিয়াছেন যে, মোটরগাড়ী সব সময়ে ভাল কাজ করে না বলিয়া গো-যান ব্যবহার করা যে রূপ নির্বোধের কার্য, আধুনিক গণতন্ত্রের দোষ-ত্রুটির জন্ত গণতান্ত্রিক শাসনব্যবস্থা পরিহার করিয়া ভিন্ন জাতীয় শাসনব্যবস্থা প্রবর্তন করা তদ্রূপ নিবুদ্ধিতার পরিচায়ক। আসল কথা হইল আধুনিক গণতান্ত্রিক শাসনব্যবস্থার উৎকর্ষসাধন করা। গণতান্ত্রিক শাসনব্যবস্থাকে প্রথমতঃ ধনতান্ত্রিক প্রভাব হইতে মুক্ত করিয়া ইহার প্রকৃত সার্বজনীন রূপ কার্যকর করা একান্ত আবশ্যক। এই উদ্দেশ্য সাধনের নিমিত্ত সমাজ-জীবনের বিভিন্ন ক্ষেত্রে বিশেষ করিয়া অর্থনৈতিক ক্ষেত্রে গণতান্ত্রিক আদর্শ সুপ্রতিষ্ঠিত করিতে হইবে। গণতন্ত্রের মূল কথা হইল স্বাধীনতা, সাম্য ও মৈত্রীভাব। সমাজ-জীবনের বিভিন্ন ক্ষেত্রে এই নীতি কার্যকরী না হওয়া পর্যন্ত গণতন্ত্র সাকল্য লাভ করিতে সক্ষম হইবে না। মানুষের সামাজিক ও অর্থনৈতিক জীবনে যদি গণতান্ত্রিক নীতি প্রযুক্ত না হয় তাহা হইলে রাজনৈতিক ক্ষেত্রে ‘জন প্রতি এক ভোট’ নীতির দ্বারা প্রকৃত গণতন্ত্র প্রতিষ্ঠিত হইতে পারে না। সুতরাং সমাজ-জীবন মহত্তর করিবার উদ্দেশ্যে গণতন্ত্রের সাকল্য একান্ত অপরিহার্য। কিন্তু জনসাধারণ উপলব্ধি করিয়াছে যে, একমাত্র গণতান্ত্রিক শাসনব্যবস্থাই ব্যক্তিস্বাধিকারের চরম সুযোগ প্রদান করিতে পারে। তাই আজ পৃথিবীর সর্বত্র গণতন্ত্র-প্রতিষ্ঠার জন্য গগনদাবী উখিত হইয়াছে। এই দাবী প্রতিরোধ করিবার শক্তি কাহারও নাই। সুতরাং গণতন্ত্রের জয় অনিবার্য ও অবশ্যজ্ঞাবী।

প্রাচীনকালের গণতন্ত্র ও আধুনিক গণতন্ত্র (Ancient and Modern Democracies)

প্রাচীন যুগেও গণতন্ত্রের অস্তিত্বের প্রমাণ পাওয়া যায়। গ্রীক ও রোমকগণের গণতন্ত্র সম্বন্ধে একটা বিশেষ ধারণা ছিল। কিন্তু বর্তমান যুগের গণতন্ত্র প্রাচীনকালের গণতন্ত্র হইতে অনেক বিষয়ে পৃথক্।

প্রথমতঃ, প্রাচীন যুগের গণতন্ত্র ছিল প্রত্যক্ষ গণতন্ত্র। পূর্ণবয়স্ক স্বাধীন নাগরিকগণ শাসনব্যবস্থায় প্রত্যক্ষ ও সক্রিয়ভাবে অংশগ্রহণ করিত। কিন্তু বর্তমান যুগের গণতন্ত্র হইল পরোক্ষ বা প্রতিনিধিমূলক। পূর্ণবয়স্ক নাগরিকগণ বর্তমান যুগে প্রতিনিধি নির্বাচন করিয়া তাহাদের মাধ্যমে শাসনকার্য পরিচালনা করে।

দ্বিতীয়তঃ, প্রাচীন রাষ্ট্রগুলি ছিল ক্ষুদ্রকায় নগর-রাষ্ট্র। আয়তনে ও লোকসংখ্যায় বর্তমান রাষ্ট্র অপেক্ষা সেগুলি বহুগুণে ক্ষুদ্রতর ছিল। নাগরিকগণ যাহাতে শাসনকার্যে সক্রিয়ভাবে অংশ গ্রহণ করিতে পারে, সেজন্য জনসংখ্যা নির্ধারিত করা হইত। বর্তমান রাষ্ট্র আয়তনে ও লোকসংখ্যায় বিশালকায়। সুতরাং বর্তমান রাষ্ট্রের আয়তন বা লোকসংখ্যা সংকুচিত করিবার কোন প্রয়োজন হয় না।

তৃতীয়তঃ, প্রাচীনকালের রাষ্ট্রে মুষ্টিমেয় বিশ্রামভোগী, পরজীবী অভিজাতসম্প্রদায় নাগরিক বলিয়া পরিগণিত হইত ও তাহারাই নাগরিক স্বত্ব-স্ববিধার অধিকারী ছিল। স্ত্রীলোক, মজুর-সম্প্রদায় ও ক্রীতদাসগণ পরনির্ভরশীল বলিয়া নাগরিক অধিকারে বঞ্চিত ছিল। বর্তমান গণতন্ত্রে মাতৃষে মাতৃষে এতটা ভেদ দেখা যায় না। সকলেরই সমান নাগরিক অধিকার রাষ্ট্র কর্তৃক স্বীকৃত হয়।

চতুর্থতঃ, প্রাচীনকালে গণতন্ত্রে রাষ্ট্রকে ব্যক্তির উপর স্থান দেওয়া হইত। ব্যক্তি রাষ্ট্রের একটি অকিংকর অংশ বলিয়া পরিগণিত হইত। সুতরাং রাষ্ট্রের উদ্দেশ্যসিদ্ধির জন্য ব্যক্তিকে রাষ্ট্রবেদীমূলে বলি দেওয়া হইত। রাষ্ট্র কর্তৃক ব্যক্তিস্বাধীনতা কখনও স্বীকৃত হয় নাই। বর্তমান যুগে রাষ্ট্রের অস্তিত্ব শুধু রাষ্ট্রের জনকল্যাণ-ক্ষমতার দ্বারাই সমর্থিত হয়।

পঞ্চমতঃ, প্রাচীন যুগের গণতন্ত্রে রাষ্ট্র ও সরকারের মধ্যে কোন পার্থক্য করা হইত না। বর্তমান যুগে এই পার্থক্য সুস্পষ্ট। এখন সরকার শুধু রাষ্ট্রপ্রদত্ত ক্ষমতা পরিচালনা করে।

পরিশেষে বলা যায়, প্রাচীন যুগের গণতন্ত্রগুলিকে প্রকৃত গণতন্ত্র বলিয়া অভিহিত করা যায় না। যে গণতন্ত্রে রাষ্ট্রের অধিকাংশ অধিবাসী একটি নিকৃষ্ট স্তরের জীব বলিয়া পরিগণিত হইত, যে শাসনব্যবস্থায় ব্যক্তিস্বাধীনতার কোন স্থান ছিল না, তাহাকে বর্তমান গণতন্ত্রের মাপকাঠিতে

প্রকৃত গণতন্ত্র বলা যায় না। এদিক দিয়া দেখিতে গেলে বর্তমানে গণতন্ত্রের অনেক উৎকর্ষ সাধিত হইয়াছে। আধুনিক রাষ্ট্রের সকল স্থায়ী অধিবাসীই নাগরিক বলিয়া পরিগণিত হয় ও বর্তমান গণতন্ত্র সর্ববিধ উপায়ে নাগরিক অধিকার রক্ষাকল্পে তৎপর থাকে।

একনায়কতন্ত্র (Dictatorship)

একনায়কতন্ত্র-সম্বন্ধে আলোচনা করিবার পূর্বে একটি কথা স্মরণ রাখা প্রয়োজন। অনেকে মনে করেন যে, একনায়কতন্ত্র এবং স্বৈরতন্ত্র সমধর্মী। কিন্তু বাস্তবক্ষেত্রে তাহা নয়। একনায়কতন্ত্রের আলোচনা করিলে এই সত্যটি উপলব্ধি করা যাইবে। বিগত প্রথম মহাসমরের পরবর্তী কালে একনায়কতন্ত্রের অভ্যুদয় হয়। যুদ্ধোত্তরকালে ইয়ুরোপের কয়েকটি দেশের পরিস্থিতির এত অবনতি ঘটে যে, ঐ সমস্ত দেশে গণতন্ত্রের বিরুদ্ধে একটা প্রতিক্রিয়া দেখা দেয়। যুদ্ধ শেষ হইবার সঙ্গে সঙ্গে প্রায় সর্বত্র বেকার-সমস্যা, কৃষি-শিল্প-বাণিজ্যের পুনঃপ্রতিষ্ঠা, ক্ষুদ্র ক্ষুদ্র জাতিগুলির আত্মনির্ধারণ-অধিকার প্রভৃতি সমস্যাগুলির সমাধানে তৎকালীন সরকারগুলির অক্ষমতা প্রকাশ পায়। এতদ্ব্যতীত অনেক দেশে বহু রাজনৈতিক দলের অস্তিত্ব থাকায় রাষ্ট্রনায়কেরা তাঁহাদের দলীয় নীতি বিসর্জন দিয়া সঙ্ঘবদ্ধভাবে জনসাধারণের অভাব-অভিযোগ দূর করিবার জন্য একমত হইতে পারেন না। আভ্যন্তরীণ বিশৃঙ্খলার জন্য শাসনব্যবস্থা দুর্বল হইয়া পড়ে। ফলে, জনসাধারণের মধ্যে অসন্তোষ বৃদ্ধি পায়। লোকের ধারণা জন্ম যে, গণতান্ত্রিক শাসনব্যবস্থা আর অবস্থার উন্নতি করিতে সক্ষম নয়। দেশের এই পরিস্থিতিতে গণতন্ত্রের দুর্বলতা স্বয়োগ লইয়া একনায়কতন্ত্রের আবির্ভাব হয়। যুদ্ধোত্তরকালে অনেক দেশের সামাজিক, রাজনৈতিক ও অর্থনৈতিক অবস্থার এত দ্রুত অবনতি ঘটে যে, একনায়কতন্ত্র একান্ত অপরিহার্য হইয়া উঠে।

একনায়কতন্ত্র তিন প্রকারের হইতে পারে, যথা সামরিক (Military), সাম্যবাদী (Communist) ও ফ্যাসিবাদী (Fascist)। সামরিক একনায়কতন্ত্র বহু পুরাতন হইলেও বর্তমান যুগেও এই শাসনব্যবস্থা লোপ পায় নাই। যখনই সেনাবাহিনীর কোন অধিনায়ক সৈন্যগণের সাহায্যে

শাসনক্ষমতা হস্তগত করিয়া সৈন্তবাহিনীর সাহায্যে শাসনকার্য পরিচালনা করেন তখন এই শাসনব্যবস্থাকে সামরিক একনায়কতন্ত্র বলা হয়। ফরাসী দেশে নেপোলিয়নের শাসন, বর্তমানে স্পেন দেশে জেনারেল ফ্রান্সোয়ার শাসন ও অতি আধুনিককালে পাকিস্তানে ফিল্ড মার্শাল আয়ুব খানের শাসন ইহার প্রকৃষ্ট উদাহরণ।

একনায়কতন্ত্রের মূলনীতি হইল একজাতি, একরাষ্ট্র ও একনায়ক। একনায়কতন্ত্রে রাষ্ট্রের সমস্ত ক্ষমতা একক নেতার হস্তে কেন্দ্রীভূত হয় ও রাষ্ট্রের সকল কার্যকলাপ একক নায়কের নেতৃত্বে পরিচালিত হয়। রাষ্ট্রের বিক্ষিপ্ত শক্তিগুলিকে যে-কোন উপায়েই হউক একত্রিত করিয়া দেশকে একটা উজ্জ্বলতর ভবিষ্যতের দিকে অগ্রসর হইতে একনায়কতন্ত্র সাহায্য করে। একনায়কতন্ত্রের বৈশিষ্ট্য হইল যে, ইহার অধীনে একটিমাত্র দল থাকে ও নেতা হইলেন দলের সর্বময় কর্তা। দেশে অত্র কোন রাজনৈতিক দল থাকিতে দেওয়া হয় না—বলপ্রয়োগ করিয়া অত্র দলগুলিকে বিনষ্ট করা হয়।

অবাধ দলীয় কর্তৃত্বপ্রতিষ্ঠার জন্য দলের নেতা ব্যক্তির সামাজিক জীবনে প্রত্যেকটি কার্যকলাপ নিয়ন্ত্রণ করেন। এই উদ্দেশ্যে জাতীয় শিক্ষা, সাহিত্য, সংবাদপত্র, চলচ্চিত্র, বেতার প্রভৃতি সব কিছুই রাষ্ট্রকর্তৃক পরিচালিত হয়। একনায়কতন্ত্রের অধীনে ব্যক্তিগত ইচ্ছার কোন স্থান নাই। ব্যক্তিগত জীবন সম্পূর্ণভাবে রাষ্ট্রনিয়ন্ত্রণের অধীনে আনা হয়।

একনায়কতন্ত্র-অনুসারে রাষ্ট্র সর্বশক্তিসম্পন্ন এবং ব্যক্তির রাষ্ট্রের বিরুদ্ধে কোন অভিযোগ দূরের কথা, কোন অধিকারও থাকিতে পারে না। শেষ পর্যন্ত রাষ্ট্র ও দলীয় নেতৃত্ব অভিন্ন হইয়া রাষ্ট্রের ইচ্ছা নেতার ইচ্ছায় পর্ববসিত হয়। রুশিয়ায় সাম্যবাদী, ইতালীতে ফ্যাসিবাদী ও জার্মানীতে নাৎসীবাদী সিদ্ধান্তের উপর একনায়কতন্ত্র প্রতিষ্ঠিত হইয়াছিল। রুশিয়ার এই সাম্যবাদী একনায়কতন্ত্র ইহার গঠনমূলক কার্য দ্বারা পৃথিবীর বহুদেশে প্রভাব বিস্তার করিতে সমর্থ হইয়াছে।

গণতন্ত্র ও একনায়কতন্ত্র (Democracy and Dictatorship)

গণতন্ত্রের মূলনীতি হইল স্বাধীনতা ও সাম্য। কিন্তু একনায়কতন্ত্রে এই নীতির কোন স্থান নাই। গণতন্ত্রে একই রাষ্ট্রে বিভিন্ন মতাবলম্বী রাজনৈতিক

দলের অস্তিত্ব সম্ভবপর, কিন্তু একনায়কতন্ত্রে একটিমাত্র দল থাকে। অল্প দলের অস্তিত্ব আদৌ বরদাস্ত করা হয় না। গণতন্ত্র পারস্পরিক সম্মতি, হবিধা ও সহযোগিতার উপর প্রতিষ্ঠিত। আর একনায়কতন্ত্র হইল দলীয় স্বার্থের উপর প্রতিষ্ঠিত; সেইজন্য একনায়কতন্ত্রে দলীয় দৃষ্টিভঙ্গী, জাতীয় দৃষ্টিভঙ্গী ও দলীয় স্বার্থ জাতীয় স্বার্থ বলিয়া বিবেচিত হয়। কিন্তু দলগত এই দৃষ্টিভঙ্গী ও স্বার্থ যদি বিকৃত হয়, তাহা হইলে শুধু দলগত স্বার্থের হানি হয় তাহা নয়, সমস্ত জাতীয় জীবন এই বিকৃত দৃষ্টিভঙ্গী দ্বারা বিপর্যস্ত হইতে পারে। রুশীয় একনায়কতন্ত্রে এবং নাৎসী ও ফ্যাসিবাদী একনায়কতন্ত্রে যথেষ্ট পার্থক্য দেখা যায়। কার্যতঃ যাহাই হউক না কেন, রুশীয় একনায়কতন্ত্রের উদ্দেশ্য ছিল ধনিক শ্রেণীকে নিয়ূল করিয়া শ্রমিকরাজ প্রতিষ্ঠা করা। অপরপক্ষে, নাৎসী ও ফ্যাসিবাদী একনায়কতন্ত্রের উদ্দেশ্য ছিল কোন সম্প্রদায়কে উৎখাত না করিয়া সকলের মধ্যে সমন্বয় সাধনপূর্বক জাতীয় স্বার্থকে পরিপুষ্ট করা। কার্যক্ষেত্রে ফ্যাসিবাদী বা নাৎসীবাদী একনায়কতন্ত্র এবিষয়ে কতদূর সাকল্য অর্জন করিয়াছিল, তাহা অবশ্য বিচারসাপেক্ষ।

একনায়কতন্ত্রের গুণ (Merits of Dictatorship)

একনায়কতন্ত্র সম্বন্ধে সকলেই স্বভাবতঃ একটা বিরুদ্ধ মনোভাব পোষণ করে। বিরুদ্ধ মনোভাব পোষণ করিবার যথেষ্ট সঙ্গত কারণ থাকিলেও একনায়কতন্ত্রের যে কোন গুণ নাই, একথা বলিলে সত্যের অপলাপ হইবে। একনায়কতন্ত্রের পক্ষে বলা যাইতে পারে যে, এই শাসনব্যবস্থায় জাতীয় ঐক্য সুপ্রতিষ্ঠিত হয়। গণতন্ত্রে যে দল বা উপদলের অস্তিত্বের উল্লেখ করিয়া জনমতের প্রাধান্য প্রমাণ করা হয়, তাহা বহুক্ষেত্রেই কৃত্রিম উপায়ে সৃষ্টি করা হয় এবং দলগত বিরোধ জাতীয় স্বার্থকে অনেক সময়ে ক্ষুণ্ণ করে। প্রায় সকল গণতান্ত্রিক দেশেই জনগণ দলের নেতাকে অন্ধভাবেই অনুসরণ করিয়া থাকে। রাজনৈতিক দলগুলি শেষ পর্যন্ত নেতার যন্ত্রস্বরূপ হইয়া পড়ে। একনায়কতন্ত্র জটিল সমস্যাসমূহের দ্রুত সমাধান করিতে পারে, যাহা গণতন্ত্রে সকল সময়ে সম্ভব হয় না। জরুরী অবস্থায় একনায়কতন্ত্র জাতীয় স্বার্থসংরক্ষণে অধিকতর কার্যকরী হয়। মালুমের নৈতিক উৎকর্ষসাধনেও একনায়কতন্ত্রের অবদান

উপেক্ষণীয় নয়। রুশ দেশে এই একনায়কতন্ত্র জনগণকে অনেক ক্ষেত্রে স্বদেশপ্রেমিক করিয়া তাহাদের আত্মত্যাগ দ্বারা জাতীয় গৌরব বৃদ্ধি করিবার শিক্ষা দিয়াছে। একনায়কতন্ত্রে যে স্বাধীনতা, সাম্য ও ভ্রাতৃত্ববোধ সম্পূর্ণ বিনষ্ট হয়, তাহা বলা আদৌ যুক্তিযুক্ত নয়। কৃষি, শিল্প, বিজ্ঞান ও সার্বজনীন শিক্ষাবিস্তারে জার্মানী, ইতালী ও বিশেষ করিয়া রুশিয়া একনায়কতন্ত্রের অধীনে অতি অল্পকালের মধ্যে উন্নতিসাধন করিয়াছে, তাহা গণতন্ত্রে কোথায়ও সম্ভব হয় নাই। অনেকে মনে করেন যে, একনায়কতন্ত্র পশুবলের উপর প্রতিষ্ঠিত। কিন্তু একথা আংশিক সত্য হইলেও সম্পূর্ণ সত্য কখনই নয়। বর্তমান যুগে কোন রাষ্ট্রই সম্পূর্ণভাবে জনমতকে উপেক্ষা করিয়া শক্তির উপর প্রতিষ্ঠিত হইতে পারে না। একনায়কতন্ত্রের কার্যাবলী যদি ক্রমাগত জনস্বার্থবিরোধী হয়, তাহা হইলে তাহার অবসান অবশ্যস্বাবী। ইহা ঐতিহাসিক সত্য। সুতরাং একনায়কতন্ত্র ও স্বৈরাচার একার্থবোধক হইতে পারে না।

দোষ (Demerits)

একনায়কতন্ত্রের পক্ষে যতই যুক্তি দেখান হউক না কেন, তাহা সত্ত্বেও বলিতে হইবে যে, এই শাসনব্যবস্থা আদৌ বাঞ্ছনীয় নহে। ব্যক্তি-স্বাধীনতা সুপ্রতিষ্ঠিত করিয়া ব্যক্তিত্ববিকাশের সুবিধা দান যদি রাষ্ট্রের প্রধান উদ্দেশ্য হয়, তাহা হইলে কোন ক্ষেত্রেই একনায়কতন্ত্র সমর্থনযোগ্য নয়। একনায়কতন্ত্র যে শেষ পর্যন্ত শক্তির উপর প্রতিষ্ঠিত, এ কথা অস্বীকার করা যায় না। মালুস আইনের শাসন মানিতে চায়, কোন ব্যক্তিবিশেষের শাসনের প্রতি স্বাধীন চিন্তাশীল মালুষের শ্রদ্ধা থাকিতে পারে না। একনায়কতন্ত্র এই ব্যক্তিবিশেষের শাসনই প্রতিষ্ঠিত করে, সুতরাং জনকল্যাণকর হইলেও এই শাসনব্যবস্থা কাম্য নহে। অনগ্রসর ও অপরাধপ্রবণ জনগণ শাসনের পক্ষে সহায়ক হইলেও একনায়কতন্ত্র জানী, গুণী ও রাজনৈতিক চেতনাসম্পন্ন জনসমূহের ব্যক্তিত্ব বিকাশের অন্তরায় বলিয়া বিবেচিত হয়। অনেক সময় এই একনায়কত্ববাদ উগ্র জাতীয়তাবাদের উপর প্রতিষ্ঠিত হইয়াছে। ক্ষুদ্র জাতিগুলির উপর কর্তৃত্ব স্থাপন করিতে ব্যগ্র হয়। সুতরাং একনায়কতন্ত্র আন্তর্জাতিক শান্তি বিনষ্ট করিয়া যুদ্ধ অনিবার্য করিয়া তুলে। জার্মানী ও

ইতালীয় একনায়কত্বের এই ছিল প্রধান দোষ। এই দোষের জন্তই তাহাদের পতন অবশ্যজ্ঞাবী হইয়াছিল।

আমলাতন্ত্র (Bureaucracy)

আমলাতান্ত্রিক শাসনব্যবস্থায় শাসনকার্য পরিচালিত হয় স্থায়ী কর্মচারি-বৃন্দের দ্বারা। এই কর্মচারীদের প্রতিযোগিতামূলক পরীক্ষা দ্বারা যোগ্যতা স্থির করিয়া সরকারী কার্যে নিয়োগ করা হয়। একটা নির্দিষ্ট বয়স হইতে কার্য আরম্ভ করিয়া একটা নির্দিষ্ট বয়সে তাঁহাদের শাসনকার্য হইতে অবসর গ্রহণ করিতে হয়। অবসর গ্রহণ করিবার পর তাঁহারা ভরণপোষণের জন্ত ভাতা পান। এই সমস্ত সরকারী কর্মচারীদের বাঁধা নিয়মে দিনের পর দিন কাজ করিতে হয় বলিয়া তাঁহারা অনেক ক্ষেত্রেই ধরাবাঁধা নিয়মের গণ্ডির বাহিরে আর কোন কিছুই করিতে রাজী হন না। সরকারী কার্যে নিযুক্ত বলিয়া তাঁহারা নিজেদের বিশিষ্ট পদমর্যাদাসম্পন্ন বলিয়া মনে করেন ও সেজন্ত সাধারণ লোকের সহিত তাঁহাদের প্রায়ই যোগাযোগ থাকে না। ফলে, সরকারী কর্মচারী হইলেও তাঁহাদের জনগণের প্রতি বিশেষ সহায়ত্বভূতি থাকে না। তাঁহারা এক বিশেষ আমলাতান্ত্রিক মনোবৃত্তিসম্পন্ন হইয়া জনসাধারণ হইতে সকল সময়ে তাঁহাদের পার্থক্য রক্ষা করিতে যত্নবান হন। শাসনকার্যে দীর্ঘস্থায়িত্ব আমলাতান্ত্রিক সরকারের আর একটি প্রধান দোষ। সম্ভব হইলেও ইহারা নিম্নবহির্ভূত কোন কার্য করিতে নারাজ। এইজন্য আমলাতান্ত্রিক সরকার সম্বন্ধে মিল্ বলিয়াছেন যে, এই সরকার অস্বাভাবিক-রূপে নিয়মানুবর্তী ও এই রোগেই ইহার মৃত্যু ঘটে। এই অস্বাভাবিক নিয়মানুবর্তিতার জন্ত অনেক সময় জনস্বার্থও ব্যাহত হয়।

দীর্ঘস্থায়ী ও অত্যধিক পরিমাণে নিয়মানুবর্তী হইলেও আমলাতান্ত্রিক সরকারের কর্মদক্ষতা অস্বীকার করা যায় না। দীর্ঘদিনের সরকারী কার্যের অভিজ্ঞতার ফলে ইহাদের সরকারী কার্যের যোগ্যতা ও কর্মদক্ষতা বৃদ্ধি পায়। জটিল সমস্যাসমূহের সমাধানে এই জাতীয় কর্মচারীরা সিদ্ধহস্ত। অনেক সময় মন্ত্রিপরিষদ, কি আইন-প্রণয়নে আর কি নীতিনির্ধারণে, এই কর্মচারীদের দ্বারা বিশেষভাবে উপকৃত হয়। আমলাতন্ত্রের উপর মন্ত্রি-পরিষদের এই নির্ভরশীলতা অনেক দেশে বিশেষ করিয়া ইংলণ্ডে আমলাতন্ত্রের

ক্ষমতা বৃদ্ধি করিয়াছে। আমলাতন্ত্রের বিশেষ দোষ হইল দায়িত্ববোধের অভাব। সু-শাসন ব্যবস্থার জন্ত সরকারী কর্মচারীদের মধ্যে কর্মদক্ষতা ও দায়িত্ববোধ এই দুইটি গুণ থাকা একান্ত আবশ্যিক। আমলাতন্ত্র কর্মদক্ষ, ইহাতে সন্দেহ নাই, কিন্তু জনগণের সংস্পর্শে আসিয়া সাধারণের স্বার্থসম্পর্কে একটু অবহিত হইলে আমলাতন্ত্র আদর্শ শাসনব্যবস্থা বলিয়া পরিগণিত হইতে পারে। জনসেবার আদর্শে অল্পপ্রাণিত করিয়া আমলাতন্ত্রের গঠন হওয়া বাঞ্ছনীয়।

সংক্ষিপ্তসার

সরকারের শ্রেণীবিভাগ—অ্যারিস্টটল গুণবাচক ভিত্তির উপর সরকারকে স্বাভাবিক ও বিকৃত এই দুই ভাগে ভাগ করিয়াছেন। তাহার পর শাসকের সংখ্যাহুসারে উক্ত দুই শ্রেণীর ছয়টি বিভিন্ন নামকরণ করেন। জনকল্যাণের জন্ত, যে শাসন পরিচালিত হয়, তাহাকে তিনি স্বাভাবিক বলিয়াছিলেন এবং স্বাভাবিক সরকারকে সংখ্যাহুসারে রাজতন্ত্র, অভিজাত-তন্ত্র ও গণতন্ত্র এই তিন আখ্যা দিয়াছিলেন। বিকৃত শ্রেণীকেও সংখ্যাহুসারে তিনটি ভাগ করিয়াছিলেন : যথা—স্বৈরাচার, ধনিকতন্ত্র ও বিকৃত গণতন্ত্র। এই প্রকার শাসনের উদ্দেশ্য হইল শাসকশ্রেণীর স্বার্থ পরিপুষ্ট করা।

বর্তমানকালে নিম্নলিখিত শাসনব্যবস্থাগুলি দেখা যায় :

রাজতন্ত্র—জন্মগত উত্তরাধিকারের উপর প্রতিষ্ঠিত একব্যক্তির শাসনকে রাজতন্ত্র বলা হয়। রাজা নিজ ইচ্ছাহুসারে যখন অবাধে ক্ষমতা পরিচালনা করেন, তখন তাহাকে অসীম ক্ষমতাবিশিষ্ট বা অবাধ রাজতন্ত্র বলা হয়। রাজার ক্ষমতা যখন শাসনতন্ত্র কর্তৃক সীমাবদ্ধ হইয়া শুধু নামসর্বস্ব রাজা হিসাবে অবস্থান করে, তখন তাহাকে নিয়মতান্ত্রিক রাজতন্ত্র বলা হয়।

অভিজাততন্ত্র—স্বল্পসংখ্যক গুণী ও জ্ঞানী লোকের দ্বারা যখন শাসন-ব্যবস্থা পরিচালিত হয়, তখন তাহাকে অভিজাততন্ত্র নাম দেওয়া হয়। প্রকৃত যোগ্য ব্যক্তিদের হস্তে শাসনকার্যের ভার থাকা বাঞ্ছনীয়, কিন্তু প্রকৃত যোগ্য লোক নির্বাচন করা কষ্টসাধ্য।

প্রজাতন্ত্র—রাষ্ট্রের প্রধান যখন রাজার পরিবর্তে একজন নির্বাচিত রাষ্ট্রপতি হইয়া থাকেন, তখন তাহাকে প্রজাতন্ত্র বলা হয়। এই শাসনব্যবস্থায় জনসাধারণের ইচ্ছাই পরোক্ষভাবে কার্যকরী।

গণতন্ত্র—এই শাসনব্যবস্থায় জনগণই হইল শাসনক্ষমতার প্রকৃত অধিকারী। তাহারা প্রত্যক্ষ অথবা পরোক্ষভাবে নির্বাচিত প্রতিনিধিদের মাধ্যমে শাসনকার্য পরিচালনা করে। বর্তমান যুগে রাষ্ট্রগুলি আয়তনে ও লোকসংখ্যায় বৃহৎ বলিয়া প্রত্যক্ষ গণতন্ত্র কার্যকরী করা সম্ভব নয়। সেইজন্য পরোক্ষ গণতন্ত্রের প্রবর্তন হইয়াছে। গণতন্ত্র সফল করিবার জন্য রাজনৈতিক, সামাজিক ও অর্থনৈতিক স্বাধীনতা ও সাম্য অপরিহার্য।

স্বাধীনতা, সাম্য ও মৈত্রীভাব গণতন্ত্রের মূলমন্ত্র। এই শাসনব্যবস্থা ব্যক্তিবিকাশের সর্বশ্রেষ্ঠ সহায়ক। গণতন্ত্র কার্যকরী করিতে হইলে জনসাধারণের মধ্যে শিক্ষা বিস্তার করিয়া তাহাদের দায়িত্ববোধ বৃদ্ধি করা অত্যাৱশ্যক বলিয়া বিবেচিত হয়।

অধুনা গণতন্ত্রকে বিশেষভাবে কার্যকরী করিবার উদ্দেশ্যে পরোক্ষ গণতান্ত্রিক শাসনে গণপ্রস্তাব-অধিকার, গণনির্দেশ, গণভোট প্রভৃতি প্রত্যক্ষ গণতান্ত্রিক ব্যবস্থা অবলম্বিত হইয়াছে।

একনায়কতন্ত্র—প্রথম মহাযুদ্ধের পর গণতন্ত্রের কতকগুলি দুর্বলতার সুযোগ লইয়া একনায়কতন্ত্রের আবির্ভাব হয়। একনায়কতন্ত্রের বৈশিষ্ট্য হইল যে, অল্প দলগুলিকে বলপ্রয়োগে নিয়ূল করিয়া একটি মাত্র দল শাসনক্ষমতা হস্তগত করে। এই দলের নেতাই হইলেন সর্বশক্তিমান পুরুষ, যাহার নির্দেশে সমস্ত শাসনকার্য পরিচালিত হয়। নেতার পশ্চাতে দলের সমর্থন থাকে। প্রথম মহাযুদ্ধের পর ইতালী, জার্মানী ও রুশিয়ায় একনায়কতন্ত্র প্রতিষ্ঠিত হয়। একনায়কতন্ত্র সমগ্র সামাজিক, রাজনৈতিক ও অর্থনৈতিক ব্যবস্থার উপর কর্তৃত্ব স্থাপন করিয়া দেশের সর্বাঙ্গীণ উন্নতি সাধন করিতে সক্ষম হয়। কিন্তু আংশিকভাবে কার্যকরী হইলেও বলপ্রয়োগনীতির উপর প্রতিষ্ঠিত বলিয়া এই শাসনব্যবস্থা স্থায়ী হইতে পারে না।

আমলাতন্ত্র—প্রতিযোগিতামূলক পরীক্ষাধারা দ্বিরীকৃত যোগ্যতাসম্পন্ন স্থায়ী কর্মচারী লইয়া আমলাতন্ত্র গঠিত হয়। জনসাধারণের সহিত বিশেষ কোন সংযোগ না থাকার দরুণ এই কর্মচারিবৃন্দ আমলাতান্ত্রিক মনোবৃত্তি-

সম্পন্ন হইয়া উঠেন। ইঁহারা অত্যধিক পরিমাণে ধরাবাঁধা নিয়মের দাস হইয়া পড়েন, সেজন্য সরকারী কার্য সম্পাদনে বিলম্ব অনিবার্য। আমলা-তান্ত্রিক সরকার সাধারণতঃ স্বদক্ষ হয়, কিন্তু ইঁহাদের মধ্যে জনসাধারণের প্রতি সহানুভূতির একান্ত অভাব পরিলক্ষিত হয়।

প্রশ্নাবলী

1. Estimate the strength and weakness of modern democracy as a form of Government. (C. U. 1949)
2. Discuss the aims and ideals of totalitarian states. How far do these ideals differ from those of democratic states? (C. U. 1944)
3. Distinguish between direct and indirect democracy. Do you think that democracy will survive?
4. How would you classify forms of government? (C. U. 1951)
5. What conditions are required for the successful operation of democracy? Indicate the merits and defects of such a form of government. (C. U. 1955)
6. Distinguish between Democracy and Dictatorship. Can democracy function in a one-party state? Give reasons for your answer. (C. U. 1960)
7. Distinguish democracy from dictatorship and point out the conditions essential to the success of democracy. (C. U. B. A. Part I, 1962)
8. Discuss the merits and defects of dictatorship. (C. U. Part I, 1965)
9. Distinguish between Democracy and Dictatorship. Which of them would you prefer and why? (C. U. 1969)

যুক্তরাষ্ট্রীয় শাসনব্যবস্থা

এককেন্দ্রীয় ও যুক্তরাষ্ট্রীয় শাসনব্যবস্থা (Unitary and Federal Governments)

শাসনব্যবস্থায় সরকারের ক্ষমতাসমূহ যদি একটিমাত্র উচ্চতম কর্তৃপক্ষের হস্তে কেন্দ্রীভূত হয়, তাহা হইলে তাহাকে এককেন্দ্রীয় শাসনব্যবস্থা বলা হয়। অপরপক্ষে সরকারের ক্ষমতাসমূহ যদি বিভক্ত হইয়া একাধিক কর্তৃপক্ষের দ্বারা পরিচালিত হয়, তাহা হইলে তাহাকে যুক্তরাষ্ট্রীয় শাসনব্যবস্থা বলা হয়। এককেন্দ্রীয় ও যুক্তরাষ্ট্রীয় শাসনব্যবস্থার মধ্যে নিম্নলিখিত পার্থক্যগুলি দেখা যায় :—

১। এককেন্দ্রীয় শাসনব্যবস্থার বৈশিষ্ট্য হইল সরকারের ক্ষমতাসমূহের কোনরূপ ভাগ করা হয় না। সমুদয় ক্ষমতাই কেন্দ্রীয় সরকারের হস্তে গ্ৰস্ত থাকে। শাসনকার্যে সুবিধার জ্ঞে সমগ্র দেশটি কতকগুলি প্রাদেশিক সরকারে ভাগ করা হয়। কিন্তু এই প্রাদেশিক বা স্থানীয় সরকারগুলির কেন্দ্রীয় সরকার-নিরপেক্ষ কোন স্বতন্ত্র অধিকার বা দায়িত্ব কিছু থাকে না। কেন্দ্রীয় সরকারের নির্দেশ অনুসারে ইহারা কার্য পরিচালনা করে। কেন্দ্রীয় সরকার ইচ্ছা করিলে স্থানীয় সরকারগুলিকে ক্ষমতাচ্যুত করিতে পারে। ইংলণ্ড, ফ্রান্স এবং ১৯৩৫ সালের পূর্বে ভারত শাসনব্যবস্থা ইহার প্রকৃষ্ট উদাহরণ।

যুক্তরাষ্ট্রীয় শাসনব্যবস্থায় সরকারের সমুদয় ক্ষমতা দুই ভাগে ভাগ করা হয়। সমগ্র দেশটিকে কতকগুলি প্রদেশ বা রাজ্যে বিভক্ত করিয়া তাহাদের হস্তে কতকগুলি নির্ধারিত বিষয়ের উপর স্বাধীন ক্ষমতা অর্পিত হয়। দেশের সর্বত্র সমানভাবে প্রযোজ্য বিষয়গুলি পরিচালনা করিবার ক্ষমতা যুক্তরাষ্ট্রীয় বা কেন্দ্রীয় সরকারের হস্তে গ্ৰস্ত থাকে। অপর পক্ষে, স্থানীয় স্বার্থ-সংক্রান্ত বিষয়গুলি পরিচালনা করিবার ভার থাকে স্থানীয় বা আঞ্চলিক সরকার-গুলির হস্তে। যুক্তরাষ্ট্রের স্থানীয় সরকারগুলি স্থানীয় স্বার্থ-সংক্রান্ত বিষয়-গুলির উপর অবাধ কর্তৃত্ব করিতে পারে। স্থানীয় স্বার্থ-সংক্রান্ত বিষয়গুলির

শাসনব্যাপারে কেন্দ্রীয় সরকার সাধারণতঃ কোনরূপ হস্তক্ষেপ করে না। সুতরাং যুক্তরাষ্ট্রীয় শাসনব্যবস্থায় দুইটি সমক্ষমতাবিশিষ্ট সরকারের অস্তিত্ব বিদ্যমান। যুক্তরাষ্ট্রের স্থানীয় বা আঞ্চলিক সরকারগুলি এককেন্দ্রীয় শাসনব্যবস্থার স্থানীয় সরকারগুলির মত কেন্দ্রীয় সরকারের ইচ্ছাধীন প্রতিনিধি মাত্র নয়। ইহাদের নিজস্ব কেন্দ্রীয় সরকার-নিরপেক্ষ ক্ষমতা থাকে।

২। এককেন্দ্রীয় শাসনব্যবস্থায় কেন্দ্রীয় সরকারই হইল সর্বসর্বা—সমস্ত ক্ষমতার অধিকারী। স্থানীয় বা প্রাদেশিক সরকারগুলির কোন নিজস্ব ক্ষমতা নাই। -কিন্তু যুক্তরাষ্ট্রীয় শাসনব্যবস্থায় কেন্দ্রীয় সরকারের কোন প্রাধান্ত দেওয়া হয় না। কেন্দ্রীয় সরকার ও প্রাদেশিক সরকারগুলি—উভয়েই শাসনতন্ত্র কর্তৃক সৃষ্ট হয় এবং শাসনতন্ত্রই কেন্দ্রীয় সরকার ও প্রাদেশিক সরকারগুলির মধ্যে ক্ষমতা বণ্টন করিয়া দেয়। সুতরাং যুক্তরাষ্ট্রীয় শাসনব্যবস্থায় শাসনতন্ত্রের প্রাধান্ত পরিলক্ষিত হয়।

৩। এককেন্দ্রীয় রাষ্ট্রের শাসনতন্ত্র লিখিত বা অলিখিত, নমনীয় বা অনমনীয় হইতে পারে, কিন্তু যুক্তরাষ্ট্রীয় শাসনতন্ত্র সর্বদা লিখিত ও অনমনীয় হয়।

৪। যুক্তরাষ্ট্রীয় শাসনতন্ত্রই হইল উভয়বিধ সরকারের ক্ষমতার উৎস। সেইজন্য সকল যুক্তরাষ্ট্রেই শাসনতন্ত্রের প্রাধান্ত পরিলক্ষিত হয়। শাসনতন্ত্রের প্রাধান্ত অটুট রাখিবার নিমিত্ত প্রত্যেক যুক্তরাষ্ট্রীয় শাসনব্যবস্থায় একটি যুক্তরাষ্ট্রীয় উচ্চ বিচারালয় অপরিহার্য বলিয়া পরিগণিত হয়। এই বিচারালয়ের সিদ্ধান্ত দ্বারা শাসনতন্ত্র-সংক্রান্ত সর্ববিধ মতভেদের নিষ্পত্তি হয়। এককেন্দ্রীয় শাসনব্যবস্থায় এইরূপ ক্ষমতাসম্পন্ন কোন উচ্চ বিচারালয়ের প্রয়োজন অনুভূত হয় না।

যুক্তরাষ্ট্রের বিশেষত্ব (Marks or Characteristics of a Federal Government)

যুক্তরাষ্ট্রীয় শাসনব্যবস্থায় কতকগুলি বৈশিষ্ট্য পরিলক্ষিত হয়। এই বৈশিষ্ট্যগুলির দ্বারা ইহাকে এককেন্দ্রীয় সরকার হইতে সহজে পৃথক করা যায়। ডাঃ ফাইনার যুক্তরাষ্ট্রের নিম্নলিখিত বৈশিষ্ট্যগুলি উল্লেখ করিয়াছেন :—

১। একসঙ্গে কেন্দ্রীয় সরকার ও আঞ্চলিক সরকারগুলির সহ-অবস্থান (Co-existence of two Governments)

যুক্তরাষ্ট্রীয় শাসনব্যবস্থায় দেশের সর্বত্র সমানভাবে প্রযোজ্য বিষয়গুলির শাসনকার্য পরিচালনা করিবার জন্য একটি কেন্দ্রীয় বা জাতীয় সরকার থাকে আর স্থানীয় স্বার্থ-সংক্রান্ত বিষয়গুলির শাসন-পরিচালনার জন্য কর্তৃকগুলি স্থানীয় সরকার থাকে। উভয় সরকারই শাসনতন্ত্র হইতে তাহাদের ক্ষমতা প্রাপ্ত হয় ও শাসনতন্ত্র কর্তৃক নির্ধারিত বিষয়গুলির উপর পরস্পরের প্রভাব-মুক্ত হইয়া উহার শাসনক্ষমতা প্রয়োগ করে। কিন্তু এককেন্দ্রীয় শাসনব্যবস্থায় স্থানীয় সরকারগুলি সর্ববিষয়ে কেন্দ্রীয় সরকারের কর্তৃত্বাধীন থাকে।

২। সরকারের ক্ষমতাসমূহের বিভাগ ও বণ্টন (Division and Distribution of Powers)

যুক্তরাষ্ট্রীয় শাসনব্যবস্থায় সরকারের সমুদয় ক্ষমতা ভাগ করিয়া একটা নির্দিষ্ট নীতি অনুযায়ী কেন্দ্রীয় সরকার ও আঞ্চলিক সরকারগুলির মধ্যে বণ্টন করা হয়। সাধারণতঃ জাতীয় স্বার্থসংশ্লিষ্ট বিষয়গুলির কর্তৃত্ব কেন্দ্রীয় সরকারের হস্তে লুপ্ত হয়, আর স্থানীয় স্বার্থসংশ্লিষ্ট বিষয়গুলির ভার দেওয়া হয় আঞ্চলিক সরকারগুলির উপর। উভয় সরকারই তাহাদের নির্ধারিত এলাকায় পরস্পরের প্রভাব-মুক্ত হইয়া স্বাধীনভাবে শাসনকার্য পরিচালনা করে।

৩। লিখিত ও অনমনীয় শাসনতন্ত্রের প্রাধান্য (Supremacy of the Constitution which is Written and Rigid)

যুক্তরাষ্ট্রীয় শাসনব্যবস্থায় ক্ষমতা বিভক্ত হইয়া কেন্দ্রীয় সরকার ও আঞ্চলিক সরকারগুলির মধ্যে বণ্টিত হয়। এই বণ্টনকার্য শাসনতন্ত্র দ্বারা সম্পাদিত হয়। সুতরাং উভয় সরকারের ক্ষমতার উৎস বলিয়া যুক্তরাষ্ট্রে শাসনতন্ত্রের প্রাধান্য স্বীকৃত হয়। ভবিষ্যতে ক্ষমতার ভাগ লইয়া ঘাহাতে উভয় সরকারের মধ্যে কোনরূপ মতভেদ বা কলহ সৃষ্টি না হয়, সেজন্য ক্ষমতার বিভাগ সুস্পষ্টভাবে শাসনতন্ত্রে লিখিত থাকে। অলিখিত শাসনতন্ত্র অস্পষ্ট, অনির্দিষ্ট ও পরিবর্তনশীল বলিয়া অনেক সময় শাসনব্যাপারে

নানাবিধ জটিলতার সৃষ্টি হয়। যুক্তরাষ্ট্রীয় শাসনব্যবস্থায় সাহায্যে কেন্দ্রীয় সরকার ও আঞ্চলিক সরকারগুলি নিজ নিজ এলাকায় স্বাধীনভাবে তাহাদের কার্যকলাপ পরিচালিত করিতে পারে, একের ক্ষমতা সাহায্যে অন্যের দ্বারা নষ্ট না হয়, সেজন্য শাসনতন্ত্র সুস্পষ্টভাবে উভয় সরকারের ক্ষমতার সীমারেখা স্থির করিয়া দেয়। সেইজন্য যুক্তরাষ্ট্রে লিখিত শাসনতন্ত্র অপরিহার্য বলিয়া পরিগণিত হয়।

যুক্তরাষ্ট্রীয় শাসনতন্ত্র শুধু লিখিত হইলেই হয় না, এই শাসনতন্ত্র অনমনীয় হওয়াও একান্ত আবশ্যিক। সহজ-পরিবর্তনীয় হইলে উভয় সরকার বিশেষ করিয়া কেন্দ্রীয় সরকার তাহার শ্রেষ্ঠতর ক্ষমতার বলে নিজ ইচ্ছা ও সুবিধা অনুসারে যে-কোন সময়ে নির্ধারিত ক্ষমতাবন্টনের পরিবর্তন করিতে পারে। যদি শাসনতন্ত্রের পরিবর্তন একান্তই প্রয়োজন হয়, তাহা হইলে নিয়মতান্ত্রিক পদ্ধতি ভিন্ন একটি সরকারের ইচ্ছা অনুসারে ইহার পরিবর্তন বাঞ্ছনীয় নয়।

৪। নিরপেক্ষ ও স্বাধীন উচ্চ বিচারালয়ের অবস্থিতি (Existence of an independent and impartial Supreme Court)

শাসনতন্ত্রের প্রাধান্য হইল যুক্তরাষ্ট্রের একটা প্রধান বিশেষত্ব। শাসনতন্ত্রের এই প্রাধান্য রক্ষা করিবার জন্য সকল যুক্তরাষ্ট্রেরই একটি উচ্চ বিচারালয় অপরিহার্য। কেন্দ্রীয় সরকার ও আঞ্চলিক সরকারগুলির শাসনতন্ত্র নির্ধারিত পারস্পরিক সম্পর্ক সাহায্যে কোনক্রমে ব্যাহত না হয়, সেজন্য উচ্চ আদালত শাসনতান্ত্রিক আইনসমূহের ব্যাখ্যা ও বিশ্লেষণ করিয়া শাসনতন্ত্রের প্রাধান্য রক্ষা করে। অপরপক্ষে, শাসন-বিভাগ ও আইন-বিভাগ শাসনতন্ত্রবিরোধী কার্যকলাপ দ্বারা সাহায্যে ব্যক্তি-স্বাধীনতা ক্ষুণ্ণ করিতে না পারে, সেজন্য উচ্চ আদালত শাসন-বিভাগ ও আইন-বিভাগের নির্দেশগুলিকে অনেক সময় বে-আইনী বলিয়া বাতিল করিতে পারে। এক কথায় উচ্চ আদালতকে শাসনতন্ত্রের রক্ষক বলিয়া অভিহিত করা সাহায্যে পারে।

৫। দ্বিগণিকত্ব (Double citizenship)

যুক্তরাষ্ট্রে নাগরিকদের কেন্দ্রীয় ও আঞ্চলিক উভয় সরকারেরই আত্মগত্যা স্বাকার করিতে হয়। যুক্তরাষ্ট্রে নাগরিকগণের দ্বিবিধ আইন মাঞ্জ করিতে

হয়। যে যে বিষয়গুলি কেন্দ্রীয় সরকারের অধীনে থাকে, সেই সেই বিষয়-গুলির জন্য প্রত্যক্ষভাবে তাহাদের কেন্দ্রীয় সরকারের আনুগত্য ও বশত্ব স্বীকার করিতে হয় ও স্থানীয় ব্যাপারগুলির জন্য নাগরিকগণ যে প্রদেশের অধিবাসী, সেই প্রাদেশিক সরকারের আইন মানিতে বাধ্য থাকে। শাসন-তত্ত্বের বিধান অনুযায়ী ভারতের অধিবাসীদের শুধু একমাগরিকত্ব স্বীকৃত হইয়াছে। ভারতের নাগরিক ব্যতীত তাহাদের স্বতন্ত্র কোন প্রাদেশিক নাগরিকত্ব নাই।

৬। রাজস্বের বণ্টন-ব্যবস্থা (Separate allocation of revenues)

যুক্তরাষ্ট্রের আঞ্চলিক সরকারগুলি সাধারণতঃ স্থানীয় ব্যাপারে কেন্দ্রীয় সরকার-নিরপেক্ষ হইয়া স্বাধীনভাবে শাসনকার্য পরিচালনা করে অর্থাৎ স্থানীয় স্বার্থসংশ্লিষ্ট ব্যাপারে তাহারা স্বায়ত্তশাসনশীল সরকার বলিয়া পরিগণিত হয়। সেইজন্য ক্ষমতাবণ্টনের সঙ্গে রাজস্বও বণ্টন করিয়া দেওয়া হয়। আঞ্চলিক সরকারগুলি তাহাদের নির্ধারিত রাজস্ব দ্বারা নিজেদের শাসনকার্যের ব্যয় নির্বাহ করে।

৭। আনুগত্য ও ব্যবচ্ছেদ (Allegiance and Secession)

আঞ্চলিক সরকারসমূহের সম্মিলিত ইচ্ছা ও সহযোগিতার ভিত্তির উপর যুক্তরাষ্ট্র প্রতিষ্ঠিত। যুক্তরাষ্ট্র একটি মাত্র সার্বভৌম ক্ষমতাবিশিষ্ট রাষ্ট্র বলিয়া বিবেচিত হয়। আঞ্চলিক সরকারগুলির নিজ নিজ সীমার মধ্যে স্বাধীনভাবে কার্য করিবার অধিকার থাকিলেও তাহারা স্বতন্ত্র রাষ্ট্র বলিয়া স্বীকৃত হয় না। সুতরাং প্রত্যেক আঞ্চলিক সরকারকেই মূল রাষ্ট্রের আনুগত্য স্বীকার করিতে হয়। আঞ্চলিক সরকারগুলি যে সার্বভৌম রাষ্ট্রের শুধু আনুগত্য স্বীকার করে তাহা নয়, কোন আঞ্চলিক সরকারই যুক্তরাষ্ট্র হইতে সম্পর্ক ছেদ করিয়া স্বাধীন রাষ্ট্র প্রতিষ্ঠা করিতে পারে না। কোন আঞ্চলিক সরকারের এই দাবী স্বীকৃত হইতে পারে না। কেন্দ্রীয় সরকার বলপ্রয়োগে আঞ্চলিক সরকারের এই প্রচেষ্টা দমন করিতে পারে। আমেরিকা যুক্তরাষ্ট্রে ও সুইজারল্যান্ডে আঞ্চলিক সরকারের এইরূপ বিচ্ছিন্ন হইবার প্রচেষ্টা বল-প্রয়োগে দমন করা হয়। একমাত্র সোভিয়েত যুক্তরাষ্ট্রের শাসনতন্ত্রে

আঞ্চলিক সরকারগুলির বিচ্ছিন্ন হইয়া স্বাধীন রাষ্ট্র গঠন করিবার অধিকার স্বীকৃত হইয়াছে।

সুতরাং যুক্তরাষ্ট্রীয় শাসনব্যবস্থা সম্পর্কে নিম্নলিখিত বিষয়গুলি স্মরণ রাখিতে হইবে।

১। অবিমিশ্র ঐক্য হইল এককেন্দ্রীয় রাষ্ট্রের লক্ষণীয় বৈশিষ্ট্য। কিন্তু যুক্তরাষ্ট্রীয় ব্যবস্থায় একাধিক রাষ্ট্র মিলিত হইয়া যে ঐক্যবদ্ধ রাষ্ট্র গঠন করে সেই নবগঠিত রাষ্ট্রে অবিমিশ্র ঐক্য বা সমরূপতা থাকে না। এককেন্দ্রীয় রাষ্ট্রের সর্বত্র একই আইন ও একই শাসনব্যবস্থা প্রবর্তিত থাকে। কিন্তু যুক্তরাষ্ট্রীয় ব্যবস্থায় কতিপয় বিষয়ে সমরূপতা থাকিলেও অনেক বিষয়ে আঞ্চলিক রাজ্যগুলির মধ্যে পার্থক্য দেখা যায়।

২। যে সমস্ত রাষ্ট্র যুক্তরাষ্ট্রে যোগদান করে, যুক্তরাষ্ট্র গঠিত হইলেই সেই সমুদয় আঞ্চলিক রাষ্ট্রের স্বাধীন সত্তা লোপ পাইয়া তাহার নবগঠিত স্বাধীন সার্বভৌম রাষ্ট্রের অবিচ্ছেদ্য অংশরূপে পরিগণিত হয়।

৩। যুক্তরাষ্ট্রীয় ব্যবস্থায় দুই জাতীয় শাসনব্যবস্থার অস্তিত্ব দেখা যায়। একদিকে কেন্দ্রীয় বা জাতীয় সরকার, অপরদিকে রাজ্যসরকারগুলি নির্ধারিত ক্ষেত্রে স্ব স্ব শাসনকার্য পরিচালনা করে।

৪। যুক্তরাষ্ট্রীয় ব্যবস্থায় জাতীয় স্বার্থ-সংশ্লিষ্ট সাধারণ ব্যাপারগুলির শাসনভার কেন্দ্রীয় সরকারের উপর গুরুত্ব থাকে, আর স্থানীয় স্বার্থ-সংশ্লিষ্ট ব্যাপারগুলির শাসন রাজ্যসরকার কর্তৃক পরিচালিত হয়।

৫। যুক্তরাষ্ট্রীয় শাসনব্যবস্থা প্রাকৃতিক বিবর্তনে আপনা হইতে গড়িয়া উঠে না, প্রয়োজনমত মানুষ ইহা সৃষ্টি করে। সুতরাং ইহার গঠনতন্ত্র লিখিত থাকে।

৬। শাসনতন্ত্র কর্তৃক উভয় সরকারের ক্ষমতাই ভাগ করিয়া দেওয়া হয় এবং শাসনতন্ত্র কর্তৃক নির্ধারিত গণ্ডির মধ্যে কেন্দ্রীয় ও রাজ্য সরকার-গুলির ক্ষমতা প্রয়োগ সীমাবদ্ধ রাখিতে হয়। কোন সরকারই নির্ধারিত পদ্ধতির সাহায্যে শাসনতন্ত্রের পরিবর্তন ব্যতীত নিজ ইচ্ছানুযায়ী অঙ্গের ক্ষমতার উপর হস্তক্ষেপ করিতে পারে না।

৭। শাসনতন্ত্রের সংশোধনপদ্ধতি শাসনতন্ত্রে বিধিবদ্ধ করা থাকে। এই কারণে যুক্তরাষ্ট্রে শাসনতন্ত্রের প্রাধান্য পরিলক্ষিত হয় এবং যুক্তরাষ্ট্রে

শাসনতন্ত্র সংশোধন করিবার ক্ষমতার অধিকারী কর্তৃপক্ষ সার্বভৌম ক্ষমতার
আধার বলিয়া পরিগণিত হয়।

৮। যুক্তরাষ্ট্র হইল আঞ্চলিক রাজ্যগুলির একটি স্থায়ী সমবায়। সন্ধি-
সমবায় বা সন্ধিবন্ধন রাষ্ট্রগুলির মত অস্থায়ী নহে।

যুক্তরাষ্ট্রীয় গঠনপ্রণালী (Formation of Federation)

দুইটি ভিন্ন পদ্ধতিতে যুক্তরাষ্ট্রের উদ্ভব হয়। অনেক সময়ে কয়েকটি
স্বাধীন রাষ্ট্র শাসনকার্যের সুবিধার জন্ত অথবা বৈদেশিক আক্রমণ হইতে
নিজেদের রক্ষা করিবার নিমিত্ত সর্বসম্মতিক্রমে একটি কেন্দ্রীয় সরকার গঠন
করে। নবগঠিত কেন্দ্রীয় সরকারের হস্তে তাহারা সুনির্দিষ্ট ক্ষমতা অর্পণ
করিয়া অবশিষ্ট ক্ষমতাগুলি (Residuary Powers) আঞ্চলিক সরকার-
গুলির কর্তৃত্বাধীনে রাখে। এইরূপে বহু রাষ্ট্রের স্থলে একটি মাত্র জাতি-
সমন্বিত একটি যুক্তরাষ্ট্রের উদ্ভব হয়। এই পদ্ধতিকে কেন্দ্রীকরণ পদ্ধতি
(Process of Centralisation) বলা হয়। মার্কিন যুক্তরাষ্ট্র এই পদ্ধতিতে
গঠিত হইয়াছে। আদি তেরটি উপনিবেশ কতকগুলি বিষয়ে তাহাদের
স্বাভাব্য পরিত্যাগ করিয়া একটি যুক্তরাষ্ট্রের অবিচ্ছেদ্য অংশে পরিণত
হইয়াছিল।

দ্বিতীয়তঃ, কোন কোন ক্ষেত্রে দেখা যায় যে, একটি এককেন্দ্রীয় শাসন-
ব্যবস্থাকে কতকগুলি আঞ্চলিক শাসনব্যবস্থায় পরিবর্তিত করিয়া সরকারের
সমুদয় ক্ষমতা কেন্দ্রীয় সরকার ও নবগঠিত আঞ্চলিক বা প্রাদেশিক সরকার-
গুলির মধ্যে ভাগ করিয়া দিয়া একটি যুক্তরাষ্ট্র গঠিত হইতে পারে। এই
জাতীয় যুক্তরাষ্ট্রে প্রাদেশিক সরকারগুলির ক্ষমতা সাধারণতঃ নির্ধারিত
করিয়া দেওয়া হয়; অবশিষ্ট ক্ষমতাগুলি কেন্দ্রীয় সরকারের হস্তে থাকে।
এই পদ্ধতিকে বিকেন্দ্রীকরণ পদ্ধতি (Process of Decentralisation)
বলা হয়। ক্যানাডার যুক্তরাষ্ট্র এইভাবে গঠিত হয়। কানাডায় একটি এক-
কেন্দ্রীয় শাসনব্যবস্থা প্রবর্তিত ছিল। এই এককেন্দ্রীয় সরকারকে নয়টি
পৃথক প্রাদেশিক সরকারে ভাগ করিয়া কতকগুলি নির্দিষ্ট বিষয়ের শাসন-
পরিচালনা করিবার ভার তাহাদের হস্তে লভ হয়। অবশিষ্ট সমুদয় ক্ষমতার
অধিকারী করা হয় কেন্দ্রীয় সরকারকে। সুতরাং যুক্তরাষ্ট্রগুলিকে প্রধানতঃ

দুই ভাগে ভাগ করা যায়। যে সমস্ত যুক্তরাষ্ট্র মার্কিন যুক্তরাষ্ট্রীয় পদ্ধতিতে গঠিত হইয়াছে সেখানে বিকেন্দ্রীভাবের প্রাবল্য দেখা যায় এবং এইজন্য সেখানকার কেন্দ্রীয় সরকারের ক্ষমতাগুলির নির্দিষ্ট গণ্ডি হ্রাস করিয়া আঞ্চলিক সরকারগুলির প্রাধান্য বজায় রাখিবার চেষ্টা করা হয়। আবার ক্যানাডা যুক্তরাষ্ট্রের পদ্ধতিতে গঠিত যুক্তরাষ্ট্রগুলি কেন্দ্রীভাবের প্রাবল্য পন্নিলক্ষিত হয়। এই জাতীয় যুক্তরাষ্ট্রে প্রাদেশিক সরকারগুলির ক্ষমতা সীমাবদ্ধ করিয়া দিয়া কেন্দ্রীয় সরকারের প্রাধান্য বজায় রাখা হয়। ভারত প্রভৃতি কয়েকটি যুক্তরাষ্ট্র এই উভয় পদ্ধতির সংমিশ্রণে গঠিত হইয়াছে।

যুক্তরাষ্ট্র-ব্যবস্থার সাফল্যের উপায় (Conditions essential to the success of a Federal Union)

যে পদ্ধতিতেই গঠিত হউক না কেন, যুক্তরাষ্ট্র-ব্যবস্থায় দুইটি বিপরীতমুখী ভাবের সমন্বয় দেখা যায়। একটি হইল কেন্দ্রীভাব (Centripetal tendency), অপরটি হইল বিকেন্দ্রীভাব (Centrifugal tendency)। একটিতে যুক্তরাষ্ট্রের অংশগুলিকে পরস্পরের প্রতি আকৃষ্ট করিয়া একটি সংঘবদ্ধ জাতিতে পরিণত করে, অপরটিতে তাহাদের মধ্যে স্বাভাবিকবোধ জীবিত রাখিতে চেষ্টা করে। পরস্পর-বিরোধী এই দুইটি শক্তির প্রকৃত সমন্বয় সাধন করিতে পারিলে যুক্তরাষ্ট্র-ব্যবস্থা স্থায়িত্ব লাভ করিতে পারে। যুক্তরাষ্ট্রের স্থায়িত্ব ও সাফল্যের জন্য কতকগুলি বাহ্যিক পরিবেশ ও আভ্যন্তরীণ ব্যবস্থা অপরিহার্য বলিয়া পরিগণিত হয়।

প্রথমতঃ, যুক্তরাষ্ট্রের সাফল্যের জন্য যুক্তরাষ্ট্রের বিভিন্ন অংশগুলির মধ্যে ভৌগোলিক ঐক্য (Geographical contiguity) থাকা একান্ত আবশ্যক। ভৌগোলিক নৈকট্যের অবর্তমানে বিভিন্ন অঞ্চলের প্রতিরক্ষা ব্যবস্থা সূদৃঢ় হইতে পারে না। এতদ্ব্যতীত যুক্তরাষ্ট্রের বিভিন্ন অংশগুলি দূরত্বের দ্বারা যদি বিচ্ছিন্ন হয় তাহা হইলে তাহাদের মধ্যে কোন ভাবের আদান-প্রদান হইতে পারে না। ফলে জাতীয়তাবোধ বাধাপ্রাপ্ত হয়। অংশগুলি বিচ্ছিন্ন থাকিলে কেন্দ্রীয় সরকারের রাষ্ট্রধানী-নির্বাচন-ব্যাপারেও যথেষ্ট অসুবিধা হয়। এক অঞ্চলের লোক দূরত্বের জন্য অপর অঞ্চলে গিয়া, জাতীয় ব্যাপারে সক্রিয় অংশ গ্রহণ করিতে পারে না। নবগঠিত পাকিস্তান,

রাষ্ট্রে এই অস্থিবিধা বিশেষভাবে পরিলক্ষিত হয়। এই রাষ্ট্রের পূর্ব-অঞ্চল রাজধানী-সমন্বিত পশ্চিম পাকিস্তান হইতে সহস্র মাইল ব্যবধানে অবস্থিত। এইজন্য ভৌগোলিক নৈকট্যের অভাবে শাসনব্যবস্থার নানাবিধ জটিল সমস্যা দেখা গিয়াছে।

দ্বিতীয়তঃ, যুক্তরাষ্ট্রের সাফল্য নির্ভর করে ইহার বিভিন্ন অঞ্চলের অধিবাসীদের মধ্যে জাতীয়তাবোধের উপর। বিভিন্ন অঞ্চলের অধিবাসিগণ ভাষা, ধর্ম বা সংস্কৃতির ঐক্য সত্ত্বেও জাতীয়তাবোধ দ্বারা যদি অস্থপ্রাণিত না হয়, তাহা হইলে যুক্তরাষ্ট্রের অস্তিত্ব বিপন্ন হয়।

তৃতীয়তঃ, এই জাতীয়তাবোধ নির্ভর করে কুলগত, ভাষাগত, ধর্মগত বা ভাবগত ঐক্যের উপর। সুতরাং উপরি-উক্ত ঐক্যগুলি বিশেষ করিয়া ভাবগত ঐক্য যুক্তরাষ্ট্রগঠনে একটি অপরিহার্য উপাদান বলিয়া পরিগণিত হয়।

চতুর্থতঃ, যুক্তরাষ্ট্রের স্থায়িত্বের জন্য বিভিন্ন অঞ্চল বা প্রদেশগুলির মধ্যে আয়তনের, সম্পদের ও বিশেষ করিয়া রাজনৈতিক অধিকারের সমতা থাকা একান্ত অপরিহার্য বলিয়া পরিগণিত হয়। আয়তন ও সম্পদের সমতা সব সময়ে কার্যকরী করা সম্ভব হয় না, কিন্তু প্রদেশগুলির মধ্যে রাজনৈতিক সমতা (Political equality) বা অন্ততঃপক্ষে আস্থপাতিক সমতা রক্ষা করা অত্যন্ত আবশ্যিক। প্রদেশগুলি আয়তনে ও লোকসংখ্যায়, ক্ষুদ্র হউক, আর বৃহৎ হউক, জাতীয় ব্যাপারে তাহাদের সমান অধিকার থাকা চাই। এই সমতার অভাব হইলে একাধিক বৃহৎ প্রদেশ সম্মিলিত হইয়া ক্ষুদ্র ক্ষুদ্র প্রদেশগুলির উপর কতৃৎ স্থাপন করিতে পারে। প্রথম বিশ্বযুদ্ধের পূর্বে জার্মান যুক্তরাষ্ট্রে এই রাজনৈতিক সমতার অভাব বিশেষভাবে পরিলক্ষিত হয়। সর্বাপেক্ষা বৃহৎ প্রদেশ প্রুসিয়া ভোটাধিক্যের বলে সমগ্র জার্মান দেশে স্বীয় আধিপত্য স্থাপন করিতে সমর্থ হয়। সমতার অভাবেই জার্মান যুক্তরাষ্ট্র স্থায়িত্ব লাভ করিতে পারে নাই। মার্কিন যুক্তরাষ্ট্রে ও কানাডায় প্রত্যেকটি আঞ্চলিক সরকারকে জাতীয় রাজনৈতিক ব্যাপারে সমান অধিকার দেওয়া হইয়াছে। মার্কিন যুক্তরাষ্ট্রে আয়তন, সম্পদ বা জনসংখ্যা নির্বিচারে প্রত্যেকটি প্রদেশ জাতীয় মহাসভা কংগ্রেসের উচ্চপরিষদ সিনেট সভায় দুইজন করিয়া প্রতিনিধি নির্বাচন করিতে পারে। কানাডার সিনেট সভা প্রত্যেক প্রদেশ হইতে ছয়জন প্রতিনিধি লইয়া গঠিত। কোন প্রাদেশিক সরকারকেই,

সংখ্যাধিক্যের বলে অন্তান্ত অংশ অপেক্ষা অধিক প্রভাবশালী করা যুক্তরাষ্ট্রের সাফল্যের প্রধান অন্তরায়।

পঞ্চমতঃ, একটি উচ্চতর আদর্শের দ্বারা অনুপ্রাণিত হইয়া যুক্তরাষ্ট্রের সৃষ্টি হয়। এই আদর্শ হইল ঐক্যবদ্ধ জাতিগঠন। জাতীয়তাবোধ ও আঞ্চলিক স্বাতন্ত্র্যবোধের সমন্বয়ে যুক্তরাষ্ট্র গঠিত হয়। এই দুইটি পরস্পর-বিরোধী মনোভাবের মধ্যে বাহাতে সংঘর্ষ না হয়, সেজন্য জনগণের মধ্যে উপযুক্ত রাজনৈতিক শিক্ষা ও সহনশীলতা থাকা চাই। যুক্তরাষ্ট্রের শাসন-ব্যবস্থা জটিল ও নানা সমস্তাপূর্ণ। নাগরিকগণেরও যুগপৎ কেন্দ্রীয় সরকার ও আঞ্চলিক সরকারের আনুগত্য স্বীকার করিতে হয়। সুতরাং যুক্তরাষ্ট্রের সাফল্য যে অনেক পরিমাণে নাগরিকদের শিক্ষা, কর্মদক্ষতা ও রাজনৈতিক চেতনার উপর নির্ভর করে, ইহা অস্বীকার করা যায় না।

যুক্তরাষ্ট্রের সাফল্যের উপাদানগুলি কি ভারতে বর্তমান (Are those conditions present in india ?)

এই সম্পর্কে স্বভাবতঃই মনে প্রশ্ন জাগিতে পারে যে, ভারতীয় যুক্তরাষ্ট্রে যুক্তরাষ্ট্রের সাফল্যের উপাদানগুলি কি বর্তমান আছে? ১৯৫৬ সালের রাজ্য পুনর্গঠন আইনের ভিত্তিতে ভারতীয় যুক্তরাষ্ট্র সম-পর্যায়ভুক্ত ১৫টি রাজ্য ও ৬টি কেন্দ্রশাসিত অঞ্চল লইয়া গঠিত হইয়াছে। বর্তমানে রাজ্যসংখ্যা হইল ১৭টি, কেন্দ্রশাসিত অঞ্চল হইল ১০টি। যুক্তরাষ্ট্র ব্যবস্থার সাফল্যের অগ্রতম প্রধান উপাদান হইল যুক্তরাষ্ট্রের আদিক রাজ্যগুলির ভৌগোলিক ঐক্য। ভারতীয় যুক্তরাষ্ট্রের আন্দামান ও নিকোবর দ্বীপপুঞ্জ এবং আমিনদ্বীপ দ্বীপপুঞ্জ ব্যতীত অন্তান্ত প্রধান অংশগুলির মধ্যে এই ভৌগোলিক ঐক্য বিদ্যমান আছে এবং প্রত্যেকটি অংশের সহিত অপরাপর অংশের ঘনিষ্ঠ যোগ-স্বত্বের ফলে ইহাদের মধ্যে পারস্পরিক সংস্পর্শ ও আদান-প্রদান সম্ভব করিয়া জাতীয় ঐক্য প্রতিষ্ঠা করিতে সাহায্য করিয়াছে। অধিকন্তু এই ভৌগোলিক ঐক্যের জন্য ভারত তাহার প্রতিরক্ষা ব্যবস্থা সুদৃঢ় করিতে সমর্থ হইয়াছে।

যুক্তরাষ্ট্রের সাফল্যের দ্বিতীয় উপাদান হইল অধিবাসিগণের মধ্যে জাতিগত, ভাষাগত, ধর্মগত, অর্থনৈতিক ও কৃষ্টিগত ঐক্যের অবস্থিতি। এদিক দিয়া দেখিতে গেলে ভারতের বিভিন্ন রাজ্যের অধিবাসিগণের মধ্যে একরূপ

কোন ঐক্য নাই। বিভিন্ন ধর্মাবলম্বী ও বিভিন্ন ভাষা-ভাষী বহু জাতি ভারতের বিভিন্ন রাজ্যে বাস করে। এই ভাষাগত ও ধর্মগত বিভেদ অনেক সময় যে ভারতের রাজনৈতিক জীবনে বিশৃঙ্খলা আনয়ন করিয়াছে তাহা অস্বীকার করা যায় না। অপরপক্ষে এই বিভিন্ন জাতিগুলি এরূপ মিশ্রভাবে পরস্পরের সহিত একই ভৌগোলিক পরিবেশে বাস করে যে, এই বিভিন্ন জাতিগুলিকে একত্র সমাবেশ করিয়া ধর্মভিত্তিক বা ভাষাভিত্তিক রাজ্য গঠন করাও সম্ভব নহে।

কিন্তু এই বিভেদ থাকা সত্ত্বেও স্মরণ রাখিতে চাইবে যে, এই বিভিন্ন জাতিগুলি শতাব্দীর পর শতাব্দী ধরিয়া একই ভৌগোলিক পরিবেশে পরস্পরের সন্নিহিতে বাস করিবার ফলে তাহাদের জীবনযাত্রা প্রণালী, চিন্তাধারা এবং অর্থনৈতিক ও কৃষ্টিগত জীবন একই ধারায় প্রবাহিত হইতেছে। ভারতের নতুন শাসনতন্ত্র ভারতীয় যুক্তরাষ্ট্রে জাতি-বর্ণ-ধর্ম-নির্বিশেষে এক নাগরিকত্ব প্রবর্তন করিয়া এবং ভারতের সকল নাগরিকের ক্ষুদ্র সমান সুযোগ-সুবিধার ব্যবস্থা করিয়া এই অসংখ্য বৈচিত্র্যের মধ্যে ঐক্য স্থাপিতে সাহায্য করিয়াছে। জাতিগত, ভাষাগত ও ধর্মগত বৈষম্য থাকা সত্ত্বেও সোভিয়েত যুক্তরাষ্ট্র, সুইস যুক্তরাষ্ট্র প্রভৃতি দেশে যদি এক জাতীয়তাবোধ বৃদ্ধি পাইয়া থাকে, তাহা হইলে ভারতের ক্ষেত্রে এক জাতীয়তাবোধ বৃদ্ধি না পাইবার কোন সংগত কারণ নাই।

ভারতের ক্ষেত্রে যুক্তরাষ্ট্রের সাফল্যের জন্ত প্রয়োজনীয় জাতীয়তাবোধ যে নাই, ইহা বলিলে সত্যের অপলাপ হইবে। বৃটিশ শাসকগণ কর্তৃক অহুসৃত দুই বিভেদমূলক শাসন-নীতির (Divide and rule) ফলে এই জাতীয়তাবোধ এখনও পর্বস্ত দুর্বল, কিন্তু এই জাতীয়তাবোধ ক্রমশই শক্তিশালী হইয়া উঠিতেছে। ভারতের বিভিন্ন অংশগুলি বৃদ্ধিতে পারিয়াছে যে, একতাই তাহাদের প্রধান বল এবং বিভেদই হইল তাহাদের ধ্বংসের কারণ। একতাবৃদ্ধির জন্ত বর্তমান ভারত সরকার বিভিন্ন রাজ্যের পারস্পরিক মতভেদ ও বিবাদ মীমাংসার জন্ত আঞ্চলিক পরামর্শ সভাগঠন করিয়াছেন ও প্রায়শই রাজ্যগুলির শাসনকর্তাদের সম্মিলিত বৈঠকের ব্যবস্থা করিয়াছেন। এই সমস্ত ব্যবস্থা গ্রহণের ফলে রাজ্যগুলির মধ্যে প্রতিযোগিতামূলক মনোভাব দূর হইয়া সহযোগিতামূলক মনোভাব

সৃষ্টিতে সাহায্য করিয়াছে। ভারতের বিভিন্ন রাজ্যে এমন কি হুদ্র আন্দামান দ্বীপে পূর্ব-পাকিস্তান হইতে আগত উষ্মজন্মের পুনর্বাসনের পরিকল্পনা এই সহযোগিতামূলক মনোভাবের পরিচায়ক। পশ্চিমবঙ্গের সমস্ত আজ সর্বভারতীয় সমস্তা বলিয়া পরিগণিত হইয়াছে। সুতরাং ভারতীয় যুক্তরাষ্ট্রে যে যুক্তরাষ্ট্রমূলভ জাতীয় ঐক্য নাই একথা বলা অদৌ সমীচীন নহে।

যুক্তরাষ্ট্রের স্থায়িত্বের জন্ত বিভিন্ন প্রদেশগুলির মধ্যে আয়তনের, সম্পদের ও বিশেষ-করিয়া রাজনৈতিক সমতা বা অন্ততঃপক্ষে আনুপাতিক সমতা থাকা একান্ত আবশ্যক। ভারতের ক্ষেত্রে এই সমতার একান্ত অভাব দেখা যায়। মধ্যপ্রদেশ, বিহার, উত্তরপ্রদেশ প্রভৃতি রাজ্যগুলি আয়তনে, লোকসংখ্যায় ও সম্পদে অন্ত্যান্ত রাজ্যগুলি হইতে শুধু বৃহত্তর নয়, রাজনৈতিক দিক দিয়া দেখিতে গেলেও ভারতের পার্লামেন্ট সভার এই রাজ্যগুলির প্রতিনিধি সংখ্যা অনেক বেশী। সুতরাং এই রাজ্যগুলি ইচ্ছা করিলে সম্মিলিতভাবে রাষ্ট্রীয় ব্যাপারে একাধিপত্য প্রতিষ্ঠিত করিয়া অন্ত্যান্ত ক্ষুদ্র ক্ষুদ্র রাজ্যগুলির অভিমতকে অগ্রাহ্য করিতে পারে। যুক্তরাষ্ট্রের একটি মূলনীতি হইল আঙ্গিক রাজ্যগুলির সমানাধিকার এবং এই সমানাধিকার নীতি স্বীকৃত না হইলে যুক্তরাষ্ট্রের সাফল্য অসম্ভব। ভারতের ১৭টি আঙ্গিক রাজ্য সম-ক্ষমতাসম্পন্ন হইলেও মাকিন বা ক্যানাডার যুক্তরাষ্ট্রের আঙ্গিক রাজ্যগুলির তায় ইহাদের সমান প্রতিনিধিত্বের দাবী স্বীকৃত হয় নাই। প্রতিনিধিত্বের দিক দিয়া শুধুমাত্র আনুপাতিক সমতা রক্ষিত হইয়াছে।

পরিশেষে যুক্তরাষ্ট্রের সাফল্যের জন্ত নাগরিকগণের মধ্যে রাজনৈতিক শিক্ষা, দায়িত্ববোধ ও কর্মপটুতা একান্ত আবশ্যক। ইহা ছাড়া, যেহেতু আঙ্গিক রাজ্যগুলি যুক্তরাষ্ট্রের সম-অঙ্গীদার সেই হেতু প্রত্যেকেরই সমান কর্মদক্ষতার অধিকারী হওয়া চাই। যুক্তরাষ্ট্র একটা জটিল শাসনব্যবস্থা। নাগরিকগণ যদি জটিল শাসনব্যবস্থা পরিচালনাকার্যে অনভিজ্ঞ হন তাহা হইলে এই শাসনব্যবস্থা সাফল্যলাভ করিতে পারে না। ভারতে স্বাধীনতা লাভের পর কিছুদিন পর্বস্ত অভিজ্ঞ ও কর্মদক্ষ শাসকের অভাবে শাসনকার্যে বিশৃঙ্খলা ঘটিয়াছিল। অনেক ক্ষেত্রে বিদেশীয়গণের সাহায্য গ্রহণ করিতে হইয়াছিল। কিন্তু বর্তমানে এই অসুবিধা অনেক পরিমাণে দূর হইয়াছে।

দেশরক্ষা বিভাগে স্থল, নৌ ও বিমানবাহিনী আজ প্রায় সম্পূর্ণরূপে ভারতীয়গণ কর্তৃক পরিচালিত হইতেছে। শাসন, চিকিৎসা, শিক্ষা, কৃষি, বন প্রভৃতি বিভাগগুলিও সম্পূর্ণরূপে ভারতীয়গণই পরিচালনা করিতেছেন। শুধু মূলধনের মালিক ও যন্ত্র-বিশেষজ্ঞরূপেই বর্তমানে বিদেশীয়গণের সাহায্য লওয়া হইয়া থাকে। স্বতরাং এদিক দিয়া দেখিতে গেলেও বলা যায় যে, যুক্তরাষ্ট্রীয় শাসনব্যবস্থা পরিচালনা করিবার প্রয়োজনীয় অভিজ্ঞতা ও কর্মপটুতা ইতিমধ্যেই শিশুরাষ্ট্র ভারত তাহার আয়ত্তাধীন করিয়াছে। স্বতরাং ভারতীয় যুক্তরাষ্ট্রের সাফল্য হুনিশিত।

যুক্তরাষ্ট্র-ব্যবস্থায় ক্ষমতাবন্টনের নীতি ও পদ্ধতি (Principle and Method of Distribution of Powers in a Federal Union) নীতি

যুক্তরাষ্ট্র-ব্যবস্থার সমগ্র শাসনক্ষমতা কেন্দ্রীয় ও আঞ্চলিক সরকারগুলির মধ্যে ভাগ করিয়া দেওয়া হয়। এই ক্ষমতাবন্টনের মূলনীতি হইল যে, জাতীয় স্বার্থসংশ্লিষ্ট বিষয়গুলি এবং যে-সকল বিষয় সম্পর্কে একই রকমের আইন-কাহ্নন ও শাসনব্যবস্থা প্রয়োজন, সেই সকল বিষয়ের ভার সাধারণতঃ কেন্দ্রীয় সরকারের হস্তে গ্ৰস্ত থাকে। অপরপক্ষে, শুধু স্থানীয় স্বার্থসংশ্লিষ্ট বিষয়গুলি অর্থাৎ যে সকল বিষয়ে বিভিন্ন অঞ্চলের অবস্থাভেদে ভিন্ন ভিন্ন আইন-কাহ্নন ও পরিচালনা-ব্যবস্থা দরকার সেই সব বিষয়ের ভার আঞ্চলিক সরকারগুলির উপর দেওয়া হয়। এই নীতি অনুসারে প্রতিরক্ষা ব্যবস্থা, বৈদেশিক সম্পর্ক, বৈদেশিক বাণিজ্য, মুদ্রানীতি, ডাক ও তার বিভাগ, যুদ্ধ ও শান্তি প্রভৃতি বিষয়গুলি কেন্দ্রীয় সরকারের অধীনে দেওয়া হয় এবং শিক্ষা, সমবায়, কৃষি, জনস্বাস্থ্য প্রভৃতি বিষয়গুলি প্রাদেশিক সরকারের হস্তে গ্ৰস্ত থাকে।

এই নীতি অনুযায়ী সকল যুক্তরাষ্ট্রে ক্ষমতা বন্টন করা হইলেও কোন্ বিষয়টি জাতীয় স্বার্থসংশ্লিষ্ট আর কোন্ বিষয়টি স্থানীয় স্বার্থসংশ্লিষ্ট এ-সম্বন্ধে ঐক্যমতভেদ দেখা যায়। বিবাহ-বিচ্ছেদ, দেউলিয়া ও শ্রমিকসং-সংক্রান্ত বিষয়গুলি মার্কিন যুক্তরাষ্ট্রে প্রাদেশিক সরকারগুলির উপর গ্ৰস্ত আছে, কিন্তু ক্যানাডায় এই বিষয়গুলির ভার কেন্দ্রীয় সরকারের

উপর দেওয়া হইয়াছে। ফলে, মার্কিন যুক্তরাষ্ট্রে উক্ত বিষয়গুলি সম্পর্কে বিভিন্ন প্রদেশে বিভিন্ন নিয়ম-কানূনের সৃষ্টি হইয়া আন্তঃপ্রাদেশিক সম্পর্ক তিস্ত করিয়া তুলিয়াছে।

অস্ট্রেলিয়া, সোভিয়েত যুক্তরাষ্ট্র প্রভৃতি কয়েকটি দেশে প্রাদেশিক সরকারগুলিকে কয়েকটি বিশেষ অধিকার দেওয়া হইয়াছে। অস্ট্রেলিয়ার প্রাদেশিক সরকারগুলি তাহাদের নিজস্ব প্রতিনিধি দ্বারা পৃথকভাবে প্রাদেশিক স্বার্থসংশ্লিষ্ট অনেক ব্যাপারে গ্রেট ব্রিটেনের সহিত বিশেষ সম্পর্ক স্থাপন করিতে পারে; সোভিয়েত যুক্তরাষ্ট্রের ইউক্রেন, বাইলো-রাশিয়া প্রভৃতি কয়েকটি প্রাদেশিক সরকারকে আন্তর্জাতিক ক্ষেত্রে স্বাধীনভাবে তাহাদের কার্যকলাপ পরিচালনা করিবার ক্ষমতা দেওয়া হইয়াছে। সম্মিলিত জাতিপুঞ্জ প্রতিষ্ঠানেও তাহাদের পৃথক প্রতিনিধি আছে।

পদ্ধতি

উপরি-উক্ত ক্ষমতাবন্টনের নীতি বিভিন্ন উপায়ে বিভিন্ন যুক্তরাষ্ট্রে কার্যকরী করা হয়। যুক্তরাষ্ট্রে ক্ষমতাবন্টনে সাধারণতঃ দুইটি নীতি অনুসৃত হয়।

প্রথমতঃ, যুক্তরাষ্ট্র-ব্যবস্থায় কেন্দ্রীয় সরকারের ক্ষমতা নির্দিষ্ট করিয়া দেওয়া হয়। কেন্দ্রীয় সরকার কোন্ কোন্ বিষয়ে শাসনকার্য পরিচালনা করিবে, শাসনতন্ত্রে বিশদভাবে তাহার উল্লেখ থাকে। প্রাদেশিক সরকার-গুলিকে অবশিষ্ট অল্পলিখিত ক্ষমতাগুলির অধিকারী করা হয়। এই প্রণালীতে ক্ষমতার বন্টন কেন্দ্রীয় সরকারের দুর্বলতা সূচিত করে। মার্কিন যুক্তরাষ্ট্রে ক্ষমতাবন্টনের এই প্রণালী কার্যকরী করা হইয়াছে।

দ্বিতীয়তঃ, ক্যানাডায় অল্প প্রণালীতে ক্ষমতার বন্টন হইয়াছে। এই প্রণালী অনুযায়ী স্থানীয় সরকারগুলিকে কতকগুলি নির্দিষ্ট ক্ষমতার অধিকারী করিয়া অবশিষ্ট অল্পলিখিত বিষয়গুলির কর্তৃত্ব কেন্দ্রীয় সরকারের হস্তে রাখা করা হইয়াছে। ফলে, এই জাতীয় যুক্তরাষ্ট্র-ব্যবস্থায় কেন্দ্রীয় সরকার অধিকতর শক্তিশালী হয়।

অধুনা যুক্তরাষ্ট্রের ক্ষমতাবন্টনে এক তৃতীয় প্রণালী অনুসৃত হইয়া থাকে। কেন্দ্রীয় সরকার ও প্রাদেশিক সরকারগুলির ক্ষমতা শাসনতন্ত্রে

অনির্দিষ্টভাবে লিখিত থাকে। ইহা ছাড়া, শাসনতন্ত্রে কতকগুলি যুগ্ম বিষয়ের (Concurrent List) উল্লেখ থাকে, যে বিষয়গুলির উপর উভয় সরকার একই সঙ্গে আইন প্রণয়ন করিতে পারেন। কিন্তু উভয় সরকারের প্রণীত আইন পরস্পর-বিরোধী হইলে কেন্দ্রীয় সরকারের ব্যবস্থা বলবৎ হইয়া প্রাদেশিক সরকারের ব্যবস্থা বাতিল হয়। ক্যানাডায় কৃষি ও দেশান্তরে বাসের নিয়ম (Immigration) যুগ্ম তালিকার অন্তর্ভুক্ত এবং ভারতে কোজদারী ও দেওয়ানী কার্যবিধি, শ্রমিকসংঘ, বিদ্যুৎ, ছাপাখানা, সংবাদপত্র প্রভৃতি সাতচল্লিশটি বিষয় যুগ্ম তালিকাভুক্ত করা হইয়াছে।

যুক্তরাষ্ট্র-ব্যবস্থায় স্থানীয় সরকারগুলির উপর কেন্দ্রীয় সরকারের কর্তৃত্ব (Federal Control over Local Governments)

যুক্তরাষ্ট্রে প্রাদেশিক সরকারগুলিকে অল্পবিস্তর পরিমাণে কেন্দ্রীয় সরকারের নির্দেশ মানিয়া চলিতে হয়। সকল যুক্তরাষ্ট্রে কেন্দ্রীয় সরকারের প্রাদেশিক সরকারগুলির উপর আধিপত্য সমান হয় না। মার্কিন যুক্তরাষ্ট্রে শাসনতন্ত্র অনুসারে প্রাদেশিক সরকারগুলিতে প্রজাতন্ত্রী শাসনব্যবস্থা বলবৎ করিবার ক্ষমতা কেন্দ্রীয় সরকারের হস্তে দেওয়া হইয়াছে। অস্ত্রবিপ্লব বা প্রাদেশিক বিদ্রোহ নিরোধ করিবার ক্ষমতাও কেন্দ্রীয় সরকারের হস্তে স্তম্ভ হইয়াছে। ক্যানাডা ও ভারতে প্রাদেশিক শাসনকর্তাগণ কেন্দ্রীয় শাসকপ্রধান কর্তৃক নিযুক্ত হইয়া থাকেন। উভয় দেশে অনেক ক্ষেত্রে প্রাদেশিক আইনগুলি কেন্দ্রীয় শাসকপ্রধানের সম্মতিসাপেক্ষ। সোভিয়েত যুক্তরাষ্ট্রে আঞ্চলিক সরকার কর্তৃক রচিত শিক্ষা, স্বাস্থ্য ও রাজস্ব-সংক্রান্ত বিধিগুলি কেন্দ্রীয় সরকারের সম্মতিসাপেক্ষ।

মার্কিন যুক্তরাষ্ট্র, ক্যানাডা প্রভৃতি দেশে আইন বলবৎ ও রাজস্ব আদায় করিবার জন্ত কেন্দ্রীয় সরকার প্রাদেশিক সরকারের উপর নির্ভর না করিয়া স্বতন্ত্র ব্যবস্থা অবলম্বন করেন, আবার জার্মানি, সুইজারল্যান্ড, ভারত প্রভৃতি দেশে উপরি-উক্ত বিষয়গুলির জন্ত অনেক সময় প্রাদেশিক সরকার-গুলির সাহায্য লওয়া হইয়া থাকে।

যুক্তরাষ্ট্রের আধুনিক প্রবণতা (Modern Tendencies in Federations)

যুক্তরাষ্ট্র বলিতে দেশের সাধারণ সম্পর্কিত কাজের জন্য কেন্দ্রে অবস্থিত একটি জাতীয় সরকার ও স্থানীয় শাসন-সম্পর্কিত কাজের জন্য কিছু সংখ্যক স্থানীয় বা প্রাদেশিক সরকারের এক সঙ্গে অবস্থিতি বুঝায়। যুক্তরাষ্ট্রীয় শাসনতন্ত্র কর্তৃক উভয় সরকারের কার্যক্ষেত্র স্থানিধারিত থাকিলেও বর্তমানে মার্কিনী, ক্যানাডীয় বা মিশ্র—সকল যুক্তরাষ্ট্রীয়-ব্যবস্থায়ই একদিকে যে রূপ কেন্দ্রে অবস্থিত জাতীয় সরকারের ক্ষমতার প্রাবল্য দেখা যায় অপর দিকে তদ্রূপ স্থানীয় বা প্রাদেশিক সরকারগুলির গুরুত্ব হ্রাস পরিলক্ষিত হয়। কেন্দ্রে অবস্থিত জাতীয় সরকারগুলির ক্ষমতা বৃদ্ধির কারণ ইহা নহে যে, তাহারা প্রাদেশিক সরকারগুলির ক্ষমতা হরণ করিয়া অধিকতর শক্তিশালী অথবা অধিকাংশ ক্ষেত্রে শাসনতন্ত্র কর্তৃক প্রদত্ত ক্ষমতা ব্যতীতও নূতন ক্ষমতা পাইয়া শক্তিশালী হইয়াছে। কেন্দ্রীয় সরকারের এই দ্রুত ক্ষমতা বৃদ্ধি হওয়ায় অনেকে মনে করেন যে, কালক্রমে কেন্দ্রীয় সরকারের এইরূপ ক্ষমতা বৃদ্ধির ফলে যুক্তরাষ্ট্রীয় শাসনব্যবস্থা এককেন্দ্রীয় শাসনব্যবস্থায় পর্যবসিত হইবে।

কিন্তু যুক্তরাষ্ট্রের এই পরিণতি ইতিহাস দ্বারা সমর্থিত হয় না। প্রায় কোন যুক্তরাষ্ট্রই এ পর্যন্ত এককেন্দ্রীয় শাসনব্যবস্থায় পরিণত হয় নাই। জাতীয় সরকারের ক্ষমতা বৃদ্ধির প্রধান কারণ হইল যে, এই সরকারগুলি ইহাদের শাসনতন্ত্র-প্রদত্ত ক্ষমতাগুলি বিশেষভাবে সম্প্রসারণ করিয়াছেন। ইহা ছাড়া মার্কিন যুক্তরাষ্ট্র, ভারত প্রভৃতি কয়েকটি যুক্তরাষ্ট্র কিছু নূতন ক্ষমতা পাইয়াও অধিকতর শক্তিশালী হইয়াছে।

যুক্তরাষ্ট্র ব্যবস্থায় জাতীয় সরকারের এই ক্ষমতাবৃদ্ধির কারণ সম্পর্কে অধ্যাপক হওয়ার (Prof. Wheare) চারিটি বিষয়ের উল্লেখ করিয়াছেন। তাঁহার মতে যুদ্ধ (War), অর্থনৈতিক সংকট (Economic depression), রাষ্ট্রের সমাজসেবামূলক কার্যের প্রসার (Growth of social services) এবং শিল্প ও পরিবহন জগতে অভূতপূর্ব পরিবর্তন (Mechanical revolution in transport and industry)।

বর্তমান যুদ্ধ হইল সর্বাঙ্গিক যুদ্ধ। এই জাতীয় যুদ্ধ পরিচালনার জন্য দেশের ব্যবসায়ী শক্তি ও সম্পদ এক-নিয়ন্ত্রণাধীন করা একান্ত আবশ্যিক এবং জাতীয় সরকারই হইল একমাত্র প্রতিষ্ঠান যাহা সাফল্যের সহিত এই কার্য করিতে পারে। দ্বিতীয়তঃ, আধুনিক যুদ্ধগুলি এত ব্যয়সাধ্য যে, একমাত্র কেন্দ্রীয় সরকারই এই বিপুল ব্যয়ভার বহন করিতে সক্ষম। উপস্থি-উক্ত কারণে যুক্তরাষ্ট্র ব্যবস্থায় জাতীয় সরকারের ক্ষমতা বৃদ্ধি পাইয়াছে।

আধুনিক যুগে প্রায় কোন দেশই অর্থনৈতিক সংকটের প্রভাব-মুক্ত নহে। অর্থনৈতিক সংকটকালে একমাত্র কেন্দ্রে অবস্থিত জাতীয় সরকারই জাতীয় স্বার্থের পরিপ্রেক্ষিতে উপযুক্ত আর্থিক ও রাজস্ব সম্পর্কীয় ব্যবস্থা অবলম্বন করিয়া সংকট মুক্ত হইতে পারেন। এ কারণে জাতীয় সরকারের প্রাধান্য ও ক্ষমতাবৃদ্ধি স্বাভাবিক বলা যাইতে পারে।

সমাজসেবামূলক কার্য বলিতে সাধারণতঃ শিক্ষা ও স্বাস্থ্য-সম্পর্কিত কার্যগুলিকে বুঝায়। প্রায় প্রত্যেক যুক্তরাষ্ট্রে এই কার্যগুলি স্থানীয় বা প্রাদেশিক সরকারগুলির উপর ন্যস্ত থাকে। কিন্তু এই সমাজসেবামূলক কার্যগুলি অল্পভাবে সম্পাদন করিতে হইলে প্রাদেশিক সরকারগুলির জাতীয় সরকারের আর্থিক সাহায্য ও উপদেশের উপর নির্ভর করিতে হয়। মার্কিন, সোভিয়েত, ভারত প্রভৃতি যুক্তরাষ্ট্রে সমাজসেবামূলক কার্যের জন্য প্রাদেশিক সরকারগুলি জাতীয় সরকারগুলির নিকট হইতে প্রভূত পরিমাণে সাহায্য পায়। এই ব্যবস্থার দ্বারাও জাতীয় সরকারের ক্ষমতা বৃদ্ধি পাইয়াছে।

যোগাযোগ ও পরিবহন ব্যবস্থার উন্নতির ফলে আন্তঃরাজ্য ভৌগোলিক বাধা সম্পূর্ণরূপে অপসারিত হইয়াছে। আন্তঃরাজ্য নানা জাতীয় সামাজিক, অর্থনৈতিক ও কৃষ্টিগত সংস্থা গঠিত হইয়া বিভিন্ন প্রদেশের জনগণের মধ্যে একাত্মবোধ বৃদ্ধি পাইয়াছে। কৃষি, শিল্প ও ব্যবসায়-বাণিজ্য-সংক্রান্ত সমস্যাগুলি স্থানীয় সমস্যা হইতে জাতীয় সমস্যায় পরিণত হইয়াছে এবং এই কারণে এই সমস্যাগুলির স্থানীয় স্বার্থ অপেক্ষা জাতীয় স্বার্থের ভিত্তিতে সমাধান করিবার প্রয়োজন হয়। তাই স্থানীয় ব্যাপারেও জাতীয় সরকারের সক্রিয় নিয়ন্ত্রণ ও সহযোগিতা অপরিহার্য বলিয়া বিবেচিত হয়।

পরিশেষে বলা যায় যে, বর্তমান রাষ্ট্রগুলি হইল সমাজসেবামূলক সংগঠন এবং এই কার্য একান্তরূপেই পূর্ব-নির্ধারিত পরিকল্পনামুযায়ী পরিচালিত

হয়। পরিকল্পনার (Planning) সাফল্য কেন্দ্রীকরণ, সংযোগ ও বিভিন্ন অংশের সহযোগিতার উপর নির্ভর করে। এ কারণেও কেন্দ্রে অবস্থিত জাতীয় সরকারের ক্ষমতা বৃদ্ধি পাইয়াছে।

কিন্তু জাতীয় সরকারের এই ক্ষমতাবৃদ্ধির জন্য ইহা মনে করা যুক্তিসূক্ত নয় যে, প্রাদেশিক সরকারগুলিকে এককেন্দ্রীয় শাসনব্যবস্থার প্রাদেশিক সরকারের পর্যায়ে পরিণত করিবার উদ্দেশ্য-প্রণোদিত হইয়া যুক্তরাষ্ট্রীয় জাতীয় সরকার-গুলি প্রাদেশিক সরকারগুলির ক্ষমতা ক্রমশই অপহরণ করিতেছে। আসল কথা হইল যে, প্রগতিশীল সমাজব্যবস্থায় যুক্তরাষ্ট্রীয় শাসনব্যবস্থা বাহ্যতে সাফল্যমণ্ডিত হয়, সেই উদ্দেশ্যে জাতীয় সরকার প্রাদেশিক সরকারগুলিকে নানাভাবে সাহায্য করিয়া থাকে।

যুক্তরাষ্ট্রের সহিত অপরাপর সমবায় রাষ্ট্রের পার্থক্য (Distinction between a Federation and other forms of Composite State)

সন্ধি-বন্ধন (Alliance)

যখন একাধিক রাষ্ট্র নির্দিষ্ট উদ্দেশ্যসাধনের নিমিত্ত পারস্পরিক সহযোগিতার ভিত্তিতে সন্ধিসূত্রে আবদ্ধ হয়, তখন এই সন্ধিসূত্রে আবদ্ধ রাষ্ট্রসমবায়কে সন্ধি-বন্ধন বলা হয়। সন্ধি-বন্ধন হইল কতকগুলি সার্বভৌম রাষ্ট্রের নির্দিষ্ট বিষয়ে ঐক্যবদ্ধ ভাব। একটি চুক্তি স্বাক্ষরিত করিয়া তাহারা সংঘবদ্ধ হয় ও একযোগে নির্দিষ্ট বিষয়ে কার্য সম্পাদন করে। সম্পাদিত চুক্তি তাহাদের মধ্যে ঐকমত্য ও সহযোগিতা প্রতিষ্ঠিত করে, কিন্তু চুক্তির ফলে কোন নূতন জাতি বা নূতন রাষ্ট্রের জন্ম হয় না। সন্ধিবদ্ধ প্রত্যেকটি রাষ্ট্র অন্তান্ত সকল বিষয়ে তাহাদের স্বাধীন সভা বজায় রাখে। সন্ধি-বন্ধনে উচ্চতর ক্ষমতাবিশিষ্ট কোন কেন্দ্রীয় শাসনকর্তৃপক্ষ গঠিত হয় না। সন্ধি-বন্ধনে আবদ্ধ সদস্য রাষ্ট্রগুলি ইচ্ছামত সন্ধি-বন্ধন ছিন্ন করিতে পারে। আন্তর্জাতিকক্ষেত্রেও সন্ধি-বন্ধন এক রাষ্ট্র বলিয়া স্বীকৃত হয় না। নির্দিষ্ট উদ্দেশ্য সিদ্ধ হইলে বা অন্য কোন কারণে সন্ধি-বন্ধনের অস্তিত্ব বিলুপ্ত হইয়া যায়। সুতরাং সন্ধি-বন্ধনকে একাধিক রাষ্ট্রের মধ্যে একটি সাময়িক

সহযোগিতার মনোভাব বলা যাইতে পারে। এই সহযোগিতার মনোভাবের স্বায়িত্ব খুব কম বলিয়া সন্ধি-বন্ধনকে সমবায় রাষ্ট্রের দুর্বলতম প্রকাশ বলিয়া গণ্য করা যাইতে পারে। যুক্তরাষ্ট্রে একাধিক রাষ্ট্র সংঘবদ্ধ হইয়া একটি মাত্র সার্বভৌম ক্ষমতাবিশিষ্ট রাষ্ট্রের সৃষ্টি করে। যুক্তরাষ্ট্রে একটি কেন্দ্রীয় সরকার থাকে এবং আন্তর্জাতিকক্ষেত্রে যুক্তরাষ্ট্র একটিমাত্র রাষ্ট্র বলিয়া পরিগণিত হয়। যুক্তরাষ্ট্রের অংশগুলি সন্ধি-বন্ধনের সদস্যগুলির ন্যায় ইচ্ছামত যুক্তরাষ্ট্রের সহিত সম্পর্ক ছেদ করিতে পারে না। সন্ধি-বন্ধন অস্থায়ী; যুক্তরাষ্ট্র-ব্যবস্থা স্থায়ী।

ব্যক্তিগত-বন্ধন (Personal Union)

একাধিক রাষ্ট্র যখন একজন রাজার অধীনে সম্মিলিত হইয়া তাহাদের শাসনকার্য রাজার নামে পরিচালিত করে, তখন এই রাষ্ট্রসমবায়কে ব্যক্তিগত-বন্ধন বলা হয়। প্রকৃতপক্ষে ব্যক্তিগত-বন্ধনে আবদ্ধ রাষ্ট্রগুলির মধ্যে অন্ত কোন বিষয়ে ঐক্য প্রতিষ্ঠিত হয় না। কি আভ্যন্তরীণ ব্যাপারে, কি বৈদেশিক ব্যাপারে প্রত্যেকটি সদস্য রাষ্ট্র তাহার সার্বভৌমত্ব বজায় রাখে। রাষ্ট্রগুলির মধ্যে একমাত্র ঐক্যমাত্র হইল সকল রাষ্ট্র কর্তৃক স্বীকৃত এক রাজা। একটি রাষ্ট্রের রাজা যদি নাবালক হন, তাহা হইলে তাহার সাবালক না হওয়া পর্যন্ত পাশ্চাত্য রাষ্ট্রের রাজাকে সাময়িকভাবে শাসন-বিভাগের উচ্চতম কর্তৃপক্ষ বলিয়া স্বীকার করিয়া তাহার নামে শাসনকার্য পরিচালনা করা হয়। অনেক সময় চুক্তিসম্পাদন দ্বারা বা উত্তরাধিকারের বলে একাধিক রাষ্ট্র একজন রাজার অধীনে সাময়িকভাবে মিলিত হইতে পারে, কিন্তু ব্যক্তিগত-বন্ধনে আবদ্ধ রাষ্ট্রগুলি একজাতি বা একরাষ্ট্রে পরিণত হয় না। তাহাদের মধ্যে যুদ্ধ বাধিলে সে যুদ্ধকে অন্তর্বিগ্রহ না বলিয়া আন্তর্জাতিক যুদ্ধ বলা হয়। ১৭১৪ হইতে ১৮৩৭ খ্রীষ্টাব্দ পর্যন্ত ইংলণ্ড ও হানোভার ব্যক্তিগত বন্ধনে আবদ্ধ ছিল

প্রকৃত-বন্ধন (Real Union)

প্রকৃত-বন্ধনে একাধিক রাষ্ট্র একই রাজার অধীনে মিলিত হয়, কিন্তু প্রকৃত-বন্ধনের বৈশিষ্ট্য হইল যে, সম্মিলিত রাষ্ট্রগুলি আভ্যন্তরীণ ব্যাপারে স্বাধীন হইলেও বৈদেশিক ব্যাপারে তাহাদের কোন পৃথক সত্তা থাকে না,

সুতরাং আন্তর্জাতিকক্ষেত্রে এই রাষ্ট্রসমবায় একটি মাত্র রাষ্ট্র বলিয়া পরিগণিত হয়। প্রকৃত বন্ধনের সদস্য রাষ্ট্রগুলির মধ্যে যদি যুদ্ধ বাধে তাহা হইলে সে যুদ্ধ আন্তর্জাতিক যুদ্ধ বলিয়া স্বীকৃত হয় না, সে যুদ্ধকে অন্তর্বিগ্রহ বলা হয়। প্রথম মহাযুদ্ধের পূর্বকালে অস্ট্রিয়া ও হাঙ্গেরি দেশ দুইটি প্রকৃত-বন্ধনে আবদ্ধ ছিল।

সন্ধি-সমবায় (Confederation)

যুক্তরাষ্ট্র ব্যতীত অন্যান্য সমবায় রাষ্ট্রগুলির মধ্যে সন্ধি-সমবায় হইল সর্বাপেক্ষা অধিক শক্তিশালী সংগঠন। একাধিক স্বাধীন রাষ্ট্রের সহযোগিতায় সন্ধি-সমবায়ের উৎপত্তি হয়। সদস্য রাষ্ট্রগুলির পারস্পরিক চুক্তির ভিত্তির উপর সন্ধি-সমবায় প্রতিষ্ঠিত। সাধারণতঃ প্রতিরক্ষা-ব্যবস্থা স্বদৃঢ় করিবার নিমিত্ত বা অন্ত কোন ব্যাপকতর উদ্দেশ্যসাধনের জগ্ন সন্ধি-সমবায়ের সৃষ্টি হয় এবং এই সমবায়কে শক্তিশালী করিবার নিমিত্ত সদস্য রাষ্ট্রগুলির প্রতিনিধি লইয়া একটি কেন্দ্রীয় শাসনপ্রতিষ্ঠানও গঠিত হয়। সন্ধি-সমবায় অনেক ক্ষেত্রে শেষ পর্যন্ত যুক্তরাষ্ট্রে পরিণত হয়। সুতরাং সন্ধি-সমবায়কে যুক্তরাষ্ট্রগঠনের প্রাথমিক স্তর বলা যায়। সন্ধি-সমবায়, সন্ধি-বন্ধন বা ব্যক্তিগত-বন্ধন অপেক্ষা অধিকতর শক্তিশালী সমবায় রাষ্ট্র বলিয়া পরিগণিত হইলেও যুক্তরাষ্ট্রের সহিত ইহার যথেষ্ট পার্থক্য দেখা যায়।

প্রথমতঃ, যে রাষ্ট্রগুলি সম্মিলিত হইয়া যুক্তরাষ্ট্র গঠন করে তাহারা তাহাদের সম্ভা সম্পূর্ণভাবে বিসর্জন দিয়া একটিমাত্র সার্বভৌম রাষ্ট্রে পরিণত হয়। সন্ধি-সমবায় প্রত্যেকটি সদস্য রাষ্ট্র তাহার স্বাধীন সার্বভৌম অস্তিত্ব বজায় রাখে।

দ্বিতীয়তঃ, যুক্তরাষ্ট্র-ব্যবস্থায় অনেকগুলি জাতি ও রাষ্ট্রের সম্মিলনে এক নতুন জাতি ও নতুন সার্বভৌম রাষ্ট্রের সৃষ্টি হয়, কিন্তু সন্ধি-সমবায় কোন নতুন একাত্মবোধ-সম্পন্ন জাতির বা একটি সার্বভৌম রাষ্ট্রের সৃষ্টি হয় না।

তৃতীয়তঃ, যুক্তরাষ্ট্রের একটা নির্দিষ্ট ভূখণ্ড ও জনসমষ্টি থাকে। এই নির্দিষ্ট ভূখণ্ডের অধিবাসীদের উপর যুক্তরাষ্ট্রের ক্ষমতা অবাধে প্রযুক্ত হয়। সন্ধি-সমবায়ের এরূপ কোন নির্দিষ্ট ভূভাগ বা জনসমষ্টি থাকে না। প্রত্যেকটি সদস্য রাষ্ট্রের পৃথক্ ভৌগোলিক সীমা থাকে ও এই নির্দিষ্ট ভৌগোলিক সীমার বাহিরে ইহার ক্ষমতা প্রযুক্ত হইতে পারে না।

চতুর্থতঃ, যুক্তরাষ্ট্র একটি লিখিত শাসনতন্ত্রের ভিত্তির উপর প্রতিষ্ঠিত। শাসনতন্ত্র সরকারের সমুদয় ক্ষমতা কেন্দ্রীয় সরকার ও আঞ্চলিক সরকার-গুলির মধ্যে বন্টন করিয়া দেয়। যুক্তরাষ্ট্রের প্রধান বিশেষত্ব হইল ক্ষমতা বিভাগ। অপরপক্ষে সন্ধি-সমবায় হইল একটি আন্তর্জাতিক চুক্তির উপর প্রতিষ্ঠিত। সার্বভৌম রাষ্ট্রগুলি একটি পারস্পরিক চুক্তিতে আবদ্ধ হইয়া তাহাদের সমস্বার্থসংশ্লিষ্ট ব্যাপারগুলির সমাধান করে। সুতরাং সন্ধি-সমবাসে সরকারের ক্ষমতাবিভাগের কোন প্রশ্ন উঠে না।

পঞ্চমতঃ, যুক্তরাষ্ট্রে শাসনতন্ত্র কর্তৃক ক্ষমতার বিভাগ করা হয় বলিয়া শাসনতন্ত্রের প্রাধান্য বজায় রাখিবার নিমিত্ত একটি যুক্তরাষ্ট্রীয় উচ্চ বিচারালয় অপরিহার্য বলিয়া পরিগণিত হয়, কিন্তু সন্ধি-সমবাসে শাসন-ক্ষমতার কোনপ্রকার ভাগ হয় না বলিয়া উচ্চ বিচারালয়ের আদৌ কোন প্রয়োজন অহুত হয় না।

ষষ্ঠতঃ, যুক্তরাষ্ট্রের কেন্দ্রীয় সরকার রাষ্ট্রের অধিবাসী সমস্ত নাগরিকের উপর প্রত্যক্ষভাবে কর্তৃত্ব করিতে পারে। কেন্দ্রীয় সরকার-প্রবর্তিত আইন সকল অঞ্চলে সকল অধিবাসীর উপর প্রত্যক্ষভাবে বলবৎ করা হয়। কিন্তু সন্ধি-সমবাসের কেন্দ্রীয় সংগঠনের সকল সদস্য-রাষ্ট্রে প্রত্যক্ষভাবে প্রযোজ্য কোন আইন প্রণয়ন করিবার ক্ষমতা নাই। সদস্য রাষ্ট্রগুলির নাগরিক ব্যতীত সন্ধি-সমবাসের নিজস্ব কোন খাস নাগরিক থাকে না। সুতরাং সন্ধি-সমবাসের কেন্দ্রীয় শাসনপ্রতিষ্ঠানের কোন নির্দেশ কাঙ্ক্ষরী করিতে হইলে সদস্য-রাষ্ট্রগুলির মাধ্যমে করিতে হয়।

সপ্তমতঃ, যুক্তরাষ্ট্রের বিভিন্ন আঞ্চলিক সরকারগুলি যুক্তরাষ্ট্রের অবিচ্ছেদ্য অংশ বলিয়া পরিগণিত হয়। যুক্তরাষ্ট্র একটি স্থায়ী রাষ্ট্রসংগঠন, সুতরাং আঞ্চলিক সরকারগুলি কোনক্রমেই যুক্তরাষ্ট্র হইতে বিচ্ছিন্ন হইতে পারে না। তাহাদের বিচ্ছিন্ন হইবার প্রচেষ্টা বিদ্রোহ বলিয়া গণ্য হয় ও বলপ্রয়োগে এই বিদ্রোহ দমন করা যাইতে পারে। অপরপক্ষে, সন্ধি-সমবায় অস্থায়ী। সদস্য-রাষ্ট্রগুলি স্বাধীন ইচ্ছাপ্রণোদিত হইয়া নিজেদের কতকগুলি সাধারণ স্বার্থসংরক্ষণের নিমিত্ত সাময়িকভাবে ঐক্যবদ্ধ হয়। উদ্দেশ্য সাধন হইলে অথবা অন্ত কোন কারণে তাহারা ইচ্ছামত সন্ধি-সমবায় হইতে বিচ্ছিন্ন

হইতে পারে। আবার, অনেক সময় মার্কিন দেশ ও সুইজারল্যান্ডের মত সন্ধি-সমবায় যুক্তরাষ্ট্রেও পরিণত হইতে পারে।

জার্মান ভাষায় যুক্তরাষ্ট্র একটি সম্মিলিত রাষ্ট্র (Bundestaat) বলিয়া পরিচিত, আর সন্ধি-সমবায়কে বলা হয় রাষ্ট্রের সম্মেলন বা সমবায় (Staatenbund)। যুক্তরাষ্ট্র সার্বভৌম শক্তিসম্পন্ন একটিমাত্র রাষ্ট্রের অস্তিত্ব সূচিত করে, আর সন্ধি-সমবাসে পৃথক্ সার্বভৌম ক্ষমতাসম্পন্ন বহুসংখ্যক রাষ্ট্রের অস্তিত্ব প্রকাশ পায়। সুতরাং যুক্তরাষ্ট্র ও সন্ধি-সমবাসের মধ্যে মূলগত পার্থক্য সার্বভৌম ক্ষমতার অবস্থানের পার্থক্যের ভিত্তির উপর প্রতিষ্ঠিত।

এককেন্দ্রীয় রাষ্ট্রের গুণ (Merits of Unitary Government)

এককেন্দ্রীয় রাষ্ট্রে, কি শাসনব্যাপারে বা কি আইন-প্রণয়নে, কেন্দ্রীয় সরকারের অবাধ আধিপত্য থাকে। সেইজন্য দেশের সর্বত্র একই প্রকারের আইন প্রচলিত হয়; শাসনপদ্ধতিতেও সর্বত্র একই নীতি অনুসৃত হয়। সুতরাং অখণ্ডতার জন্তই এককেন্দ্রীয় সরকার যুক্তরাষ্ট্র অপেক্ষা অধিকতর শক্তিশালী হয়। দ্বিতীয়তঃ, আভ্যন্তরীণ শাসনকার্য-পরিচালনায় বা বৈদেশিক ব্যাপারে এককেন্দ্রীয় সরকারকে আঞ্চলিক সরকারগুলির মতামতের উপর নির্ভর করিতে হয় না। জরুরী ব্যাপারে তাই দ্রুত সিদ্ধান্ত করা এককেন্দ্রীয় সরকারের পক্ষে সহজসাধ্য। তৃতীয়তঃ, দেশে একটিমাত্র শাসনব্যবস্থা চালু থাকার জন্ত কোন বিষয়ে মতভেদ বা অনৈক্যের সম্ভাবনাও কম থাকে। চতুর্থতঃ, দেশের শাসনকার্য একটিমাত্র সরকার কর্তৃক পরিচালিত হয় বলিয়া ব্যয়সংকোচ করা সম্ভব হয়।

অপগুণ (Demerits)

বর্তমান গণতান্ত্রিক যুগে এককেন্দ্রীয় সরকারের উপযোগিতা অনেক পরিমাণে হ্রাস পাইয়াছে। এই শাসনব্যবস্থায় গণতান্ত্রিক আদর্শকে কার্যকর করা সম্ভব হয় না। কেন্দ্রীয় সরকারের প্রাধাণ্যের জন্ত আঞ্চলিক সরকার-গুলির আদৌ কোন ক্ষমতা থাকে না। সুতরাং স্থানীয় ব্যাপারগুলির শাসনপরিচালনায়ও স্থানীয় লোকের কোনরূপ কর্তৃত্ব থাকে না। ফলে,

স্থানীয় স্বায়ত্তশাসন প্রতিষ্ঠিত হইতে পারে না। অধিকন্তু কেন্দ্রীয় আমলাতন্ত্র ক্রমেই শক্তিশালী হইয়া গণতান্ত্রিক প্রতিষ্ঠান গঠনে বাধা দেয়।

দ্বিতীয়তঃ, এককেন্দ্রীয় সরকারের প্রধান দোষ হইল যে, কেন্দ্রীয় সরকার দূরে অবস্থিত বলিয়া বিভিন্ন অঞ্চলগুলির নানাবিধ স্থানীয় সমস্যার দ্রুত সমাধান হওয়া একপ্রকার অসম্ভব হইয়া পড়ে। শাসনব্যাপারে কোনরূপ অংশ গ্রহণ করিবার ক্ষমতা না থাকার দরুন জনগণও রাজনৈতিক ব্যাপারে কোনরূপ উৎসাহ বোধ করে না। তৃতীয়তঃ, শাসন-পরিচালনার সমস্ত ভার একটিমাত্র সরকারের হস্তে লুপ্ত বলিয়া ইহার উপর অত্যধিক পরিমাণে কার্যের চাপ পড়ে। সুতরাং কেন্দ্রীয় সরকারের পক্ষে কোন কার্যই স্বল্পভাবে পরিচালনা করা সম্ভব হয় না।

যুক্তরাষ্ট্রের শ্রেষ্ঠত্ব (Merits of Federal Government)

যুক্তরাষ্ট্রীয় ব্যবস্থা হইতে অনেক সুবিধা পাওয়া যায়। প্রথমতঃ, এই শাসনব্যবস্থা দ্বারা বিচ্ছিন্ন দেশকে একত্রিত করা সম্ভব হয়, অথচ এই একত্রীকরণের দরুন বিভিন্ন অঞ্চলগুলির বৈশিষ্ট্যের কোনরূপ হানি হয় না। এইরূপে মার্কিন যুক্তরাষ্ট্র, সুইজারল্যান্ড প্রভৃতি দেশে আঞ্চলিক বৈচিত্র্যকে অস্বীকার না করিয়াও বিভিন্ন অঞ্চলগুলির মধ্যে সমন্বয় সাধন করা সম্ভব হইয়াছে। দ্বিতীয়তঃ, একটি বিরাট নানা ভাষাভাষী ও নানা জাতি-অধুষিত দেশকে কতকগুলি অঞ্চলে ভাগ করিয়া আঞ্চলিক স্বাভাব্য ও আঞ্চলিক বৈশিষ্ট্য রক্ষা করা যাইতে পারে। ইহাতে আঞ্চলিক স্বাভাব্য ও জাতীয় ঐক্যের মধ্যে কোনরূপ বিরোধ খটিতে পারে না। তৃতীয়তঃ, এই শাসনব্যবস্থার ফলে প্রত্যেকটি অঞ্চল নিজ নিজ বৈশিষ্ট্য অনুসারে নিজেদের প্রয়োজনমত শাসনব্যবস্থা প্রবর্তিত করিয়া স্থানীয় সমস্যাগুলির সমাধান করিতে পারে। এইজন্য তাহাদের দূরবর্তী কেন্দ্রীয় সরকারের উপর নির্ভর করিতে হয় না। চতুর্থতঃ, গণতান্ত্রিক আদর্শ কার্যকর করিবার একমাত্র পন্থা হইল স্থানীয় স্বায়ত্তশাসনের প্রবর্তন। স্থানীয় স্বায়ত্তশাসন প্রবর্তন করিয়া যুক্তরাষ্ট্রীয় সরকার শাসনকার্যে জনগণকে অংশ গ্রহণ করিবার অধিকতর সুযোগ দেয়। এই সুযোগের ফলে জনগণের মধ্যে রাজনৈতিক চেতনা বৃদ্ধি পায়। তাহার শাসনব্যাপারে উৎসাহী হয়। পঞ্চমতঃ, যুক্তরাষ্ট্র

ব্যবস্থায় শাসনকার্যের নানাবিধ উৎকর্ষ সাধিত হয়। কেন্দ্রীয় সরকার ও আঞ্চলিক সরকারগুলির মধ্যে ক্ষমতা বিভাগ হওয়ার দরুণ কেন্দ্রীয় সরকারের উপর শাসনকার্যের সমস্ত ভার থাকে না। এইরূপে শাসনব্যাপারে গুরুভার-মুক্ত হইয়া কেন্দ্রীয় সরকার জাতীয় স্বার্থসংশ্লিষ্ট ব্যাপারগুলিতে অধিকতর মনোযোগ দিয়া সেগুলির উৎকর্ষ সাধন করিতে পারে।

যুক্তরাষ্ট্রের দুর্বলতা (Demerits)

যুক্তরাষ্ট্রের একটি প্রধান দুর্বলতা হইল যে, বিভিন্ন অঞ্চলগুলির জন্ত পৃথক পৃথক শাসনব্যবস্থা চালু থাকার নিমিত্ত শাসনব্যবস্থা অপেক্ষাকৃত জটিল ও ব্যয়সংকুল হইয়া পড়ে। দ্বিতীয়তঃ, ক্ষমতাবিভাগের ফলে কেন্দ্রীয় সরকার দুর্বল হইয়া পড়ে, ফলে আভ্যন্তরীণ শাসনব্যবস্থায় ও বিশেষ করিয়া বৈদেশিক ব্যাপারে সাধারণতঃ যুক্তরাষ্ট্রের দুর্বলতা প্রকাশ পায়। সমস্ত আঞ্চলিক সরকারগুলির মত অনুসারে সর্বসম্মত নীতি নির্ধারণ করা অনেক সময় অসম্ভব হইয়া পড়ে। ফলে, জরুরী অবস্থার উদ্ভব হইলেও কোন বিষয়ে দ্রুত সিদ্ধান্ত গ্রহণ করা সম্ভব হয় না। তৃতীয়তঃ, এই শাসনব্যবস্থায় কয়েকটি বৃহৎ অঞ্চল একত্রিত হইয় শক্তিশালী একটি দল গঠন করিতে পারে। এই দল ইচ্ছা করিলে রাষ্ট্রীয় সরকারের কার্যে বাধা দিতে পারে। চতুর্থতঃ, যুক্তরাষ্ট্রে বিভিন্ন অঞ্চলগুলির মধ্যে বিরোধের সম্ভাবনা থাকে। বিভিন্ন অঞ্চলগুলির পৃথক হইয়া স্বাধীন রাষ্ট্র গঠন করিবার প্রয়াসও পাইতে পারে।

উপরি-উক্ত দুর্বলতাগুলি থাকা সত্ত্বেও বলিতে হইবে যে, যুক্তরাষ্ট্র ব্যবস্থা দিন দিন জনপ্রিয় শাসনব্যবস্থা বলিয়া পরিগণিত হইতেছে। উল্লিখিত দুর্বলতাগুলিকে বাস্তবক্ষেত্রে কোথাও সক্রিয়ভাবে কার্যকরী হইয়া উঠিতে দেখা যায় না। যুক্তরাষ্ট্রের বিভিন্ন অঞ্চলগুলির বিচ্ছিন্ন হইয়া যাওয়ার উদাহরণ আধুনিক কালে বিরল। পরন্তু, যুক্তরাষ্ট্র ব্যবস্থা হইল একমাত্র শাসনব্যবস্থা, বাহার দ্বারা জাতীয় ঐক্য ও আঞ্চলিক স্বাধীনতা—এই দুইটি বিপরীত শক্তির সমন্বয় সাধন করা সম্ভবপর হইয়াছে। মার্কিন দেশে যুক্তরাষ্ট্র ব্যবস্থা প্রবর্তিত হইলে সে দেশ আজ জগৎসভায় এত উচ্চ আসনের অধিকারী হইতে পারিত না। সুইজারল্যান্ডের বিভিন্ন ক্যান্টনগুলি একত্রিত না হইলে—ইয়ুরোপ মহাদেশের শান্তি আরও বহুবার বিস্ত্রিত হইত।

ক্যানাডায় যুক্তরাষ্ট্র প্রবর্তিত না হইলে ইংরাজ ও ফরাসী জাতি আজ এক অঞ্চল জাতিতে পরিণত হইয়া স্থল ও সম্প্রীতিতে বাস করিতে পারিত না। অধ্যাপক ল্যান্সি বলেন, যেদিন বিশ্বরাষ্ট্রসমূহকে এই যুক্তরাষ্ট্রের ভিত্তিতে সংঘবদ্ধ করা সম্ভব হইবে সেদিন জগতে স্থায়ী শান্তি প্রতিষ্ঠিত হইবে।

মন্ত্রিসংসদ-চালিত সরকার (Parliamentary or Cabinet Form of Government)

মন্ত্রিসংসদ-চালিত সরকারের শাসনবিভাগের সমুদয় ক্ষমতা একটি মন্ত্রিসভার হস্তে স্তম্ভ থাকে এবং মন্ত্রিসভাই এই সমুদয় ক্ষমতা কার্যক্ষেত্রে প্রয়োগ করেন। কিন্তু এই শাসনব্যবস্থায় আইনতঃ সমস্ত ক্ষমতার অধিকারী হইলেন একজন নামসর্বস্ব রাজা কিংবা নির্বাচিত একজন রাষ্ট্রপতি। রাজা বা রাষ্ট্রপতির নামে সমস্ত কার্য পরিচালিত হইলেও তাঁহার নিজস্ব কোন ক্ষমতা থাকে না। মন্ত্রিসংসদই শাসন পরিচালনা করেন। আইনসভার সংখ্যাগরিষ্ঠদের নেতারা মন্ত্রিসংসদ গঠন করিয়া আইনসভার অল্পমোদনে সমস্ত শাসনকার্য পরিচালনা করেন। মন্ত্রিসংসদ তাহাদের নীতি ও কার্যের জন্য আইনসভার নিকট দায়ী থাকেন। মন্ত্রিসভার কার্য যদি আইনসভা কর্তৃক অল্পমোদিত না হয়, তাহা হইলে মন্ত্রিসভার পদত্যাগ করিতে হয়। মন্ত্রিসংসদ-চালিত সরকারের বৈশিষ্ট্য হইল, শাসনবিভাগীয় ও আইনবিভাগীয় ক্ষমতার একত্র সমাবেশ। এই ব্যবস্থায় ক্ষমতার কোনরূপ স্বাভাব্যবিধান করা হয় না। মন্ত্রিগণকে আইনসভার সদস্য হইতে হয়। আইনসভার সদস্য হিসাবে তাঁহারা আইন প্রণয়ন করিতে পারেন, সরকারের আয়-ব্যয় নির্ধারণ করিতে পারেন ও শাসনবিভাগীয় সমুদয় কার্য পরিচালনা করিয়া থাকেন। কিন্তু আইনসভা যদি মন্ত্রিগণের উপর অনাস্থা প্রকাশ করে, তাহা হইলে মন্ত্রিগণলীক হয় পদত্যাগ করিতে হয় নতুবা আইনসভা ভাঙ্গিয়া দিয়া নূতন নির্বাচনের ব্যবস্থা করিতে হয়। এই নূতন নির্বাচনের ফলের উপর মন্ত্রিসংসদের অস্তিত্ব নির্ভর করে। নূতন নির্বাচনে যদি বিরোধী দল সংখ্যাগরিষ্ঠতা লাভ করে, তাহা হইলে তাহাদের পদত্যাগ বাধ্যতামূলক হয়। সুতরাং এই শাসনব্যবস্থায় প্রকৃত শাসকগোষ্ঠী অর্থাৎ মন্ত্রিসংসদ

প্রত্যক্ষভাবে আইনসভার নিকট এবং পরোক্ষভাবে নির্বাচকমণ্ডলীর নিকট দায়ী থাকেন—এইজন্য ইহাকে দায়িত্বশীল সরকার (Responsible Government) বলা হয়। এই শাসনব্যবস্থায় শাসনবিভাগ ও আইন-বিভাগের মধ্যে পারস্পরিক সহযোগিতা ও নির্ভরশীলতা দেখিতে পাওয়া যায়।

মন্ত্রিসংসদ-চালিত সরকারের উৎপত্তি হয় ইংলণ্ডে ও অন্যান্য দেশসমূহ ইংলণ্ডের শাসনব্যবস্থার অনুকরণে প্রয়োজন অনুসারে এই শাসনব্যবস্থার কিছু পরিবর্তন করিয়া নিজ নিজ দেশে প্রবর্তন করিয়াছে। ফরাসী দেশ, কানাডা, অস্ট্রেলিয়া, ভারত প্রভৃতি দেশে এই শাসনব্যবস্থা প্রবর্তিত হইয়াছে। সাধারণ নির্বাচনের পর আইনসভায় যে রাজনৈতিক দল সংখ্যাগরিষ্ঠতা লাভ করে, সেই দল মন্ত্রিসংসদ গঠন করে। দলের প্রধান নেতা প্রধান মন্ত্রিরূপে পরিচিত হইয়া মন্ত্রিমণ্ডলীর সংহতি বজায় রাখেন। মন্ত্রিসংসদ আইনসভার নিকট দায়ী থাকেন ও আইনসভা কর্তৃক তাঁহাদের কার্য নিয়ন্ত্রিত হয় বলিয়া এই সরকারকে আইনসভা-প্রধান (Parliamentary Government) বলা হয়।

রাষ্ট্রপতি-চালিত সরকার (Presidential or Non-Parliamentary Government)

রাষ্ট্রপতি-চালিত সরকার একজন রাষ্ট্রনায়ক নির্দিষ্ট কালের জন্য পরিচালনা করেন। এই শাসনব্যবস্থায় শাসনবিভাগীয় কর্তৃপক্ষ শাসনতন্ত্র অনুসারে আইনসভার কর্তৃত্বাধীন নহে। অপরপক্ষে, আইনসভাও শাসন-কর্তৃপক্ষের প্রভাবমুক্ত হইয়া কার্য পরিচালনা করে। এই শাসনব্যবস্থা ক্ষমতার প্রায় সম্পূর্ণ স্বাতন্ত্র্যবিধানের উপর প্রতিষ্ঠিত। শাসনকর্তৃপক্ষ ও আইনসভার মধ্যে নামমাত্র যোগাযোগ থাকে। মার্কিন যুক্তরাষ্ট্রে এই শাসনব্যবস্থা প্রচলিত আছে।

মার্কিন যুক্তরাষ্ট্রের শাসনবিভাগের উচ্চতম কর্তৃপক্ষ হইলেন রাষ্ট্রপতি। তিনি জনগণ কর্তৃক পরোক্ষভাবে চারি বৎসরের জন্য নির্বাচিত হইয়া থাকেন। তাঁহার এই চারি বৎসর কার্যকালের মধ্যে কেহই তাঁহাকে অপসারিত করিতে পারে না। তাঁহার সহকারী মন্ত্রিপরিষদের সদস্যগণকে

তিনি নিয়োগ করেন এবং বরখাস্তও করিতে পারেন। মন্ত্রিগণ তাঁহার অধস্তন কর্মচারী। রাষ্ট্রপতির নির্দেশ ব্যতীত তাঁহাদের ব্যক্তিগত অভিমত বা দায়িত্ব কিছুমাত্র নাই। রাষ্ট্রপতির সহিত আইনসভার প্রত্যক্ষ কোন যোগসূত্র নাই। তিনি আইনসভার সদস্য নহেন ও আইন-প্রণয়নে তাঁহার প্রত্যক্ষ কোন প্রভাব নাই। আইনসভা অনায়াসে প্রস্তাব পাস করিয়া তাঁহাকে পদচ্যুত করিতে পারে না। এক কথায়, রাষ্ট্রপতিকে গ্রেট ব্রিটেনের মন্ত্রিসংসদের ন্যায় আইনসভার উপর নির্ভর করিতে হয় না। অবস্থা অল্পসারে ব্যবস্থা গ্রহণ করিবার শাসনতন্ত্রানুসারে ক্ষমতা রাষ্ট্রপতির আছে। এইজন্য আইনসভার নিকটে তাঁহার কোন দায়িত্ব নাই। অপরপক্ষে, আইনসভার কার্যেও রাষ্ট্রপতি হস্তক্ষেপ করিতে পারেন না। আইনসভা ভাঙ্গিয়া দিবার ক্ষমতা রাষ্ট্রপতির নাই।

মন্ত্রিসংসদ-চালিত সরকার ও রাষ্ট্রপতি-চালিত সরকারের পার্থক্য (Points of difference between Parliamentary and Presidential Forms of Government)

১। মন্ত্রিসংসদ-চালিত শাসনব্যবস্থায় নামসর্বস্ব বংশানুক্রমিক একজন রাজা বা নির্বাচিত রাষ্ট্রপতি থাকেন। ইনি শাসনতান্ত্রিক আইনানুসারে রাষ্ট্রের প্রধান শাসনকর্তৃপক্ষ বলিয়া বিবেচিত হইলেও কার্যতঃ ইনি প্রকৃত ক্ষমতার অধিকারী নহেন। ইংলণ্ডের রাজা, ভারতের রাষ্ট্রপতি ও ক্যানাডার গভর্নর-জেনারেল ইহার প্রকৃষ্ট উদাহরণ।

অপরপক্ষে রাষ্ট্রপতি-চালিত শাসনব্যবস্থার প্রধান বৈশিষ্ট্য হইল যে, রাষ্ট্রপতি শুধু নামসর্বস্ব শাসক-প্রধান নহেন, পরন্তু তিনি প্রকৃত ক্ষমতার অধিকারী। তিনি ভোটদাতাগণ কর্তৃক প্রত্যক্ষ অথবা পরোক্ষভাবে নির্বাচিত হইয়া থাকেন।

২। মন্ত্রিসংসদ-চালিত সরকারের প্রকৃত ক্ষমতার অধিকারী হইল মন্ত্রিসংসদ। মন্ত্রিসংসদের নির্ধারিত কার্যকাল থাকিলেও তৎপূর্বে আইনসভার অনায়াস প্রস্তাবে ইঁহারা পদত্যাগ করিতে বাধ্য হইতে পারেন, কিন্তু রাষ্ট্রপতি-চালিত সরকারের প্রকৃত শাসনক্ষমতার অধিকারী রাষ্ট্রপতির নির্বাচনপদ্ধতি ও কার্যকালের স্থায়িত্ব সম্পূর্ণরূপে শাসনতান্ত্রিক আইন দ্বারা

নির্ধারিত হয়। বিশেষ বিচারব্যবস্থা ব্যতীত রাষ্ট্রপতিকে পদচ্যুত করা যায় না।

৩। মন্ত্রিসংসদ-চালিত শাসনব্যবস্থায় মন্ত্রিমণ্ডলী আইনসভার উপর সম্পূর্ণরূপে নির্ভরশীল—যতদিন তাঁহারা আইনসভার আস্থাভাজন থাকেন ততদিন পর্যন্ত ক্ষমতায় অধিষ্ঠিত থাকিতে পারেন। এদিক দিয়া দেখিতে গেলে রাষ্ট্রপতি-চালিত শাসনব্যবস্থায় রাষ্ট্রপতি সম্পূর্ণরূপে আইনসভা-নিরপেক্ষ ও আইনসভার প্রভাবমুক্ত থাকিয়া তাঁহার শাসনতন্ত্র-নির্ধারিত কার্যকাল পর্যন্ত শাসনকার্য পরিচালনা করিতে পারেন। আইনসভার আস্থা বা অনাস্থা প্রস্তাবে তাঁহার পদমর্যাদা বা কার্যকাল ক্ষুণ্ণ হয় না।

৪। মন্ত্রিসংসদ-চালিত শাসনব্যবস্থায় মন্ত্রিসংসদ সাধারণতঃ সংখ্যাগরিষ্ঠ দলের নেতৃবর্গের দ্বারা গঠিত হয়। প্রধান মন্ত্রী এই নেতৃবর্গের লীধস্থানীয় হইলেও প্রধান মন্ত্রিসহ সমুদয় সদস্য সমপর্যায়ভুক্ত সহকর্মী। মন্ত্রিসংসদের সিদ্ধান্তগুলি সংখ্যাগরিষ্ঠ ভোট দ্বারা স্থিরীকৃত হয়।

অপরপক্ষে রাষ্ট্রপতি-চালিত শাসনব্যবস্থায় একমাত্র রাষ্ট্রপতিই হইলেন শাসনক্ষমতার অধিকারী—সুতরাং তাঁহার মন্ত্রণাসভার সদস্যগণ তাঁহার আজ্ঞাবহ অধস্তন কর্মচারী মাত্র। এক রাষ্ট্রপতি স্বয়ং ব্যতীত দলের প্রভাব-প্রতিপত্তিশালী অন্তান্ত নেতৃবর্গ সাধারণতঃ আইনসভার সদস্য থাকেন—কদাচিৎ তাঁহাদের মন্ত্রণাসভায় দেখিতে পাওয়া যায়। মন্ত্রণাসভার সদস্যগণ রাষ্ট্রপতি কর্তৃক নিযুক্ত হন ও রাষ্ট্রপতি ইচ্ছা করিলে তাঁহাদিগকে পদচ্যুত করিতে পারেন। মন্ত্রণাসভার সিদ্ধান্তগুলি একমাত্র রাষ্ট্রপতির মতামতের উপর নির্ভর করে।

৫। মন্ত্রিসংসদ-চালিত শাসনব্যবস্থায় শাসনকর্তৃপক্ষ ও আইনসভার মধ্যে ক্ষমতার কোন স্বাতন্ত্র্যিকরণ পরিদৃষ্ট হয় না। মন্ত্রিসংসদের সমুদয় সদস্যকে আইনসভার সদস্য হইতে হয় এবং আইনসভার সদস্য হিসাবে তাঁহারা আইন-প্রণয়ন, নীতি-নির্ধারণ ও আয়-ব্যয় নিয়ন্ত্রণ করিয়া থাকেন। ইহারা আইনসভার নিকট ইহাদের কার্যের জ্ঞাত দায়ী থাকেন—আবার আইনসভার সহিত মতভেদ হইলে আইনসভা ভাঙ্গিয়া দিতে পারেন।

অপরপক্ষে রাষ্ট্রপতি-চালিত শাসনব্যবস্থায় শাসনবিভাগ ও আইনসভার মধ্যে প্রায় সম্পূর্ণ ক্ষমতা স্বাতন্ত্র্যিকরণ-নীতি প্রযুক্ত হইয়াছে। রাষ্ট্রপতি

আইনসভার সদস্য নহেন। তিনি বে-সরকারী সদস্যের সাহায্য ব্যতীত আইন-প্রণয়ন কার্বে যোগদান করিতে পারেন না বা প্রত্যক্ষভাবে আইন-প্রণয়ন কার্বে উপর প্রভাব বিস্তার করিতে পারেন না। তিনি আইনসভা ভাঙ্গিয়া দিতে পারেন না বা আইনসভাও বিশেষ বিচারপদ্ধতির আশ্রয় গ্রহণ না করিয়া তাঁহাকে পদচ্যুত করিতে পারে না। মার্কিন যুক্তরাষ্ট্র হুইল রাষ্ট্রপতি-চালিত শাসনব্যবস্থার প্রকৃষ্ট উদাহরণ।

মন্ত্রিসংসদ-চালিত সরকারের সুবিধা ও অসুবিধা (Merits and Demerits of Cabinet Government)

মন্ত্রিসংসদ-চালিত শাসনব্যবস্থার প্রধান সুবিধা হইল যে, শাসনবিভাগ ও আইনবিভাগ পারস্পরিক সহযোগিতার ভিত্তির উপর প্রতিষ্ঠিত বলিয়া শাসনকার্য বিনা বাধায় সুচারুভাবে সম্পন্ন হয়। দ্বিতীয়তঃ, মন্ত্রিসংসদ আইনসভার নিকট তাঁহাদের কার্বের দ্রুত দায়ী থাকেন বলিয়া শাসনব্যবস্থায় কোনরূপ শৈথিল্য বা স্বেচ্ছাচারিতার সম্ভাবনা থাকে না। মন্ত্রিসভা যে শাসনব্যবস্থা গ্রহণ করেন তাহা সংখ্যাধিকোর বলে আইনসভার অনুমোদন লাভ করে। দলগত ভিত্তির উপর প্রতিষ্ঠিত বলিয়া মন্ত্রিসংসদের সর্বদাই দলের নীতি অনুযায়ী কার্য করিতে হয়। তৃতীয়তঃ, জনগণের স্বার্থবিরোধী কোনরূপ কার্য করিলে ভবিষ্যতে ইঁহারা জনগণের সমর্থনলাভে বঞ্চিত হইতে পারেন—এইজন্য জনস্বার্থ সম্বন্ধে উদাসীন থাকা বা জনমত উপেক্ষা করা ইঁহাদের পক্ষে সম্ভব নয়। চতুর্থতঃ, এই শাসনব্যবস্থায় পারস্পরিক আলাপ-আলোচনার যথেষ্ট সুযোগ আছে। আলাপ-আলোচনার দ্বারা মতভেদ দূর করিয়া সিদ্ধান্ত গ্রহণ করা হয় বলিয়া শাসনব্যবস্থা অপেক্ষাকৃত সুদৃঢ় হয়। পঞ্চমতঃ, মন্ত্রিসংসদ-চালিত সরকার সহজেই প্রয়োজনমত পরিবর্তন করা যায় বলিয়া জরুরী অবস্থায় ইহা বিশেষ কার্যকরী হয়। ইংলণ্ডে যুদ্ধকালে সর্বদলীয় মন্ত্রিসভা বা অপেক্ষাকৃত ক্ষুদ্র মন্ত্রিসভা গঠন করিয়া শাসনকার্য পরিচালনা করিতে কোনরূপ বেগ পাইতে হয় না।

উল্লিখিত সুবিধাগুলি থাকা সত্ত্বেও মন্ত্রিসংসদ-চালিত শাসনব্যবস্থায় কতকগুলি মারাত্মক ত্রুটি দেখা দেয়। মন্ত্রিমণ্ডলীর সদস্যগণ যদি একমত না হইতে পারেন, তাহা হইলে শাসনব্যবস্থা পদে পদে ব্যাহত হইবার সম্ভাবনা

থাকে। বিশেষ করিয়া আপংকালে এই ঐকমত্যের অভাবে শাসনব্যবস্থা ভাঙ্গিয়া পড়িতে পারে। দ্বিতীয়তঃ, যে সমস্ত দেশে অনেকগুলি রাজনৈতিক দলের অস্তিত্ব আছে, সে সমস্ত দেশে মন্ত্রিমণ্ডলী পুনঃপুনঃ পরিবর্তনের ফলে শাসনব্যবস্থায় কোনরূপ প্রকৃত প্রগতিশীল নীতি অনুসৃত হইতে পারে না। ফরাসী মন্ত্রিসভার এইটি ছিল প্রধান ত্রুটি। দলীয় সমর্থনের উপর প্রতিষ্ঠিত বলিয়া দলগঠনের কোনরূপ পরিবর্তন খটিলেই মন্ত্রিসভার পরিবর্তন অবশ্যজ্ঞাবী হইয়া পড়ে। সুতরাং এই শাসনব্যবস্থার বিশেষ কোন স্থায়িত্ব নাই। তৃতীয়তঃ, এই শাসনব্যবস্থার দুর্বলতা দুই দিক দিয়া প্রকটিত হয়। ইংলণ্ডে এই শাসনব্যবস্থা মন্ত্রিসংসদের বিশেষ করিয়া প্রধানমন্ত্রীর একনায়কত্বে পর্ববসিত হইয়াছে। মন্ত্রিসংসদের আইনসভা ভাঙ্গিয়া দিয়া নূতন নির্বাচনের ব্যবস্থা করিবার ক্ষমতা থাকায় আইনসভা বর্তমানে একটি তাঁবেদার আইনসভায় পরিণত হইয়াছে। ফলে, মন্ত্রিসংসদ সর্ববিষয়ে অবাধ কর্তৃত্বের অধিকারী হইয়াছে। ফরাসী দেশে আবার আইনসভার হস্তে মন্ত্রিসংসদকে ইচ্ছামত অপসারিত করিবার ক্ষমতা থাকায় সেখানে কোন মন্ত্রিসংসদই স্থায়িত্ব লাভ করিতে পারিত না।

রাষ্ট্রপতি-চালিত শাসনব্যবস্থার সুবিধা ও অসুবিধা (Merits and Demerits of Presidential Government)

রাষ্ট্রপতি-চালিত সরকারের প্রধান গুণ হইল যে, ইহা অপেক্ষাকৃত স্থায়ী শাসনব্যবস্থা। নির্দিষ্ট সময়ের জন্য রাষ্ট্রপতি জনগণ কর্তৃক নির্বাচিত হইয়া থাকেন। ঐ সময়পর্বন্ত তিনি নিজের নীতি অনুসরণ করিতে পারেন। দ্বিতীয়তঃ, জরুরী অবস্থায় বা জটিল পরিস্থিতিতে যেখানে দ্রুত সিদ্ধান্ত গ্রহণ করা আবশ্যক সেখানে রাষ্ট্রপতি-চালিত সরকার অধিকতর উপযোগী। তৃতীয়তঃ, এই শাসনব্যবস্থায় মন্ত্রিমণ্ডলীকে আইনসভায় উপস্থিত থাকিয়া তাঁহাদের কার্যকলাপের জন্য জবাবদিহি করিতে হয় না, সুতরাং মন্ত্রিমণ্ডলী একাগ্রচিত্তে শাসন পরিচালনা কার্যে মনঃসংযোগ করিতে পারেন। ইহাতে শাসনব্যবস্থার উৎকর্ষ সাধিত হয়। চতুর্থতঃ, আইন-প্রণয়ন-ব্যাপারেও আইনসভা শাসনকর্তৃপক্ষের প্রভাবমুক্ত হইয়া দেশের প্রয়োজন অনুসারে আইন প্রণয়ন করিতে পারে।

কিন্তু এই শাসনব্যবস্থার প্রধান ত্রুটি হইল যে, আইনসভা ও শাসন-বিভাগের মধ্যে ক্ষমতার স্বাতন্ত্র্যবিধানের জন্ত ইহারা সহযোগিতার ভিত্তিতে কার্য পরিচালনা করিতে পারে না। কোন কারণে যদি শাসনকর্তৃপক্ষের সহিত আইনসভার মতবিরোধ বা সংঘর্ষ হয়, তাহা হইলে শাসনব্যবস্থায় অচল পরিস্থিতির উদ্ভব হইতে পারে। ফলে, জাতীয় স্বার্থের হানি হইবার সম্ভাবনা থাকে। দ্বিতীয়তঃ, এই শাসনব্যবস্থায় শাসনকর্তৃপক্ষ দায়িত্বহীন হইয়া পড়িতে পারে। যে নির্দিষ্টকালের জন্ত রাষ্ট্রপতি জনগণ কর্তৃক পরীক্ষিতভাবে নির্বাচিত হন, সেই সময়ের মধ্যে তাঁহাকে পদচ্যুত করা যায় না। রাষ্ট্রপতি তাঁহার কার্যের জন্ত কাহারও নিকট তাঁহার কার্যকালে দায়ী নহেন। জনগণ বা আইনসভা বা মন্ত্রিসংসদ তাঁহার কার্যের জন্ত কৈকিৎ তলব করিতে পারে না। সুতরাং রাষ্ট্রপতি ইচ্ছা করিলে তাঁহার খুশিমত শাসনকার্য পরিচালনা করিতে পারেন। তৃতীয়তঃ, এই শাসনব্যবস্থায় সরকারের বিভিন্ন বিভাগের মধ্যে যোগসূত্র না থাকার ফলে পারস্পরিক সহযোগিতার ভিত্তিতে শাসনব্যবস্থা পরিচালিত হইতে পারে না। কিন্তু রাজনৈতিক দলের আবির্ভাব হইয়া দলীয় ভিত্তিতে শাসনব্যবস্থা প্রবর্তন হওয়ার ফলে বর্তমানে বিভিন্ন বিভাগের মধ্যে যোগসূত্র স্থাপিত হইয়া শাসনকার্য অনেক পরিমাণে পারস্পরিক সহযোগিতার ভিত্তিতে পরিচালিত হইতেছে।

বিকেন্দ্রন বা বিকেন্দ্রীকরণ (Decentralisation)

বিকেন্দ্রীকরণের অর্থ হইল শীর্ষস্থানীয় কর্তৃপক্ষের হস্ত হইতে কর্তৃত্ব ও সিদ্ধান্ত গ্রহণ করিবার ক্ষমতা অধস্তন কর্তৃপক্ষের হস্তে গ্রাস্ত করা। বিকেন্দ্রীকরণ আধুনিক শাসনব্যবস্থার একটি গুরুত্বপূর্ণ নীতি। এই নীতি অনুসারে প্রশাসন ও আইন-প্রণয়ন ব্যাপারে কেন্দ্রীয় সরকার নির্ধারিত বিষয়ে ক্ষমতা স্থানীয় সরকারগুলিকে হস্তান্তরিত করে এবং হস্তান্তরিত ক্ষমতা সম্পর্কে কেন্দ্রীয় সরকার কোন হস্তক্ষেপ করে না। কেন্দ্রীকরণ (centralisation) ব্যবস্থায় ইহার বিপরীত ঘটে। সরকারের সমগ্র ক্ষমতাই কেন্দ্রীয় সরকারের হস্তে কেন্দ্রীভূত থাকে। স্থানীয় সরকার-গুলি শুধু কেন্দ্রীয় সরকারের প্রতিনিধি হিসাবে কাজ করে। ইহাদের কোন স্বাধীন ক্ষমতা থাকে না। সুতরাং বিকেন্দ্রীকরণ ব্যবস্থায় স্থানীয়

সরকারগুলি যে রূপে আত্মনিয়ন্ত্রণশীল (autonomous) হয়, কেন্দ্রীকরণ ব্যবস্থায় স্থানীয় সরকারগুলি সে রূপে আত্মনিয়ন্ত্রণশীল নহে—ইহারা সর্ববিষয়ে কেন্দ্রীয় সরকারের নিয়ন্ত্রণাধীন থাকে।

আধুনিক রাষ্ট্রগুলির প্রশাসনিক ক্ষেত্রে এই দুইটি বিপরীতমুখী প্রবণতা পাশাপাশি দেখিতে পাওয়া যায়। শাসনব্যবস্থাকে সুদক্ষ করিবার উদ্দেশ্যে কোন কোন ক্ষেত্রে কেন্দ্রীকরণ নীতি গ্রহণ করা হয়। আবার শাসনব্যবস্থার গণতান্ত্রিক কাঠামো অব্যাহত রাখিবার উদ্দেশ্যে কোথায়ও বা বিকেন্দ্রীকরণ নীতি অবলম্বন করা হয়। ভারতের শাসনব্যবস্থায় এই উভয় নীতির প্রয়োগ দেখা যায়। অর্থনৈতিক উন্নয়ন ও শক্তিশালী প্রতিরক্ষা ব্যবস্থা গঠন করিবার উদ্দেশ্যে কেন্দ্রীয় সরকারের হস্তে সর্বক্ষমতা কেন্দ্রীভূত করা হইয়াছে, অপর পক্ষে দেশে প্রচুর গণতান্ত্রিক শাসন প্রবর্তনের উদ্দেশ্যে পঞ্চায়েতরাজ প্রতিষ্ঠিত হইয়াছে।

বিকেন্দ্রীকরণের প্রয়োজনীয়তা—Need for Decentralisation

আধুনিক কল্যাণ-রাষ্ট্রের কার্যাবলীর ব্যাপকতা এরূপ বৃদ্ধি পাইয়াছে যে, কোন একটিমাত্র কেন্দ্রীয় সরকারের পক্ষে সর্ববিষয়ে পুংখানুপুংখরূপে আইন প্রণয়ন ও প্রশাসনিক ব্যাপার পরিচালনা করা সম্ভবও নহে, কাম্যও নহে। একত্র তিনটি কারণে ক্ষমতার বিকেন্দ্রীকরণ হওয়া প্রয়োজন।

প্রথমতঃ, কেন্দ্রীকরণ ব্যবস্থায় প্রশাসনিক ক্ষমতা মুষ্টিমেয় তথাকথিত নেতাগণের হস্তে কেন্দ্রীভূত থাকে। ফলে অধিকাংশ লোকই সিদ্ধান্ত গ্রহণ ও ক্ষমতা প্রয়োগের অধিকার হইতে বঞ্চিত হইয়া শাসন ব্যাপারে উদাসীন হইয়া পড়ে। এরূপ শাসনব্যবস্থায় জনসাধারণের সরকারের প্রতি যে আস্থা দেখা যায় তাহা স্বেচ্ছা-প্রণোদিত হইতে পারে না। যে আস্থা সহযোগিতামূলক নহে তাহা কখনই স্বজনশীল হইতে পারে না। বিকেন্দ্রীকরণ সাহায্যে অধিকসংখ্যক লোককে প্রশাসনিক ব্যাপারের সহিত সংশ্লিষ্ট করা সম্ভব হয়। প্রশাসনিক ব্যাপারে অংশ গ্রহণ করিতে অধিকারপ্রাপ্ত জনগণের মধ্যে আত্মদাম্পত্য ও দায়িত্ববোধ বৃদ্ধি পায়। ফলে তাহারা স্বেচ্ছা-প্রণোদিতভাবে রাষ্ট্রের আস্থা গত্য স্বীকার করিয়া স্থানগণিকে পরিণত হয়।

দ্বিতীয়তঃ, বিকেন্দ্রীকরণ পদ্ধতির সাহায্যে বিভিন্ন অঞ্চলের প্রয়োজন অনুসারে বিভিন্ন ধরনের পরীক্ষা ও অনুসন্ধান পরিচালনা দ্বারা কার্যকর ফল পাওয়া সম্ভব হয়। কেন্দ্রীকরণ ব্যবস্থার সমরূপতার (uniformity) পরিবর্তে দেশের বিভিন্ন অংশে প্রয়োজনমত বৈচিত্র্য সৃষ্টি করা সম্ভব হয়।

পরিশেষে বলা যায় যে, কোন একটিমাত্র কেন্দ্রীয় সরকারের পক্ষে সর্ববিধ আইন প্রণয়ন ও শাসন পরিচালনা করা একান্তরূপে অসম্ভব। এইজন্য বিকেন্দ্রীকরণ সাহায্যে স্থানীয় সমস্যাগুলির দ্রুত ও সুস্থ সমাধানের উদ্দেশ্যে স্থানীয় সরকারগুলির হস্তে প্রয়োজনীয় আইন প্রণয়ন ও শাসন পরিচালনা ক্ষমতা হস্তান্তর করা একান্ত প্রয়োজন। এই ব্যবস্থার সাহায্যে একদিকে যে রূপ কেন্দ্রীয় সরকারকে গুরু কার্যভার মুক্ত করা সম্ভব হয় অপর দিকে তদ্রূপ জনসাধারণকে প্রশাসনিক ব্যাপারের সহিত যুক্ত করিয়া গণতান্ত্রিক শাসনব্যবস্থার ভিত্তি সুদৃঢ় ও প্রসারিত করা সম্ভব হয়।

সংক্ষিপ্তসার

এককেন্দ্রীয় ও যুক্তরাষ্ট্রীয় শাসনব্যবস্থা—এককেন্দ্রীয় শাসনব্যবস্থায় সরকারের ক্ষমতার কোনরূপ ভাগ হয় না। কেন্দ্রীয় সরকারই হইল সমুদয় ক্ষমতার একমাত্র অধিকারী। স্থানীয় সরকারগুলি কেন্দ্রীয় সরকারের সৃষ্ট আজ্ঞাবহ সংগঠনমাত্র। কিন্তু যুক্তরাষ্ট্রে কেন্দ্রীয় সরকার ও স্থানীয় সরকারগুলির মধ্যে ক্ষমতার বিভাগ করা হয়। একটি লিখিত ও অনমনীয় শাসনতন্ত্র উভয় সরকারের মধ্যে ক্ষমতা বণ্টন করিয়া দেয়। এককেন্দ্রীয় শাসনব্যবস্থায় লিখিত বা অনমনীয় শাসনতন্ত্র অপরিহার্য নহে বা কোন উচ্চ বিচারালয়েরও প্রয়োজন না হইতে পারে। কিন্তু যুক্তরাষ্ট্রে ক্ষমতাবণ্টন ও উভয় সরকারের পারস্পরিক সম্পর্ক অটুট রাখিবার নিমিত্ত একটি উচ্চ আদালত অপরিহার্য বলিয়া বিবেচিত হয়।

যুক্তরাষ্ট্রের বিশেষত্ব—যুক্তরাষ্ট্র-ব্যবস্থায় নিম্নলিখিত বৈশিষ্ট্যগুলি দেখিতে পাওয়া যায় :—

- ১। একসঙ্গে কেন্দ্রীয় সরকার ও আঞ্চলিক সরকারের অবস্থিতি
- ২। ক্ষমতার বিভাগ। ৩। লিখিত ও অনমনীয় শাসনতন্ত্র। ৪। স্বাধীন বিচারালয়ের অবস্থিতি। ৫। রাজস্বের বণ্টন ইত্যাদি

যুক্তরাষ্ট্রের গঠনপ্রণালী—১। কতকগুলি স্বাধীন রাষ্ট্র একত্রিত হইয়া তাহাদের সার্বভৌমত্ব বিসর্জন দিয়া একরাষ্ট্রে পরিণত হইতে পারে। এরূপ ক্ষেত্রে সাধারণতঃ আঞ্চলিক সরকারগুলি কেন্দ্রীয় সরকার অপেক্ষা অধিক ক্ষমতার অধিকারী হয়। ২। দ্বিতীয়তঃ, একটি এককেন্দ্রীয় শাসনব্যবস্থাকে কতকগুলি স্বায়ত্তশাসনশীল অঞ্চলে বিভক্ত করিয়া কেন্দ্রীয় সরকারকে অধিক ক্ষমতার অধিকারী করা হয়।

যুক্তরাষ্ট্রের সাফল্যের উপায়—যুক্তরাষ্ট্রীয় শাসনব্যবস্থা অপেক্ষাকৃত জটিল। এইজন্য ইহার সাফল্য কতকগুলি অবস্থার উপর নির্ভর করে। অবস্থাগুলি হইল—১। বিভিন্ন অঞ্চলগুলির ভৌগোলিক নৈকট্যের অবস্থিতি। ২। অধিবাসীদের মধ্যে জাতীয়তাবোধের বিद्यমানতা। ৩। কুলগত, ভাষাগত, ধর্মগত ও ঐতিহ্যগত ঐক্যের বিद्यমানতা। ৪। বিভিন্ন অঞ্চলগুলির মধ্যে রাজনৈতিক সমতা। ৫। জনগণের মধ্যে রাজনৈতিক শিক্ষা ও পারস্পরিক সহনশীলতা।

যুক্তরাষ্ট্রে ক্ষমতাবন্টনের নীতি ও পদ্ধতি—জাতীয় স্বার্থসংশ্লিষ্ট বিষয়গুলি, যথা, যোগাযোগ-ব্যবস্থা, প্রতিরক্ষা প্রভৃতি সাধারণতঃ কেন্দ্রীয় সরকারের শাসনাধীন থাকে, আর স্থানীয় স্বার্থ-সংক্রান্ত ব্যাপারগুলি, যথা, কৃষি, শিক্ষা প্রভৃতি আঞ্চলিক সরকারগুলি হস্তে গ্রহণ থাকে। দেশভেদে এই বন্টন-নীতির পার্থক্য দেখা যায়। কোন কোন যুক্তরাষ্ট্রে ক্ষমতাগুলিকে আবার তিনভাগে ভাগ করা হয়। প্রত্যেক যুক্তরাষ্ট্রীয় ব্যবস্থায় যুক্তরাষ্ট্রের অথও অস্তিত্ব বজায় রাখিবার নিমিত্ত কেন্দ্রীয় সরকারের অবাধ ক্ষমতা থাকে ও এইজন্য আঞ্চলিক সরকারগুলিকে মূল রাষ্ট্রীয় সরকারের আনুগত্য স্বীকার করিতে হয়।

যুক্তরাষ্ট্র ও সঙ্ঘ-বন্ধন—সঙ্ঘ-বন্ধনে একাধিক রাষ্ট্র কোন নির্দিষ্ট উদ্দেশ্যসাধনের জন্ত চুক্তি দ্বারা সাময়িকভাবে আবদ্ধ হয়। যুক্তরাষ্ট্রের মত তাহারা তাহাদের পৃথক্ সত্তা বিসর্জন দিয়া একটিমাত্র সার্বভৌম রাষ্ট্রে পরিণত হয় না।

ব্যক্তিগত-বন্ধন—ব্যক্তিগত-বন্ধনে একাধিক রাষ্ট্র একই রাজার অধীনে সম্মিলিত হইলেও তাহাদের পৃথক্ সত্তা সম্পূর্ণভাবে বজায় রাখে।

প্রকৃত-বন্ধন—একাধিক রাষ্ট্র যখন একই রাজার অধীনে মিলিত হইয়া

পররাষ্ট্র সম্পর্কিত ব্যাপারে তাহাদের স্বাধীন পৃথক সভা লোপ করিয়া একরাষ্ট্রে পরিণত হয়, তখন তাহাকে প্রকৃত-বন্ধন বলা হয়। আভ্যন্তরীণ ব্যাপারে ইহাদের স্বাধীন সভা থাকিতে পারে।

সন্ধি-সমবায়—সন্ধি-সমবাসে একাধিক রাষ্ট্র একাধিক উদ্দেশ্য সাধন করিবার জন্ত একটি কেন্দ্রীয় শাসনসংগঠন সৃষ্টি করিয়া সম্মিলিত হয়। কিন্তু এই সম্মেলনের ফলে তাহাদের স্বাধীন সভা লোপ পাইয়া কোন নতন জাতি বা নতন রাষ্ট্রের সৃষ্টি হয় না। রাষ্ট্রগুলি ইচ্ছামত এই সম্মেলন হইতে সম্পর্ক ছেদ করিতে পারে।

এককেন্দ্রীয় রাষ্ট্রের গুণাগুণ—এককেন্দ্রীয় রাষ্ট্রের প্রধান গুণ হইল ইহার অখণ্ডতা, এবং এই অখণ্ডতার জন্ত ইহা অধিকতর শক্তিশালী হইয়া আভ্যন্তরীণ শাসনব্যবস্থা ও বৈদেশিক সম্পর্ক নিয়ন্ত্রিত করিতে পারে। কিন্তু এই শাসনব্যবস্থায় বিভিন্ন অঞ্চলগুলির বিভিন্ন সমস্যার সুষ্ঠু সমাধান হইতে পারে না। কেন্দ্রীয় সরকার সর্বসর্বা বলিয়া এই শাসনব্যবস্থায় স্থানীয় স্বায়ত্তশাসন ও তদ্বারা লোকশিক্ষার কোন ব্যবস্থা সম্ভব নয়।

যুক্তরাষ্ট্রের গুণাগুণ—যুক্তরাষ্ট্রীয় ব্যবস্থায় বিচ্ছিন্ন দেশকে একীভূত করিয়া আঞ্চলিক প্রয়োজন অনুসারে শাসনব্যবস্থা প্রবর্তন করা যায়। স্থানীয় স্বায়ত্তশাসনের মাধ্যমে আঞ্চলিক বৈশিষ্ট্য রক্ষা করিয়া একটি অখণ্ড জাতিসংগঠনে ইহা সহায়ক বলিয়া বিবেচিত হয়। আঞ্চলিক সরকারগুলির উপর স্থানীয় শাসনপরিচালনার ভার ন্যস্ত থাকার ফলে কেন্দ্রীয় সরকার গুরু শাসনভার হইতে মুক্ত হইয়া দেশের সাধারণ স্বার্থসংশ্লিষ্ট ব্যাপারসমূহের উন্নতিসাধনে অধিকতর তৎপর হইতে পারে।

কিন্তু এহ শাসনব্যবস্থার প্রধান দোষ হইল যে, শাসনক্ষমতা-বিভাগের ফলে কেন্দ্রীয় সরকার আভ্যন্তরীণ ব্যাপারে ও বৈদেশিক ব্যাপারে দুর্বল হইয়া পড়ে। বৃহত্তর আঞ্চলিক সরকারগুলির সংঘবদ্ধ হইয়া কেন্দ্রীয় সরকারের বিরোধিতা করিতে পারে ও বিচ্ছিন্ন হইয়া স্বাধীন রাষ্ট্রগঠনের প্রচেষ্টাও দেখা দিতে পারে। বর্তমানে যুক্তরাষ্ট্রীয় ব্যবস্থা ক্রমশই জনপ্রিয় হইয়া উঠিতেছে।

মন্ত্রিসংসদ-চালিত সরকার ও ইহার গুণাগুণ—মন্ত্রিসংসদ-চালিত সরকার-ব্যবস্থার শাসনকর্তৃপক্ষ এই আইনসভার মধ্যে সহযোগিতা

ও পারস্পরিক নির্ভরশীলতা দেখা যায়। এই ব্যবস্থায় মন্ত্রিমণ্ডলী আইনসভার অবিচ্ছেদ্য অংশরূপে পরিগণিত হইয়া থাকেন। আইনসভার ও শাসনকর্তৃপক্ষের মধ্যে ক্ষমতার পৃথকীকরণ না থাকার জন্য সহযোগিতার ভিত্তিতে শাসনকার্য স্মৃভূভাবে পরিচালিত হইতে পারে। কিন্তু আইনসভার আস্থা হারাইলে মন্ত্রিমণ্ডলীকে পদত্যাগ করিতে হয় বলিয়া এই ব্যবস্থা স্থায়ী হয় না। দলীয় শাসনের ফলে জাতীয় স্বার্থ ব্যাহত হইবারও সম্ভাবনা থাকে।

রাষ্ট্রপতি-চালিত সরকার ও ইহার গুণাপগুণ—রাষ্ট্রপতি-চালিত সরকার ক্ষমতার স্বাতন্ত্র্যবিধানের উপর প্রতিষ্ঠিত। এই ব্যবস্থায় আইনসভা ও শাসনকর্তৃপক্ষের মধ্যে প্রত্যক্ষ কোন যোগসূত্র থাকে না, সুতরাং প্রত্যেক বিভাগই পরস্পরের প্রভাবমুক্ত হইয়া নিজ নিজ কার্য করিবার সুযোগ পায়। আইনসভার প্রভাবমুক্ত হইয়া স্থায়ী শাসনকর্তৃপক্ষ স্বাধীনভাবে শাসনকার্য পরিচালনা করিতে পারে ও জরুরী অবস্থায় দ্রুত সিদ্ধান্ত গ্রহণে সক্ষম হয়। কিন্তু দায়িত্বশীল নয় বলিয়া শাসনকর্তৃপক্ষ স্বেচ্ছাচারী হইয়া উঠিতে পারে। আর ক্ষমতার স্বাতন্ত্র্যবিধানের ফলে সহযোগিতার অভাবে গুরুতর মতবৈধ ঘটিয়া শাসনকার্যে অচল অবস্থা সৃষ্টির সম্ভাবনা থাকে।

বিকেন্দ্রীকরণ—শীর্ষস্থানীয় কর্তৃপক্ষের হস্ত হইতে সিদ্ধান্ত গ্রহণ ও সিদ্ধান্ত কার্যকর করিবার ক্ষমতা অধস্তন কর্তৃপক্ষের হস্তে ন্যস্ত করা। এই ব্যবস্থার ফলে স্থানীয় সরকারগুলি কেন্দ্রীয় সরকার-নিরপেক্ষভাবে কার্য পরিচালনা করিতে সমর্থ হয়। ফলে কেন্দ্রীয় সরকার গুরুভার মুক্ত হয়। অধিকসংখ্যক লোক সক্রিয়ভাবে শাসনকার্যে অংশ গ্রহণ করিতে পারে বলিয়া তাহাদের সাধারণ স্বার্থসম্পর্কিত কার্যে উৎসাহ জন্মে এবং তাহাদের দায়িত্ববোধ বৃদ্ধি পায়। গণতান্ত্রিক আদর্শ সফল করিতে হইলে শাসন-ব্যবস্থায় বিকেন্দ্রীকরণ নীতি গ্রহণ করা অপরিহার্য।

প্রশ্নাবলী

1. Discuss the characteristics of a Federal Government. Illustrate your answer by reference to the United States of America. (C. U. 1946)

2. What are the conditions essential to the formation of a Federal Union ? Explain the necessity of a written constitution for a Federal Union. (C. U. 1949)

3. Critically examine the respective merits and defects of a bureaucratic and popular Government. (C. U. 1949)

4. Illustrate the distinction between Parliamentary and non-Parliamentary executive from Great Britain and the United States of America.

5. What are the essential features of the Cabinet form of Government ? How does the legislature exercise control over the executive in such a form of Government ?

6. What are the conditions for the success of a Federal Union ? How far do they exist in India ? (C. U. 1958)

7. Discuss the characteristics of Cabinet Government and the essential conditions for its success. (C. U. 1962)

8. Explain the nature of a Federal Union and distinguish a Federal Union (a) from a confederation, and (b) from a Unitary State. (C. U. Part I, 1964, 1967)

9. Explain the chief features of Federation and point out its merits and demerits. (C. U. 1969)

একাদশ অধ্যায়

সরকারের বিভিন্ন বিভাগ (১)

(Organs of the Government)

আইনসভা (The Legislature)

সরকারের সমুদয় কার্য সাধারণতঃ তিন ভাগে ভাগ করা হয় ও এই তিনটি কার্য পরিচালনা করিবার জন্য প্রত্যেক সরকারই তিনটি বিভাগ লইয়া গঠিত হয়। বিভাগ তিনটি হইল—আইনসভা, শাসনবিভাগ ও বিচারবিভাগ। অনেক লেখক আবার নির্বাচকমণ্ডলীকে সরকারের চতুর্থ বিভাগ বলিয়া অভিহিত করিয়াছেন। কিন্তু নির্বাচকমণ্ডলী আইনসম্মতভাবে সরকারের দৈনন্দিন কার্যে সক্রিয় অংশ গ্রহণ করিতে পারে না বলিয়া সাধারণতঃ ইহাকে সরকারের একটি বিভাগ বলিয়া গণ্য করা হয় না।

সরকারের তিনটি বিভাগের মধ্যে আইনসভার প্রাধান্ত্য সর্বত্র স্বীকৃত হয়। আইনসভার কার্যের বিশদ আলোচনা করিলে ইহার শ্রেষ্ঠত্বের প্রমাণ পাওয়া যায়।

আইনসভার কার্য (Functions of the Legislature)

আইনসভার প্রধান কার্য হইল আইন প্রণয়ন করা। আইনসভাকে বিশেষভাবে বিচার-বিবেচনা ও সতর্কতা অবলম্বন করিয়া আইন প্রণয়ন করিতে হয়। রাষ্ট্রের অন্তর্ভুক্ত জনসাধারণের সমবেত ইচ্ছা প্রতিফলিত হয় আইনসভার মাধ্যমে। আইনসভা-প্রণীত আইন অনুসারে শাসনবিভাগ শাসনকার্য পরিচালনা করে এবং বিচারবিভাগ আইনের ব্যাখ্যা করে ও সেই অনুসারে বিচারকার্য পরিচালনা করে। সুতরাং আইনসভার কার্য হইল সর্বাঙ্গীণ ও গুরুত্বপূর্ণ। আইনসভা অনুপযোগী পুরাতন আইনগুলিকে বাতিল করিতে পারে, বা পুরাতন আইনগুলির সংশোধন করিতে পারে এবং দেশের প্রয়োজন অনুসারে নির্দিষ্ট পদ্ধতিতে নূতন আইন প্রবর্তন করিতে পারে।

আইনসভা বিশেষ বিচার-বিবেচনা না করিয়া কোন আইন অমুদ্রণ করে না। শাসনকর্তৃপক্ষের মত আইনসভা কোন বিষয়ে দ্রুত সিদ্ধান্ত গ্রহণ করে না। এইজন্য আইন-প্রণয়নকার্য একটি জটিল ও দীর্ঘ পদ্ধতির মধ্য দিয়া সম্পন্ন করিবার ব্যবস্থা আছে। আইন কার্যকর হইলে জনস্বার্থের উপর তাহার কিরূপ প্রতিক্রিয়া হইতে পারে, সে সম্বন্ধে বিস্তারিত আলোচনা, তর্ক-বিতর্ক না করিয়া কোন আইনই বলবৎ করা যায় না। বিরোধীদের মতামত, জনমত ও অভিজ্ঞ ব্যক্তিদের মতামত গ্রহণপূর্বক নানা পদ্ধতি অমুসরণ করিয়া শেষ পর্যন্ত আইন পূর্ণতাপ্রাপ্ত হয়। সুতরাং আইন-প্রণয়ন ব্যাপারের একটা প্রধান অঙ্গ হইল বিশেষ বিচার-বিবেচনা করা (Deliberation)। এইজন্য বিশেষরূপে বিচার-বিবেচনা করা আইনসভার আর একটি কার্য বলিয়া পরিগণিত হয়।

সরকারী আয়-ব্যয়ের আলোচনা ও মঞ্জুরী করা আইনসভার আর একটি প্রধান কার্য। সরকারের আয় কি পরিমাণে হইবে, কি কি কর ধার্য করা হইবে ও করপদ্ধতি কি হইবে ও কি ভাবে সরকারের বিভিন্ন বিভাগের জন্য আদায়ীকৃত রাজস্ব ব্যয় করা হইবে, এই সকল বিষয় আইনসভার অমুদ্রণসাপেক্ষ। এক কথায়, শাসনকর্তৃপক্ষ ও বিচারবিভাগকে আইনসভা কর্তৃক মঞ্জুরীকৃত ব্যয়ের উপর নির্ভর করিতে হয়।

সরকারী ব্যয় নির্বাহের জন্য নানাভাবে জনসাধারণের নিকট হইতে অর্থ আহরণ করা হয়। অর্থের অপচয় ও ব্যয়বাহুল্য রদ করিবার উদ্দেশ্যে প্রায় সকল দেশের আইনসভা সরকারী আয়-ব্যয়ের উপর তীক্ষ্ণ দৃষ্টি রাখে। সরকারী আয়-ব্যয় নিয়ন্ত্রণের মাধ্যমে আইনসভা শাসনবিভাগীয় নীতি ও বিভিন্ন কার্যকলাপ স্থনিয়ন্ত্রিত করে।

ইংলণ্ডে সরকারী হিসাব সংস্থা (Public Accounts Committee), ব্যয়ের হিসাব সংস্থা (Estimates Committee) এবং হিসাব পরীক্ষক প্রধান সংস্থা (Office of the Comptroller and Auditor General) সাহায্যে প্যারলিমেন্টের এই নিয়ন্ত্রণ কার্য বলবৎ করা হয়। মার্কিন যুক্তরাষ্ট্রেও কংগ্রেস সভা প্রয়োজনীয় কর আহরণ ব্যবস্থা ও ব্যয়-বরাদ্দ মঞ্জুর করে। মার্কিন যুক্তরাষ্ট্রে রাষ্ট্রপতি যে পরিমাণ অর্থ সরকারী ব্যয় নির্বাহের জন্য দাবী করেন,

কংগ্রেস সাধারণতঃ তদপেক্ষা কম পরিমাণে অর্থ মঞ্জুর করে। উদ্দেশ্য হইল যে, সরকারকে পুনরায় অর্থের জন্য আইনসভার দ্বারস্থ হইতে হইবে এবং এইরূপে ব্যয়ের পরিমাণ পুনরায় আইনসভা কর্তৃক পরীক্ষিত হইবে। কংগ্রেসের এই নিয়ন্ত্রণ ক্ষমতা সাধারণতঃ সাধারণ হিসাব সংস্থা (General Accounting Office) দ্বারা পরিচালিত হয়।

ভারতেও বৃটিশ ব্যবস্থার অনুরূপভাবে সরকারী আয়-ব্যয়ের উপর পার্লামেন্টের নিয়ন্ত্রণ ক্ষমতা পরিচালিত হয়। এখানেও সরকারী হিসাব সংস্থা, ব্যয়ের হিসাব সংস্থা এবং হিসাব পরীক্ষক প্রধান সংস্থার মাধ্যমে পার্লামেন্টের নিয়ন্ত্রণ কার্য বলবৎ করা হয়।

এতদ্ব্যতীত মন্ত্রিসংসদ-চালিত শাসনব্যবস্থায় শাসনবিভাগ প্রত্যক্ষভাবে ইহার শাসনকার্য ও শাসননীতির জন্য আইনসভার নিকট দায়ী থাকে। আইনসভা অনাস্থা প্রস্তাব পাশ করিয়া মন্ত্রিসংসদকে অপসারিত করিতে পারে। প্রয়োজনের দ্বারা ও অল্প নানা উপায়ে আইনসভা শাসন-কর্তৃপক্ষের কার্য নিয়ন্ত্রিত করে। রাষ্ট্রপতি-চালিত শাসনব্যবস্থায় আইনসভা পরোক্ষভাবে শাসনকর্তৃপক্ষের কার্য নিয়ন্ত্রণ করে। মার্কিন যুক্তরাষ্ট্রে রাষ্ট্রপতি কর্তৃক গুরুত্বপূর্ণ নিয়োগগুলি সিনেট সভার অনুমোদন-সাপেক্ষ। উভয় পরিষদের অনুমোদন ব্যতীত রাষ্ট্রপতি যুদ্ধঘোষণা করিতে পারেন না।

অনেক দেশে আইনসভার হস্তে শাসনতন্ত্র পরিবর্তন করিবার অধিকার ব্রহ্ম থাকে। ইংলণ্ডে পার্লামেন্ট সভা সাধারণ আইন-প্রণয়ন পদ্ধতিতে শাসনতন্ত্রের পরিবর্তন করিতে পারে। মার্কিন যুক্তরাষ্ট্রে কংগ্রেস সভার শাসনতন্ত্র পরিবর্তন করিবার সম্পূর্ণ ক্ষমতা না থাকিলেও পরিবর্তনের প্রস্তাব উত্থাপন করিবার ক্ষমতা আছে।

আইনসভা অনেক ক্ষেত্রে শাসনবিভাগীয় ক্ষমতা পরিচালনায় কিছু অংশ গ্রহণ করিয়া থাকে। পূর্বেই বলা হইয়াছে যে, মার্কিন যুক্তরাষ্ট্রে বড় বড় সরকারী চাকুরীতে রাষ্ট্রপতি যে সকল নিয়োগ করেন তাহা উচ্চ পরিষদের অনুমোদনসাপেক্ষ। পররাষ্ট্রের সহিত সম্পাদিত চুক্তিও উচ্চ পরিষদের অনুমোদন না হওয়া পর্যন্ত বৈধ বলিয়া বিবেচিত হয় না ও সেগুলিকে বলবৎ করা যায় না। অনেক দেশে আইনসভা নির্বাচনক্ষমতার অধিকারী থাকে।

রাষ্ট্রপতি ও প্রধান বিচারালয়ের বিচারপতিগণ আইনসভার দ্বারা নির্বাচিত হইয়া থাকেন। ভারতের রাষ্ট্রপতি আইনসভার নির্বাচিত সদস্যবর্গের ভোটে নির্বাচিত হইয়া থাকেন। সুইজারল্যান্ড ও সোভিয়েট যুক্তরাষ্ট্রে বিচারপতিগণ আইনসভার দ্বারা নির্বাচিত হইয়া থাকেন।

ইহা ছাড়া আইনসভার কিছু বিচারবিভাগীয় কার্যও সম্পাদন করিতে হয়। মন্ত্রী অথবা উচ্চপদস্থ সরকারী কর্মচারীদিগকে অভিযুক্ত করিবার ও বিচার করিবার ক্ষমতা আইনসভার হস্তে লভ্য থাকে। নূতন শাসনতন্ত্র অমুসারে ভারতের রাষ্ট্রপতির বিরুদ্ধে অভিযোগ আনয়ন করিয়া তাঁহার বিচার করিবার ক্ষমতা কেন্দ্রীয় পার্লামেন্ট সভার হস্তে দেওয়া হইয়াছে। সুতরাং আইন-প্রণয়ন ছাড়াও আইনসভার আরও নানাবিধ কার্য করিতে হয়।

আইনসভার সংগঠন (Organisation of the Legislature)

আইনসভা এক-কক্ষ অথবা দ্বি-কক্ষবিশিষ্ট হইতে পারে। যে সমস্ত দেশে দ্বি-কক্ষ অর্থাৎ দ্বি-পরিষদবিশিষ্ট আইনসভা প্রবর্তিত আছে, সে সমস্ত দেশে একটি পরিষদকে উচ্চ পরিষদ (Upper House or Second Chamber) বলা হয়, অত্রটিকে নিম্ন পরিষদ (Lower House or Popular Assembly) বলা হয়। প্রায় সকল দেশেই নিম্ন পরিষদ ভোটদাতৃগণ কর্তৃক নির্বাচিত প্রতিনিধি দ্বারা গঠিত হইয়া থাকে। ইহা গণতান্ত্রিক আদর্শের ভিত্তির উপর প্রতিষ্ঠিত। কিন্তু উচ্চ পরিষদের সংগঠন পদ্ধতি সর্বত্র সমান হয় না। উচ্চ পরিষদের সংগঠনে ভিন্ন ভিন্ন দেশে ভিন্ন ভিন্ন নীতি অমুসরণ করা হইয়াছে। যুদ্ধ-পূর্ব জাপান ও ইংলও প্রভৃতি দেশে উচ্চ পরিষদ উত্তরাধিকার-স্বত্বের (Hereditary principle) দ্বারা সংগঠিত হইয়াছে। ইংলওে অবশ্য এই উত্তরাধিকার-স্বত্ব ব্যতীত অন্ত্র নীতিরও প্রয়োগ দেখা যায়। ক্যানাডার উচ্চ পরিষদ মনোনয়ন-নীতির (Principle of Nomination) উপর প্রতিষ্ঠিত। সেখানে উচ্চ পরিষদের সমস্ত সদস্যই ক্যানাডার গভর্নর-জেনারেল কর্তৃক আজীবন সদস্যরূপে মনোনীত হইয়া থাকেন। ফরাসী, ভারত প্রভৃতি অনেক রাষ্ট্রে উচ্চ পরিষদের সদস্যবৃন্দ জনগণ কর্তৃক পরোক্ষ-ভাবে নির্বাচিত (Indirect election) হইয়া থাকেন। জনগণ কর্তৃক

নির্বাচিত রাজ্য আইনসভাগুলি উচ্চ পরিষদের সদস্য নির্বাচন করে। মার্কিন যুক্তরাষ্ট্রের উচ্চ পরিষদ সিনেট সভা ভোটদাতৃগণ-কর্তৃক প্রত্যক্ষভাবে নির্বাচিত (Direct election) প্রতিনিধিদের দ্বারা সংগঠিত হয়। দক্ষিণ আফ্রিকা ও ১২৪৭ খ্রিষ্টাব্দের পূর্বে ব্রিটিশ ভারতের কেন্দ্রীয় আইনসভার উচ্চ পরিষদ মনোনয়ন ও নির্বাচন (Partly elected and partly nominated) এই দুইটি নীতির সমন্বয়ে গঠিত হইত। উচ্চ পরিষদের কিয়দংশ সদস্য শাসনকর্তৃপক্ষ দ্বারা মনোনীত, এবং অপর অংশ জনগণের ভোট দ্বারা নির্বাচিত হইতে পারে।

এক-কক্ষ বনাম দ্বি-কক্ষ আইনসভা (Unicameral Vs. Bicameral Legislature)

আইনসভা এক-কক্ষবিশিষ্ট না দ্বি-কক্ষবিশিষ্ট হইবে এ সম্বন্ধে রাষ্ট্র-বিজ্ঞানীদের মধ্যে যথেষ্ট মতভেদ দেখা যায়। এক-কক্ষবিশিষ্ট আইনসভার সপক্ষে যে যুক্তিগুলির অবতারণা করা হইয়া থাকে, সেগুলিকে দ্বি-কক্ষবিশিষ্ট আইনসভার বিরুদ্ধে প্রয়োগ করা হয়। অপরপক্ষে দ্বি-কক্ষবিশিষ্ট আইনসভার সপক্ষে যে যুক্তি দেখান হয়, তাহা এক-কক্ষবিশিষ্ট আইনসভার বিরুদ্ধে প্রযোজ্য। বর্তমান গণতান্ত্রিক যুগে অধিকাংশ সভ্যদেশের আইনসভাই দ্বি-কক্ষবিশিষ্ট। অধিকসংখ্যক লোক যাহাতে সক্রিয়ভাবে শাসনব্যাপারে অংশ গ্রহণ করিতে পারে তজ্জন্ম দ্বিপরিষদ আইনসভা গণতান্ত্রিক শাসনব্যবস্থার একটি অপরিহার্য উপাদান বলিয়া পরিগণিত হয়। দ্বি-কক্ষের সপক্ষে সাধারণতঃ নিম্নলিখিত যুক্তিগুলির অবতারণা করা হয় :—

লেকি তাঁহার *Democracy and Liberty* নামক গ্রন্থে বিশেষ গুরুত্ব লক্ষ্য করে বলিয়াছেন যে, যত প্রকারের শাসনব্যবস্থা আছে বা হইতে পারে তাহাদের মধ্যে সার্বভৌম ক্ষমতার অধিকারী এক-কক্ষ আইনসভাবিশিষ্ট সরকার হইল নিকৃষ্টতম। এই ব্যবস্থায় আইনপরিষদের একত্ব প্রতিষ্ঠিত হইয়া ইহা পূর্ণ স্বৈরতন্ত্রে পরিণত হইতে পারে। এক-কক্ষবিশিষ্ট আইনসভার এই স্বৈরাচারী ক্ষমতায় বাধা দিবার জন্য দ্বিতীয় কক্ষের প্রয়োজন অপরিহার্য। দ্বিতীয় কক্ষের অবর্তমানে এক-কক্ষ আইনসভা অসংযত ও পক্ষপাতমূলক আইন প্রণয়ন করিয়া ব্যক্তিস্বাধীনতা বিপন্ন করিতে পারে।

দ্বিতীয়তঃ, আইনসভা দুইটি পরিষদ লইয়া গঠিত হইলে প্রত্যেকটি আইন উপযুক্তভাবে বিবেচিত হইতে পারে। একটিমাত্র কক্ষ থাকিলে বিশেষ বিচার-বিবেচনাহীন ও দ্রুত আইন রচিত হইবার সম্ভাবনা থাকে। আইনসভা দ্বি-কক্ষবিশিষ্ট হইলে সাময়িক উত্তেজনার বশে বা সতত পরিবর্তনশীল জনমতের চাপে কোন আইন-প্রণয়ন সম্ভব হয় না। দুইটি পরিষদ কর্তৃক অনুমোদিত না হইলে কোন আইনই বৈধ বলিয়া বিবেচিত হইতে পারে না। সুতরাং একটি পরিষদ সাময়িক উত্তেজনার বশবর্তী হইয়া আইন-প্রণয়নের প্রস্তাব আনয়ন করিলেও অপর কক্ষ তাহাকে বাধা দিতে পারে।

তৃতীয়তঃ, আইন-প্রণয়ন হইল জনস্বার্থসংশ্লিষ্ট একটি বিশেষ গুরুত্বপূর্ণ কার্য। সুতরাং বিশেষ বিবেচনা ব্যতীত আইন প্রণয়ন করা যুক্তিযুক্ত নয়। কিন্তু এই বিশেষ বিবেচনা করিবার জন্য সময়ের প্রয়োজন। আইনসভা দ্বি-কক্ষবিশিষ্ট হইলে আইনের প্রস্তাব ও শেষ অধ্যায়ের মধ্যে এত অবসর পাওয়া যায়, যাহাতে প্রত্যেকটি প্রস্তাব পূঙ্খানুপূঙ্খরূপে আলোচিত হইতে পারে। চতুর্থতঃ, আইনসভা দুইটি পরিষদ দ্বারা গঠিত হইলে একটি পরিষদ দ্বারা আনীত আইনের ত্রুটি-বিচ্যুতিগুলি অপর পরিষদ কর্তৃক সংশোধিত হইবার সম্ভাবনা থাকে। একটি পরিষদ থাকিলে অনেক সময় আইনের প্রত্যেক প্রস্তাব বিশ্লেষণ করিয়া দেখিবার মত সময় বা যোগ্যতা সেই পরিষদের না থাকিতে পারে। কিন্তু আইনসভা দ্বি-কক্ষ হইলে অপর পরিষদ প্রস্তাবিত আইন ভিন্ন দৃষ্টিকোণ হইতে বিচার করিয়া ইহার গলদ দূর করিতে পারে।

পঞ্চমতঃ, দ্বি-কক্ষবিশিষ্ট আইনসভায় দেশের বিভিন্ন মতাবলম্বী সকল শ্রেণীর লোকের প্রতিনিধি প্রেরণ সম্ভব হয়। প্রায় সকল দেশেই এমন সমস্ত ব্যক্তি আছেন যাহারা নির্বাচনব্যাপারে বীতশ্রুহ অথচ শাসন-পরিচালন কার্যে তাহাদের এরূপ যোগ্যতা আছে যে, তাহাদের পরামর্শ ও উপদেশ জাতীয় স্বার্থের উৎকর্ষসাধনে একান্ত প্রয়োজনীয় বলিয়া অনুভূত হয়। উচ্চ পরিষদ থাকিলে এই সকল যোগ্য ব্যক্তিদের মনোনয়ন দ্বারা উচ্চ পরিষদের সদস্য করা যাইতে পারে। বর্ত্ততঃ, যুক্তরাষ্ট্রীয় শাসনব্যবস্থায় উচ্চ পরিষদের প্রয়োজনীয়তা অপরিহার্য বলিয়া পরিগণিত হয়। যুক্তরাষ্ট্রে বিভিন্ন প্রদেশ হইতে সমসংখ্যক প্রতিনিধি নির্বাচিত হইয়া উচ্চ পরিষদ গঠিত হয়। যুক্তরাষ্ট্রীয় উচ্চ পরিষদ বিভিন্ন অঞ্চলগুলির প্রতিনিধি লইয়া

গঠিত হয় বলিয়া আঞ্চলিক স্বাধীনতা ও স্বার্থসংরক্ষণে ইহার প্রয়োজনীয়তা বিশেষভাবে অনুভূত হয়।

বর্তমানে অধিকাংশ রাষ্ট্রের আইনসভা দুইটি কক্ষ লইয়া গঠিত। কিন্তু ইহা সত্ত্বেও দ্বি-কক্ষবিশিষ্ট আইনসভার বিপক্ষে অনেক যুক্তি দেখান যাইতে পারে। ল্যাক্স প্রভৃতি অনেক প্রগতিশীল লেখক ইহার সমর্থন করেন নাই। তাঁহাদের মতে আইন-প্রণয়নের জন্য একটি পরিষদই যথেষ্ট। উচ্চ পরিষদ বাহুল্যমাত্র। আধুনিককালে কোন আইনই দ্রুত ও বিশেষ বিচার-বিবেচনা না করিয়া প্রণয়ন করা হয় না। এইজন্য আইন প্রণয়নের পদ্ধতি প্রত্যেক দেশেই জটিল ও দীর্ঘ হইয়া পড়িয়াছে। সুতরাং বিশেষ বিবেচনা করিবার জন্য একটি উচ্চ পরিষদের আদৌ কোন প্রয়োজন নাই। দ্বিতীয়তঃ, উচ্চ পরিষদ কার্যকরীভাবে নিম্ন পরিষদের আইন-প্রণয়নকার্যে বাধা দিতে পারে না। প্রায় সকল দেশেই নিম্ন পরিষদ অধিক ক্ষমতার অধিকারী, সুতরাং নিম্ন পরিষদ ইচ্ছা করিলে উচ্চ পরিষদের আপত্তি সত্ত্বেও আইন-প্রণয়ন করিতে পারে। এদিক দিয়া দেখিতে গেলে উচ্চ পরিষদের কোন মার্যকতা নাই। তৃতীয়তঃ, উচ্চ পরিষদ থাকিলে বিভিন্ন শ্রেণীর ও যোগ্য ব্যক্তিদের মনোনয়ন দ্বারা উচ্চ পরিষদের সদস্য করা যাইতে পারে বটে, কিন্তু এই ব্যবস্থায় বক্তৃতা-বিশেষ বা শ্রেণী-বিশেষের জন্য পৃথক নীতি অনুসৃত হয়। সেইজন্য মনোনয়ন ব্যবস্থাকে গণতন্ত্র-বিবোধী ব্যবস্থা বলা যাইতে পারে। চতুর্থতঃ, যুক্তরাষ্ট্রীয় শাসনব্যবস্থায় উচ্চ পরিষদ অপরিহার্য বলিয়া পরিগণিত হইতে পারে না। যুক্তরাষ্ট্রে প্রাদেশিক বা স্থানীয় সরকারগুলির ক্ষমতা শাসনতন্ত্র কর্তৃক নির্ধারিত হয় ও যুক্তরাষ্ট্রের উচ্চ বিচারালয়ের দ্বারা কেন্দ্রীয় সরকার ও আঞ্চলিক সরকারগুলির পারস্পরিক সম্পর্ক অক্ষুণ্ণ রাখা হয়। উচ্চ পরিষদ কোনক্রমেও আঞ্চলিক সরকারগুলির ক্ষমতা সংরক্ষণে সাহায্য করিতে পারে না। ইহা ছাড়া, আঞ্চলিক ভিত্তিতে নির্বাচিত হইলেও উচ্চ পরিষদের সদস্যগণ ভোটদান দ্বারা তাঁহাদের নিজ প্রদেশ অপেক্ষা দলীয় নির্দেশের প্রতি অধিক আনুগত্য প্রদর্শন করেন। পঞ্চমতঃ, দুইটি পরিষদ ব্যয়সাপেক্ষ। ষষ্ঠতঃ, দুইটি পরিষদ থাকিলে অনেক সময় উভয়ের মধ্যে বিরোধের ফলে কার্যে অযথা বিলম্ব হয়। সপ্তমতঃ, উচ্চ পরিষদ কিভাবে সংগঠিত হইবে সে সম্বন্ধেও এখন পর্যন্ত কোন সন্তোষজনক নীতি উদ্ভাবিত হয় নাই। উভয়

পরিষদের মধ্যে ক্ষমতাবন্টনের ব্যাপারেও যথেষ্ট মতভেদ দেখা যায়। এই সমস্ত কারণে ফরাসী লেখক আবে সিয়ে (Abbe Seieyes) বলেন, উচ্চ পরিষদ যদি নিম্ন পরিষদের সহিত একমত হয় তবে তাহা বাহ্যল্যমাত্র, আর উচ্চ পরিষদ যদি নিম্ন পরিষদের সহিত একমত না হয়, তবে তাহা অত্যন্ত হানিকর। উচ্চ পরিষদ যতই কার্যকরী হউক না কেন, জনগণের প্রতিশ্রুতি-গণ লইয়া গঠিত নিম্ন পরিষদের কার্যে বাধা সৃষ্টি করিবার ক্ষমতা ইহার থাকিতে পারে না। উল্লিখিত কারণগুলির জন্য দ্বি-কক্ষবিশিষ্ট আইনসভার উপযোগিতা অনেকে অস্বীকার করেন।

উচ্চ পরিষদের সংগঠন ও কার্যকলাপ (Organisation and proper functions of Second Chambers)

অভিজ্ঞতা হইতে দেখা যায় যে, উত্তরাধিকার-স্বত্ব বা মনোনয়ন বা প্রত্যক্ষ নির্বাচনের দ্বারা সংগঠিত উচ্চ পরিষদ আদর্শ বলিয়া গণ্য হইতে পারে না। অনেকে মনে করেন যে, উচ্চ পরিষদের অধিকাংশ সদস্য নিম্ন পরিষদ দ্বারা নির্বাচিত হওয়া উচিত, আর কিছুসংখ্যক সদস্য যোগ্যতার ভিত্তিতে শাসনকর্তৃপক্ষ কর্তৃক মনোনীত হওয়া উচিত।

উচ্চ পরিষদ যদি একান্ত প্রয়োজনীয় বলিয়া মনে করা যায় তবে উচ্চ পরিষদের উপর নিম্নলিখিত কার্যগুলির ভার দেওয়া যাইতে পারে। প্রথমতঃ, নিম্ন পরিষদ কর্তৃক প্রস্তাবিত আইনগুলিকে পুঙ্খানুপুঙ্খরূপে পরীক্ষা করিয়া সেগুলির গলদ দূর করা। দ্বিতীয়তঃ, যে আইনগুলি সম্বন্ধে কোন মতভেদ থাকিতে পারে না, সে জাতীয় আইনের প্রস্তাব উত্থাপন করা। তৃতীয়তঃ, সাময়িক উত্তেজনার বশবর্তী হইয়া নিম্ন পরিষদ যাহাতে দ্রুত আইন প্রণয়ন করিতে না পারে সেজন্য আইন-প্রণয়নে সাময়িক বাধা সৃষ্টি করিয়া জনমতকে সজাগ রাখা উচ্চ পরিষদের একটি প্রধান কার্য বলিয়া বিবেচিত হয়। এই উদ্দেশ্যে গ্রেট ব্রিটেনে লর্ড সভা বর্তমানে এক বৎসরকাল পর্যন্ত সাধারণ আইন-প্রণয়ন ব্যাপারে বাধা দিতে পারে। চতুর্থতঃ, উচ্চ পরিষদের আর একটি কার্য হইল প্রস্তাবিত আইনগুলির বিশদ আলোচনা করিয়া সেগুলির ত্রুটি-বিচ্যুতি প্রকাশ করা। কিন্তু উচ্চ পরিষদের কার্যকলাপ.

এরূপভাবে নিয়ন্ত্রিত হওয়া আবশ্যক বাহাতে নিম্ন পরিষদের ইচ্ছা কোনক্রমে বাধাপ্রাপ্ত না হয়।

ভারতের রাজ্য সরকারের ক্ষেত্রে উচ্চ পরিষদের প্রয়োজনীয়তা (Utility of Second Chamber in the Indian States)

নূতন সংবিধান অনুসারে ভারতের ছয়টি রাজ্যে—বোম্বাই, মাদ্রাজ, উত্তর-প্রদেশ, বিহার, পাঞ্জাব ও পশ্চিমবঙ্গ—দ্বি-পরিষদ আইনসভার প্রবর্তন করা হইয়াছিল। রাজ্য পুনর্গঠন আইন অনুসারে বর্তমানে মহীশূর ও মধ্যপ্রদেশ রাজ্য দুইটির আইনসভা দুইটি কক্ষ লইয়া গঠিত হইয়াছে। ১৯৫৭ সালের ২৭নং বিধান পরিষদ আইন অনুসারে অন্ধ্রপ্রদেশ এবং জম্মু ও কাশ্মীরের জন্ত ও বর্তমানে নূতন মহারাষ্ট্র রাজ্যের জন্ত দ্বি-পরিষদের ব্যবস্থা হইয়াছে। কেন্দ্রীয় সরকারের ক্ষেত্রে দ্বি-পরিষদের উপযোগিতা থাকিলেও রাজ্য সরকারের ইহার উপযোগিতা সম্বন্ধে যথেষ্ট মতভেদ দেখা যায়। নূতন শাসনতন্ত্র অনুসারে কেন্দ্রীয় সরকারই হইল কার্যতঃ প্রকৃত ক্ষমতার অধিকারী। রাজ্য সরকারগুলির এরূপ বিশেষ কোন দায়িত্ব নাই, যে জন্ত বিশেষ বিচার-বিবেচনার উদ্দেশ্যে একটি উচ্চ পরিষদের প্রয়োজন হইতে পারে। পাঞ্জাব ও পশ্চিমবঙ্গ সম্পর্কে বিশেষ করিয়া বলা যাইতে পারে যে, দেশবিভাগের ফলে এই রাজ্যগুলির আয়তন ও লোকসংখ্যা এত পরিমাণে হ্রাস পাইয়াছে যে, এই ক্ষুদ্র রাজ্য দুইটির পক্ষে একটি অতি-ব্যয়সাপেক্ষ উচ্চ পরিষদের আদৌ কোন প্রয়োজন নাই। একটি উচ্চ পরিষদ পোষণের গুরু ব্যয়ভার জনসাধারণকে অনর্থক বহন করিতে হয়। পশ্চিমবঙ্গের উচ্চ পরিষদ ১৯৬৯ সালে বিলুপ্ত হইয়াছে।

খসড়া আইনের শ্রেণাবিভাগ (Classification of Bills)

আইন পাস না হওয়া পর্যন্ত আইনের প্রস্তাবকে খসড়া আইন বলা হয়। খসড়া আইনকে উদ্দেশ্যের দিক দিয়া সাধারণতঃ দুই ভাগে ভাগ করা হয়; স্বাধীন, সাধারণ স্বার্থসংশ্লিষ্ট খসড়া আইন (Public Bills) ও বিশেষ স্বার্থসংশ্লিষ্ট খসড়া আইন (Private Bills)। সাধারণ স্বার্থসংশ্লিষ্ট আইনের প্রস্তাব সরকারী সদস্য কর্তৃক উত্থাপিত হইলে তাকে সরকারী খসড়া আইন

(Government Bills) বলা হয়, আর বে-সরকারী সদস্য কর্তৃক আনীত হইলে তাহাকে বে-সরকারী সদস্য-প্রস্তাবিত খসড়া আইন (Private Members' Bills) বলা হয়। সরকারী খসড়া আইনকে আবার দুই ভাগে ভাগ করা হয়: সাধারণ স্বার্থবিষয়ক প্রস্তাব (Ordinary Bills) ও অর্থ-সংক্রান্ত প্রস্তাব (Money Bills)। অর্থ-সংক্রান্ত প্রস্তাবগুলি সাধারণত: শাসন-বিভাগীয় কোন সরকারী সদস্য ব্যতীত আইনসভার বে-সরকারী সদস্যগণ উত্থাপন করিতে পারেন না। অর্থ-সংক্রান্ত প্রস্তাবগুলির দুইটি শ্রেণী আছে। ব্যয়বরাদ্দের জন্য যে সমস্ত প্রস্তাব আনীত হয় তাহাকে ব্যয়বরাদ্দ মঞ্জুর বিল (Appropriation Bills) বলা হয়, আর কর ধার্য করিবার প্রস্তাবগুলিকে রাজস্ব বিল (Finance Bills) বলা হয়।

আইন-প্রণয়ন পদ্ধতি (Process of Law-making)

আইনসভার প্রধান কার্য হইল আইন প্রণয়ন করা। আইন প্রণয়নে আইনসভাকে বিশেষ সতর্কতা অবলম্বন করিয়া বিচার-বিবেচনাপূর্বক আইন প্রণয়ন করিতে হয়। এইজন্য প্রত্যেক দেশে আইন-প্রণয়নে দীর্ঘ সময়ের প্রয়োজন হয়। প্রণয়ন-পদ্ধতিও জটিল এবং দীর্ঘ হয়।

খসড়া আইনকে আইনে পরিণত করিবার পূর্বে কয়েকটি নির্ধারিত পর্যায়ে উহার বিশদ-আলোচনা করা হয়। আইনসভার যে সদস্য আইনের প্রস্তাব আইনসভায় আনয়ন করিতে ইচ্ছুক, প্রথমে তাহাকে নিজে অথবা অভিজ্ঞ লোকের সাহায্যে খসড়াটি প্রস্তুত করিতে হয়। আইন-প্রণয়নে শকবিন্দুসে যথেষ্ট সতর্কতা অবলম্বন করা একান্ত আবশ্যিক। খসড়াটি প্রস্তুত হইলে আইন-সভায় উহা পেশ (Introduction) করিতে হয়। পেশ করিবার পর প্রথম পর্যায়ে আইনের প্রস্তাবক সভাপতির অহুমতিক্রমে খসড়াটির শিরোনামা মাত্র পাঠ করেন, জরুরী আইন না হইলে পাঠের পর কোন প্রকারের আলোচনা হয় না। ইহাকে আইনের প্রথম পাঠ (First Reading) বলা হয়। তারপর খসড়াটি মুদ্রিত হইয়া সদস্যগণের মধ্যে বিলি করা হয় ও একটি নির্ধারিত দিনে খসড়াটির দ্বিতীয় পাঠ (Second Reading) হয়। দ্বিতীয়বার পাঠের সময় খসড়াটির মৌলিক নীতি সম্পর্কে আলাপ-আলোচনা ও তর্ক-বিতর্কের অহুষ্ঠান চলে, কিন্তু খসড়াটির ধারা-উপধারা সম্পর্কে

কোনরূপ বিশদ আলোচনা অমুষ্ঠিত হইতে পারে না। খসড়াটি যদি সংখ্যাধিক্যের অমুমোদন লাভ করে, তাহা হইলে ইহা একটি বিশেষ সংস্থার (Committee) নিকট প্রেরিত হয়। এই সংস্থা কর্তৃক খসড়াটির ধারা-উপধারা প্রভৃতি বিশদভাবে আলোচিত হয়। সংস্থা ইচ্ছামত খসড়াটির পরিবর্তন সাধন করিতে পারে। এই ব্যবস্থাকে Committee Stage বলা হয়। সংস্থা যদি খসড়াটির কোন পরিবর্তন করে তবে পরিবর্তিত আকারে খসড়াটি আইনসভায় প্রেরিত হয় (Report Stage)। শেষ পর্যায়ে খসড়াটির তৃতীয় পাঠ (Third Reading) হয়। এই পর্যায়ে খসড়াটিকে সমগ্রভাবে গ্রহণ করিতে হয় নতুবা সমগ্রভাবে ইহাকে বাতিল করিতে হয়—এই পর্যায়ে খসড়াটির কোনরূপ পরিবর্তন করা যায় না।

নিম্ন পরিষদ কর্তৃক অমুমোদিত হইলে খসড়াটি উচ্চ পরিষদে বিবেচনার্থে প্রেরিত হয়। উচ্চ পরিষদেও একই পদ্ধতিতে খসড়াটির আলোচনা হয়। উচ্চ পরিষদ পুনর্বিবেচনার জন্ত খসড়াটিকে নিম্ন পরিষদে ফেরৎ পাঠাইতে পারে। উভয় পরিষদের মতবিরোধ ঘটিলে যুক্ত অধিবেশন হয়, অথবা মতবিরোধ দূর করিবার জন্য পঞ্চা সকল দেশেই আছে। সাধারণতঃ আইন-প্রণয়ন ব্যাপারে নিম্ন পরিষদের ইচ্ছাই সর্বত্র বলবৎ হয়। উভয় পরিষদ কর্তৃক গৃহীত হইলে রাজা, রাষ্ট্রপতি বা শাসনকর্তৃপক্ষের শীর্ষস্থানীয় ব্যক্তির অমুমোদন লাভ করিয়া খসড়াটি আইনে পরিণত হয়। এইরূপে নানা বাধাবিঘ্নের মধ্য দিয়া আইনসভার মাধ্যমে জনগণের সমবেত ইচ্ছা আইন-রূপে মূর্ত হইয়া উঠে।

সার্বভৌম ও অ-সার্বভৌম আইনসভা (Sovereign & Non-Sovereign Law-making Bodies)

আইন প্রণয়ন করিবার ক্ষমতার দিক দেখিতে গেলে আইনসভাগুলিকে সার্বভৌম আইনসভা ও অ-সার্বভৌম আইনসভা—এই দুই ভাগে ভাগ করা যায়। আইনসভার প্রধান কার্য হইল আইন প্রণয়ন করা, কিন্তু এই আইন-প্রণয়ন ক্ষমতার তারতম্যের ভিত্তিতে আইনসভাগুলিকে উপরি-উক্ত দুই শ্রেণীতে ভাগ করা হয়।

সার্বভৌম আইনসভার প্রধান বৈশিষ্ট্য হইল যে, (১) এই আইনসভা আইন-প্রণয়ন ব্যাপারে স্বৈর ও আদিম ক্ষমতার অধিকারী। ইহার আইন-প্রণয়ন ক্ষমতা কোন উচ্চতর কর্তৃপক্ষ হইতে উদ্ধৃত নহে। (২) দ্বিতীয়তঃ, এমন কোন আইন নাই যাহা এই সার্বভৌম আইনসভা প্রণয়ন করিতে পারে না। (৩) তৃতীয়তঃ, এমন কোন আইন নাই যাহা এই সভা সংশোধন বা বাতিল করিতে পারে না। এক কথায়, আইন-প্রণয়নে এই আইনসভা অবাধ ক্ষমতার অধিকারী। (৪) চতুর্থতঃ, দেশের মধ্যে এরূপ কোন আইনগ্রাহ্য ব্যক্তি বা ব্যক্তি-সংসদ থাকে না যে বা যাহারা এই আইনসভা-প্রণীত আইনকে বে-আইনী বলিয়া বাতিল করিতে পারে। সংক্ষেপে বলা যায় যে, এই আইনসভা কার্যতঃ আইন-প্রণয়ন ব্যাপারে সর্বসর্বা এবং ইহার দ্বারা প্রণীত আইনগুলি দেশের সর্বত্র প্রযোজ্য।

অপরপক্ষে অ-সার্বভৌম আইনসভার বৈশিষ্ট্য হইল যে, (১) এই আইনসভার আইন-প্রণয়নক্ষমতা অল্প উচ্চতর কর্তৃপক্ষ হইতে উদ্ধৃত—ইহার আদিম বা স্বৈর ক্ষমতা থাকে না। (২) দ্বিতীয়তঃ, এই আইনসভা সর্বপ্রকার আইন প্রণয়ন করিতে পারে না বা সব আইন সংশোধন বা পরিবর্তন করিতে পারে না। (৩) তৃতীয়তঃ, এই আইনসভা-প্রণীত আইন শাসনবিভাগীয় কর্তৃপক্ষ নাকচ করিতে পারে বা বিচারবিভাগ ইহা অবৈধ বলিয়া ঘোষণা করিতে পারে।

ইংলণ্ডের পার্লামেন্ট সভা হইল সার্বভৌম আইনসভার প্রকৃষ্ট উদাহরণ। পার্লামেন্ট সভার আইন-প্রণয়নক্ষমতা এতই দুর্ভেদ্য যে, এ সম্পর্কে বলা হইয়াছে যে, পার্লামেন্ট সভা একমাত্র নারীকে পুরুষে রূপান্তরিত করা ও পুরুষকে নারীতে রূপান্তরিত করা ব্যতীত আর সবই পারে। পার্লামেন্ট সভার আইন-প্রণয়ন ক্ষমতা স্বৈর—ইহা কোন উচ্চতর কর্তৃপক্ষ কর্তৃক প্রদত্ত হয় নাই। পার্লামেন্ট-প্রণীত আইনের বৈধতা সম্পর্কে প্রশ্ন করিবার ক্ষমতা ইংলণ্ডের কোন কর্তৃপক্ষেরই বা কোন বিচারালয়ের নাই। পার্লামেন্ট সভা সকলপ্রকার আইনই—কি সাধারণ কি শাসনতান্ত্রিক—প্রণয়ন, সংশোধন ও বাতিল করিতে পারে। পার্লামেন্ট-প্রণীত আইন সাম্রাজ্যের সর্বত্র প্রযোজ্য।

পার্লামেন্ট সভার তুলনায় মার্কিন যুক্তরাষ্ট্রের আইনসভা কংগ্রেসকে

অ-সার্বভৌম আইনসভা বলা যাইতে পারে। প্রথমতঃ, মার্কিন যুক্তরাষ্ট্রের কংগ্রেস সভার আইন-প্রণয়নক্ষমতা আদিম নহে—ইহা যুক্তরাষ্ট্রের শ্রেষ্ঠতর আইন অর্থাৎ শাসনতন্ত্র কর্তৃক প্রদত্ত ও এই শাসনতন্ত্র কর্তৃক নির্ধারিত গণ্ডির মধ্যে কংগ্রেসের আইন-প্রণয়নক্ষমতা সীমাবদ্ধ। দ্বিতীয়তঃ, কংগ্রেস-প্রণীত আইন রাষ্ট্রপতির অমুমোদনসাপেক্ষ। তিনি ইহা নাকচ করিতে পারেন। তৃতীয়তঃ, মার্কিন যুক্তরাষ্ট্রের যুক্তরাষ্ট্রীয় বিচারালয় সূপ্রীম কোর্ট কংগ্রেস-প্রণীত আইনকে শাসনতন্ত্র-বিরোধী আইন বলিয়া ঘোষণা করিতে পারে। এইরূপ বে-আইনী ঘোষিত আইন কার্যকরী হয় না। পরিশেষে বলা যায় যে, কংগ্রেস সভার আইন-প্রণয়নক্ষমতা বিভিন্ন রাজ্যগুলির স্বাধীন আইন-প্রণয়নক্ষমতার দ্বারাও সংকুচিত হইয়াছে। এইজন্যই বলা হয় যে, মার্কিন দেশে যুক্তরাষ্ট্রীয় আইনসভা (কংগ্রেস) দুই দিক দিয়া সীমাবদ্ধ (Doubly restricted), কিন্তু ইংলণ্ডের আইনসভা (পার্লিামেন্ট) আদৌ সীমাবদ্ধ নয়।

এস্থলে স্মরণ রাখিতে হইবে যে, নীতিগতভাবে পার্লিামেন্ট সভার সার্ব-ভৌমত্ব স্বীকৃত হইলেও কার্যতঃ বর্তমানে পার্লিামেন্ট সভাকে আর সার্বভৌম ক্ষমতার অধিকারী বলা সমীচীন নহে। পার্লিামেন্ট বলিতে রাজা-সহ লর্ড সভা ও কমন্স সভা বুঝায়। বর্তমানে রাজা ও লর্ড সভার আইন-প্রণয়ন-ক্ষমতা নাই বলিলেও চলে। পার্লিামেন্টের প্রাধান্ত বর্তমানে কমন্স সভার প্রাধান্ত হুচিত করে। কিন্তু বিংশ শতাব্দীর প্রারম্ভ হইতেই কমন্স সভা হইতে ক্ষমতা হস্তান্তরিত হইয়া কেবিনেট সভায় কেন্দ্রীভূত হইয়াছে। সুতরাং পার্লিামেন্টের প্রাধান্ত বলিতে কেবিনেটেরই প্রাধান্ত বুঝায়। ইহা ব্যতীত, অপিচ ক্ষমতার বলে শাসন-বিভাগ কর্তৃক আইন-প্রণয়ন ও বিচার-বিভাগ কর্তৃক আইন-ব্যাখ্যাকালীন পরোক্ষ আইন-প্রণয়ন দ্বারাও পার্লিামেন্ট সভার আইন-প্রণয়নক্ষমতা অনেকাংশে সংকুচিত হইয়াছে। ইংলণ্ড কর্তৃক স্বীকৃত আন্তর্জাতিক আইনগুলির বিরোধী কোন আইনও পার্লিামেন্ট সভা প্রণয়ন করিতে পারে না। পরিশেষে বলা যায় যে, পার্লিামেন্ট-প্রণীত কোন আইনই ডোমিনিয়নগুলির বিনা সম্মতিতে প্রযোজ্য নহে। সুতরাং দেখা যায় যে, পার্লিামেন্টের প্রাধান্ত বর্তমানে একটি নিছক কল্পনায় পর্ববসিত হইয়াছে

অর্পিত ক্ষমতা বলে আইন প্রণয়ন (Delegated Legislation)

আইন প্রণয়ন করা একমাত্র আইনসভার কাজ বলিয়া পরিগণিত হয়। কিন্তু আইনসভা যখন এই আইন-প্রণয়ন কার্য শাসনকর্তৃপক্ষের হস্তে হস্তান্তরিত করে, তখন শাসনকর্তৃপক্ষ কর্তৃক রচিত আইন অর্পিত ক্ষমতা বলে প্রণীত আইন বলিয়া কথিত হয়। আইন প্রণয়ন করা শাসনকর্তৃপক্ষের মৌলিক ক্ষমতা নহে—ইহা উদ্ভূত বা প্রাপ্ত (derivative) ক্ষমতা মাত্র। সুতরাং শাসনকর্তৃপক্ষ কর্তৃক প্রণীত আইনকে প্রয়োজনীয় কিন্তু অপ্রধান আইন বলা যাইতে পারে। ইংলণ্ডের শাসনব্যবস্থায় এইরূপ বহু আইন প্রচলিত আছে। এই আইনগুলি মন্ত্রিগণ কর্তৃক নিয়ম (Rules), বিধি (Regulations) ও উপ-বিধি (Bye-laws) প্রভৃতি আকারে প্রণীত হয়।

অর্পিত ক্ষমতা বলে আইন-প্রণয়নের প্রয়োজনীয়তা (Need for De'legated Legislation)

নানা কারণে এই ধরনের আইন প্রণয়ন করিবার প্রয়োজনীয়তা দেখা যায়। প্রথমতঃ, বলা যায় যে, বর্তমান যুগে কল্যাণ রাষ্ট্রগুলির ক্ষমতা ও কার্য ক্রমাগত বৃদ্ধি পাইতেছে। নিত্য নূতন আইন-প্রণয়নের বর্ধিত চাহিদা একটিমাত্র আইনসভা পূরণ করিতে পারে না—কারণ ইহার সেরূপ পর্যাপ্ত সময়ও নাই ও যোগ্যতাও নাই। বর্তমানে অধিকাংশ ক্ষেত্রেই আইনসভা আইনের পরিধি-রেখা (outline) অংকন করে, বিশদ বিবরণ সন্নিবেশ করিতে পারে না। আইন-প্রণয়ন ব্যাপারে যে তথ্য-সংক্রান্ত ও প্রায়োগিক জ্ঞান প্রয়োজন তাহা আইনসভার নাই। এই কারণে রচিত আইনকে কার্যক্ষেত্রে প্রয়োগযোগ্য করিবার উদ্দেশ্যে পূর্ণাঙ্গ করা প্রয়োজন হয়। এই পূর্ণাঙ্গ করিবার ভার শাসনকর্তৃপক্ষের হস্তে হস্ত হয়। শাসনকর্তৃপক্ষ নানা নিয়ম, বিধি, উপ-বিধি প্রভৃতি সৃষ্টি করিয়া পার্লামেন্ট প্রণীত আইনকে পূর্ণাঙ্গ করিয়া প্রয়োগযোগ্য করে। পার্লামেন্ট প্রদত্ত ক্ষমতা বলে শাসনকর্তৃপক্ষ কর্তৃক আইনের এই পূর্ণাঙ্গকরণ কাজকে অর্পিত ক্ষমতা বলে আইন-প্রণয়ন বলা হয়।

দ্বিতীয়তঃ, আইন-প্রণয়ন একটি জটিল কার্য। ইহার জন্য বিশেষ বিদ্যা ও জ্ঞানের প্রয়োজন। প্রতিনিধিগূলক আইনসভা আইনের নীতি

ও গুণাগুণ বিচার করিতে সমর্থ হইলেও আইন-প্রণয়ন ব্যাপারে যে বিশেষ জ্ঞানের প্রয়োজন তাহার অধিকারী নহে। সুতরাং বাহারা এই বিশেষ জ্ঞানের অধিকারী, সেই শাসনকর্তৃপক্ষের হস্তে আইন-প্রণয়নের জটিল অংশ অর্পণ করা হয়।

তৃতীয়তঃ, বর্তমান দ্রুত পরিবর্তনশীল সামাজিক পরিবেশের সহিত সামঞ্জস্য বিধান করিয়া আইন প্রণয়ন ও প্রয়োগ করা বিশেষ প্রয়োজন। আইনসভা সমরূপ (uniform) আইন প্রণয়ন করে। কিন্তু বিভিন্ন স্থানে স্থানীয় অবস্থা অনুসারে আইন প্রয়োগ করিতে হয়। প্রয়োগ ক্ষেত্রে অনেক সময় স্থানভেদে আইনের কিছু পরিবর্তন করা প্রয়োজন হয়। নতুন নিয়ম, বিধি বা উপ-বিধি প্রণয়ন সাহায্যে শাসনকর্তৃপক্ষ এরূপক্ষেত্রে আইন প্রয়োগযোগ্য করে। ইহাতে আইনের নমনীয়তাও বৃদ্ধি পায়।

অপিত ক্ষমতাবলে আইন প্রণয়ন প্রবর্তিত হওয়ার ফলে আইন-সভার সময়ের মিতব্যয়িতা হইয়াছে। আইনের বিশদ তথ্য বা জটিল বিষয়ের আলোচনায় সময়ক্ষেপ না করিয়া আইনসভা এখন আইনের নীতি ও গুণাগুণ বিচারে অধিক সময় ব্যয় করিতে পারে। এই ব্যবস্থার সাহায্যে আইন-প্রণয়ন ব্যাপারে বিশেষজ্ঞের সাহায্য পাওয়াও সম্ভব।

কিন্তু এই পদ্ধতিতে আইন-প্রণয়নের প্রধান অসুবিধা হইল যে, শাসনকর্তৃপক্ষ তাহাদের নির্ধারিত ক্ষমতা লংঘন করিয়া আইন প্রণয়ন করিবার নীতিও নির্ধারণ করে। ইহার ফলে ব্যক্তিস্বাধীনতা ক্ষুণ্ণ হওয়ার সম্ভাবনা। শাসনকর্তৃপক্ষের সাধারণতঃ জনসাধারণের সহিত কোন যোগাযোগ থাকে না। সুতরাং শাসনকর্তৃপক্ষ কর্তৃক প্রণীত আইন জনস্বার্থ-বিরোধী হইবার সম্ভাবনা। ইহা ছাড়া, এই অপ্রধান আইনগুলি যখন বিচারালয়ের আওতা-মুক্ত হয়, তখন এই আইনগুলি বিপজ্জনক হয়।

আইনসভার গুরুত্ব হ্রাস (Decline of the Legislature)

সরকারের তিনটি বিভাগের মধ্যে আইনসভার অগ্রাধিকার ও প্রাধান্য সুপ্রতিষ্ঠিত। কারণ আইনসভা-প্রণীত আইনই হইল শাসন ও বিচার বিভাগদ্বয়ের কার্যাবলীর পথনির্দেশক। এতদ্ব্যতীত শাসন ও বিচার—এই দুইটি বিভাগকে আইনসভা কর্তৃক মঞ্জুরীকৃত ব্যয়বরাদ্দের উপর নির্ভর করিতে হয়।

কিন্তু বর্তমান যুগে আইনসভার প্রাধান্ত ক্রমশই হ্রাস পাইতেছে, অপর দিকে শাসনবিভাগের গুরুত্ব অবশ্রুস্তাবীরূপে বৃদ্ধি পাইতেছে। যে সমস্ত কারণে আইনসভার গুরুত্ব হ্রাস পাইতেছে তাহা নিম্নলিখিত-ভাবে বর্ণনা করা যাইতে পারে।

প্রথমতঃ, স্বসংবদ্ধ ও শক্তিশালী রাজনৈতিক দলের আবির্ভাবের ফলে দলের তথা দলীয় নেতার ক্ষমতা অসম্ভবরূপে বৃদ্ধি পাইয়াছে। দলীয় সংহতি এরূপ কঠোরভাবে বলবৎ করা হয় যে, দলের সদস্যগণকে অন্ধভাবেই দলীয় নির্দেশ পালন করিতে হয়। দলের সদস্যগণ গ্রহণ হইতে আরম্ভ করিয়া আইনসভায় ভোটদান ব্যাপার পর্যন্ত সমস্ত কিছুই দলীয় নির্দেশে পরিচালিত হয়। সুতরাং আইনসভার সদস্যগণের কোন অস্থপ্রেরণা বা ব্যক্তিত্ব থাকে না। যে আইনসভার কোন সদস্য নিজের বিবেকবুদ্ধি অহুসারে আলাপ-আলোচনা বা কাজ করিতে পারে না, সে আইনসভা শুধুমাত্র ভোটদান যন্ত্রে পরিণত হয়। এরূপ নিষ্ক্রিয় আইনসভার গুরুত্ব হ্রাস পাওয়া স্বাভাবিক।

দ্বিতীয়তঃ, আইনসভার সদস্যগণ প্রধানতঃ কোন বিশেষ রাজনৈতিক মতবাদের ধারক বলিয়া নির্বাচিত হন। তাঁহাদের কোন বিশেষ যোগ্যতার অধিকারী হওয়া প্রয়োজন হয় না। কিন্তু বর্তমানে আইন-প্রণয়ন কার্য যে শুধু জটিল হইয়াছে তাহা নহে, এই কার্যে অনেক সময় বিশেষ বিজ্ঞা ও জ্ঞানের প্রয়োজন হয়। আইনসভার অধিকাংশ সদস্যই এই বিশেষ জ্ঞানের অধিকারী নহেন, সেইজন্য সদস্যগণ আইন-প্রণয়ন কার্য রূপায়ণের ভার শাসনকর্তৃপক্ষের হস্তে স্তম্ভ করেন। আইন-প্রণয়ন কার্যে আইনসভার এই অক্ষমতা জনিত ঔদাসীন্তের ফলেও ইহার প্রভাব হ্রাস পাইয়াছে।

তৃতীয়তঃ, প্রায় সব দেশেই দলের নেতৃবর্গ শাসনক্ষমতায় অধিষ্ঠিত থাকেন। দলীয় অস্থশাসন অমান্ত করিলে দল হইতে বহিষ্কার এবং আইনসভা ভাঙ্গিয়া দিবার ভীতি প্রদর্শন দ্বারা নেতৃবর্গ আইনসভার দলীয় সদস্যগণকে বশ্রুতা স্বীকার করিতে বাধ্য করেন। ফলে আইন-সভা শাসনকর্তৃপক্ষের তাঁবেদারে পরিণত হয়।

চতুর্থতঃ, অশিত ক্ষমতা বলে আইন-প্রণয়ন (Delegated Legislation) প্রথা প্রবর্তিত হওয়ার ফলেও আইনসভা আরও ক্ষমতাহীন হইয়াছে।

পরিশেষে বলা যায় যে, আইনসভার প্রাধান্ত ও অগ্রাধিকার বিচার বিভাগীয় পুনর্বিচার (Judicial Review) দ্বারাও কিছু ক্ষুণ্ণ হইয়াছে।

ইংলণ্ডের শাসনব্যবস্থায় পার্লামেন্টের ক্ষমতা ও প্রভাব হ্রাস বিশেষরূপে দেখা যায়। পার্লামেন্ট আজ আর শাসন করে না বা শাসন করা ইহার উদ্দেশ্য বলিয়াও পরিগণিত হয় না। শাসনকর্তৃপক্ষ-কেবিনেট সব ক্ষমতাই আত্মসাৎ করিয়াছে। ভারতে আইনসভার প্রাধান্ত কোনদিনই সুপ্রতিষ্ঠিত হয় নাই। ইহা ছাড়া, পার্লামেন্ট সভায় বিরুদ্ধ মতাবলম্বী বহুদলের অবস্থিতির জন্ত পার্লামেন্টের প্রাধান্ত প্রতিষ্ঠিত হইতে পারে না। কাজেই ক্ষমতাসীন শাসনকর্তৃপক্ষই পার্লামেন্টের কার্য নিয়ন্ত্রণ করে। মার্কিন যুক্তরাষ্ট্রে কংগ্রেস সভার উপর শাসনকর্তৃপক্ষের প্রত্যক্ষ নিয়ন্ত্রণ না থাকিলেও পরোক্ষভাবে রাষ্ট্রপতি তাঁহার ভিটোক্ষমতা, প্রেস সন্মেলন, টেলিভিসন বক্তৃতা এবং কংগ্রেস সভায় তাঁহার দলের সাহায্যে আইন-সভার কাজ বিশেষভাবে নিয়ন্ত্রণ করিতে সমর্থ। এতদ্ব্যতীত মার্কিন যুক্তরাষ্ট্রে, সুপ্রীম কোর্টের বিশেষ ক্ষমতা দ্বারা আইনসভার প্রাধান্ত বিশেষভাবে ক্ষুণ্ণ হইয়াছে।

আইনসভার প্রাধান্ত ক্ষুণ্ণ হইলেও বলিতে হইতে হইবে যে, আইন-সভা জনমতের প্রতিনিধি ও জনমত জাগ্রত করিতে সাহায্য করে। ইহার বিভিন্ন কমিটিগুলির মাধ্যমে এই সভা গুরুত্বপূর্ণ কাজ করে। যুগের চাহিদা মিটাইবার জন্ত আজ আইনসভা ইহার পূর্ব ক্ষমতা হস্তান্তর করিয়াছে।

সংক্ষিপ্তসার

সরকারের বিভিন্ন বিভাগ—(১)

আইনসভা—আইনসভা, শাসন-বিভাগ ও বিচার-বিভাগ—সরকারের এই তিনটি বিভাগের মধ্যে আইনসভা সর্বপ্রধান বলিয়া গণ্য হয়।

আইনসভার কার্য—১। পুরাতন আইন সংশোধন করা ও নতুন আইন প্রণয়ন করা। ২। বিশেষ বিচার-বিবেচনা করা। ৩। আয়-ব্যয়ের তদারক ও মঞ্জুর করা। ৪। শাসনকর্তৃপক্ষের কার্য নিয়ন্ত্রণ করা। ৫। বিচার-বিভাগীয় কিছু কার্য সম্পাদন করা।

আইনসভার সংগঠন—আইনসভার নিম্ন পরিষদ সাধারণতঃ নির্বাচিত সদস্যগণ দ্বারা গঠিত হয়। উচ্চ পরিষদের গঠন-প্রণালী সর্বত্র সমান নহে। উত্তরাধিকার-স্বত্ব, মনোনয়ন, প্রত্যক্ষ বা পরোক্ষ নির্বাচন প্রভৃতি বিভিন্ন পদ্ধতির দ্বারা উচ্চ পরিষদ সংগঠিত হয়।

এক-কক্ষ বনাম দ্বি-কক্ষ আইনসভা—বর্তমানে প্রায় সকল দেশে দ্বি-কক্ষ-বিশিষ্ট আইনসভা প্রবর্তিত হইয়াছে। দ্বি-কক্ষের সপক্ষে ও বিপক্ষে নিম্নলিখিত যুক্তিগুলি দেখান হয়।

সপক্ষে যুক্তি—১। উচ্চ পরিষদ বর্তমান থাকিলে নিম্ন পরিষদ যথেষ্ট-ভাবে আইন প্রণয়ন করিতে পারে না। ২। নিম্ন পরিষদের বিবেচনাহীন ও দ্রুত আইন-প্রণয়নে বাধা দিয়া উচ্চ পরিষদ জনমত জাগ্রত করিতে পারে। ৩। আইন-প্রণয়নে নিম্ন পরিষদের ভুলত্রুটি সংশোধন করিতে পারে। ৪। বিশেষ শ্রেণী ও স্বার্থের প্রতিনিধিত্ব করিতে পারে। ৫। যুক্তরাষ্ট্রীয় ব্যবস্থায় আঞ্চলিক সরকারগুলির অধিকার অক্ষুণ্ণ রাখিবার জন্য দ্বিতীয় পরিষদ অপরিহার্য।

বিপক্ষে যুক্তি—১। আইন-প্রণয়ন-পদ্ধতি বর্তমান যুগে এরূপভাবে পরিকল্পিত হইয়াছে যে, কোন আইনই দ্রুত পাস করা যায় না। আর নিম্ন পরিষদ অধিক ক্ষমতার অধিকারী বলিয়া ইচ্ছা করিলে যে-কোনও আইন পাস করিতে পারে, তাহাতে উচ্চ পরিষদ বাধা দিতে পারে না। ২। উচ্চ পরিষদে বিশেষ স্বার্থ ও শ্রেণীর প্রতিনিধিত্ব করিবার বিশেষ ব্যবস্থা করিলে গণতান্ত্রিক আদর্শ ক্ষুণ্ণ হয়। ৩। যুক্তরাষ্ট্রীয় ব্যবস্থায় লিখিত শাসনতন্ত্র ও উচ্চ আদালতই আঞ্চলিক সরকারগুলির অধিকারের রক্ষাকবচের কার্য করে, সেজন্য উচ্চ পরিষদের কোন আবশ্যকতা নাই। ৪। উচ্চ পরিষদের সর্ববাদিসম্মত কোন সংগঠন-প্রণালী আজও পর্যন্ত স্থিরীকৃত হয় নাই। ৫। ক্ষমতাবন্টনের দিক দিয়াও উচ্চ পরিষদ যদি নিম্ন পরিষদের সহিত

একমত হয় তাহা হইলে ইহা বাহুল্যমাত্র, আর যদি নিম্ন পরিষদের কার্যে বাধা দেয় তাহা হইলে ইহা ক্ষতিকর।

উচ্চ পরিষদের প্রকৃত কার্য হইল নিম্ন পরিষদ কর্তৃক প্রস্তাবিত আইনের ভুলত্রুটি সংশোধন, মতবিরোধহীন আইনের প্রস্তাব আনয়ন ও উপযুক্তভাবে প্রত্যেকটি আইনের প্রস্তাব বিবেচনা করা।

ভারতে রাজ্য-সরকারের ক্ষেত্রে উচ্চ পরিষদের প্রয়োজনীয়তা—পশ্চিমবঙ্গ, পূর্ব-পাঞ্জাব, উত্তরপ্রদেশ, বিহার, বোম্বাই ও মাদ্রাজ—এই ছয়টি রাজ্যে প্রথমে দ্বি-কক্ষবিশিষ্ট আইনসভার প্রবর্তন করা হইয়াছিল—ইহার বিপক্ষে বলা হয় যে, ভারতের কেন্দ্রীয় সরকারই হইল প্রকৃত ক্ষমতার অধিকারী। সুতরাং কেন্দ্রে দ্বি-পরিষদ আইনসভার প্রয়োজনীয়তা থাকিলেও রাজ্যসরকারগুলিতে ইহার আবশ্যকতা খুব কম। অনেক রাজ্য আয়তনে ক্ষুদ্র হইয়াছে—তাহাদের পক্ষে দ্বি-কক্ষ আইনসভা পোষণ করা ব্যয়সাপেক্ষ।

আইন-প্রণয়ন-পদ্ধতি—আইন-প্রণয়ন-পদ্ধতি বর্তমানে জটিল আকার ধারণ করিয়াছে। আইনের প্রস্তাবককে খসড়া আইন প্রণয়ন করিয়া আইনসভায় পেশ করিতে হয়। নির্দিষ্ট দিনে প্রথম পাঠ হয়। তাহার পর দ্বিতীয় পাঠ। দ্বিতীয় পাঠের পর বিশেষ একটি সংস্থার বিবেচনার্থ আইন সেই সংস্থার নিকট পাঠান হয়। সংস্থা খসড়াটিকে পরিবর্তিত আকারে বা পরিবর্তন না করিয়া পুনরায় আইন-পরিষদে প্রেরণ করে। তখন তৃতীয় পাঠ হয়। তৃতীয় পাঠের পর খসড়াটি অন্ত পরিষদে প্রেরিত হয়। অন্ত পরিষদ একই পদ্ধতিতে খসড়াটি বিবেচনা করে। অন্ত পরিষদের সমর্থন লাভ করিলে রাজ্য বা রাষ্ট্রপতির অহুমোদন লাভ করিয়া খসড়াটি আইনে পরিণত হয়।

অঙ্গিত ক্ষমতাবলে আইন প্রণয়ন

আইনসভা প্রদত্ত ক্ষমতা বলে শাসনকর্তৃপক্ষ কর্তৃক প্রণীত আইন এই নামে অভিহিত হয়। শাসনকর্তৃপক্ষ কর্তৃক এই আইন নিয়ম, বিধি, উপবিধি আকারে বলবৎ করা হয়।

ইংলণ্ডের শাসনব্যবস্থায় শাসনকর্তৃপক্ষ কর্তৃক প্রণীত বহু আইন প্রচলিত দেখা যায়।

আইনসভার সময় স্বল্প। এই স্বল্প সময়ের মধ্যে বিভিন্ন ধরনের আইন পূর্ণাঙ্গরূপে প্রণয়ন করা আইনসভার পক্ষে সম্ভব নয়। আইনসভার সদস্যগণের সেরূপ বিশেষ জ্ঞানও নাই। তাই নানা বিধি, উপবিধি সংযোজন দ্বারা আইনসভা প্রণীত আইনকে পূর্ণাঙ্গ করিবার ভার শাসনকর্তৃপক্ষের হস্তে প্রাপ্ত করা হয়। এই ব্যবস্থার সাহায্যে প্রত্যেকটি আইনকে স্থান ও কালের ভিত্তিতে রূপায়িত করিয়া অধিকতর উপযোগী করা সম্ভব। আইনসভারও সময়ের মিতব্যয়িতা হয়। কিন্তু অনেক সময় শাসনকর্তৃপক্ষ কর্তৃক রচিত আইন জনস্বার্থ বিরোধী হয়। এইরূপ আইন বিচারালয়ের আওতা-মুক্ত হইলে আরও বিপজ্জনক হয়।

আইনসভার গুরুত্ব হ্রাস

সরকারের তিনটি বিভাগের মধ্যে আইনসভার অগ্রাধিকার স্বীকৃত হইলেও বর্তমানে নানা কারণে আইনসভার এই প্রাধান্য ক্ষুণ্ণ হইতে চলিয়াছে। আইনসভার প্রভাব ও ক্ষমতা আজ দলীয় নেতৃত্বের চাপে অবক্ষয়। দলীয় নির্দেশ পালন করা ব্যতীত আইনসভার সদস্যগণের আর কোন কর্তব্য নাই। দল হইতে বহিষ্কার ও আইনসভা ভাঙ্গিয়া দিবার ভীতি প্রদর্শন দ্বারা শাসন ক্ষমতায় অধিষ্ঠিত দলীয় নেতৃবর্গ আইনসভাকে প্রায় নিষ্ক্রিয় করিয়াছে। অর্পিত ক্ষমতা বলে আইন প্রণয়ন ও বিচার বিভাগীয় পুনর্বিচার প্রবর্তন ফলেও আইনসভার অগ্রাধিকার ও মর্যাদা বহু পরিমাণে ক্ষুণ্ণ হইয়াছে।

প্রশ্নাবলী

1. Classify and describe the nature of functions performed by the legislature in the modern state. (C. U. 1952)
2. Describe the process of law-making in a modern democracy.
3. Bicameralism cannot be justified by any argument. Do you agree? (C. U. 1962)
4. Examine the case for and against Bicameralism. Give illustrations. (C. U. Part I, 1965)
5. Discuss the problem of Bicameralism in connection with the constitution of the legislative organ of modern Governments. (C. U. B. A. Part I, 1967)
6. What are the functions of a moderns legislature? (C. U. B. A. Part I, 1970)

সরকারের বিভিন্ন বিভাগ—(২)

শাসনকর্তৃপক্ষ ও বিচারবিভাগ (The Executive and the Judiciary)

ব্যাপক-অর্থে শাসনকর্তৃপক্ষ বলিতে শাসনব্যবহার শীর্ষস্থানীয় ব্যক্তি হইতে আরম্ভ করিয়া পুলিশবিভাগের অধস্তন কর্মচারী পর্যন্ত বুঝায়। আইন-পরিষদ ও বিচারবিভাগ ব্যতীত সরকারী কার্যে নিযুক্ত সমুদয় কর্মচারীই শাসনবিভাগের অন্তর্ভুক্ত বলিয়া সাধারণতঃ পরিচিত হয়। সংকীর্ণ অর্থে শাসনকর্তৃপক্ষ বলিতে শাসনবিভাগের নীতি ও কার্যক্রমনির্ধারণক শীর্ষস্থানীয় ব্যক্তি বা ব্যক্তিসংসদ বুঝায়।

শাসনকর্তৃপক্ষের শ্রেণীবিভাগ ও নিয়োগ-পদ্ধতি (Classification and Appointment of the Executive)

শাসনকর্তৃপক্ষের শীর্ষস্থানীয় ব্যক্তি বংশাভ্যুত্থিক একজন রাজা অথবা নির্বাচিত রাষ্ট্রপতি হইতে পারেন।

বংশাভ্যুত্থিক রাজা (Hereditary King) অথবা নির্বাচিত রাষ্ট্রপতি (Elected President) নামসর্বস্ব (Nominal) শাসনকর্তৃপক্ষ হইতে পারেন। ইংলণ্ডের বংশাভ্যুত্থিক রাজা ও ভারতের নির্বাচিত রাষ্ট্রপতি নামসর্বস্ব শাসনকর্তৃপক্ষের প্রকৃষ্ট উদাহরণ। যখন শাসনকর্তৃপক্ষের আইন-সভার সহিত যোগসূত্র থাকে ও পারম্পরিক সহযোগিতার ভিত্তিতে শাসনকার্য পরিচালিত হয়, তখন তাহাকে আইনসভা-প্রধান শাসনকর্তৃপক্ষ (Parliamentary Executive) বলা হয়। ইংলণ্ডে এই শাসনব্যবস্থা প্রচলিত আছে। শাসনকর্তৃপক্ষের যদি আইনসভার সহিত কোন প্রকার প্রত্যক্ষ যোগসূত্র না থাকে এবং আইনসভাও যদি শাসনকর্তৃপক্ষের প্রভাবমুক্ত হয়, তাহা হইলে সেই শাসনব্যবস্থাকে রাষ্ট্রপতি-প্রধান শাসনকর্তৃপক্ষ (Non-Parliamentary Executive) বলা হয়। মার্কিন যুক্তরাষ্ট্রে এই শাসন-

ব্যবস্থা চালু দেখিতে পাওয়া যায়। শাসনবিভাগের সর্বোচ্চ ক্ষমতা যখন একটিমাত্র ব্যক্তির হস্তে স্তম্ভ থাকে তখন তাহাকে একক শাসনকর্তৃপক্ষ (Single Executive) বলা হয়। এই ব্যবস্থায় একজন ব্যক্তি শাসন-পরিষদের সর্বাধিনায়ক থাকেন ও পরিষদের অপর সদস্যগণ তাঁহার নির্দেশে পরিচালিত হইয়া থাকেন। একনায়কত্বে ও রাষ্ট্রপতি-চালিত শাসন-ব্যবস্থায় সর্বোচ্চ ক্ষমতার অধিকারী হইলেন একজন শীর্ষস্থানীয় ব্যক্তি। শাসনকার্যে সাহায্য করিবার জন্ত তিনি সহকারী নিয়োগ করিতে পারেন, কিন্তু সহকারিবৃন্দ তাঁহার নিম্নতম কর্মচারী বলিয়া পরিগণিত হয়। মার্কিন যুক্তরাষ্ট্রে রাষ্ট্রপতি হইলেন শাসনবিভাগের শীর্ষস্থানীয় ব্যক্তি। মন্ত্রিসভার সদস্যগণকে তিনিই নিয়োগ করেন ও সদস্যগণ তাঁহার নির্দেশেই পরিচালিত হন। নাৎসী জার্মানী ও ফ্যাসিবাদী ইটালীতে এক-নায়কত্ব ব্যবস্থায় একব্যক্তিই সমস্ত ক্ষমতা-প্রয়োগের অধিকারী ও সমস্ত দায়িত্ববহনকারী বলিয়া পরিগণিত হইত।

শাসন-পরিষদ যদি একব্যক্তি দ্বারা গঠিত না হইয়া একাধিক ব্যক্তির দ্বারা গঠিত হয় এবং শাসনকার্য যদি একাধিক ব্যক্তির দ্বারা পরিচালিত হয়, তাহা হইলে শাসন-পরিষদকে সমষ্টিগত শাসনকর্তৃপক্ষ (Plural Executive) বলা হয়। মন্ত্রিসংসদ-চালিত শাসনব্যবস্থায় একাধিক ব্যক্তি যৌথ-ভাবে শাসনকার্য পরিচালনা করেন। কিন্তু এই ব্যবস্থায়ও একজন নেতা বা প্রধানমন্ত্রী থাকেন। তিনি মন্ত্রিমণ্ডলীর অন্ততম হইলেও অনেক বিষয়ে তাঁহার প্রাধান্ত দেখিতে পাওয়া যায়। সমষ্টিগত শাসন-পরিষদের প্রকৃষ্ট উদাহরণ সুইজারল্যাণ্ডে দেখিতে পাওয়া যায়। সুইস শাসন-পরিষদ (Federal Council) সাতজন সমক্ষমতাবিশিষ্ট সদস্য লইয়া গঠিত। ইহাদের মধ্যে একজন এক বৎসরের জন্য সভাপতি নিযুক্ত হইয়া থাকেন। কিন্তু ক্ষমতার দিক দিয়া দেখিলে এই সভাপতি অত্যন্ত সদস্য অপেক্ষা উচ্চতর বা কোন বিশেষ ক্ষমতার অধিকারী নহেন। শাসন-পরিচালনার ক্ষমতা ও দায়িত্ব শাসন-পরিষদের সাতজন সদস্যই সমভাবে বহন করেন।

একক শাসন-পরিষদ-ব্যবস্থায় একজন মাত্র ব্যক্তি শাসনক্ষমতার শীর্ষস্থানীয় বলিয়া অবস্থা অল্পসারে দ্রুত সিদ্ধান্ত গ্রহণ করিতে পারেন। শাসনক্ষমতা একাধিক ব্যক্তির মধ্যে বিভক্ত হইলে দৃঢ়তার সহিত কোন কার্যকরী পদ্য

অবলম্বন করা যায় না, সুতরাং শাসনব্যবস্থা দুর্বল হইয়া পড়ে। একক শাসন-পরিষদের প্রধান গুণ হইল যে, শাসনকর্তৃপক্ষ অন্তর্নিরপেক্ষ হইয়া স্বাধীন-ভাবে প্রয়োজনীয় কার্যসমূহ সময়মত সম্পাদন করিতে পারে। কিন্তু একহস্তে সমস্ত ক্ষমতা কেন্দ্রীভূত হওয়ার ফলে সৈরাচারের সম্ভাবনা বৃদ্ধি পায়।

সমষ্টিগত শাসন-পরিষদের প্রধান গুণ হইল যে, একাধিক ব্যক্তির আলাপ-আলোচনা ও ভাববিনিময়ের দ্বারা শাসনব্যবস্থার নীতি ও কার্যক্রম নির্ধারিত হইতে পারে। সময়সাপেক্ষ হইলেও আলাপ-আলোচনার দ্বারা স্থিরীকৃত-নীতি অধিকতর কার্যকরী ও সাফল্যমণ্ডিত হয়। ক্ষমতা একাধিক ব্যক্তির মধ্যে বিভক্ত থাকার ফলে ইহার সৈরপ্রয়োগের সম্ভাবনা হ্রাস পায়। কিন্তু এই ব্যবস্থার বিপক্ষে বলা হয় যে, শাসনক্ষমতা যদি একাধিক ব্যক্তির মধ্যে সমভাবে বিভক্ত হয়, তাহা হইলে শাসনব্যবস্থা শুধু দুর্বল হইয়া পড়ে তাহা নয়, শাসকগণের মধ্যে দায়িত্বজ্ঞানেরও অভাব হইতে পারে। এইজন্য মন্ত্রিসংসদ-চালিত শাসনব্যবস্থায় মন্ত্রিমণ্ডলীর যৌথ-দায়িত্বের উপর বিশেষ গুরুত্ব আরোপ করা হয় এবং একজন প্রধানমন্ত্রীর নির্দেশে মন্ত্রিসংসদ পরিচালিত হয়। সুইজারল্যান্ডে এই সমষ্টিগত শাসন-পরিষদ সূত্রেই শাসনকার্য পরিচালনা করিলেও অন্তত এই ব্যবস্থা কার্যকরী হয় নাই।

শাসনবিভাগীয় কার্য (Functions of the Executive)

শাসনবিভাগীয় কার্য পাঁচটি বিভিন্ন ভাগে বিভক্ত করা যায় :—

১। শাসনবিভাগীয় ক্ষমতা (Administrative Power)

শাসনবিভাগের প্রধান কার্য হইল আইনসমূহ প্রয়োগ করিয়া শাসনকার্য পরিচালনা করা এবং দেশে যাহাতে আইন ও শৃঙ্খলা বজায় থাকে সেজন্য জনসাধারণকে আইন মানিতে বাধ্য করা। আভ্যন্তরীণ শান্তি ও শৃঙ্খলা রক্ষা করিবার জন্ত শাসনকর্তৃপক্ষকে পুলিশবাহিনী পরিচালনা করিতে হয় এবং আইনভঙ্গকারীদের বিচারালয় কর্তৃক নির্ধারিত শাস্তি প্রদান করিবার নিমিত্ত কারাবাসের ব্যবস্থা করিতে হয়।

২। কূটনৈতিক ক্ষমতা (Diplomatic Power)

বর্তমান যুগে প্রত্যেক রাষ্ট্রের নানা কারণে অপরাপর রাষ্ট্রের সহিত ঘনিষ্ঠ সম্পর্কে আসিতে হয়। এক রাষ্ট্রের সহিত অপর রাষ্ট্রের কি সম্পর্ক হইবে

তাহা শাসনবিভাগ স্থির করে। বৈদেশিক ব্যাপারসমূহ নিষ্পন্ন করিবার উদ্দেশ্যে রাষ্ট্রসমূহ পরস্পরের সহিত দূতবিনিময় করে ও এই দূতের মাধ্যমেই রাষ্ট্রগুলির পারস্পরিক আদান-প্রদান সম্পন্ন হয়। ইহা ছাড়া, বৈদেশিক শক্তির সহিত চুক্তি সম্পাদন করা ও সন্ধিস্থলে আবদ্ধ হওয়া প্রভৃতি যাবতীয় কার্য শাসনবিভাগীয় ক্ষমতার অন্তর্ভুক্ত।

৩। সামরিক ক্ষমতা (Military Power)

পররাষ্ট্রের সহিত যুদ্ধ ঘোষণা করিয়া যুদ্ধকার্য পরিচালনা করা শাসন-বিভাগের আর একটি প্রধান ক্ষমতা। যুদ্ধ-পরিচালনার জন্য শাসনবিভাগ স্থলবাহিনী, নৌ-বাহিনী এবং বিমানবাহিনী গঠন করিয়া তাহাদের পরিচালনা করে। যুদ্ধ সমাপ্ত করিয়া শান্তিস্থাপন করিবার ক্ষমতাও শাসন-কর্তৃপক্ষের হস্তে গৃহ্য থাকে। কিন্তু যুদ্ধ ঘোষণা করা বা যুদ্ধ পরিচালনা করিবার ব্যয়ের জন্য শাসনকর্তৃপক্ষকে আইন-পরিষদের অনুমোদন লাভ করিতে হয়।

৪। সাধারণ ও জরুরী আইন-প্রণয়ন ক্ষমতা (Legislative and Ordinance-making Power)

শাসনকর্তৃপক্ষের কিছু আইন প্রণয়ন করিবার ক্ষমতাও থাকে। মন্ত্রি-সংসদ-চালিত শাসনব্যবস্থায় মন্ত্রিসংসদের প্রত্যেকটি সদস্য আইনসভার সদস্য হিসাবে আইনসভায় আইন-প্রণয়নের প্রস্তাব করিতে পারেন। আইনসভার সংখ্যাগরিষ্ঠ দলের নেতারা ই মন্ত্রিসংসদ গঠন করেন। সুতরাং মন্ত্রিমণ্ডলী কর্তৃক প্রস্তাবিত খসড়া আইনগুলি সহজেই সংখ্যাগরিষ্ঠ দলের সমর্থনে আইনে পরিণত হয়। অনেক সময় আইনসভা কর্তৃক অস্বীকৃত হইয়া মন্ত্রিসংসদ প্রয়োজনীয় আইন প্রণয়ন করিয়া থাকে। মার্কিন যুক্তরাষ্ট্র প্রভৃতি রাষ্ট্রপতি-চালিত শাসনব্যবস্থায় শাসনকর্তৃপক্ষ পরোক্ষ উপায়ে আইন-প্রণয়নকার্যের উপর প্রভাব বিস্তার করিতে পারে। এতদ্ব্যতীত, আইনসভা কর্তৃক অনুমোদিত আইন শাসনকর্তৃপক্ষ ইচ্ছা করিলে বাতিল করিতে বা স্থগিত রাখিতে পারে। আপেক্ষিক শাসনকর্তৃপক্ষ জরুরী আইন প্রবর্তন করিতে পারে।

৫। বিচারবিষয়ক ক্ষমতা (Judicial Power)

শাসনকর্তৃপক্ষের কিছু কিছু বিচারবিষয়ক ক্ষমতাও থাকে। অধিকাংশ দেশে উচ্চ বিচারালয়ের বিচারপতিগণ শাসনকর্তৃপক্ষ কর্তৃক নিযুক্ত হইয়া থাকেন। উর্ধ্বতন শাসনকর্তৃপক্ষের দণ্ডিত ব্যক্তিকে ক্ষমা করিবার ক্ষমতাও থাকে।

স্থায়ী কর্মচারিবৃন্দ (Permanent Civil Service)

স্থায়ী কর্মচারিবৃন্দ হইল শাসনবিভাগের একটি অবিচ্ছেদ্য অঙ্গ। প্রত্যেক দেশেই এই স্থায়ী কর্মচারিবৃন্দ লইয়া শাসনবিভাগ গঠিত হয়। শাসনবিভাগের উর্ধ্বতন কর্তৃপক্ষ স-মন্ত্রিপরিষদ্ রাজা বা রাষ্ট্রপতি। মন্ত্রিপরিষদ্ নির্ধারিত কালের জন্ত নির্বাচিত বা নিযুক্ত হইয়া শাসনকার্য পরিচালনা করেন এবং নির্দিষ্ট কাল অন্তে কার্যভারমুক্ত হন এবং নূতন শাসকগণ নিযুক্ত হন। উর্ধ্বতন শাসনকর্তৃপক্ষ রাষ্ট্র পরিচালনার নীতি নির্ধারণ করেন এবং তাঁহারা নির্ধারিত নীতি ও কার্যের জন্ত পরোক্ষভাবে জনসাধারণের নিকট দায়ী থাকেন। এইরূপে গণতান্ত্রিক শাসনব্যবস্থায় শাসকগণ শাসিতের নিকট দায়ী থাকেন। কিন্তু নীতি নির্ধারণ ও কার্যক্রম স্থির করাই শাসন পরিচালনার একমাত্র কাজ নহে। নির্ধারিত নীতি ও কার্যক্রমকে কার্যে রূপায়িত করিবার জন্ত আর একদল দক্ষ ও অভিজ্ঞ কর্মচারীর প্রয়োজন। এই কর্মচারীগণের শুধু দক্ষ ও কর্মকুশল হইলেই চলে না—তাঁহাদের কার্যের স্থায়িত্বও থাকা আবশ্যক। নতুবা উর্ধ্বতন কর্তৃপক্ষের অর্থাৎ মন্ত্রিপরিষদের পরিবর্তনের সঙ্গে এই কর্মচারিবৃন্দের পরিবর্তন ঘটিলে শাসনবিভাগের কার্য একেবারেই অচল হয়। সেইজন্ত প্রত্যেক দেশের শাসনব্যবস্থায় দুই শ্রেণীর শাসক দেখা যায়—প্রথম শ্রেণীর শাসকগণ শাসনবিষয়ক নীতি নির্ধারণ করিলেও নির্ধারিত কার্যকালের জন্ত নিযুক্ত হন। দক্ষতা অপেক্ষাও দায়িত্বশীলতা হইল এই শ্রেণীর শাসকবর্গের প্রধান বৈশিষ্ট্য। দ্বিতীয় শ্রেণীর শাসকগণ দক্ষতা ও কর্মকুশলতার ভিত্তিতে দীর্ঘকালের জন্ত নিযুক্ত হন। দায়িত্বশীলতা অপেক্ষা কর্মকুশলতাই হইল এই শ্রেণীর শাসকবর্গের প্রধান বৈশিষ্ট্য। ইহারা নির্দিষ্ট বয়সে নিযুক্ত হইয়া একটা নির্দিষ্ট বয়সে কার্য হইতে অবসর গ্রহণ করেন। এই শ্রেণীর কর্মচারীগণ যাহাতে

নিরপেক্ষভাবে দক্ষতার সহিত সরকারী কার্য পরিচালনা করিতে পারেন সেই উদ্দেশ্যে ইঁহাদের নিয়োগ, পদোন্নতি ও বেতন প্রভৃতি একটি নিরপেক্ষ নিয়োগ সংসদ কর্তৃক স্থিরীকৃত হয়। শাসনব্যবস্থা দক্ষতা ও দায়িত্বশীলতা এই দুইটি গুণের উপর নির্ভর করে এবং শাসনবিভাগের এই দুইটি অঙ্গের সুসামঞ্জস্যের উপর শাসনব্যবস্থার সাক্ষ্য নির্ভর করে।

বিচারবিভাগ ও ইহার কার্য (The Judiciary and its Functions)

লর্ড ব্রাইস বলিয়াছেন যে, কোন দেশের শাসনব্যবস্থার উৎকর্ষ নির্ধারণ করা যায় একমাত্র সেই দেশের বিচারব্যবস্থার উৎকর্ষ দ্বারা। একটু প্রাণিধানপূর্বক দেখিলেই উক্তিটির সত্যতা সন্দেহে সন্দেহের অবকাশ থাকে না। আইনসভা কর্তৃক প্রণীত আইনগুলিকে যথাযথভাবে কার্যক্ষেত্রে প্রয়োগের ভার থাকে বিচারকদের উপর। বিচারপতিগণ শুধু যে আইনগুলি প্রয়োগ করিয়া দোষী ব্যক্তিকে শাস্তি প্রদান করেন তাহা নয়, প্রয়োজনমত তাঁহারা প্রচলিত আইনগুলির ব্যাখ্যা ও বিশ্লেষণ করিয়া এরূপভাবে প্রয়োগ করেন যাহাতে দোষী ব্যক্তি যথাযথভাবে দণ্ডিত হয় ও নির্দোষ ব্যক্তি অব্যাহতি পায়। বিচারকার্য একটা লৌকিক ব্যবস্থামাত্র নহে। অপরাধীর উদ্দেশ্য ও অপরাধের গুরুত্ব সঠিকভাবে পরিমাপ করিয়া শাস্তিবিধান করা উচিত। বিচারব্যবস্থা এরূপভাবে পরিচালিত হওয়া উচিত যে, একাধিক অপরাধী অব্যাহতি লাভ করুক, কিন্তু একজনও নির্দোষ ব্যক্তি যেন শাস্তি না পায়। সুতরাং দেশে শাস্তি-শৃঙ্খলা-রক্ষা ও ব্যক্তি-স্বাধীনতা অক্ষুণ্ণ রাখাঙ্কে ন্যায় বিচারব্যবস্থার গুরুত্ব ও প্রয়োজনীয়তা সর্বত্র স্বীকৃত হয়।

বিচারপতিগণ আইনের প্রয়োগ করেন ও আইনের কি ব্যাখ্যা হওয়া উচিত তাহা স্থির করেন। এইরূপে ব্যাখ্যাত আইনগুলি প্রয়োজন অনুসারে বিভিন্ন ক্ষেত্রে প্রযুক্ত হয়। একাধিক বিচারক যখন তাঁহাদের পূর্ববর্তী বিচারক-কর্তৃক ব্যাখ্যাত আইন অত্মরূপ ক্ষেত্রে অনুসরণ করেন, তখন এই নূতন ব্যাখ্যা দ্বারা নূতন আইন সৃষ্টি হয়। বিচারকগণ অত্র আর এক প্রকারে আইন সৃষ্টি করিয়া থাকেন। যদি কোন বিরোধের বিষয় প্রচলিত আইনের গণ্ডির মধ্যে না পড়ে, তাহা হইলে বিচারকগণ তাঁহাদের বিবেক ও

ত্রায়বুদ্ধি অনুসারে সেই সমস্ত বিষয়ের নিষ্পত্তি করিয়া নূতন আইন সৃষ্টি করেন।

যুক্তরাষ্ট্রের বিচারপতিগণকে আর এক প্রকারের কার্য সম্পাদন করিতে হয়। যুক্তরাষ্ট্রীয় বিচারালয়ের একটি গুরুত্বপূর্ণ কার্য হইল শাসনতান্ত্রিক আইনের ব্যাখ্যা করা। যুক্তরাষ্ট্রে শাসনক্ষমতা কেন্দ্রীয় সরকার ও আঞ্চলিক সরকারগুলির মধ্যে ভাগ করিয়া দেওয়া হয়। কেন্দ্রীয় সরকার অথবা আঞ্চলিক সরকারগুলির শাসনতন্ত্র দ্বারা নির্ধারিত সীমারেখা অতিক্রম করিয়া অপরের কার্যক্ষেত্রে ঘাঘাতে হস্তক্ষেপ করিতে না পারে, সেজন্য যুক্তরাষ্ট্রীয় বিচারালয়ের উভয় সরকারের কার্যকলাপ শাসনতন্ত্র-বহির্ভূত ও বে-আইনী বলিয়া ঘোষণা করিবার ক্ষমতা থাকে।

বিচারকগণ নির্দিষ্টক্ষেত্রে প্রয়োজনমত আইন-পরিষদ ও শাসনকর্তৃপক্ষ কর্তৃক অতীত হইলে আইন সম্বন্ধে তাঁহাদের অভিমত প্রদান করিয়া থাকেন। নূতন শাসনতন্ত্র অনুসারে ভারতের রাষ্ট্রপতি ভারতীয় উচ্চ বিচারালয়ের অভিমত জানিবার জন্য যে-কোন বিষয় উপস্থিত করিতে পারেন।

বিচারবিভাগের স্বাধীনতা ও নিরপেক্ষতা (Independence and Impartiality of the Judiciary)

ত্রায়বিচার করিয়া ব্যক্তি-স্বাধীনতা রক্ষা করা বিচারকের পবিত্র ও গুরুদায়িত্ব বলিয়া সর্বত্র স্বীকৃত হয়। বিচারকগণ ঘাঘাতে আইন অনুসারে বিচারকার্য পরিচালনা করিতে পারেন সেজন্য তাঁহাদের স্বাধীন ও নিরপেক্ষ হওয়া একান্ত বাঞ্ছনীয়। প্রথমতঃ, বিচারকগণ আইন প্রয়োগ করিয়া দোষী ও নির্দোষ স্থির করেন ও অপরাধের গুরুত্ব অনুসারে শাস্তিবিধান করেন। এরূপ ক্ষেত্রে বিচারক যদি স্বাধীন ও নিরপেক্ষ না হন, তাহা হইলে হয়ত নির্দোষ ব্যক্তি শাস্তি পাইতে পারে ও দোষী অব্যাহতি লাভ করিতে পারে। সুতরাং ত্রায়ধর্ম অনুসারে বিচারকের স্বাধীন ও নিরপেক্ষ মনোভাবাপন্ন হওয়া উচিত। দ্বিতীয়তঃ, শাসনকর্তৃপক্ষের বে-আইনী কার্যকলাপের হস্ত হইতে নাগরিক অধিকারগুলি রক্ষা করা বিচারকগণের আর একটি গুরুদায়িত্ব। যে ক্ষেত্রে বিচারকগণের আইনমতা বা শাসনকর্তৃপক্ষের দ্বারা প্রভাবিত হওয়ার সম্ভাবনা থাকে, সেখানে ব্যক্তি-স্বাধীনতার সমাধি রচিত হওয়া

অবশ্যজ্ঞাবী। এদিক দিয়া দেখিতে গেলেও নিরপেক্ষ ও স্বাধীন বিচার-ব্যবস্থাকে ব্যক্তিস্বাধীনতার রক্ষাকবচ বলা যাইতে পারে। তৃতীয়তঃ, যুক্তরাষ্ট্রীয় শাসনব্যবস্থায় কেন্দ্রীয় সরকার ও আঞ্চলিক সরকারগুলির মধ্যে ক্ষমতার ভারসাম্য রক্ষাকল্পে বিচারপতিগণের স্বাধীন ও নিরপেক্ষ দৃষ্টিভঙ্গীর একান্ত প্রয়োজন। সুতরাং বিচারবিভাগের স্বাধীনতা ও নিরপেক্ষতার প্রয়োজনীয়তা সম্বন্ধে সন্দেহের অবকাশ থাকিতে পারে না।

তিনটি উপায়ে বিচারবিভাগের স্বাধীনতা ও নিরপেক্ষতা সৃষ্টি করা হয়। প্রথমতঃ, বিচারকগণের স্বাধীনতা ও নিরপেক্ষতা বহুল পরিমাণে তাঁহাদের নিয়োগ-পদ্ধতির উপর নির্ভর করে। নিয়োগ-পদ্ধতি এরূপ হওয়া উচিত যে, একবার বিচারকপদে নিযুক্ত হইলে তাঁহাদের স্বাধীন ও নিরপেক্ষ মতের জন্ত যেন কোন কর্তৃপক্ষই তাঁহাদের পদচ্যুত করিতে না পারে। যদি কোন কর্তৃপক্ষের ইচ্ছানুসারে কার্য না করিলে বিচারকের পদচ্যুত হইবার সম্ভাবনা থাকে, তাহা হইলে বিচারক নির্ভীকভাবে তাঁহার কর্তব্য সম্পাদন করিতে পারেন না। দ্বিতীয়তঃ, বিচারকদের কার্যকালের স্থায়িত্বের উপরও তাঁহাদের স্বাধীনতা ও নিরপেক্ষতা নির্ভর করে। অত্যাশ্রিত ও দুর্নীতির আশ্রয় গ্রহণ ব্যতীত, অল্প কোন কারণে তাঁহাদের অপসারিত হইবার ভয় না থাকিলে বিচারকগণ নিরপেক্ষভাবে তাঁহাদের গুরুদায়িত্ব পালন করিতে সক্ষম হন। একটা নির্দিষ্ট বয়ঃসীমা অতিক্রম করিবার পর বিচারকগণ অবসর গ্রহণ করিবেন, কিন্তু তৎপূর্বে তাঁহাদের অপসারণ সম্ভাবনারহিত হওয়া উচিত। তৃতীয়তঃ, বিচারপতিগণ যাহাতে কোনরূপ প্রলোভন দ্বারা আকৃষ্ট না হইয়া সসম্মানে তাঁহাদের গুরুদায়িত্ব-পালনে সক্ষম হন সেজ্জন্ত তাঁহাদের উপযুক্ত পরিমাণ বেতন দেওয়া উচিত ও কার্যকালে তাঁহাদের বেতনের হ্রাস-বৃদ্ধি না করাও উচিত।

বিচারক নিয়োগ ও অপসারণ-পদ্ধতি (Mode of Appointment and Removal of the Judiciary)

পূর্বেই বলা হইয়াছে যে, বিচারকগণের স্বাধীনতা ও নিরপেক্ষতা তাঁহাদের নিয়োগ পদ্ধতির উপর কিয়ৎপরিমাণে নির্ভর করে। বিভিন্ন দেশে বিচারক-নিয়োগে বিভিন্ন পদ্ধতি অমূল্য হইয়া থাকে। প্রথমতঃ, ইংলণ্ড,

মার্কিন যুক্তরাষ্ট্রে, ভারত প্রভৃতি দেশে শাসনকর্তৃপক্ষ বিচারপতিগণকে মনোনীত করিয়া থাকেন। ইংলণ্ডে সর্বোচ্চ বিচারালয়ের বিচারপতিগণ রাজা কর্তৃক নিযুক্ত হইয়া থাকেন ও নির্দিষ্ট বয়সসীমা পর্যন্ত যদি তাঁহাদের বিরুদ্ধে অসদাচরণের অভিযোগ আনীত না হয় তাহা হইলে তাঁহাদের কাৰ্যকালে কেহই তাঁহাদিগকে অপসারিত করিতে পারে না। কোন বিচারককে পদচ্যুত করা হউক—এই মর্মে যদি পার্লামেন্ট সভা রাজার নিকট আবেদন করে, তাহা হইলে একমাত্র সেই ক্ষেত্রে সংশ্লিষ্ট বিচারককে পদচ্যুত করা যায়। সুতরাং ইংলণ্ডে শাসনকর্তৃপক্ষ কর্তৃক নিযুক্ত হইলেও বিচারপতিগণকে শাসনকর্তৃপক্ষ ইচ্ছামত পদচ্যুত করিতে পারে না। মার্কিন যুক্তরাষ্ট্রে যুক্তরাষ্ট্রীয় উচ্চ আদালতের বিচারপতিগণ সিনেট সভার অল্পমোদনক্রমে রাষ্ট্রপতি কর্তৃক নিযুক্ত হইয়া থাকেন, কিন্তু বিশেষ বিচারপদ্ধতি (Impeachment) অবলম্বন না করিয়া বিচারকগণকে অপসারিত করিবার ক্ষমতা রাষ্ট্রপতির নাই। ভারতেও সর্বোচ্চ বিচারালয়ের প্রধান-বিচারপতি ও অন্যান্য বিচারপতির সহিত পরামর্শ করিয়া উচ্চ আদালতের বিচারপতিগণকে রাষ্ট্রপতি নিযুক্ত করিয়া থাকেন। কিন্তু কোন বিচারপতিকে অপসারিত করিতে হইলে আইনসভার একটি পরিষদকে উক্ত বিষয়ে আবেদন করিতে হইবে, এবং অপর পরিষদ কর্তৃক যদি সংশ্লিষ্ট বিচারপতির অপসারণের উক্ত আবেদন গৃহীত হয়, তবেই তাঁহাকে পদচ্যুত করা যাইতে পারে।

সুইজারল্যান্ডে ও সোভিয়েত যুক্তরাষ্ট্রে বিচারপতিগণ আইনসভা কর্তৃক নির্বাচিত হইয়া থাকেন। মার্কিন যুক্তরাষ্ট্রের অধিকাংশ রাজ্যে জনগণের ভোটের উপর বিচারকদের নির্বাচন নির্ভর করে। এই উভয় পদ্ধতিই সমর্থনযোগ্য নহে। আইনসভা কর্তৃক বিচারপতিদের নির্বাচনের বিপক্ষে বলা যায় যে, এই ব্যবস্থায় বিচারবিভাগও রাজনৈতিক দলাদলির সহিত জড়িত হইয়া পড়ে। ফলে ন্যায়বিচারের সম্ভাবনা সুদূরপরাহত হয়। বিচারকগণও তাঁহাদের নির্বাচন এবং চাকুরির স্থায়িত্বের জগ্ন দলীয় স্বার্থপ্রণোদিত হইয়া বিচারকার্য পরিচালনা করিবেন। একই কারণে জনসাধারণের হস্তে বিচারক নির্বাচন করিবার গুরুদায়িত্ব অর্পিত হওয়া যুক্তিযুক্ত নহে। যোগ্য বিচারক নির্বাচন করিবার অল্পরূপ বুদ্ধি বা যোগ্যতা

সাধারণ লোকের নিকট হইতে আশা করা যায় না। গার্গারের মতে শাসনকর্তৃপক্ষ কর্তৃক বিচারকগণের নিয়োগ-পদ্ধতি হইল সর্বোৎকৃষ্ট। এই পদ্ধতিতে বিচারকগণের নিয়োগ হইলে তাঁহারা দলাদলির উর্ধ্বে থাকিয়া সম্পূর্ণ নিরপেক্ষ ও নির্ভীকভাবে বিচারকার্য পরিচালনা করিতে পারেন।

আইনসভার সহিত শাসনকর্তৃপক্ষের সম্পর্ক (Relation between the Legislature and the Executive)

সরকারের বিভিন্ন কার্য তিনটি পৃথক বিভাগ কর্তৃক পরিচালিত হইলেও প্রশাসনিক দক্ষতা অব্যাহত রাখিবার নিমিত্ত এই তিনটি বিভাগের সম্পূর্ণ পৃথকীকরণ সম্ভবও নয়, বাঞ্ছনীয়ও নয়। প্রত্যেক বিভাগের সহিত অপর বিভাগের সহযোগিতা ও পারস্পরিক নির্ভরশীলতা শাসনব্যবস্থাকে দৃঢ়তর ও সুদক্ষ করিতে সাহায্য করে। প্রত্যেক দেশেই আইনসভার সহিত শাসন-বিভাগের প্রত্যক্ষ অথবা পরোক্ষ যোগসূত্র বর্তমান।

প্রথমতঃ, গ্রেট ব্রিটেন, ফরাসী দেশ বা ভারত, যেখানে পার্লামেন্টারি শাসনব্যবস্থা প্রবর্তিত আছে, সেখানে আইনসভা ও শাসনকর্তৃপক্ষের মধ্যে প্রত্যক্ষ যোগসূত্র ও পারস্পরিক নির্ভরশীলতা দেখিতে পাওয়া যায়। মন্ত্রিপরিষদের সমুদয় সদস্যই আইনসভার সদস্য এবং যতদিন তাঁহারা আইনসভার আস্থাভাজন থাকেন ততদিন তাঁহারা ক্ষমতায় অধিষ্ঠিত থাকিতে পারেন। নিছক নীতির দিক দিয়া দেখিতে গেলে গ্রেট ব্রিটেনে মন্ত্রিপরিষদ আইনসভার উপর নির্ভরশীল হইলেও কার্যতঃ বর্তমানে মন্ত্রিপরিষদের প্রাধান্ত পরিলক্ষিত হয়। কি নীতিনির্ধারণে, কি আইন-প্রণয়নে—সর্ববিষয়েই মন্ত্রিপরিষদ হইল সর্বসর্বা। কমন্স সভা ভাঙ্গিয়া দিয়া নূতন নির্বাচনের জন্ত প্রধানমন্ত্রী রাজাকে পরামর্শ দিতে পারেন। ফরাসী দেশের পূর্বতন পার্লামেন্টারি শাসনব্যবস্থা ভিন্ন রূপ পরিগ্রহ করিয়াছিল। সেখানে আইনসভার প্রাধান্ত পরিলক্ষিত হইত এবং আইনসভা ইচ্ছামত মন্ত্রিপরিষদ ভাঙ্গিয়া দিতে পারিত। এইজন্ত ফরাসী মন্ত্রিপরিষদ অতিমাত্রায় আইনসভার উপর নির্ভরশীল এবং ইহার স্বাধীনতা গড়ে তিনমাসের অধিক হইত না। ভারতে আইনসভার সহিত মন্ত্রিপরিষদের সম্পর্ক বহুল পরিমাণে গ্রেট ব্রিটেনের শাসনব্যবস্থার অনুরূপ করিয়া গঠিত হইয়াছে।

দ্বিতীয়তঃ, মার্কিন যুক্তরাষ্ট্রে রাষ্ট্রপতি-প্রধান শাসনব্যবস্থা প্রবর্তিত হওয়ার কালে সেখানে আইনসভা ও শাসনকর্তৃপক্ষের সম্পর্ক চরম কর্মবিভাগ-নীতি দ্বারা প্রভাবিত হইয়াছে। উভয় বিভাগই পারস্পরিক প্রভাব হইতে বর্ধাসম্ভব মুক্ত থাকিয়া স্বাধীনভাবে তাহাদের কার্য পরিচালিত করে। তবে রাষ্ট্রপতির সহিত আইনসভার বিশেষ করিয়া উচ্চকক্ষ সিনেট সভার কিছু সম্পর্ক বিদ্যমান।

তৃতীয়তঃ, সুইজারল্যাণ্ডে আইনসভা ও শাসনকর্তৃপক্ষের সম্পর্ক এক অভিনব রূপ পরিগ্রহ করিয়াছে। গ্রেটব্রিটেনের পালামেন্টারি শাসনব্যবস্থা ও মার্কিন যুক্তরাষ্ট্রের রাষ্ট্রপতি-প্রধান শাসনব্যবস্থায় সমন্বয় সাধন করিয়া শাসনব্যবস্থাকে যুগপৎ স্থায়ী ও দৃঢ় করিয়া গঠন করা হইয়াছে। সুইস শাসনকর্তৃপক্ষের বৈশিষ্ট্য হইল যে, ইহা একাধিক সম-ক্ষমতাসম্পন্ন ব্যক্তি লইয়া গঠিত এবং আইনসভা কর্তৃক তাহাদের নীতি বা কার্যক্রম গৃহীত না হইলেও তাহারা আইনসভার মতের সহিত সামঞ্জস্যবিধান করিয়া মন্ত্রিপদে অধিষ্ঠিত থাকেন।

আইনসভার সহিত বিচারবিভাগের সম্পর্ক (Relation between the Legislature and the Judiciary)

অনেক লেখক বিচারবিভাগকে সরকারের একটি স্বতন্ত্র বিভাগের মর্যাদা না দিয়া আইনসভারই একটি প্রশাসনিক অংশ বলিয়া বিবেচনা করেন। কিন্তু এরূপ মতবাদ গ্রহণযোগ্য নয়—কারণ বিচারবিভাগ শুধু আইনসভা-প্রণীত আইনের নির্দিষ্ট ক্ষেত্রে প্রয়োগ ব্যতীত গুরুত্বপূর্ণ অগ্র নানাবিধ কার্য সম্পাদন করিয়া থাকে। বিচারবিভাগ আইনের ব্যাখ্যা দ্বারা ও তাহাদের বিবেক, বুদ্ধি ও গ্রন্থবোধ প্রয়োগ করিয়া নূতন আইন সৃষ্টি দ্বারা আইনসভা-প্রণীত আইনগুলিকে পরিপূর্ণ করে। মার্কিন যুক্তরাষ্ট্র, ভারত প্রভৃতি দেশের উচ্চ বিচারালয় শাসনতন্ত্রের প্রাধান্ত রক্ষা করে এবং শাসনকর্তৃপক্ষ ও আইনসভার শাসনতন্ত্র-বিরোধী কার্যকলাপ নিয়ন্ত্রণ করে। কিন্তু গ্রেট ব্রিটেন বা ফরাসী দেশের বিচারবিভাগ শেঘোক্ত ক্ষমতার অধিকারী নহে।

অপরপক্ষে আইনসভার উচ্চকক্ষ অগিল মামলার প্রধান বিচারালয়রূপে কার্য করে—যথা, গ্রেট ব্রিটেনের লর্ড সভা। এতদ্ব্যতীত ইহা শাসনকর্তৃপক্ষের

উর্ধ্বতন কর্মচারীদের অপরাধ বিচার করিবার অধিকারী। সুইজারল্যান্ড, সোভিয়েত যুক্তরাষ্ট্র প্রভৃতি দেশে বিচারপতিগণ আইনসভা কর্তৃক নির্বাচিত হইয়া থাকেন। গ্রেট ব্রিটেন ও ভারতে বিচারপতিদের অপসারিত করিতে হইলে আইনসভার উভয় কক্ষের রাজা বা রাষ্ট্রপতিসকাশে যুক্ত আবেদন করিতে হয়।

শাসনকর্তৃপক্ষের সহিত বিচারবিভাগের সম্পর্ক (Relation between the Executive and the Judiciary)

বিচারবিভাগ বাহাতে নির্ভীক ও স্বাধীনভাবে ইহার কার্য পরিচালনা করিতে পারে, তজ্জন্ম এই বিভাগকে শাসনকর্তৃপক্ষ-নিরপেক্ষ করা হয়। অমুরূপ কারণে শাসনকর্তৃপক্ষের শীর্ষস্থানীয় ব্যক্তিগণকেও বিচারবিভাগের প্রভাবমুক্ত রাখা হয়। রাজা, রাষ্ট্রপতি বা গভর্নরগণ সাধারণ বিচারালয়ের ক্ষমতাবহির্ভূত বিশেষ মর্যাদাসম্পন্ন কর্মচারী বলিয়া পরিগণিত হইয়া থাকেন। ফরাসী দেশে শাসনবিভাগীয় কর্মচারীগণের শাসন-সংক্রান্ত অপরাধের জন্ত সাধারণ বিচারালয়ে বিচার হইতে পারে না। শাসন-সংক্রান্ত অপরাধের বিচারের জন্ত পৃথক বিচারালয় আছে।

কিন্তু উভয় বিভাগের মধ্যে উপরি-উক্ত স্বাতন্ত্র্য থাকা সত্ত্বেও উভয় বিভাগের মধ্যে যোগসূত্র বর্তমান। প্রথমতঃ, শাসনকর্তৃপক্ষ অনেক দেশে বিচারক নিযুক্ত করেন ও কিছু বিচারবিভাগীয় কার্য সম্পাদন করেন, যথা, প্রাণদণ্ড মকুব করা। অপরপক্ষে, বিচারবিভাগও অনেকক্ষেত্রে প্রত্যক্ষ ও পরোক্ষভাবে শাসনবিভাগের উপর প্রভাব বিস্তার করে। মার্কিন যুক্তরাষ্ট্রে সুপ্রীম কোর্টের বিচারপতিগণ সিনেট সভার অমুমোদনক্রমে রাষ্ট্রপতি কর্তৃক নিযুক্ত হইয়া থাকেন। কিন্তু বিচারপতিগণ তাঁহাদের বিশেষ ব্যাখ্যা করিবার ক্ষমতা প্রয়োগ করিয়া রাষ্ট্রপতির ক্ষমতার সংকোচ বা সম্প্রসারণ করিতে পারেন।

সংক্ষিপ্তসার

শাসনবিভাগ ও বিচারবিভাগ

শাসনকর্তৃপক্ষ—শাসনকার্যে নিযুক্ত কর্মচারিসমূহকে লইয়া শাসন-বিভাগ গঠিত হয়। শাসনকার্যের শীর্ষস্থানীয় ব্যক্তি বা ব্যক্তিসংসদকে সাধারণতঃ শাসনকর্তৃপক্ষ বলা হয়।

শাসনকর্তৃপক্ষীয় শীর্ষস্থানীয় ব্যক্তি বংশানুক্রমিক রাজা অথবা নির্বাচিত রাষ্ট্রপতি হইতে পারেন। এইরূপ ব্যক্তি নামসর্বস্ব প্রকৃত ক্ষমতাসূত্র অথবা প্রকৃত ক্ষমতার অধিকারী হইতে পারেন। শাসনকর্তৃপক্ষ আইনসভা-প্রধান অথবা রাষ্ট্রপতি-প্রধান হইতে পারে। সাধারণতঃ শাসনকর্তৃপক্ষ একক হয়। কিন্তু সুইজারল্যান্ডের শাসনকর্তৃপক্ষ হইল সমষ্টিগত। এরূপ ক্ষেত্রে শাসন-ক্ষমতা একহস্তে গৃহ্য না হইয়া একটি সংসদের মধ্যে সমভাবে বিভক্ত হয়। সুইজারল্যান্ডে সাফল্যমণ্ডিত হইলেও সমষ্টিগত শাসনকর্তৃপক্ষ-ব্যবস্থা অন্ততঃ সাফল্যলাভ করিতে পারে নাই।

শাসনবিভাগীয় কার্য—১। আভ্যন্তরীণ শান্তি-শৃঙ্খলা রক্ষা করা প্রভৃতি শাসনবিভাগীয় কার্য; ২। বৈদেশিক ব্যাপারসমূহ নিষ্পন্ন করিবার জন্য কূট-নৈতিক কার্য; ৩। যুদ্ধ পরিচালনা ও শান্তিস্থাপনের জন্য সামরিক কার্য; ৪। সাধারণ ও জরুরী আইন-প্রণয়নের ক্ষমতা; ৫। বিচার-বিষয়ক কার্য।

বিচারবিভাগ ও ইহার কার্য—১। বিচারকগণ আইন প্রয়োগ করিয়া আইন-ভঙ্গকারীদের শাস্তি প্রদান করেন; ২। আইনের ব্যাখ্যা ও বিশ্লেষণ করিয়া নূতন আইনের সৃষ্টি করেন; ৩। অনেক সময় তাঁহাদের বিবেক ও বিচারবুদ্ধি প্রয়োগ করিয়াও নূতন আইন প্রণয়ন করেন; ৪। যুক্তরাষ্ট্রীয় ব্যবস্থায় শাসনতান্ত্রিক আইনের ব্যাখ্যা ও বিশ্লেষণ করা তাঁহাদের আর একটি প্রধান কার্য।

বিচারবিভাগের স্বাধীনতা ও নিরপেক্ষতা—প্রকৃত অপরাধীকে শাস্তি প্রদান করা ও নিরপরাধকে অব্যাহতি দিয়া বিচারকগণ ব্যক্তিস্বাধীনতা রক্ষা করেন। এজন্য বিচারকদের স্বাধীন ও নিরপেক্ষ হওয়া একান্ত আবশ্যক। তিনটি উপায় দ্বারা বিচারকদের স্বাধীন ও নিরপেক্ষ করা যায়, ১। নিয়োগ-পদ্ধতি; ২। কার্যকালের স্থায়িত্ব; ৩। উপযুক্ত বেতন।

বিচারক নিয়োগ-পদ্ধতি—(১) জনগণ কর্তৃক, অথবা (২) আইন-সভা কর্তৃক বিচারকগণ নির্বাচিত হইতে পারেন। কিন্তু এই ব্যবস্থা দ্বারা বিচারপতিগণের স্বাধীনতা বা নিরপেক্ষতা রক্ষা করা সম্ভব হয় না। সেজন্য (৩) শাসনকর্তৃপক্ষ কর্তৃক বিচারক নিয়োগ-পদ্ধতি সর্বোৎকৃষ্ট বলিয়া বিবেচিত হয়।

প্রশ্নাবলী

1. Detail the powers of the Government which are embraced in the Legislature and the Executive. State the objection to the election of the Chief Executive by the Legislature. (C. U. 1930)

2. What are the political, administrative and legislative functions of the Executive ? (C. U. 1954)

3. Explain the role of the judiciary in a modern state, and indicate the factors on which the independence of the judiciary depends. (C. U. 1961)

4. Discuss the principles of organisation of the judiciary in modern states. (C. U. B. A. Part I, 1962)

5. Point out the importance and functions of Judiciary in a modern state. (C. U. B. A. Part I, 1967)

ত্রয়োদশ অধ্যায়

ক্ষমতার স্বাতন্ত্র্যবিধান নীতি

(Theory of Separation of Powers)

রাষ্ট্রের প্রথম ও প্রধান কর্তব্য হইল রাষ্ট্রান্তর্গত জনসমষ্টির সর্বাত্মক কল্যাণ সাধন করা। এই কল্যাণসাধনের উদ্দেশ্যে রাষ্ট্রকে সমাজ-মধ্যে এরূপ পরিবেশ সৃষ্টি করিতে হইবে, যে পরিবেশে ব্যক্তিমাত্রই স্বীয় স্বাভাবিক বৈশিষ্ট্যগুলির পূর্ণ বিকাশের সুযোগ পায়। এইজন্য রাষ্ট্র ব্যক্তিকে কতকগুলি অধিকার অর্পণ ও কর্তব্যের নির্দেশ দান করে। রাষ্ট্র-নির্ধারিত আইনের সাহায্যে এই অধিকার ও কর্তব্য বলবৎ করা যায়। সুতরাং আইন-প্রণয়ন, আইন বলবৎ ও পক্ষপাতশূন্যভাবে আইন প্রয়োগ করা হইল রাষ্ট্রের কার্য।

ক্ষমতার স্বাতন্ত্র্যবিধানের প্রয়োজনীয়তা (Necessity for Separation of Powers)

সরকারের কার্যাবলীকে সাধারণতঃ তিন ভাগে ভাগ করা হয়। যথা, আইনবিষয়ক, শাসনবিষয়ক ও বিচারবিষয়ক। এই তিন শ্রেণীর কার্য তিনটি পৃথক্ বিভাগ দ্বারা পরিচালিত হয়। আইনসভার প্রধান কার্য হইল আইন প্রণয়ন করা। শাসনবিভাগ এই আইনগুলিকে বলবৎ করে, এবং বিচারবিভাগ আইনগুলির ব্যাখ্যা করে ও বিচারার্থ আনীত বিরোধসমূহের নিষ্পত্তির জন্ত আইনগুলির প্রয়োগ করে। ক্ষমতার স্বাতন্ত্র্যবিধান নীতি অনুযায়ী প্রত্যেকটি বিভাগ স্বীয় কার্য পরিচালনার ব্যাপারে অপরের প্রভাব-মুক্ত হইয়া স্বাধীনভাবে কার্য করিবার অধিকারী হয়। যদি একাধিক ক্ষমতা অথবা তিনটি ক্ষমতাই একই ব্যক্তি বা একই ব্যক্তিসংসদের হস্তে ন্যস্ত হয়, তাহা হইলে শাসনব্যবস্থায় স্বৈরাচারের উদ্ভব হইয়া ব্যক্তি-স্বাধীনতা ক্ষুণ্ণ হইবার সম্ভাবনা থাকে।

মতবাদের উৎপত্তি (Development of the Theory)

প্রাচীনকালে রাজা একাধারে এই তিনটি ক্ষমতার অধিকারী ছিলেন।

তিনি আইন প্রণয়ন করিতেন, আবার শাসক হিসাবে জনগণের দণ্ডমুণ্ডের কর্তা ছিলেন এবং বিচারকশ্রেষ্ঠ হিসাবে রাজাই আইনের প্রয়োগ করিতেন। এইরূপ ব্যবস্থার ফলে বিচারব্যবস্থা প্রহসনে পৰ্ব্ববসিত হইয়া ব্যক্তি-স্বাধীনতার সমাধি রচিত হয়। স্বৈরাচারী শাসনব্যবস্থার কবল হইতে ব্যক্তি-স্বাধীনতা রক্ষা করিবার নিমিত্ত এই মতবাদ প্রবর্তিত হয়। গ্রীক দার্শনিক অ্যারিস্টটল ও রোমক দার্শনিকদের লেখার মধ্যে অস্পষ্টভাবে এই মতবাদের উল্লেখ দেখা যায়। এই মতবাদকে বর্তমান যুগোপযোগী করিয়া প্রথম প্রবর্তন করেন ফরাসী লেখক মণ্টেস্ক। মণ্টেস্ক তাঁহার ‘*L’Esprit De Lois*’ নামক বিখ্যাত গ্রন্থে এই মতবাদের বিশদ ব্যাখ্যা করিয়া ইহাকে রাষ্ট্রবিজ্ঞানের একটি মূল নীতি বলিয়া প্রচার করেন। মণ্টেস্ক বৃটিশ শাসনতন্ত্রের বিশেষ ব্যাখ্যা ও বিশ্লেষণ করিয়া এই সিদ্ধান্তে উপনীত হন যে, যদি একই ব্যক্তি বা ব্যক্তিসমষ্টি সরকারী সমুদয় ক্ষমতার অধিকারী হয় তাহা হইলে নাগরিক জীবন ও স্বাধীনতা বিপন্ন হইবে। স্বৈরাচারের সম্ভাবনা রহিত করিয়া ব্যক্তি-স্বাধীনতা রক্ষার নিমিত্ত পৃথক পৃথক ব্যক্তি বা ব্যক্তিসমষ্টির সরকারের বিভিন্ন কার্যাবলী পরিচালনার অধিকারী হওয়া উচিত। সুতরাং মণ্টেস্ক ক্ষমতার স্বাতন্ত্র্যবিধানকে ব্যক্তি-স্বাধীনতার রক্ষাকবচ হিসাবে অপরিহার্য বলিয়া মনে করিয়াছিলেন। মণ্টেস্কের পর ইংলণ্ডে ব্র্যাক্টোনও এই মতের একজন প্রধান সমর্থক ছিলেন। তিনি প্রত্যেকটি বিভাগকে বিশেষ করিয়া বিচারবিভাগকে সম্পূর্ণরূপে পৃথক ও স্বাধীন করিবার উপর গুরুত্ব আরোপ করেন। বাস্তবক্ষেত্রেও এই নীতি অনেক দেশের শাসনব্যবস্থায় কার্যকরী করা হইয়াছিল। বিপ্লবের পরবর্তী কালে ফরাসী দেশে যে শাসনতন্ত্র রচিত হয়, তাহাতে এই নীতির প্রয়োগ বিশেষভাবে বলবৎ দেখা যায়। মার্কিন দেশের শাসনতন্ত্রের রচয়িতাগণও এই নীতির দ্বারা প্রভাবিত হইয়া শাসনব্যবস্থায় এই নীতি প্রয়োগ করিয়াছিলেন। কিন্তু বর্তমানে এই নীতির উপর আর পূর্বের মত বাস্তব গুরুত্ব আরোপ করা হয় না।

সমালোচনা (Criticism)

সরকারী ক্ষমতা ও কার্যসমূহ তিনভাগে ভাগ করিয়া তিনটি পৃথক বিভাগের মধ্যে বণ্টন করিয়া দেওয়া হইয়াছে একথা সত্য বলিয়া ধরিয়া

লওয়া হইলেও বাস্তব অভিজ্ঞতার দিক হইতে দেখিলে উপলব্ধি হয় যে, ক্ষমতার সম্পূর্ণ পৃথকীকরণ সম্ভব নয়। সরকারের প্রত্যেক বিভাগেরই অন্য দুইটি বিভাগ-সংক্রান্ত কিছু-না-কিছু কার্য করিতেই হয়। বর্তমান শাসনব্যবস্থা এত জটিল যে, কোন বিভাগই স্বয়ংসম্পূর্ণভাবে কার্য করিতে পারে না। উদাহরণস্বরূপ বলা যাইতে পারে যে, আইনসভার প্রধান কার্য হইল আইন প্রণয়ন করা। কিন্তু আইনসভা একাদিক্রমে দুই-তিন মাস অধিবেশন পরিচালনা করিয়া কিছুদিনের জন্ত স্থগিত থাকে। তাহার পর পুনরায় দ্বিতীয় অধিবেশন আরম্ভ হয়। আইনসভার এই দুই অধিবেশনের মধ্যবর্তী কালে জরুরী প্রয়োজনে শাসনকর্তৃপক্ষই সাময়িকভাবে আইন প্রণয়ন করিয়া থাকে। বিচারবিভাগের প্রধান কার্য হইল আইনের প্রয়োগ করা। কিন্তু অনেক সময় বিচারকগণ আইনের নূতন ব্যাখ্যা দ্বারা বা আইনের অস্পষ্টতার জন্ত নিজেদের ত্রায়বুদ্ধি প্রয়োগের দ্বারা বিচারকার্য পরিচালনা করিয়া নূতন আইন সৃষ্টি করেন। অপরপক্ষে, আইনসভাকেও অনেক সময় বিচারবিষয়ক কার্য পরিচালনা করিতে হয়। সরকারী উচ্চগদস্থ কর্মচারীদের কর্তব্যের ত্রুটি হইলে সাধারণতঃ আইনসভার উচ্চ পরিষদই এই বিচারকার্য করিয়া থাকে। শাসনকর্তৃপক্ষেরও অনেক সময় বিচারবিষয়ক কার্য সম্পাদন করিতে হয়। গণতান্ত্রিক শাসনব্যবস্থা প্রবর্তিত হইবার পর শাসনবিভাগ ও আইনসভার মধ্যে পারস্পরিক সংযোগ ও সহযোগিতা এত বৃদ্ধি পাইয়াছে যে, এই দুইটি বিভাগের কার্যের মধ্যে স্বাতন্ত্র্যবিধান নীতি একরূপ অস্তহিত হইয়াছে। বিশেষ করিয়া ইংলণ্ড প্রভৃতি মন্ত্রিসংসদ-চালিত শাসনব্যবস্থায় এই দুইটি বিভাগের মধ্যে স্বাতন্ত্র্যের অভাব বিশেষভাবে উপলব্ধি করা যায়।

দ্বিতীয়তঃ, এমন কোন গণতান্ত্রিক শাসনব্যবস্থা দেখা যায় না যেখানে সরকারের এই তিনটি ক্ষমতার সম্পূর্ণ পৃথকীকরণ কার্যক্ষেত্রে বলবৎ করা সম্ভব হইয়াছে। কি মন্ত্রিসংসদ-চালিত শাসনে, কি রাষ্ট্রপতি-চালিত শাসনে, সরকারের এই তিনটি ক্ষমতার কার্যকারিতা পারস্পরিক সহযোগিতার উপর নির্ভর করে। প্রত্যেক দেশের শাসনব্যবস্থা বিশ্লেষণ করিলে উপরি-উক্ত উক্তির সত্যতা সন্দেহে সন্দেহের অবকাশ থাকে না।

গ্রেট ব্রিটেনে ক্ষমতার স্বাতন্ত্র্যবিধান অস্থায়ী তিনটি বিভাগ দ্বারা

সরকারের তিনটি প্রধান কার্য পরিচালিত হয় বলিয়া অনুমিত হয়। কিন্তু বাস্তবক্ষেত্রে দেখা যায় যে, গ্রেট ব্রিটেনে শাসনব্যবস্থায় ক্ষমতার স্বাতন্ত্র্যবিধান সর্বাপেক্ষা কম অনুমত হইয়াছে। মন্ত্রিসংসদের সদস্যগণ সকলেই আইনসভার সদস্য ও আইন-প্রণয়নে তাঁহাদের পূর্ণ অধিকার আছে। মন্ত্রিমণ্ডলী আবার শাসনকার্যের প্রকৃত পরিচালক। লর্ড সভা আইনসভার একটি অংশ, কিন্তু ইহার কিছু কিছু বিচারক্ষমতাও আছে। ইংলণ্ডের রাজা শাসনকার্যের উচ্চতম কর্তৃপক্ষ, কিন্তু তিনি আবার আইনসভার অবিচ্ছেদ্য অংশ। তাঁহার কিছু কিছু বিচারক্ষমতাও আছে। লর্ড চ্যান্সেলর লর্ড সভার সভাপতি, মন্ত্রিমণ্ডলীর সদস্য ও ইংলণ্ডে প্রধান বিচারালয়ের একজন বিচারপতি। তিনি একাধারে তিনটি বিভাগের সহিত সংশ্লিষ্ট। সুতরাং ইংলণ্ডে কর্মবিভাগের উপর বিশেষ কোন গুরুত্ব আরোপ করা হয় নাই, অধিকন্তু অনেকক্ষেত্রে বিভিন্ন বিভাগের সংমিশ্রণ দেখিতে পাওয়া যায়।

মার্কিন যুক্তরাষ্ট্রে আইনসভা, শাসনবিভাগ ও বিচারবিভাগ সম্পূর্ণ পৃথক্। রাষ্ট্রপতি শাসনকার্য পরিচালনা করেন। তিনি আইনসভার সদস্য নহেন বা প্রত্যক্ষভাবে আইন প্রণয়ন করিতে পারেন না। আইনসভা ও বিচারবিভাগও সম্পূর্ণ স্বাধীন। কিন্তু কার্যক্ষেত্রে দেখিতে পাওয়া যায় যে, এখানেও তিনটি বিভাগের মধ্যে কিছু ঘোষণাত্মক রহিয়াছে। রাষ্ট্রপতি বিচারপতিদের নিযুক্ত করেন, কিন্তু বিচারপতিগণ রাষ্ট্রপতির নির্দেশ বাতিল করিতে পারেন। রাষ্ট্রপতি আইনসভার আইন বাতিল করিতে পারেন, কিন্তু রাষ্ট্রপতি যে সকল নিয়োগ করেন ও পররাষ্ট্রের সহিত যে সমস্ত সন্ধি স্বাক্ষর করেন সেগুলি আইনসভার উচ্চপরিষদ কর্তৃক অনুমোদিত হওয়া চাই। মার্কিন যুক্তরাষ্ট্রে রাজনৈতিক দলের উদ্ভব হওয়ার ফলে আইনসভা ও শাসনকর্তৃপক্ষের মধ্যে আরও ঘনিষ্ঠ সম্পর্ক স্থাপিত হইয়া পারস্পরিক সহযোগিতা ও নির্ভরশীলতা বৃদ্ধি পাইয়াছে। বর্তমানে রাষ্ট্রপতি ও কংগ্রেস সভার সংখ্যাগরিষ্ঠদল একই রাজনৈতিক দলভুক্ত বলিয়া তাঁহাদের মধ্যে বিরোধের সম্ভাবনা হ্রাস পাইয়াছে।

ভারতের নূতন শাসনতন্ত্রে সরকারের কর্মবিভাগ নীতি কিছু পরিমাণে কার্যকরী করা হইয়াছে। কিন্তু তৎসঙ্গেও শাসনপরিচালনা ব্যবস্থায় ক্ষমতার সংমিশ্রণ যথেষ্ট পরিমাণে দেখা যায়।

রাষ্ট্রপতি শাসনকার্য পরিচালনা করেন, কিন্তু জরুরী প্রয়োজনে তিনি অডিন্সান্স নামে অভিহিত বিশেষ আইন প্রণয়ন করিতে পারেন। রাষ্ট্রপতি বিচারপতিদের নিয়োগ করেন ও প্রাণদণ্ড-মকুব প্রভৃতি কয়েকটি বিচার-বিভাগীয় ক্ষমতার অধিকার তাঁহার আছে। ভারতের আইনসভা ও মন্ত্রি-মঞ্জলীর মধ্যে যোগসূত্র দেখিতে পাওয়া যায়। মহিমগুলীর সবস্তরের আইনসভার সদস্য হইতে হইবে ও তাঁহাদের শাসনকার্যের জন্ত তাঁহারা আইনসভার নিকট দায়ী থাকেন। অপরপক্ষে, মন্ত্রিসভার নির্দেশে রাষ্ট্রপতি আইনসভা ডাঙ্গিয়া দিতে পারেন। আইনসভাকে আহ্বান করা ও সাময়িকভাবে আইনসভার অধিবেশন স্থগিত রাখিবার ক্ষমতাও রাষ্ট্রপতির আছে। ভারতে জিলার শাসনব্যবস্থায় কর্মবিভাগ নীতির অভাব বিশেষ-ভাবে দেখা যায়। জিলাশাসক একাধারে জিলায় শাসনব্যাপারের সর্বময় কর্তা ও তিনি ফৌজদারী মানলা-সংক্রান্ত ব্যাপারে একজন বিচারপতি। শাসনবিভাগের কর্তা হইলেও জিলাশাসকের বিচারক্ষমতা আছে। বর্তমানে অবশ্য এই ব্যবস্থার কিছু পরিবর্তন ঘটিতেছে। ভারতের শাসনকর্তৃপক্ষ ও আইন-সভার মধ্যে ক্ষমতার স্বাতন্ত্র্যবিধান নীতি প্রযুক্ত না হইলেও শাসনতন্ত্র কর্তৃক বিচারবিভাগের স্বাতন্ত্র্য ও স্বাধীনতার উপর গুরুত্ব আরোপ করা হইয়াছে। সুপ্রীমকোর্ট ও হাইকোর্টের বিচারপতিগণ যাহাতে শাসনকর্তৃপক্ষ-নিরপেক্ষভাবে তাঁহাদের স্বাধীনতা বজায় রাখিয়া কর্তব্য সম্পাদন করিতে পারেন তজ্জন্ত তাঁহাদের নিয়োগ, বেতন ও পদচ্যুতি সম্পর্কে বিশেষ ব্যবস্থা অবলম্বিত হইয়াছে। বিচারপতিগণের বেতন ও অগ্রাণু ভাতা শাসনতন্ত্র কর্তৃক নির্ধারিত হইয়াছে, তাহা আইনসভার বাৎসরিক অনুমোদনের উপর নির্ভর করে না। নির্দিষ্ট বেতনে বিচারপতি নিযুক্ত হইবার পর তাঁহাদের কার্যকালে (জরুরী অর্থসংকট অবস্থা ব্যতীত) তাঁহাদের নির্ধারিত বেতনের পরিমাণ পরিবর্তন করা যায় না। পার্লামেন্ট সভার প্রত্যেক কক্ষের এক বিশেষ সংখ্যাধিক্যের আবেদনে অযোগ্যতা বা অসদাচরণের অপরাধ ব্যতীত অন্য কোন কারণে রাষ্ট্রপতি বিচারপতিগণকে পদচ্যুত করিতে পারেন না। তাঁহাদের বিচার-বিষয়ক কর্তব্যসম্পাদন বিষয়ে কোন আইনসভায় কোনপ্রকার জ্ঞানোলোচনা চলিতে পারে না। এইরূপে ভারতের নূতন শাসনতন্ত্র বিচারবিভাগকে আইনসভা ও শাসনকর্তৃপক্ষের প্রভাবমুক্ত করিবার প্রয়াস পাইয়াছে।

সোভিয়েত যুক্তরাষ্ট্র প্রভৃতি সাম্যবাদী রাষ্ট্রে ও নাৎসী ও ফ্যাসি-বাদী রাষ্ট্রে ক্ষমতার স্বাতন্ত্র্যবিধান নীতি প্রকাশ্যতঃ অস্বীকৃত হইয়াছে, স্তরাতঃ শাসনব্যবস্থায় এই নীতি কোন স্থান পায় নাই। সাম্যবাদী নেতৃবর্গ এই তথাকথিত স্বাতন্ত্র্যবিধান নীতিকে সংখ্যাগরিষ্ঠ পুঁজিপতিদলের জনসাধারণকে প্রবঞ্চিত করিবার একটি রাজনৈতিক কৌশল বুলিয়া অভিহিত করেন। তাঁহাদের মতে অর্থনৈতিক ক্ষমতার অধিকারী দল রাজনৈতিক ক্ষমতা হস্তগত করিয়া বিত্তহীনদের নানাভাবে শোষণ করে এবং এই পুঁজিপতিদল রাষ্ট্রের প্রকৃত ধনতান্ত্রিক রূপকে গোপন করিবার উদ্দেশ্যে এই মতবাদের অবতারণা করেন। প্রকৃতপক্ষে কোন দেশের শাসন-ব্যবস্থায়ই এই নীতি কার্যতঃ প্রযুক্ত হয় নাই। মুষ্টিমেয় লোক এই তিনটি ক্ষমতার অধিকারী।

সাম্যবাদিগণ এই নীতিতে আস্থাহীন। তাঁহারা ধনতান্ত্রিক ব্যবহার উচ্ছেদসাধন করিয়া বিত্তহীন শ্রেণীর প্রাধান্ত প্রতিষ্ঠিত করিতে কৃতসংকল্প। স্তরাতঃ সাম্যবাদী শাসনব্যবস্থায় তিনটি ক্ষমতাই প্রকাশ্যতঃ দলীয় নেতৃত্বে কেন্দ্রীভূত হইয়াছে। রুশ দেশের শাসনব্যবস্থা বা পূর্বতন নাৎসী ও ফ্যাসিবাদী শাসনব্যবস্থা বিশ্লেষণ করিলে ইহার সত্যতা সপ্রমাণিত হয়। সোভিয়েত যুক্তরাষ্ট্রে একমাত্র সাম্যবাদী দল ক্ষমতার অধিকারী। এই দলের পলিট ব্যুরো নামক সংস্থা বিভিন্নভাবে সমগ্র শাসনব্যবস্থা নিয়ন্ত্রণ করে। সুপ্রীম সোভিয়েতের প্রেসিডিয়াম সভার সংগঠন ও কার্যকলাপ বিশ্লেষণ করিলে ইহাই প্রতীয়মান হয় যে, সোভিয়েত যুক্তরাষ্ট্রের কর্ণ-ধারণ এই নীতিতে আদৌ আস্থাবান নহেন এবং সেই কারণে তাঁহারা প্রকাশ্যতঃ এই নীতি বর্জন করিয়াছেন।

তৃতীয়তঃ, প্রাণিদেহের বিভিন্ন অঙ্গপ্রত্যঙ্গের মত রাষ্ট্রের বিভিন্ন অঙ্গ-প্রত্যঙ্গ পরস্পর সংযুক্ত। কোন জীবদেহের বিভিন্ন অঙ্গপ্রত্যঙ্গগুলি যেরূপ পরস্পর-বিচ্ছিন্ন হইয়া কর্মক্ষম থাকিতে পারে না, তদ্রূপ রাষ্ট্রের বিভিন্ন বিভাগগুলিকেও সম্পূর্ণরূপে পৃথক্ করা চলে না। অত্যধিক পরিমাণে কর্ম-বিভাজনের ফলে বিরোধের সৃষ্টি হইয়া শাসনকার্যে অচল পরিস্থিতির উদ্ভব হইতে পারে। ইহাতে শাসনকার্য ব্যাহত হয়।

চতুর্থতঃ, বলা হয় যে, ক্ষমতার স্বাতন্ত্র্যের অবর্তমানে স্বৈরাচারী শাসন-

ব্যবস্থা প্রতিষ্ঠিত হইয়া ব্যক্তি-স্বাধীনতা বিপন্ন করিতে পারে। কিন্তু এ যুক্তি সত্য নয়। গ্রেট ব্রিটেনের শাসনব্যবস্থায় ক্ষমতার স্বাতন্ত্র্যবিধান নীতি খুবই কম অহুসৃত হইয়াছে, আবার মার্কিন যুক্তরাষ্ট্রের শাসনব্যবস্থায় এই নীতি অত্যধিক পরিমাণে কার্যকরী করা হইয়াছে। কিন্তু তৎসঙ্গেও গ্রেট ব্রিটেনের অধিবাসীরা মার্কিন যুক্তরাষ্ট্রের অধিবাসীদের অপেক্ষা কম স্বাধীনতার অধিকারী নয়। গ্রেট ব্রিটেনের শাসনতন্ত্রকে ব্যক্তি-স্বাধীনতার রক্ষাকবচ বলিলেও অত্যুক্তি হয় না। সুতরাং বলা যাইতে পারে যে, ব্যক্তি-স্বাধীনতা একমাত্র নিয়মতান্ত্রিক ক্ষমতা-স্বাতন্ত্র্যবিধানের উপর নির্ভর করে না। তাহা হইলে গ্রেট ব্রিটেনের অধিবাসীরা কখনই স্বাধীনতার অধিকারী হইতে পারিত না। ব্যক্তি-স্বাধীনতার প্রধান রক্ষাকবচ হইল জনগণের স্বাধীনতা রক্ষা করিবার আন্তরিক প্রয়াস ও আত্মসচেতনভাব।

পঞ্চমতঃ, ক্ষমতার স্বাতন্ত্র্যবিধান অস্থায়ী প্রত্যেকটি বিভাগের সম্পূর্ণ স্বাধীন ও সম-ক্ষমতার অধিকারী হইতে হয়। কিন্তু বাস্তবক্ষেত্রে এই তিনটি বিভাগের ক্ষমতার মধ্যে অনেক তারতম্য পরিলক্ষিত হয়। তিনটি বিভাগকে সম-ক্ষমতাবিশিষ্ট করাও সম্ভব নয়। প্রত্যেক দেশে আইনসভাই হইল সর্বোচ্চ ক্ষমতার অধিকারী। শাসনবিভাগ ও বিচারবিভাগ অনেক বিষয়ে আইনসভার উপর নির্ভরশীল। রাষ্ট্রব্যবস্থায় একটি বিভাগ সর্বোচ্চ ক্ষমতাসম্পন্ন না হইলে শাসনকার্য বাধাপ্রাপ্ত হইতে পারে, তজ্জন্ত আইনসভার নির্দেশ সর্বত্র চূড়ান্ত বলিয়া পরিগণিত হয়।

ষষ্ঠতঃ, মার্কিন যুক্তরাষ্ট্রে এই নীতির চূড়ান্ত প্রয়োগের ফলে বিচারবিভাগ ভীষণভাবে ক্ষতিগ্রস্ত হইয়াছে। বিচারবিভাগকে আইনসভা ও শাসন-বিভাগের প্রভাবমুক্ত করিয়া স্বাধীন করিবার উদ্দেশ্যে মার্কিন যুক্তরাষ্ট্রের অধিকাংশ রাজ্যের বিচারপতিগণ জনগণ কর্তৃক নির্বাচিত হইয়া থাকেন। জনগণের ভোট দ্বারা নির্বাচিত বিচারকগণ যোগ্যতা অপেক্ষা জনপ্রিয়তার জোরেই নির্বাচিত হন। এইরূপে নির্বাচিত বিচারকেরা পুনর্নির্বাচনের জন্ত জনমতকে খুশি করিবার উদ্দেশ্যে বিচারকার্য পরিচালনা করেন। নির্ভীক পক্ষপাতশূন্য ত্রায়বিচার এইরূপে নির্বাচিত বিচারকদের নিকট হইতে আশা করা দূরাশা মাত্র। একটি রাজনৈতিক মতবাদকে কার্যকর করিবার উদ্দেশ্যে মার্কিন যুক্তরাষ্ট্রে বিচারবিভাগকে পঙ্গু করা হইয়াছে।

উপসংহার (Conclusion)

উল্লিখিত সমালোচনাগুলি হইতে ইহাই প্রমাণিত হয় যে, নিছক নীতি হিসাবে অথবা শাসনব্যবস্থায় কার্যকরী শক্তি হিসাবে এই মতবাদ গ্রহণযোগ্য নয়। শাসনব্যবস্থায় ক্ষমতার স্বাতন্ত্র্যবিধান বলবৎ হইলে শাসনব্যবস্থায় অচল পরিস্থিতির উদ্ভব হইবে, অপরপক্ষে, ক্ষমতার একত্রীকরণে ব্যক্তি-স্বাধীনতা ক্ষুণ্ণ হইবে। সুতরাং ক্ষমতার স্বাতন্ত্র্যবিধানের প্রকৃত তাৎপর্য কি ?

বর্তমানে ক্ষমতার স্বাতন্ত্র্যবিধান বলিতে সরকারী বিভিন্ন বিভাগগুলি সম্পূর্ণ পৃথকীকরণের নীতি বা প্রয়োগ বুঝায় না। ক্ষমতার স্বাতন্ত্র্যবিধান বর্তমানে দুইটি অর্থে ব্যবহৃত হয়। প্রথমতঃ, ক্ষমতার আংশিক স্বাতন্ত্র্য-করণ ও দ্বিতীয়তঃ, বিভিন্ন বিভাগগুলির কার্যাবলীর পৃথকীকরণ : কিন্তু ক্ষমতার অধিকারী বা প্রয়োগকারীর পৃথকীকরণ অপরিহার্য বলিয়া গণ্য হয় না।

শাসনকার্যে সরকারের বিভিন্ন কার্যাবলী বিভিন্ন ধরনের। আইনসভার কার্য হইল সাধারণ ধরনের। আইনসভার সদস্যের কোন বিশেষ বিষয়ে বিশেষজ্ঞ না হইলেও চলিতে পারে। সাধারণ জ্ঞান ও দায়িত্বসম্পন্ন যে-কোন ব্যক্তি আইনসভার সদস্য হইবার উপযুক্ত বলিয়া নির্বাচিত হইতে পারেন। কিন্তু শাসনকর্তৃপক্ষের ও বিশেষ করিয়া বিচারবিভাগের সদস্যদের কোন কোন বিষয়ে বিশেষজ্ঞ হওয়া একান্ত আবশ্যক। শাসনকর্তৃপক্ষের দূরদৃষ্টি ও তীক্ষ্ণবুদ্ধিসম্পন্ন এবং দ্রুত সিদ্ধান্তগ্রহণে তৎপর হওয়া একান্ত আবশ্যক। বিচারকার্য পরিচালনার জন্য ধীর ও স্থির, স্বাধীন ও নিরপেক্ষ মনোভাবাপন্ন এবং আইন সম্বন্ধে অভিজ্ঞ ব্যক্তির প্রয়োজন। সুতরাং দেখা যাইতেছে যে, প্রত্যেকটি বিভাগের কার্যেই কিছু বিশেষত্ব আছে এবং সেইজন্য একই ব্যক্তির দ্বারা এই তিনটি বিভিন্ন প্রকৃতির কার্য স্ফুটভাবে পরিচালিত হইতে পারে না। বিচারকের কার্য আইনসভার দ্বারা নিষ্পন্ন হইতে পারে না, কেন না বিচারপতিদের যে যোগ্যতা থাকে দরকার আইনসভার সদস্যদের সেই জাতীয় যোগ্যতার প্রয়োজন হয় না। তিনটি কার্য বিভিন্ন বলিয়া এই কার্যগুলি বিভিন্ন যোগ্যতাসম্পন্ন ব্যক্তিসমূহের দ্বারা পরিচালিত হওয়াই উচিত। কিন্তু এই পৃথকীকরণেরও একটা সীমা আছে। একটি যন্ত্র যেরূপ কতকগুলি প্রাণহীন অংশবিশেষের সমাবেশ, সরকারকে সেইরূপ কতকগুলি

ব্যক্তির সমষ্টি বলিয়া মনে করিলে মারাত্মক ভুল হইবে। একটি ব্যাপক ও মহান উদ্দেশ্য সাধন করিবার নিমিত্ত সরকার গঠিত হয় ও সরকারের কার্যের বিভিন্নতা সত্ত্বেও প্রত্যেকটি কার্য প্রত্যেকটি বিভাগ কর্তৃক একই উদ্দেশ্যে পরিচালিত হয়। দেহের বিভিন্ন অঙ্গপ্রত্যঙ্গগুলির মধ্যে যোগসূত্রের অভাবে দেহের বিনাশ ধেরূপ অবশ্যস্বাবী, সরকারের বিভিন্ন বিভাগগুলির মধ্যে যোগসূত্রের অবর্তমানে সরকারেরও বিনাশ সেইরূপ অবশ্যস্বাবী। এই যোগসূত্রের জন্ত বিভিন্ন বিভাগের উর্বরতন কর্তৃপক্ষের মধ্যে সহযোগিতা ও পারস্পরিক নির্ভরশীলতা থাকা একান্ত আবশ্যক। যাহারা নীতিগুলি কার্যক্ষেত্রে প্রয়োগ করে, সেই সমস্ত অধস্তন কর্মচারীদের মধ্যে কর্মবিভাগের প্রয়োজনীয়তা অস্বীকার করা চলে না। এইরূপ কর্মবিভাগের দ্বারা কার্যদক্ষতা বৃদ্ধি পায় ও সরকারী কার্য সুষ্ঠুভাবে পরিচালিত হয়। এদিক দিয়া দেখিতে গেলে ক্ষমতার স্বাতন্ত্র্যবিধানকে ধনবিজ্ঞানের শ্রমবিভাগ নীতির একটি প্রয়োগ বলা যাইতে পারে।

স্বৈরাচারী শাসনব্যবস্থার যুগে ক্ষমতা-স্বাতন্ত্র্যকরণ নীতির প্রয়োজনীয়তা অল্পভূত হইয়াছিল। কিন্তু বর্তমান গণতান্ত্রিক যুগে ক্ষমতার স্বাতন্ত্র্যকরণ দ্বারা ব্যক্তি-স্বাধীনতা সুরক্ষিত করিবার প্রয়োজন আর নাই। বর্তমান যুগে সরকারের কার্যাবলী এত জটিল হইয়াছে যে, সরকারের সমুদয় কার্যই একব্যক্তি বা ব্যক্তি-সংসদ দ্বারা পরিচালিত হইতে পারে না। সেহেতু বিভিন্ন কার্যের জন্ত বিভিন্ন দক্ষতাসম্পন্ন ব্যক্তির প্রয়োজন হয়। সুতরাং ব্যক্তি-স্বাধীনতা রক্ষা করা অপেক্ষাও সরকারের কার্য বাহাতে দক্ষতার সহিত পরিচালিত হয় সেইজন্ত কর্মবিভাগের প্রয়োজন। কিন্তু এই কর্মবিভাগ এইরূপভাবে সাধিত হইবে যে, বিভিন্ন বিভাগগুলির মধ্যে পারস্পরিক যোগসূত্র, সহযোগিতা ও পারস্পরিক দায়িত্বশীলতা বিনষ্ট না হয়।

ক্ষমতার স্বাতন্ত্র্যবিধান নীতির আধুনিক ব্যাখ্যা (Modern Interpretation of the Theory of Separation of Powers)

রাষ্ট্র-সম্পর্কে মানুষের ধারণার আমূল পরিবর্তন হওয়ার সঙ্গে সঙ্গে ক্ষমতার স্বাতন্ত্র্যবিধান নীতির অন্তর্নিহিত তত্ত্বের পরিবর্তন অল্পভূত হইতেছে।

ক্ষমতার আধার রাষ্ট্র বর্তমান যুগে কল্যাণ-রাষ্ট্রে রূপায়িত হইয়াছে। স্বতরাং রাষ্ট্রের শক্তির উপর গুরুত্ব আরোপ না করিয়া বর্তমানে রাষ্ট্রের জনহিতকর কার্যকলাপের উপর অধিকতর গুরুত্ব প্রদান করা হয়।

রাষ্ট্রের ক্ষমতা প্রধানতঃ শক্তির উপর প্রতিষ্ঠিত। কিন্তু নিছক শক্তি-ভিত্তিক রাষ্ট্র জনকল্যাণ সাধন করিতে পারে না। কল্যাণ-রাষ্ট্রে সহিত পশুবলের কোন সম্পর্ক থাকিতে পারে না। স্বতরাং উপরি-উক্ত নীতিটিকে ক্ষমতার স্বাতন্ত্র্যবিধান নামে অভিহিত না করিয়া রাষ্ট্রের কল্যাণকর কার্যকলাপের স্বাতন্ত্র্যবিধান নামে অভিহিত করা অধিকতর যুক্তিযুক্ত। মানুষের সর্বাঙ্গীণ কল্যাণসাধন করাই যদি বর্তমান রাষ্ট্রের প্রধান কর্তব্য বলিয়া পরিগণিত হয়, তাহা হইলে রাষ্ট্রের এই কল্যাণসাধন কার্য বিভিন্ন বিভাগ দ্বারা আংশিকভাবে সম্পন্ন হইতে পারে না—এই কল্যাণসাধনের নিমিত্ত শাসনব্যবস্থাকে একটি কেন্দ্রীয় সংগঠনের অধীনে সমগ্রভাবে কার্য সম্পাদন করিতে হইবে। এই উদ্দেশ্যে বর্তমানে রাষ্ট্রীয় সমুদয় কার্যকলাপই একটি পূর্ব-নির্ধারিত পরিকল্পনামুযায়ী সম্পাদিত হয়। পরিকল্পনার মূল নীতি হইল বিভিন্ন বিচ্ছিন্ন শক্তিগুলিকে এক নিয়ন্ত্রণাধীনে একত্রিত করিয়া পারস্পরিক সহযোগিতার দ্বারা সমষ্টির মঙ্গল সাধন করা। স্বতরাং বর্তমান রাষ্ট্রগুলির কার্যকলাপ পৃথকীকরণনীতি অপেক্ষা সহযোগিতার উপর অধিকতর নির্ভরশীল। এইজন্য আধুনিক রাষ্ট্রের কার্যকলাপের উপরি-উক্ত নীতির উপর গুরুত্ব আরোপ করা হয় না।

কিন্তু তাই বলিয়া শাসনব্যবস্থায় যথেষ্টাচারিতার প্রত্যয় দেওয়া যুক্তিযুক্ত নয়। বর্তমান যুগে সর্বদেশে সর্ববিষয়ে শাসনকর্তৃপক্ষের আধিপত্য বৃদ্ধি পাইয়াছে। শাসনকর্তৃপক্ষকে সংযত রাখিবার জন্য বিচারবিভাগীয় নির্দেশ (judicial review) ও নিয়মতান্ত্রিক বিধিনিষেধ বলবৎ থাকা একান্ত আবশ্যক।

সংক্ষিপ্তসার

ক্ষমতার স্বাতন্ত্র্যবিধান—সরকারের তিনটি প্রধান কার্য আছে ও এই তিনটি কার্য তিনটি পৃথক বিভাগ দ্বারা সাধারণতঃ পরিচালিত হয়। আইনসভার কার্য হইল আইন প্রণয়ন করা। শাসনকর্তৃপক্ষ আইন বলবৎ

করে এবং বিচারবিভাগ প্রয়োজন অনুযায়ী আইন প্রয়োগ করিয়া বিরোধের মীমাংসা করে। ক্ষমতার স্বাতন্ত্র্যবিধান অনুসারে সরকারের এই তিনটি কার্য পৃথকভাবে ভাগ করিয়া তিনটি পৃথক বিভাগ দ্বারা পরিচালিত হওয়া উচিত। নতুবা একই ব্যক্তি বা ব্যক্তি-সংসদের হস্তে ক্ষমতা কেন্দ্রীভূত হইলে ব্যক্তি-স্বাধীনতা বিপন্ন হয়। সুতরাং ব্যক্তি-স্বাধীনতা সংরক্ষণের জন্ত ক্ষমতার স্বাতন্ত্র্যবিধান অপরিহার্য।

অ্যারিস্টটল প্রভৃতি প্রাচীন দার্শনিকদের লেখার মধ্যে এই মতবাদের উল্লেখ থাকিলেও ফরাসী দার্শনিক মন্টেস্কু এই মতবাদের জন্মদাতা বলা যায়। তিনি ও তৎপরবর্তী ইংরাজ লেখক ব্লাকস্টোন ব্যক্তি-স্বাধীনতার রক্ষাকবচ হিসাবে এই মতবাদের উপর বিশেষ গুরুত্ব আরোপ করিয়াছিলেন।

এই মতবাদের বিরুদ্ধে অনেক সমালোচনা হইয়াছে। প্রথমতঃ, সরকারের প্রত্যেকটি বিভাগেরই অল্প বিভাগের কিছু কার্য করিতে হয়। দ্বিতীয়তঃ, বাস্তবক্ষেত্রে কোন দেশের শাসনব্যবস্থায় এই নীতি কার্যকরী করা সম্ভব হয় নাই। তৃতীয়তঃ, ইংলণ্ডের শাসনব্যবস্থায় ক্ষমতার স্বাতন্ত্র্য-বিধান না থাকিলেও ব্যক্তি-স্বাধীনতার কোনরূপ হানি হয় নাই। পরন্তু ইংলণ্ডের নাগরিক এই বিষয়ে অল্প দেশের নাগরিকগণ অপেক্ষা অধিকতর স্বাধীনতার অধিকারী বলিয়া বিবেচিত হয়। চতুর্থতঃ, মার্কিন যুক্তরাষ্ট্রের শাসনব্যবস্থায় এই নীতি অনুসৃত হওয়ার ফলে সেখানে বিভিন্ন বিভাগগুলির মধ্যে বিরোধের সম্ভাবনা দেখা দেয় ও এই নীতির প্রবর্তনে সেখানকার প্রাদেশিক বিচারবিভাগে অনেক ত্রুটি পরিলক্ষিত হয়। পঞ্চমতঃ, জীবদেহের অঙ্গপ্রত্যঙ্গগুলির মধ্যে যেরূপ সম্পূর্ণ পৃথকীকরণ সম্ভব নয়, সরকারের কর্মবিভাগের মধ্যেও সেইরূপ পৃথকীকরণ সম্ভব নয়।

উপরি-উক্ত বিরুদ্ধ সমালোচনা সত্ত্বেও বলিতে হইবে যে, কর্মদক্ষতা ও ব্যক্তি-স্বাধীনতা রক্ষার জন্ত যে পরিমাণে কর্মবিভাগ প্রয়োজন তাহার ব্যবস্থা করা আবশ্যিক। সরকারের উদ্দেশ্যসাধনের জন্ত কার্যের বিভিন্নতা সত্ত্বেও বিভাগগুলির মধ্যে পারস্পরিক সহযোগিতা ও দায়িত্বশীলতা থাকা একান্ত আবশ্যিক।

প্রশ্নাবলী

1. "The strict separation of the powers is not only impracticable as a working principle of Government, but it is not one to be desired in practice." Discuss. (C. U. 1943)
 2. In what sense and with what limitations is the theory of separation of powers true? (Gauhati, 1948)
 - 3 Explain carefully the statement that the system of 'Separation of Powers' and 'check and balance' prevent chaos of authority and unify Governmental powers. (C. U. 1941)
 4. How far is it possible and desirable to carry out the principle of separation of powers in the Governmental organisation of a state? (C. U. 1958)
 5. Discuss the doctrine of separation of powers. How far has it been translated into practice in India, the U. S. A. and the U. K.? (C. U. 1949, 1961)
 6. Discuss the value and limitation of the Theory of Separation of Powers. (C. U. B. A. Part I, 1964)
-

চতুর্দশ অধ্যায়

রাষ্ট্রের উদ্দেশ্য ও কার্যকলাপ

(Ends and Functions of the State)

প্রাচীন যুগে গ্রীক ও রোমকগণ রাষ্ট্রকে মানব-জীবনের চরম পরিণতি বা উদ্দেশ্য বলিয়া বর্ণনা করিয়াছেন। তাঁহাদের মতে ব্যক্তি রাষ্ট্রগঠনের উপাদানমাত্র ও রাষ্ট্রের প্রয়োজনে ব্যক্তিগত স্বার্থ রাষ্ট্রবেদীমূলে অনায়াসে বলি দেওয়া ঘাইতে পারে। তাঁহারা রাষ্ট্রবিহীন মানুষকে অতিমানব অথবা অতি নিম্নস্তরের জীব বলিয়া বিবেচনা করিতেন। এইরূপ ধারণার বশবর্তী হইয়া তাঁহারা সমগ্র মানব-জীবনের উপর রাষ্ট্রের অবাধ কর্তৃত্ব প্রতিষ্ঠিত করিয়াছিলেন। প্রসিদ্ধ গ্রীক দার্শনিক অ্যারিস্টটল রাষ্ট্রের উদ্দেশ্য বর্ণনা-প্রসঙ্গে বলিয়াছেন, রাষ্ট্র শুধু অপরাধ-নিবারণ ও ব্যবসায়-বাণিজ্যের উদ্দেশ্যে গঠিত নির্দিষ্ট ভৌগোলিক সীমার মধ্যে অবস্থিত এক মনুষ্যসমাজ মাত্র নহে— ইহার আরও ব্যাপক ও বৃহত্তর উদ্দেশ্য আছে। রাষ্ট্রের উদ্দেশ্য হইল মানব-জীবনের নৈতিক উৎকর্ষসাধন করা যাহাতে মানুষ স্বাধীন ও সর্বাঙ্গসুন্দর জীবন ধাপন করিতে সমর্থ হয়। সুতরাং গ্রীক দার্শনিকদের মতে ব্যক্তি-স্বাধীনতার একমাত্র উৎস ছিল রাষ্ট্র। রাষ্ট্রপ্রদত্ত অধিকার ব্যতীত ব্যক্তির অন্য কোনপ্রকার মৌলিক অধিকার রাষ্ট্রকর্তৃক স্বীকৃত হয় নাই। গ্রীক চিন্তাধারা দ্বারা প্রভাবিত হইলেও রোমকগণ পারিবারিক জীবনের কয়েকটি স্বতন্ত্র অধিকার স্বীকার করিয়া লইয়াছিলেন।

খৃষ্টধর্ম প্রবর্তিত হওয়ার পর ধর্মযাজকগণ মানুষের ধর্মজীবনকে রাষ্ট্রের প্রভাবমুক্ত করিতে সমর্থ হইয়াছিলেন। টিউটন জাতি অতিমাত্রায় স্বাধীনতা-প্রিয় ছিল। তাহারা রাষ্ট্রের সর্বময় কর্তৃত্ব অস্বীকার করে। ফলে মানব-জীবনের উপর রাষ্ট্রের সর্বময় কর্তৃত্ব হ্রাস পাইয়া রাষ্ট্রসম্বন্ধে মানুষের ধারণার পরিবর্তন ঘটিতে থাকে। বর্তমান যুগে রাষ্ট্র আর মানব-জীবনের মুখ্য উদ্দেশ্য বা চরম পরিণতি বলিয়া বিবেচিত হয় না। বর্তমান রাষ্ট্রকে মানব-জীবনের পূর্ণতাপ্রাপ্তির একটা প্রধান সহায়ক বা উপাদান হিসাবে গণ্য করা হয়।

রাষ্ট্র মাহুষের জন্ত সৃষ্ট হইয়াছে, মাহুষ রাষ্ট্রের জন্ত সৃষ্ট হয় নাই। বর্তমানে ব্যক্তি-বিকাশের জন্ত ব্যক্তি-স্বাধীনতার রক্ষক হিসাবেই রাষ্ট্রের অস্তিত্ব স্বীকৃত ও সমর্থিত হয়।

১. রাষ্ট্রের প্রকৃত উদ্দেশ্য (True end of State)

রাষ্ট্রের প্রকৃত উদ্দেশ্য কি—এ সম্বন্ধে নানা মূনির নানা মত। যতদিন পর্যন্ত বংশাঙ্কুরমিক শাসনব্যবস্থা চালু ছিল এবং রাষ্ট্র বংশাঙ্কুরমিক শাসক-গোষ্ঠীর ব্যক্তিগত সম্পত্তি বলিয়া বিবেচিত হইত, ততদিন পর্যন্ত রাষ্ট্রের প্রকৃত উদ্দেশ্য সম্পর্কে কোন স্থায়ী মতবাদ গঠিত হইতে পারে নাই। শাসকগোষ্ঠীর স্বার্থসাধনই ছিল রাষ্ট্রপরিচালনার প্রধান উদ্দেশ্য। গণতন্ত্রের অভ্যুত্থানের সঙ্গে সঙ্গে রক্ষণশীল রাজনীতির অবসান ঘটিয়া ক্রমশঃ উদারনৈতিক রাজনীতির প্রবর্তন হয়। ফলে রাষ্ট্রের উদ্দেশ্য সম্বন্ধে মাহুষ স্বাধীনভাবে চিন্তা করিবার সুযোগ পাইয়া নানারূপ মতবাদের প্রতিষ্ঠা করে।

রাষ্ট্রমধ্যে শান্তি-শৃঙ্খলা রক্ষা করিয়া নিয়মিত ব্যবস্থা করা, অথবা প্রগতি-মূলক কার্য করা, অথবা ন্যায়পরতা প্রতিষ্ঠা করাকে রাষ্ট্রের মুখ্য উদ্দেশ্য বলিয়া অনেক লেখক বর্ণনা করিয়াছেন। আবার মাহুষের সুখসমৃদ্ধি বৃদ্ধি করা অথবা জনহিতকর কার্য করা অথবা জাতীয় শক্তি বা মানব-সমাজের সভ্যতা বৃদ্ধি করাকেই রাষ্ট্রের প্রধান উদ্দেশ্য বলিয়া অনেকে মনে করেন। জার্মান লেখক ব্রুনো স্পিরের মতে জনসাধারণের কল্যাণসাধন করাই রাষ্ট্রের প্রধান কর্তব্য বলিয়া বিবেচিত হয়। হিতবাদী (Utilitarian) দার্শনিকদের মতে সর্বাধিক সংখ্যক লোকের সর্বাধিক কল্যাণসাধন করাই রাষ্ট্রের প্রধান কর্তব্য। ব্যক্তিত্ববাদীরা বলেন যে, রাষ্ট্রের ক্রিয়াকলাপ শুধুমাত্র আইনশৃঙ্খলা রক্ষাকার্যে সীমাবদ্ধ থাকা উচিত। অধুনা অনেক লেখক রাষ্ট্রকে শুধুমাত্র একটা সমাজ-কল্যাণকর প্রতিষ্ঠানরূপে গণ্য করেন। তাঁহাদের মতে রাষ্ট্রের উদ্দেশ্য হইল জনস্বাস্থ্য, মাতৃমঙ্গল, দারিদ্র্য দূরীকরণ, মাহুষের নৈতিক চরিত্রের উৎকর্ষসাধন প্রভৃতি নানারূপ সমাজহিতকর কার্য করা।

কিন্তু বিভিন্ন লেখক কর্তৃক নির্ধারিত উল্লিখিত উদ্দেশ্যগুলির কোনটিই রাষ্ট্রের প্রকৃত উদ্দেশ্য বলিয়া পরিগণিত হইতে পারে না। রাষ্ট্রের উদ্দেশ্য

সম্পর্কে ঐগুলি আংশিকভাবে সত্য হইলেও রাষ্ট্র যে ব্যাপক ও সর্বাঙ্গিক উদ্দেশ্যসাধনের নিমিত্ত সংগঠিত হইয়াছে, উপরি-উক্ত মতবাদগুলির কোনটির দ্বারা সেই মহান উদ্দেশ্যের সম্যক পরিচয় পাওয়া সম্ভব নয়। ডাঃ গার্নার ও অধ্যাপক বার্জেস রাষ্ট্রের উদ্দেশ্যকে তিন ভাগে ভাগ করিয়াছেন, যথা— প্রাথমিক উদ্দেশ্য (Primary end), মাধ্যমিক উদ্দেশ্য (Secondary end) ও শেষ বা চরম উদ্দেশ্য (Ultimate end)। রাষ্ট্রের প্রাথমিক বা আপাত উদ্দেশ্য হইল শান্তি, শৃঙ্খলা, নিরাপত্তা ও শ্রায়পরতার পরিবেশ সৃষ্টি করিয়া ব্যক্তি-বিকাশের সহায়তা করা। কিন্তু একমাত্র ব্যক্তিগত জীবনের উৎকর্ষসাধনের সহায়তার দ্বারা রাষ্ট্রের উদ্দেশ্য সিদ্ধ হইতে পারে না। সমষ্টিগত জীবনের সর্বাঙ্গীণ মঙ্গলসাধনের সাহায্য করা রাষ্ট্রের মাধ্যমিক উদ্দেশ্য। সমষ্টির উন্নতি ব্যতীত এককভাবে ব্যক্তির উন্নতি হইতে পারে না। সুতরাং ব্যক্তিগত জীবনের উৎকর্ষসাধনের নিমিত্ত রাষ্ট্রকে সমাজের কল্যাণসাধন করিতে হইবে। ব্যক্তি যেরূপ সমাজদেহের অবিচ্ছেদ্য অঙ্গ ও ব্যক্তিগত উন্নতি-যেরূপ সামাজিক উন্নতির সহিত ওতপ্রোতভাবে জড়িত, কোন একটি জাতির জীবনও তদ্রূপ সমগ্র মানবসমাজের অংশ-বিশেষ ও জাতীয় জীবনের উন্নতিও তদ্রূপ সমগ্র মানবজাতির উন্নতির উপর নির্ভরশীল। এদিক দিয়া বিবেচনা করিলে সমগ্র মানবসমাজের হিতকর কার্য করা রাষ্ট্রের চরম উদ্দেশ্য বলিয়া পরিগণিত হইতে পারে। রাষ্ট্রের কার্যকলাপ এরূপভাবে পরিচালিত হওয়া প্রয়োজন যাহাতে ব্যক্তিগত স্বার্থ, জাতীয় স্বার্থ ও আন্তর্জাতিক স্বার্থের মধ্যে কোনরূপ সংঘাত না ঘটে।

জনকল্যাণ নীতি বা কল্যাণ-রাষ্ট্রের ভিত্তি (Welfare Theory or the basis of the Welfare State)

রাষ্ট্রের বিবর্তনের ফলে একদিকে যেরূপ রাষ্ট্রের গঠনপ্রকৃতির পরিবর্তন ঘটিয়াছে অপর দিকে তদ্রূপ রাষ্ট্রের উদ্দেশ্য সম্পর্কেও মানুষের ধারণা পরিবর্তিত হইতেছে। আধুনিক রাষ্ট্রগুলি আকারে যেরূপ বৃহৎ, উদ্দেশ্যের দিক দিয়াও তদ্রূপ ব্যাপক। গণতন্ত্র প্রতিষ্ঠিত হইবার পরবর্তী কাল হইতে বিশেষ করিয়া বিংশ শতাব্দীর দ্বিতীয় দশক হইতে রাষ্ট্রের উদ্দেশ্য ও কর্ম-পরিধি সম্পর্কে ধারণার আয়ু পরিবর্তন ঘটিয়াছে। পূর্বতন রাষ্ট্রগুলির

উদ্দেশ্য ছিল শ্রেণী-বিশেষ, বিশেষ করিয়া শাসকশ্রেণীর স্বার্থসাধন করা। কোন রাষ্ট্রই জনমতের উপর প্রতিষ্ঠিত ছিল না এবং জনকল্যাণের জন্ত কোন রাষ্ট্রই বিশেষ কোন প্রয়াস পায় নাই। কিন্তু জনসাধারণকে লইয়া জনসাধারণের কল্যাণে জনসাধারণ কর্তৃক পরিচালিত শাসনব্যবস্থার ধারণা জনসমাজে বদ্ধমূল হইবার পর হইতেই জনকল্যাণ নীতি রাষ্ট্রের প্রধান উদ্দেশ্য বলিয়া স্বীকৃতি লাভ করিয়াছে। কিন্তু স্বীকৃতি লাভ করিলেও কোন দেশেই এই নীতিকে সম্পূর্ণরূপে রূপদান করা এখনও সম্ভব হয় নাই।

এখন প্রশ্ন হইল এই জনকল্যাণ নীতি কী? জন বলিতে রাষ্ট্রান্তর্গত সমগ্র জনসমষ্টিকে বুঝায়, কল্যাণ বলিতে এই জনসমষ্টির সামগ্রিক মঙ্গল বুঝায়। যে রাষ্ট্র মানুষে মানুষে কোন পার্থক্য করে না, যে রাষ্ট্র প্রত্যেক ব্যক্তির পাখি, নৈতিক ও মানসিক উন্নতির জন্ত সমান সুযোগ-সুবিধা দান করিয়া ব্যক্তির ব্যক্তিঅবিকাশে সাহায্য করে, সেই রাষ্ট্রকে কল্যাণরাষ্ট্র (Welfare State) বলা যাইতে পারে। অর্থাৎ জনকল্যাণ সাধন করাই হইল সে রাষ্ট্রের মুখ্য উদ্দেশ্য। গ্রীক দার্শনিক প্লেটোর কথায় বলিতে হয়, জনকল্যাণ রাষ্ট্রের উদ্দেশ্য হইল সকল মানুষকে সুখী করা (To make all men happy)।

জনকল্যাণ নীতি যদি রাষ্ট্রের উদ্দেশ্য বলিয়া পরিগণিত হয় তাহা হইলে রাষ্ট্রকর্ম-পরিধির কোন নির্দিষ্ট সীমারেখা স্থির করা সম্ভব নয়। মানুষের সর্বাত্মক কল্যাণসাধনের জন্ত যাহা কিছু করা প্রয়োজন রাষ্ট্র তাহাই করিবে। অপরপক্ষে রাষ্ট্রীয় হস্তক্ষেপ কোন ক্ষেত্রে জনকল্যাণের প্রতিকূল বিবেচিত হইলে রাষ্ট্র সেক্ষেত্রে ইহার ক্ষমতা প্রয়োগ করিবে না। জনকল্যাণের উদ্দেশ্যে রাষ্ট্র ব্যক্তির পারিবারিক, সামাজিক, ধর্ম-সম্বন্ধীয়, অর্থনৈতিক জীবন নিয়ন্ত্রণ করিতে পারিবে। বিত্তীয় বিশ্বযুদ্ধের পরবর্তী কাল হইতেই বৃটেন, মার্কিন যুক্তরাষ্ট্র, সোভিয়েত যুক্তরাষ্ট্র, ভারত প্রভৃতি দেশগুলির সরকারী কর্মসূচী এই জনকল্যাণ নীতির দ্বারা পরিচালিত হইতেছে। ভারতের সংবিধানের নির্দেশাত্মক নীতিগুলির প্রচারমধ্যে ভারতে এই কল্যাণরাষ্ট্র (Welfare State) গঠনের উদ্দেশ্য বর্ণনা করা হইয়াছে। জনকল্যাণ-ভিত্তিক রাষ্ট্র গঠনের উদ্দেশ্যে বিভিন্ন দেশ নানারূপ আইন প্রণয়ন করিয়া রাষ্ট্রের কর্মক্ষেত্রের পরিধি বিস্তার করিতেছে। ভারত-রাষ্ট্রও এরূপ

নানাপ্রকার আইন প্রণয়ন করিতেছে। অস্পৃশ্যতা বর্জন, জমিদারী প্রথা
বিলোপ, শ্রমিক-মালিক সম্পর্ক নিয়ন্ত্রণ, শিক্ষাব্যবস্থার প্রসার প্রভৃতি নানা
বিষয়ে জনকল্যাণমূলক আইন প্রবর্তিত হইতেছে।

কল্যাণরাষ্ট্র ব্যক্তির ব্যক্তিত্ব-বিকাশের পথে সমস্ত অন্তরায় দূর করিয়া
ব্যক্তির ব্যক্তিত্ব বাহাতে আদর্শ স্তরে উন্নীত হয়, সেজন্য সচেষ্ট থাকে।
প্রথমতঃ, রাষ্ট্র ব্যক্তির নিরাপত্তা রক্ষা করে। দস্যু-তরুর বা বিদেশী আক্রমণ
হইতে জনগণকে রক্ষা করা কল্যাণরাষ্ট্রের একমাত্র কর্তব্য নহে। সকলের
জন্ম থাণ্ড, বস্ত্র, বাসস্থানের সুখম ব্যবস্থা করা, সুশিক্ষা ও সুচিকিৎসার
ব্যবস্থা করা কল্যাণরাষ্ট্রের অন্ততম প্রধান দায়িত্ব। বৃদ্ধাবস্থায়, বেকার
অবস্থায় বা আকস্মিক বিপদকালে অসহায় নর-নারীগণকে সাহায্য করাও
রাষ্ট্রের কর্তব্য বলিয়া বিবেচিত হয়।

কল্যাণরাষ্ট্র শিক্ষা ও সংস্কৃতির প্রসার ও উন্নতিকল্পে ব্যয় করিতে
কুণ্ঠা বোধ করে না। প্রকৃত কল্যাণরাষ্ট্রের বৈশিষ্ট্য হইল যে, এই রাষ্ট্র
শিক্ষাকে সরকারী নিয়ন্ত্রণমুক্ত করিয়া স্বাধীনভাবে দেশের প্রয়োজন
অনুযায়ী বর্ধিত হইবার সুযোগ দান করে। যে রাষ্ট্র শিক্ষা-প্রসারের
অজুহাতে শিক্ষাব্যবস্থাকে সরকারী কৃষ্ণিগত করিয়া সরকারী নীতির
সমর্থক করিতে চায়, সে রাষ্ট্রব্যবস্থায় ব্যক্তিত্ব-বিকাশ সম্ভব নয়। মাহুষের
কৃষ্ণিগত জীবনের উন্নয়ন কল্যাণরাষ্ট্রের লক্ষ্য হওয়া উচিত। এই উদ্দেশ্যে
কল্যাণরাষ্ট্র গ্রন্থাগার, নাট্যশালা, চলচ্চিত্র, যাদুঘর প্রভৃতি স্থাপনে সাহায্য
করে এবং লেখক ও শিল্পী সম্প্রদায়কে পরোক্ষভাবে সরকারের স্তাবকে
পর্ববসিত না করিয়া নানাভাবে তাহাদের স্বজনীশক্তি বৃদ্ধির সাহায্য করে।

দেশে ধনী-দরিদ্র থাকিলে উৎকট ধনবৈষম্য সৃষ্টি হয় এবং এই ধনবৈষম্য
হইল অশান্তির মূল কারণ এবং জাতীয় প্রগতির প্রধান অন্তরায়। কল্যাণ-
রাষ্ট্র সুখম কর ব্যবস্থা স্থাপন করিয়া ব্যক্তিগত মালিকানা নিয়ন্ত্রণ প্রভৃতির
সাহায্যে ধনবৈষম্য হ্রাস করিতে চেষ্টা করে।

কল্যাণরাষ্ট্র কৃষি, শিল্প, খনি, পরিবহন, যোগাযোগ প্রভৃতি আর্থিক
আয়ের উৎসগুলির সম্পূর্ণ বা আংশিক জাতীয়করণ সাহায্যে জনগণের
অর্থনৈতিক কল্যাণের পথ সুগম করে। ভারত সরকার এই উদ্দেশ্যে
উৎপাদন-ব্যবস্থায় মিশ্র অর্থনৈতিক নীতি গ্রহণ করিয়াছেন।

পরিশেষে বলা যায় যে, কল্যাণরাষ্ট্র হইল শ্রেণী স্বার্থের উর্ধ্বে। এই রাষ্ট্র ব্যক্তি-বিশেষ বা সম্প্রদায়-বিশেষের স্বার্থরক্ষার জন্ত পরিচালিত হয় না। এই রাষ্ট্রের উদ্দেশ্য হইল জাতি-ধর্ম-শ্রেণী-নির্বিশেষে সকলের জন্ত সমান সুবিধা সৃষ্টি করিয়া সকল মানুষের সামগ্রিক কল্যাণসাধন করা।

নীতি হিসাবে জনকল্যাণ নীতি গৃহীত হইলেও ইহার বিরুদ্ধে বলা যায় যে, এই নীতি যদি নিছক এক শ্রেণীর লোকের দ্বারা নির্ধারিত হয়— জনসাধারণকে যদি এই নীতি নির্ধারণে কোন বক্তব্য না দেওয়া হয়, তাহা হইলে এই নীতি শ্রেণীগত দৃষ্টিভঙ্গী ও শ্রেণীগত স্বার্থের দ্বারা দুষ্ট হইবে। জনকল্যাণের উদ্দেশ্যে রাষ্ট্র-প্রণীত আইন বা কোন কর্মসূচী জনসাধারণ যদি পীড়াদায়ক ও জনস্বার্থ-বিরোধী বলিয়া মনে করে, তাহা হইলে রাষ্ট্র কর্তৃক ঘোষিত হইলেও এরূপ নীতিকে জনকল্যাণ নীতি বলা যায় না এবং এরূপ নীতি-নির্ধারক রাষ্ট্রকে কল্যাণরাষ্ট্র বলা চলে না। শেষ বিশ্লেষণে দেখা যায় যে, গণতান্ত্রিক আদর্শের পূর্ণ বিকাশের মধ্যেই কল্যাণরাষ্ট্রের ধারণা নিহিত আছে।

রাষ্ট্রের ক্রিয়াকলাপ সম্বন্ধে বিভিন্ন মতবাদ (Theories of State Function)

রাষ্ট্রকর্তব্য সম্বন্ধে লেখকগণের মধ্যে মতভেদ দেখা যায়। রাষ্ট্রের কর্মক্ষেত্র স্ফূর্তবিস্তারী হইবে, না ক্ষুদ্র গণ্ডির মধ্যে আবদ্ধ থাকিবে—এ সম্পর্কে রাষ্ট্র-বিজ্ঞানীদের মধ্যে এখনও পর্যন্ত ঐকমত্য প্রতিষ্ঠিত হয় নাই। রাষ্ট্রকর্তব্য সম্বন্ধে যে দুইটি মতবাদ প্রচলিত আছে, তাহারা পরস্পর-বিরোধী বলিয়া মনে হয়। রাষ্ট্রকর্তব্য সম্পর্কে প্রধানতঃ দুইটি মতবাদের উল্লেখ দেখিতে পাওয়া যায়—১। ব্যক্তিস্বাতন্ত্র্যবাদ ও ২। সমাজতন্ত্রবাদ। এই দুইটি মতবাদ আলোচনা করিবার পূর্বে এই সম্পর্কে আর একটি তৃতীয় মতবাদের আলোচনা হওয়া বাঞ্ছনীয়।

অ-রাষ্ট্রতন্ত্র (Anarchism)

অ-রাষ্ট্রতন্ত্রিগণ রাষ্ট্রের উপযোগিতা আদৌ স্বীকার করেন না। তাঁহাদের মতে রাষ্ট্র মানব-জীবনের একটি প্রধান অভিশাপ। তাঁহারা বলেন, রাষ্ট্রের

কর্তৃত্ব নিছক পশুবলের উপর প্রতিষ্ঠিত। এই পশুবল প্রয়োগ করিয়া রাষ্ট্র-মাল্লুষকে তাহার বিবেকবুদ্ধিসম্মত কার্যে বাধা প্রদান করিয়া তাহার ব্যক্তিত্ব বিকাশের অন্তরায় ঘটায়। মাল্লুষ তাহার বিচারবুদ্ধি প্রয়োগ করিয়া নিজের হিতসাধনে সমর্থ। সুতরাং মাল্লুষের উপর কর্তৃত্ব করিবার জন্ত রাষ্ট্রের কোন প্রয়োজন নাই। তাই তাঁহারা যে-কোন উপায়েই হউক না কেন রাষ্ট্রের বিলোপসাধন করিয়া পূর্ণ ব্যক্তিস্বাতন্ত্র্য প্রতিষ্ঠা করিতে চাহেন।

অ-রাষ্ট্রতন্ত্রিগণ দুই দলে বিভক্ত—দার্শনিক অ-রাষ্ট্রতন্ত্রী (Philosophical Anarchist) ও বিপ্লবপন্থী অ-রাষ্ট্রতন্ত্রী (Revolutionary Anarchist)। উভয় দলই রাষ্ট্র-বিরোধী ও যথাসম্ভব শীঘ্র রাষ্ট্রের অবসান ঘটাইতে বন্ধ-পরিকর। কিন্তু দার্শনিক অ-রাষ্ট্রতন্ত্রিগণ ধ্বংসাত্মক কার্যপদ্ধতি দ্বারা রাষ্ট্রের বিনাশসাধন করিতে চাহেন না। তাঁহারা শিক্ষা দ্বারা জনমতকে রাষ্ট্রের অল্পযোগিতা সহজে সচেতন করিয়া ধীরে ধীরে রাষ্ট্রের বিলোপসাধনের পক্ষপাতী। রুশীয় দার্শনিক টল্‌স্টয় এই মতের একজন প্রধান সমর্থক। বাকুনি, ক্রোপটকিন প্রভৃতি দার্শনিকেরা রাষ্ট্রের অস্তিত্ব আদৌ বরদাস্ত করিতে অস্বীকার করেন। তাঁহারা ধ্বংসাত্মক কার্যপদ্ধতির দ্বারা রাষ্ট্রের বিলোপসাধন করিতে বন্ধপরিকর।

অ-রাষ্ট্রতন্ত্রিগণ ব্যক্তিস্বাধীনতার উপর যথেষ্ট গুরুত্ব আরোপ করিয়াছেন—একথা স্বীকার করিয়া নইলেও তাঁহাদের মতবাদ গ্রহণ করা যায় না। রাষ্ট্রবিহীন সমাজে অরাজকতা অবশ্যজ্ঞাবী। ইহা ছাড়া অ-রাষ্ট্রতন্ত্রিগণ মাল্লুষের হিতাহিতবোধের উপর অত্যধিক আস্থা স্থাপন করিয়াছেন। কিন্তু কার্যতঃ মাল্লুষ এতটা হিতাহিতবোধসম্পন্ন নহে। সুতরাং মাল্লুষকে সংযত ও ঠিক পথে পরিচালিত করিয়া সমাজ-জীবনকে সফল করিবার নিমিত্ত রাষ্ট্রের প্রয়োজনীয়তা অনস্বীকার্য।

ব্যক্তিস্বাতন্ত্র্যবাদ (Individualism)

ব্যক্তিস্বাতন্ত্র্যবাদ অ-রাষ্ট্রতন্ত্রবাদের একটি মার্জিত সংস্করণ। মাত্র। ব্যক্তিস্বাতন্ত্র্যবাদীরা রাষ্ট্রকে একটি অভিশাপ বলিয়া বর্ণনা করিলেও অ-রাষ্ট্র-তন্ত্রীদের মত রাষ্ট্রের প্রয়োজনীয়তা একেবারে অস্বীকার করিতে পারেন নাই। তাঁহাদের মতে মাল্লুষের যতদিন স্বীয় স্বার্থসিদ্ধির জন্ত অপরের

অধিকারে হস্তক্ষেপ করিবার প্রবণতা থাকিবে, ততদিন রাষ্ট্রের অস্তিত্ব থাকিবে। মানুষ যেদিন নিষ্পাপ ও নিরহঙ্কার হইয়া আত্মনিয়ন্ত্রণে সক্ষম হইবে, সেদিন আর রাষ্ট্রের কোন প্রয়োজনীয়তা থাকিবে না। ব্যক্তিস্বাতন্ত্র্যবাদীদের মতে রাষ্ট্র একটি অপরিহার্য পাপ। যতদিন মানব-সমাজে দুর্কার থাকিবে ততদিন রাষ্ট্র একান্ত অপরিহার্য বলিয়া বিবেচিত হইবে। এইজন্য ব্যক্তিস্বাতন্ত্র্যবাদীরা বলেন যে, রাষ্ট্রের কার্যের পরিধি যতই কম হয়, ব্যক্তির পক্ষে ততই মঙ্গল। ব্যক্তিস্বাতন্ত্র্যবাদীরা রাষ্ট্রের কার্যকলাপ কমাইয়া ক্ষুদ্র গণ্ডির মধ্যে আবদ্ধ রাখিতে চাহেন। তাঁহাদের মতে রাষ্ট্রের প্রধান কার্য হইল আভ্যন্তরীণ শাস্তি-শৃঙ্খলা রক্ষা করিবার জন্য শাসনকার্য পরিচালনা করা এবং বহিঃশত্রুর হস্ত হইতে দেশ রক্ষা করা। এতদতিরিক্ত কোন কার্যই রাষ্ট্র কর্তৃক পরিচালিত হইতে পারিবে না। অন্য সমস্ত বিষয়ে ব্যক্তির অবাধ স্বাধীনতা প্রতিষ্ঠিত করিয়া ব্যক্তিস্বাতন্ত্র্যবাদীরা ব্যক্তিত্ব-বিকাশের সুযোগ সৃষ্টি করিবার পক্ষপাতী।

ইংলণ্ডে শিল্পবিপ্লবের সঙ্গে সঙ্গে ব্যক্তিস্বাতন্ত্র্যবাদ শক্তিশালী মতবাদ বলিয়া অ্যাডাম স্মিথ, রিকার্ডো, মালথাস্, প্রমুখ প্রসিদ্ধ অর্থশাস্ত্র-বিশারদগণ কর্তৃক সমর্থিত হইয়া রাষ্ট্র কর্তৃত্বের অত্যধিক প্রয়োগের বিরুদ্ধে প্রতিক্রিয়া-স্বরূপ দেখা দেয়। উপরি-উক্ত লেখকগণ উৎপাদন ও বিনিময়ক্ষেত্রে রাষ্ট্রের কর্তৃত্ব বিলোপ করিয়া শ্রমিক ও মালিক, ক্রেতা ও বিক্রেতার সম্পর্ক পূর্ণ প্রতিযোগিতার উপর প্রতিষ্ঠিত করিবার পক্ষে যুক্তির অবতারণা করেন। প্রসিদ্ধ দার্শনিক জন স্টুয়ার্ট মিল ও ব্যক্তিস্বাতন্ত্র্যবাদের একজন প্রধান সমর্থক ছিলেন। মতামত-প্রকাশের স্বাধীনতা ছাড়াও মিল ব্যক্তিগত জীবনের স্বাধীনতার উপর বিশেষ গুরুত্ব আরোপ করিয়াছিলেন। তাঁহার মতে রাষ্ট্র নিছক ব্যক্তিগত জীবনে হস্তক্ষেপ করিয়া ব্যক্তির ব্যক্তিত্ব-বিকাশের অন্তরায় ঘটাইবে না। প্রত্যেক ব্যক্তিকেই নিজ অভিরুচি অনুযায়ী কার্য করিবার সুযোগ দান করিলে প্রত্যেক মানুষ প্রকৃত সুখের সন্ধান পাইবে। মিল ব্যক্তিস্বাধীনতার একটিমাত্র সীমারেখার উল্লেখ করিয়াছেন। ব্যক্তিগত আচরণের দ্বারা যদি অপরের স্বার্থ ক্ষুণ্ণ হইবার সম্ভাবনা থাকে, তাহা হইলে অবশ্য ব্যক্তিগত আচরণ রাষ্ট্র কর্তৃক নিয়ন্ত্রিত হওয়া বাঞ্ছনীয়।

মিল-প্রদত্ত ব্যক্তিস্বাতন্ত্র্যবাদ ও ডারউইন্-প্রদত্ত বিবর্তনবাদের সমন্বয়-

সাধন করিয়া প্রসিদ্ধ লেখক হার্বার্ট স্পেন্সার ব্যক্তিস্বাতন্ত্র্যবাদের এক অভিনব ব্যাখ্যা প্রদান করেন। তাঁহার মতে সমাজ-জীবনে মানুষ পরস্পরের সহিত প্রতিযোগিতায় রত। এই প্রতিযোগিতার ফলে যোগ্যতম ব্যক্তিগণ বাঁচিয়া থাকে, আর বাহারা দুর্বল ও অক্ষম তাহারা অপসারিত হয়। জীৱনযুদ্ধের এই স্বাভাবিক পরিণতিকে স্পেন্সার সমাজ-জীবনের অগ্রগতির সহায়ক বলিয়া মনে করেন। তাঁহার মতে আর্ড ও অক্ষম ব্যক্তিদের সাহায্য প্রদান করিয়া এই স্বাভাবিক নিয়মকে ব্যাহত করা রাষ্ট্রের পক্ষে দুষণীয়।

ব্যক্তিস্বাতন্ত্র্যবাদের পক্ষে যুক্তি (Arguments for Individualism)

ব্যক্তিস্বাতন্ত্র্যবাদীরা তাঁহাদের মতবাদের সমর্থনে অনেকগুলি যুক্তির অবতারণা করেন। তাঁহাদের প্রথম যুক্তি সহজাত ন্যায়পরতার (Ethical argument) ভিত্তির উপর প্রতিষ্ঠিত। তাঁহারা বলেন, মানুষ হিতাহিত-বোধসম্পন্ন জীব। স্বীয় ইষ্ট সম্বন্ধে মানুষ সর্বদা সচেতন। সুতরাং রাষ্ট্রকর্তৃ-বিমুক্ত হইলে মানুষ নিজের অভিক্রুচি অহুযায়ী কার্য করিয়া প্রকৃত স্বাধীনতা ও স্থখের অধিকারী হইতে পারিবে। রাষ্ট্রকর্তৃত্বের ফলে মানুষের আত্ম-প্রত্যয় ও কর্মক্ষমতা বিনষ্ট হয়। সুতরাং স্বস্থ ও সবল ব্যক্তিত্ব-বিকাশের নিমিত্ত রাষ্ট্রকর্তৃত্বের অবসান হওয়া ব্যক্তির পক্ষে মঙ্গলজনক।

দ্বিতীয়তঃ, ডারউইন-প্রদত্ত বিবর্তনবাদ (Biological argument) প্রয়োগ করিয়া ব্যক্তিস্বাতন্ত্র্যবাদীরা তাঁহাদের মতবাদ প্রতিষ্ঠিত করেন। জীবনযুদ্ধের স্বাভাবিক পরিণতি হইল যোগ্যতমের জীবনধারণ ও দুর্বলের মৃত্যুবরণ। সুতরাং এই স্বাভাবিক নিয়ম অহুসারে যোগ্যতমের বাঁচিয়া থাকা ও অক্ষমের মৃত্যুবরণ করা সমাজ-জীবনের পক্ষে মঙ্গলজনক। রাষ্ট্রের সাহায্য না পাইলে পূর্ণ প্রতিযোগিতার ফলে শুধু যোগ্যতম ব্যক্তিরা জীবন-সংগ্রামে জয়ী হইয়া টিকিয়া থাকিবে, অযোগ্য ব্যক্তিগণ অপসারিত হইবে। ফলে সামাজিক অগ্রগতি অব্যাহত থাকিবে।

তৃতীয়তঃ, অর্থনৈতিক যুক্তির (Economic argument) অবতারণা করিয়া ব্যক্তিস্বাতন্ত্র্যবাদীরা তাঁহাদের মতবাদ সমর্থন করেন। শিল্প, ব্যবসায় ও বাণিজ্য প্রভৃতি অর্থনৈতিক জীবনের বিভিন্ন ক্ষেত্রে সহযোগিতা

অপেক্ষা প্রতিযোগিতার উপর তাঁহারা অধিকতর গুরুত্ব আরোপ করেন। তাঁহারা বলেন, অবাধ প্রতিযোগিতার ফলেই উৎপাদন বৃদ্ধি পাইয়া শিল্পজাত দ্রব্যের উৎকর্ষসাধন ও মূল্যহ্রাস হইবে। দ্রব্যমূল্য, মজুরির হার ও স্বদের হার প্রতিযোগিতার দ্বারা নির্ধারিত হইয়া স্বাভাবিক স্তরে থাকিবে।

চতুর্থতঃ, ব্যক্তিস্বাতন্ত্র্যবাদীরা অতীতের অভিজ্ঞতার (Argument based on experience) দ্বারা তাঁহাদের মতবাদ সমর্থন করেন। তাঁহারা বলেন, রাষ্ট্র যে ব্যক্তিকে ঠিক পথে পরিচালিত করিতে পারে নাই, ইতিহাস তাহার প্রধান সাক্ষ্য। প্রত্যেক দেশের ইতিহাসেই সরকারী প্রচেষ্টার ব্যর্থতার কাহিনী লিপিবদ্ধ আছে। তাই তাঁহারা বলেন, রাষ্ট্র নানারূপ বিধিনিষেধ আরোপ না করিয়া ব্যক্তিকে যদি পূর্ণ-স্বাধীনতা প্রদান করে তাহা হইলে ব্যক্তি রাষ্ট্রনিরপেক্ষ হইয়া আত্মবিকাশের চরম সুযোগ লাভ করিতে পারে।

পরিশেষে ব্যক্তিস্বাতন্ত্র্যবাদীরা রাষ্ট্রের অক্ষমতার (Argument of State incompetency) উল্লেখ করিয়া ব্যক্তিস্বাধীনতার অপরিহার্যতা প্রমাণিত করেন। তাঁহারা বলেন, ব্যক্তিগত প্রচেষ্টা দ্বারা ব্যক্তিগত স্বার্থ যতটা স্বরক্ষিত হইতে পারে, রাষ্ট্র কর্তৃক সেরূপ স্বরক্ষিত হওয়া সম্পূর্ণ অসম্ভব। রাষ্ট্রের উপর অত্যধিক পরিমাণে কার্যের ভার অপিত হইলে রাষ্ট্র কোন কার্যই সূচুভাবে সম্পাদন করিতে পারে না। ফলে, সমাজের কল্যাণ অপেক্ষা অকল্যাণের সম্ভাবনা অধিক হয়। সুতরাং রাষ্ট্রের ক্রিয়াকলাপ ক্ষুদ্রতম গতির মধ্যে সীমায়িত করিয়া মাহুষকে স্বাধীনভাবে কাজ করিবার ক্ষমতা প্রদান করিলে তাহার চিত্তবৃত্তিগুলির চরম বিকাশ সম্ভব হইবে।

ব্যক্তিস্বাতন্ত্র্যবাদের বিপক্ষে যুক্তি (Arguments against Individualism)

ব্যক্তিস্বাতন্ত্র্যবাদের অসারতা প্রমাণ করিবার উদ্দেশ্যে অনেক যুক্তির অবতারণা করা হইয়াছে। ব্যক্তিস্বাতন্ত্র্যবাদীরা রাষ্ট্রকে একটি পাপ বলিয়া অভিহিত করিয়াছেন। কিন্তু বাস্তবক্ষেত্রে এ-কথা প্রযোজ্য নহে। রাষ্ট্র-

প্রবর্তিত কোন কোন নীতি বা কার্যক্রম ভ্রমপ্রমাদ পূর্ণ হইতে পারে, তজ্জন্ত রাষ্ট্রের অবসান দাবী করা আর সময় সময় এরোপ্লেন-দুর্ঘটনা হয় বলিয়া এরোপ্লেনকে বাতিল করা একই মনোভাবের পরিচায়ক। রাষ্ট্র মানব-জীবনের অগ্রগতিকে কোনরূপ সহায়তা করিতে পারে নাই বলিয়া রাষ্ট্রের প্রয়োজনীয়তা অস্বীকার করা আর পুত্র কর্তৃক দরিদ্র পিতার পিতৃদাবী উপেক্ষা করা একই মনোভাবের পরিচায়ক। মানুষের অর্থনৈতিক, সামাজিক ও আধ্যাত্মিক জীবনের প্রগতিতে রাষ্ট্রের অবদান আদৌ উপেক্ষণীয় নহে। সকল দেশের ইতিহাসেই এই সাক্ষ্য প্রদান করে।

দ্বিতীয়তঃ, কোন ব্যক্তিই তাহার নিজ স্বার্থ সঙ্ঘর্ষে সকল সময়ে অবহিত নহে। কোনটি স্বার্থের অনুকূল ও কোনটি স্বার্থের প্রতিকূল মানুষ সর্বদা তাহা স্থির করিতে পারে না। অস্বাস্থ্যকর পরিবেশ, দূষিত বাত্ম ও অনিষ্টকর আমোদ-প্রমোদের ভয়াবহ পরিণাম সঙ্ঘর্ষে অশিক্ষিত ও অজ্ঞলোকেরা সম্পূর্ণ উদাসীন। শিক্ষিত ব্যক্তিগণও অনেক সময় পরিণাম চিন্তা না করিয়া অনেক আত্মঘাতী কার্যে লিপ্ত থাকেন। এরূপ ক্ষেত্রে ব্যক্তিস্বাধীনতা সংরক্ষণের অজুহাতে রাষ্ট্রের হস্তক্ষেপ বন্ধ করা সমাজের পক্ষে মঙ্গলজনক হয় না। ব্যক্তির প্রকৃত স্বথের জন্তই ব্যক্তিগত ব্যাপারে রাষ্ট্রের হস্তক্ষেপ করিবার অধিকার থাকা উচিত।

তৃতীয়তঃ, ব্যক্তিস্বাতন্ত্র্যবাদীরা রাষ্ট্রকে ব্যক্তিস্বাধীনতার পরিপন্থী বলিয়া বর্ণনা করিয়াছেন। তাঁহাদের মতে রাষ্ট্রের কার্যকলাপ যত অধিক হয়, ব্যক্তিস্বাধীনতা সেই পরিমাণে হ্রাস পায়। কিন্তু প্রকৃতপক্ষে এরূপ দৃষ্টিভঙ্গী সমর্থনযোগ্য নয়। অনিয়ন্ত্রিত স্বাধীনতা উচ্ছৃঙ্খলতার নামান্তর মাত্র। রাষ্ট্র-কর্তৃক নিয়ন্ত্রিত না হইলে ব্যক্তিস্বাতন্ত্র্য দুর্বল অসহায় ব্যক্তির দাসত্বের কারণ হইয়া পড়ে। অনিয়ন্ত্রিত শাসনব্যবস্থা উচ্ছৃঙ্খলতার অবসান ঘটাইয়া প্রত্যেক ব্যক্তিকে তাহার গাথ্য অধিকার ভোগ করিতে সহায়তা করে।

চতুর্থতঃ, ব্যক্তিস্বাতন্ত্র্যবাদীরা বিবর্তনবাদের সাহায্যে তাঁহাদের মতবাদ সমর্থনের যে প্রয়াস পাইয়াছেন, তাহাও বর্তমানে অসার বলিয়া প্রতিপন্ন হইয়াছে। জীবন-সংগ্রামে বাহাতে শুধু যুদ্ধক্ষম যোগ্য ব্যক্তি বাঁচিয়া থাকিতে পারে ও অক্ষয় ধ্বংসপ্রাপ্ত হয়, সেজন্য তাঁহারা দুর্বল ও অক্ষমের প্রতি রাষ্ট্রের পক্ষপাতিত্বের বিরোধিতা করেন। কিন্তু তত্বকে শাস্তি দেওয়া যদি

রাষ্ট্রের অবশ্যকরণীয় বলিয়া পরিগণিত হয়, তাহা হইলে দুর্বলকে সাহায্য দ্বারা সবল করিয়া তোলা রাষ্ট্রকর্তব্য হিসাবে কি কারণে পরিগণিত হইবে না—ইহার কোন সহজ ব্যক্তিস্বাতন্ত্র্যবাদীরা দিতে পারেন না। সামাজিক সর্বশ্রেষ্ঠ সংগঠন হিসাবে রাষ্ট্রের কর্তব্য শুধু দুইয়ের দমনে সীমাবদ্ধ থাকিতে পারে না—শিষ্টের পালনও রাষ্ট্রের কর্তব্য।

পঞ্চমতঃ, তাহার। অনাবশ্যকরূপে সরকারী কার্যের ভুল-ত্রুটির উপর গুরুত্ব আরোপ করেন, কিন্তু রাষ্ট্র-কার্যকলাপের দ্বারা এযাবৎ মানব-সমাজের যে অপরিসীম উন্নতি হইয়াছে, সে সম্বন্ধে তাহার। সম্পূর্ণ উদাসীন ও নীরব থাকেন। বর্তমান সমাজব্যবস্থা এরূপভাবে গঠিত যে, রাষ্ট্রীয় হস্তক্ষেপ ও রাষ্ট্রীয় নিয়ন্ত্রণ ব্যতীত সামাজিক স্বার্থের পরিপ্রেক্ষিতে ব্যক্তিগত স্বার্থ-সংরক্ষণ সম্ভব নয়। বাস্তবক্ষেত্রেও রাষ্ট্রীয় হস্তক্ষেপের ফলে প্রায় সকল দেশেই কৃষি, শিল্প, ব্যবসায়-বাণিজ্য, শিক্ষাবিস্তার প্রভৃতি নানাবিধ গঠন-মূলক কার্য সাফল্যের সহিত সম্পাদিত হইয়াছে।

পরিশেষে ব্যক্তিস্বাতন্ত্র্যবাদের বিরুদ্ধে বলা যায় যে, সুযোগ-সুবিধার অভাবে অধিকাংশ লোক তাহাদের অন্তর্নিহিত শক্তিগুলির সদ্ব্যবহার করিতে পারে না। ব্যক্তিগত প্রচেষ্টা দ্বারা ব্যক্তি-বিকাশ সকল সময় সকল ক্ষেত্রে সম্ভবপর নয় বলিয়া রাষ্ট্রের পক্ষে ব্যক্তির স্বার্থসংরক্ষণ ও হিতসাধনের জন্ত সর্ববিধ কার্যে আত্মনিয়োগ করা কর্তব্য। বর্তমান যুগের রাষ্ট্রগুলি তাহাদের কার্যকলাপ দ্বারা ব্যক্তি ও সমষ্টির জীবনে যে অভাবনীয় পরিবর্তন আনয়ন করিয়াছে, তাহা দ্বারা ব্যক্তিস্বাতন্ত্র্যবাদের অসারতা প্রমাণিত হয়।

ব্যক্তিস্বাতন্ত্র্যবাদের আধুনিক ব্যাখ্যা (Modern Individualism)

উনবিংশ শতাব্দীর শেষভাগ হইতে ব্যক্তিস্বাতন্ত্র্যবাদী চিন্তাধারার প্রভাব হ্রাস পাইতে থাকে। ব্যক্তিস্বাতন্ত্র্যবাদী চিন্তাধারার প্রতিক্রিয়ারূপে রাষ্ট্রের যে আদর্শবাদ (Idealism) ও সমষ্টিবাদের (Collectivism) সৃষ্টি হয় তাহার ফলে ব্যক্তিত্ব সম্পূর্ণরূপে বিনষ্ট হইবার উপক্রম হয়। এই আদর্শবাদ ও সমষ্টিবাদের প্রতিবাদস্বরূপ ব্যক্তিস্বাতন্ত্র্যবাদের পুনরুত্থান ঘটে। সুতরাং প্রতিক্রিয়ার প্রতিক্রিয়া হিসাবে বর্তমান ব্যক্তিস্বাতন্ত্র্যবাদ জন্মলাভ করে।

ব্যক্তিস্বাতন্ত্র্যবাদের পুনরুত্থানের প্রথম ও প্রধান কারণ হইল হেগেল প্রমুখ জার্মান দার্শনিকগণের প্রবর্তিত আদর্শবাদ—যাহার ফলে রাষ্ট্রের ঐশ্বরিক ও অতিমানবীয় অস্তিত্ব স্বীকৃত হইয়া রাষ্ট্র এক সর্বশক্তিমান ও চরম ক্ষমতার অধিকারী সংগঠনের মর্যাদা লাভ করে। ফলে, ব্যক্তিগত জীবনের প্রাথমিক অধিকারগুলিও রাষ্ট্রের ইচ্ছাধীন হয়। দ্বিতীয়তঃ, পার্লামেন্টারী শাসনব্যবস্থা প্রবর্তিত হওয়ার ফলে গণতন্ত্রের নামে যে সংখ্যাগরিষ্ঠ দল তথা রাজনৈতিক দলের নেতৃবর্গের সংখ্যালঘু দলের উপর অস্ত্রায়, অত্যাচার ও অবিচার আরম্ভ হইল তাহাতে জনসাধারণ অতিষ্ঠ হইয়া তাহাদের অধিকার রক্ষায় তৎপর হয়। তৃতীয়তঃ, প্রথম বিশ্ব-মহাসমরের ফলে জীবন ও ধনের ব্যাপক অপচয় লক্ষ্য করিয়া জনসাধারণ রাষ্ট্রের অবাধ কর্তৃত্ব সম্পর্কে সন্দেহান হইয়া উঠে,—এমন কি রাষ্ট্রের উপযোগিতা সম্পর্কেও জনসাধারণের মধ্যে সন্দেহের উদ্রেক হয়। চতুর্থতঃ, বিংশ শতাব্দীর প্রারম্ভ হইতে বর্তমানকাল পর্যন্ত রাষ্ট্রীয় কার্যকলাপের পরিধি ক্রমশঃই বিস্তৃতিলাভ করিতেছে। মানুষের সামাজিক, ধর্মসম্পর্কীয়, কৃষ্টিগত বিশেষ করিয়া অর্থনৈতিক জীবনে রাষ্ট্র-নিয়ন্ত্রণ দ্রুতগতিতে বৃদ্ধি পাইতেছে। রাষ্ট্রীয় কার্যকলাপ সম্পাদন করিবার জন্ত কেন্দ্রীভূত বিশাল আমলাতন্ত্র প্রতিষ্ঠিত হইয়াছে। গণতান্ত্রিক শাসনব্যবস্থায় দায়িত্বহীন আমলাতন্ত্রের অভ্যুত্থানে ব্যক্তিস্বাধীনতা বহুল পরিমাণে ব্যাহত হইয়াছে। উপরি-উক্ত কারণগুলির সমন্বয়ে বর্তমান রাষ্ট্রগুলি যে সর্বাঙ্গিক রূপ পরিগ্রহ করিয়াছে, তাহার প্রতিবাদ হিসাবে ব্যক্তিস্বাতন্ত্র্যবাদ নূতন রূপ পরিগ্রহ করিয়া আবির্ভূত হইয়াছে।

আধুনিক যুগে নরম্যান্ এঞ্জেল, গ্রাহাম্ ওয়ালেস্, মিস্ ফলেট্ প্রমুখ প্রগতিশীল ব্যক্তিস্বাতন্ত্র্যবাদিগণ এই মতবাদের এক নূতন ব্যাখ্যা প্রদান করিয়াছেন। নরম্যান্ এঞ্জেল তাঁহার ‘Great Illusion’ নামক গ্রন্থে রাষ্ট্রকে একটি শাসনযন্ত্র-বিশেষ বলিয়া অভিহিত করিয়া বলিয়াছেন যে, যখনই বর্তমান শাসনযন্ত্র অপেক্ষা কোন অধিকতর উপযোগী শাসনযন্ত্র আবিষ্কৃত হইবে তখনই বর্তমান ব্যবস্থার অবসান ঘটিবে। প্রগতিশীল ব্যক্তিস্বাতন্ত্র্যবাদীদের মতে বর্তমান রাষ্ট্র মানুষের কোন বিশেষ প্রয়োজন মিটাইবার জন্ত গঠিত হয় নাই বা নাগরিক জীবনের উপর বর্তমান রাষ্ট্রের

যে দাবী তাহা কোন নৈতিক বা ঐশ্বরিক বিধানের উপর প্রতিষ্ঠিত নহে। রাষ্ট্রভুক্ত জনসমূহের ব্যক্তিত্ব বা ইচ্ছা ব্যতীত রাষ্ট্রের কোন পৃথক্ অতি-মানবীয় অস্তিত্ব বা ইচ্ছা নাই। গ্রেহাম ওয়ালেস্ পার্লামেন্টারী শাসনব্যবস্থা ও সার্বজনীন ভোটাধিকার প্রথাকে জনসাধারণকে প্রবঞ্চিত করিয়া মুষ্টিমেয় লোকের আধিপত্য প্রতিষ্ঠিত করিবার একটি কৌশলমাত্র বলিয়া অভিহিত করিয়াছেন।

আধুনিক ব্যক্তিস্বাতন্ত্র্যবাদীরা ব্যক্তি অপেক্ষা ব্যক্তিসমষ্টি লইয়া গঠিত সমাজস্থিত নানা জাতীয় বিশেষ করিয়া অর্থনৈতিক সংঘগুলির উপর অধিকতর গুরুত্ব আরোপ করেন। তাঁহারা বলেন যে, বর্তমান যুগের বিশালায়তন ও বিশাল জনসমষ্টি লইয়া গঠিত রাষ্ট্রের পক্ষে ব্যক্তির সর্বাঙ্গীণ কল্যাণসাধন করা একরূপ অসম্ভব। সেইজন্য প্রয়োজনের তার্গিদে সমাজের মধ্যে ক্ষুদ্র ক্ষুদ্র সংঘের সৃষ্টি হইয়াছে। এই সংঘগুলি প্রথমতঃ, ব্যক্তিকে সংখ্যা-গরিষ্ঠের উৎপীড়ন হইতে রক্ষা করে। দ্বিতীয়তঃ, ইহারা ইহাদের সদ্ব্যবহারের বিশেষ চিন্তাধারা ও স্বার্থের উৎকর্ষসাধনের সহায়তা করে। সুতরাং রাষ্ট্র অপেক্ষা এই সংঘগুলিই ব্যক্তির ব্যক্তিত্ব-বিকাশের অধিকতর সহায়ক বলিয়া বিবেচিত হয়। সুতরাং ব্যক্তি, ব্যক্তিসমষ্টি লইয়া গঠিত সংঘ ও রাষ্ট্র—এই তিনের সম্পর্কের সামঞ্জস্যবিধানের উপর প্রত্যেকটির স্থায়িত্ব ও অধিকার নির্ভর করে। বহুত্ববাদিগণ (Pluralists) সংঘগুলির উপর সর্বাধিক গুরুত্ব আরোপ করেন। কিন্তু মিস্ ফলেট্ প্রমুখ প্রগতিশীল ব্যক্তিস্বাতন্ত্র্যবাদীদের মতে এই তিনটির কোনটিরই গুরুত্ব কম নহে। মানুষের মধ্যে যে অগ্রগতির ও মনুষ্যত্ব-বিকাশের সম্ভাবনা আছে, তাহা একমাত্র সমষ্টিগত জীবনের মধ্য দিয়া পরিণতি লাভ করিতে পারে। সুতরাং ব্যক্তি ও সমষ্টি—কোনটিই উপেক্ষণীয় নহে। (“Man discovers his true nature, gains his true freedom only through the group.”)

সমাজতন্ত্রবাদ (Socialism)

রাষ্ট্রের ক্রিয়াকলাপসম্পর্কে সমাজতন্ত্রবাদীরা ব্যক্তিস্বাতন্ত্র্যবাদী হইতে সম্পূর্ণ বিপরীত মত পোষণ করেন। তাঁহারা রাষ্ট্রকে মানব-জীবনের চরম উৎকর্ষলাভের পক্ষে অবশ্য-প্রয়োজনীয় বলিয়া মনে করেন এবং এই কারণে

তাঁহারা রাষ্ট্রের কার্যক্ষেত্র বহুদূরবিস্তৃত করিবার পক্ষপাতী। তাঁহারা বলেন, ব্যক্তিগত প্রচেষ্টায় সকল সময় ব্যক্তি-বিকাশ সম্ভব নয়। এইজন্য সমাজের অধিকাংশ লোক সুযোগ-সুবিধার অভাবে তাহাদের অন্তর্নিহিত শক্তিগুলির পূর্ণ-সম্ভাব্যহার করিতে পারে না। রাষ্ট্রীয় হস্তক্ষেপ ব্যতীত এই সমস্ত ব্যক্তির আর্থিক, নৈতিক ও মানসিক কল্যাণসাধন সম্পূর্ণ অসম্ভব। সুতরাং ব্যক্তির কল্যাণের জন্যই ব্যক্তিগত জীবনের বৃহত্তম ক্ষেত্রে ব্যক্তির পক্ষে রাষ্ট্র কর্তৃক পরিচালিত হওয়া বাঞ্ছনীয়।

সমাজতত্ত্ববাদীরা ব্যক্তির ক্ষমতায় বিশ্বাস করেন না, তাই তাঁহারা রাষ্ট্র-কর্তৃত্বের মধ্য দিয়া ব্যক্তি-বিকাশের ব্যবস্থা করিবার পক্ষপাতী। অপর-পক্ষে, ব্যক্তিস্বাতন্ত্র্যবাদীরা ব্যক্তিগত ক্ষমতায় আস্থাবান, তাই তাঁহারা রাষ্ট্রের কর্তৃত্ব ক্ষুদ্র গতির মধ্যে আবদ্ধ রাখিয়া ব্যক্তিগত প্রচেষ্টার দ্বারা ব্যক্তি-বিকাশের ব্যবস্থা করিবার পক্ষে মত পোষণ করেন। সুতরাং ব্যক্তির সর্ববিধ কল্যাণ-বিধান করাই হইল উভয় দলের উদ্দেশ্য। কিন্তু একই উদ্দেশ্য-প্রণোদিত হইলেও কার্যক্রমের দিক দিয়া উভয় দলের মধ্যে মূলগত পার্থক্য রহিয়াছে।

সমাজতত্ত্ববাদ শুধু একটি রাজনৈতিক মতবাদ নহে, ইহা মূলতঃ নির্দিষ্ট কার্যক্রমসম্বন্ধিত একটি অর্থনৈতিক মতবাদ। এই মতবাদ অনুসারে সমগ্র সামাজিক ও অর্থনৈতিক জীবন নিয়ন্ত্রণ করিবার গুরুত্বপূর্ণ দায়িত্ব রাষ্ট্রের হস্তে স্তম্ভ থাকে বলিয়া ইহা একটি রাজনৈতিক মতবাদ বলিয়া পরিগণিত হয়।

অত্যধিক ব্যক্তিস্বাতন্ত্র্যের ফলে যে ধনতান্ত্রিকতার উদ্ভব হয়, প্রধানতঃ তাহার প্রতিক্রিয়ারূপে সমাজতত্ত্ববাদের উদ্ভব হয়। ধনতান্ত্রিক ব্যবস্থায় জমি-জায়গা, কল-কারখানা, খনি, রেলপথ, বিদ্যুৎ প্রভৃতি উৎপাদনের প্রধান উপাদানগুলি ব্যক্তিগত মালিকানায় পরিচালিত হওয়ার ফলে সমাজে যে ধনবৈষম্য ও সাম্প্রদায়িক বিভেদ দেখা দেয়, সমাজতত্ত্ববাদীরা সর্বসাধারণের হিতার্থে তাহা প্রতিরোধ করিতে চেষ্টা করেন। এইজন্য উৎপাদনের উপাদানগুলির উপর ব্যক্তিগত স্বার্থসাধনের নিষিদ্ধি যে ব্যক্তিগত মালিকানা প্রতিষ্ঠিত আছে তাহার অবসান ঘটাইতে তাঁহারা বদ্ধপরিকর। ব্যক্তিগত মূল্যবোধের উদ্দেশ্যে পরিচালিত সম্পদ-উৎপাদন ও বণ্টনের যে ব্যবস্থা

বর্তমানে সমাজে প্রবর্তিত আছে, সমাজতন্ত্রবাদীরা তৎপরিবর্তে রাষ্ট্রকর্তৃত্ব ও রাষ্ট্রনিয়ন্ত্রণ প্রচলিত করিয়া সামাজিক প্রয়োজনানুযায়ী উৎপাদন ও বণ্টন-ব্যবস্থা প্রবর্তিত করিয়া ধনবৈষম্য ও সাম্প্রদায়িক ভেদবুদ্ধি দূর করিতে প্রয়াস পাইয়া থাকেন। উৎপাদন ও বণ্টন-ব্যবস্থায় রাষ্ট্র-নিয়ন্ত্রণ প্রতিষ্ঠিত হইলে মুষ্টিমেয় লোক তাহাদের স্বার্থসাধনের জন্ত বর্তমানে যে অধিকাংশ লোককে তাহাদের শ্রাঘ্য অধিকার হইতে বঞ্চিত করিতেছে, তাহার অবসান ঘটিবে। পরন্তু অর্থনৈতিক জীবনে এমন একটি পরিবেশের সৃষ্টি হইবে, যাহার ফলে সমাজের সমগ্র উৎপাদন ও বণ্টন-ব্যবস্থা ব্যক্তিগত প্রয়োজনের পরিবর্তে সামাজিক প্রয়োজনের দ্বারাই নির্ধারিত হইবে। রাষ্ট্রনিয়ন্ত্রণাধীন একটি কেন্দ্রীয় পরিকল্পনা-সমিতি সমগ্র উৎপাদন-ব্যবস্থা পরিচালনা করিবে। ফলে, প্রয়োজনাতিরিক্ত উৎপাদন, মূল্য-হ্রাস-বৃদ্ধি, বাণিজ্যচক্র, বেকারসমশ্রা প্রভৃতি ব্যক্তিগত মালিকানা-পরিচালিত উৎপাদন-ব্যবস্থার অবশ্যজ্ঞাবী ক্রটিগুলি দূরীভূত হইয়া অর্থনৈতিক জীবনে অপেক্ষাকৃত স্থিতিবস্থা আনীত হইবে। রুশ দেশে সমাজতান্ত্রিক ব্যবস্থা প্রবর্তনের ফলে জাতীয় জীবনে যে অভাবনীয় উৎকর্ষ সাধিত হইয়াছে, তাহার ফলে পৃথিবীর সর্বত্রই এই মতবাদ অল্পবিস্তর পরিমাণে প্রসারলাভ করিতে সমর্থ হইয়াছে।

সমাজতন্ত্রবাদের প্রকারভেদ (Different Forms of Socialism)

সমাজতন্ত্রবাদীরা একই উদ্দেশ্য-প্রণোদিত হইলেও উদ্দেশ্যসিদ্ধির জন্ত বিভিন্ন পন্থা অনুসরণ করিয়া থাকেন। সুতরাং কার্যপদ্ধতির দিক দিয়া দেখিতে গেলে সমাজতন্ত্রবাদকে বিভিন্ন শ্রেণীতে ভাগ করা যায় :—

১। কাল্পনিক সমাজতন্ত্রবাদ (Utopian Socialism)

গ্রীক দার্শনিক প্লেটোকে সমাজতন্ত্রবাদের জন্মদাতা বলিলে বোধ হয় অতুক্তি হয় না। তিনি ‘রিপাব্লিক’ নামক তাঁহার বিখ্যাত গ্রন্থে এক আদর্শ রাষ্ট্রের পরিকল্পনা করিয়াছিলেন। প্লেটো কর্তৃক পরিকল্পিত আদর্শ রাষ্ট্রের বৈশিষ্ট্য হইল যে, শাসকগোষ্ঠী ব্যক্তিগত সম্পত্তি ও পারিবারিক বন্ধনমুক্ত হইয়া নিঃস্বার্থভাবে শাসনকার্য পরিচালনা করিবেন। শাসকশ্রেণী যাহাতে আপন-পর-ভেদবুদ্ধি-মুক্ত হইয়া অশরের জন্ত জীবন উৎসর্গ

করিতে পারেন সেজন্য প্লেটো তাঁহাদের মধ্যে সামাজিক বিবাহবন্ধন দ্বারা পরিবার-সংগঠন ও ব্যক্তিগত সম্পত্তির উচ্ছেদসাধন করিবার পক্ষে মত প্রকাশ করেন। প্লেটোর আদর্শ রাষ্ট্রের পরিকল্পনা দ্বারা পরবর্তী যুগের যে সমস্ত লেখক অল্পপ্রাণিত হইয়াছিলেন, তাঁহাদিগের মধ্যে টমাস মুরের নাম বিশেষভাবে উল্লেখযোগ্য। মুর তাঁহার 'ইউটোপিয়া' নামক গ্রন্থে এক আদর্শ রাষ্ট্রের চিত্র অঙ্কিত করিয়াছিলেন। মুরের পরবর্তী কালে ফরাসী লেখক সেন্ট সাইমন, ইংরাজ লেখক রবার্ট ওয়েন্ প্রভৃতি দার্শনিকগণ কাল্পনিক সমাজতন্ত্রবাদের সমর্থক বলিয়া পরিচিত ছিলেন। কিন্তু বাস্তবতা-বর্জিত নিছক কল্পনাপ্রসূত বলিয়া এই দার্শনিকদের কাহারও পরিকল্পনা কার্যকরী হয় নাই।

২। মার্কসীয় সমাজতন্ত্রবাদ (Scientific or Marxian Socialism)

আধুনিক সমাজতন্ত্রবাদ মূল্যতঃ কাল মার্কস-প্রবর্তিত সমাজতন্ত্রবাদের উপর প্রতিষ্ঠিত। ১৮৬৭ খৃষ্টাব্দে মার্কস 'দাস ক্যাপিটাল' নামক তাঁহার বিখ্যাত গ্রন্থে বিজ্ঞানসম্মত ভিত্তিতে সমাজতন্ত্রবাদের এক অভিনব ব্যাখ্যা প্রদান করেন। পরবর্তী যুগের সমাজতন্ত্রবাদীরা মার্কসীয় নীতি দ্বারা বহুল পরিমাণে অল্পপ্রাণিত হইয়াছেন। মার্কসীয় সমাজতন্ত্রবাদ প্রধানতঃ তিনটি স্তরের উপর প্রতিষ্ঠিত। প্রথমটি হইল উৎকৃত মূল্যের স্তর (Theory of Surplus Value); দ্বিতীয়টি হইল ইতিহাসের জড়বাদী ব্যাখ্যা (Materialistic Interpretation of History) এবং তৃতীয়টি হইল শ্রেণী-সংগ্রাম যতবাদ (Theory of Class Struggle)।

মার্কসের মতে একটি সামগ্রী মূল্য নির্ভর করে উহা উৎপাদন করিতে যে-পরিমাণ শ্রম ব্যয় করা হইয়াছে তাহার উপর। যে সামগ্রী উৎপাদন করিতে অধিক পরিশ্রম প্রয়োগ করিতে হয়, তাহার উৎপাদন-ব্যয় হয় অধিক এবং সেইজন্য তাহার বিনিময়মূল্যও হয় অধিক। অপরপক্ষে, স্বল্প পরিশ্রম দ্বারা উৎপাদিত সামগ্রীর বিনিময়মূল্য কম। সুতরাং মার্কসের মতে সামগ্রীমূল্যের একমাত্র নির্ধারক হইল সমগ্র-উৎপাদনের জন্ত প্রয়োজনীয় শ্রমের পরিমাণ। কিন্তু শ্রমিকেরা যে-পরিমাণ মজুরি পায় তাহা তাহাদের প্রদত্ত শ্রমের পরিমাণ অপেক্ষা অনেক কম অর্থাৎ একটি

সামগ্রী বাজারে যে মূল্যে বিনিময় হয় তদনুসারে শ্রমিকেরা কম হারে মজুরি পায়। সামগ্রীর বিনিময়মূল্য, যাহা প্রযুক্ত শ্রমের পরিমাণ দ্বারা নির্ধারিত হয়, এবং শ্রমিককে প্রদত্ত মজুরির পরিমাণ এই উভয়ের পার্থক্যকেই মার্কস্ উদ্ভূত মূল্য আখ্যা দিয়াছেন। উৎপাদিত সামগ্রীর এই উদ্ভূত মূল্য অন্তায়ভাবে মালিকগণ আত্মসাৎ করিয়া শ্রমিকদের তাহাদের জাতীয় প্রাপ্য হইতে বঞ্চিত করে। ব্যক্তিগত সম্পত্তি বর্তমান থাকার জন্য মালিকগণ উৎপাদনের প্রধান উপাদানগুলি, যথা—বিভিন্ন কৃষি-জাত ও খনিজ সামগ্রী, যন্ত্রপাতি, কল-কারখানা, বিদ্যুৎশক্তি প্রভৃতির উপর একচেটিয়া অধিকার স্থাপন করিতে সমর্থ হইয়াছে। উৎপাদনের আবশ্যকীয় উপাদানগুলি ব্যতীত উৎপাদন অসম্ভব এবং এই উপাদানগুলি মুষ্টিমেয় মালিকশ্রেণীর করায়ত্ত বলিয়া শ্রমিকগণ মালিকশ্রেণীর নিকট তাহাদের শ্রম বিক্রয় করিতে বাধ্য হয়। শ্রম দ্বারা উৎপাদিত সামগ্রীর বিক্রয়লব্ধ মূল্যের সামান্য একটি অংশ মালিকগণ শ্রমিকদের পারিশ্রমিক হিসাবে প্রদান করিয়া অবশিষ্টাংশ তাহারা মুনাফা হিসাবে আত্মসাৎ করিয়া থাকে। মার্কসের মতে মুনাফা আইনসিদ্ধ চৌর্ধ্ববৃত্তি ব্যতীত আর কিছুই নহে, কেন না দ্রব্যমূল্য সম্পূর্ণরূপে নির্ভর করে প্রযুক্ত শ্রমের পরিমাণের উপর। যাহারা এই শ্রম প্রয়োগ করে, মালিকেরা তাহাদের দুর্বলতার স্বয়োগ লইয়া তাহাদিগকে তাহাদের প্রযুক্ত শ্রমের জাতীয় মূল্য অপেক্ষা কম মূল্য প্রদান করে। উৎপাদনের এই ব্যবস্থার ফলে সমাজে নূতন আকারে এক নূতন দাসত্বপ্রথার সৃষ্টি হইয়াছে। মুষ্টিমেয় মালিকশ্রেণী শ্রমিকদের শোষণ করিয়া অধিকতর ধনবান্ হইতেছে ও শ্রমিকগণ ক্রমশঃই অধিকতর নির্ধন হইয়া পড়িতেছে। কিন্তু এরূপ অসম ব্যবস্থা সমাজ-জীবনে চিরস্থায়ী হইতে পারে না। সমাজতন্ত্রবাদীরা বিশ্বাস করেন যে, এই ব্যবস্থার ফলে সমাজ-জীবনে এক স্ফূর্তপ্রসারী প্রতিক্রিয়া অবশস্তাবীরূপে দেখা দেয়, যাহার ফলে পুরাতন ব্যবস্থার আয়ুর্ল পরিবর্তন সাধিত হইয়া নূতন ব্যবস্থার আবির্ভাব হয়। ইতিহাসে এরূপ নজির দেখিতে পাওয়া যায়। এইজন্য মার্কস্ ইতিহাসের জড়বাদী ব্যাখ্যা প্রদান করিয়াছেন।

মার্কস্ বলেন, মানবজাতির ইতিহাস পর্যালোচনা করিলে দেখিতে পাওয়া যায় যে, মানুষের সামাজিক ও রাজনৈতিক জীবন তাহার অর্থ-নৈতিক জীবনের একটা প্রতিবিম্বমাত্র অর্থাৎ সামাজিক ও রাজনৈতিক

জীবনের কাঠামো অর্থনৈতিক ব্যবস্থার দ্বারা নির্ধারিত হয়। যে-কোন দেশের ইতিহাস আলোচনা করিলে দেখিতে পাওয়া যায় যে, সেই দেশের ঐতিহাসিক ঘটনাবলী সেই দেশের বিভিন্ন শ্রেণীগুলির মধ্যে সংগ্রামের ইতিহাসমাত্র। এই শ্রেণী-সংগ্রাম-ই (Class War) হইল মার্ক্স-প্রদত্ত ইতিহাসের জড়বাদী ব্যাখ্যার ভিত্তি। মার্ক্স বলেন, প্রত্যেক দেশে যে শ্রেণীবিভাগ ও শ্রেণীভেদ ছিল ইতিহাস তাহার সাক্ষ্য প্রদান করে। প্রাচীন রোমে প্যাট্রিসীয়, প্লিবিয় ও ক্রীতদাস শ্রেণীর অস্তিত্ব বিদ্যমান ছিল। মধ্যযুগে ভূম্যধিকারী অভিজাত ব্যারনশ্রেণী ও ভূমিহীন কৃষি ভূত্যশ্রেণী দেখা যায়। বর্তমান যুগে মালিক ও শ্রমিক এই দুই শ্রেণীতে সমাজ বিভক্ত। অতীত যুগে ধেরূপ প্যাট্রিসীয় ও ব্যারনশ্রেণী সমাজের সমস্ত স্বত্ব-স্ববিধার অধিকারী ছিল, বর্তমানেও সেইরূপ মুষ্টিমেয় মালিকশ্রেণী আধিপত্য ভোগ করে। বর্তমান সমাজের অর্থনৈতিক রূপ হইল ধনতান্ত্রিক; ফলে, সমাজ-জীবন ও রাজনৈতিক জীবনের কাঠামোও সেইরূপে গঠিত হইয়াছে। মুষ্টিমেয় ধনিক মালিক তাহাদের অর্থনৈতিক প্রভাব বিস্তার করিয়া সামাজিক ও রাজনৈতিক জীবনে একাধিপত্য প্রতিষ্ঠিত করিতে সমর্থ হইয়াছে। উৎপাদন, বিনিময় ও বণ্টন সমাজের সকল শ্রেণীর মঙ্গলের জন্য পরিচালিত না হইয়া মুষ্টিমেয় মালিকশ্রেণীর মুনাফাবৃদ্ধিকল্পে পরিচালিত হইতেছে। ফলে, সমাজ-জীবনে ও রাজনৈতিক জীবনে অন্তায় অত্যাচার ও বিশৃঙ্খলা দেখা দিয়াছে। এইরূপে যুগে যুগে শ্রেণীতে শ্রেণীতে অবিরাম সংগ্রাম চলিয়াছে। মার্ক্স আশাবাদী ছিলেন। তাই তিনি ভবিষ্যদ্বাণী করিয়াছেন যে, বর্তমান ধনতান্ত্রিক ব্যবস্থার মধ্যেই তাহার ধ্বংসের বীজ উপ্ত আছে। কালক্রমে বিত্তবান্ ও বিত্তহীন শ্রেণীর মধ্যে বৈষম্য ধ্বংস চরম সীমায় উপস্থিত হইবে তখন বিত্তহীনেরা সংঘবদ্ধ হইয়া বিত্তবানের অন্তায় ও অত্যাচারের বিরুদ্ধে যে চরম আঘাত হানিবে সেই আঘাতের ফলে ধনতন্ত্রের বিনাশ ঘটিবে।

মার্ক্সীয় মতবাদের সমালোচনা (Criticism of Marxian Socialism)

মার্ক্সীয় মতবাদের বহু বিরুদ্ধ সমালোচনা হইয়াছে। সমালোচনাগুলির সারাংশ নিম্নে প্রদত্ত হইল। বর্তমান যুগের ধনবিজ্ঞানিগণ তাহার উদ্ভূত-

মূল্য-স্বত্বের অসারতা প্রমাণ করিতে সমর্থ হইয়াছেন। বর্তমান যুগের ধর্মবিজ্ঞানিগণ বলেন, 'শ্রম' শব্দটির অর্থ অস্পষ্ট। কারণ, এরূপ বিভিন্ন ধরনের শ্রম আছে যাহাদিগকে এক পর্যায়ভুক্ত করিয়া এক মাপকাঠিতে তাহাদের মূল্য নির্ধারণ করা সম্ভব নয়। যদি বলা হয় যে, সামাজিক উপযোগিতা-সম্পন্ন শ্রমই হইল প্রকৃত শ্রম, তাহা হইলেও এই জাতীয় শ্রমের মূল্য নির্ধারণ করা সহজসাধ্য নয়, কারণ অধিকতর সামাজিক উপযোগিতা-সম্পন্ন হইলেও চাহিদার তীব্রতা না থাকিলেও সে শ্রমের মূল্য অধিক হইতে পারে না। দ্বিতীয়তঃ, দ্রব্যমূল্য-নির্ধারণে যোগান বা সরবরাহের প্রভাব আদৌ উপেক্ষণীয় নহে। দ্রব্যের সরবরাহ দ্রব্যটির সহজ-প্রাপ্যতা অথবা দুশ্চাপ্যতার উপর নির্ভর করে। যে দ্রব্য যত অধিক দুশ্চাপ্য বা মূল্যবান, তাহা যে অধিক শ্রমপ্রয়োগের দ্বারা উৎপাদিত হয় তাহা সকল সময় সত্য নয়। সুতরাং একটি দ্রব্য-সরবরাহ যে-সমস্ত শক্তির দ্বারা পরিচালিত হইতেছে, সেগুলিকে মার্কসীয় সূত্র সম্পূর্ণরূপে উপেক্ষা করে। তৃতীয়তঃ, দ্রব্যমূল্য যে সম্পূর্ণরূপে দ্রব্য-উৎপাদনের প্রযুক্ত শ্রমের পরিমাণের উপর নির্ভর করে, ইহাও গ্রহণযোগ্য নহে। প্রতিযোগিতার হ্রাস-বৃদ্ধি, মূলধন-সঞ্চয়ের পরিমাণ, উৎপাদনের অনিশ্চয়তা ও ঝুঁকির পরিমাণ প্রভৃতি নানা বিষয় মূল্যনির্ধারণে প্রভাব বিস্তার করে।

মার্কস-প্রবর্তিত ইতিহাসের জড়বাদী ব্যাখ্যার নানারূপ বিরুদ্ধ সমালোচনা হইয়াছে। মানুষের সামাজিক ও রাজনৈতিক ইতিহাসের দ্বারা যে একমাত্র অর্থনৈতিক উদ্দেশ্য দ্বারা প্রভাবিত হইয়াছে, এ কথা বলিলে সত্যের অশ্লাপ হয়। মানুষ শুধু তাহার ক্ষুধার্ত্তির জন্ত জীবনধারণ করে না, আরও মহত্তর উদ্দেশ্যসাধনের নিমিত্ত মানুষ যুগে যুগে বিরুদ্ধ অবস্থার সহিত সংগ্রাম করিয়া আসিতেছে। মার্কস মানব-ইতিহাসের শুধু দ্বন্দ্ব ও ধ্বংসাত্মক কার্যকলাপের দিকটাই দেখিয়াছেন, কিন্তু মানুষ এই দ্বন্দ্ব ও ধ্বংসের মধ্য দিয়া কিরূপভাবে গঠনমূলক কার্য দ্বারা ধীরে ধীরে প্রগতির পথে অগ্রসর হইতেছে, সে সম্বন্ধে তিনি সম্পূর্ণ উদাসীন ছিলেন। মহাপুরুষগণের আবির্ভাব, ধর্মসংগঠনের অভ্যুত্থান ও ভৌগোলিক পরিবেশ দ্বারা মানবজাতির ইতিহাসের দ্বারা যে বহুল পরিমাণে প্রভাবিত হইয়াছে ইহা অনস্বীকার্য। এতদ্ব্যতীত মার্কস ভবিষ্যদ্বাণী করিয়াছিলেন যে, বর্তমান ধনতান্ত্রিক সমাজব্যবস্থার উচ্ছেদ

অবশ্যজ্ঞাবী। কিন্তু তাঁহার এই ভবিষ্যদ্বাণী সত্য বলিয়া প্রমাণিত হয় নাই বা সত্য বলিয়া প্রমাণিত হইবার প্রয়োজনও নাই। বর্তমানে ধনতান্ত্রিক ব্যবস্থার যে সমস্ত দোষ-ত্রুটি দেখা যায়, সে সমস্ত দোষ-ত্রুটি রাষ্ট্রনিয়ন্ত্রণ দ্বারা বহুল পরিমাণে দূর করা সম্ভব হইয়াছে এবং অনেক দেশে নিছক ধনতান্ত্রিক ব্যবস্থা বা নিছক সমাজতান্ত্রিক ব্যবস্থার পরিবর্তে উভয়ের সমন্বয়ে প্রয়োজনো-
 ক্তরূপ মিশ্র ব্যবস্থার প্রবর্তনে অনেক সফল পাওয়া গিয়াছে। এমন কি, মার্কসীয় নীতিতে পূর্ণ আত্মবান্ সোভিয়েত যুক্তরাষ্ট্রেও মার্কসীয় সমাজতন্ত্র-
 বাদ অক্ষরে অক্ষরে অনুসৃত হয় নাই।

মার্কসীয় মতবাদ সম্পূর্ণরূপে গ্রহণযোগ্য না হইলেও এ-কথা সত্য যে, মার্কস তাঁহার উদ্ভূত-মূল্যতত্ত্ব প্রচার দ্বারা শ্রমজীবীগণকে তাহাদের ভ্রাতৃত্ব অধিকার সম্বন্ধে সচেতন করিয়া সম্মিলিত প্রচেষ্টার দ্বারা তাহাদের অধিকার প্রতিষ্ঠিত করিতে সহায়তা করেন। মার্কসের ইতিহাসের জড়বাদী ব্যাখ্যা আদৌ গ্রহণযোগ্য নয়। তথাপি এ-কথা মানিয়া লইতে হইবে যে, মার্কসের অর্থনৈতিক প্রয়োজনজনিত কর্মপ্রচেষ্টা মার্কসের ইতিহাসের গতিকে অনেক পরিমাণে সূনির্দিষ্ট করিয়াছে। শ্রমিকেরা যে মালিকগণ কর্তৃক পূর্বে শোষিত ও নিৰ্ব্বাচিত হইত এবং শ্রমিকেরা সংঘবদ্ধ হইয়া এই নিৰ্ব্বাচন ও শোষণ প্রতিরোধ করিতে বর্তমানে সমর্থ হইয়াছে, ইহাও অনস্বীকার্য।

মার্কসের পরবর্তী সমাজতন্ত্রবাদিগণ মার্কসের সমাজতন্ত্রবাদের বিভিন্ন ব্যাখ্যা ও টীকা করিয়াছেন। তাহার ফলে মার্কসীয় নীতি নূতন নূতন রূপ পরিগ্রহ করিয়াছে। এই নূতন ব্যাখ্যা দ্বারা প্রধানতঃ দুই জাতীয় সমাজতন্ত্র-
 বাদের উদ্ভব হইয়াছে, যথা—বিবর্তনমূলক সমাজতন্ত্রবাদ (Evolu-
 tionary Socialism) ও বিপ্লবপন্থী সমাজতন্ত্রবাদ (Revolutionary
 Socialism)। বিবর্তনমূলক সমাজতন্ত্রবাদের সমর্থকগণ সমষ্টিপ্রধান সমাজ-
 তন্ত্রবাদী ও রাষ্ট্রপ্রধান সমাজতন্ত্রবাদী বলিয়া পরিচিত; অপরপক্ষে বিপ্লব-
 পন্থীদের অ-রাষ্ট্রতন্ত্রী সমাজতন্ত্রবাদী, সমিতিপ্রধান সমাজতন্ত্রবাদী ও
 সাম্যবাদী বলা হয়।

৩। সমষ্টিপ্রধান সমাজতন্ত্রবাদ (Collectivism)

সমষ্টিপ্রধান সমাজতন্ত্রবাদিগণ উৎপাদনের উপাদানগুলির সম্পূর্ণ রাষ্ট্রায়ত্ত-

করণ দাবী করেন। ইঁহারা বলপ্রয়োগ নীতি পরিহার করিয়া নিয়মতান্ত্রিক উপায়ে বর্তমান ধনতান্ত্রিক ব্যবস্থার পরিবর্তনসাধন করিয়া সমাজতান্ত্রিক ব্যবস্থা প্রবর্তন করিবার পক্ষপাতী। ইঁহাদের মতে উৎপাদন ও বণ্টনব্যবস্থা সম্পূর্ণরূপে রাষ্ট্র কর্তৃক নিয়ন্ত্রিত হইবে; অপরপক্ষে বিনিময় ও ভোগব্যবস্থা ধনতান্ত্রিক ব্যবস্থার অঙ্গরূপ হইবে। তাঁহাদের মতে সমাজে বিশেষ স্ববিধা-ভোগী কোন শ্রেণী থাকিতে পারিবে না। সমষ্টিপ্রধান সমাজতন্ত্রবাদীরা আইনসভা-প্রধান গণতন্ত্রে বিশ্বাসী ও গণতান্ত্রিক শাসনব্যবস্থার মধ্য দিয়াই তাঁহারা বিত্তহীন শ্রমিকশ্রেণীর উন্নতিসাধন করিবার পক্ষপাতী।

৪। রাষ্ট্রপ্রধান সমাজতন্ত্রবাদ (State Socialism)

জার্মান লেখকগণ সমষ্টিপ্রধান সমাজতন্ত্রবাদকে রাষ্ট্রপ্রধান সমাজতন্ত্রবাদ আখ্যা প্রদান করিয়াছেন। মূলতঃ, উভয় মতবাদের মধ্যে বিশেষ কোন পার্থক্য নাই। শ্রমিকেরা তাহাদের স্বার্থসংরক্ষণ করিতে অক্ষম, সুতরাং রাষ্ট্রপ্রধান সমাজতন্ত্রবাদীরা রাষ্ট্রকেই শ্রমিকশ্রেণীর স্বার্থের প্রধান রক্ষক বলিয়া বিবেচনা করেন। এইজন্য তাঁহারা উৎপাদন ও বণ্টনব্যবস্থা সম্পূর্ণরূপে রাষ্ট্রের হস্তে হস্ত করিবার পক্ষপাতী। বৃদ্ধবয়সের ভাতা, শ্রমিক-জীবনবীমা, কারখানা-সংক্রান্ত আইন প্রভৃতি শ্রমিক-কল্যাণকর নানাবিধ আইন প্রবর্তন করিয়া শ্রমিকের কল্যাণসাধন করা রাষ্ট্রের অবশ্য কর্তব্য বলিয়া তাঁহারা বিবেচনা করেন।

৫। ক্রমবিবর্তমান সমাজতন্ত্রবাদ (Fabian Socialism)

জর্জ বার্ণাড শ' প্রভৃতি কতিপয় ইংরাজ মনস্বীর হস্তে সমাজতন্ত্রবাদ এক নূতন রূপ পরিগ্রহ করে। সমষ্টিপ্রধান সমাজতন্ত্রবাদীদের মত ইঁহারাও জ্বরদত্তিমূলক উপায় দ্বারা সমাজতান্ত্রিক ব্যবস্থা প্রবর্তনের বিরোধিতা করেন। তাঁহাদের মতে সাহিত্যপ্রচারের মধ্য দিয়া জনমতকে গুণশিক্ষিত করিয়া ধীরে ধীরে সমাজতান্ত্রিক ব্যবস্থা প্রবর্তন করা অধিকতর সমীচীন। এইজন্য ক্রমবিবর্তমান সমাজতন্ত্রবাদীরা নূতন এক ধরনের সাহিত্য সৃষ্টি করিয়া শাস্তিপূর্ণ উপায়ে ধনতন্ত্রের বিরুদ্ধে অভিযান পরিচালনা করিয়াছেন। সাহিত্যের মধ্য দিয়া এই অভিযানের ফলে ইংলণ্ডের জনমত কিছু পরিমাণে

খনতন্ত্র-বিরোধী মনোভাবাপন্ন হইয়া উঠিয়াছে। ক্রমবিবর্তমান সমাজতন্ত্র-বাদীরা অবশ্য সাহিত্যের মারফত প্রচারকার্য ছাড়া সক্রিয়ভাবে রাজনীতিতে যোগদান করেন নাই। ইংলণ্ডের শ্রমিকদল ক্রমবিবর্তমান সমাজতন্ত্রবাদী কর্তৃক প্রবর্তিত অনেকগুলি নীতি কার্যকরী করিয়াছেন।

৬। খৃষ্টীয় সমাজতন্ত্রবাদ (Christian Socialism)

খৃষ্টীয় সমাজতন্ত্রবাদীরা প্রতিযোগিতার পরিবর্তে সহযোগিতার ভিত্তিতে সমাজব্যবস্থার পুনর্গঠন করিবার পক্ষপাতী। তাঁহারা বলেন, শ্রমিকশ্রেণীর দুঃস্থতার প্রধান কারণ হইল প্রতিযোগিতা। তাই তাঁহারা প্রতিযোগিতা-মূলক ব্যবস্থার অবসান ঘটাইয়া শ্রমিকদের মধ্যে সমবায়-পদ্ধতিতে উৎপাদন-ব্যবস্থা প্রবর্তন করিবার পক্ষে মত পোষণ করেন।

৭। অ-রাষ্ট্রতন্ত্রী সমাজতন্ত্রবাদ (Syndicalism)

এই মতবাদ তিনটি মূলস্তরের উপর প্রতিষ্ঠিত। প্রথমতঃ, শ্রমই হইল ধনোৎপাদনের একমাত্র উপাদান। দ্বিতীয়তঃ, কৃষি, শিল্প প্রভৃতি উৎপাদনের উপায়গুলির মালিকানার অধিকারী হইল শ্রমিকেরা। তৃতীয়তঃ, এই মালিকানাধ্বংস-সাধের জন্য ধর্মঘট প্রভৃতি ধ্বংসাত্মক কার্য গ্রহণসম্মত। অ-রাষ্ট্রতন্ত্রী সমাজতন্ত্রবাদীরা শ্রমিকসংঘের উপর বিশেষ গুরুত্ব আরোপ করেন। তাঁহারা ধ্বংসাত্মক কার্যপদ্ধতির দ্বারা বর্তমান ধনতান্ত্রিক ব্যবস্থার অবসান ঘটাইয়া শ্রমিকসংঘের আধিপত্য প্রতিষ্ঠিত করিতে বদ্ধপরিকর। ইহারা রাষ্ট্রের কর্মদক্ষতায় আদৌ বিশ্বাসী নহেন, সেইজন্য ইহারা শ্রমিক-শ্রেণীর দ্বারা পুনঃপুনঃ সর্বাঙ্গিক ধর্মঘট চালাইয়া রাষ্ট্রসংগঠনকে বিপর্যস্ত করিবার পক্ষপাতী। রাষ্ট্রের ধ্বংসসাধন করিয়া ইহারা মানুষের সামাজিক, রাজনৈতিক ও অর্থনৈতিক জীবনকে একমাত্র শ্রমিকসংঘের নিয়ন্ত্রণাধীনে আনিবার প্রয়াস পাইয়া থাকেন। এই মতবাদ ফরাসী দেশে প্রাধান্য লাভ করে।

৮। সমিতিপ্রধান সমাজতন্ত্রবাদ (Guild Socialism)

সমিতিপ্রধান সমাজতন্ত্রবাদ ও অ-রাষ্ট্রতন্ত্রী সমাজতন্ত্রবাদের সমন্বয়সাধন করিয়া সমিতিপ্রধান সমাজতন্ত্রবাদিগণ সমাজতন্ত্রবাদের এক নতুন ব্যাখ্যা

প্রদান করিয়াছেন। ইঁহারা রাষ্ট্রের কর্মক্ষমতায় আদৌ আস্থা বান্ না হইলেও অ-রাষ্ট্রতন্ত্রী সমাজতন্ত্রবাদীদের মত রাষ্ট্রকে সম্পূর্ণরূপে বিলুপ্ত করিতে চাহেন না। তাঁহারা সমাজস্থিত বিভিন্ন সংগঠনগুলির উপর বিশেষ গুরুত্ব আরোপ করেন। তাঁহারা উৎপাদনব্যবস্থার জাতীয়করণ স্বীকার করিলেও রাষ্ট্রের কর্মক্ষমতার অভাবের নিমিত্ত উৎপাদনব্যবস্থা রাষ্ট্রের হস্তে ন্যস্ত না করিয়া শ্রমিক, পরিচালক ও কারিগর লইয়া গঠিত সমিতিগুলির হস্তে ন্যস্ত করিবার পক্ষপাতী। অর্থনৈতিক উদ্দেশ্যসাধনের নিমিত্ত সংগঠিত সমিতিগুলি ছাড়াও ইঁহারা সমাজের অন্ত নানাবিধ সমিতিগুলির উপযোগিতা স্বীকার করেন। তাঁহারা বলেন, অর্থনৈতিক সমিতিগুলির এবং সামাজিক অন্তান্ত সমিতিগুলির সহযোগিতায় মানবজীবনের সর্বাঙ্গীণ মঙ্গলসাধন সম্ভব হয়। তাঁহাদের মতে রাষ্ট্রের হস্তে অর্থনৈতিক ব্যবস্থা পরিচালনা করিবার ক্ষমতা কেন্দ্রীভূত হইলে অর্থনৈতিক জীবনে বিশৃঙ্খলা, দুর্নীতি ও অযোগ্যতা বৃদ্ধি পায়। এইজন্য তাঁহারা অর্থনৈতিক ব্যবস্থা পরিচালনা করিবার ক্ষমতা বণ্টন করিয়া সমিতিগুলির হস্তে প্রদান করিতে ইচ্ছুক। জনসাধারণের স্বার্থসংরক্ষণের জন্ত রাষ্ট্রের কর্তব্য হইল এই সমিতিগুলির কার্যের উপর সতর্ক দৃষ্টি রাখা। এইরূপে ক্ষমতার বিকেন্দ্রীকরণ দ্বারা তাঁহারা প্রকৃত গণতন্ত্র প্রতিষ্ঠিত করিতে চেষ্টা করেন।

৯। সাম্যবাদ (Communism)

সাম্যবাদিগণ তাঁহাদের পরিকল্পিত নির্দিষ্ট সমাজব্যবস্থা প্রবর্তন করা অপেক্ষা তাঁহাদের উদ্দেশ্যসাধনের নিমিত্ত প্রয়োজনীয় কর্মপদ্ধতির উপর অধিক গুরুত্ব আরোপ করেন। সাম্যবাদিগণ তাঁহাদের দল পুষ্টি করিবার জন্য পৃথিবীর প্রত্যেক দেশে সাম্যবাদী দল গঠন করিয়া ধীরে ধীরে সমাজের সর্বক্ষেত্রেই আধিপত্য বিস্তার করিবার চেষ্টা করেন। এক্ষেপে সংখ্যাগরিষ্ঠতা লাভ করিবার পর তাঁহারা বলপ্রয়োগপূর্বক ধনিক ও মালিকশ্রেণীকে উৎখাত করিয়া কৃষক, শ্রমিক, দৈনিক প্রভৃতি বিভবহীনের রাষ্ট্র প্রতিষ্ঠিত করা তাঁহাদের প্রধান উদ্দেশ্য বলিয়া ঘোষণা করেন। শ্রমিকরাজ প্রতিষ্ঠিত হইলে রাষ্ট্রীয় ক্ষমতা প্রয়োগ করিয়া সাম্যবাদিগণ ধনিক মালিকশ্রেণীকে নিমূল করিয়া সমস্ত বিরোধিতার অবসান ঘটাইবার জন্য বদ্ধপরিকর। ইঁহারা

ফলে এমন এক নূতন শ্রেণীহীন সমাজব্যবস্থা গড়িয়া উঠিবে যেখানে উচ্চ-নীচ, ধনি-দরিদ্র প্রভৃতির কোন পার্থক্য থাকিবে না। শ্রেণীহীন যে নূতন সমাজব্যবস্থা গঠিত হইবে তাহাতে কি উৎপাদনে, কি ভোগে কোনরূপ ব্যক্তিগত মালিকানার অস্তিত্ব থাকিবে না। প্রত্যেকে তাহার সাধামত পরিশ্রম করিবে, কিন্তু প্রয়োজনানুযায়ী পারিশ্রমিক পাইবে। মানুষের সমগ্র জীবন রাষ্ট্র কর্তৃক নিয়ন্ত্রিত হইবে। প্রত্যেক ব্যক্তিই রাষ্ট্রের কর্মচারী হিসাবে তাহার নির্ধারিত কাৰ্য সম্পাদন করিবে ও রাষ্ট্রনির্ধারিত একটা নির্দিষ্ট মান অনুসারে তাহার খাদ্য, পরিধেয় ও বাসস্থানের ব্যবস্থা হইবে। সুস্থানসমুদায়গণের রক্ষণাবেক্ষণ ও শিক্ষা সম্পূর্ণরূপে রাষ্ট্র কর্তৃক পরিচালিত হইবে। উৎপাদন, বিনিময়, বণ্টন ও ভোগব্যবস্থা রাষ্ট্র কর্তৃক একরূপভাবে নিয়ন্ত্রিত হইবে যে, সাম্যবাদী সমাজব্যবস্থায় বেকারসমষ্টি, বাণিজ্যচক্র বা শ্রমিক-মালিক বিরোধের চিরতরে অবসান ঘটিবে। একরূপ ব্যবস্থায় অর্থের মাধ্যমে কোনরূপ বিনিময়ের প্রয়োজন হইবে না, হুতরাং দ্রব্যমূল্য নির্ধারণ করিবার কোন আবশ্যিকতা অনুভূত হইবে না। অর্থনৈতিক জীবন সম্পূর্ণরূপে রাষ্ট্রায়ত্ত্ব হইলে মানুষ আর মুনাফার লোভে ধনোৎপাদন করিবে না। এইরূপে সমাজব্যবস্থায় পূর্ণ সাম্যবাদ প্রতিষ্ঠিত হইলে রাষ্ট্রের আর কোন প্রয়োজনীয়তা থাকিবে না। সাম্যবাদী ব্যবস্থার দ্বারা মানুষ স্বাধীন ও স্বাবলম্বী হইলে রাষ্ট্রসংগঠন বিলীন হইবে।

শেষ পর্যন্ত রাষ্ট্রের প্রয়োজনীয়তা অস্বীকার করিলেও সাম্যবাদিগণ অ-রাষ্ট্রতত্ত্বীদের দ্বারা রাষ্ট্রকে অচিরাতঃ ধ্বংস করিবার পক্ষপাতী নহেন। সাম্যবাদিগণ মনে করেন, বর্তমান রাষ্ট্রসংগঠনের শক্তির সাহায্যে সাম্যবাদী ব্যবস্থা সুপ্রতিষ্ঠিত হইবার ফলে মানুষ যখন পূর্ণ-সমাজচেতনাসম্পন্ন হইবে, তখন রাষ্ট্র স্বয়ংক্রিয় পদ্ধতিতে বিলুপ্ত হইবে। মানুষ হিতাহিত-জ্ঞানসম্পন্ন হইলে বহিনিয়ন্ত্রণের আর কোন প্রয়োজন অনুভূত হইবে না। সমাজতত্ত্ব-বাদিগণ শুধু উৎপাদন ও বণ্টনের ক্ষেত্রে রাষ্ট্রনিয়ন্ত্রণের পক্ষপাতী, কিন্তু সাম্যবাদিগণ মানুষের সামাজিক ও অর্থনৈতিক জীবনের সর্বক্ষেত্রে রাষ্ট্র-নিয়ন্ত্রণ প্রবর্তনের উগ্র সমর্থক। সাম্যবাদিগণ ব্যক্তিগত সম্পত্তি ও পারিবারিক জীবন উভয়েরই বিনাশসাধন করিয়া সাম্যবাদ প্রতিষ্ঠার প্রথম পর্যায়ে ব্যক্তিকে রাষ্ট্রদেবতার বেদীমূলে উপহার দিবার পক্ষপাতী।

মার্কসীয় মতবাদ ও পরবর্তী কালে লেনিন-প্রদত্ত মার্কসীয় মতবাদ বিশ্লেষণ করিলে দেখা যায় যে, এই উভয় চিন্তাবীরই সাম্যবাদী সমাজব্যবস্থাকে দুইটি স্তরে ভাগ করিয়াছেন। প্রথমটি হইল বিপ্লব যুগ (Revolutionary Stage) এবং দ্বিতীয়টি হইল বিপ্লবোত্তর যুগ (Post-Revolutionary Stage)। বিপ্লব যুগে ধনিকশ্রেণীকে উৎখাত করিয়া শ্রমিকরাজ প্রতিষ্ঠিত হইবে। এই যুগে রাজনৈতিক ক্ষমতা প্রয়োগ করিয়া শ্রমিকগণ ধনিকশ্রেণীর নিকট হইতে বলপূর্বক সমৃদ্ধ রাজনৈতিক ও অর্থনৈতিক ক্ষমতা হস্তগত করিবে। এই অবস্থায় প্রকৃত কোন গণতান্ত্রিক ব্যবস্থা প্রবর্তিত হইতে পারে না। রাষ্ট্র শুধুমাত্র শ্রমিকশ্রেণীর রক্ষক হইবে। কাজ অহুসারে বেতন নির্ধারিত হইবে এবং নির্ধারিত বেতন অর্থের মাধ্যমে প্রদত্ত হইবে। এইরূপে ক্রমশঃ ধনতন্ত্রের অবসান ঘটিবার ফলে এক নূতন শ্রেণীহীন সমাজব্যবস্থা গড়িয়া উঠিবে, যেখানে প্রত্যেক মানুষ তাহার পরিশ্রমলব্ধ আয় হইতে বঞ্চিত হইবে না। উৎপাদন, বিনিময় ও বণ্টনব্যবস্থা কোন শ্রেণী-বিশেষের দ্বারা পরিচালিত না হইয়া রাষ্ট্র কর্তৃক সর্বজনের হিতার্থে পরিচালিত হইবে। এই শ্রেণীহীন অবস্থাকে বিপ্লবোত্তর যুগ বলা হইয়াছে। এই অবস্থায় প্রত্যেকে সামর্থ্যানুসারে কাজ করিবে ও প্রয়োজনানুযায়ী পারিশ্রমিক পাইবে। রাষ্ট্রায়ত্ত উৎপাদন ও বণ্টনব্যবস্থায় অর্থের বিনিময়ে পারিশ্রমিক প্রদানের প্রথা বিলুপ্ত হইবে। এইরূপে পূর্ণ সাম্যবাদ প্রতিষ্ঠিত হইলে রাষ্ট্র স্বয়ংক্রিয় পদ্ধতিতে লোপ পাইবে।

সোভিয়েত যুক্তরাষ্ট্রের সাম্যবাদ (Bolshevism or Communism in the U. S. S. R.)

একমাত্র সোভিয়েত যুক্তরাষ্ট্রে সাম্যবাদের প্রত্যক্ষ ও সক্রিয় অভিব্যক্তি দেখা যায়। সোভিয়েত যুক্তরাষ্ট্রের সাম্যবাদী ব্যবস্থা সম্পূর্ণরূপে মার্ক্স-প্রবর্তিত নীতির উপর প্রতিষ্ঠিত। উদ্ভূতযুলোর সূত্র ও শ্রেণীসংগ্রামের পরিপ্রেক্ষিতে ইতিহাসের জড়বাদী ব্যাখ্যা প্রদান করিয়া মার্ক্স সমাজতন্ত্রবাদের যে অভিনব রূপ দিয়াছিলেন, রুশীয় সমাজতন্ত্রবাদিগণ নিবিচারে তাহা গ্রহণ করিয়া সাম্যবাদের গোড়াপত্তন করেন।

১৯১৭ খৃষ্টাব্দের বিপ্লবের পর রুশীয় সাম্যবাদিগণ পূর্বতন সমাজব্যবস্থার ধ্বংসসাধন করিয়া এক অভিনব ব্যবস্থার প্রবর্তন করেন। তাঁহারা বল-

প্রয়োজে জারতন্ত্রের সহিত সামন্ততান্ত্রিক অভিজাতশ্রেণী ও ধনিকশ্রেণীর সম্পূর্ণ বিলোপ সাধন করিয়া যে শ্রমিকরাজ প্রতিষ্ঠিত করিলেন তাহা মাম্ব্বের আধ্যাত্মিক, অর্থনৈতিক ও পারিবারিক জীবনকে সমগ্রভাবে নিয়ন্ত্রিত করিতে প্রয়াস পাইল। রাষ্ট্রীয় ক্ষমতা হস্তগত করিবার পর কৃষীয় সাম্যবাদীগণ মার্কস-প্রবর্তিত নীতিকে অঙ্কভাবে অনুসরণ করিতে আরম্ভ করিলেন। জমি-জায়গা, কল-কারখানা, খনি, রেলপথ, বিদ্যুৎশক্তি প্রভৃতি উৎপাদনের উপাদানগুলিকে রাষ্ট্রায়ত্ত্ব করা হইল। রাষ্ট্রায়ত্ত্বকরণের ফলে কিছুদিনের পরে দেশের উৎপাদনের পরিমাণ কমিয়া গেল, কারণ কৃষকশ্রেণী তাহাদের প্রয়োজনের অতিরিক্ত পরিমাণ শস্ত উৎপাদনে বিরত থাকিল। ইহা ছাড়া, নবগঠিত সরকার পূর্বতন সংগঠক ও কারিগরদের সহযোগিতা-লাভে বঞ্চিত হইল। বিদেশ হইতেও প্রয়োজনের অমুরূপ উৎপাদনের সহায়ক সামগ্রী আমদানি করিবার সম্ভাবনা রহিল না। ফলে, উৎপাদন-ব্যবস্থায় এরূপ বিশৃঙ্খলা দেখা দিল যে, সাম্যবাদীগণ তাহাদের অনুমত নীতি পরিবর্তন করিতে বাধ্য হইলেন। অর্থনৈতিক ক্ষেত্রে তাহারা উৎপাদন বৃদ্ধির উদ্দেশ্যে এক নববিধান প্রবর্তন করিয়া একটা নির্দিষ্ট গতির মধ্যে ব্যক্তিগত মালিকানার পুনঃপ্রবর্তন করিলেন।

১৯২৮ খৃষ্টাব্দ হইতে কৃষীয় সাম্যবাদের এক নূতন অধ্যায় আরম্ভ হয়। এই সময় হইতে স্ট্যালিনের নেতৃত্বাধীনে অতিকায় বহরে কৃষি ও শিল্পের উন্নতির জন্য পঞ্চবার্ষিকী পরিকল্পনা গ্রহণ করা হয়। কৃষির উন্নতির জন্য বৃহদায়তনের যৌথ কৃষিক্ষেত্র স্থাপিত হয়। কৃষকদের আপত্তি সত্ত্বেও অনেক-ক্ষেত্রে নির্মমভাবে তাহাদিগের জমি-জায়গা ও গৃহপালিত পশু-পক্ষিসহ এই যৌথ-কৃষিক্ষেত্রে যোগদান করিতে বাধ্য করা হয়। এইরূপে পর পর কয়েকটি পঞ্চবার্ষিকী পরিকল্পনা দ্বারা সাম্যবাদীগণ কৃষি এবং ক্ষুদ্র ও বৃহৎ শিল্পের অজুতপূর্ব উন্নতিসাধন করিয়া দেশকে বহুল পরিমাণে স্বাবলম্বী করিয়া তুলিতে সমর্থ হইলেন। দেশে অন্ন, বস্ত্র, বাসস্থান ও শিক্ষার অভাব অনেক পরিমাণে হ্রাস পাইল। কৃষি, শিল্প, বাণিজ্য প্রভৃতি রাষ্ট্র নিয়ন্ত্রিত হইবার ফলে বেকার-সমস্যা, বাণিজ্যচক্র, শ্রমিক-মালিক বিরোধ প্রভৃতি ধনতান্ত্রিক ব্যবস্থার অনিবার্য কুফলগুলি দূর হইয়া জাতীয় জীবনের মান অনেক পরিমাণে উন্নত হইল। বহুদিনব্যাপী অগ্রাঘ, অত্যাচার, অশিক্ষা ও কুসংস্কারের ফলে কৃষ-

জাতির মেরুদণ্ড ভাঙিয়া পড়িয়াছিল ; সাম্যবাদিগণ রাষ্ট্রপ্রবর্তিত সার্বজনীন শিক্ষার প্রসার করিয়া জাতীয় চিন্তাধারার আমূল পরিবর্তন সাধন করিলেন । শিক্ষাবিস্তারের ফলে জাতীয় জীবন যখন কুসংস্কারমুক্ত হইয়া স্বাধীন ও সাবলীল হইল তখন সাম্যবাদিগণ এই নতনভাবে অল্পপ্রাণিত জনগণের সাহায্যে গঠনমূলক কার্যে আত্মনিয়োগ করিয়া অতি অল্পকালের মধ্যে কৃষি, শিল্প, ব্যবসায়, বাণিজ্য, বিজ্ঞান, কলা, চিত্রাঙ্কন, স্থাপত্যবিদ্যা, খেলাধুলা প্রভৃতি নানা বিষয়ে এরূপ অভূতপূর্ব উন্নতিসাধন করিলেন যে, শত্রু-মিত্র সকলেই চমৎকৃত হইল । জাতীয় জীবনের সর্বাদীণ উৎকর্ষসাধন করিবার উদ্দেশ্যে সাম্যবাদিগণকে অনেক নিষ্ঠুর ও নির্মম আচরণ করিতে হইয়াছে । সাম্যবাদী নীতিতে আত্মহীন বিরোধী পক্ষকে বর্বরোচিত পদ্ধতিতে অপসারিত করা হইয়াছে । উদ্দেশ্যসাধনের সহায়ক বিবেচিত হইলে যে-কোন পদ্ধতি অবলম্বন করিতে তাহারা দ্বিধাবোধ করেন নাই । প্রচলিত লোকধর্ম ও নীতিজ্ঞানকে সম্পূর্ণ বিসর্জন দিয়া সাম্যবাদিগণ জাতীয় জীবনে যে নতন অধ্যায়ের সূচনা করিলেন, তাহা ভ্রগতের ইতিহাসে বিরল বলিলেও অত্যুক্তি হয় না । প্রাথমিক পর্যায়ে ধ্বংসাত্মক কার্যপদ্ধতির পর সাম্যবাদিগণ গঠন-মূলক কার্যে আত্মনিয়োগ করিয়া জাতীয় জীবন যখন নানাভাবে সমৃদ্ধ করিতে লাগিলেন তখন জনসাধারণ ধীরে ধীরে সাম্যবাদের মূল নীতির প্রতি আস্থাবান হইয়া সরকারের সহিত সহযোগিতা আরম্ভ করিল । যৌথ কৃষিক্ষেত্রে যোগদান করিতে প্রথমতঃ কৃষকগণ আপত্তি করিয়াছিল, কিন্তু যৌথ কৃষিক্ষেত্রের উপযোগিতা যখন তাহারা হৃদয়ঙ্গম করিল তখন তাহারা স্বেচ্ছায় দলে দলে ইহাতে যোগদান করিল । এইরূপে একদিকে বলপ্রয়োগ ও অত্যাধিক শিক্ষাবিস্তারের দ্বারা সাম্যবাদিগণ জনসাধারণকে যে শুধু রাষ্ট্রের আহুগত্য স্বীকার করিতে শিক্ষা দিয়াছেন তাহা নয়, পরন্তু জনসাধারণের মধ্যে এক স্বাভাবিক সমাজচেতনা ও গভীর দেশাত্মবোধের উন্মেষ করিয়া সৃষ্টি ও সবলকায় ব্যক্তিত্বের বিকাশ সম্ভব করিয়াছেন ।

মার্কসীয় নীতি ও রুশীয় সাম্যবাদী নীতির পার্থক্য (Difference between Marxian Socialism and Russian Communism)

মার্কসের যতবাদ দ্বারা অল্পপ্রাণিত হইলেও পরবর্তী কালে রুশীয় সাম্যবাদিগণ বাস্তবক্ষেত্রে মার্কসের নীতিকে বহুল পরিমাণে বর্জন করিতে

বাধ্য হইয়াছেন। নির্দিষ্ট সীমার মধ্যে ব্যক্তিগত মালিকানা ও পারিবারিক সংগঠনকে তাঁহারা সম্পূর্ণরূপে বিলোপ করিতে পারেন নাই। বিনিময়ক্ষেত্রে দ্রব্যমূল্য অর্থের দ্বারা নির্ধারিত হয় এবং বিভিন্ন ধরনের পরিশ্রমের মজুরি নির্ধারিত হয় প্রযুক্ত শ্রমের দুপ্রাপ্যতা ও দক্ষতার দ্বারা। সাধারণ শ্রমিক জীবনধারার উপযোগী একটা নির্দিষ্ট মান অমুখ্যায়ী পারিশ্রমিক পাইলেও পারিশ্রমিকের পার্থক্য সোভিয়েত রাষ্ট্র হইতে বিলুপ্ত হয় নাই। সাম্যবাদিগণ বলেন যে, সাম্যবাদের প্রথম পর্যায়ে ঘোষণাতানুসারে পারিশ্রমিকের পার্থক্য অবশ্যস্বাভাবী। দেশে পূর্ণ সাম্যবাদ প্রবর্তিত হইয়া উৎপাদন যথেষ্ট পরিমাণে বৃদ্ধি পাইবে এবং শ্রেণীহীন সমাজব্যবস্থা গঠিত হইয়া যখন জনগণের মধ্যে ভেদাভেদ তিরোহিত হইবে, তখন আর পারিশ্রমিকের পার্থক্য থাকিবে না। প্রত্যেকে সামর্থ্য অনুযায়ী কার্য করিবে এবং প্রয়োজন অনুযায়ী মজুরি পাইবে। মজুরির পার্থক্য থাকা সত্ত্বেও এ-কথা স্বীকার করিতে হইবে যে, সাম্যবাদী ব্যবস্থা ধনতান্ত্রিক ব্যবস্থা হইতে এক বিষয়ে শ্রেষ্ঠ। এই ব্যবস্থায় ব্যক্তিগত মালিকানা সম্ভব নয় বা অনুপাঙ্কিত আয় উপভোগ করিবার সম্ভাবনা নাই। নিজে পরিশ্রম না করিয়া পরজীবী হিসাবে সমাজে কেহ বাস করিতে পারে না।

মার্কসীয় মতবাদ সমস্ত পৃথিবীব্যাপী সাম্যবাদ-প্রবর্তনের উদ্দেশ্য দ্বারা প্রণোদিত হইয়াছিল। সেই উদ্দেশ্যে মার্কস জগতের সকল দেশের শ্রমিকদের সংঘবদ্ধ হইবার নির্দেশ দিয়াছিলেন। রুশীয় সাম্যবাদিগণ পরবর্তী কালে আন্তর্জাতিক ক্ষেত্রে সাম্যবাদ নীতি প্রবর্তনের উদ্দেশ্য পরিত্যাগ করিয়া শুধুমাত্র তাঁহাদের নিজ দেশে এই নীতি কার্যকরী করিতেছেন। স্ট্যালিন কাজের লোক ছিলেন, তাই তিনি পৃথিবীব্যাপী সাম্যবাদ-প্রবর্তনের অস্বীকার্য বুদ্ধিতে পারিয়া মার্কসীয় নীতি পরিহার করেন। রুশীয় সাম্যবাদ বর্তমানে কার্যতঃ জাতীয়তাবাদে পৰ্ব্ববসিত হইয়াছে।

সাম্যবাদী ব্যবস্থা প্রবর্তনের প্রথম পর্যায়ে রুশীয় সাম্যবাদিগণ প্রচলিত লোকধর্ম ও নীতিজ্ঞানকে বর্জন করিয়া রাষ্ট্রকে যে শুধু সম্পূর্ণরূপে ধর্মনিরপেক্ষ করিয়াছিলেন তাহা নয়, রাষ্ট্রকর্মতা প্রয়োগ করিয়া অনেকক্ষেত্রে ধর্মসংগঠন-গুলিকে ধ্বংসও করিয়াছিলেন। দ্বিতীয় মহাযুদ্ধের সময় হইতে ধর্মের প্রতি রাষ্ট্রনীতির পরিবর্তন পরিলক্ষিত হয়। ধর্মের প্রতি রাষ্ট্রের বর্তমান নীতি,

হইল সহনশীলতা। জনসাধারণ তাহাদের ইচ্ছামত ধর্মসংগঠনে বোগদান করিতে পারে বা ধর্মের বিরুদ্ধে শান্তিপূর্ণ উপায়ে প্রচারকার্য চালাইতে পারে।

সোভিয়েত যুক্তরাষ্ট্রের শাসনব্যবস্থাও বর্তমানে বহুলাংশে পাশ্চাত্য অন্তান্ত দেশের শাসনব্যবস্থার অনুরূপ হইয়া গঠিত হইয়াছে। পূর্বতন স্বাভাবিক মনোভাব পরিত্যাগ করিয়া সোভিয়েত যুক্তরাষ্ট্র বর্তমানে অন্তান্ত দেশগুলির সহিত নানা প্রকারে আদান-প্রদান করিতেছে। বিগত দ্বিতীয় মহাসমরের সময় সোভিয়েত যুক্তরাষ্ট্র ধনতাত্ত্বিক ইংলণ্ড ও মার্কিন যুক্তরাষ্ট্রের সহযোগিতারূপে নাৎসী জার্মানীর বিরুদ্ধে যুদ্ধ করিয়াছে। সুতরাং অনুমান করা যায় যে, সোভিয়েত নেতৃবর্গ আন্তর্জাতিক ক্ষেত্রে সাম্যবাদ-প্রতিষ্ঠার যে স্বপ্ন দেখিয়াছিলেন তাহা তিরোহিত হইয়াছে বলিয়া তাঁহারা বর্তমানে স্বদেশের হিতসাধনে আত্মনিয়োগ করিয়াছেন।

সোভিয়েত সাম্যবাদের মূল্যনির্ধারণ (Evaluation of Russian Communism)

কমিউন সাম্যবাদের পক্ষে ও বিপক্ষে এত অধিক প্রচারকার্য হইয়া থাকে যে, সাধারণ লোকের পক্ষে এই প্রচারকার্য দ্বারা বিভ্রান্ত হওয়া একান্ত স্বাভাবিক,—বিশেষ করিয়া দ্বিতীয় বিশ্বযুদ্ধের কিছুদিন পর পর্যন্তও বিদেশী পর্যটকেরা অবাধে সোভিয়েত দেশে ভ্রমণ করিবার সুবিধা পাইত না। বর্তমানে এ বিষয়ে সরকারী বিধিনিষেধ অনেক পরিমাণে শিথিল হইলেও অন্তান্ত দেশের মত সোভিয়েত দেশে পর্যটকের যত্নহীন ভ্রমণ করিয়া তাহার জ্ঞাতব্য বিষয় সম্পর্কে প্রয়োজনীয় তথ্য আহরণ করা সম্ভব নয়। অবশ্য এ-কথা সত্য যে, সোভিয়েত সরকার তাহাদের পূর্বতন তিক্ত অভিজ্ঞতার ফলে বিদেশী গুপ্তচরদের ধ্বংসাত্মক কার্যকলাপ রহিত করিবার জন্য এই গণতন্ত্র-বিরোধী বিধিনিষেধ প্রবর্তন করিতে বাধ্য হইয়াছেন। সোভিয়েত সাম্যবাদ সম্বন্ধে সাধারণতঃ দুইটি পরস্পর-বিরোধী মত প্রচলিত দেখিতে পাওয়া যায়। সোভিয়েত সাম্যবাদের অনুরক্ত ভক্তগণ সোভিয়েত দেশকে মর্ত্যের স্বর্গ বলিয়া বর্ণনা করেন। স্বাধীনতা, সাম্য, মৈত্রী প্রভৃতি বাহ্যিকিছু মানবজীবনে শ্রেয়ঃ বলিয়া বিবেচিত হয় তাহার সব-কিছুই সোভিয়েত .

দেশে দেখিতে পাওয়া যায়। অপরপক্ষে, সোভিয়েত সাম্যবাদের উগ্র বিরুদ্ধবাদীরা সোভিয়েত দেশকে নরকের সহিত তুলনা করিয়া থাকেন। তাঁহাদের মতে সোভিয়েত দেশে বিভীষিকার রাজত্ব বর্তমান; সাম্য, মৈত্রী দূরের কথা, সেখানে মানুষের কোন বিষয়েই স্বাধীনতার লেশমাত্র নাই। এই উড়ীয় মতবাদই অজ্ঞতা ও অশিক্ষাপ্রসূত বলিয়া মনে হয়। এই চরম সাধুবাদ বা নিন্দাবাদ দ্বারা প্রভাবিত না হইয়াও বর্তমানে সোভিয়েত দেশ সম্পর্কে যে তথ্যগুলি পাওয়া সম্ভবপর হইয়াছে, তাহার ভিত্তিতে সম্পূর্ণ নিরপেক্ষ সমালোচনার দ্বারা সোভিয়েত সাম্যবাদ সম্পর্কে একটা সিদ্ধান্ত করা যাইতে পারে।

বহু ভাষাভাষী, বহু জাতি-সমন্বিত সোভিয়েত দেশকে একটি উপ-মহাদেশ বলা যাইতে পারে। এই বিশাল আয়তনের, বিপুল জনসংখ্যা দ্বারা অধ্যুষিত উপ-মহাদেশ একটিমাত্র রাজনৈতিক অর্থাৎ সাম্যবাদী দল দ্বারা শাসিত হয়। এদেশে অল্প কোন রাজনৈতিক দলের অস্তিত্ব বরদাস্ত করা হয় না—জবরদস্তিমূলক উপায়ে অল্প দলগুলিকে উৎসাদিত করিয়া সাম্যবাদী দল তাঁহাদের একাধিপত্য অপ্রতিহত রাখিয়াছেন। সাম্যবাদী নেতৃগণ তাঁহাদের নীতি সমর্থনের জন্য বলিয়া থাকেন যে, তাঁহারা ধনিক ও মালিকশ্রেণী-পরিচালিত রাষ্ট্রব্যবস্থার পরিবর্তে শ্রমিকরাজ প্রতিষ্ঠিত করিয়াছেন। কিন্তু বাস্তবক্ষেত্রে দেখিতে পাওয়া যায় যে, শ্রমিকরাজের পরিবর্তে কার্যতঃ দলীয় অবাধ কর্তৃত্ব প্রতিষ্ঠিত হইয়াছে। সমগ্র জনসংখ্যার এক ক্ষুদ্র অংশমাত্র সক্রিয়ভাবে সাম্যবাদী দলে যোগদান করিয়াছেন। স্বেচ্ছাং সহজেই অহুমান করা যায় যে, জনসংখ্যার বেশীর ভাগ লোককেই এই সাম্যবাদী ব্যবস্থা গ্রহণ করিতে বাধ্য করা হইয়াছে। সাম্যবাদী দলব্যবস্থা বিশ্লেষণ করিলে দেখিতে পাওয়া যায় যে, মুষ্টিমেয় লোক সাম্যবাদী দল পরিচালনা করিয়া দলের মাধ্যমে শাসনব্যবস্থা নিয়ন্ত্রিত করিতেছে। ষতদিন ষ্ট্যালিন জীবিত ছিলেন ততদিন সাম্যবাদী দল বলিতে তাঁহাকেই বুঝাইত। আর সাম্যবাদী দলের নেতা ষ্ট্যালিন এই বিশাল জনসংখ্যার ভাগ্যানিয়ন্তারূপে এক-নায়কত্বে অধিষ্ঠিত ছিলেন। যেকোন কঠোর স্ত্রী নির্মম উপায়ে সাম্যবাদিগণ তাঁহাদের দলীয় সংহতি ও ক্ষমতা অব্যাহত রাখিয়াছেন ফ্রাঙ্কা মানবধর্মবিরোধী বলিলেও বোধ হয় অত্যুক্তি হয় না। উদ্দেশ্য মহৎ

হইতে পারে, কিন্তু মহৎ উদ্দেশ্যসাধনের নিমিত্ত হীন ও অমাহুষিক পন্থা অবলম্বন করা কোনরূপ যুক্তি দ্বারাই সমর্থনযোগ্য নয়। এতদ্ব্যতীত ব্যক্তিগত মালিকানা, ধর্মসংগঠন নানাবিধ প্রথা ও আচার সম্পর্কে সোভিয়েত সরকার কর্তৃক অমুহৃত নীতিগুলির বিরুদ্ধ সমালোচনা না করিয়াও একথা বলা যাইতে পারে যে, তাঁহাদের অমুহৃত নীতি অনেক ক্ষেত্রে স্বাভাবিকভাবে ব্যক্তিত্ব-বিকাশের অন্তরায় সৃষ্টি করিয়া সমষ্টির অগ্র-গতি ব্যাহত করিয়াছে। বাক্-স্বাধীনতা ও সংবাদপত্রের স্বাধীনতা নিয়ন্ত্রণ করিয়া সাম্যবাদিগণ ব্যক্তিগত জীবনের স্বাভাবিক গতিকে অনেকাংশে রুদ্ধ করিয়াছেন। ব্যক্তিকে খর্ব করিয়া সমষ্টির উৎকর্ষসাধন কতদূর সম্ভবপর, সে সম্বন্ধে সন্দেহের যথেষ্ট অবকাশ আছে। কিন্তু সাম্যবাদী কার্যক্রম একমাত্র চীন ব্যতীত পৃথিবীর অত্র কোন দেশ এখনও পর্যন্ত প্রত্যক্ষভাবে গ্রহণ না করিলেও কোন দেশই সম্পূর্ণভাবে সাম্যবাদের প্রভাব হইতে মুক্ত নহে।

উপরি-উক্ত বিরুদ্ধ সমালোচনা সত্ত্বেও স্বীকার করিতে হইবে যে, সাম্যবাদিগণ তাঁহাদের অমুহৃত কার্যক্রম দ্বারা সমগ্র সোভিয়েত নাগরিকদের অর্থনৈতিক ও সংস্কৃতিগত জীবনে এক যুগান্তকারী পরিবর্তন আনয়ন করিতে সমর্থ হইয়াছেন। জার-শাসনের সময়ে দেশের জনসংখ্যার শতকরা আশী জন লোক ছিল নিরক্ষর। সাম্রাজ্যের অন্তর্ভুক্ত এমন অনেক জাতি ছিল যাহাদের নিজস্ব কোন লিপি ছিল না। সাম্যবাদিগণ ক্ষমতাগ্রহণের পর নিরক্ষরতার বিরুদ্ধে অভিযান পরিচালনা করিয়া নেহাৎ অসমর্থ বৃদ্ধ ব্যতীত সমগ্র জনসংখ্যাকে লিখন-পঠন পটু করিতে সমর্থ হইয়াছেন। সোভিয়েত যুক্তরাষ্ট্রের অধিবাসী এমন কোন ক্ষুদ্র জাতিও দেখিতে পাওয়া যায় না যাহাদের নিজস্ব জাতীয় লিপি ও জাতীয় সাহিত্য সৃষ্টি হয় নাই। শতাব্দীর এক-চতুর্থাংশ সময়ের মধ্যে সাম্যবাদিগণ বিজ্ঞান-বিষয়সমূহে যে অভাবনীয় উন্নতি সাধন করিয়াছেন তাহা কোন গণতান্ত্রিক রাষ্ট্রে সম্ভব হয় নাই। সাহিত্য, বিজ্ঞান, শিল্প, কলা প্রভৃতি সংস্কৃতিমূলক ও কার্যকরী বিষয়সমূহে সোভিয়েত নাগরিকগণের ঔৎসুক্য ও অমুসন্ধিৎসা এত দ্রুত বৃদ্ধি পাইয়াছে যে, বিদেশী শত্রুমনোভাবাপন্ন পর্যটকেরাও তাহার স্তুতিগান না করিয়া পারেন নাই। নানাপ্রকার দুর্কার্ণের নিমিত্ত শান্তিপ্রাপ্ত অসামু ব্যক্তিদের চরিত্র সংশোধন

করিয়া তাহাদের স্ব-নাগরিক করিবার জন্ত সোভিয়েত সরকার যে ব্যবস্থা অবলম্বন করিয়াছেন তাহাতে লক্ষ লক্ষ পতিত মানব পুনর্জীবন লাভ করিয়া সমাজের শক্তি বৃদ্ধি করিতেছে। স্বীজাতির উন্নতিকল্পে সাম্যবাদিগণ যে ব্যবস্থা অবলম্বন করিয়াছেন পৃথিবীর অত্র কোন দেশে তাহা সম্ভব হয় নাই। পতিতবৃত্তি নিরোধ করা সোভিয়েত সরকারের অগ্রতম প্রধান কীর্তি। সোভিয়েত রাষ্ট্রে স্বীজাতি আজ পুরুষের সমানাধিকারের আসনে সুপ্রতিষ্ঠিত। এতদ্ব্যতীত সংখ্যালঘু জাতিসমূহের সমস্যাগুলি সোভিয়েত সরকার এরূপ নিপুণভাবে সমাধান করিতে সমর্থ হইয়াছেন যে, সংখ্যালঘু জাতিগুলি আজ রাষ্ট্রের প্রধান সহায় হইয়া দাঁড়াইয়াছে।

সংস্কৃতিগত জীবনের উৎকর্ষসাধন ব্যতীত অর্থনৈতিক জীবনের উন্নয়ন-ক্ষেত্রে সোভিয়েত সরকারের প্রচেষ্টা অধিকতর সাফল্যমণ্ডিত হইয়াছে। পর পর কয়েকটি পঞ্চবার্ষিক পরিকল্পনা দ্বারা সমগ্র উৎপাদনক্ষেত্রে বিশেষ করিয়া কৃষি ও শিল্পে সোভিয়েত সরকার যে অভাবনীয় উন্নতিসাধন করিয়াছেন তাহা বিশ্বয়ের বিষয়। দেশের বিপুল প্রাকৃতিক সম্পদকে উৎপাদনকার্যে নিয়োজিত করিয়া তাঁহারা কয়েক বৎসরের মধ্যে বহু-পরিমাণে আত্মনির্ভরশীল হইতে সমর্থ হইয়াছেন। প্রাচুর্য না হইলেও জন-সাধারণকে অনশনের ভয় হইতে মুক্ত করিয়া তাহাদের জীবনধারণোপযোগী জীবিকার একটা নির্দিষ্ট মান স্থির করিতে সমর্থ হইয়াছেন। সোভিয়েত রাষ্ট্রে আজ বেকারসমস্যার কথা শুনিতে পাওয়া যায় না। কৃষি, শিল্প ও উৎপাদনের অগ্রাঙ্গ ক্ষেত্রে ব্যক্তিগত মালিকানার পরিবর্তে ষোথ-পরিচালনার ব্যবস্থা প্রবর্তন করিয়া সোভিয়েত সরকার অর্থনৈতিক জীবনে গণতন্ত্রের গোড়াপত্তন করিয়াছেন। কৃষি ও শিল্পের ষোথ পরিচালনা-ব্যবস্থা প্রবর্তনের ফলে কৃষক ও শ্রমিকগণ আত্মসচেতন হইয়া তাহাদের গ্রাম্য অধিকার ও দায়িত্ব সম্বন্ধে বহুল পরিমাণে সজাগ হইয়াছে। সমাজতান্ত্রিক ব্যবস্থা দ্বারা যে ব্যক্তিত্ব-বিকাশ সম্ভব, সোভিয়েত দেশে তাহার ভূরি ভূরি প্রমাণ পাওয়া যায়। সমাজচেতনা বৃদ্ধির সঙ্গে সঙ্গে সোভিয়েত নাগরিকগণের দেশাত্ম-বোধও অনেক পরিমাণে বৃদ্ধি পাইয়াছে।

সোভিয়েত সরকার জাতীয় জীবনের বিভিন্ন ক্ষেত্রে যে বিরাট সাফল্য অর্জন করিয়াছেন তাহার পিছনে মর্মস্পর্শ ছুঁথের কাহিনী আছে—এ কথা

অনস্বীকার্য। এই বিরাট সাক্ষ্য অর্জনের জন্য যে কত নির্মম অত্যাচার অহুষ্ঠিত হইয়াছে, কত শত লোক জীবন দান করিয়াছে তাহার ইয়ত্তা নাই। অত্যাচার, অত্যাচার ও রক্তপাতের কাহিনী পৃথিবীর সকল দেশের ইতিহাসে দেখিতে পাওয়া যায়। সমগ্র এশিয়া ও আফ্রিকা মহাদেশের উপর শতাব্দীর পর শতাব্দী ধরিয়া পাশ্চাত্য জাতিগুলি যে অত্যাচার করিয়াছে তাহার তুলনা ইতিহাসে বিরল। ভারত, বর্মা, ইন্দোনেশিয়া, আয়ারল্যান্ড, পোল্যান্ড প্রভৃতি দেশগুলিকে যে অগ্নিপরীক্ষার সম্মুখীন হইতে হইয়াছিল তাহাও সভ্যমানবের কার্যকলাপের নিদর্শন। হিরোসিমা ও নাগাসাকি যুগ-যুগান্তর ধরিয়া সভ্যতাগর্বা পাশ্চাত্য জাতির বৈজ্ঞানিক পদ্ধতিতে ধ্বংসাত্মক কার্যের সাক্ষ্য প্রদান করিবে। এশিয়া ও আফ্রিকা মহাদেশের অধিবাসিগণের উপর পাশ্চাত্য জাতিগুলি যে অত্যাচার করিয়াছিল তাহাদের উদ্দেশ্যের সহিত রুশ জাতির অত্যাচারের উদ্দেশ্যের তুলনা করিলে রুশ জাতিকে বোধ হয় বিশেষ হীন প্রতিপন্ন করা যায় না। রাশিয়া অত্যাচার পাশ্চাত্য জাতিগুলির প্রতিবেশী রাষ্ট্র, সুতরাং সমধর্মী।

চৈনিক সাম্যবাদ (Chinese Communism)

বর্তমানে একমাত্র মহাচীনে সাম্যবাদী সরকার প্রতিষ্ঠিত হইয়াছে। অস্তুবিপ্লব ও বহিঃশত্রুর অত্যাচারে এই অতি-প্রাচীন ঐতিহ্যসম্পন্ন জাতির রাজনৈতিক অস্তিত্ব প্রায় বিলুপ্ত হইতে চলিয়াছিল। রুশীয় সাম্যবাদের দ্বারা অনুপ্রাণিত হইয়া এই মৃতকল্প জাতি নবজীবন লাভ করিয়া তাহার ‘মহাচীন’ নাম সার্থক করিতে চলিয়াছে। ১৯৫১ খৃষ্টাব্দের ২১শে সেপ্টেম্বর পূর্বতন জাতীয় সরকারের উচ্ছেদসাধন করিয়া, চীনে সাম্যবাদের ভিত্তিতে এক প্রজাতন্ত্রী সরকার প্রতিষ্ঠিত হয়। একমাত্র ফরমোজা ও আর কয়েকটি ক্ষুদ্র দ্বীপ ব্যতীত মূল ভূখণ্ডের সহিত মহাচীনের অত্যাচার প্রদেশগুলিতে আজ সাম্যবাদী শাসনব্যবস্থা সুপ্রতিষ্ঠিত। প্রজাতন্ত্রী সরকার প্রতিষ্ঠিত হইবার অত্যল্পকালের মধ্যে গ্রেট ব্রুটেন, ভারত, পাকিস্তান, সোভিয়েত, যুক্তরাষ্ট্র প্রভৃতি একুশটি রাষ্ট্রের স্বীকৃতি লাভ করিতে মহাচীন সমর্থ হইয়াছে। কিন্তু এই নবগঠিত সরকার এখনও পর্যন্ত সম্মিলিত জাতিপুঞ্জ প্রতিষ্ঠানের স্বীকৃতি লাভ করিতে পারে নাই।

রুশীয় সাম্যবাদীদের মতই চৈনিক সাম্যবাদিগণ সাম্রাজ্যবাদ, সামন্ততন্ত্র ও আমলাতান্ত্রিক ব্যবস্থার উচ্ছেদসাধন করিয়া স্বাধীন ও শাস্তিপূর্ণ গণতান্ত্রিক ব্যবস্থা দ্বারা জাতীয় শক্তি ও সমৃদ্ধি বৃদ্ধি করিতে বদ্ধপরিকর। সামন্ততান্ত্রিক ভূমিব্যবস্থার পরিবর্তে তাঁহারা চাষীপ্রধান ভূমিব্যবস্থা প্রবর্তন করিয়াছেন। কৃষিপ্রধান দেশকে শিল্পপ্রধান দেশে পরিণত করা তাঁহাদের অর্থনৈতিক কার্যক্রমের একটা প্রধান উদ্দেশ্য। স্বাভাবিক স্বাধীনতা ও সমানাধিকার প্রতিষ্ঠিত করিয়া তাঁহারা জাতীয় শক্তি বৃদ্ধি করিয়াছেন। চৈনিক সাম্যবাদিগণ নিজেদের শাস্তিপূর্ণ সহ-অবস্থান নীতিতে বিশ্বাসী বলিয়া ঘোষণা করেন, তাই তাঁহারা শাস্তিকামী জাতিগুলির সহিত মৈত্রীস্থলে আবদ্ধ হইবার জন্য বিশেষ আগ্রহাশ্রিত। কিন্তু চীনের বর্তমান আক্রমণাত্মক পররাষ্ট্রনীতি তাহার সহ-অবস্থান নীতিকে অসার প্রমাণিত করিয়াছে। রুশীয় সাম্যবাদের দ্বারা বহুল পরিমাণে প্রভাবিত হইলেও মহাচীন তাহার প্রাচীন ঐতিহ্যের সহিত সম্পর্ক সম্পূর্ণরূপে ছেদ করে নাই। প্রধানতঃ, সাম্যবাদী দল কর্তৃক সরকার গঠিত হইলেও অত্যন্ত রাজনৈতিক দলগুলির অস্তিত্ব বিলুপ্ত করা হয় নাই বা পুঁজিপতি ও মধ্যবিত্ত সম্প্রদায়কে একেবারে বিতাড়িত করা হয় নাই। বর্তমান সরকার দেশের সকল সম্প্রদায়ের সহযোগিতা দ্বারা সার্বজনীন উন্নতিসাধন করিতে চান।

সমাজতন্ত্রবাদের পক্ষে যুক্তি (Arguments for Socialism)

সমাজতন্ত্রবাদিগণ ধনতান্ত্রিক ব্যবস্থার বিরুদ্ধে নিম্নলিখিত যুক্তিগুলির অবতারণা করিয়া তাঁহাদের মতের সারবস্তা প্রমাণ করেন। তাঁহারা বলেন, ধনতান্ত্রিক ব্যবস্থায় কৃষক ও শ্রমিকশ্রেণীর স্বার্থ সম্পূর্ণরূপে উপেক্ষা করিয়া মুষ্টিমেয় মালিকশ্রেণী অধিকতর ধনশালী হয়, অপরপক্ষে শ্রমজীবীরা ক্রমশঃই দরিদ্রতর হয়। ধনতান্ত্রিক ব্যবস্থার উচ্ছেদসাধন করিয়া সমাজতান্ত্রিক ব্যবস্থা প্রবর্তিত হইলে দরিদ্রের স্বার্থ যথোচিতভাবে সংরক্ষিত হইবে।

দ্বিতীয়তঃ, ধনতান্ত্রিক ব্যবস্থায় প্রতিযোগিতামূলক উৎপাদন ব্যবস্থার ফলে অনেক ক্ষতি ও অপচয় ঘটে। সমাজতান্ত্রিক ব্যবস্থার প্রবর্তনের ফলে প্রতিযোগিতামূলক উৎপাদনের পরিবর্তে প্রয়োজনের অনুরূপ সহযোগিতামূলক উৎপাদনব্যবস্থা প্রবর্তিত হইয়া প্রয়োজনাতিরিক্ত উৎপাদন, প্রতিযোগিতামূলক বিজ্ঞাপন ও কম মূল্যে বিক্রয়জনিত ক্ষতি ও অপচয় দূরীভূত হইবে।

তৃতীয়তঃ, সমাজতন্ত্রবাদিগণের মত ও তাঁহাদের অনুসৃত নীতি শ্রায়ধর্মের উপর প্রতিষ্ঠিত। জমি-জায়গা, খনি প্রভৃতি প্রাকৃতিক সম্পদগুলি ব্যক্তিগত অধিকারভুক্ত না হইয়া জনসাধারণের হিতার্থে রাষ্ট্র কর্তৃক পরিচালিত হইবে। এই ব্যবস্থায় সর্বসাধারণের স্বার্থ অধিকতরভাবে সংরক্ষিত হইবে।

চতুর্থতঃ, তাঁহারা বলেন মানুষ সামাজিক জীব। সুতরাং ব্যক্তিগত স্বার্থ সমষ্টিগত স্বার্থের সহিত ওতপ্রোতভাবে জড়িত। একমাত্র সমষ্টিগত স্বার্থের উৎকর্ষসাধনের দ্বারা ব্যক্তিগত স্বার্থের উন্নয়ন সম্ভবপর। সমাজতান্ত্রিক ব্যবস্থা দ্বারা এই সমষ্টিগত স্বার্থের উৎকর্ষসাধন অধিকতর সহজসাধ্য হয়।

পঞ্চমতঃ, একমাত্র সমাজতান্ত্রিক ব্যবস্থার দ্বারা প্রকৃত গণতান্ত্রিক আদর্শকে কার্যে রূপায়িত করা সম্ভব। রাষ্ট্রনৈতিক ক্ষেত্রে গণতান্ত্রিক ব্যবস্থা কার্যকরী হইয়াছে, কিন্তু অর্থনৈতিক ক্ষেত্রে গণতান্ত্রিক ব্যবস্থা কার্যকরী না হইলে রাষ্ট্রনৈতিক গণতন্ত্র বিফল হইবে। মানুষ যদি ভয় ও অভাবমুক্ত না হইতে পারে, তাহা হইলে তাহার রাজনৈতিক স্বাধীনতা প্রহসনে পর্যবসিত হয়। অন্ত্রনিরপেক্ষভাবে জীবিকা অর্জনের ব্যবস্থা দ্বারা সমাজতন্ত্রবাদ ব্যক্তিকে অভাবমুক্ত করিয়া তাহার অভিরুচি অনুযায়ী ব্যক্তিত্ব-বিকাশের পথ স্বেচ্ছা করিয়া দেয়।

পরিশেষে বলা যায় যে, সমাজতন্ত্রবাদ প্রতিযোগিতা অপেক্ষা সহযোগিতার উপর অধিকতর গুরুত্ব আরোপ করিয়া মানুষের সহজাত সমাজচেতনাকে দৃঢ়তর করে। সহযোগিতামূলক ব্যবস্থা সকল দেশেই প্রসারলাভ করিয়া উৎপাদনক্ষেত্রে বহুল পরিমাণে সাফল্যমণ্ডিত হইয়াছে। সমাজতন্ত্রবাদের মূল নীতি হইল 'নিজে বাঁচ এবং অপরকে বাঁচিতে দাও'। সুতরাং ইহা একটি নৈতিক ভিত্তির উপর প্রতিষ্ঠিত। বর্তমান যুগের রাষ্ট্রগুলির কার্যক্রম লক্ষ্য করিলে সমাজতন্ত্রবাদের অস্বীকৃত সত্য প্রমাণিত হয়। বর্তমান রাষ্ট্রগুলি ক্রমশঃই সামাজিক জীবনের বিভিন্ন ক্ষেত্রে রাষ্ট্র-নিয়ন্ত্রণ প্রবর্তন করিয়া জনসাধারণের স্বার্থসংরক্ষণের জন্ত সচেষ্ট হইয়াছে।

সমাজতন্ত্রবাদের বিপক্ষে যুক্তি (Arguments against Socialism)

সমাজতন্ত্রবাদের বিরুদ্ধে যে যুক্তিগুলির অবতারণা করা হয় তন্মধ্যে প্রধান যুক্তি হইল যে, সমাজতন্ত্রবাদ রাষ্ট্রের কর্মক্ষমতা ও যোগ্যতার উপর

অত্যধিক গুরুত্ব আরোপ করে। রাষ্ট্র মানুষ কর্তৃক সৃষ্ট একটি সামাজিক সংগঠনমাত্র। কোন মানবীয় প্রতিষ্ঠানই নির্ভুল বা ত্রুটিহীন হইতে পারে না। সুতরাং রাষ্ট্রকে সর্বশক্তিমাম্ বিবেচনা করিয়া মানবজীবন নিয়ন্ত্রণ করিবার সম্পূর্ণ দায়িত্ব রাষ্ট্রের হস্তে গুলু করিলে মারাত্মক ভুল হইবে। প্রকৃতপক্ষে রাষ্ট্রের ক্ষমতা নির্দিষ্ট গতির মধ্যে সীমাবদ্ধ।

দ্বিতীয়তঃ, ব্যক্তিগত সম্পত্তির বিলোপসাধন করিয়া রাষ্ট্র-মালিকানা প্রবর্তিত হইলে ব্যক্তিগত কর্মপ্রচেষ্টার অমুপ্রেরণা অন্তর্হিত হইবে। মানুষ যদি ইচ্ছানুযায়ী কায়িক ও মানসিক পরিশ্রম প্রয়োগ করিয়া সেই পরিশ্রমলব্ধ ফল স্বাধীনভাবে উপভোগ করিতে না পারে তাহা হইলে সে কোন কার্যই স্বেচ্ছাভাবে সম্পাদন করিয়া তাহার অন্তর্নিহিত শক্তির সদ্যবহার করিবার স্বযোগ পাইবে না। ফলে ব্যক্তিত্ব-বিকাশের সম্ভাবনা তিরোহিত হইবে।

তৃতীয়তঃ, সমাজতন্ত্রবাদ প্রবর্তনের ফলে ব্যক্তিস্বাধীনতা ক্ষুণ্ণ হইবে। ব্যক্তিগত জীবন ব্যক্তির অভিরুচি অনুযায়ী পরিচালিত না হইয়া পদে পদে রাষ্ট্র কর্তৃক নিয়ন্ত্রিত হইবে। রাষ্ট্রনিয়ন্ত্রণ প্রবর্তিত হইবার ফলে সমগ্র সমাজ-জীবন বৈচিত্র্যহীন হইয়া নিয়মানুবর্তী সৈনিকজীবনে পরিণত হইবে।

চতুর্থতঃ, সমাজতন্ত্রবাদিগণ সাধারণ মানুষকে যতটা সমাজচেতনাসম্পন্ন ও পরার্থপর বলিয়া মনে করেন কার্যতঃ তাহা নয়। সমাজতান্ত্রিক ব্যবস্থা সাফল্যমণ্ডিত করিতে হইলে প্রত্যেক লোকের যে পরিমাণ পরার্থপর হইতে হয়, সাধারণ মানুষের নিকট তাহা আশা করা দূরাশামাত্র। মানবচরিত্রের এই সহজাত স্বার্থবুদ্ধির আধিক্যহেতু ক্রমশঃ সাম্যবাদিগণ ব্যক্তিগত সম্পত্তির আংশিক পুনঃপ্রবর্তন করিতে বাধ্য হইয়াছিলেন।

অবশেষে বলা যায় যে, এই মতবাদ সম্পূর্ণরূপে বস্তুতান্ত্রিক ভিত্তির উপর প্রতিষ্ঠিত—ইহার আদৌ কোন নৈতিক ভিত্তি নাই। এই মতবাদের দ্বারা কর্মবিমুখতা, অযোগ্যতা ও দারিদ্র্য প্রভূত পায়। অপরপক্ষে, বুদ্ধিমত্তা, কর্ম-ক্ষমতা, আত্মনির্ভরশীলতা প্রভৃতি সদগুণগুলি সংকুচিত হয়।

সত্যসিদ্ধান্ত (Correct view)

উপরি-উক্ত আলোচনা দ্বারা ইহাই প্রতীয়মান হয় যে, নিছক ব্যক্তি-স্বাতন্ত্র্যবাদ বা নিছক সমাজতন্ত্রবাদ অনুসারে রাষ্ট্রের কার্যকলাপ পরিচালিত

হইতে পারে না। আভ্যন্তরীণ শান্তি-শৃঙ্খলা রক্ষা ও বহিরাক্রমণ প্রতিরোধ করা রাষ্ট্রের একমাত্র কর্তব্য বলিয়া বিবেচিত হয় না। অপরপক্ষে, মানুষের বহুমুখী জীবনের একমাত্র নিয়ামক হিসাবেও রাষ্ট্র পরিগণিত হয় না। বাস্তবক্ষেত্রে রাষ্ট্রের কার্যকলাপ কোন একটা নির্দিষ্ট নীতির দ্বারা পরিচালিত হয় না। বর্তমানে দেশের অবস্থা বা প্রয়োজনানুসারে রাষ্ট্রের কর্তব্য স্থির হয়। অনগ্রসর দেশগুলিতে, যেখানে জনসাধারণ অজ্ঞান-অন্ধকারে সমাচ্ছন্ন, সেখানে রাষ্ট্রকেই নানাবিধ প্রগতিমূলক কর্মপ্রচেষ্টার সূত্রপাত করিয়া জনসাধারণের অগ্রগমনে সহায়তা করিতে হয়। অপরপক্ষে, যে সমস্ত দেশের জনসাধারণ শিক্ষিত ও সমাজচেতনাসম্পন্ন, সেখানে রাষ্ট্রের নিয়ন্ত্রণশক্তির পরিধিও কম। ইংলণ্ডে সামাজিক জীবনের নানাবিধ প্রগতির জগ্ন রাষ্ট্রীয় হস্তক্ষেপের সাধারণতঃ কোন প্রয়োজন হয় না, কিন্তু ভারতের মত পশ্চাৎপদ দেশের সামাজিক ও অর্থনৈতিক অগ্রগতি রাষ্ট্রীয় হস্তক্ষেপ ব্যতীত সম্ভব হয় নাই। ইহা দ্বারা প্রমাণিত হয় যে, রাষ্ট্রীয় হস্তক্ষেপের সীমা দেশের অবস্থা বা প্রয়োজন দ্বারা নির্ধারিত হয়। ব্যক্তিস্বাতন্ত্র্যবাদ ও সমাজতন্ত্রবাদের সমন্বয়ে যদি কোন নতুন মতবাদ গঠন করা যায়, তাহা হইলে রাষ্ট্রকর্তব্য এই মিশ্র মতবাদ দ্বারা অনেক পরিমাণে নির্ধারিত হইতে পারে।

বর্তমান রাষ্ট্রের কার্যকলাপের পরিধি (Proper sphere of the Modern State)

সমাজতন্ত্রবাদ কোথাও সম্পূর্ণভাবে গৃহীত না হইলেও আধুনিক গণতান্ত্রিক রাষ্ট্রসমূহের কার্যকলাপের দ্বারা সমাজতন্ত্রবাদ-প্রবণতা সূচিত হয়। আধুনিক অধিকাংশ রাষ্ট্রই খনি, রেলপথ, যোগাযোগব্যবস্থা, কেন্দ্রীয় ব্যাঙ্ক-পরিচালনা প্রভৃতি জাতীয় স্বার্থসংশ্লিষ্ট ব্যাপারগুলি স্বহস্তে গ্রহণ করিয়াছে। যুদ্ধাস্ত্র নির্মাণ, অহিফেন ও অন্যান্য মাদকদ্রব্য উৎপাদনের একচেটিয়া অধিকার রাষ্ট্র গ্রহণ করিয়াছে। রাষ্ট্র কর্তৃক আইন-প্রণয়ন-ব্যবস্থা লক্ষ্য করিলেও এই সমাজতন্ত্রবাদ-প্রবণতা পরিলক্ষিত হয়। বর্তমান রাষ্ট্রগুলি শ্রমিক ও অন্যান্য বিভূতহীন শ্রেণীর স্বার্থ-সংরক্ষণের উদ্দেশ্যে অবৈতনিক প্রাথমিক শিক্ষা, স্বাস্থ্য, বৃদ্ধবয়সের ভাতা, কল-কারখানা ও প্রজাস্বত্ব-সংক্রান্ত নানাবিধ আইন প্রণয়ন করিতেছে। এতদ্ব্যতীত সমাজব্যবস্থা-সংস্কারের

উদ্দেশ্যে আধুনিক অনেক রাষ্ট্রই নানাবিধ আইন প্রবর্তন করিতেছে। ভারত সরকার অস্পৃশ্যতা বর্জন, বাল্যবিবাহ-নিরোধ প্রভৃতি নানাবিধ সমাজ-উন্নয়নমূলক বিধিনিষেধ প্রবর্তন করিয়াছেন। ব্যক্তিগত বা সামাজিক বা ধর্ম-সম্পর্কীয় ব্যাপারে রাষ্ট্র কখনই হস্তক্ষেপ করিবে না—ব্যক্তিষাভ্যাবাদী এই মতবাদ আধুনিক রাষ্ট্রগুলি গ্রহণ করে নাই। বর্তমান যুগে সামাজিক ব্যবস্থা এত জটিলতাপূর্ণ যে, কোন রাষ্ট্রের পক্ষে সমাজব্যবস্থার নিয়ন্ত্রণ না করিয়া রাষ্ট্রকর্তব্য সম্পাদন করা সম্ভব নয়। ইহা ছাড়াও জনগণের নৈতিক ও আধ্যাত্মিক উন্নতিসাধন করা আধুনিক রাষ্ট্রের একটি প্রধান কর্তব্য বলিয়া বিবেচিত হয়। কিন্তু এ-কথা স্মরণ রাখিতে হইবে যে, প্রত্যক্ষভাবে রাষ্ট্র মানুষের অন্তর্জীবন নিয়ন্ত্রণ করিতে পারে না। মানুষের বহির্জীবন নিয়ন্ত্রণ করিয়া কেবলমাত্র পরোক্ষভাবে রাষ্ট্র মানুষের অন্তর্জীবন নিয়ন্ত্রণ করিতে পারে। এই উদ্দেশ্যে রাষ্ট্র সমাজহিতকর এরূপ অনেক আইন প্রণয়ন করে যদ্বারা মানুষের নৈতিক জীবনের মান উন্নীত হয় অথবা নৈতিক জীবনের উন্নয়ন-পথে যে অন্তরায় থাকে তাহা দূরীভূত হয়। রাষ্ট্রের পক্ষে নৈতিক উপদেশ দান করিয়া জনসাধারণকে মত্তপানে বিরত করা সম্ভব নয়, কিন্তু মত্তবিক্রয় নিষিদ্ধ করিয়া রাষ্ট্র মত্তপানের প্রলোভন হইতে জনগণকে রক্ষা করিতে পারে। স্ব-নাগরিক সৃষ্টি করিতে হইলে নাগরিক জীবনের নৈতিক মান উন্নয়ন করা একান্ত আবশ্যিক। এইজন্য রাষ্ট্রকে সমাজব্যবস্থায় এরূপ একটি পরিবেশ সৃষ্টি করিতে হইবে যেখানে উন্নত নৈতিক জীবনযাপনের পক্ষে সকল বাধা দূরীভূত হইয়া নৈতিক জীবনযাপন সম্ভব হইবে। এইজন্যই আধুনিক রাষ্ট্রগুলি সমাজব্যবস্থায় বাল্যবিবাহ, মত্তপান, অশিক্ষা প্রভৃতি প্রগতিবিরুদ্ধ যে সমস্ত কু-প্রথা প্রচলিত আছে সেগুলি আইনের দ্বারা দূর করিয়া প্রগতিমূলক ব্যবস্থা প্রবর্তন করিতেছে।

আধুনিক রাষ্ট্রগুলির কার্যকলাপের পরিধি লক্ষ্য করিলে স্বভাবতঃই মনে হয় যে, রাষ্ট্র অহেতুক ব্যক্তিগত জীবনের উপর হস্তক্ষেপ করিয়া ব্যক্তি-স্বাধীনতা ক্ষুণ্ণ করিতেছে। মানুষের অর্থনৈতিক জীবনের উপর রাষ্ট্রের এই হস্তক্ষেপ ক্রমশঃই বৃদ্ধি পাইতেছে। ফ্যাসিবাদী বা সমাজতান্ত্রিক দৈর্শগুলির কথা ছাড়িয়া দিলেও ধনতান্ত্রিক ভিত্তির উপর প্রতিষ্ঠিত রাষ্ট্রগুলিতেও এই রাষ্ট্রীয় হস্তক্ষেপের মাত্রা ক্রমবর্ধমান বলিয়া অনুভূত হয়। ইংলণ্ড, মার্কিন

যুক্তরাষ্ট্র প্রভৃতি দেশগুলিতেও উৎপাদন ও বণ্টনব্যবস্থা ধীরে ধীরে রাষ্ট্রায়ত্ত্বের অধীন হইতেছে। সুতরাং পূর্বতন ব্যক্তিগতস্বত্ববাদী মতবাদ যে পরিত্যক্ত হইতে চলিয়াছে এ বিষয়ে আর সন্দেহের অবকাশ নাই।

বাস্তবক্ষেত্রে সমাজতন্ত্রবাদের এই ক্রমবর্ধমান সম্প্রসারণের প্রধান কারণ হইল গণতান্ত্রিক আদর্শের বহুল প্রসার। বর্তমান রাষ্ট্রগুলি গণতান্ত্রিক আদর্শের উপর প্রতিষ্ঠিত। আধুনিক যুগে রাষ্ট্র সম্বন্ধে মানুষের ধারণা পরিবর্তিত হইয়াছে। আধুনিক কালে রাষ্ট্র আর অসীম ক্ষমতার আধার বলিয়া বিবেচিত হয় না। রাষ্ট্রের অস্তিত্ব একমাত্র রাষ্ট্রের জনকল্যাণমূলক কার্যের দ্বারাই সমর্থিত হয়। যে রাষ্ট্র জনকল্যাণ সাধন করিতে অসমর্থ, সে রাষ্ট্র জনসমর্থন-লাভেও বঞ্চিত। সমগ্র জনসংখ্যার সর্বদ্বীণ উন্নতিসাধন হইল বর্তমান রাষ্ট্রের প্রধান উদ্দেশ্য। এইজন্যই বর্তমান রাষ্ট্রগুলি কল্যাণরাষ্ট্র (Welfare State) বলিয়া দাবী করে। সেই উদ্দেশ্যসাধনের নিমিত্ত কি ব্যক্তিগত, কি সমষ্টিগত সমগ্র মানবজীবনের উপর রাষ্ট্রের কর্তৃত্ব প্রতিষ্ঠিত হইতে চলিয়াছে। সুতরাং রাষ্ট্রকর্তব্যের সীমারেখা স্থির করা সম্ভবপর নয়।

রাষ্ট্রীয় কার্যকলাপের শ্রেণীবিভাগ (Classification of the State Functions)

পূর্বেই বলা হইয়াছে যে, রাষ্ট্রের কার্যকলাপ সেই দেশের অবস্থা বা প্রয়োজনের মাপকাঠিতে নির্ধারিত হয়। রাষ্ট্রীয় কার্যকলাপগুলিকে সাধারণতঃ দুই ভাগে ভাগ করা হয়। কতকগুলি কার্য অত্যাवश्यकীয় বা প্রাথমিক (Essential or Primary) বলিয়া বিবেচিত হয়; আর কতকগুলি কার্য আছে যেগুলি অবশ্যকরণীয় নয়; প্রয়োজন অনুসারে রাষ্ট্র এইগুলি করিয়া থাকে। এইগুলিকে প্রয়োজনানুযায়ী বা ইচ্ছামূলক (Non-essential or Optional) কার্য বলা হয়।

দেশের আভ্যন্তরীণ শান্তি-শৃংখলা রক্ষা করা ও বহিঃশত্রুর আক্রমণ হইতে ক্লেমরক্ষা করা প্রত্যেক রাষ্ট্রেরই প্রাথমিক বা অবশ্যকর্তব্য বলিয়া বিবেচিত হয়। রাষ্ট্রের অস্তিত্ব বজায় রাখিবার নিমিত্ত প্রত্যেক রাষ্ট্রের এই কার্য সম্পাদন করিতে হয়। নতুবা কোন রাষ্ট্রই বাঁচিতে পারে না। শান্তি-

শৃংখলা রক্ষা ও বহিরাক্রমণ হইতে দেশকে রক্ষা করা ছাড়াও আধুনিক রাষ্ট্রের আরও কতকগুলি অত্যাৱশ্যক কর্তব্য আছে। আন্তর্জাতিক ক্ষেত্রে পররাষ্ট্রের সহিত কূটনৈতিক সম্পর্ক স্থির করিয়া নিজস্ব অস্তিত্বকে নিরাপদ রাখা বর্তমান রাষ্ট্রের একটা প্রধান কর্তব্য। পারিবারিক সম্পর্ক স্থির করিয়া অর্থাৎ স্বামী-স্ত্রী, পিতা-মাতা ও সন্তানের মধ্যে আইনগত সম্পর্ক নির্ধারণ করিয়া পারিবারিক জীবনকে স্থিতিশীল করা রাষ্ট্রের আর একটি প্রধান কর্তব্য বলিয়া বিবেচিত হয়। মুদ্রাব্যবস্থা নিয়ন্ত্রণ করিয়া উৎপাদন ও বিনিময়কার্কে সাহায্য করা ও ব্যবসায়-বাণিজ্যের সুবিধার জন্ত নির্দিষ্ট-পরিমাপের ব্যবস্থা করা রাষ্ট্রের অন্ততম কর্তব্য বলিয়া বর্তমানে বিবেচিত হয়। আইন-শৃংখলা রক্ষা করিবার জন্ত প্রত্যেক রাষ্ট্রের পক্ষে নিরপেক্ষ বিচার ও শাস্তিদানের ব্যবস্থা রাখা অবশ্যকর্তব্য। এইজন্য রাষ্ট্র পুলিশ, বিচার ও জেল বিভাগগুলি প্রবর্তন করিয়াছে। এতদ্ব্যতীত ব্যক্তিগত সম্পত্তির মালিকানা, উত্তরাধিকার, নাগরিকত্ব গ্রহণ ও বর্জন-সংক্রান্ত বিষয়গুলিও রাষ্ট্র নিয়ন্ত্রণ করিয়া থাকে।

যে কার্যগুলি রাষ্ট্রের অবশ্যকরণীয় নয় অর্থাৎ রাষ্ট্র যেগুলি প্রয়োজন অনুসারে করিয়া থাকে, সেগুলিকে ইচ্ছামূলক বা ইচ্ছাকৃত কার্য বলা হয়। এই ইচ্ছাকৃত কার্যগুলির মধ্যে কতকগুলি শিল্প ও ব্যবসায়ের পরিচালনা অনেক রাষ্ট্র স্বহস্তে গ্রহণ করে। লবণ, তামাক, মুদ্রা, রেলপথ প্রভৃতি অনেক শিল্পব্যবসায় রাষ্ট্র প্রত্যক্ষভাবে পরিচালনা করিয়া থাকে। আবার অনেক সময় রাষ্ট্র শিল্প, ব্যবসায়-বাণিজ্য প্রভৃতি স্বহস্তে গ্রহণ না করিয়া সেগুলিকে বিধিনিষেধ দ্বারা নিয়ন্ত্রিত করিতে পারে। শ্রমিকের স্বার্থ-সংরক্ষণের জন্ত আধুনিক রাষ্ট্রগুলি শ্রমিক কল্যাণমূলক বহুবিধ আইন প্রণয়ন করিয়া থাকে। স্ত্রীলোক ও অল্পবয়স্ক শ্রমিকদের কল্যাণের জন্ত রাষ্ট্র অনেক ব্যবস্থা অবলম্বন করিয়াছে। জনসাধারণের সুবিধার জন্ত ডাক, তার ও টেলিফোন-ব্যবস্থাও প্রবর্তন করিয়াছে। পূর্তকার্য, রাস্তাঘাট নির্মাণ, স্বাস্থ্যরক্ষা, শিল্প-ব্যবসায়-বাণিজ্যের নিয়ন্ত্রণ, কৃষির উন্নতি, বেতার-প্রচারকার্য, ট্রাম, বাস প্রভৃতি পরিবহন-ব্যবস্থা, গ্যাস ও বিদ্যুৎ-সরবরাহ এবং লবোপরি শিক্ষাবিস্তারকার্কে আধুনিক রাষ্ট্রগুলি আত্মনিয়োগ করিয়াছে। দরিদ্র, অসহায়, বৃদ্ধ ও পঙ্গু লোকদের সাহায্যদান-কার্যও বর্তমান রাষ্ট্রগুলি স্বহস্তে

গ্রহণ করিয়াছে। সুতরাং আধুনিক কালে রাষ্ট্রের অবশ্যকরণীয় কর্তব্য ও ইচ্ছাকৃত কর্তব্যের মধ্যে সীমারেখা ক্রমশঃই বিলীন হইয়া যাইতেছে।

ব্যক্তিগত জীবনে রাষ্ট্র-নিয়ন্ত্রণের সীমা (Limits to State intervention over individual life)

আধুনিক রাষ্ট্রগুলির কার্যের পরিধি ও প্রকৃতি বিশ্লেষণ করিলে স্বভাবতঃই মনে হয় যে, রাষ্ট্রকর্তব্যের কোন সীমা নাই—মানবজীবনের এমন কোন অংশ নাই যাহার উপর রাষ্ট্রনিয়ন্ত্রণ প্রযোজ্য নহে। কিন্তু ব্যক্তির ব্যক্তিত্ব-বিকাশে সাহায্য করাই যদি রাষ্ট্রের প্রধান কর্তব্য বলিয়া ধরা যায়, তাহা হইলে এইরূপ সর্বগ্রাসী রাষ্ট্রের সাহায্যে ব্যক্তিত্ব-বিকাশ কতদূর সম্ভবপর, সে বিষয়ে সন্দেহের যথেষ্ট অবকাশ থাকে। যে সমস্ত রাষ্ট্রীয় কার্যকলাপ ব্যক্তির ব্যক্তিত্ব-বিকাশের পথে অন্তরায় সৃষ্টি করে, সে সমস্ত কার্যকলাপ কখনই রাষ্ট্রকর্তব্য বলিয়া পরিগণিত হইতে পারে না। এদিক দিয়া দেখিতে গেলে বলা যায় যে, জনমত নিয়ন্ত্রণ করা রাষ্ট্রের পক্ষে দৃশ্যীয় কার্য। জনমত যদি ভ্রান্ত পথেও পরিচালিত হয়, তাহা হইলেও এই জনমত যত সময় পর্যন্ত শাস্তিপূর্ণ ও নিয়মতান্ত্রিক পদ্ধতিতে প্রকাশিত হইবে তত সময় পর্যন্ত রাষ্ট্র এই জনমত দমনের চেষ্টা করিবে না। জনমত হইল জনগণের নির্দিষ্ট বিষয়ে চিন্তাশক্তির অভিব্যক্তি মাত্র। জনমত দমন করার তাৎপর্য হইল মানুষের স্বাধীন চিন্তাশক্তিতে বাধা সৃষ্টি করা। যে মানুষ তাহার চিন্তা প্রকাশ করিতে পারে না, সে মানুষ চিন্তা করিতে শিখে না। আর যে মানুষ চিন্তা করিতে পারে না, সে মানুষপদবাচ্য নহে। সুতরাং স্বাধীনভাবে চিন্তা করা ও চিন্তার বিষয় ব্যক্ত করাই হইল মানুষের প্রধান বৈশিষ্ট্য। রাষ্ট্রের কর্তব্য হইল মানুষের এই স্বাধীন চিন্তাশক্তির উৎকর্ষসাধনে সাহায্য করা। যে রাষ্ট্র নাগরিকগণের স্বাধীন মতামত ব্যক্ত করিবার অন্তরায় সৃষ্টি করে, সে রাষ্ট্রকে কখনও কলাণ রাষ্ট্র বলা যায় না।

দ্বিতীয়তঃ, রাষ্ট্র সাধারণতঃ সমাজে প্রচলিত নানাবিধ আচার, প্রথা ও অনুষ্ঠান নিয়ন্ত্রণ করিবে না। কারণ, এই সামাজিক আচার, প্রথা ও অনুষ্ঠানগুলি দীর্ঘকালব্যাপী জনমতের সমর্থনপুষ্ট হইয়া রাষ্ট্র-নিরপেক্ষভাবে প্রবর্তিত থাকে। এগুলির উপর হস্তক্ষেপ করিলে জনমত ক্ষুব্ধ হয়।

কিন্তু নিরপেক্ষভাবে বিচার করিলে এ মত সব সময়ে গ্রহণযোগ্য নহে। প্রত্যেক সমাজেই এমন কতকগুলি কু-প্রথা, আচার ও অস্থান প্রচলিত থাকে যেগুলি দূর না করিলে কোন রাষ্ট্রের পক্ষেই ব্যক্তির ব্যক্তি-বিকাশের পথ বাধাহীন করা সম্ভব নয়। সামাজিক ও পারিবারিক অবস্থা পরিবর্তনের ফলে মানুষের চিন্তাধারারও পরিবর্তন ঘটে এবং রাষ্ট্রের কর্তব্য হইল যে, সামাজিক অগ্রগতির সহিত সামঞ্জস্যবিধান করিয়া সামাজিক আচার, প্রথা ও অস্থানগুলির পরিবর্তন সাধন করা। সতীদাহ, বাল্যবিবাহ, গঙ্গাসাগরে সম্ভান বিসর্জন দেওয়া প্রভৃতি জনমত-সমর্থিত প্রথা হইলেও কোনও প্রগতিশীল রাষ্ট্রের পক্ষে এই প্রথাগুলি মানিয়া লওয়া রাষ্ট্রকর্তব্য নহে। এরূপ ক্ষেত্রে রাষ্ট্রীয় হস্তক্ষেপ ও নিয়ন্ত্রণ অতিমাত্রায় বাঞ্ছনীয়।

তৃতীয়তঃ, রাষ্ট্র সাধারণতঃ মানুষের রুচিবোধ ও প্রচলিত অভ্যাস নিয়ন্ত্রণের চেষ্টা হইতে বিরত থাকিবে। রাষ্ট্র কখনও মানুষের খাওয়া বা পরিধেয় সম্পর্কে বিধিনিষেধ আরোপ করিবে না। কারণ, এই অভ্যাসগুলি বহুদিন ধরিয়া মানুষের মধ্যে ধীরে ধীরে জন্মে ও পারিবারিক অবস্থার পরিবর্তনে ধীরে ধীরে আপনা হইতেই পরিবর্তিত হয়। বর্তমানে আমাদের দেশে যুবকগণের মধ্যে প্রয়োজনের তাগিদে ধূতির পরিবর্তে প্যান্টালুন ব্যবহৃত হইতেছে। এজন্য রাষ্ট্রীয় হস্তক্ষেপের কোন প্রয়োজন হয় নাই। প্রধানমন্ত্রী যে পোশাক ব্যবহার করেন, তাহা জনসাধারণের ভাল লাগিলে তাহারা স্বতঃপ্রসূত হইয়া ব্যবহার করিবে। সুতরাং প্রধানমন্ত্রী ব্যবহার করেন বলিয়া উক্ত পোশাক জনসাধারণের পক্ষে বাধ্যতামূলক করা সমীচীন নহে।

পরিশেষে বলা যায় যে, রাষ্ট্র এরূপ একটি সংগঠন যাহা শুধু মানুষের বহির্জীবন নিয়ন্ত্রণ করিতে পারে—সুতরাং রাষ্ট্র মানুষের অন্তর্জীবন নিয়ন্ত্রণ করিবার প্রয়াস পাইবে না। মানুষের ধর্মমত ও নীতিবোধের উপর রাষ্ট্রীয় হস্তক্ষেপ অব্যাহিত বলিয়া বিবেচিত হয়।

নূতন মতবাদ (New Theories)

আধুনিক রাষ্ট্রগুলির কার্যকলাপ সম্বন্ধে সুস্পষ্ট ধারণা করিবার নিমিত্ত প্রচলিত আরও দুই-একটি মতবাদের আলোচনা হওয়া প্রয়োজন। বাস্তব-

ক্ষেত্রে কোনও রাষ্ট্রের কর্মক্ষেত্র পূর্বনির্ধারিত একটি নীতির দ্বারা স্থিরীকৃত হইতে পারে না। তবে বিভিন্ন রাষ্ট্রের কার্যকলাপ পর্যালোচনা করিলে দেখিতে পাওয়া যায় যে, কোন একটি বিশেষ নীতি বা মতবাদ দ্বারা রাষ্ট্রের কার্যকলাপ বহুল পরিমাণে প্রভাবিত হইয়া থাকে। ব্যক্তি-স্বাতন্ত্র্যবাদ ও সমাজতন্ত্রবাদ ছাড়াও ধনতন্ত্রবাদ, ক্যাসীবাদ, নাৎসীবাদ প্রভৃতি নতন কতকগুলি মতবাদের আবির্ভাবে রাষ্ট্রকর্তব্য সম্বন্ধে মানুষের ধারণার কিছু পরিবর্তন ঘটিয়াছে। বিংশ শতাব্দীর প্রথমার্ধে ভারতবর্ষে গান্ধীবাদের আবির্ভাব হয়। প্রথম পর্বায়ে গান্ধীবাদ ভারতের রাজনীতি-ক্ষেত্রে সীমাবদ্ধ থাকিলেও বর্তমানে এই মতবাদ ধীরে ধীরে আন্তর্জাতিক-ক্ষেত্রে প্রসারলাভ করিতেছে।

ধনতন্ত্রবাদ (Capitalism)

মানুষের সমাজব্যবস্থায় বিতণালী ও বিভ্রাট এই দুই শ্রেণীর অস্তিত্ব আদিমকাল হইতে পরিদৃষ্ট হইলেও ধনতন্ত্রবাদ শব্দটি আধুনিককালে যে অর্থে ব্যবহৃত হয় সে অর্থে ইহার অস্তিত্বের কোন প্রমাণ পূর্ববর্তী যুগে পাওয়া যায় না। ধনতন্ত্রবাদ শব্দটি বর্তমান যুগে এমন একটি অর্থনৈতিক ব্যবস্থাকে বুঝায়, যে ব্যবস্থাকে আধুনিক সমাজব্যবস্থার সমুদয় ক্রটির জন্ত দায়ী করা হয়। স্তরং বর্তমানে ধনতন্ত্রবাদ শব্দটি একটি তিরস্কার বা অবজ্ঞাসূচক অর্থে ব্যবহৃত হইয়া থাকে।

উনবিংশ শতাব্দীতে ইংলণ্ডে যে শিল্পবিপ্লব সংঘটিত হয় তাহার ফলে উৎপাদনব্যবস্থায় যুগান্তকারী পরিবর্তন আনীত হয়। ক্ষুদ্র ও কুটীরশিল্প-গুলির পরিবর্তে বিরাট আকারে উৎপাদনের নিমিত্ত যন্ত্রপরিচালিত কারখানা প্রবর্তিত হয়। বিরাট পরিমাণ উৎপাদনের নিমিত্ত বহু মূলধনের প্রয়োজন। সাধারণ মজুরশ্রেণীর এই মূলধন না থাকার জন্ত অল্পসংখ্যক পুঁজিপতি তাহাদের মূলধনের সহায়তায় কল-কারখানা প্রতিষ্ঠিত করিয়া শ্রমিকদের শ্রম অর্থের বিনিময়ে ক্রয় করিতে আরম্ভ করিলেন। এইরূপে উৎপাদন-ব্যবস্থা সম্পূর্ণরূপে মুষ্টিমেয় ধনিকশ্রেণীর করায়ত্ত হওয়ায় শ্রমিকশ্রেণীকে সম্পূর্ণরূপে দাস শ্রেণীতে পরিণত করিয়া কালক্রমে যে অর্থনৈতিক ব্যবস্থা চালু হইল, তাহাই সাধারণতঃ ধনতান্ত্রিক ব্যবস্থা বলিয়া পরিচিত।

অর্থনৈতিক ক্ষমতা মুষ্টিমেয় লোকের হস্তে কেন্দ্রীভূত হওয়ায় এই ক্ষমতার বলে তাঁহারা রাষ্ট্রনৈতিক ক্ষমতা হস্তগত করিয়া শাসনব্যবস্থায় তাঁহাদের আধিপত্য বিস্তার করিতে সমর্থ হন। ফলে, সমগ্র সমাজজীবনের উপর এই ধনিকশ্রেণীর কর্তৃত্ব প্রতিষ্ঠিত হয়।

আদর্শ হিসাবে ধনতন্ত্রবাদ এমন একটি অর্থনৈতিক ব্যবস্থা বুঝায়, যে ব্যবস্থায় প্রত্যেক ব্যক্তি স্বাধীনভাবে অর্থনৈতিক কার্যকলাপ নিয়ন্ত্রিত করিতে পারে। ধনতান্ত্রিক ব্যবস্থার প্রধান বৈশিষ্ট্য হইল যে, কোন ব্যক্তি উপযুক্ত পরিমাণ মূলধন সংগ্রহ করিতে পারিলে ব্যক্তিগত লাভের জন্য স্বাধীনভাবে উৎপাদনকার্যে আত্মনিয়োগ করিতে পারে। গুয়েবস্ ধনতন্ত্রবাদের নিম্নলিখিত সংজ্ঞা নির্দেশ করিয়াছেন। তাঁহার মতে ধনতন্ত্রবাদ বা ধনতান্ত্রিক ব্যবস্থা অথবা ধনতান্ত্রিক সভ্যতা এমন একটি সমাজব্যবস্থা, যেখানে শিল্প ও অন্যান্য আইনসম্মত প্রতিষ্ঠানগুলি এমন একটি স্তরে উন্নীত হয় যে, অধিকাংশ শ্রমজীবী উৎপাদনের উপাদানগুলির মালিকানা হইতে বঞ্চিত হইয়া দিনমজুরে পরিণত হয় এবং তাহাদের জীবনধারণের সংস্থান, নিরাপত্তা ও ব্যক্তি-স্বাধীনতা—ব্যক্তিগত মুনাফার উদ্দেশ্যে প্রণোদিত ভূমি-জায়গা ও কল-কারখানার মালিক ও অগণিত শ্রমিকের পরিচালক মুষ্টিমেয় লোকের অহুগ্রহের উপর নির্ভর করে।

ধনতান্ত্রিক ব্যবস্থায় উৎপাদনের উপাদান ও উপভোগের সামগ্রীগুলি যে শুধু ব্যক্তিগত সম্পত্তি বলিয়া পরিগণিত হয় তাহা নয়, উত্তরাধিকারসূত্রে ভবিষ্যৎ বংশধরগণের এইগুলির উপর মালিকানা স্বীকৃত হয়। সুতরাং উৎপাদনের উপাদানগুলি বংশপরম্পরাক্রমে এক শ্রেণীর লোকের দ্বারা পরিচালিত হইয়া তাহাদের মুনাফা বৃদ্ধি করে। ফলে, ভূমি ও শিল্পের মালিকগণ ধনবান্ হইতে অধিকতর ধনবান্ হইতে থাকেন ও সাধারণ লোক দরিদ্র হইতে দরিদ্রতর হয়। এইরূপে কালক্রমে সমাজে বিভবান্ ও বিভবহীন—এই দুই শ্রেণীর আবির্ভাব হইয়া পারস্পরিক স্বার্থসংঘর্ষের সূত্রপাত করে। এই ব্যবস্থায় যে-কোনও ব্যক্তি যে-কোনও উৎপাদনকার্যে স্বাধীনভাবে আত্মনিয়োগ করিতে পারে। যে-কোন লোক ব্যক্তিগত লাভের উদ্দেশ্যে অপরের সহিত চুক্তিবদ্ধ হইয়া নিজ সম্পত্তি পরিচালনা করিতে পারে। ধনতান্ত্রিক ব্যবস্থায় উৎপাদনক্ষেত্রে উৎপাদক বৈরূপ অবাধ

প্রতিযোগিতা করিবার অধিকারী, উপভোগের ক্ষেত্রে ক্রেতা বা উপভোগ-কারী সেইরূপ অবাধ স্বাধীনতার অধিকারী। ক্রেতা তাহার স্বাধীন ইচ্ছানুসারে দ্রব্য ক্রয় করিতে পারে। ক্রেতা ও বিক্রেতার এই অবাধ প্রতিযোগিতার দ্বারা দ্রব্যমূল্য নির্ধারিত হইয়া চাহিদা ও যোগানের সমতা আনয়ন করে। ধনতান্ত্রিক ব্যবস্থায় উৎপাদন ও উপভোগ নিয়ন্ত্রণ করিবার কোনও কেন্দ্রীয় সংগঠন থাকে না। উৎপাদন, বিনিময়, উপভোগ প্রভৃতি দ্রব্যমূল্য দ্বারা নির্ধারিত হয় এবং দ্রব্যমূল্য, চাহিদা ও যোগানের পারস্পরিক প্রভাব দ্বারা নির্ধারিত হইয়া অনেকটা স্বয়ংক্রিয় পদ্ধতিতে স্থিতিাবস্থা প্রাপ্ত হয়। বর্তমান যুগে ধনতান্ত্রিক ব্যবস্থার আরও কয়েকটি বৈশিষ্ট্য পরিলক্ষিত হয়। আধুনিক বিরাট পরিমাণ উৎপাদনব্যবস্থায় ঝুঁকি ও দায়িত্ব অত্যধিক পরিমাণে বৃদ্ধি পাইয়াছে। বাহারা উৎপাদনকার্যের জন্য মূলধন সরবরাহ করে তাহারা সাধারণতঃ এই ঝুঁকি বহন করে, কিন্তু উৎপাদনব্যবস্থা পরিচালনা করিতে তাহারা অসমর্থ। সুতরাং বিরাট পরিমাণ উৎপাদনব্যবস্থা পরিচালনা করিবার নিমিত্ত নতুন এক শ্রেণীর লোকের আবির্ভাব হইয়াছে। ইহাদিগকে সংগঠক বা পরিচালক বলা হয়। সংগঠকেরা ঝুঁকি বহন করেন বলিয়া উৎপাদনক্ষেত্রে অনেক সময় তাঁহারা ভ্রান্ত নীতির দ্বারা পরিচালিত হইয়া থাকেন। ধনতান্ত্রিক ব্যবস্থায় ক্রেতা, বিক্রেতা ও শ্রমিকদের মধ্যে অবাধ প্রতিযোগিতা বর্তমান থাকিলেও অনেক সময় শ্রেণীস্বার্থ-সংরক্ষণের নিমিত্ত ইহারা একতাবদ্ধ হয়। এই একতার ফলে শ্রমিকসংঘ, ক্রেতাসংঘ ও নানাজাতীয় উৎপাদকসংঘের আবির্ভাব হইয়াছে।

ধনতান্ত্রিক ব্যবস্থার সুফল (Merits of Capitalism)

ধনতান্ত্রিক ব্যবস্থার সমর্থকগণ বলেন, এই ব্যবস্থায় উৎপাদকেরা ব্যক্তিগত মুনাফা বৃদ্ধি করিবার উদ্দেশ্য-প্রণোদিত হইয়া পারস্পরিক অবাধ প্রতিযোগিতায় লিপ্ত হয়। ফলে, উৎপাদনের উৎকর্ষ বৃদ্ধি পায় ও দ্রব্যমূল্য হ্রাস হয়। প্রতিযোগিতার ফলে একমাত্র যোগ্য উৎপাদক টিকিয়া থাকে। ক্রেতগণ স্বল্পমূল্যে উৎকৃষ্ট ধরনের দ্রব্য পাইয়া থাকে।

দ্বিতীয়তঃ, এই ব্যবস্থায় ক্রেতাগণ তাহাদের স্বাধীন ইচ্ছানুসারে দ্রব্য ক্রয় করিতে পারে। দ্রব্যক্রয়-ব্যাপারে ক্রেতার পূর্ণ-স্বাধীনতার ফলে

উৎপাদকগণ ক্রেতার কুচি ও চাহিদা অহুযায়ী দ্রব্য উৎপাদন করিতে বাধ্য হয়। ক্রেতা ও বিক্রেতার এই স্বাধীন ক্রয়-বিক্রয়-ব্যবস্থাকে অর্থনৈতিক গণতন্ত্রের নিদর্শন বলা যাইতে পারে।

তৃতীয়তঃ, ধনতান্ত্রিক উৎপাদনব্যবস্থায় ঝুঁকির পরিমাণ বৃদ্ধি পাওয়ার ফলে উৎপাদনকার্য বিশেষ বিবেচনা ও দক্ষতার সহিত পরিচালনা করিতে হয়। দক্ষ পরিচালনার ফলে উৎপাদনে কম অপচয় হয়।

চতুর্থতঃ, ধনতান্ত্রিক ব্যবস্থা প্রধানতঃ মূল্যনিয়ন্ত্রণ দ্বারা ব্যক্তিগত মুনাফা-বৃদ্ধির উদ্দেশ্যে পরিচালিত হয় বলিয়া এই ব্যবস্থায় দুর্নীতি, অযোগ্যতা, পক্ষপাতিত্ব বা আমলাতান্ত্রিক ব্যবস্থার ক্রটি প্রশ্রয় পায় না। কি ধনতান্ত্রিক, কি গণতান্ত্রিক সকল ব্যবস্থায়ই সমর্থ পরিচালকের প্রয়োজন। ধনতান্ত্রিক ব্যবস্থায় অবাধ প্রতিযোগিতার ফলে, যাহারা যোগ্যতম তাহারা টিকিয়া থাকে ও পুরস্কৃত হয়। যোগ্য ব্যক্তির পুরস্কারলাভকে গণতন্ত্র-বিরোধী আদর্শ বলা সমীচীন নহে।

ধনতান্ত্রিক ব্যবস্থার কুফল (Evils of Capitalism)

ধনতান্ত্রিক ব্যবস্থার প্রধান দোষ হইল, ইহাতে সমাজে ধনবৈষম্যের সৃষ্টি হইয়া ধনী ও দরিদ্রের পার্থক্য বৃদ্ধি পায়। ফলে, দরিদ্র ব্যক্তিগণ তাহাদের রাজনৈতিক, সামাজিক ও ধর্মসম্পর্কীয় স্বাধীনতা হারািয়া ধনীর ক্রীতদাসে পর্যবসিত হয়। দ্বিতীয়তঃ, ধনবৈষম্যের ফলে সাধারণ লোক ব্যক্তিত্ব-বিকাশের উপযোগী সমান সুযোগ পায় না। সমান সুযোগের অভাবে যোগ্যতা অর্জন করিতে না পারায় দরিদ্র ব্যক্তির জীবনধারণোপযোগী জীবিকা-অর্জনেও অস্তুরায় ঘটে। তৃতীয়তঃ, ধনতান্ত্রিক ব্যবস্থায় ক্রেতার যে স্বাধীনতার উল্লেখ করা হয়, কার্যক্ষেত্রে এই স্বাধীনতা অসার বলিয়া প্রতিপন্ন হয়। নানাজাতীয় বিজ্ঞাপন ও প্রচারকার্যের দ্বারা ক্রেতার ক্রয়স্বাধীনতা স্তূর্ণ করা হয়। অনেকক্ষেত্রে উৎপাদকগণ সংযবদ্ধ হইয়া একচেটিয়া কারবার প্রতিষ্ঠা করে ও উচ্চমূল্য নির্ধারণ করিয়া ক্রেতাকে দ্রব্য ক্রয় করিতে বাধ্য করে। চতুর্থতঃ, প্রতিযোগিতামূলক উৎপাদনব্যবস্থায় উৎপাদনের পরিমাণ ও উৎপাদনের উৎকর্ষ ব্যক্তিগত মুনাফার পরিমাণ দ্বারা নির্ধারিত হয়। সমাজকল্যাণের দিকে দৃষ্টি রাখিয়া সমাজের অধিকাংশ

লোকের বাহা প্রয়োজনীয় সেই সমস্ত দ্রব্য সব সময়ে উৎপাদিত হয় না। যে সমস্ত দ্রব্য যেভাবে উৎপাদন করিলে উৎপাদকের ব্যক্তিগত মুনাফা বৃদ্ধি পাইবে, উৎপাদনকার্য ঠিক সেইভাবে পরিচালিত হয়। ফলে উৎপাদনকার্যে নানাবিধ অপচয় ঘটে। পঞ্চমতঃ, ধনতান্ত্রিক ব্যবস্থার ফলে বেকারসমস্যা, বাণিজ্য-চক্র ও শ্রমিক-মালিক বিরোধ আবির্ভূত হয়। ফলে সামাজিক শান্তি ও প্রগতি ব্যাহত হয়।

ধনতান্ত্রিক ব্যবস্থার কুফলগুলি দূর করিবার দুইটি উপায় আছে। প্রথমটি হইল, সমাজতান্ত্রিক ব্যবস্থার প্রবর্তন। কিন্তু অনেকে সমাজতান্ত্রিক ব্যবস্থার পূর্ণ প্রবর্তন সমর্থন করেন না। দ্বিতীয়টি হইল, মিশ্র ব্যবস্থার প্রবর্তন। ধনতান্ত্রিক ব্যবস্থাকে সম্পূর্ণরূপে উৎপাটিত না করিয়া কতকগুলি বিশেষ ক্ষেত্রে রাষ্ট্রায়ত্তকরণ প্রবর্তন ও প্রয়োজনমত অন্তর্ক্ষেত্রে রাষ্ট্রনিয়ন্ত্রণ প্রবর্তন দ্বারা ধনবৈষম্য প্রতিরোধ করা সম্ভব। এই উদ্দেশ্য-প্রণোদিত হইয়া অনেক রাষ্ট্র ক্রমবর্ধমান হারে আয়কর ও মৃত্যুকর এবং অনিষ্টকর দ্রব্য-উৎপাদনের উপর কর ধার্য করিয়াছে। বেকারসমস্যা, বাণিজ্যচক্র ও শ্রমিক-মালিক বিরোধ অবসানকল্পে অনেক রাষ্ট্র উপযুক্ত ব্যবস্থা গ্রহণ করিতেছে। ধনতান্ত্রিক ব্যবস্থার বিরুদ্ধে বিপ্লবাত্মক আন্দোলনের ফলে রাশিয়া ও চীনদেশে ধনতান্ত্রিক ব্যবস্থার অবসান ঘটিয়াছে। ইংলণ্ড, মার্কিন যুক্তরাষ্ট্র প্রভৃতি দেশে একাবদ্ধভাবে ধনতান্ত্রিকতার বিরুদ্ধে ধর্মঘট ব্যতীত এখনও পর্যন্ত অন্ত কোন গণ-অভ্যুত্থান হয় নাই। তথাপি এই সমস্ত দেশের রাষ্ট্রনায়কগণ ক্রমবর্ধমান গণ-অসন্তোষ দূর করিবার উদ্দেশ্যে অনেকক্ষেত্রে ধনতান্ত্রিক ও সমাজতান্ত্রিক ব্যবস্থার সমন্বয়ে মিশ্র ব্যবস্থার প্রবর্তন করিতেছেন।

ফ্যাসীবাদ (Fascism)

প্রথম বিশ্বযুদ্ধের অব্যবহিত পরে ইতালী দেশে ফ্যাসিষ্ট মতবাদের অভ্যুত্থান হয়। ফ্যাসিষ্ট মতবাদের প্রবর্তক ও ফ্যাসিষ্ট দলের একচ্ছত্র নায়ক ছিলেন বেনিটো মুসোলিনি। প্রথম মহাযুদ্ধের পর ইতালীতে যে সমস্ত রাজনৈতিক ও অর্থনৈতিক সমস্যা দেখা দিয়াছিল, সে সমস্যাসমূহের সমাধান করিতে তৎকালীন ইতালীয় গণতান্ত্রিক সরকার সম্পূর্ণরূপে ব্যর্থতার পরিচয় দিয়াছিলেন। ফলে জনসাধারণের মধ্যে নৈরাশ্যের সঞ্চার হয় ও জনসাধারণ

সরকারের ক্ষমতায় ক্রমশঃ আত্মহীন হইয়া পড়ে। রুশ-বিপ্লবের অতীতকরণে ইতালীয় কৃষক ও মজুরশ্রেণী জমি ও কল-কারখানা দখল করিতে আরম্ভ করে। ইতালী দেশ যখন ক্রমশঃ সাম্যবাদের দিকে অগ্রসর হইতেছিল তখন মুসোলিনী ইতালীয় জনসাধারণের নিকট এক ভবিষ্যৎ সম্ভাবনাপূর্ণ প্রগতি-মূলক ‘কর্মসূচী’ উপস্থাপিত করিয়া তাহাদের ফ্যাসিষ্ট মতবাদে দীক্ষিত করিতে সাক্ষালাভ করেন। এইরূপে মুসোলিনীর প্রভাবে ইতালী সাম্যবাদনীতি গ্রহণ না করিয়া ফ্যাসীবাদী রাষ্ট্রে পরিণত হইল। এই সময়ে ইতালীতে একটি শক্তিশালী সরকারের প্রয়োজন ছিল। মুসোলিনী তাঁহার অল্পসংখ্যক অতীতের সহায়তায় রাষ্ট্রক্ষমতা হস্তগত করিয়া আভ্যন্তরীণ অবস্থার উন্নতি ও বিশেষ করিয়া আন্তর্জাতিক ক্ষেত্রে ইতালীর নষ্টগোরব পুনরুদ্ধারের জন্য আত্মনিয়োগ করিলেন।

ফ্যাসীবাদ শব্দটি একটি রোমান শব্দ হইতে উদ্ভূত। এই শব্দটির অর্থ হইল ‘একসঙ্গে একখানি কুঠারসহ আবদ্ধ কতকগুলি কাঠখণ্ড’। ইহাই ছিল প্রাচীন রোমে রাষ্ট্রকর্তৃত্বের নিদর্শন। ইতালীয় ফ্যাসিষ্ট দলও এই প্রতীক-চিহ্ন গ্রহণ করে।

ফ্যাসিষ্ট মতবাদ অনুসারে রাষ্ট্র, জাতি ও সমাজ হইতে অভিন্ন এক সর্বাত্মক সংগঠন। রাষ্ট্ররূপ সংগঠন হইল সর্বশক্তির আধার—ইহার বিনাশ নাই। ফ্যাসীবাদিগণ সমষ্টিগত জাতীয় জীবনের উপর সবিশেষ গুরুত্ব আরোপ করেন। তাঁহাদের মতে ব্যক্তিগত জীবনের উত্থান-পতনে জাতীয় জীবনের গতি কোনক্রমে ব্যাহত হয় না। ফ্যাসীবাদীরা জাতীয় স্বার্থের পরিপন্থী কোনরূপ ব্যক্তিস্বাধীনতা স্বীকার করেন না। ফ্যাসীবাদীরা সংখ্যাগরিষ্ঠ দলের শাসন, সাম্য, স্বাধীনতা প্রভৃতি গণতান্ত্রিক আদর্শে আত্মহীন। তাঁহারা নেতৃত্বে বিশ্বাসী ও সেইজন্য ফ্যাসীবাদী রাষ্ট্রের কাঠামো মূলতঃ অভিজাততান্ত্রিক ও স্বৈরাচারী। ফ্যাসীবাদীরা গণ-সার্বভৌমত্বে বিশ্বাস করেন না। তাঁহাদের মতে জাতীয় স্বার্থের একমাত্র রক্ষক হইল রাষ্ট্র, আর এই রাষ্ট্র সর্বতোভাবে জনসাধারণকে পরিচালনা করিবে। রাষ্ট্রের ক্ষমতা পরিচালিত হইবে মুষ্টিমেয় ঘোণ্য ব্যক্তির দ্বারা ৭

ফ্যাসীবাদিগণ শাস্তিবাদের উগ্র বিরোধী। ফ্যাসীবাদের জন্মদাতা মুসোলিনীর মতে যুদ্ধ করা জাতীয় জীবনের একটি স্বাভাবিক কর্তব্য। যুদ্ধ

বর্জন করিলে জাতীয় শক্তির অপচয় ঘটে। ফ্যাসীবাদ সাম্যবাদেরও বিরোধী। ফ্যাসীবাদীরা শ্রেণীসংগ্রাম বিশ্বাস করেন না বা একটিমাত্র দল-শাসনকার্য পরিচালনা করিবে, ইহাও তাঁহারা বরদাস্ত করিতে পারেন না। বিভিন্ন ধরনের স্বার্থসংরক্ষণের জন্ত ফ্যাসীবাদীরা ব্যক্তিগত প্রতিনিধিত্বের ব্যবস্থা সমর্থন করেন।

অর্থনৈতিক ক্ষেত্রে ফ্যাসীবাদ, ধনতত্ত্ববাদ ও সমাজতত্ত্ববাদের সমন্বয়-সাধন করিয়া উভয় ব্যবস্থার সুবিধাগ্রহণের পক্ষপাতী। এইজন্য মুসোলিনী জমি-জায়গা প্রভৃতি উৎপাদনের উপাদানগুলিকে সম্পূর্ণরূপে রাষ্ট্রায়ত্তে আনয়ন না করিয়া ব্যক্তিগত মালিকানা স্বীকার করিয়া লইয়াছিলেন। কিন্তু এই ব্যক্তিগত সম্পত্তি যাহাতে শুধুমাত্র ব্যক্তিগত মুনাফারূপের উদ্দেশ্য পরিচালিত হইয়া জাতীয় স্বার্থের পরিপন্থী না হয়, তজ্জন্ম কঠোর রাষ্ট্রনিয়ন্ত্রণ-ব্যবস্থা প্রবর্তিত করিয়াছিলেন। কলে একদিকে যেমন ব্যক্তিগত কর্মপ্রেরণা ব্যাহত হয় নাই, অপর দিকে সেইরূপ শ্রমিক ও ক্রেতার স্বার্থ ক্ষুণ্ণ হইতে দেওয়া হয় নাই।

মুসোলিনীর কর্তৃত্বাধীনে দেশের আভ্যন্তরীণ ব্যাপারে অতি অল্পকালের মধ্যে ইতালী অনেক গুণগতিমূলক কার্য সম্পাদন করিতে সমর্থ হইয়াছিল। আন্তর্জাতিক ক্ষেত্রেও ইতালী তাহার নষ্টগোরব পুনরুদ্ধার করিয়া একটা বিশিষ্ট আসন অধিকার করিয়াছিল। কিন্তু জাতীয় জীবনের নানাদিকে নানা উৎকর্ষসাধনে সমর্থ হইলেও ফ্যাসীবাদ আদৌ সমর্থনযোগ্য নয় এবং ইতালীয় জনসাধারণ এই মতবাদ শেষ পর্যন্ত গ্রহণ করে নাই। ব্যক্তিকে সম্পূর্ণরূপে উপেক্ষা করিয়া জবরদস্তিমূলক পদ্ধতিতে সমষ্টির উন্নতিসাধন সম্ভবপর নয়। ধর্মজ্ঞান ও নীতিজ্ঞানকে সম্পূর্ণরূপে বিসর্জন দিয়া একমাত্র পশুবলের উপর মহৎ কিছু স্থাপি করা যায় না। ফ্যাসীবাদ সম্পূর্ণরূপে পশুবলের উপর প্রতিষ্ঠিত, তাই যেকোন আকস্মিকভাবে ইহার অভ্যুত্থান হইয়াছিল ততোধিক আকস্মিকভাবে এই নীতিজ্ঞান-বিরোধী মতবাদের অবসান ঘটিল।

নাৎসীবাদ (Nazism)

প্রথম মহাযুদ্ধের কলে জার্মানীর জাতীয় জীবনে যে দুঃখ, দৈন্ত ও গ্লানি দেখা দিয়াছিল তাহার প্রতিবিধানকল্পে নাৎসীবাদের আবির্ভাব হয়।

সুতরাং ইতালীয় ফ্যাসীবাদ ও জার্মানীর নাৎসীবাদ এবং এই উভয় মতবাদের জন্মদাতাঘরের মধ্যে যে একটা নিকট সম্বন্ধ স্থাপিত হইবে ইহা অত্যন্ত স্বাভাবিক বল। ঘাইতে পারে। নাৎসীবাদ মূলতঃ ফ্যাসীবাদের সহধর্মী হইলেও ইহার একটা বৈশিষ্ট্য পরিলক্ষিত হয়। নাৎসীবাদের জন্মদাতা হের হিটলার, জার্মান জাতি যে বিস্তৃত আর্থবংশ-সমুদ্ভূত—ইহা অন্তরের সহিত বিশ্বাস করিতেন। সুতরাং জার্মান জাতির শ্রেষ্ঠত্ব প্রতিষ্ঠা করাই ছিল তাঁহার মতবাদের একমাত্র উদ্দেশ্য। এই উদ্দেশ্য-প্রণোদিত হইয়া নাৎসীবাদ অতি অল্পকালের মধ্যে জাতীয় জীবনে অনেক পরিবর্তন সাধন করিতে সমর্থ হইয়াছিল।

ফ্যাসীবাদের মত নাৎসীবাদও ব্যক্তিকে উপেক্ষা করিয়া সর্বগ্রাসী রাষ্ট্রের একাধিকার বিস্তারের পক্ষপাতী। একদলীয় শাসন ও দলীয় নেতার হস্তে সর্বময় কর্তৃত্ব সমর্পণ, ইহাই হইল নাৎসীবাদীদের মূলমন্ত্র। নাৎসী রাষ্ট্রে ব্যক্তির কোন স্থান নাই। রাষ্ট্রের একমাত্র নিয়ামক, সর্বক্ষমতার আধার নাৎসীনায়ক হইলেন জনসাধারণের দণ্ডমুণ্ডের বিধাতা। নাৎসীবাদ সর্বদিক দিয়াই ফ্যাসীবাদের অনুরূপ। নাৎসীবাদ ফ্যাসীবাদের মতই এই সত্য প্রমাণিত করিয়া গেল যে, নীতিজ্ঞান-বিরোধী কোন মতবাদই স্থায়িত্বলাভ করিতে পারে না।

গান্ধীবাদ (Gandhism)

গান্ধীবাদ ভারতে তথা সমগ্র জগতে এক নবযুগের সূত্রপাত করিয়াছে। বহু পূর্ব হইতেই রাজনীতি ধর্মজ্ঞান ও নীতিজ্ঞান-বিবর্জিত হইয়াছিল। গান্ধীবাদ মানুষের সহজাত আয়বুদ্ধিকে রাজনৈতিক ক্ষেত্রে প্রয়োগ করিয়া মানুষের রাজনৈতিক জীবনকে মহত্তর করিবার প্রয়াস পাইয়াছিল। গান্ধীবাদ মূলতঃ ভারতীয় আদর্শের উপর প্রতিষ্ঠিত। ভারতীয় আদর্শের মূল কথা হইল অহিংসা। কি সামাজিক, কি অর্থনৈতিক, কি রাজনৈতিক জীবনে মানুষ হিংসা দ্বারা কখনও তাহার শ্রেয়ঃ লাভ করিতে পারে না।

রাষ্ট্রনৈতিক ক্ষেত্রে গান্ধীবাদ এই অহিংসানীতির উপর গণতান্ত্রিক মন্যবস্থা প্রবর্তনের পক্ষপাতী। গান্ধীবাদ অনুসারে প্রকৃত গণতন্ত্র কখনও হিংসার দ্বারা প্রতিষ্ঠিত হইতে পারে না। গান্ধীজীর মতে পাশ্চাত্য দেশসমূহে যে

তথাকথিত গণতন্ত্র প্রচলিত আছে, সেগুলি ধনিকশ্রেণী কর্তৃক দরিদ্রশ্রেণীকে শোষণ করিবার যন্ত্রবিশেষ মাত্র। এইরূপ অস্ত্রায় ও হিংসাত্মক ব্যবহার দ্বারা প্রকৃত সাম্য প্রতিষ্ঠিত হইতে পারে না। হিংসাত্মক কার্য দ্বারা প্রতিষ্ঠিত সাম্যমূলক সমাজব্যবস্থায় ব্যক্তির অর্থনৈতিক ও সামাজিক স্বত্ব-স্ববিধা বৃদ্ধি পাইতে পারে, কিন্তু এই ব্যবস্থার দ্বারা ব্যক্তিত্বের পূর্ণবিকাশ সম্ভব নয়। কারণ, হিংসাত্মক কার্য দ্বারা রাষ্ট্রীয় ক্ষমতা মুষ্টিমেয় ব্যক্তির হস্তে কেন্দ্রীভূত হয়, ফলে জনসাধারণ এই ক্ষমতা হইতে বঞ্চিত হয়। সুতরাং গান্ধীবাদে ক্ষমতাপ্রয়োগের কোন স্থান নাই। এইজন্য গান্ধীজী সমাজকে রাষ্ট্রনিরপেক্ষ করিয়া গঠন করিতে চাহিয়াছিলেন। অ-রাষ্ট্রতন্ত্রীদেব মত গান্ধীবাদ রাষ্ট্রকর্তৃত্ব ও রাষ্ট্রনিয়ন্ত্রণে আস্থাহীন। তাই গান্ধীবাদ রাষ্ট্রনিয়ন্ত্রণমুক্ত পঞ্চায়েত ব্যবস্থায় স্বাধীন মাহুষের স্বাধীন সমাজগঠনের পক্ষপাতী। গান্ধীজীর মতে কোন রাষ্ট্রই বলপ্রয়োগের দ্বারা প্রকৃত সাম্য প্রতিষ্ঠিত করিতে পারে না। সাম্য ও মৈত্রীভাব মাহুষের সহজাত ত্রায়বুদ্ধির উপর প্রতিষ্ঠিত না হইলে কখনও স্থায়ী হয় না।

অর্থনৈতিক ক্ষেত্রে গান্ধীবাদ বিকেন্দ্রীকৃত ক্ষুদ্রায়তনের উৎপাদনব্যবস্থার পক্ষপাতী। আধুনিককালে জটিল যন্ত্রপাতির সাহায্যে যে অতিকায় কল-কারখানা স্থাপিত হইয়াছে তাহাতে মাহুষ এই যন্ত্রদানবের ক্রীতদাসে পরিণত হইয়াছে। এইজন্য গান্ধীজী যন্ত্রবিরোধী ছিলেন। যন্ত্রবিরোধিতা গান্ধীবাদের একটা প্রধান বৈশিষ্ট্য হইলেও উৎপাদনকার্যে যন্ত্রের প্রয়োজনীয়তা গান্ধীজী অস্বীকার করেন নাই। যে সমস্ত যন্ত্রপাতি মাহুষের দৈহিক শ্রমের লাভব করে এবং যেগুলি শ্রমিকগণ অনায়াসে ব্যবহার করিতে পারে, সেগুলির ব্যবহার গান্ধীবাদ অমুমোদন করে। ক্ষুদ্র ক্ষুদ্র যন্ত্রপাতির উৎপাদনের নিমিত্ত ইম্পাত ও লোহশিল্পের বড় কারখানা থাকা প্রয়োজন। এই জাতীয় দু-চারটি বড় আকারের শিল্পসংগঠন গান্ধীজীর অমুমোদন লাভ করিয়াছিল। কিন্তু বড় আকারের কারখানাগুলি রাষ্ট্রায়ত্ত্বকরণের প্রয়োজনীয়তাও গান্ধীবাদ সমর্থন করে। অর্থনৈতিক ক্ষেত্রে গান্ধীবাদ ধনতান্ত্রিক উৎপাদনব্যবস্থার অবশুস্তাবী কুফলগুলি দূর করিয়া এরূপ একটা সহজ ও সরল উৎপাদনব্যবস্থা প্রবর্তন করিতে চাহিয়াছিল, যে ব্যবস্থায় যন্ত্র ও যন্ত্রবিশেষজ্ঞ থাকিবে, কিন্তু যন্ত্রের মালিক ও যন্ত্রবিশেষজ্ঞগণ ব্যক্তিগত

মুনাফাবুদ্ধির জন্তু যেন মানুষকে শুধু ভোগের উপকরণ-উৎপাদনের উপাদানে পৰ্ববলিত করিতে না পারে। বড় বড় কল-কারখানায় যে সমস্ত দ্রব্যসম্ভার উৎপাদিত হয়, তাহাতে শিল্পী মজুরী পাইলেও সৃষ্টির আনন্দ হইতে সম্পূর্ণ বঞ্চিত থাকে। যে উৎপাদনব্যবস্থায় শিল্পী যন্ত্রের একটি ক্রীড়নক হইয়া উৎপাদনের একটি গোণ উপাদানে পরিণত হয়, সেরূপ উৎপাদনব্যবস্থা কখনও সমাজের প্রকৃত কল্যাণসাধন করিতে পারে না। জনগণের অর্থনৈতিক তথা সৰ্বাঙ্গীণ উন্নতিসাধন করাই হইল উৎপাদনের উদ্দেশ্য। কিন্তু যে উৎপাদনব্যবস্থা ভোগের উপকরণ উৎপাদন করিবার উপর অধিকতর গুরুত্ব আরোপ করিয়া ব্যক্তিকে নষ্ট করে, গান্ধীবাদ কখনই তাহাকে সমর্থন করে না।

গান্ধীবাদের আর একটি বৈশিষ্ট্য হইল, কি অর্থনৈতিক ক্ষেত্রে, কি রাজনৈতিক ক্ষেত্রে, ক্ষমতার বিকেন্দ্রীকরণ। অহিংস আদর্শবিশিষ্ট সমাজব্যবস্থা গঠন করিতে গেলে অর্থনৈতিক ক্ষেত্রে ক্ষুদ্র ক্ষুদ্র শিল্পব্যবস্থা প্রবর্তন করা অপরিহার্য। যন্ত্রের সাহায্যে বৃহৎ শিল্পসংগঠনের ফলে অর্থনৈতিক ক্ষমতা ও প্রতিপত্তি কেন্দ্রীভূত হয়, ফলে গণতান্ত্রিক রাষ্ট্রব্যবস্থার আবির্ভাব হয়। সুতরাং যন্ত্রসহযোগে কেন্দ্রীভূত উৎপাদনব্যবস্থার পরিবর্তে বিকেন্দ্রীকৃত ক্ষুদ্র শিল্পব্যবস্থা অবলম্বন করিয়া কেন্দ্রীভূত সমাজতান্ত্রিক ব্যবস্থা ও ধনতান্ত্রিক ব্যবস্থার কুফল দূর করা যায়। এইরূপে গান্ধীবাদ সরল ও অনাড়ম্বর জীবনযাপনের মধ্য দিয়া চিন্তাধারার উৎকর্ষসাধনের উদ্দেশ্যে নূতন এক সামাজিক পরিবেশ সৃষ্টি করিতে প্রয়াস পাইয়াছিল।

গান্ধীবাদের বিরুদ্ধে অনেক সমালোচনা করা হইয়াছে। এদেশের প্রধান সমস্যা হইল অর্থনৈতিক দুর্গতি। এই দুর্গতি দূর করিয়া জনগণের জীবনযাত্রার মান উন্নয়ন করিবার পক্ষে গান্ধীবাদ কতটা সহায়ক সে সম্বন্ধে সন্দেহের যথেষ্ট অবকাশ আছে। অল্প দেশ দূরে থাকুক, এমন কি তাঁহার স্বদেশ ভারতও উৎপাদনব্যবস্থায় গান্ধীবাদ গ্রহণ করে নাই। যন্ত্রপাতির সাহায্য ব্যতীত অধিক উৎপাদন সম্ভব নয়। পর্যাপ্ত পরিমাণে ধনোৎপাদন না হইলে দেশের বিভিন্ন সমস্যার সমাধান আদৌ সম্ভব নয়।

গান্ধীবাদ রাষ্ট্রনিরপেক্ষভাবে ব্যক্তিগত চরিত্রের উৎকর্ষের উপর গুরুত্ব আরোপ করিয়াছে। রাষ্ট্রকে বাদ দিয়া ব্যক্তিগত উন্নতি কতটা সম্ভব তাহাও নিশ্চিতরূপে বলা যায় না।

বাস্তবক্ষেত্রে গান্ধীবাদ কতটা প্রযোজ্য সে সম্বন্ধে সন্দেহের যথেষ্ট অবকাশ থাকিলেও এ-কথা বলা যাইতে পারে যে, গান্ধীবাদ এই হিংসাকুলিত ও সত্য স্বার্থসংঘাতে লিপ্ত মানবসমাজে এক শান্তিময় জীবনযাত্রার বার্তা বহন করিয়া আনিয়াছিলেন। রণোন্মত্ত মানুষের কানে শান্তির সে বাণী না পৌঁছিতে পারে, কিন্তু মানুষ যেদিন রণক্লান্ত হইয়া অবসর হইয়া পড়িবে, সেদিন গান্ধীবাদ—‘মা হিংসীঃ’—একমাত্র সত্যরূপ জগতে প্রতিষ্ঠিত হইবে। সমগ্র মানবজাতি হিংসার পথ পরিত্যাগ করিয়া ভ্রাতৃত্ববন্ধনে আবদ্ধ হইবে। নতুবা সমগ্র মানবসমাজের ধ্বংস অনিবার্য।

রাজনীতির শেষ সমস্যা (Ultimate Problem of Politics)

বিভিন্ন যুগে বিভিন্ন জাতির রাজনৈতিক চিন্তাধারা পর্যালোচনা করিলে দেখিতে পাওয়া যায় যে, মানুষ তাহার রাজনৈতিক জীবনে যে চরম সমস্যার সম্মুখীন হইয়াছে এবং আজ পর্যন্ত যে সমস্যার সন্তোষজনক সমাধান করিতে পারে নাই, সে সমস্যাটি হইল—ব্যক্তি-স্বাধীনতার সহিত রাষ্ট্রকর্তৃত্বের সমন্বয়সাধন (Reconciliation between Individual Liberty and State Authority)। যুগে যুগে বিভিন্ন দেশে ব্যক্তি বা ব্যক্তিসমষ্টির সহিত রাষ্ট্রের সংঘাত চলিয়াছে এবং এই সংঘাতকে কেন্দ্র করিয়া উভয়ের সম্পর্কের মধ্যে সামঞ্জস্যবিধান করিবার উদ্দেশ্যে নূতন নূতন রাজনৈতিক চিন্তাধারার আবির্ভাব হইয়াছে। প্রাচীন গ্রীক ও রোমক চিন্তাধারা হইতে আরম্ভ করিয়া আধুনিককাল পর্যন্ত নানাভাবে ব্যক্তিস্বাধীনতা ও রাষ্ট্রকর্তৃত্বের মধ্যে আদর্শ সম্পর্ক স্থাপনের উদ্দেশ্যে নানা মতবাদ এবং নানা প্রকার শাসনব্যবস্থার উদ্ভাবন হইয়াছে, কিন্তু আজ পর্যন্ত কোন দেশেই এই সমস্যার পূর্ণ সমাধান সম্ভব হয় নাই।

এই সমস্যার সহিত দুইটি প্রশ্ন জড়িত আছে। প্রথমটি হইল—কে বা কাহারো শাসনকার্য পরিচালনা করিবে? দ্বিতীয়টি হইল—কি পরিমাণ ক্ষমতা রাষ্ট্রকে পরিচালনা করিতে দেওয়া যাইতে পারে? প্রথম প্রশ্নটি রাষ্ট্রীয় সংগঠন-সম্পর্কিত এবং রাজনৈতিক ক্ষমতা-বন্টনের উপর নির্ভর করে। দ্বিতীয়টি হইল—রাষ্ট্রীয় কার্যপরিধি-সম্পর্কিত এবং ব্যক্তির পৌর অধিকারের প্রকৃতি ও বিস্তৃতির উপর নির্ভর করে। রাষ্ট্রীয় ক্ষমতা বা ব্যক্তিগত অধিকার

এই দুইটির যে-কোনটির আধিক্য ঘটিলে রাষ্ট্রনৈতিক ক্ষেত্রে বিপর্যয় ঘটে। অনিয়ন্ত্রিত স্বাধীনতার ক্ষেত্রে স্বাধীনতার অপব্যবহার ঘটে, অপরপক্ষে অত্যধিক রাষ্ট্রকর্তৃত্ব স্বৈরাচারে পরিণত হয়। প্রথম ক্ষেত্রে অরাজকতা সৃষ্টি হয়। দ্বিতীয় ক্ষেত্রে স্বেচ্ছাচারের ফলে ব্যক্তি-স্বাধীনতা ক্ষুণ্ণ হয়। গ্রীক দার্শনিক য্যারিষ্টটল এই সমস্তা সম্পর্কে বিশেষ অবহিত ছিলেন এবং এই সমস্তা সমাধানকল্পে তিনি রাজনৈতিক ক্ষেত্রে মধ্যপন্থা অবলম্বনের পক্ষপাতী ছিলেন। হব্‌স ও লক্‌ এই সমস্তা সমাধান উদ্দেশ্যে নিজ নিজ অভিমত ব্যক্ত করিয়াছিলেন। কারণ হব্‌সের রাষ্ট্রব্যবস্থায় রাষ্ট্রকর্তৃত্বের আধিক্যের ফলে ব্যক্তি-স্বাধীনতা অন্তর্হিত হয়; আর লক্‌-প্রবর্তিত রাষ্ট্রব্যবস্থায় ব্যক্তি-স্বাধীনতার আধিক্যের ফলে রাষ্ট্রীয় সংগঠনের স্থায়িত্ব দুর্বল হয়। করাসী দার্শনিক রুশো নীতিগতভাবে ব্যক্তি-স্বাধীনতা ও রাষ্ট্রকর্তৃত্বের মধ্যে সামঞ্জস্য বিধান করিতে সমর্থ হইলেও বাস্তবক্ষেত্রে রুশো কর্তৃক বর্ণিত উপায়ে এই চিরন্তন সমস্তার সমাধান সম্ভব হয় নাই। পরবর্তী কালে বিভিন্ন সম্প্রদায়ের আইনবিদগণ, হিতবাদী ও আদর্শবাদী দার্শনিকগণ, ব্যক্তিস্বাতন্ত্র্যবাদী ও সমাজতন্ত্রবাদীগণ, বহুত্ববাদী, সাম্যবাদী ও ফ্যাসীবাদীগণ নিজ নিজ নীতি অনুযায়ী এই সমস্তা-সমাধানের প্রয়াস পাইয়াছেন, কিন্তু কোন দেশের রাজনৈতিক জীবনে আজ পর্যন্ত এই দুইটি আপাতবিরোধী শক্তির সমন্বয়সাধন সম্ভব হয় নাই। রাষ্ট্রনৈতিক জীবনের বাস্তবক্ষেত্রেও এই সমস্তার সমাধানকল্পে লিখিত ও অনমনীয় শাসনতন্ত্র, মৌলিক অধিকার, ক্ষমতার পৃথকীকরণ ও বিকেন্দ্রীকরণ প্রভৃতি নানা শাসনতাত্ত্বিক উপায় সাহায্যে একদিকে রাষ্ট্রীয় কর্তৃত্বের সীমানির্ধারণ এবং অপরদিকে ব্যক্তি-স্বাধীনতার ক্ষেত্র স্থিরীকরণের প্রচেষ্টা চলিয়াছে। কিন্তু এখনও পর্যন্ত উভয় শক্তির মধ্যে স্থিতিশীল সম্পর্ক স্থাপিত হয় নাই।

ব্যক্তি-স্বাধীনতা সম্পর্কে বলা যায় যে, রাষ্ট্রীয় সংগঠন এরূপভাবে পরিকল্পিত হইবে যাহাতে ব্যক্তিগত রাজনৈতিক অধিকারের আধিক্যেহেতু শাসনব্যবস্থা যাহাতে জনতা-শাসনে পর্যবসিত না হয়, আবার রাজনৈতিক অধিকারের স্বল্পতা-হেতু শাসনব্যবস্থা যাহাতে স্বৈরাচারে পরিণত না হয়। ৫

অপরপক্ষে রাষ্ট্রকর্তৃত্ব সম্পর্কে বলা যায় যে, ব্যক্তির পৌর অধিকারগুলি এরূপভাবে পরিকল্পিত হইবে যাহাতে পৌর অধিকারগুলির আধিক্য রাষ্ট্র-

কর্তৃত্ব দুর্বল করিয়া অরাজকতা সৃষ্টি করিতে না পারে। আবার পৌর অধিকারগুলির স্বল্পতা-হেতু বাহাতে রাষ্ট্রীয় হস্তক্ষেপের মাত্রা বৃদ্ধি পাইয়া ব্যক্তি-স্বাধীনতার ন্যায় দাবী ক্ষুণ্ণ না করে। এ সম্পর্কে কোন স্থায়ী বিধি-নিষেধ আরোপ করা সম্ভব নহে। পারিপার্শ্বিক অবস্থার পরিপ্রেক্ষিতে সময়ের পরিবর্তনের উপর লক্ষ্য রাখিয়া রাষ্ট্রের সহিত ব্যক্তির সম্পর্ক নির্ধারণ করা প্রয়োজন।

সংক্ষিপ্তসার

রাষ্ট্রের উদ্দেশ্য ও কার্যকলাপ—গ্রীক ও রোমকগণ রাষ্ট্রকে মানব-জীবনের চরম পরিণতি বলিয়া গণ্য করিতেন। তাঁহাদের মতে মানুষ রাষ্ট্রের জন্ত সৃষ্ট হইয়াছিল, রাষ্ট্র মানুষের জন্ত সৃষ্ট হয় নাই। তাঁহারা ব্যক্তিকে উপেক্ষা করিয়া রাষ্ট্রকে শ্রেষ্ঠ বলিয়া মনে করিতেন। বর্তমানে এই মতবাদ সম্পূর্ণরূপে পরিত্যক্ত হইয়াছে। বর্তমানে মানবজীবনের সর্বাক্ষীণ উন্নতি-সাধনের সহায়ক বলিয়া রাষ্ট্রের উপযোগিতা স্বীকৃত হয়।

রাষ্ট্রের প্রকৃত উদ্দেশ্য—রাষ্ট্রের প্রকৃত উদ্দেশ্য সম্বন্ধে বিভিন্ন লেখক বিভিন্ন মতবাদ প্রচার করিয়াছেন। আইনশৃঙ্খলা রক্ষা করা, ন্যায়পরতা প্রতিষ্ঠা করা, সামাজিক বিবিধ কল্যাণকর কার্য সম্পাদন করা, মানব-সমাজের হিতসাধন করা প্রভৃতি নানা কার্য রাষ্ট্রের করণীয় বলিয়া বিভিন্ন লেখক অভিমত প্রকাশ করিয়াছেন। এ সম্পর্কে ডাঃ গার্গারের মত অধিকতর যুক্তিযুক্ত বলিয়া গৃহীত হইয়াছে। তাঁহার মতে রাষ্ট্রের কার্য হইল—১। ব্যক্তির উন্নতিসাধন করা, ২। জাতীয় জীবনের উন্নতিসাধন করা ও ৩। সমগ্র মানবসমাজের হিতসাধন করা।

রাষ্ট্রের ক্রিয়াকলাপ সম্বন্ধে বিভিন্ন মতবাদ

অ-রাষ্ট্রতন্ত্র—মানবজীবনে রাষ্ট্রের যে আদৌ কোন প্রয়োজনীয়তা আছে অ-রাষ্ট্রতন্ত্রিগণ তাহা স্বীকার করেন না। তাঁহাদের মতে রাষ্ট্র কৃত্রিম বিধি-নিষেধ প্রবর্তন করিয়া মানুষের স্বাভাবিক ব্যক্তিত্ব-বিকাশের অন্তরায় ঘটায়। সুতরাং তাঁহারা রাষ্ট্রের বিলোপসাধন করিয়া স্বাধীন মানবসমাজ গঠন করিবার পক্ষপাতী।

ব্যক্তিস্বাভিন্যবাদ—অ-রাষ্ট্রতত্ত্বীদের মতই ব্যক্তিস্বাভিন্যবাদীরা রাষ্ট্রের উপযোগিতা স্বীকার করেন না। তবে তাঁহারা রাষ্ট্রকে অচিরাতঃ ধ্বংস করিবার পক্ষপাতী নহেন। যতদিন মানবসমাজে নানাজাতীয় অপরাধ অল্পুষ্টিত হইবে, ততদিন রাষ্ট্রের অস্তিত্ব মানিয়া লইতে হইবে। মানুষ যখন দোষশ্রুমুক্ত হইয়া আত্মনিয়ন্ত্রণে সক্ষম হইবে তখন আর রাষ্ট্রের কোন প্রয়োজনীয়তা থাকিবে না। এইজন্যই ব্যক্তিস্বাভিন্যবাদীগণ বর্তমানে রাষ্ট্রের ক্ষমতা একটা নির্দিষ্ট গণ্ডির মধ্যে সীমাবদ্ধ রাখিয়া ব্যক্তিগত অবাধ স্বাধীনতা প্রবর্তন করিবার পক্ষপাতী। তাঁহাদের মতে রাষ্ট্র শুধু অপরাধ নিবারণ করিবে, মানুষের অন্তবিধ উন্নতির জন্ত কোনরূপ প্রচেষ্টা করিবে না।

ব্যক্তিস্বাভিন্যবাদের সপক্ষে যুক্তি—ব্যক্তিস্বাভিন্যবাদের পক্ষে বলা হয়—১। মানুষ নিজের ভাল নিজে বুঝে, সুতরাং রাষ্ট্রকর্তৃহীন তাহার ব্যক্তিত্ব-বিকাশের পথে বাধা দান করে। ২। অবাধ প্রতিযোগিতার ফলে যোগ্যতম টিকিয়া থাকে, দুর্বল মৃত্যু বরণ করে। ৩। অর্থনৈতিক ক্ষেত্রে অবাধ প্রতিযোগিতার ফলে উৎপাদনের উৎকর্ষ সাধিত হয় ও দ্রব্যমূল্য হ্রাস হইয়া ক্রেতার সুবিধা হয়। ৪। অতীতের অভিজ্ঞতাও রাষ্ট্র-প্রচেষ্টার ব্যর্থতার পরিচায়ক। ৫। রাষ্ট্র মানুষের সর্বাঙ্গীণ মঙ্গলসাধনে সম্পূর্ণ অক্ষম, সুতরাং ব্যক্তিগত প্রচেষ্টা দ্বারাই ব্যক্তিগত স্বার্থের সংরক্ষণ বাঞ্ছনীয়।

বিপক্ষে যুক্তি—১। কোন কোন ক্ষেত্রে রাষ্ট্রপ্রচেষ্টা ব্যর্থ হইলেও বহু-ক্ষেত্রে ইহা সাফল্যমণ্ডিত হইয়াছে। ইতিহাস তাহার সাক্ষ্য প্রদান করে। ২। মানুষ সর্ব সময়ে তাহার স্বার্থ সন্মুখে সজাগ নয় বলিয়া রাষ্ট্রনিয়ন্ত্রণ বহুক্ষেত্রে ব্যক্তিগত স্বার্থসংরক্ষণের জন্ত অপরিহার্য। ৩। রাষ্ট্রের অবর্তমানে সমাজে আইনশৃঙ্খলা থাকিতে পারে না। আইনশৃঙ্খলার অবর্তমানে সমাজে প্রকৃত ব্যক্তি-স্বাধীনতার পরিবর্তে স্বৈরাচারের অভ্যুত্থান অবশ্যজ্ঞাবী। ৪। জীবনসংগ্রামে বাহারা বাঁচিয়া থাকে তাহারাই একমাত্র যোগ্যতম বলিয়া বিবেচিত হইতে পারে না। রাষ্ট্রপ্রচেষ্টার দ্বারা অক্ষম ব্যক্তিকে সক্ষম করিতে পারিলে সমাজের পক্ষে তাহা মঙ্গলকর। ৫। সমান সুযোগ-সুবিধার অভাব অনেক সময় ব্যক্তিত্ব-বিকাশের অন্তরায় ঘটায়। রাষ্ট্রপ্রচেষ্টার দ্বারা সমান

স্বযোগ-স্ববিধা প্রতিষ্ঠিত হইলে প্রত্যেক ব্যক্তি তাহার স্বাভাবিক প্রবণতা অনুযায়ী ব্যক্তি-বিকাশে সক্ষম হয়। এইরূপে রাষ্ট্রপ্রচেষ্টা বহুক্ষেত্রে মানুষের উন্নতিসাধনে সহায়তা করিয়াছে।

সমাজতত্ত্ববাদ—সমাজতত্ত্ববাদ রাষ্ট্রকে মানুষের একটি পরম হিতকর প্রতিষ্ঠান হিসাবে গণ্য করে। এই মত অনুসারে রাষ্ট্রপ্রচেষ্টা ঘারাই মানব-জীবনের সর্বাপেক্ষা উন্নতিসাধন সম্ভবপর। তাই তাঁহারা সর্বক্ষেত্রে রাষ্ট্রনিয়ন্ত্রণ প্রবর্তন করিবার পক্ষপাতী। সমাজতত্ত্ববাদীরা ব্যক্তিগত কর্মপ্রচেষ্টায় বিশ্বাস করেন না, তাই তাঁহারা মানবজীবনের সর্বক্ষেত্রে বিশেষ করিয়া অর্থনৈতিক ক্ষেত্রে পূর্ণ রাষ্ট্রনিয়ন্ত্রণ প্রবর্তন করিতে বদ্ধপরিকর।

সমাজতত্ত্ববাদের প্রকারভেদ—সমাজতত্ত্ববাদ অতীতে ও বর্তমানে নানাপ্রকারে আত্মপ্রকাশ করিয়াছে। সমাজতত্ত্ববাদের বিভিন্ন রূপ বিভিন্ন নামে অভিহিত হয়; যথা—১। কাল্পনিক সমাজতত্ত্ববাদ, ২। মার্কসীয় সমাজতত্ত্ববাদ, ৩। সমষ্টিপ্রধান সমাজতত্ত্ববাদ, ৪। রাষ্ট্রপ্রধান সমাজ-তত্ত্ববাদ, ৫। ক্রমবিবর্তমান সমাজতত্ত্ববাদ, ৬। খৃষ্টীয় সমাজতত্ত্ববাদ, ৭। অ-রাষ্ট্রতন্ত্রী সমাজতত্ত্ববাদ, ৮। সমিতিপ্রধান সমাজতত্ত্ববাদ, ৯। সাম্যবাদ।

আধুনিক যুগে সাম্যবাদ শক্তি সঞ্চয় করিয়া পৃথিবীব্যাপী ইহার প্রভাব বিস্তার করিতে সক্ষম হইয়াছে। এই মতবাদ মার্কসীয় নীতি—‘উৎকৃষ্ট মূল্য’-সূত্র ও ইতিহাসের জড়বাদী ব্যাখ্যার উপর প্রতিষ্ঠিত। রাশিয়ায় ১৯১৭ খৃষ্টাব্দের বিপ্লবের পর সাম্যবাদ প্রতিষ্ঠিত হইয়াছে। পরবর্তী কালে রুশীয় সাম্যবাদিগণ প্রয়োজনের তাগিদে তাঁহাদের অনুমত সাম্যবাদী নীতি বহুলাংশে পরিবর্তিত করিতে বাধ্য হইয়াছেন। প্রথম পর্যায়ে ধ্বংসাত্মক কার্য দ্বারা প্রচলিত সমাজব্যবস্থার আমূল পরিবর্তন সাধন করিয়া পরবর্তী কালে সাম্যবাদিগণ গঠনমূলক কার্যে আত্মনিয়োগ করিয়া জাতীয় জীবনের অনেক উন্নতিসাধন করিতে সক্ষম হইয়াছেন। রাশিয়ার অনুকরণে মহাচীনেও সাম্যবাদী ক্যবস্থা প্রবর্তিত হইয়াছে।

সমাজতত্ত্ববাদের পক্ষে যুক্তি—১। সমাজতত্ত্ববাদ মুষ্টিমেয় ধনিক-শ্রেণীর স্ববিধার পরিষেবে সর্বশ্রেণীর স্ববিধা প্রতিষ্ঠা করে। ২। প্রতিযোগিতা-

মূলক উৎপাদনব্যবস্থার অপচয় নিরোধ করিয়া সহযোগিতামূলক উৎপাদন-ব্যবস্থা প্রবর্তন করে। ফলে, অর্থনৈতিক জীবনে সমতা প্রতিষ্ঠিত হয়। ৩। উৎপাদনের উপাদানগুলি জাতীয়করণের দ্বারা সর্বসাধারণের স্বার্থ সংরক্ষিত হয়। ৪। সমাজতন্ত্রবাদ সমষ্টিগত জীবনের উন্নতি দ্বারা ব্যক্তিগত উন্নতির ব্যবস্থা করে। ৫। অর্থনৈতিক জীবনে গণতান্ত্রিক আদর্শ সুপ্রতিষ্ঠিত করিবার একমাত্র উপায় হইল সমাজতান্ত্রিক ব্যবস্থার প্রবর্তন।

বিপক্ষে যুক্তি—১। রাষ্ট্রপ্রচেষ্টা দ্বারা মানুষের সর্বাদীপ মঙ্গলসাধন সম্ভবপর নয়, কারণ রাষ্ট্রও ভুল করিতে পারে। ২। ব্যক্তিগত মালিকানা ও ব্যক্তিগত মুনাকা না থাকিলে ব্যক্তিগত কর্মপ্রচেষ্টার অমুপ্রেরণা নষ্ট হইবে। ৩। সমাজতান্ত্রিক ব্যবস্থা প্রবর্তনের ফলে মানুষ নিজ অভিকর্ষি অমুখ্যায়ী ব্যক্তিত্ব-বিকাশ করিতে পারিবে না। ৪। অত্যধিক রাষ্ট্রনিয়ন্ত্রণের ফলে সমাজে কর্মদক্ষতা লোপ পাইয়া কর্মবিমুখতা দেখা দিবে।

সত্য সিদ্ধান্ত—রাষ্ট্রের ক্রিয়াকলাপ উল্লিখিত কোন একটিমাত্র নীতি অবলম্বনে পরিচালিত হয় না। দেশের প্রয়োজনানুসারেই প্রত্যেক দেশে রাষ্ট্রকর্তব্য নির্ধারিত হয়। ব্যক্তিস্বাতন্ত্র্যবাদ ও সমাজতন্ত্রবাদের সমন্বয়সাধন করিতে পারিলে রাষ্ট্রের ক্রিয়াকলাপ সম্বন্ধে একটা সুনির্ধারিত মতবাদ পাওয়া যাইতে পারে।

বর্তমান রাষ্ট্রের ক্রিয়াকলাপের পরিধি—বর্তমান যুগে রাষ্ট্র সম্বন্ধে মানুষের ধারণার আমূল পরিবর্তন ঘটিয়াছে। অতীতে রাষ্ট্রকে মানুষ শুধু একটি ক্ষমতার আধার বলিয়া মনে করিত। আইন-শৃঙ্খলা রক্ষা করা ও বহিঃশত্রুর আক্রমণ হইতে দেশ রক্ষা করিয়া শাসকগোষ্ঠী নিজেদের ক্ষমতা সুপ্রতিষ্ঠিত রাখিতেন। বর্তমান রাষ্ট্রগুলির উদ্দেশ্য হইল জনকল্যাণসাধন। শুধু শাসকশ্রেণী বা একটি নির্দিষ্ট শ্রেণীর লোকের স্বার্থসাধনের উদ্দেশ্যে এখন আর রাষ্ট্রের ক্রিয়াকলাপ পরিচালিত হয় না। গণতান্ত্রিক আদর্শ সুপ্রতিষ্ঠিত হইবার সঙ্গে সঙ্গে জনকল্যাণসাধনই রাষ্ট্রের প্রধান উদ্দেশ্য বলিয়া পরিগণিত হইয়াছে। তাই আজ শক্তির ধারক অতীতের পুলিশ-রাষ্ট্র কল্যাণরাষ্ট্রে রূপান্তরিত হইয়াছে। সুতরাং জনকল্যাণের জন্ত বাহা অপরিহার্য তাহা রাষ্ট্রের অবশ্যকর্তব্য বলিয়া বিবেচিত হয়। এইদিক দিয়া দেখিতে গেলে

বর্তমান কালের রাষ্ট্রগুলির কার্যকলাপে কোন সীমারেখা স্থির করা সম্ভব নয়। মানুষের সামাজিক, নৈতিক ও অর্থনৈতিক উন্নতিসাধন করিবার জন্য যাহা-কিছু প্রয়োজন তাহার সব-কিছুই রাষ্ট্র করিতে পারে।

রাষ্ট্রীয় কার্যকলাপের শ্রেণীবিভাগ—রাষ্ট্রের কার্যকলাপ সাধারণতঃ দুই ভাগে ভাগ করা হয়। ১। আইনশৃঙ্খলা রক্ষা করা ও প্রতিরক্ষা-ব্যবস্থা সূদৃঢ় করা রাষ্ট্রের প্রাথমিক অবশ্যকর্তব্য বলিয়া বিবেচিত হয়। এই দুইটি কার্য সম্পাদনের উপর রাষ্ট্রের অস্তিত্ব নির্ভর করে বলিয়া এই কার্যগুলিকে প্রাথমিক বা অবশ্যকর্তব্য বলা হয়। ইহা ছাড়াও বর্তমান রাষ্ট্রগুলি আরও অনেক কর্তব্য সম্পাদন করিয়া থাকে। ২। ইচ্ছামূলক কার্য অর্থাৎ সে কার্যগুলি না করিলেও রাষ্ট্রের নিরাপত্তা বিপদাপন্ন হয় না, যথা, কৃষিশিল্পের উন্নতি, শিক্ষাবিস্তার প্রভৃতি।

নূতন মতবাদ—রাষ্ট্রের ক্রিয়াকলাপ সম্পর্কে আরও কয়েকটি নূতন মতবাদের আবির্ভাব হইয়াছে, যথা, ধনতন্ত্রবাদ, ফ্যাসীবাদ, নাৎসীবাদ ও গান্ধীবাদ।

প্রশ্নাবলী

1. Discuss the various theories of the end and purpose of the state. (C. U. 1952)

2. Can any limit be put to the proper sphere of the state in modern times? Give reasons for your answer.

(C. U. 1950)

3. Classify State functions. What are the Individualistic and Socialistic theories of State functions? Why is it said that neither Individualism nor Socialism represents the modern view of functions of State. (C. U. Hon. 1928)

4. How far do you agree with the Materialistic conception of History as expounded by Karl Marx? Give reasons for your answer. (C. U. Hon. 1954)

5. Indicate the distinguishing features of the Communist experiment in Soviet Russia. Explain in what important respect it deviates from the Marxian Socialism.

[C. U. 1948 (First Paper)]

6. Discuss the proper sphere of the State. (C. U. 1955)

7. What should be the positive functions of a modern state? To what extent should the state leave religion alone? (C. U. Hon. 1958)

8. What, in your opinion, should be the proper sphere of the State? Give reasons for your answer.

(C. U. 1961)

9. "Socialism proposes to complete rather than oppose the liberal democratic creed." Discuss the statement.

(C. U. B. A. Part I, 1962)

10. Discuss the Individualistic Theory regarding the functions of Government. [C. U. B. A. Part. I, 1967]

11. Discuss the philosophical foundation of individualism.

(C. U. B. A. Part I, 1970)

পঞ্চদশ অধ্যায়

শাসনতন্ত্র

(Constitution of the State)

শাসনতন্ত্রের প্রয়োজনীয়তা (Necessity of a Constitution)

প্রত্যেক দেশের শাসনব্যবস্থা শাসক-শাসিতের আইনগত সম্পর্কের উপর প্রতিষ্ঠিত। রাষ্ট্র-উৎপত্তির আরম্ভ হইতে বর্তমানকাল পর্যন্ত বিভিন্ন যুগে শাসক-শাসিতের এই সম্পর্ক বিভিন্ন রূপ পরিগ্রহ করিয়াছে। অতীত যুগে এই সম্পর্ক শুধু শাসকশ্রেণীর ক্ষমতার দ্বারা নির্ধারিত হইত। সম্পর্কনির্ণয়ে শাসিতের ইচ্ছার কোন স্থান ছিল না। বর্তমানে গণতান্ত্রিক আদর্শ প্রতিষ্ঠিত হওয়ার ফলে শাসক-শাসিতের এই সম্পর্ক একটা সুনির্দিষ্ট রূপ পরিগ্রহ করিয়াছে। বর্তমান যুগে মানুষ আর কোন উচ্চতর ক্ষমতাবিশিষ্ট মাহুষের দ্বারা শাসিত হইতে চায় না। এখন প্রবর্তিত হইয়াছে আইনের শাসন। এই শাসনব্যবস্থায় শাসিতের ইচ্ছা শুধু যে কার্যকরী হইয়াছে তাহা নয়, শাসিতের ইচ্ছানুসারেই বর্তমান যুগে শাসনব্যবস্থা গঠিত হয়; পূর্বযুগের ক্ষমতার ভিত্তির উপর প্রতিষ্ঠিত শাসক-শাসিত সম্পর্ক বর্তমান যুগে শাসিতের ইচ্ছার ভিত্তির উপর প্রতিষ্ঠিত হইয়াছে। প্রত্যেক দেশে এই শাসক-শাসিত সম্পর্ক যাহাতে স্থায়িত্ব লাভ করে ও শাসকশ্রেণী স্বৈরাচারী হইতে না পারে, সেজন্য কতকগুলি মৌলিক বিধিনিষেধ দ্বারা শাসনব্যবস্থা নিয়ন্ত্রিত হয়। এই মৌলিক বিধিনিষেধগুলিই বর্তমান যুগে শাসক-শাসিতের সম্পর্ক নির্ণয় করিয়া শাসনব্যবস্থাকে কার্যকরী রাখে।

সংজ্ঞা (Definition)

প্রত্যেক রাষ্ট্রেরই একটা নিজস্ব শাসনতন্ত্র থাকে। শাসনতন্ত্র ছাড়া রাষ্ট্রের অস্তিত্ব কল্পনা করা যায় না। মানুষের দৈনন্দিন জীবন যেকোন কতকগুলি বিধিনিষেধের দ্বারা নিয়ন্ত্রিত হয়, রাষ্ট্রের কার্যকলাপও তদ্রূপ কতকগুলি বিধিনিষেধের দ্বারা সীমায়িত। এই বিধিনিষেধগুলির অবর্তমানে রাষ্ট্র স্বৈরাচারী হইতে পারে। শাসনতন্ত্র বলিতে আমরা বুঝি

কতকগুলি প্রয়োজনীয় আইন-কানুন এবং কতকগুলি বিধিনিষেধ ও প্রথা-
বেগুলি অনুসরণ করিয়া রাষ্ট্র শাসনকার্য পরিচালিত করে। রাষ্ট্রের কার্য
পরিচালনা করে সরকার। শাসনতন্ত্র নিম্নলিখিত বিষয়গুলি নির্ধারিত
করিয়া শাসনব্যবস্থা চালু রাখে—সরকারের কি কি ক্ষমতা থাকিবে ও কি-
ভাবে সেই ক্ষমতাসমূহ শাসনকার্যে প্রয়োগ করা হইবে, কি নিয়ম অনুসারে
সরকার গঠিত ও পরিচালিত হইবে, সরকারের বিভিন্ন বিভাগের মধ্যে কি
সম্পর্ক বিদ্যমান থাকিবে ও সর্বোপরি শাসক ও শাসিতের কি কি অধিকার
ও দায়িত্ব থাকিবে। হুতরাং শাসনতন্ত্র হইল কতকগুলি লিখিত ও
অ-লিখিত আইনের সমষ্টি, যেগুলির দ্বারা একদিকে সরকারের সংগঠন ও
কার্যকলাপ অপরদিকে শাসক ও শাসিতের সম্পর্ক নির্ধারিত হয়। কোন
দেশের বর্তমান শাসনতন্ত্র বলিতে বুঝায় সেই দেশের রাষ্ট্রগঠনকালীন মূল
শাসনতন্ত্র ও পরবর্তী কালের শাসনতন্ত্রের পরিবর্তন—এই উভয়ের সমষ্টিকে
শাসনতন্ত্র বলা হয়।

শাসনতন্ত্রের শ্রেণীবিন্যাস (Classification of Constitutions)

পূর্বতন রাষ্ট্রবিজ্ঞানীরা শাসনতন্ত্রের দুইটি ভাগের উল্লেখ করিয়াছেন।
একটি হইল অ-লিখিত (Unwritten), অপরটি হইল লিখিত
(Written)। অ-লিখিত শাসনতন্ত্র কোন পূর্ব-পরিকল্পিত নিয়ম অনুযায়ী
গঠিত হয় না। এই শাসনতন্ত্র বিভিন্ন প্রথা ও আদালতের সিদ্ধান্তের ভিত্তির
উপর ধীরে ধীরে গড়িয়া উঠে। আইনসভা বা কোন প্রতিনিধিমূলক সংসদ
দ্বারা রচিত আইন এই শাসনতন্ত্রে খুব কমই দেখা যায়। এই শাসনতন্ত্র
কোন একটা নির্দিষ্ট সময়ে কোন নির্দিষ্ট প্রতিনিধি-সংসদ দ্বারা রচিত
হয় না। ইহা ক্রমবিবর্তনের ফলে গড়িয়া উঠে। ইংলণ্ডের শাসনতন্ত্র
অ-লিখিত শাসনতন্ত্রের প্রকৃষ্ট উদাহরণ। এই শাসনতন্ত্র কতকগুলি প্রথা
এবং বিধিব্যবস্থা ও বিচারালয়ের সিদ্ধান্তের সমষ্টিক্রমে। যে প্রথা ও বিধি-
ব্যবস্থাগুলি বহুদিন হইতে প্রচলিত আছে, অ-লিখিত হইলেও সেগুলি
লিখিত আইনের মতই কার্যকরী হয়।

লিখিত শাসনতন্ত্রে প্রত্যেকটি বিষয়ই লিপিবদ্ধ থাকে। এই জাতীয়
শাসনতন্ত্র পূর্ব-পরিকল্পনানুযায়ী একটি নির্দিষ্ট প্রতিনিধি-সংসদ দ্বারা রচিত

হয়। শাসক-শাসিতের সম্পর্ক এই শাসনতন্ত্রে বিশদভাবে লিখিত থাকে। লিখিত শাসনতন্ত্র একটিমাত্র বৃহৎ আইনের দ্বারা গঠিত হইতে পারে, যেমন আমাদের ভারতবর্ষের বর্তমান শাসনতন্ত্র, অথবা ইহা বিভিন্ন সময়ে রচিত আইনের সমষ্টিও হইতে পারে। বর্তমান যুগে অধিকাংশ দেশেই লিখিত শাসনতন্ত্র প্রবর্তিত হইয়াছে। আমেরিকা যুক্তরাষ্ট্র, ফরাসী দেশ, ভারত, রাশিয়া প্রভৃতি দেশে এই লিখিত শাসনতন্ত্র দ্বারা শাসনব্যবস্থা পরিচালিত হয়।

লিখিত ও অ-লিখিত শাসনতন্ত্রের পার্থক্য সুস্পষ্ট নয়।
(Distinction between a Written Constitution and an Un-written one—not well-marked)

শাসনতন্ত্রের উপরি-উক্ত শ্রেণীবিভাগ সুস্পষ্ট নয়, বিজ্ঞানসম্মতও নয়। প্রথমতঃ, বলা যায় যে, কোন অ-লিখিত শাসনতন্ত্রই সম্পূর্ণ অ-লিখিত হইতে পারে না। অ-লিখিত শাসনতন্ত্রে অনেক লিখিত অংশ থাকে। উদাহরণস্বরূপ বলা যাইতে পারে যে, ব্রিটিশ শাসনতন্ত্র প্রধানতঃ অ-লিখিত হইলেও সম্পূর্ণভাবে অ-লিখিত নয়। ম্যাগনা কার্টা, অধিকারের সনদ (Bill of Rights) প্রভৃতি কতকগুলি লিখিত অংশ এই অ-লিখিত শাসনতন্ত্রে স্থান পাইয়াছে।

দ্বিতীয়তঃ, লিখিত শাসনতন্ত্রেও অ-লিখিত অংশ থাকে। আমেরিকা যুক্তরাষ্ট্রের শাসনতন্ত্র মূলতঃ লিখিত হইলেও ক্যাবিনেটের উৎপত্তি, রাষ্ট্রপতির পরোক্ষ নির্বাচন-নীতির পরিবর্তন প্রভৃতি শাসনতান্ত্রিক নিয়মগুলি অ-লিখিত প্রথার দ্বারা প্রভূত পরিমাণে প্রভাবিত হইয়াছে। সুতরাং লিখিত শাসনতন্ত্রে অ-লিখিত অংশের ও অ-লিখিত শাসনতন্ত্রে লিখিত অংশের অস্তিত্ব বিদ্যমান। সকল শাসনতন্ত্রই লিখিত ও অ-লিখিত বিধিব্যবস্থার দ্বারা নিয়ন্ত্রিত হয়। কোন শাসনতন্ত্রে লিখিত অংশ বেশী, অ-লিখিত অংশ কম। আবার কোন শাসনতন্ত্রে অ-লিখিত অংশ বেশী, লিখিত অংশ কম। সুতরাং ইহাকে মূলগত পার্থক্য বলা যায় না।

তৃতীয়তঃ, শাসনতন্ত্রের এইরূপ শ্রেণীবিভাগের ফলে পরোক্ষভাবে এই ভুল ধারণা জন্মিতে পারে যে, যে-দেশে লিখিত শাসনতন্ত্র দ্বারা শাসনব্যবস্থা

নিয়ন্ত্রিত হয়, সেখানকার উচ্চ আদালত আইনসভা-রচিত আইন শাসনতন্ত্র-বিরোধী বলিয়া বে-আইনীরূপে বাতিল করিতে পারে। কিন্তু সর্বক্ষেত্রে এ-কথা সত্য নয়। ফরাসী দেশের শাসনতন্ত্র লিখিত, কিন্তু সে-দেশের উচ্চ আদালত আমেরিকা যুক্তরাষ্ট্রের সুপ্রীম কোর্টের মত আইনসভা-প্রণীত কোন আইনকে বে-আইনী বলিয়া বাতিল করিতে পারে না।

চতুর্থতঃ, বলা হয় যে, অ-লিখিত শাসনতন্ত্র অপেক্ষা লিখিত শাসনতন্ত্র দ্বারা ব্যক্তিস্বাধীনতা অধিকতর সুরক্ষিত করা যায়। কিন্তু কার্যক্ষেত্রে দেখা যায়, ব্যক্তিস্বাধীনতা শাসনতন্ত্রের লিখিত প্রকৃতির উপর চূড়ান্তভাবে নির্ভর করে না। বৃটিশ শাসনতন্ত্র অ-লিখিত, তাহা সত্ত্বেও বৃটিশ জাতি স্বাধীন, আবার দ্বিতীয় মহাযুদ্ধের পূর্বে জার্মানীর লিখিত শাসনতন্ত্র হিটলারের শাসনসময়ে জার্মান জাতির অধিকার অক্ষুণ্ণ রাখিতে পারে নাই।

কোন শাসনতন্ত্রই সম্পূর্ণরূপে লিখিত বা অ-লিখিত হইতে পারে না বা হওয়া বাঞ্ছনীয়ও নয়। শাসনতন্ত্র যদি সম্পূর্ণভাবে লিখিত হয়, তাহা হইলে জাতীয় জীবনে অগ্রগতির পথ রুদ্ধ হয়। শাসনতন্ত্র জাতীয় জীবনের রাষ্ট্রনৈতিক আশা-আকাঙ্ক্ষা ও আদর্শের জীবন্ত প্রতীক। জাতীয় জীবন-ধারা পরিবর্তনের সঙ্গে সঙ্গে জাতীয় জীবনদর্শন ও আদর্শ পরিবর্তিত হয়। এই পরিবর্তন শাসনতন্ত্রে স্থান পাইয়া জাতীয় জীবনের অগ্রগতির পথ সুগম করিয়া দেয়। সুতরাং জাতীয় জীবনের প্রয়োজনেই শাসনতন্ত্র ধীরে ধীরে বিবর্তনের মধ্য দিয়া প্রথা ও আদালতের সিদ্ধান্ত দ্বারা পরিপুষ্ট ও পূর্ণতা-প্রাপ্ত হয়।

অ-লিখিত শাসনতন্ত্রের সুবিধা ও অসুবিধা (Merits and Demerits of Un-written Constitution)

অ-লিখিত শাসনতন্ত্রের প্রধান গুণ হইল যে, অবস্থার পরিবর্তনের সঙ্গে এই শাসনতন্ত্রের পরিবর্তন করিয়া শাসনতন্ত্রকে সম্বোধনযোগী করা যায়। জাতীয় জীবনের পরিবর্তনের সঙ্গে শাসনতন্ত্র পরিবর্তন করিয়া উহা জাতীয় অগ্রগতির পথ সুগম করে। অ-লিখিত শাসনতন্ত্র সহজে পরিবর্তনশীল বলিয়া ইহার সংস্কার সকল সময়ে নিয়মতান্ত্রিক উপায়ে সাধিত হইতে পারে।

অ-লিখিত শাসনতন্ত্র সহজে পরিবর্তন করা যায় বলিয়া ইহার কোন

স্থায়িত্ব থাকে না। প্রয়োজনে ও অপ্রয়োজনে সাধারণের দাবীতে ইহা পরিবর্তিত হইতে পারে। ফলে, শাসনতন্ত্রের অনেক উৎকৃষ্ট বৈশিষ্ট্যও নষ্ট হইয়া যাইতে পারে। অ-লিখিত শাসনতন্ত্র প্রধানতঃ প্রচলিত প্রথা ও আচারের উপর প্রতিষ্ঠিত, সুতরাং ইহার বিধিনিষেধগুলি সুস্পষ্ট হইতে পারে না। স্পষ্টতার অভাবের দরুণ শাসকগণ তাহাদের নিজেদের ইচ্ছামত ইহার ব্যাখ্যা করিতে পারেন ও সেজন্য ব্যক্তিস্বাধীনতা অনেক সময় ব্যাহত হয়। যুক্তরাষ্ট্রীয় শাসনব্যবস্থায় অ-লিখিত শাসনতন্ত্র একেবারেই অহুপযোগী।

লিখিত শাসনতন্ত্রের সুবিধা ও অসুবিধা (Merits and Demerits of Written Constitution)

লিখিত শাসনতন্ত্রে শাসক-শাসিতের সম্পর্কের সমস্ত বিষয় সুস্পষ্টরূপে লিখিত থাকে বলিয়া ইহাতে কোন বিষয়ের সন্দেহের অবকাশ থাকে না। এই সুস্পষ্টতার জন্য শাসকবর্গ ও জনসাধারণ তাহাদের ত্রাণ অধিকার ও দায়িত্ব সম্বন্ধে সচেতন থাকিতে পারে। যুক্তরাষ্ট্রীয় শাসনব্যবস্থায় লিখিত শাসনতন্ত্র অপরিহার্য বলিয়া বিবেচিত হয়। কেন্দ্রীয় ও প্রাদেশিক সরকার-গুলির মধ্যে ক্ষমতা ভাগ করিয়া দিয়া এই লিখিত শাসনতন্ত্র উভয় সরকারের কার্যের সীমারেখা স্থির করিয়া দেয়। অ-লিখিত শাসনতন্ত্র অপেক্ষা ইহা অধিকতর স্বাধীন।

লিখিত শাসনতন্ত্রের দোষ হইল যে, অবস্থার পরিবর্তনের সঙ্গে ইহার দ্রুত পরিবর্তন সম্ভব নয়। সহজে পরিবর্তন করা যায় না বলিয়া দেশে অসন্তোষের সৃষ্টি হইতে পারে। অনেক সময় জাতীয় জীবনের রাষ্ট্রনৈতিক অগ্রগতির পথে ইহা বাধা সৃষ্টি করিয়া দেশে বিদ্রোহ ঘটাইতে পারে।

নমনীয় ও অনমনীয় শাসনতন্ত্র (Flexible and Rigid Constitution)

শাসনতন্ত্রের লিখিত ও অ-লিখিত এই শ্রেণীবিভাগ অলীক ও অবাস্তব বলিয়া লর্ড ব্রাইস শাসনতন্ত্রকে নমনীয় ও অনমনীয় এই দুই শ্রেণীতে ভাগ করিয়াছেন। শাসনতন্ত্রের পরিবর্তন-শক্তি সহজ কি জটিল এই

পার্শ্বকোয় ভিত্তির উপর এই শ্রেণীবিভাগ করা হইয়াছে। যদি শাসনতন্ত্র সহজেই পরিবর্তন করা চলে অর্থাৎ দেশের আইনসভা সাধারণ আইনের মত শাসনতন্ত্র-বিষয়ক আইনও ভোটাধিক্যে যদি পরিবর্তন করিতে পারে তাহা হইলে তাহাকে নমনীয় শাসনতন্ত্র বলা হয়। এই ব্যবস্থায় শাসনতান্ত্রিক আইন পরিবর্তনের জন্ত কোনরূপ বিশেষ পদ্ধতি অবলম্বন করিবার প্রয়োজন হয় না। শাসনতান্ত্রিক আইন ও সাধারণ আইন একই পর্যায়ভুক্ত বলিয়া বিবেচিত হয়। দেশের আইনসভা উভয়বিধ আইন পরিবর্তনের অধিকারী হয়। ব্রিটিশ শাসনতন্ত্র নমনীয় শাসনতন্ত্রের প্রকৃষ্ট উদাহরণ। পার্লামেন্ট সভা সাধারণ আইন পরিবর্তন-পদ্ধতিতে গুরুত্বপূর্ণ শাসনতান্ত্রিক আইনগুলিও পরিবর্তন করিয়া থাকে। এজন্ত কোন বিশেষ পদ্ধতির আশ্রয় গ্রহণ করিতে হয় না। ইংলণ্ডে শাসনতান্ত্রিক আইন ও সাধারণ আইনের মধ্যে কোন প্রভেদ করা হয় না ও রাজা-সহ পার্লামেন্ট সভা উভয়বিধ আইন-প্রণয়ন ও পরিবর্তনের পূর্ণ-অধিকারী।

অপরপক্ষে, মার্কিন যুক্তরাষ্ট্রে শাসনতন্ত্রকে অ-নমনীয় বলা হয়। এই শাসনতন্ত্রের যদি একটি সামান্যতম পরিবর্তনও করিতে হয় তাহা হইলে একটা বিশেষ পদ্ধতি অবলম্বন করিতে হয়। দেশের আইনসভা সাধারণ আইনপরিবর্তন-পদ্ধতিতে শাসনতান্ত্রিক আইন পরিবর্তন করিতে পারে না। মার্কিন দেশে শাসনতান্ত্রিক আইনের পরিবর্তন করিতে হইলে নিম্নলিখিত জটিল পদ্ধতির আশ্রয় লইতে হয়। কংগ্রেস-সভার দুই পরিষদের মোট সদস্যদের ঠিক অংশকে এই পরিবর্তনের প্রস্তাব সমর্থন করিতে হইবে, বিকল্পে পঞ্চাশটি রাজ্যের ঠিক রাজ্য দ্বারা এই পরিবর্তনের জন্ত বিশেষ একটি সভা আহ্বান করিয়া প্রস্তাবটি সমর্থন করাইতে হইবে। এইরূপে সমর্থিত পরিবর্তনের প্রস্তাব ঐ রাজ্যের আইনসভা কিংবা আহূত সভায় উপস্থিত ঐ সংখ্যক সদস্য দ্বারা সমর্থিত হইতে হইবে। এই পদ্ধতি সাধারণ আইনপ্রণয়ন-পদ্ধতি অপেক্ষা বহু গুণে জটিল। সেইজন্য মার্কিন যুক্তরাষ্ট্রে এযাবৎ নিয়মতান্ত্রিক উপায়ে শাসনতন্ত্র পরিবর্তনের সংখ্যা অতি অল্প। যে-দেশে অ-নমনীয় শাসনতন্ত্র প্রচলিত, সেখানে শাসনতান্ত্রিক আইনগুলি সাধারণ আইন হইতে সম্পূর্ণ পৃথক্। শাসনতান্ত্রিক আইনগুলিকে একটি বিশেষ মর্যাদা দেওয়া হয়।

নমনীয় শাসনতন্ত্রের সুবিধা ও অসুবিধা (Merits and Demerits of Flexible Constitution)

নমনীয় শাসনতন্ত্রের অনেকগুলি সুবিধা আছে। প্রথমতঃ, শাসনতন্ত্র পরিবর্তনের জন্য বিশেষ কোন অসুবিধা নাই বলিয়া জাতীয় প্রগতির সঙ্গে ইহার সমন্বয় সম্ভব করা যায়। শাসনতন্ত্র সহজে পরিবর্তন করা যায় বলিয়া বিনা রক্তপাতে শাসনতন্ত্রের আমূল পরিবর্তন সাধন করা যায়। সহজে পরিবর্তনশীল বলিয়া জনমতের দাবী পূরণ করা যায় ও তাহাতে জনমত শান্ত থাকে। লোকে ইচ্ছা করিয়া শাসনতন্ত্র ভঙ্গ করিবার চেষ্টা করে না।

স্বায়ত্বের অভাব হইল এই শাসনতন্ত্রের প্রধান ত্রুটি। সদা-পরিবর্তনশীল জনমতের প্রভাবে এই শাসনতন্ত্রও পরিবর্তিত হইতে পারে। নিয়ত পরিবর্তনশীল শাসনতন্ত্র জনমতের আত্মভাজন হইতে সক্ষম হয় না। নাগরিক অধিকার ও স্বার্থ এইরূপ পরিবর্তনশীল শাসনতন্ত্র দ্বারা সুরক্ষিত হইতে পারে না। সুতরাং জনসাধারণ এই শাসনতন্ত্র সম্বন্ধে স্বভাবতঃই সন্দেহপরায়ণ হইয়া উঠে।

অ-নমনীয় শাসনতন্ত্রের গুণ ও অগুণ (Merits and Demerits of Rigid Constitution)

অ-নমনীয় শাসনতন্ত্রের প্রধান গুণ হইল ইহার স্থায়িত্ব। এই শাসনতন্ত্রের পরিবর্তন শুধু জনমতের প্রভাবে হয় না। এই শাসনতন্ত্রের আইনগুলি লিখিত বলিয়া ইহা স্পষ্ট এবং ইহার মধ্যে অনিশ্চয়তা কম। দ্রুত ও সহজে পরিবর্তনশীল নয় বলিয়া জনগণের অধিকার ও স্বার্থ ইহা দ্বারা অধিকতর-ভাবে সুরক্ষিত হয় ও সেজন্য শাসনতন্ত্রে জনগণের আস্থা থাকে। যুক্তরাষ্ট্র-ব্যবস্থায় অ-নমনীয় শাসনতন্ত্র অতীব উপযোগী।

কিন্তু ইহার ত্রুটি হইল যে, প্রয়োজনীয় পরিবর্তন করা যায় না বলিয়া জাতীয় অগ্রগতির পথে উহা অনেক সময় বাধা সৃষ্টি করে। ফলে জনগণের মনে অসন্তোষের সৃষ্টি হয়। জাতীয় জীবনের পরিবর্তনের সহিত যদি শাসনতন্ত্রের সামঞ্জস্যবিধান না করা যায়, তাহা হইলে সে শাসনতন্ত্র কার্যকরী হইতে পারে না।

শাসনতন্ত্রের আধুনিক প্রবণতা (Modern Tendencies in Constitutions)

শাসনতন্ত্রকে ঘেরূপ লিখিত ও অ-লিখিত ভিত্তিতে শ্রেণীবিভাগ

করা যুক্তিসংগত নয়, তদ্রূপ নমনীয় ও অ-নমনীয়রূপে ইহার শ্রেণীবিভাগ করা কতদূর যুক্তিসংগত তাহা বিচারসাপেক্ষ। সংক্ষেপে বলা যায় যে, শাসনতন্ত্র শাসক-শাসিতের সম্পর্ক নির্ধারিত করে। শাসক-শাসিতের এই সম্পর্ক সূদৃঢ় ভিত্তির উপর প্রতিষ্ঠিত হওয়া বাঞ্ছনীয় হইলেও ইহার পরিবর্তনের প্রয়োজনীয়তার গুরুত্ব লাঘব হয় না। মাহুষের চিন্তাধারা, প্রয়োজন ও আদর্শ ক্রমশঃ নূতন নূতন রূপ পরিগ্রহ করিতেছে এবং এই পরিবর্তনের সহিত সামঞ্জস্য রাখিবার জন্ত শাসনতন্ত্রের পরিবর্তনও জাতীয় জীবনে অনস্বীকার্য। যেখানে এই পরিবর্তনের কোন ব্যবস্থা নাই, সেখানে শাসনতন্ত্রের মর্যাদাহানি হইবার সম্ভাবনা বর্তমান থাকে। তাই প্রত্যেক দেশের শাসনতন্ত্রে,—কি লিখিত বা অ-লিখিত, কি নমনীয় বা অ-নমনীয়,—পরিবর্তন ও পরিবর্তনের ব্যবস্থা থাকা অতীব প্রয়োজন বলিয়া বিবেচিত হয়। যে শ্রেণীরই শাসনতন্ত্র হউক না কেন, সকল শাসনতন্ত্রই অল্পবিস্তর তিনটি উপাদানের সমাবেশে গঠিত হয়। প্রথমতঃ, দেখা যায় যে, প্রত্যেক শাসনতন্ত্রে অল্পবিস্তর পরিমাণে নিয়মতান্ত্রিক পদ্ধতিতে প্রণীত শাসনতান্ত্রিক আইন স্থান পায়। দ্বিতীয়তঃ, প্রচলিত প্রথা ও বিধিবিধান দ্বারা শাসনতন্ত্রের অনেকাংশ পরিপুষ্ট হয়। তৃতীয়তঃ, বিচারালয়গুলির সিদ্ধান্ত শাসনতন্ত্রের পরিবর্তনে ও পরিবর্তনে অনেক সহায়তা করে। ব্রুটেন ও মার্কিন দেশের শাসনতন্ত্রে পার্থক্য থাকিলেও এই উভয় শাসনতন্ত্রই শেষোক্ত উপাদানটির দ্বারা প্রভূত পরিমাণে প্রভাবিত হইয়াছে। কিন্তু এই সঙ্গে একটি কথা স্মরণ রাখিতে হইবে যে, শাসনতন্ত্রের উপর উপরি-উক্ত তিনটি উপাদানের প্রভাব সর্বত্র সমানভাবে কার্যকরী নাও হইতে পারে। মার্কিন যুক্তরাষ্ট্রে শাসনতন্ত্র নিয়মতান্ত্রিক পদ্ধতিতে গঠিত হইলেও প্রচলিত প্রথা ও বিচারালয়ের সিদ্ধান্তের প্রভাব হইতে মুক্ত নয়। অপরপক্ষে, ব্রুটেনের শাসনতন্ত্র প্রধানতঃ প্রচলিত প্রথা ও বিচারালয়ের সিদ্ধান্তের উপর প্রতিষ্ঠিত হইলেও নিয়মতান্ত্রিক পদ্ধতিতে প্রণীত আইনের প্রভাব হইতে মুক্ত নয়।

সাধারণতঃ ব্রিটিশ শাসনতন্ত্রকে নমনীয় ও মার্কিন যুক্তরাষ্ট্রের শাসনতন্ত্রকে অ-নমনীয় বলা হয়। বিশেষ-বিবেচনা করিয়া দেখিলে, এই পার্থক্য মূলগত পার্থক্য বলিয়া বিবেচিত হইতে পারে না। ব্রিটিশ শাসনতন্ত্র অতি সহজেই সাধারণ আইন-প্রণয়ন-পদ্ধতিতে পার্লামেন্ট সভা কর্তৃক পরিবর্তিত

হইতে পারে, কিন্তু আপাতদৃষ্টিতে দেখা যায় যে, মার্কিন যুক্তরাষ্ট্রের শাসনতন্ত্র সাধারণ আইন-প্রণয়ন-পদ্ধতি হইতে পৃথক্ একটি জটিল পদ্ধতি ব্যতীত পরিবর্তিত হইতে পারে না। কিন্তু এই নিয়মতান্ত্রিক জটিল পদ্ধতি ছাড়াও মার্কিন দেশের শাসনতন্ত্র পরিবর্তনের অল্প পন্থা আছে ও সেই পন্থা অনুসরণ করিয়া মার্কিন দেশের শাসনতন্ত্রের সম্বোধনগামী বহু গুরুত্বপূর্ণ পরিবর্তন সাধিত হইয়াছে। এ-কথা স্বীকার করিয়া লইতে হইবে যে, জাতীয় রাজনৈতিক জীবনধারার ক্রমবিকাশের সঙ্গে সঙ্গে মার্কিন যুক্তরাষ্ট্রের বর্তমান শাসনতন্ত্র ১৭৮৭ খৃষ্টাব্দে ফিলাডেল্ফিয়ায় রচিত ও ১৭৮৯ খৃষ্টাব্দে গৃহীত আদি শাসনতন্ত্র হইতে বহুলাংশে পরিবর্তিত হইয়াছে। প্রশ্ন হইল, এই অসংখ্য পরিবর্তন শাসনতন্ত্রের অ-নমনীয়তা সত্ত্বেও কিভাবে সম্ভব হইল? নিয়মতান্ত্রিক উপায়ে মাত্র ২৫টি সংশোধন হইয়াছে। অবশিষ্ট পরিবর্তন ও পরিবর্ধন সম্ভব হইয়াছে প্রথা ও বিচারালয়ের মাধ্যমে। প্রথাগত বিধির দ্বারাই ক্যাবিনেটের উৎপত্তি হইয়াছে। বিচারালয়ের সিদ্ধান্ত দ্বারা জাতীয় বা কেন্দ্রীয় সরকারের ক্ষমতা ক্রমশঃ বৃদ্ধি পাইয়াছে। রাষ্ট্রপতি ও কংগ্রেস-সভার ক্ষমতা বিচারালয়ের সিদ্ধান্ত দ্বারা ধীরে ধীরে একরূপ পরিমাণে বৃদ্ধি পাইয়াছে যে, আদি শাসনতন্ত্রের রচয়িতাগণ তাহা কল্পনা করিতে পারিতেন না। এইরূপে যুক্তরাষ্ট্রের শাসনতন্ত্রের গঠনপ্রকৃতি ও তাৎপর্য উভয়েরই পরিবর্তন হইয়াছে। সুতরাং নিয়মতান্ত্রিক উপায়ে শাসনতন্ত্রের পরিবর্তন-পদ্ধতি শাসনতন্ত্র-পরিবর্তনের একমাত্র পদ্ধতি বা পন্থা বলিয়া বিবেচিত হইতে পারে না। যেখানে নিয়মতান্ত্রিক পদ্ধতিতে শাসনতন্ত্রের পরিবর্তন সহজ নয় সেখানে অল্প উপায়ে—প্রথা বা বিচারালয়ের সিদ্ধান্ত দ্বারা শাসনতন্ত্রের পরিবর্তন সহজসাধ্য করা হয়। শাসনতন্ত্র কোন-ক্রমে স্থাপুর মত থাকিতে পারে না। সুতরাং সকল শাসনতন্ত্রই পরিবর্তনশীল। এ দিক দিয়া দেখিতে গেলে মার্কিন যুক্তরাষ্ট্রের শাসনতন্ত্র বৃটিশ শাসনতন্ত্র অপেক্ষা কম নমনীয় নহে।

বর্তমান যুগে নানাকারণে শাসনতন্ত্রগুলি অ-নমনীয়তার দিকে ঝুঁকিয়া পড়িতেছে। এমন কি সর্বাপেক্ষা অধিক নমনীয় বৃটিশ শাসনতন্ত্রও ক্রমশঃই অ-নমনীয় হইয়া উঠিতেছে। ইহার প্রধান কারণ হইল, মৌলিক অধিকার-গুলির রক্ষাকল্পে জনসাধারণ বিশেষভাবে আগ্রহান্বিত হইয়া উঠিতেছে 'ও'.

সেইজন্য অ-নমনীয় শাসনতন্ত্রের মাধ্যমে এই ব্যক্তিস্বাধীনতা রক্ষার চেষ্টা করা হয়। শাসনতন্ত্র সহজে পরিবর্তনশীল নয় বলিয়া শাসন-কর্তৃপক্ষ সহসা ব্যক্তিস্বাধীনতা সংকুচিত করিতে পারেন না। দ্বিতীয়তঃ, যুক্তরাষ্ট্রীয় শাসনব্যবস্থা প্রবর্তনের সঙ্গে সঙ্গে অ-নমনীয় শাসনতন্ত্রের উপযোগিতা বৃদ্ধি পাইয়াছে। যুক্তরাষ্ট্রীয় ব্যবস্থায় এই অ-নমনীয় শাসনতন্ত্র ব্যক্তিস্বাধীনতা, প্রাদেশিক সরকারগুলির ও কেন্দ্রীয় সরকারের ক্ষমতা অব্যাহত রাখে।

শাসনতন্ত্র পরিবর্তনের বিভিন্ন পদ্ধতি (Methods of Constitutional Amendment)

শাসনতন্ত্র লিখিত হউক আর অ-লিখিত হউক, নমনীয় হউক আর অ-নমনীয় হউক, জাতীয় অগ্রগতির জন্ত ইহার পরিবর্তন অপরিহার্য। কিন্তু এই পরিবর্তনের পদ্ধতি সকল দেশে একপ্রকারের নয়।

নমনীয় শাসনতন্ত্রের পরিবর্তনে কোনরূপ জটিলতা নাই। সাধারণ পদ্ধতিতে সাধারণ আইনের মত আইনসভাই ইহার পরিবর্তন করিতে পারে—যেদ্রুপভাবে ইংলেণ্ডে পরিবর্তিত হয়।

কিন্তু অ-নমনীয় শাসনতন্ত্রের ক্ষেত্রে বিভিন্ন দেশে বিভিন্ন পদ্ধতি অবলম্বন করা হইয়াছে।

প্রথমতঃ, অ-নমনীয় শাসনতন্ত্রের পরিবর্তনের জন্ত সমগ্র ভোটদাতার সম্মতির প্রয়োজন হয়। সুইস্ দেশে ও অস্ট্রেলিয়ায় এই নিয়ম অনুসারে শাসনতন্ত্র পরিবর্তিত করা যায়। দ্বিতীয়তঃ, যুক্তরাষ্ট্রীয় শাসনব্যবস্থায় শাসনতান্ত্রিক আইনের পরিবর্তনের জন্ত প্রাদেশিক সরকারগুলির সংখ্যাধিক্যের সম্মতি প্রয়োজন। মার্কিন যুক্তরাষ্ট্রের শাসনতান্ত্রিক পরিবর্তনের প্রস্তাব ৩ রাজ্য দ্বারা সমর্থিত হওয়া চাই। অস্ট্রেলিয়া ও সুইস্ দেশেও নির্বাচকমণ্ডলীর সংখ্যাধিক্য ছাড়া প্রাদেশিক সরকারগুলির সংখ্যাধিক্যের সম্মতি প্রয়োজন। তৃতীয়তঃ, অনেক দেশে সাধারণ আইনসভা একটা নির্দিষ্ট বিশেষ পদ্ধতি দ্বারা শাসনতন্ত্র পরিবর্তন করিতে পারে। সোভিয়েত যুক্তরাষ্ট্রে আইনসভার উভয়কক্ষের ৬ অংশ স্বেচ্ছায় সম্মতিতে শাসনতন্ত্রের পরিবর্তন সম্ভব হয়। ভারতের কয়েকটি বিশেষ ক্ষেত্রে ছাড়া সাধারণ আইনসভা কর্তৃক প্রস্তাবিত সংশোধন একটা খসড়া

বিলের আকারে আইনসভায় পেশ করা হইয়া সমগ্র সদস্যসংখ্যা ও উপস্থিত সদস্যসংখ্যার নিরঙ্কুশ সংখ্যাধিক্য দ্বারা প্রস্তাবিত সংশোধন অনুমোদন করাইতে হইবে। তারপর ভারতের রাষ্ট্রপতির সম্মতি পাইলে ইহা কার্যকরী হইবে।

শাসনতন্ত্রের বিষয়বস্তু (Contents of Constitution)

শাসনতন্ত্রের বিষয়বস্তু কি এ-সম্বন্ধে আলোচনা করা প্রয়োজন। শাসনতন্ত্র কি শুধু সরকারের ক্ষমতার উৎস বলিয়া বিবেচিত হইবে, না শুধু ব্যক্তিস্বাধীনতার রক্ষাকবচ হিসাবে পরিগণিত হইবে—ইহাই বিচার্য বিষয়। শাসনতন্ত্রের প্রধান কার্য হইল, রাষ্ট্রের ক্ষমতা ও ব্যক্তিস্বাধীনতার মধ্যে সমন্বয়সাধন করিয়া ব্যক্তিত্বের পূর্ণ অভিব্যক্তির পথ সুগম করিয়া দেওয়া। এইজন্য শাসনতন্ত্রে নিম্নলিখিত বিধিনিষেধগুলি স্থান পায়।

প্রথমতঃ, শাসনকার্য পরিচালনা করিবার নিমিত্ত শাসকশ্রেণী নির্বাচন করিয়া তাহাদের ক্ষমতা শাসনতন্ত্র সুস্পষ্টভাবে নির্ধারিত করিয়া দেয়। শাসনতন্ত্র একদিকে যেমন সরকার কি কি কার্য করিবে তাহা স্থির করিয়া দেয়, অপরদিকে সেইরূপ সরকার কি কি কার্য করিতে পারিবে না তাহাও নির্ধারিত করিয়া সরকারের কার্যের সীমারেখা স্থির করিয়া দেয়।

দ্বিতীয়তঃ, শাসনতন্ত্র ব্যক্তিস্বাধীনতার উৎস। সমাজজীবনে নাগরিকগণ অত্র ব্যক্তির ও সরকারের সম্পর্কে কি পরিমাণ অধিকার ভোগ করিতে পারে শাসনতন্ত্র তাহা স্থির করিয়া পারস্পরিক সম্বন্ধ নিয়ন্ত্রিত করে। শাসনতন্ত্র অন্ত্রের ও সরকারের সম্পর্কে নাগরিক কর্তব্যও নির্ধারণ করিয়া দেয়।

তৃতীয়তঃ, সরকারের কার্য যাহাতে সুষ্ঠুভাবে পরিচালিত হয় সেইজন্য সরকারের বিভিন্ন বিভাগের পারস্পরিক সম্পর্ক শাসনতন্ত্র স্থির করে। বিভিন্ন বিভাগের ক্ষমতা পরস্পর-বিরোধী না হইয়া কিভাবে পরিচালিত হইলে শাসনকার্য উন্নততর হইতে পারে, শাসনতন্ত্র সে নির্দেশ দেয়।

চতুর্থতঃ, সরকারী কার্যে লোক নিয়োগ করিবার জন্য কতকগুলি মৌলিক আইন শাসনতন্ত্রে সন্নিবিষ্ট করা হয়। এই আইনানুসারে গঠিত একটি সাধারণ নিয়োগ-সংসদ (Public Service Commission)-গঠনের ব্যবস্থা থাকে। এই নিয়োগ-সংসদ যোগ্যতানুসারে পরীক্ষা করিয়া বা অন্য পন্থায় সরকারী কর্মী নিয়োগ করিয়া থাকে।

পরিণেবে প্রত্যেক শাসনতন্ত্রেই শাসনতন্ত্র পরিবর্তনের একটি নিয়মতান্ত্রিক পদ্ধতি স্থিরীকৃত থাকে, যে পদ্ধতিতে শাসনতন্ত্রের পরিবর্তন সম্ভব হয়। কোন কর্তৃপক্ষ শাসনতন্ত্র সংশোধন করিতে যোগ্যভাসম্পন্ন বা কি পদ্ধতিতে সংশোধন করা যাইবে—সকল বিষয় স্পষ্টভাবে শাসনতন্ত্রে লিখিত থাকে।

সংক্ষিপ্তসার

শাসনতন্ত্র—স্বাধীনভাবে আইনের ভিত্তির উপর শাসক-শাসিতের সম্পর্ক নির্ধারণ করা হইল শাসনতন্ত্রের কার্য। শাসনতন্ত্র ব্যতীত কোন রাষ্ট্রের কল্পনা করা যায় না।

সরকারের কার্য কিভাবে পরিচালিত হইবে, সরকারের বিভিন্ন বিভাগগুলির মধ্যে পারস্পরিক কি সম্পর্ক হইবে এবং সরকার ও জনগণের মধ্যে কি সম্পর্ক হইবে—শাসনতন্ত্র এইগুলি স্থির করে। সরকারের কার্যের সীমারেখা স্থির করিয়া শাসনতন্ত্র ব্যক্তিস্বাধীনতার রক্ষাকবচ হিসাবে কাজ করে।

শাসনতন্ত্রের শ্রেণীবিভাগ—শাসনতন্ত্রকে সাধারণতঃ লিখিত ও অ-লিখিত শাসনতন্ত্রে ভাগ করা হয়। যে শাসনতন্ত্রে শাসক ও শাসিতের সম্পর্ক বিশদভাবে লিখিত থাকে এবং পূর্ব-পরিকল্পনামুযায়ী একটি প্রতিনিধি-সংসদ দ্বারা ইহা রচিত হয় তাহাকে লিখিত শাসনতন্ত্র বলা হয়। আর যে শাসনতন্ত্র ধীরে ধীরে বিভিন্ন প্রথা, বিচারালয়ের সিদ্ধান্ত প্রভৃতির দ্বারা গড়িয়া উঠে তাহাকে অ-লিখিত শাসনতন্ত্র বলা হয়। ইহা কোন নির্দিষ্ট সময়ে কোন নির্দিষ্ট পদ্ধতিতে নির্দিষ্ট প্রতিনিধি-সংসদ দ্বারা গঠিত হয় না।

শাসনতন্ত্রের এই শ্রেণীবিভাগ যুক্তিযুক্ত নয়, কারণ কোন শাসনতন্ত্রই সম্পূর্ণরূপে লিখিত বা অ-লিখিত হইতে পারে না। লিখিত শাসনতন্ত্রে অ-লিখিত অংশ থাকিতে পারে (যেমন, আমেরিকা যুক্তরাষ্ট্রের শাসনতন্ত্র লিখিত হইলেও অনেকক্ষেত্রে অ-লিখিত প্রথার দ্বারা প্রভাবিত হইয়াছে), আবার অ-লিখিত শাসনতন্ত্রে লিখিত অংশ থাকিতে পারে (যেমন, ব্রিটিশ শাসনতন্ত্রে ম্যাগনাকার্টা, অধিকারের সনদ প্রভৃতি লিখিত অঙ্গ স্থান পাইয়াছে)।

লিখিত শাসনতন্ত্র সুস্পষ্ট। যুক্তরাষ্ট্রীয় শাসনব্যবস্থায় ইহা অপরিহার্য।

কিন্তু ইহার প্রধান দোষ হইল যে, সহজে পরিবর্তন করা যায় না বলিয়া লিখিত শাসনতন্ত্র অনেক সময় জাতীয় অগ্রগতির পথ রোধ করে।

অ-লিখিত শাসনতন্ত্র সহজে পরিবর্তন করা যায় বলিয়া ইহা জাতীয় জীবনের প্রয়োজন মিটাইতে পারে। কিন্তু ইহা অস্থায়ী ও অস্পষ্ট।

শাসনতন্ত্রকে অল্প দিক দিয়া নমনীয় ও অ-নমনীয় এই দুই ভাগে ভাগ করা যায়। সাধারণ পদ্ধতিতে সাধারণ আইনের মত যে শাসনতন্ত্রের পরিবর্তন করা যায় তাহাকে নমনীয় শাসনতন্ত্র বলা হয়, যেমন ব্রিটিশ শাসনতন্ত্র। রাজা-সহ পার্লামেন্ট সভা একই পদ্ধতিতে সাধারণ আইন ও শাসনতান্ত্রিক আইনের পরিবর্তন সাধন করিতে পারে। অপরপক্ষে, যে শাসনতন্ত্র-পরিবর্তন করিতে হইলে সাধারণ আইন-প্রণয়ন-পদ্ধতি অপেক্ষা জটিলতর ভিন্ন পদ্ধতির আশ্রয় গ্রহণ করিতে হয় তাহাকে অ-নমনীয় শাসনতন্ত্র বলা হয়।

নমনীয় শাসনতন্ত্র সহজে পরিবর্তন করা যায় বলিয়া জাতীয় অগ্রগতি ব্যাহত হয় না—বিনা রক্তপাতে শাসনতান্ত্রিক পরিবর্তন সম্ভব। কিন্তু ইহার দোষ হইল যে, ইহার কোন স্থায়িত্ব নাই। জনমতের চাপে সদাসর্বদা ইহার রদবদল হইতে পারে।

অ-নমনীয় শাসনতন্ত্রের প্রধান গুণ হইল ইহার স্থায়িত্ব। ব্যক্তিস্বাধীনতা ও নাগরিক অধিকার রক্ষা করিতে এই শাসনতন্ত্র অধিকতর উপযোগী বলিয়া বিবেচিত হয়। কিন্তু ইহার প্রধান দোষ হইল যে, প্রয়োজনীয় পরিবর্তন করা যায় না বলিয়া উহা জাতীয় অগ্রগতির অন্তরায় হইতে পারে।

শাসনতন্ত্রের স্বরূপ—সকল দেশের শাসনতন্ত্রই প্রধানতঃ তিনটি উপাদান দ্বারা গঠিত হয় : নিয়মতান্ত্রিক পদ্ধতিতে রচিত আইন, বিভিন্ন প্রথা ও বিচারালয়ের সিদ্ধান্ত। যে সমস্ত দেশের শাসনতন্ত্র নিয়মতান্ত্রিক পদ্ধতিতে পরিবর্তন করা দুরূহ, সেখানে প্রথা ও বিচারালয়ের সিদ্ধান্ত দ্বারা শাসনতন্ত্রের অনেক পরিবর্তন ঘটে; উদাহরণস্বরূপ আমেরিকা যুক্তরাষ্ট্রের কথা বলা যাইতে পারে। আবার ব্রিটিশ শাসনতন্ত্র প্রধানতঃ প্রথা ও বিচারালয়ের সিদ্ধান্তের উপর প্রতিষ্ঠিত হইলেও নিয়মতান্ত্রিক পদ্ধতিতে ইহার অনেক পরিবর্তন সাধিত হইয়াছে। অধুনা যুক্তরাষ্ট্রীয় প্রথার আবির্ভাবের ফলে ও ব্যক্তিস্বাধীনতা রক্ষাকল্পে সকল দেশের শাসনতন্ত্রই অ-নমনীয় হইয়া উঠিতেছে।

শাসনতন্ত্র-পরিবর্তনের বিভিন্ন পদ্ধতি—নমনীয় শাসনতন্ত্র-পরিবর্তনে কোন জটিলতা নাই। সাধারণ আইনসভা সাধারণ আইন-প্রণয়ন-পদ্ধতিতে ইহার পরিবর্তন করিতে পারে। কিন্তু অ-নমনীয় শাসনতন্ত্রের পরিবর্তন পদ্ধতিতে প্রভেদ দেখা যায়। সাধারণ আইনসভা ভিন্ন পদ্ধতি অবলম্বন করিয়া, বা প্রতিনিধি-সংসদ আহ্বান করিয়া, কিংবা নির্বাচক-মণ্ডলীর সমর্থন দ্বারা, কিংবা যুগপৎ আইনসভার সমর্থন ও নির্বাচকমণ্ডলীর সংখ্যাধিক্যের সমর্থন দ্বারা, অ-নমনীয় শাসনতন্ত্রের পরিবর্তন করা হয়।

শাসনতন্ত্রের বিষয়বস্তু—শাসনতন্ত্র শাসক-শাসিতের সম্পর্ক নির্ধারণ করে। সুতরাং ইহাতে থাকে—(ক) শাসকের ক্ষমতা ও ক্ষমতার সীমা, (খ) শাসিতের অধিকার, (গ) সরকারের বিভিন্ন বিভাগের পারস্পরিক সম্পর্ক, (ঘ) শাসনতন্ত্র পরিবর্তন করিবার নির্ধারিত পদ্ধতি।

প্রশ্নাবলী

1. Distinguish between a rigid and a flexible constitution. Are the constitutions of (a) U. S. A. (b) England, and (c) India rigid or flexible? Give reasons for your answer.

(C. U. 1947)

2. "Constitutions grow and are not made." Criticise the doctrine with reference to the Constitution of India.

(Gauhati, 1948)

3. "The distinction between state with written and those with unwritten constitutions is an illusory basis of division." Examine the statement.

4. An American Writer has said that the constitution of the U. S. A. is more flexible than the British one. How would you justify his view-point?

(C. U. 1951)

ষোড়শ অধ্যায় রাজনৈতিক দল ও জনমত

(Political Party and Public Opinion)

রাজনৈতিক দল (Political Party)

বর্তমান সভ্য রাষ্ট্রগুলির শাসনব্যবস্থা দলীয় রাজনীতির ভিত্তির উপর প্রতিষ্ঠিত। সেজন্য আধুনিক গণতন্ত্রগুলিকে প্রতিনিধি-পরিচালিত গণতন্ত্র বলা যাইতে পারে। দেশের বিভিন্ন রাজনৈতিক ও অর্থনৈতিক সমস্যা সম্পর্কে সকলে একমতাবলম্বী হইতে পারে না। যে সমস্ত লোক একই নীতিকে কার্যকরী করিবার জন্য বদ্ধপরিকর হয়, সেই সমস্ত লোক লইয়া এক-একটি রাজনৈতিক দল গঠিত হয়। ব্যক্তিবিশেষের মত যতই যুক্তিযুক্ত ও গুরুত্বপূর্ণ হউক না কেন, তাহা এককভাবে কার্যকর হইতে পারে না। সেজন্য এক নীতিতে আস্থাবান অধিকসংখ্যক লোক যদি একতাবদ্ধ হইয়া তাহাদের নীতি ও কার্যক্রম সফল করিবার জন্য বদ্ধপরিকর হয়, তাহা হইলে সেই সংঘবদ্ধ শক্তিকে প্রতিরোধ করা যায় না। দল-গঠন ব্যাপারে মানব-চরিত্রের দুইটি বৈশিষ্ট্য পরিলক্ষিত হয়। প্রথম বৈশিষ্ট্য হইল যে, প্রত্যেক মানুষের একটি স্বকীয় মত থাকে এবং সেইজন্য মানুষে মানুষে মতভেদ হয়। কিন্তু এই মতভেদ থাক। সত্ত্বেও মানুষ সামাজিক জীব এবং সংঘবদ্ধভাবে সভ্য জীবন বাপনের উদ্দেশ্যে মতানৈক্য দূর করিয়া ষথাসম্ভব ঐক্যমত প্রতিষ্ঠিত করিতে প্রয়াস পায়। দ্বিতীয়তঃ, একই নীতিতে বিশ্বাসী জনসমূহ স্বসংঘবদ্ধভাবে তাহাদের নির্ধারিত নীতিকে রূপায়িত করিতে প্রয়াস পায়। সুতরাং রাজনৈতিক দল-গঠনের মূলনীতি হইল—একতাই বল। প্রত্যেকটি রাজনৈতিক দল উদ্দেশ্য-প্রণোদিত হইয়া তাহাদের নীতি ও কার্যক্রম স্থির করে। জাতীয় স্বার্থের সংরক্ষণ ও উৎকর্ষসাধন হইল রাজনৈতিক দলের মুখ্য উদ্দেশ্য। দলীয় স্বার্থসিদ্ধি করিবার উদ্দেশ্যে দল গঠিত হইলে সে দল আদর্শশ্রষ্ট হইয়া কুচক্রী দলে পরিণত হয়। প্রত্যেকটি রাজনৈতিক দল জাতীয় স্বার্থের উৎকর্ষসাধন করিবার নিমিত্ত রাজনৈতিক ক্ষমতা অধিকার করিয়া শাসনকার্য পরিচালনা করিবার জন্য সচেষ্ট থাকে। কিন্তু দলীয় শাসন

ঈশ্বরানুমোদিত—এই কথা প্রচার করিয়া কোন রাজনৈতিক দলই বর্তমান যুগে শাসনকার্য পরিচালনা করিতে পারে না। দলীয় শাসনব্যবস্থার পশ্চাতে জনগণের সমর্থন থাকা চাই।

রাজনৈতিক দল গঠন করিতে নিম্নলিখিত চারটি উপাদান একান্ত অপরিহার্য :—

১। দলগঠনের প্রাথমিক উপাদান হইল যে, যে-সমস্ত লোক লইয়া রাজনৈতিক দল গঠিত হইবে তাহাদের মধ্যে বিস্তারিত কার্যক্রমে মতভেদ থাকিলেও দলীয় মূলনীতিতে সকলেরই আস্থা ও সমর্থন থাকা চাই। এই মূলগত ঐক্যের অভাবে রাজনৈতিক দল সংবদ্ধভাবে কার্য করিয়া তাহাদের উদ্দেশ্যসাধন করিতে পারে না।

২। রাজনৈতিক দলের প্রধান বল হইল একতা। সূত্রাং দলের সদস্যবর্গকে সুসংবদ্ধ হইয়া তাহাদের নির্ধারিত নীতিকে কার্যকরী করিবার জন্ত বদ্ধপত্রিকর হইতে হয়। দলীয় সংগঠন যদি সুসংবদ্ধ না হইয়া শিথিল হয়, তাহা হইলে রাজনৈতিক দল একটি অসংবদ্ধ ও অনিয়ন্ত্রিত জনতায় পর্যবসিত হয়।

৩। রাজনৈতিক দলের প্রধান বৈশিষ্ট্য হইল যে, ইহারা সর্বদা নিয়ম-তান্ত্রিক উপায়ে ইহাদের উদ্দেশ্যসাধন করিতে চায়। যে দল বলপ্রয়োগে বা অন্ত কোন অসং উপায়ে ক্ষমতা অধিকার করিবার প্রয়াস পায়, তাহা কখনই রাজনৈতিক দল পদবাচ্য হইতে পারে না। একমাত্র জনসাধারণের ভোট দ্বারা সমর্থনের উপরই রাজনৈতিক দলের অধিকার নির্ভর করে।

৪। রাজনৈতিক দলের প্রধান উদ্দেশ্য হইল জাতীয় স্বার্থের উন্নতিসাধন করা। একমাত্র এই উদ্দেশ্যের দ্বারা রাজনৈতিক দলগুলিকে অন্তান্ত সংগঠন হইতে পৃথক্ করা যায়। যখন কোন দল এই মহান আদর্শ-ভ্রষ্ট হইয়া ইহার দলীয় স্বার্থসংরক্ষণে সচেষ্ট হয়, তখন তাহাকে কুচক্রী দল (Faction বা Coteri) বলা হয়।

রাজনৈতিক দলের কার্য (Functions of Political Parties)

প্রত্যেকটি রাজনৈতিক দল একজন নেতা ও একাধিক উপনেতার অধীনে সংঘবদ্ধ হয়। কোন রাজনৈতিক দল যদি বাস্তবক্ষেত্রে তাহাদের মত

কার্যকর করিতে কৃতসংকল্প হয়, তাহা হইলে তাহাদের প্রথম ও প্রধান কর্তব্য হইল দেশের বিভিন্ন সমস্ত সম্পর্কে তাহাদের দলীয় নীতি স্থির করা। জাতীয় সমস্তাগুলি নির্ধারণ করিয়া সেই সমস্তাগুলির সমাধানকল্পে রাজনৈতিক দলগুলিকে তাহাদের কার্যক্রম স্থির করিতে হয়। জাতীয় সমস্তা ও সমস্তা-সমাধানের নীতি স্থির হইলে দলের কার্য হইল সেই নীতিকে নানা উপায়ে দেশের জনসাধারণের মধ্যে প্রচার করা। সংবাদপত্র, সভাসমিতি ও পুস্তিকা প্রকাশ প্রভৃতির মধ্য দিয়া জনমতকে দলের অনুকূল করিয়া গঠন করিবার জন্য প্রত্যেক দলকে প্রচারকার্য চালাইতে হয়। যত অধিক সংখ্যক লোক এই প্রচারকার্যের দ্বারা উদ্বুদ্ধ হইয়া দলীয় নীতিতে আস্থা বান্ হয়, দলের সমর্থকসংখ্যা ততই বৃদ্ধি পায়। আইনসভার সাধারণ নির্বাচনের সময় প্রত্যেকটি রাজনৈতিক দল সক্রিয় হয়। প্রার্থী নির্বাচন করিয়া সাধারণ নির্বাচনদ্বন্দে অবতীর্ণ হওয়া রাজনৈতিক দলের আর একটি প্রধান কার্য। নিজ নিজ দলের প্রার্থীর পক্ষে ভোটসংগ্রহের জন্য এই সময় প্রত্যেকটি দলকে জোর প্রচারকার্য চালাইতে হয়। নির্বাচনের পর যে দল আইনসভায় সংখ্যাগরিষ্ঠতা লাভ করে, সেই দলের নেতৃগণ মন্ত্রিসংসদ গঠন করিয়া শাসনকার্য-পরিচালনার দায়িত্ব গ্রহণ করেন। শাসনক্ষমতার অধিকারী হইলে রাজনৈতিক দল ইহার নীতি ও কার্যক্রম অনুসারে দেশের শাসনকার্য পরিচালনা করিয়া জাতীয় সমস্তাগুলির সমাধান করিতে সচেষ্ট থাকে। এইরূপে নির্বাচনের সময় জনসাধারণের সমর্থন লাভের জন্য যে সমস্ত প্রতিশ্রুতি রাজনৈতিক দল কর্তৃক প্রদত্ত হয়, ক্ষমতালভের পর সেগুলিকে যথাসম্ভব রক্ষা করিবার চেষ্টা করা হয়। যে দলগুলি আইনসভায় অপেক্ষাকৃত কমসংখ্যক আসন দখল করে, তাহারা বিরোধী দল বলিয়া পরিচিত হয়। প্রত্যক্ষভাবে শাসনকার্যের সহিত সংশ্লিষ্ট না থাকিলেও বিরোধী দল আলাপ-আলোচনা, তর্ক-বিতর্ক ও প্রশ্নোত্তরের দ্বারা মন্ত্রিমণ্ডলকে তাহাদের কর্তব্য সম্বন্ধে সর্বদা অবহিত রাখে। মন্ত্রিমণ্ডলী তাহাদের নির্বাচনকালীন প্রতিশ্রুতি উপেক্ষা করিয়া খুশীমত শাসনকার্য পরিচালনা করিলে বিরোধী দল জনমত জাগ্রত করিয়া মন্ত্রিমণ্ডলীর কার্যে বাধা সৃষ্টি করিতে পারে।

রাজনৈতিক দলগুলিকে ইহাদের মতের পার্থক্য অনুসারে সাধারণতঃ চার ভাগে ভাগ করা হয়—উগ্র বামপন্থী (Extreme Left), বামপন্থী

(Left), দক্ষিণপন্থী (Right) ও উগ্র দক্ষিণপন্থী (Extreme Right) । উগ্র বামপন্থী দল সব-কিছুই আয়ুল পরিবর্তনসাধন করিয়া নতুন পরিবেশের সৃষ্টি করিতে চান । বামপন্থীরা প্রয়োজনমত বর্তমান অবস্থার প্রগতিমূলক পরিবর্তনে বিশ্বাসী । দক্ষিণপন্থীরা কোনরূপ পরিবর্তনের পক্ষপাতী নহেন । বর্তমান অবস্থাকে বজায় রাখা তাঁহারা সমীচীন মনে করেন । উগ্র দক্ষিণ-পন্থী দল অতিরিক্তমাত্রায় রক্ষণশীল । তাঁহারা অধুনালুপ্ত পুরাতন ব্যবস্থার পক্ষপাতী ।

রাজনৈতিক দল সম্পর্কে কয়েকটি কথা স্মরণ রাখা অতীব প্রয়োজন । প্রথমতঃ, রাজনৈতিক দলের দায়িত্ব ও কার্যকারিতা অনেকাংশে ইহাদের নীতি ও কার্যসূচীর উপর নির্ভর করে । যে দল ইহার নীতি ও কার্যক্রম সময়োপযোগী করিয়া পরিবর্তন করিতে পারে না, সে দলের পক্ষে স্থায়িত্ব-লাভ করিয়া জনপ্রিয়তা অর্জন করা সম্ভব নয় । দলের নীতি ও কার্যক্রম যদি জাতীয় অগ্রগতির সমান পর্যায়ে না চলিতে পারে, তাহা হইলে দলীয় শাসনব্যবস্থা অসাড় ও পঙ্কু হইয়া পড়ে । এইজন্য কি রক্ষণশীল, কি উদার-নৈতিক—সব দলেরই নীতি ও কার্যক্রমের পরিবর্তন অপরিহার্য ।

দ্বিতীয়তঃ, কোন দেশেই রাজনৈতিক দল শাসনতান্ত্রিক ভিত্তির উপর প্রতিষ্ঠিত নহে । শাসনতন্ত্র কর্তৃক রাজনৈতিক দলের অস্তিত্ব স্বীকৃত বা সমর্থিত হয় না । সকল দেশেই রাজনৈতিক দলের কার্যকলাপ শাসনতন্ত্র-বহির্ভূত এলাকায় সীমাবদ্ধ (Extra-legal growth) । মার্কিন যুক্তরাষ্ট্র ও গ্রেট ব্রিটেন প্রভৃতি দেশে যেখানে শাসনব্যবস্থা দলীয় রাজনীতির উপর প্রতিষ্ঠিত, সে সমস্ত দেশেও রাজনৈতিক দলগুলির শাসনতন্ত্র কর্তৃক স্বীকৃত কোন অস্তিত্ব নাই—অথচ সরকার-গঠনে এবং সরকারী কার্য-পরিচালনায় দলীয় সংগঠন অপরিহার্য হইয়া উঠিয়াছে । মার্কিন যুক্তরাষ্ট্রে এই দলীয় সংগঠন শাসনতন্ত্রের কঠোরতা প্রশমিত করিয়া শাসনতন্ত্রকে বাস্তবক্ষেত্রে কার্যকর করিতে সহায়তা করিয়াছে । দলীয় সংগঠনের অবর্তমানে মার্কিন শাসনতন্ত্র কর্তৃক সৃষ্ট শাসনব্যবস্থা চরম ক্ষমতা স্বাতন্ত্র্যবিধানের জন্য পঙ্কু হইয়া পড়িত ।

তৃতীয়তঃ, রাজনৈতিক দলগুলি মানুষের স্বাধীনভাবে চিন্তা করিবার ও স্বাধীনভাবে কার্য করিবার সহজাত অধিকারের উপর প্রতিষ্ঠিত হইলেও বর্তমান যুগে রাজনৈতিক দলগুলি অর্থনৈতিক সমশ্রাসমূহ সম্পর্কে মানুষের

মতানৈক্যের ভিত্তির উপর গঠিত হইয়াছে। সাময়িক উত্তেজনা বা লঘু কারণে মানুষের মধ্যে যে মতভেদ হয় তজ্জন্ত স্থায়ী কোন দল গঠিত হইতে পারে না। উত্তেজনা প্রশমিত হইলে মতভেদও দূর হয়। ব্যক্তিগত সম্পত্তির অধিকার ও ভোগ এবং অশান্ত অর্থনৈতিক ব্যবস্থা সম্পর্কে মানুষের ধারণার মধ্যে যে মূলগত পার্থক্য দেখা যায়, রাজনৈতিক দলগুলি প্রধানতঃ এই অর্থনৈতিক সমস্যা-সম্পর্কিত মূলগত পার্থক্যের উপর প্রতিষ্ঠিত হয়। অনেক সময় আবাস ধর্মমতের পার্থক্যের জন্ত সাম্প্রদায়িক পার্থক্যের ভিত্তিতে রাজনৈতিক দল গঠিত হয়। পাশ্চাত্য দেশসমূহে সাম্প্রদায়িক ভিত্তিতে গঠিত রাজনৈতিক দল বিরল, কিন্তু ভারত প্রভৃতি প্রাচীণ দেশে রাজনৈতিক শিক্ষার অভাবে এখনও পর্যন্ত সাম্প্রদায়িক ভিত্তিতে গঠিত রাজনৈতিক দল দেখিতে পাওয়া যায়।

দলীয় শাসনের গুণ (Merits of Party Government)

বর্তমান যুগে দেশের শাসনব্যবস্থায় রাজনৈতিক দল বিশেষ গুরুত্বপূর্ণ স্থান অধিকার করিয়াছে। রাজনৈতিক ব্যাপারে সাধারণতঃ জনসাধারণের কোন সুস্পষ্ট অভিমত থাকে না বা থাকিলেও সেই অভিমত কার্যকর করিতে পারে না। রাজনৈতিক দল এই অসংবদ্ধ জনমতকে সুসংবদ্ধভাবে গঠন করিয়া ইহাকে শক্তিশালী করিয়া তুলে। এই উদ্দেশ্যে দলগুলি নানা প্রকারে প্রচারকার্য পরিচালনা করিয়া থাকে। রাজনৈতিক দলগুলি দেশের বিভিন্ন সমস্যা ও তাহাদের সমাধানের প্রস্তাব জনসাধারণের সম্মুখে উপস্থিত করিয়া জনসাধারণকে ঐ সমস্ত বিষয়ে সচেতন করিবার প্রয়াস পায়। প্রচারকার্যের মধ্য দিয়া দেশবাসী ঐ সমস্ত জাতীয় সমস্যা ও তাহাদের সমাধান প্রস্তাবগুলির সহিত পরিচিত হয়। ফলে, সাধারণ স্বার্থসংশ্লিষ্ট ব্যাপারে জনসাধারণের উৎসাহ জন্মে ও তাহাদের রাজনৈতিক অধিকার ও কর্তব্যজ্ঞান বৃদ্ধি পায়। সুতরাং রাজনৈতিক দলগুলির কার্যকলাপের মধ্য দিয়া জনশিক্ষা বিস্তারলাভ করে।

সুসংবদ্ধ রাজনৈতিক দলের অবর্তমানে শাসনব্যবস্থা সুষ্ঠুভাবে পরিচালিত হইতে পারে না। আইনসভার সংখ্যাগরিষ্ঠ দল মন্ত্রিসংসদ গঠন করিয়া শাসনকার্য পরিচালনা করে এবং দলের নীতি ও নির্বাচনকালীন প্রতিশ্রুতি

ব্যাসম্ভব সকল করিতে সচেষ্ট থাকে। কিন্তু আইনসভার সদস্যগণ যদি তাঁহাদের দলের নেতৃগণ কর্তৃক গঠিত মন্ত্রিমণ্ডলীর কার্যে সহায়তা না করিয়া তাঁহাদের খুশীমত ভোট দেন, তাহা হইলে মন্ত্রিমণ্ডলীর শাসন পরিচালনা করা সম্ভব হয় না। দলের সদস্যগণের নিয়মানুসৃততা ও শৃংখলার অভাবে শাসনকর্তৃপক্ষ স্থায়ীভাবে কোন শাসননীতি প্রবর্তন করিতে পারে না। দলের সমর্থন ব্যতীত গণতান্ত্রিক শাসনব্যবস্থা স্থায়ী লাভ করিয়া দলীয় নীতি ও কার্যক্রম সকল করিতে পারে না।

দলীয় শাসনব্যবস্থার প্রবর্তন না হইলে শাসনকার্যের কোনরূপ উৎকর্ষসাধন হওয়া সম্ভবপর হইত না। ক্ষমতার অধিকারী দল নিজ ইচ্ছানুসারে শাসনকার্য পরিচালনা করিয়া যাইত। একমাত্র বলপ্রয়োগ পদ্ধতি ভিন্ন অন্য কোন উপায়ে ক্ষমতার অধিকারী দলকে ক্ষমতাচ্যুত করা সম্ভব হইত না। বর্তমান যুগে দলীয় শাসনব্যবস্থা প্রবর্তিত হওয়ার ফলে প্রত্যেকটি রাজনৈতিক দল শাসনকার্য পরিচালনা করিবার সুযোগ পায় এবং এই পারস্পরিক প্রতিযোগিতার মধ্য দিয়া শাসনকার্যের উৎকর্ষ সাধিত হওয়ার সম্ভাবনা থাকে। সংখ্যাগরিষ্ঠ দল শাসনকার্য পরিচালনার ভার গ্রহণ করিলেও সংখ্যালঘিষ্ঠ দলের বিরুদ্ধ সমালোচনার ভয়ে তাহার জনস্বার্থবিরোধী কোন কাজ করিতে সাহসী হয় না। আইনসভার বিরুদ্ধ দলগুলির সদাজাগ্রত দৃষ্টি সংখ্যাগরিষ্ঠ দলকে তাহাদের কর্তব্য সম্বন্ধে অবহিত রাখে। এইরূপে দলীয় শাসনব্যবস্থা সংখ্যাগরিষ্ঠ দলের স্বৈরাচারের প্রতিবন্ধকতা করে ও দলীয় প্রতিযোগিতার মধ্য দিয়া শাসনকার্যের উৎকর্ষসাধনে সহায়তা করে।

দলীয় শাসনব্যবস্থার আর একটি গুণ হইল যে, যে-সমস্ত দেশে ক্ষমতার স্বাতন্ত্র্যবিধান-নীতি শাসন-পরিচালনাক্ষেত্রে কার্যকরী করা হইয়াছে, সে সমস্ত দেশে রাজনৈতিক দলের মধ্য দিয়াই সরকারের বিভিন্ন বিভাগগুলির মধ্যে যোগসূত্র স্থাপিত হইয়াছে। এই যোগসূত্রের অভাবে শাসনব্যবস্থায় অচল পরিস্থিতি উদ্ভবের সম্ভাবনা ছিল; কিন্তু দলীয় শাসনব্যবস্থার ফলে শাসন-কর্তৃপক্ষ ও আইনসভার মধ্যে যোগসূত্র ও সহযোগিতা স্থাপিত হইয়া শাসনব্যবস্থা অব্যাহত আছে। মার্কিন যুক্তরাষ্ট্র শাসন-কর্তৃপক্ষের লীর্ধস্থানীয় ব্যক্তি অর্থাৎ রাষ্ট্রপতি এবং কংগ্রেস-সভার সংখ্যাগরিষ্ঠ দল একই রাজনৈতিক

দলভুক্ত বলিয়া ক্ষমতার স্বাতন্ত্র্যবিধান সত্ত্বেও তাঁহারা একযোগে শাসনকার্য পরিচালনা করিতে পারেন।

দলীয় শাসনের দোষ (Demerits)

গণতান্ত্রিক শাসনব্যবস্থায় রাজনৈতিক দল অপরিহার্য বিবেচিত হইলেও দলীয় শাসনব্যবস্থাকে ক্রটিহীন বলা যায় না। দলীয় শাসনব্যবস্থা আদর্শচ্যুত হইলে শাসনকার্য পরিচালনা ব্যাপারে অনেক গলদ দেখিতে পাওয়া যায়। রাজনৈতিক দল মানুষের মধ্যে কৃত্রিম বিভেদ সৃষ্টি করিয়া দলাদলির সূত্রপাত করে। দলের প্রাধান্ত বজায় রাখিবার নিমিত্ত অনেক সময় ব্যক্তিও উপেক্ষিত হয়। দলীয় সংহতি অব্যাহত রাখিবার জন্ত কোনরূপ মতানৈক্য বরদাস্ত করা হয় না। দলীয় নেতার মাধ্যমে যে-দলীয় নীতি নির্ধারিত হয়, বিবেকবুদ্ধি-বিরোধী হইলেও প্রত্যেক সদস্যকে সেই নীতি মানিয়া চলিতে হয়। ফলে, স্বাধীনভাবে চিন্তা করা বা স্বাধীনভাবে মত প্রকাশ করা সম্ভব হয় না। কোন কোন দেশে দলীয় বিধিনিষেধগুলি এত কঠোরভাবে কার্যকর করা হয় যে, দলের সমর্থকগণ দলের ক্রীড়নকে পর্যবসিত হয়। সুতরাং দলীয় শাসনব্যবস্থা ব্যক্তিবিকাশের অন্তরায় সৃষ্টি করে।

দলীয় অশুশাসনের প্রতি এই অঙ্ক ও অথও আশুগতোর ফলে দলের সমর্থকগণ দেশের বৃহত্তর স্বার্থের কথা ভুলিয়া দলীয় স্বার্থকে বড় করিয়া দেখিতে অভ্যস্ত হয়। জাতীয় সমস্যাগুলিকে নিরপেক্ষভাবে জাতীয় স্বার্থের দিক দিয়া বিবেচনা না করিয়া দলীয় ক্ষুদ্র স্বার্থের পরিপ্রেক্ষিতে বিবেচনা করা হয়। আইনসভায় সংখ্যাগরিষ্ঠতা লাভ করিবার জন্ত প্রত্যেকটি রাজনৈতিক দল ভোটসংগ্রহ ব্যাপারে তৎপর হয়। আর এই ভোটসংগ্রহ ব্যাপারে রাজনৈতিক দলগুলি সাধারণতঃ যে সমস্ত পন্থা অবলম্বন করে তাহাতে দেশের নৈতিক আবহাওয়ার ও নৈতিক মানের অবনতি ঘটে। বিভিন্ন দলের বিশিষ্ট নেতৃগণ তাঁহাদের সামাজিক পদমর্যাদা ভুলিয়া পরস্পরের প্রতি ব্যক্তিগত আক্রমণ ও প্রতি-আক্রমণ চালনা করিয়া সমাজে এরূপ দূষিত আবহাওয়ার সৃষ্টি করেন যাহাতে জনশিকার মূলে কুঠারাঘাত করা হয়। দুর্নীতি, মিথ্যাভাষণ ও মিথ্যাপ্রচার, কলহ-দ্বন্দ্ব প্রভৃতি নানাবিধ দোষ সমাজদেহে ছষ্ট ব্রণের মত আবির্ভূত হয়।

নির্বাচনক্ষেত্রে যে দল সংখ্যাগরিষ্ঠতা লাভ করে, সেই দল রাজনৈতিক ক্ষমতার অধিকারী হয় ও মন্ত্রিসংসদ গঠন করে। দলীয় আধিপত্য অকুণ্ণ রাখিবার নিমিত্ত সংখ্যাগরিষ্ঠ দল সরকারী চাকুরী, সরকারী সাহায্য ও সম্মান যোগ্যতা বিচার না করিয়া দলের সমর্থনকারীদের মধ্যে অকুণ্ণভাবে বিতরণ করিয়া দলের সংহতি বজায় রাখিতে সচেষ্ট হয়। ফলে, যোগ্য ব্যক্তি অপর দলভুক্ত বলিয়া সরকারী কার্যে অংশগ্রহণ করিতে পারে না। ইহাতে শাসনব্যবস্থা দুর্বল হইয়া পড়ে। অপরপক্ষে, যে রাজনৈতিক দল ক্ষমতালভ করিতে পারে না, সে দল বিরোধী দল বলিয়া পরিচিত হয় ও সর্বদা সরকারী কার্যের ভাল-মন্দ বিবেচনা না করিয়া সংখ্যাগরিষ্ঠ দলের ছিদ্রাঘেষণ করে ও সর্বপ্রকারে সরকারী কার্যে অন্তরায় সৃষ্টি করিতে সচেষ্ট থাকে। এইরূপ আত্মকলহের ফলে জাতীয় প্রগতিমূলক কার্যসমূহ বাধাপ্রাপ্ত হয়।

দলীয় শাসনের আর একটি প্রধান ত্রুটি হইল যে, দলের নেতৃত্ব যখন জনকয়েক স্বার্থপর কুচক্রী লোকের হস্তগত হয়, তখন এই কুচক্রী দল নিজেদের ক্ষুদ্র স্বার্থসাধনের নিমিত্ত জাতীয় স্বার্থ বিসর্জন দিতে দ্বিধাবোধ করে না।

উপসংহার (Conclusion)

দলব্যবস্থার উপরি-উক্ত দোষগুলি থাকার জন্ত অনেকে দলীয় শাসনের অবসান ঘটাইতে ইচ্ছা করেন। দলব্যবস্থার নিষ্পেষণে ব্যক্তিগত ইচ্ছা অসাড় ও মৃতকল্প হইয়া পড়িয়াছে। দলব্যবস্থা বিলুপ্ত হইলে ব্যক্তিগত ইচ্ছা আত্ম-প্রকাশ করিবার সুযোগ পাইয়া ব্যক্তিবিকাশে সহায়তা করিবে। কিন্তু এখানে একটি কথা স্মরণ রাখিতে হইবে যে, দলব্যবস্থার অবর্তমানে ব্যক্তিগত ইচ্ছা বা অভিমত এককভাবে কার্যকরী করা সম্ভব নয়। ব্যক্তিগত ইচ্ছা সমষ্টিগতভাবে দলব্যবস্থার মধ্য দিয়া কার্যকর হয়। অপরপক্ষে দলব্যবস্থার অবর্তমানে কোন শাসনব্যবস্থাই পরিবর্তন সাধন করা সম্ভব নয়। শাসক-গোষ্ঠীকে পরিবর্তন করিতে হইলে একমাত্র বল-প্রয়োগ-পদ্ধতি ব্যতীত অন্য কোন উপায়ে পরিবর্তন করা যায় না। সুতরাং ব্যক্তিগত অভিমত কার্যকর করিবার নিমিত্ত ও শাসনব্যবস্থা পরিবর্তনের জন্ত দলব্যবস্থা অপরিহার্য বলিয়া গণ্য হয়। সত্য বটে যে, দলীয় শাসনের অনেক ত্রুটি-বিচ্যুতি আছে, কিন্তু

সেজ্ঞাত দলব্যবস্থার অবমান না ঘটাইয়া ক্রটি-বিচ্যুতিগুলি বাহাতে দূর করা যায় সেই ব্যবস্থা অবলম্বন করা অধিকতর যুক্তিযুক্ত।

নাগরিকগণকে লইয়াই রাজনৈতিক দলগুলি গঠিত হয়। নাগরিকগণ যদি প্রকৃত শিক্ষিত ও রাজনৈতিক চেতনাসম্পন্ন হইয়া জাতীয় স্বার্থকে বড় করিয়া দেখেন, তাহা হইলে দলব্যবস্থায় কোনরূপ সংকীর্ণতা প্রবেশ করিতে পারে না। দলের নেতার প্রতি দলের সমর্থকগণের অকৃত্রিম শ্রদ্ধা ও বিশ্বাস থাকা একান্ত আবশ্যিক; কিন্তু দলের নেতা যদি বিপথগামী হন ও জাতীয় স্বার্থ অপেক্ষা দলীয় স্বার্থকে উচ্চতর স্থান দেন, তাহা হইলে এরূপ নেতাকে প্রতিরোধ করা প্রত্যেক লোকেরই নৈতিক কর্তব্য। দলব্যবস্থায় সাফল্য অনেক পরিমাণে নেতৃত্ব-নির্বাচনের উপর নির্ভর করে। দলপতি নির্বাচন করিলে জনগণের কর্তব্য শেষ হয় না। দলপতির কার্যক্রম ও কার্যপদ্ধতির উপরে জনগণের সদাজাগ্রত দৃষ্টি রাখা একান্ত আবশ্যিক। নতুবা দলপতি স্বৈরাচারী হইয়া পড়িতে পারেন। সাধারণতঃ দেখা যায় যে, জনসাধারণের বিচারবুদ্ধি কম। তাহার তাহাদের নেতার দ্বারা পরিচালিত হয়। নেতা বাহাতে স্বীয় স্বার্থসাধনের নিমিত্ত জনগণকে বিপথে পরিচালিত করিতে না পারেন সেজ্ঞাত শিক্ষিত, সচেতন ও সক্রিয় জনমত চাই। জনমত যদি হিতাহিতবোধসম্পন্ন হয়, তাহা হইলে দলব্যবস্থার সমস্ত দুর্বলতা দূর হইয়া গণতন্ত্রকে প্রগতির পথে অগ্রসর হইতে সহায়তা করিতে পারে।

চাপ সৃষ্টিকারী ও স্বার্থপ্রণোদিত সংস্থা (Pressure and Interest Groups)

রাজনৈতিক দলগুলি বিভিন্ন স্বার্থের প্রতিনিধি লইয়া গঠিত হইলেও জাতীয় স্বার্থ উন্নয়নের জগু ইহারা একটি সাধারণ নীতির দ্বারা পরিচালিত হয়। কিন্তু আধুনিক কালে রাজনৈতিক দল কর্তৃক সাধারণ স্বার্থে সাধারণ নীতি পরিচালনায় কিছু বাধা সৃষ্টি হইয়াছে। এই বাধার ফলে দলগুলি কর্তৃক জন-প্রতিনিধিত্ব কিছু পরিমাণে ব্যাহত হইয়াছে।

বর্তমানে সমাজব্যবস্থায় বিশেষ করিয়া অর্থনৈতিক ক্ষেত্রে বিশেষ স্বার্থ সংরক্ষণ উদ্দেশ্যে কতকগুলি বিশেষ সংঘ গঠিত হইয়াছে। এই সংঘগুলি ইহাদের বিশেষ স্বার্থ সংরক্ষণ ও উন্নয়ন করিবার উদ্দেশ্যে নানাপ্রকারে

ক্ষমতাসীন দলের উপর চাপ দিয়া ইহাদের স্বার্থের অহুঙ্কল আইন প্রণয়ন করিবার জন্ত সচেষ্ট হয়। এই বিশেষ স্বার্থপ্রণোদিত দলগুলি জনসাধারণ বা ভোটদাতাগণের উপর প্রত্যক্ষভাবে কোন প্রভাব বিস্তার করিবার চেষ্টা করে না বা নির্বাচনকালে কোন প্রার্থী মনোনয়ন করে না। ইহাদের একমাত্র উদ্দেশ্য হইল সরকারী দলের উপর চাপ দিয়া ইহাদের বিশেষ স্বার্থ সুরক্ষিত করা। শ্রমিক সংঘ, ব্যবসায়ী সংঘ প্রভৃতি হইল এইরূপ বিশেষ স্বার্থপ্রণোদিত চাপ সৃষ্টিকারী সংঘ। এই বিশেষ স্বার্থপ্রণোদিত সংঘগুলির চাপে অনেক সময় সরকারী দল ইহার সাধারণ নীতি ও নির্ধারিত কার্যক্রম অন্ততঃ আংশিকভাবে বাতিল করিয়া এই বিশেষ সংঘগুলির স্বার্থের অহুঙ্কলে কাজ করিতে বাধ্য হয়। ফলে সরকারী দল ভোটদাতাগণের অপরিচিত হইয়া পড়েন।

গণতন্ত্রের মূল ভিত্তি হইল সাধারণ স্বার্থের উন্নয়ন এবং শাসিতের নিকট শাসকের দায়িত্ব। কিন্তু এই চাপ সৃষ্টিকারী সংস্থাগুলির অভ্যুত্থানে উপরি-উক্ত গণতান্ত্রিক দুইটি নীতিই ব্যাহত হইয়াছে। চাপ সৃষ্টিকারী দলগুলি সরকারের উপর প্রভাব বিস্তার করিয়া ক্ষমতা পরিচালনা করে, কিন্তু ভোটদাতাগণের নিকট ইহাদের কোন দায়িত্ব নাই। অপর পক্ষে এই সংস্থাগুলি ইহাদের বিশেষ স্বার্থ সংরক্ষণের উদ্দেশ্যে চাপ সৃষ্টি করে, কিন্তু গণতন্ত্রের মূল নীতি হইল সাধারণ স্বার্থ সংরক্ষণ। সুতরাং এই বিশেষ স্বার্থপ্রণোদিত সংস্থাগুলি বর্তমানে গণতন্ত্রের এক বিশেষ বাধাস্বরূপ বলিয়া পরিগণিত হয়।

দুই-দল বনাম বহু-দল (Two-Party System vs. Multiple-Party System)

গণতান্ত্রিক শাসনব্যবস্থায় রাজনৈতিক দলের প্রয়োজনীয়তা অনস্বীকার্য বলিয়া পরিগণিত হয়। অনেকে মনে করেন যে, শাসনব্যবস্থা সুষ্ঠুভাবে পরিচালনা করিবার জন্ত বহু দল অপেক্ষা দুইটি দল দেশের স্বার্থের পক্ষে অধিকতর অহুঙ্কল। ইংলণ্ডে বহুদিন হইতে দুইটি প্রধান দলের দ্বারা শাসনকার্য পরিচালিত হইয়া আসিতেছে। যাকিন যুক্তরাষ্ট্রেও দুইটি প্রধান দল দেখিতে পাওয়া যায়। উভয় ব্যবহার সপক্ষে ও বিপক্ষে নিম্নলিখিত যুক্তিগুলির অবতারণা করা হইয়া থাকে।

দুই-দলের সপক্ষে ও বিপক্ষে যুক্তি (Arguments for and against Two-Party System)

দেশে দুইটি রাজনৈতিক দল থাকিলে যে-দলটি সংখ্যাগরিষ্ঠতা লাভ করে, সেই দল ক্ষমতার অধিকারী হইয়া শাসনকার্য পরিচালনা করিতে পারে। ইহাতে রাষ্ট্রীয় সরকার স্থায়িত্বলাভ করিয়া নির্দিষ্ট নীতি অনুসারে ইহাদের কার্যক্রম রূপায়িত করিতে সক্ষম হয়। সংখ্যাগরিষ্ঠ দল স্থায়িত্বলাভ করিলেও ইহারা জনমত-বিরোধী কার্য করিতে সাহস পায় না। কারণ, বিরোধী দলের সদাজাগ্রত দৃষ্টি ইহাদের কার্যকলাপের উপর নিবন্ধ থাকে। শাসনকার্যে কোনপ্রকার ত্রুটি-বিচ্যুতি ঘটিলে বিরোধী দল সমালোচনা দ্বারা জনমতকে ইহাদের বিরুদ্ধে উত্তেজিত করিয়া দিতে পারে। ফলে পরবর্তী নির্বাচনকালে সংখ্যাগরিষ্ঠ দলের নির্বাচন-দ্বন্দ্বে পরাজিত হইয়া ক্ষমতাচ্যুত হইবার সম্ভাবনা থাকে। দ্বিতীয়তঃ, দুইটি দলের মধ্যে প্রতিযোগিতা হওয়ার ফলে শাসনকার্যও উৎকর্ষ লাভ করে। তৃতীয়তঃ, দুইটি দল বর্তমান থাকিলে ভোটদাতাগণের পক্ষে প্রার্থী নির্বাচন করাও অধিকতর সহজ ও সরল হয়। ভোটদাতাগণের মাত্র দুইটি নীতির সমর্থক দুইজন প্রার্থীর মধ্যে একজনকে নির্বাচন করিতে হয়। সুতরাং তাহারা সহজেই প্রার্থী স্থির করিতে পারে।

দেশে দুইটি দল মাত্র থাকিবার বিরুদ্ধে বলা হয় যে, ইহাতে জনমতের বিভিন্ন দিক সূষ্টভাবে প্রকাশিত হইতে পারে না। দেশে যদি উদারনৈতিক ও রক্ষণশীল দুইটি মাত্র দল থাকে, তাহা হইলে মধ্যপন্থী কোন লোকের পক্ষে উল্লিখিত দুইটি দলের কোন দলেই বিবেকবুদ্ধিসম্মতভাবে যোগদান করা সম্ভব নয়। দ্বিতীয়তঃ, দেশের সমস্তাঙ্গুলিও বিভিন্ন দৃষ্টিকোণ হইতে আলোচিত হইবার সম্ভাবনা থাকে না। তৃতীয়তঃ, দুইটি মাত্র দল থাকিলে দেশের শাসকগোষ্ঠীও স্বৈরাচারী হইয়া উঠিতে পারে। সংখ্যাগরিষ্ঠের সমর্থনলাভ করিয়া মন্ত্রিসংসদ স্থায়িত্বলাভ করে। ক্ষমতাচ্যুত হইবার আশংকা কম থাকিলে মন্ত্রিসংসদ তাহাদের খুশীমত শাসনকার্য পরিচালনা করিয়া সর্ববিষয়ে একাধিপত্য-স্থাপনে প্রয়াস পায়। ফলে, মন্ত্রিসংসদ সর্বেসর্বা হইয়া উঠে ও আইনসভায় প্রাধান্ত পর্ব হয়। গ্রেট ব্রিটেনের শাসনব্যবস্থায় এই প্রকারে মন্ত্রিসংসদ আইন-প্রণয়নে, রাজস্ব-সংক্রান্ত ব্যাপারে, শাসন-

পরিচালনায় সর্ববিষয়েই একাধিপত্য বিস্তার করিয়া আইনসভার সার্বভৌমত্বের হানি করিয়াছে। চতুর্থতঃ, দুই-দল ব্যবস্থার প্রধান ত্রুটি হইল যে, ইহাতে কোন ব্যক্তির স্বাধীনভাবে মতপ্রকাশের ক্ষমতা থাকে না। ভোক্তাদাতা নিজে বিচারবুদ্ধি বিসর্জন দিয়া দলের অহুশাসন অহুসারে ভোট দিতে বাধ্য হয়। পঞ্চমতঃ, দুইটি মাত্র রাজনৈতিক দলের মধ্যে প্রতিযোগিতা দ্বারা যে নির্বাচন অহুষ্ঠিত হয়, সেই নির্বাচনের ফলে প্রকৃত জনমতকে কতদূর প্রতিকলিত করিতে পারে সে সম্বন্ধে সন্দেহের যথেষ্ট অবকাশ থাকিতে পারে।

বহু-দলের সপক্ষে ও বিপক্ষে যুক্তি (Arguments for and against Multiple-Party System)

দুই-দল ব্যবস্থার উল্লিখিত গলদ থাকার জ্ঞাত অনেকে বহু-দলের অস্তিত্ব সমর্থন করেন। বহু দল থাকিলে জনমত এই বিভিন্ন দলের মাধ্যমে প্রকাশিত হইতে পারে ও আইনসভাও অধিকতর প্রাতিনিধিমূলক হইতে পারে। দ্বিতীয়তঃ, জনগণ তাহাদের স্বাধীন অভিমত ব্যক্ত করিবার অধিকতর সুযোগ লাভ করে। এই ব্যবস্থা দ্বারা সংখ্যাগরিষ্ঠ দলের একাধিপত্য-বিস্তার প্রতিরোধ করা যায়। তৃতীয়তঃ, বিভিন্ন দল আলাপ-আলোচনার দ্বারা সহযোগিতার ভিত্তিতে শাসনকার্য পরিচালনা করিতে পারে। ফলে, আইন-প্রণয়ন-কার্য ও শাসনকার্য বহু-দলের সমর্থনলাভ করিয়া ব্যাপক ভিত্তির উপর প্রতিষ্ঠিত হয়। চতুর্থতঃ, বহু-দল ব্যবস্থায় সংখ্যালঘু দলও শাসনকার্য-পরিচালনায় অংশ গ্রহণ করিবার সুযোগ পায়। মন্ত্রিসংসদ একমাত্র সংখ্যাগরিষ্ঠ দলের সমর্থনের উপর প্রতিষ্ঠিত না হইয়া বহু-দলের সম্মিলিত সমর্থনপুষ্ট বলিয়া স্বৈরাচারী হইতে পারে না। পঞ্চমতঃ, এক-দল দ্বারা গঠিত মন্ত্রিসংসদ অপেক্ষা বহু-দল-সমর্থিত মন্ত্রিসংসদ দেশের জনমতকে অধিকতর প্রতিকলিত করিতে পারে এবং জাতীয় স্বার্থকে অধিকতর সংরক্ষিত করিতে সক্ষম হয়।

কিন্তু বহু দলের বিপক্ষে প্রধান যুক্তি হইল যে, এই ব্যবস্থায় শূন্যশালী ও স্থায়ী মন্ত্রিসংসদ গঠন করা সম্ভব নয়। দুই বা ততোধিক দলের সমর্থনে যে মন্ত্রিসংসদ গঠিত হয়, দলগুলির মধ্যে সামান্য মতানৈক্য হইলেই ঐ মন্ত্রিসংসদ ভাঙিয়া পড়ে। আইনসভায় কোন দলেরই সংখ্যাগরিষ্ঠতা না থাকার ফলে

মন্ত্রিসংসদকে দলগুলির সম্মিলিত সমর্থনের উপর নির্ভর করিতে হয়। মন্ত্রি-গণের মধ্যে মতবৈধ ঘটিলে এক বা একাধিক দলের সমর্থন হইতে বঞ্চিত হইয়া মন্ত্রিসংসদের পতন অনিবার্য হইয়া পড়ে। দ্বিতীয়তঃ, এই ব্যবস্থায় মন্ত্রিসংসদ যে শুধু অস্থায়ী হয় তাহা নয়, উহার দুর্বলতাও প্রকাশ পায়। মন্ত্রিসংসদের কোন সদস্যই অগ্নিনিরপেক্ষ হইয়া একক ও স্বাধীনভাবে তাঁহার নিজের বিভাগের কার্য পরিচালনা করিতে পারেন না। সর্বদাই আলোপ-আলোচনা দ্বারা অন্ত্র দলের সদস্যদের সম্মতির উপর তাঁহাকে নির্ভর করিতে হয়। ফলে, কোন নীতি কার্যকরী করিতে গেলে বহু সময় অতিবাহিত হয়। তৃতীয়তঃ, কোন বিষয়ে দ্রুত সিদ্ধান্ত গ্রহণ করা সম্ভব নয়। ইহাতে দেশের শাসন ও হিতকর কোন কার্যপদ্ধতি অহুসরণ করা সম্ভব হয় না। চতুর্থতঃ, অল্প সময়ের ব্যবধানে মন্ত্রিসংসদ পুনর্গঠিত হয় বলিয়া মন্ত্রিসংসদের সদস্য-নির্বাচনে অনেক সময় দুর্নীতি প্রচুর পায়। ফরাসী দেশে এই ব্যবস্থার ফলে সে দেশের মন্ত্রিসভা বহুল পরিমাণে দুর্বল হইয়া পড়িয়াছে। কি আভ্যন্তরীণ শাসনব্যাপারে, কি বৈদেশিক ব্যাপারে কোন দীর্ঘমেয়াদী নীতি বা কার্যক্রম সেখানে স্থায়ীভাবে স্থাপিত করিতে পারে না। পঞ্চমতঃ, বহু-দল থাকার জন্য জনসাধারণের পক্ষে প্রার্থী নির্বাচন করাও একটা সমস্যারূপে দেখা দেয়। বিভিন্ন দল তাহাদের বিভিন্ন দৃষ্টিভঙ্গী উপস্থাপিত করিয়া ভোটদাতার কাছে একটা সমস্যার সৃষ্টি করে।

এই সমস্ত কারণে দুই-দল ব্যবস্থার ত্রুটি থাকা সত্ত্বেও অধিকাংশ লেখক বহু-দল অপেক্ষা দুই-দল ব্যবস্থাকে শাসনকার্যের অধিকতর অহুকুল বলিয়া মত প্রকাশ করিয়াছেন। দুই-দল ব্যবস্থার জন্যই গ্রেট ব্রিটেনের শাসনব্যবস্থা স্থায়ী ও দক্ষতা অর্জন করিতে সক্ষম হইয়াছে।

এক-দলীয় শাসন ও গণতন্ত্র (One-Party Government and Democracy)

বিগত প্রথম বিশ্বসমরের পরবর্তী কালে ইউরোপের কয়েকটি দেশে এক-দলীয় সরকারের সূত্রপাত হয়। রুশ দেশে প্রথম সাম্যবাদী দল কর্তৃক পরিচালিত এক-দলীয় সরকার প্রতিষ্ঠিত হয়। সাম্যবাদী দল বলপ্রয়োগ দ্বারা অন্ত্র দলগুলিকে উৎসাদিত করিয়া দলীয় একনায়কত্ব প্রতিষ্ঠা করে।

রুশ দেশের বর্তমান শাসনতন্ত্রেও সাম্যবাদী ব্যতীত অন্য কোন রাজনৈতিক দলের অস্তিত্ব স্বীকার করা হয় না। রুশ দেশের পর জার্মানি ও ইতালীতে যথাক্রমে নাৎসী ও ফ্যাসিবাদী দলের অভ্যুত্থানের সঙ্গে সঙ্গে এক-দলীয় সরকার প্রতিষ্ঠিত হয়। নাৎসী দল ও ফ্যাসিবাদী দল সাম্যবাদীদের পদাঙ্ক অমূল্য করিয়া দেশের অন্ত্যান্ত রাজনৈতিক দলগুলিকে বলপ্রয়োগ দ্বারা সমূলে উৎপাটিত করে। ইংলণ্ডে যুদ্ধের সময় যে জাতীয় সরকার গঠিত হয়, তাহাকে কার্যতঃ এক-দলীয় সরকার বলা যাইতে পারে। জাতীয় বিপদের সময় ইংলণ্ডের বিভিন্ন দল তাহাদের দলগত বিভেদ বিসর্জন দিয়া জাতীয় স্বার্থসংরক্ষণে যত্নবান হয়। সুতরাং রাশিয়া, জার্মানি প্রভৃতি দেশের 'এক-দলীয় সরকার' ও ইংলণ্ডের 'জাতীয় সরকারকে এক পর্যায়ভুক্ত করা সমীচীন নয়।

'এক-দলীয় সরকার' ব্যবস্থার সমর্থকগণ বলেন যে, কৃত্রিম বিভেদ সৃষ্টি করিয়া জাতিকে বিভিন্ন দলে বিভক্ত করিলে জাতীয় শক্তি ও সংহতির অপচয় ঘটে। জনসাধারণের বিচারবুদ্ধি সাধারণতঃ কম। জনসাধারণকে প্রচারকার্যের দ্বারা বিভ্রান্ত করিয়া বিভিন্ন দলের সমর্থন লাভ করা হয়। ইহাতে জাতীয় শক্তি দুর্বল হইয়া পড়ে। কাজেই শুধুমাত্র যুদ্ধ প্রভৃতি আপৎকালে জাতীয় সরকার গঠন না করিয়া সর্বকালের জন্ত এক-দলীয় সরকার গঠন করিলে জাতীয় শক্তির কোনরূপ অপচয় ঘটে না। জাতির সমগ্র সদস্যই যদি একই আদর্শে অনুপ্রাণিত হইয়া সজ্জবদ্ধ হয়, তাহা হইলে জাতীয় শক্তি বহুগুণে বৃদ্ধি পায়। এক-দলীয়, দ্বি-দলীয় বা বহু-দলীয় সকল শাসনব্যবস্থাই জনসাধারণ দলের নেতৃগণ কর্তৃক পরিচালিত হইয়া থাকে। দলের নির্দেশ জনগণ অন্ধভাবেই পালন করিয়া থাকে। কোনরূপ দলীয় ব্যবস্থায় ব্যক্তি-স্বাধীনতা অক্ষুণ্ণ থাকিতে পারে না। সুতরাং কৃত্রিম উপায়ে বিভেদ সৃষ্টি করিয়া নানারূপ দল গঠন করিবার পরিবর্তে একটি মাত্র রাজনৈতিক দল থাকিলে জাতীয় ঐক্য অধিকতররূপে সুপ্রতিষ্ঠিত হইতে পারে।

এক-দলীয় সরকারের সপক্ষে যতই যুক্তির অবতারণা করা হউক না কেন, এক-দলীয় সরকার যতদিন পর্যন্ত জনগণের স্বেচ্ছাপ্রণোদিত না হইবে ততদিন এই সরকার স্থায়ীস্থলাভ করিতে পারে না। জার্মানি ও ইতালিতে এক-দলীয় সরকারের অবসান ঘটিয়াছে। কিন্তু রুশ দেশে এক-দলীয় সরকার

আজও সুপ্রতিষ্ঠিত ও ক্রমশঃই শক্তিশালী হইয়া উঠিতেছে। তাহার কারণ রুশ দেশের এক-দলীয় সরকার বলপ্রয়োগ-নীতির উপর প্রতিষ্ঠিত হইলেও নানাবিষয়ে দেশের যথেষ্ট উন্নতিসাধন করিয়া জনসংখ্যার বিশাল এক অংশের আত্মভাজন হইতে সমর্থ হইয়াছে। রুশ দেশের এক-দলীয় সরকারের ভবিষ্যৎ ইহার জনস্বার্থসংশ্লিষ্ট গঠনমূলক কার্যের উপর নির্ভর করে।

এক-দলীয় শাসন ও গণতান্ত্রিক শাসন পরস্পর-বিরোধী। গণতান্ত্রিক শাসন জনগণের স্বেচ্ছাপ্রণোদিত ইচ্ছা ও সহযোগিতার উপর নির্ভর করে। জনগণ বিভিন্ন দলের মাধ্যমে তাহাদের অভিমত প্রকাশ সাহায্যে শাসক শ্রেণী নির্বাচন করে। গণতন্ত্রে আলাপ-আলোচনা ও মতবিরোধ নিষ্পত্তির পথ উন্মুক্ত থাকে। ভোটদাতাগণ নিজেদের পছন্দমত প্রতিনিধি নির্বাচন করিয়া তাহাদের ব্যক্তিগত ইচ্ছা বলবৎ করিতে পারে। কিন্তু এক-দলীয় শাসনব্যবস্থায় ভোটদাতার ব্যক্তিগত মতামত প্রকাশ করিবার ক্ষেত্র নাই বলিলেও চলে। যে ব্যবস্থায় ক্ষমতা একটি মাত্র দলের হস্তে কেন্দ্রীভূত, সেখানে ব্যক্তির স্বাধীনতা থাকিতে পারে না। একটি মাত্র দলের হস্তে সমস্ত ক্ষমতা কেন্দ্রীভূত হওয়ার ফলে আলাপ-আলোচনা দ্বারা বিরোধ নিষ্পত্তির কোন ক্ষেত্র নাই। এই ব্যবস্থায় ব্যক্তির পক্ষে ক্ষমতার একচেটিয়া অধিকারী দলের স্তাবক হইতে হয় অথবা তাহার নিজস্ব মতামত বিসর্জন দিয়া আধ্যাত্মিক মৃত্যুবরণ করিতে হয়।

[নবম অধ্যায়—একনায়কত্ব দ্রষ্টব্য]

দলব্যবস্থার ত্রুটি দূর করিবার উপায় (Means of Removing the Defects)

পূর্বেই বলা হইয়াছে যে, রাজনৈতিক দলগুলি বিভিন্ন মতাবলম্বী নাগরিক-সমষ্টি লইয়া গঠিত হয়। দল-প্রথার যে অসুবিধাগুলি উল্লেখ করা হইয়াছে, তাহা বহুলাংশে নাগরিক জীবনের অসম্পূর্ণতার জন্তই দেখা দেয়। দলপ্রথার কুফলগুলি দুই প্রকারে দূরীভূত করা সম্ভব। প্রথমতঃ, শাসনব্যবস্থাকে এরূপ-ভাবে গঠন করিতে হইবে যাহাতে কোন ব্যক্তিবিশেষ বা দলবিশেষ শাসন-ব্যাপারে সর্বময় কর্তৃত্ব লাভ করিতে না পারে। এই নিমিত্ত শাসনব্যাপারে জনসাধারণের অভিমতকে গুরুত্ব প্রদান করিবার ব্যবস্থা থাকা অত্যাवশ্যক।

দেশের শাসনতন্ত্রে যদি গণভোট, গণপ্রস্তাব ও প্রত্যাভর্তনের নির্দেশ দিবার অধিকার থাকে, তাহা হইলে দলীয় একনায়কত্বের পরিবর্তে সার্বজনীন সার্বভৌমত্ব প্রতিষ্ঠিত থাকিবে। জনগণ যতই অধিকতর সক্রিয়ভাবে শাসন-ব্যাপারে অংশ গ্রহণ করিবার সুযোগ পাইবে, শাসনব্যবস্থা হইতে সেই পরিমাণে দলীয় একনায়কত্বের ক্রটিগুলি দূরীভূত হইবে। দ্বিতীয়তঃ, সরকারী সাহায্য, সম্মান ও সরকারী চাকরী বিতরণ করিয়া সংখ্যাগরিষ্ঠ দল তাহাদের সমর্থকগণকে বশীভূত রাখে। ইহাতে অনেক সময় নানাবিধ দুর্নীতি প্রশ্রয় পায়। এই ক্রটি দূরীকরণের জন্য শাসনতন্ত্রে একরূপ ব্যবস্থা থাকা উচিত যে, একমাত্র যোগ্যতা ব্যতীত অন্য কোন কারণে কোন ব্যক্তি সরকারী চাকুরীতে নিযুক্ত হইতে পারিবে না। একটি স্বাধীন ও সম্পূর্ণ নিরপেক্ষ সংসদের দ্বারা সরকারী চাকুরীতে নিয়োগের ব্যবস্থা থাকিবে। তৃতীয়তঃ, শাসকবর্গ যাহাতে নিজেদের খুশিমত শাসনব্যবস্থার পরিবর্তন করিতে সমর্থ না হয় সেজন্য দেশের সংবিধান যথাসম্ভব অ-নমনীয় রাখিতে হইবে। শাসনতান্ত্রিক আইনগুলি যদি সাধারণ আইনগুলির মত সহজে পরিবর্তনশীল হয়, তাহা হইলে শাসকগোষ্ঠী তাহাদের সুবিধা অহুসারে শাসনতান্ত্রিক পরিবর্তন সাধন করিয়া দলীয় একনায়কত্ব স্থায়ী করিতে পারে। জনগণের মৌলিক অধিকার-গুলিও লিখিত ও অ-নমনীয় শাসনতন্ত্রদ্বারা সুরক্ষিত করা একান্ত আবশ্যক। চতুর্থতঃ, শাসনতন্ত্রে উল্লিখিত মৌলিক অধিকার রক্ষা এবং সরকারের কার্যকলাপ নিয়ন্ত্রিত করিবার জন্য একটি স্বাধীন ও নিরপেক্ষ উচ্চ-বিচারালয় বর্তমানে শাসনব্যবস্থার একটি অপরিহার্য অংশ বলিয়া পরিগণিত হয়। বিচারপতিগণ যাহাতে দল-নিরপেক্ষ হইয়া বিচারকার্যের পবিত্রতা ও জায়পরায়ণতা রক্ষা করিতে পারেন সেজন্য তাহাদের নিয়োগ, বেতন ও পদচ্যুতির বিধিগুলি সুনির্দিষ্ট থাকা প্রয়োজন। পঞ্চমতঃ, সরকারের স্থায়ী কর্মচারিবৃন্দ যাহাতে দলনিরপেক্ষভাবে তাহাদের দৈনন্দিন কার্য সম্পাদন করিতে পারে সেজন্য শাসনতন্ত্রে তাহাদের নিয়োগ, বেতন ও পদচ্যুতির বিধিগুলি সুনির্দিষ্ট করিয়া দেওয়া উচিত। কোনরূপ প্রলোভন বা ভয়ের দ্বারা তাহারা যাহাতে কর্তব্যচ্যুত না হয় সেজন্য শাসনতান্ত্রিক ব্যবস্থা থাকা প্রয়োজন। ষষ্ঠতঃ, সংখ্যালঘু দলগুলির অধিকার যাহাতে অক্ষুণ্ণ থাকে, সেজন্যও শাসনতান্ত্রিক ব্যবস্থা থাকা প্রয়োজন।

পরিশেষে বলা যায় যে, নাগরিকগণ যদি সংশ্লিষ্ট পাইয়া প্রকৃত রাজনৈতিক চেতনাসম্পন্ন হয়, তাহা হইলে তাহার সাম্প্রদায়িক বা দলগত স্বার্থের উর্ধ্বে উঠিয়া সব সময়ে জাতীয় স্বার্থসংরক্ষণে যত্নবান হয়। শিক্ষার আলোকপ্রাপ্ত ব্যক্তি কখনই দলীয় প্রচারকার্যের দ্বারা বিভ্রান্ত হইয়া সমষ্টিগত স্বার্থের হানি করিতে পারে না। দলগঠনের মুখ্য উদ্দেশ্য হইল জাতীয় স্বার্থের উৎকর্ষসাধন—এই কথাটি স্মরণে যদি দলের সমর্থকগণ অবহিত থাকেন, তাহা হইলে রাজনৈতিক দলগুলি রাষ্ট্রীয় জীবনকে নানা দিক দিয়া সমৃদ্ধ করিতে পারে। প্রকৃত শিক্ষাবিস্তার দ্বারা জাতীয় জীবনের এই ক্রটিগুলি দূর করা সম্ভবপর বলিয়া বিবেচিত হয়।

দলবিহীন শাসন (Non-Party Government)

দল-প্রথার কুফল দেখিয়া অনেক লেখক দলপ্রথার বিলোপসাধন করিয়া দলশূন্য স্বাধীন শাসনব্যবস্থা প্রবর্তন করিবার অভিমত প্রকাশ করিয়াছেন। এখন প্রশ্ন হইতেছে যে, দলীয় শাসনের কোন বিকল্প ব্যবস্থা সম্ভব কি? মানুষ হিতাহিতবোধসম্পন্ন চিন্তাশীল প্রাণী। যতদিন মানুষের স্বাধীনভাবে চিন্তা করিবার শক্তি থাকিবে, ততদিন মানুষে মানুষে মতভেদ থাকিবে ও এই বিভিন্ন মতবাদের ভিত্তিতে বিভিন্ন দল গঠিত হইবে। সুতরাং মানব-জীবনের বিভিন্ন ক্ষেত্রে দলের অস্তিত্বকে স্বাভাবিক ও অবশ্যসম্ভাবী বলা যাইতে পারে। রাজনৈতিক জীবনেও রাজনৈতিক দলের অভ্যুত্থান মানুষের এই স্বাধীন চিন্তাশক্তির এক অভিব্যক্তি মাত্র। বলপূর্বক এই স্বাধীন চিন্তাশক্তিকে বিনাশ করা সম্ভব নয়। রাজনৈতিক দলের অভ্যুত্থান যদি অবশ্যসম্ভাবী বলিয়া ধরা যায়, তাহা হইলে দলীয় শাসনের বিকল্প হিসাবে অনেকে বিভিন্ন দলের সহযোগিতায় (Coalition) শাসনব্যবস্থা সংগঠনের সুপারিশ করিয়াছেন। কিন্তু বহু-দলের সহযোগিতায় যে শাসনব্যবস্থা প্রবর্তিত হয় তাহা কখনও স্থায়ী হইতে পারে না। ফরাসী দেশের শাসনব্যবস্থা এই কারণে দুর্বল হইয়া পড়িয়াছে। দ্বিতীয়তঃ, দলীয় শাসনের বিকল্প হিসাবে এক-দলীয় শাসনের (One-Party Government) সপক্ষে অনেকে যুক্তি প্রদর্শন করিয়া থাকেন। কিন্তু এক-দলীয় শাসন অনেক বিষয়ে শ্রেয়ঃ হইলেও এই ব্যবস্থা যে ব্যক্তি-স্বাধীনতার অন্তরায় হইবে

অনস্বীকার্য। তৃতীয়তঃ, দলীয় শাসনের অবসান ঘটাইয়া প্রাচীন কালের ব্যক্তিগত শাসন (Monarchy) প্রবর্তন করিতে পারা যায়। কিন্তু বর্তমান গণতান্ত্রিক যুগে ব্যক্তিগত শাসনব্যবস্থা সম্পূর্ণ অচল। সুতরাং শেষ বিশ্লেষণে দেখা যায় যে, দলীয় শাসনের বিকল্প কোন ব্যবস্থা বর্তমান গণতন্ত্রে সম্ভব নয়। বিভিন্ন দলগুলির মধ্যে যথাসম্ভব মতের ঐক্য প্রতিষ্ঠিত করিয়া শাসনকার্য পরিচালনা করা কর্তব্য। দেশে যদি শিক্ষিত ও সচেতন জনমত গঠিত হয়, তাহা হইলে দলীয় শাসনের কুফল রাজনৈতিক জীবনকে বিধাক্ত করিতে পারে না।

জনমত (Public Opinion)

গণতন্ত্র ও জনমত (Democracy and Public Opinion)

গণতন্ত্র সফল করিবার একমাত্র উপায় হইল শিক্ষিত ও সচেতন জনমত সৃষ্টি করা। বর্তমান গণতান্ত্রিক শাসনব্যবস্থায় প্রত্যেক নাগরিকের পক্ষে প্রত্যক্ষ ও সক্রিয়ভাবে শাসনকার্য-পরিচালনায় অংশ গ্রহণ করা সম্ভব নয়। অথচ জনগণ যদি তাহাদের অধিকার সম্বন্ধে আত্মসচেতন এবং অধিকারগুলি রক্ষা করিবার জন্ত বদ্ধপরিকর না হয়, তাহা হইলে গণতন্ত্রের অবসান হইয়া স্বৈরতন্ত্র বা একনায়কত্বের অভ্যুদয় অবশ্যজ্ঞাবী। এইজন্য জনগণকে সর্বদা সজাগ থাকিয়া শাসকশ্রেণীর কার্যকলাপের উপর সতর্ক দৃষ্টি রাখিতে হয়। শাসকশ্রেণী যদি বুঝিতে পারে যে, জনসাধারণ তাহাদের অন্ত্যায় কার্যকলাপ কখনই বরদাস্ত করিবে না, তাহা হইলে তাহারা স্বেচ্ছাচারী হইয়া জনসাধারণকে তাহাদের ত্রাণ্য অধিকার হইতে বঞ্চিত করিতে পারে না। সুতরাং দেশের জনসাধারণ যদি ঐক্যবদ্ধ হইয়া সরকারী কার্যের উপর তীক্ষ্ণ দৃষ্টি রাখে—সরকারী কার্যে ত্রুটি-বিচ্যুতি ঘটিলে তাহারা যদি সম্ব্যবস্থা-ভাবে তাহা প্রতিরোধ করে, তাহা হইলে সরকার কখনও বে-আইনী কার্য করিতে সাহসী হয় না। যেখানে জনগণ সম্ব্যবদ্ধ হইয়া নানাপ্রকারে শাসকবর্গের উপর প্রভাব বিস্তার করিতে পারে, সেখানে জনগণের অধিকার কখনও ক্ষুণ্ণ হইতে পারে না। প্রকৃত গণতান্ত্রিক শাসনব্যবস্থার একমাত্র পরিমাপক হইল শাসনব্যবস্থার উপর জনমতের প্রভাব। শাসনব্যবস্থা যদি

জনমত অনুসারে পরিচালিত হয়, তাহা হইলে সেই শাসনব্যবস্থাকে প্রকৃত গণতান্ত্রিক শাসনব্যবস্থা বলা যায়। সুতরাং প্রকৃত গণতন্ত্রের অস্তিত্ব ও কার্যকারিতা সচেতন ও সক্রিয় জনমতের উপর নির্ভর করে।

জনমতের প্রকৃতি (Nature of Public Opinion)

জনমতের অর্থ এই নয় যে, দেশের সকল ব্যক্তিই একমত হইবে। প্রত্যেকটি বিষয়ে বিভিন্ন ব্যক্তির ও বিভিন্ন দলের বিভিন্ন মতামত থাকিতে পারে। জনমত বলিতে ইহাদের কোন একটি বিশেষ মত বুঝায় না। দেশের সংখ্যাগরিষ্ঠ দলের মতই যে সকল সময় নির্ভুল হইবে তাহারও কোন নিশ্চয়তা নাই। সুতরাং জনমত বলিতে সর্ববাদিসম্মত মত বা সংখ্যাগরিষ্ঠের মত বুঝায় না। এ অবস্থায় কোন মতকে জনমত বলা যায় তাহা স্থির করা এক সমস্যা। বর্তমান গণতান্ত্রিক ব্যবস্থায় সংখ্যাগরিষ্ঠ দল যে মত পোষণ করে, সাধারণতঃ তাহাই জনমতরূপে পরিগণিত হয়। সংখ্যাগরিষ্ঠ দল এই জনমত সমর্থন না করিতে পারে, কিন্তু তাই বলিয়া তাহারাই এই মতের প্রতি যেন বিদ্রোহভাবাপন্ন না হয়। সংখ্যালঘু দল যদি বিরুদ্ধমনোভাবাপন্ন হইয়া সক্রিয়ভাবে এই মতের বিরোধিতা করে, তাহা হইলে তাহাকে অসংবদ্ধ জনমত বলা চলে না। তবে এ-কথা স্মরণ রাখিতে হইবে যে, সংখ্যাগরিষ্ঠ দল যদি তাহাদের সংখ্যাধিক্যের বলে সংখ্যালঘু দলের স্বার্থের প্রতি সম্পূর্ণ উদাসীন হইয়া স্বীয় স্বার্থসাধনের নিমিত্ত কোন মত পোষণ করে, তাহা হইলে সংখ্যাগরিষ্ঠদের মত বলিয়াই তাহাকে প্রকৃত জনমত বলা সমীচীন নয়।

জনসাধারণের প্রায়ই নিজস্ব কোন মতামত থাকে না। বুদ্ধিমান ও কর্মঠ ব্যক্তিগণ জাতীয় স্বার্থসংশ্লিষ্ট সমস্যাসমূহ ও তাহাদের সমাধানের উপায়গুলি স্থির করেন এবং এইগুলি জনসাধারণের মধ্যে প্রচার করিয়া জনসাধারণের মধ্যে মতের সৃষ্টি করিতে সহায়তা করেন। জনসাধারণ তাহাদের বিচারবুদ্ধি প্রয়োগ করিয়া এই সকল চিন্তানায়কের মতে আস্থাবান হয়। এইরূপে জনসংখ্যার বিশাল এক অংশ যখন কোন নির্দিষ্ট মতের সমর্থক হয়, তখন তাহাকে জনমত বলা হয়। সুতরাং যে মত জনগণের বিচারবুদ্ধির উপর প্রতিষ্ঠিত ও যাহার উদ্দেশ্য হইল জনগণের বৃহত্তর

কল্যাণ সাধন করা, সেই মতকেই প্রকৃত জনমত বলা হয়। ব্যক্তিবিশেষ বা দলবিশেষের স্বার্থসম্পর্কিত কোন মতকে জনমত আখ্যা দেওয়া চলে না।

জনমত গঠন ও প্রকাশের বিভিন্ন উপায় (Agencies for the Formulation and Expression of Public Opinion)

নানা উপায়ে জনমত গঠিত ও প্রভাবিত হইয়া থাকে। বর্তমান যুগে জনমত গঠনে সংবাদপত্র এক বিশিষ্ট স্থান অধিকার করিয়াছে। শিক্ষাবিস্তারের সঙ্গে সঙ্গে সংবাদপত্র-পাঠার্থীর সংখ্যা ক্রমশঃই বৃদ্ধি পাইতেছে। সংবাদপত্রগুলি যে নানাবিধ সংবাদ পরিবেশন করিয়া কেবল জনগণের জ্ঞানের পরিধি বিস্তারে সহায়তা করে তাহা নয়, সম্পাদকীয় মন্তব্য ও সংবাদ পরিবেশন-পদ্ধতির মধ্য দিয়া তাহারা পাঠকের মত-গঠনেরও সহায়তা করে। এদিক দিয়া দেখিতে গেলে জনমত-গঠনে সংবাদপত্র যে গুরুত্বপূর্ণ ভূমিকা গ্রহণ করে তাহা অস্বীকার করা চলে না। সংবাদপত্র যদি এই গুরু-দায়িত্বের কথা স্মরণ রাখিয়া তাহাদের কর্তব্য সম্পাদন করে, তাহা হইলে দেশে প্রকৃত জনমত গঠিত হইতে পারে। সঠিক সংবাদ পরিবেশন এবং নিরপেক্ষ ও গঠনমূলক সমালোচনা দ্বারা সংবাদপত্রগুলি জনমতকে শিক্ষিত ও চিন্তাশীল করিয়া তুলিতে পারে।

জনমত-গঠনে শিক্ষায়তনগুলির প্রভাবও উপেক্ষণীয় নহে। বাল্যকালে ও কৈশোরে মানুষ যে শিক্ষালাভ করে, পরবর্তী জীবনে সে শিক্ষার প্রভাব অনতিক্রমণীয় হইয়া উঠে। দেশের বাহারা নেতা ও বিভিন্ন মতবাদের স্রষ্টা তাহারা প্রায় সকলেই বাল্যের ও যৌবনের শিক্ষার দ্বারা অল্পপ্রাণিত হইয়া থাকেন। এই কারণে একনায়ক-পরিচালিত দেশগুলিতে বিদ্যালয়ের ছাত্রদের এই সমস্ত দেশের রাজনীতির মূলসূত্রগুলি সম্বন্ধে বিশেষ শিক্ষা দেওয়া হয় বাহাতে পরবর্তী জীবনে তাহারা ঐভাবে উদ্ভূত হইয়া উঠে।

রাজনৈতিক দলসমূহ দেশের বিভিন্ন সমস্যা সম্পর্কে জনসাধারণের নিকট জনসভা, সংবাদপত্র ও পুস্তিকা মারফৎ তাহাদের মতবাদ প্রচার করিয়া জনমত প্রভাবিত করিবার চেষ্টা করে। রাজনৈতিক দলগুলি প্রচার-কার্যের দ্বারা জনগণ দেশের বিভিন্ন সমস্যাগুলির সহিত পরিচিত হয় ও রাজনৈতিক ব্যাপারে আগ্রহান্বিত হইয়া উঠে।

অধুনা বেতার ও চলচ্চিত্রের সাহায্যে প্রচারকার্য পরিচালনা করা হয়। জনশিক্ষার প্রসার করিয়া জনমত-গঠনে বেতার ও চলচ্চিত্রের অবদান আদৌ উপেক্ষণীয় নহে।

দেশের আইনসভার তর্ক-বিতর্ক ও আলোচনা দ্বারাও জনমত সূচন হইয়া রাজনৈতিক ব্যাপারে অধিকতর উৎসাহী হয়।

আইন ও জনমত (Law and Public Opinion)

বর্তমান যুগে নাগরিকগণের দৈনন্দিন জীবনযাত্রা রাষ্ট্র-প্রণীত আইন দ্বারা বহুল পরিমাণে নিয়ন্ত্রিত হয়। আধুনিক রাষ্ট্রগুলি আইন প্রণয়ন করিয়া মাহুঘের সামাজিক, রাজনৈতিক, অর্থনৈতিক, ধর্মসম্বন্ধীয় ও কৃষ্টিগত জীবন-ধারা নিয়ন্ত্রণ করিয়া তাহার ব্যক্তিত্ববিকাশের সহায়তা করিবার অধিকার দাবী করে। বস্তুতঃ, মানবজীবনের এমন কোন অংশ নাই যাহাকে সম্পূর্ণরূপে রাষ্ট্রপ্রভাবমুক্ত বলা যাইতে পারে। সুতরাং এরূপ ক্ষেত্রে রাষ্ট্র-প্রণীত আইন-কাহন ও বিধিনিষেধগুলি যদি সার্বজনীন ও সর্ববাদিসম্মত ভিত্তির উপর প্রতিষ্ঠিত না হয়, তাহা হইলে রাষ্ট্র-প্রবর্তিত আইনগুলি ব্যক্তিত্ববিকাশের সহায়ক না হইয়া তাহার অন্তরায় সৃষ্টি করিতে পারে। এইজন্যই গণতান্ত্রিক শাসনব্যবস্থার প্রয়োজন এবং গণতন্ত্রের মূল কথা হইল যে, শাসনব্যবস্থা জনমতের সমর্থনের উপর প্রতিষ্ঠিত হইবে। জনগণের ভোট দ্বারা নির্বাচিত সদস্য লইয়া গঠিত আইনসভা আইন প্রণয়ন করে এবং আইনসভার প্রধান কর্তব্য হইল জনস্বার্থের প্রতি লক্ষ্য রাখিয়া আইন প্রণয়ন করা। যে আইন জনস্বার্থের প্রতিকূল সে আইন সর্বথা পরিত্যাজ্য। নির্বাচিত প্রতিনিধিগণ যদি জনস্বার্থ-বিরোধী আইন প্রণয়ন করেন, তাহা হইলে তাঁহারা জনগণের আস্থাহীন হইবেন ও পরবর্তী নির্বাচনকালে জনগণের সমর্থনলাভে বঞ্চিত হইবেন। সুতরাং শাসনবিভাগ বা আইন-সভার পক্ষে দীর্ঘকাল পর্যন্ত জনমত বিরোধী কার্য করা সম্ভব নয়। আইনসভা-প্রণীত আইন যদি দেশের জনমতকে প্রতিকূলিত করিতে অসমর্থ হয়, তাহা হইলে সে আইনের বিশেষ কোন মর্যাদা থাকে না এবং অধিকাংশ ক্ষেত্রে তাহাকে জনমতের বিরোধিতার সম্মুখীন হইতে হয়। যে শাসনব্যবস্থা জনমত দ্বারা সমর্থিত নয়, তাহা কখনও স্বদৃঢ় ও স্থায়ী হইতে পারে না।

জনগণের অকুণ্ঠ আত্মগত্য ও বশ্যতার অভাবে তাহার পতন অবশ্যজ্ঞাবী। জনগণ সভাসমিতি, সংবাদপত্র, শোভাযাত্রা, প্রচার-পুস্তিকা প্রভৃতির দ্বারা আইনসভার উপর প্রভাব বিস্তার করিতে পারে। নিয়মতান্ত্রিক উপায়গুলি বার্ষিক হইলে জনসাধারণ তাহাদের চরম অস্থ 'বিদ্রোহ' দ্বারা শাসনব্যবস্থার পরিবর্তন সাধন করিতে পারে। সুতরাং আইন-প্রণয়নে জনমতের জয় অবশ্যজ্ঞাবী।

ভারতের জনমত (Public Opinion in India)

কিছুদিন পূর্ব পর্যন্ত ভারতে প্রকৃত জনমত বলিয়া কার্যতঃ কোন শক্তি ছিল না। জনমত-গঠনের প্রধান অন্তরায় ছিল দারিদ্র্য, অশিক্ষা ও পরাধীনতা। পরাধীনতার অবসান হইবার ফলে ভারতবাসী ক্রমশঃ আত্ম-সচেতন হইয়া তাহার জাতিগত অধিকার সম্বন্ধে অবহিত হইতে শিখিতেছে। শিক্ষাবিস্তার ও সার্বজনীন ভোটাধিকার প্রদানের ফলে তাহাদের জাতীয়তাবোধের সৃষ্টি হইতেছে। সাম্প্রদায়িক ভেদবুদ্ধিও অনেক পরিমাণে দূরীভূত হইয়াছে। রাজনৈতিক দলগুলি যদি তাহাদের সংকীর্ণ স্বার্থ দ্বারা প্ররোচিত না হইয়া জাতীয় স্বার্থ দ্বারা অনুপ্রাণিত হয়, তাহা হইলে অচিরে ভারতে শক্তিশালী ও সক্রিয় জনমত গঠিত হইবে।

বর্তমানে প্রাদেশিকতা ভারতে জনমত-গঠনের একটি প্রধান অন্তরায়রূপে দেখা দিয়াছে। প্রাদেশিকতার মূল কারণ হইল প্রকৃত জাতীয় শিক্ষার অভাব। প্রকৃত শিক্ষায় আলোকপ্রাপ্ত হইলে বিভিন্ন রাজ্যের অধিবাসিগণ এক অণুও জাতীয়তাবোধে উদ্বুদ্ধ হইয়া নিজেদের ভারতবাসী বলিয়া মনে করিবেন। জনমত যাহাতে জাতীয়তাবোধে উদ্বুদ্ধ হয়, সেইজন্য দেশে প্রকৃত শিক্ষার প্রবর্তন হওয়া বাঞ্ছনীয়।

সংক্ষিপ্তসার

রাজনৈতিক দল—যখন একদল লোক একটি নির্দিষ্ট নীতি ও কার্যক্রম অবলম্বন করিয়া জাতীয় সমস্যাগুলির সমাধানে বন্ধপরিকর হয়, তখন তাহাকে রাজনৈতিক দল বলা হয়। দল-গঠন যাহাযের স্বাধীন চিন্তাশক্তির

অভিব্যক্তি মাত্র। ব্যক্তিবিশেষের মত এককভাবে কার্যকর হইতে পারে না, সেজন্য সম্ভবত্বভাবে মানুষ তাহাদের সমবেত মতকে কার্যকর করিবার প্রয়াস পায়। রাজনৈতিক দলের মুখ্য উদ্দেশ্য হইল জাতীয় স্বার্থের উৎকর্ষ-সাধন করা।

রাজনৈতিক দলের কার্য—জাতীয় সমস্যাগুলি নির্ধারণ করিয়া তাহাদের সমাধান করিবার নীতি ও কার্যক্রম জনসাধারণের নিকট উপস্থিত করা দলের প্রধান কার্য বলিয়া পরিগণিত হয়। জনসাধারণকে প্রচার-কার্যের দ্বারা দলীয় নীতিতে আস্থাবান করিয়া তাহাদের সমর্থন লাভ করা দলের আর একটি কার্য। সংখ্যাধিক্যের সমর্থন লাভ করিলে নির্বাচনে জয় নিশ্চিত। নির্বাচনে জয়লাভ করিয়া রাজনৈতিক দল শাসনভার গ্রহণ করিতে পারে। শাসনভার হস্তগত হইলে দলীয় নীতি ও কার্যক্রম বাস্তবক্ষেত্রে প্রয়োগ করিয়া রাজনৈতিক দল তাহার প্রতিশ্রুতি পূরণ করিতে পারে।

দলীয় শাসনের গুণ—১। অসংবদ্ধ জনমতকে প্রচারকার্যের দ্বারা সুসংবদ্ধ করিয়া রাজনৈতিক দল জনশিক্ষা-প্রচারে সহায়তা করে। রাজনৈতিক ব্যাপারে সাধারণ লোকও উৎসাহিত হইয়া শাসনকার্যে অংশ গ্রহণ করে। ২। সংখ্যাগরিষ্ঠের সমর্থন লাভ করিয়া মস্তিসংসদ স্থায়িত্ব লাভ করে ও দীর্ঘমেয়াদী কার্যক্রম অনুসরণ করিতে পারে। ৩। দলগুলির মধ্যে প্রতিযোগিতার ফলে শাসনকার্যে উন্নতি হয়। বিরোধী দলের সমালোচনার জন্ত ও পরবর্তী নির্বাচনে পরাজিত হইবার আশঙ্কায় সংখ্যাগরিষ্ঠ দল স্বেচ্ছায় হইতে পারে না বা জনমতকে একেবারে উপেক্ষা করিতে পারে না। ৪। দলীয় শাসনব্যবস্থা প্রবর্তনের ফলে সরকারের বিভিন্ন বিভাগের মধ্যে যোগসূত্র স্থাপিত হইয়া সরকারী কার্য অব্যাহতভাবে পরিচালিত হইতে পারে।

দলীয় শাসনের দোষ—১। দলীয় শাসন মানুষের মধ্যে কৃত্রিম বিভেদ সৃষ্টি করে। ২। স্বাধীনভাবে মতপ্রকাশের সুযোগ নষ্ট করিয়া দল-প্রথা ব্যক্তিগত উপেক্ষা করে। ৩। অনেক সময় দলের সমর্থকগণ দলীয় স্বার্থকে বড় করিয়া দেখেন, ইহাতে জাতীয় স্বার্থ সঙ্কুচিত হয়। ৪। নির্বাচনকালে নানারূপ অবস্থিত ও নীতি-বিরোধী উপায়ে বিভিন্ন দল ভোট সংগ্রহ করে,

ফলে দেশের নৈতিক আবহাওয়া নিম্নস্তরে নামিয়া যায়। ৫। সংখ্যাগরিষ্ঠ দল শুধু বিরুদ্ধাচরণ করিবার উদ্দেশ্যেই ভালমন্দ বিচার না করিয়াই সংখ্যাগরিষ্ঠ দলের সকল কার্যক্রমে বাধা প্রদান করে।

দুই-দল বনাম বহু-দল—দুই-দলের গুণ : ১। দুই-দল থাকিলে ভোটদাতার প্রার্থিনির্বাচনের সমস্তা সহজ হয়। ২। সংখ্যাগরিষ্ঠ দলের সমর্থন লাভ করিয়া শাসনপরিষদ স্থায়িত্ব লাভ করে। ৩। বিরোধী দলের সমালোচনার দ্বারা জনমত বিরুদ্ধভাবাপন্ন হইতে পারে এই ভয়ে সংখ্যাগরিষ্ঠ দল বে-আইনী কার্য করিতে পারে না।

দুই-দলের দোষ : ১। এই ব্যবস্থায় দেশের জনমত বিশেষ করিয়া মধ্যপন্থী মত সম্যক্রূপে প্রকাশ হইতে পারে না। ২। সংখ্যাগরিষ্ঠ দলের স্বৈরাচারী হইবার সম্ভাবনা থাকে। ৩। মন্ত্রিসংসদ একটিমাত্র দলের নেতৃগণ দ্বারা গঠিত হয় বলিয়া দেশের বিভিন্ন জনমত মন্ত্রিসংসদের কার্য দ্বারা প্রতিকলিত হয় না।

বহু-দলের গুণ : বহু-দল থাকিলে ১। দেশের জনমত অধিকতর স্পষ্টভাবে প্রকাশ হইবার সুযোগ পায় ও জনসাধারণ এই বিভিন্ন দলের মাধ্যমে তাহাদের মত প্রকাশ করিতে পারে। ২। মন্ত্রিসংসদ বহু-দলের সদস্য লইয়া গঠিত হয় বলিয়া ইহাকে জনমতের অধিকতর প্রতিনিধিমূলক বলা যাইতে পারে। ৩। বহু-দলের সহযোগিতার ভিত্তির উপর প্রতিষ্ঠিত বলিয়া মন্ত্রিসংসদ অত্যাচারী হইতে পারে না।

বহু-দলের দোষ : ১। বহু-দলের সহযোগিতায় যে মন্ত্রিসংসদ গঠিত হয় তাহা স্থায়ী হইতে পারে না। ২। অস্থায়ী বলিয়া মন্ত্রিসংসদ জাতীয় প্রগতিমূলক কোন দীর্ঘমেয়াদী কার্যক্রম সফল করিতে পারে না। ৩। বহু-দলের সম্মতি-সাপেক্ষ বলিয়া শাসনপরিষদ কোন বিষয়ে দ্রুত সিদ্ধান্ত গ্রহণ করিতে পারে না। ৪। মন্ত্রিসংসদ-গঠনে অনেক কূটনীতি প্রদর্শন পায়।

এক-দলীয় শাসন

প্রথম বিশ্বযুদ্ধের পর রাশিয়া, জার্মানি, ইতালি প্রভৃতি দেশে একদলীয় শাসনব্যবস্থা প্রবর্তিত হয়। একদলীয় সরকার অল্প দলগুলিকে বলপ্রয়োগ দ্বারা বিনষ্ট করে। একদলীয় শাসনব্যবস্থার উদ্দেশ্য হইল, যে-কোন প্রকারে

হউক না কেন জাতীয় ঐক্য প্রতিষ্ঠা করা। সেজন্য তাহার ধর্ম, ন্যায় ও নীতি পর্যন্ত বিসর্জন দিতে কুণ্ঠাবোধ করে না। এক-দলীয় সরকার দেশের স্বার্থে বিনা বাধায় ক্রতগতিতে কার্য করিতে পারে। কিন্তু এই শাসন-ব্যবস্থায় ব্যক্তিস্বাধীনতা যে ক্ষুণ্ণ হয় তাহা অস্বীকার করা যায় না।

দলব্যবস্থার ক্রটি দূর করিবার উপায়

১। শাসনব্যবস্থায় জনসাধারণের গণভোট, গণ-প্রস্তাব, প্রত্যাখ্যানের নির্দেশ প্রভৃতি দ্বারা সক্রিয় অংশ গ্রহণ করিবার ক্ষমতা প্রদান করিয়া দলীয় শাসনের ক্রটি দূর করা সম্ভব। ২। শুধুমাত্র যোগ্যতার ভিত্তির উপর সরকারী চাকুরী ও সরকারী সম্মান বিতরণ করিবার ব্যবস্থা হইলে দলীয় শাসনের গলদ অনেক পরিমাণে কমিতে পারে। ৩। লিখিত ও অনমনীয় শাসনতন্ত্র এবং নির্ভীক ও নিরপেক্ষ বিচারপদ্ধতি প্রতিষ্ঠিত থাকিলে রাজনৈতিক দল তাহাদের খুশিমত কার্য করিতে পারে না। ৪। সরকারী কর্মচারী ও সংখ্যালঘু দলের গ্রায্য অধিকারগুলি শাসনতন্ত্র দ্বারা সুরক্ষিত হইলে দলীয় ক্রটি দূর করা সহজসাধ্য হয়।

দলবিহীন শাসন

দলব্যবস্থার ক্রটি দূর করিবার উদ্দেশ্যে অনেকে রাজনৈতিক দলগুলির বিলোপসাধনের প্রস্তাব করিয়াছেন। দলব্যবস্থার বিকল্প হিসাবে এক-দলীয় সরকার বা দলগুলির সহযোগিতায় মন্ত্রিসংসদ গঠনের প্রস্তাবও করা হইয়াছে। কিন্তু রাজনৈতিক জীবনে দলের অভ্যুত্থান স্বাভাবিক ও অনিবার্য। রাজনৈতিক দলের বিলোপসাধন না করিয়া দল-প্রথার দুর্বলতাগুলি দূর করিতে পারিলে দল-প্রথা অধিকতর কার্যকরী করা যায়।

জনমত—গণতন্ত্রকে সফল করিতে হইলে শাসন-পরিচালনায় জনমতের প্রাধান্য প্রতিষ্ঠিত হওয়া আবশ্যিক। জনমতের কার্যকর শক্তির অভাবে গণতন্ত্র বিকৃত হইয়া স্বৈরতন্ত্রে পরিণত হইতে পারে।

জনমতের প্রকৃতি—জনমত বলিতে সকল ব্যক্তিই যে একমতাবলম্বী হইবে ইহা বুঝায় না বা কোন সংখ্যাগরিষ্ঠ দলের মতও বুঝায় না। যে মত

জনগণের বিবেকবুদ্ধির উপর প্রতিষ্ঠিত ও যাহার উদ্দেশ্য হইল জনগণের বৃহত্তর কল্যাণ সাধন করা, সেই মতকেই জনমত বলা হয়। সংখ্যালঘু দল এই মত সমর্থন না করিলেও সক্রিয়ভাবে এই মতের বিরুদ্ধাচরণ করিতে পারে না।

৫

জনমত গঠন ও প্রকাশের বিভিন্ন উপায়—দেশে প্রকৃত জনমত গঠনে সংবাদপত্র, শিক্ষায়তন, রাজনৈতিক দল, চলচ্চিত্র ও বেতার বিশেষভাবে সহায়তা করে। বর্তমানে সংবাদপত্র, চলচ্চিত্র ও বেতার-সাহায্যে জনমত প্রভূতভাবে প্রভাবিত হয়। এইজন্য এইগুলিকে ঠিক পথে পরিচালিত করা জাতীয় জীবনে অপরিহার্য হইয়া উঠিয়াছে।

আইন ও জনমত—গণতন্ত্রের ভিত্তি হইল জনমতের সমর্থন। রাষ্ট্র-প্রণীত আইন যদি জনমত প্রতিকূলিত করিতে অসমর্থ হয়, তাহা হইলে সে আইন লোকে মান্য করিতে চায় না। জনমতের প্রতিকূলতা করিয়া কোন সরকারই স্থায়ী হইতে পারে না। জনগণ নানা উপায়ে, সংবাদপত্র, সভা-সমিতি প্রভৃতি দ্বারা আইন-প্রণয়নে প্রভাব বিস্তার করে।

ভারতে জনমত—অশিক্ষা, দারিদ্র্য ও পরাধীনতার জন্য ভারতে এতদিন পর্যন্ত কোনরূপ প্রকৃত জনমত গঠিত হইতে পারে নাই। স্বাধীনতা-লাভের পর জাতীয় জীবনে নানা দিক দিয়া যে পরিবর্তন দেখা যাইতেছে তাহাতে আশা করা যায় যে, শিক্ষাবিস্তার হইলে ভারতে শক্তিশালী জনমত গঠিত হইতে পারিবে। জনমত গঠনে ভারতের সংবাদপত্রগুলির ও রাজনৈতিক দলগুলির যথেষ্ট দায়িত্ব আছে।

1. Discuss the advantages and disadvantages of party government. Can you suggest any practical working alternative ?

(C. U. 1946).

2. Discuss the use, abuse and the true role of the party system in Democracy. (C. U 1953)

3. Define a Political Party. What are the functions of a political party ? (C. U. 1955)

4. Discuss the use and limitations of the party system. Answer with special reference to the conditions in this country. (Gauhati, 1957)

5. Would you like to have only one party, two parties or many parties in a country ? Give reasons for your answer. (C. U. 1962)

6. Explain the meaning of multiple party system and examine its advantages and disadvantages.

(C. U. Part I, 1965)

7. Discuss the nature of Public opinion and point out its importance in popular government.

(C. U. Part I, 1962, 1964)

8. Discuss the nature and functions of political parties. Are political parties indispensable in democracies ? Give reasons for your answer. (C. U. B. A. Part I, 1967)

9. Explain the meaning of one-party rule. Discuss with reference to an example the advantages and disadvantages of one-party rule. (C. U. Part I, Sp. 1970)

নির্বাচকমণ্ডলী

(The Electorate)

নির্বাচকমণ্ডলী ও ভোটাধিকার (The Electorate and the right of voting)

আধুনিক যুগে গণতন্ত্র বলিতে পরোক্ষ গণতন্ত্র বুঝায়। জনসাধারণ প্রত্যক্ষভাবে শাসনব্যবস্থায় অংশ গ্রহণ করিতে পারে না, তাই তাহারা একটি নির্দিষ্টকালের জন্য প্রতিনিধি নির্বাচন করে এবং এই নির্বাচিত প্রতিনিধিগণ জনসাধারণের পক্ষে শাসনকার্য পরিচালনা করিয়া থাকেন। ভোট দিয়া প্রতিনিধি নির্বাচন করা সকল দেশেই একটা বিশেষ মূল্যবান রাজনৈতিক অধিকার বলিয়া বিবেচিত হয়। ভোট দিয়া প্রতিনিধি নির্বাচন করিবার অধিকার কাহাদের থাকে উচিত, নির্বাচনব্যবস্থা কি ধরনের হওয়া উচিত, ইহা লইয়া রাষ্ট্রবিজ্ঞানীদের মধ্যে মতভেদ দেখা যায়।

দেশে যে সমস্ত লোকের ভোট দিয়া প্রতিনিধি নির্বাচন করিবার অধিকার থাকে, তাহাদের সমষ্টিগতভাবে ভোটদাতৃমণ্ডল বা নির্বাচকমণ্ডলী বলা হয়।

সার্বজনীন ভোটাধিকার : ইহার সপক্ষে ও বিপক্ষে যুক্তি
(Universal Franchise : Arguments for and against the System)

গণতান্ত্রিক আদর্শ সুপ্রতিষ্ঠিত হওয়ার ফলে ভোটদানক্ষমতা আর মুষ্টিমেয় কয়েকজনের মধ্যে সীমাবদ্ধ নাই। বর্তমানে প্রত্যেক প্রাপ্তবয়স্ক ব্যক্তিই ভোটদানের অধিকারী বলিয়া গণ্য হয়। যত অধিক সংখ্যক লোক ভোটদানের অধিকারী হইবে গণতন্ত্র হইবে তদধিক ব্যাপক। অপরপক্ষে যত বেশী সংখ্যক লোকে ভোটদানের অধিকার হইতে বঞ্চিত রাখা হইবে গণতন্ত্রের পরিসর সেই অল্পপাতে সঙ্কীর্ণতর হইবে। একটি দেশে যখন

আবালবুদ্ধবিনিতা সকলেরই ভোটদানের অধিকার থাকে, তখন তাহাকে ব্যাপক বা সার্বজনীন ভোটাধিকার বলা হয়। কিন্তু সার্বজনীন ভোটাধিকার কার্যকর হইলেও একটি দেশের সমস্ত নাগরিকেরই এই অধিকার থাকে না। সমস্ত জনসংখ্যার একটা বিরাট অংশ ভোটদানের অধিকার হইতে বঞ্চিত থাকে।

ভোটদান-ক্ষমতাকে সাধারণতঃ একটা অধিকার বলা হয়। কিন্তু একদিকে ইহা যেমন একটা অধিকার বলিয়া গণ্য হয়, অন্যদিকে ইহা আবার একটা গুরুদায়িত্ব বলিয়া পরিগণিত হয়। ভোটদান করার অধিকার হউক আর কর্তব্যই হউক, প্রত্যেক ভোটদাতার এই অধিকার অর্জন করিবার ও যথাযথভাবে দায়িত্ব পালন করিবার ক্ষমতা থাকা চাই। যেক্ষেত্রে এই অধিকার অর্জনের ও কর্তব্যপালনের ক্ষমতার অভাব দেখা যায়, সেখানে ভোটদান-ক্ষমতা অর্পণ করা সমীচীন নয়। এই কারণে প্রত্যেক সভ্য দেশে অপ্রাপ্তবয়স্ক, বিকৃতমস্তিষ্ক, দেউলিয়া, দুর্বৃত্ত, বিদেশীয় প্রভৃতি শ্রেণীর লোকদিগকে ভোটাধিকার দেওয়া হয় না।

প্রাপ্তবয়স্ক মাত্রের ভোটাধিকার-নীতির সপক্ষে বলা হয় যে, এই ক্ষমতা ব্যক্তিমাত্রেরই জন্মগত অধিকার। রাষ্ট্রের সার্বভৌম ক্ষমতার ভিত্তি হইল জনসাধারণের সমষ্টিগত ইচ্ছা। সমষ্টিগত ইচ্ছাকে কার্যে পরিণত করিবার একমাত্র পন্থা হইল সার্বজনীন ভোটাধিকার-দান। ভোটদান করিবার মাধ্যমেই জনসাধারণ শাসনকার্যে সক্রিয় অংশ গ্রহণ করিয়া তাহাদের ইচ্ছাকে কার্যকর করিতে সক্ষম হয়। দ্বিতীয়তঃ, গণতান্ত্রিক শাসনব্যবস্থা জনসাধারণের সম্মতির উপর প্রতিষ্ঠিত। জনগণের সম্মতি তাহাদের নির্বাচিত প্রতিনিধিদের মাধ্যমে প্রকাশিত হয়। সুতরাং জনগণের ভোটদান-ক্ষমতা না থাকিলে কোন শাসনব্যবস্থাকেই গণতন্ত্রসম্মত শাসনব্যবস্থা বলা যাইতে পারে না। তৃতীয়তঃ, শাসকগোষ্ঠী স্বৈরাচারী হইয়া যাহাতে ব্যক্তিস্বাধীনতা ক্ষুণ্ণ করিতে না পারে তজ্জন্ম জনগণের ভোটাধিকার একান্ত আবশ্যক। ভোটদান-ক্ষমতার প্রয়োগ করিয়া জনগণ দায়িত্ববোধহীন ও অকর্মণ্য সরকারকে অপসারিত করিয়া নূতন সরকার গঠন করিতে পারে। পরিশেষে বলা যায় যে, রাষ্ট্রের অধিবাসী হিসাবে সকল নাগরিকই সমান অধিকার দাবী করিতে পারে। একদল লোককে ভোটাধিকার দান।

করিয়া অল্প সকলকে এই অধিকার হইতে বঞ্চিত রাখিলে, রাষ্ট্র তাহার সকল নাগরিকের নিকট হইতে সমান আত্মগত্য লাভ করিতে পারে না। ফলে, রাষ্ট্রের ভিত্তি দুর্বল হইয়া পড়ে ও এই বৈষম্যমূলক ব্যবহার জন্ত নাগরিকদের মধ্যে ভেদবুদ্ধি ও ঈর্ষার সৃষ্টি হয়। সার্বজনীন স্বার্থের পরিবর্তে মুষ্টিমেয় লোকের স্বার্থসংরক্ষণের জন্ত রাষ্ট্র পরিচালিত হয়। এরূপ রাষ্ট্রকে কখনও কল্যাণরাষ্ট্র বলা যায় না।

প্রাপ্তবয়স্কদের ভোটাদিকার দান করিবার বিরুদ্ধে মিল, মেইন, লেকি প্রভৃতি মনীষিগণ অনেক যুক্তির অবতারণা করিয়াছেন। তাঁহাদের মতে ভোটদান-অধিকার নিতুলভাবে প্রয়োগ করিবার যোগ্যতা যাহাদের নাই, তাহাদের ভোটদান-অধিকার হইতে বঞ্চিত রাখা যুক্তিযুক্ত। মিল ভোটদান-ব্যাপারে ভোটদাতার শিক্ষার উপর সমধিক গুরুত্ব আরোপ করিয়াছেন। তাঁহার মতে যাহারা লিখিতে-পড়িতে জানে না ও গণিত-শাস্ত্রের প্রাথমিক সূত্রগুলির সহিত অপরিচিত, তাহাদের ভোটদান-অধিকার দেওয়া সমীচীন নয়। সুতরাং মিলের মতে পূর্বে জনসাধারণকে শিক্ষিত করিয়া পরে তাহাদের ভোটদান-অধিকার দেওয়া উচিত (“Universal teaching must precede universal enfranchisement”)। শুধুমাত্র লিখিতে পড়িতে শিখিলে ও অঙ্কশাস্ত্রের প্রাথমিক সূত্রগুলির সহিত সামান্য পরিচয় হইলেই যে লোকের ভোটদানের যোগ্যতা বৃদ্ধি পায়—এ-কথা সত্য নয়। ভোটদান-ব্যাপারে সাধারণ কর্তব্যবুদ্ধি ও হিতাহিতজ্ঞান থাকা আবশ্যিক, ইহা স্বীকার করিয়া লইলেও মিলের উক্তির সমর্থন করা যায় না। সামান্য শিক্ষাপ্রাপ্ত ব্যক্তি ভোটদাতা হিসাবে যে নিরক্ষর ব্যক্তি অপেক্ষা শ্রেষ্ঠতর তাহা সব সময়ে সত্য নয়। অধিকন্তু বর্তমানকালে দেখা যায় যে, ভিন্নমুখী নানাবিধ মতবাদ-প্রচারের ঘূর্ণাবর্তে পড়িয়া শিক্ষিত ব্যক্তির নিজস্ব মতের যতটা বিকৃতি ঘটিবার সম্ভাবনা থাকে, অজ্ঞ এবং সংবাদপত্র ও প্রচার-পুস্তিকা পাঠে অক্ষম ব্যক্তির নিজস্ব মতের ততটা বিকৃতি ঘটিবার সম্ভাবনা নাই। সাধারণ বুদ্ধি, পরার্থপরতা বা সমষ্টিগত হিতজ্ঞান প্রভৃতি যে গুণগুলি ভোটদানক্ষমতা-প্রয়োগের পক্ষে অপরিহার্য বলিয়া পরিগণিত হয়, সেগুলি অশিক্ষিত লোকের মধ্যেও যথেষ্ট পরিমাণে দেখা যায়। ভোটদানের অধিকার থাকিলে লোকে তাহাদের অল্প অধিকার সম্বন্ধে সজাগ হইয়া

অন্য অধিকারগুলি দাবী করিতে পারে। সুতরাং পূর্বে শিক্ষা বিস্তার, পরে ভোটদান-ক্ষমতার সম্প্রসারণ-নীতি গ্রহণ করা যায় না। মিলের নিজ দেশ ইংলণ্ডেও মিল-বর্ণিত নীতি অমুমত হয় নাই। ইংলণ্ডে সংস্কার আইনগুলি পাস করিয়া যত সংখ্যক লোককে ভোটদানের অধিকার দেওয়া হইয়াছিল, তদপেক্ষা অল্পসংখ্যক লোকই তখন লিখিতে পড়িতে পারিত। ভোটদান-ক্ষমতা সম্প্রসারণের ফলে জনগণের শিক্ষাবিস্তারের দাবী স্বীকৃত হইয়া শিক্ষাবিস্তারের পথ উন্মুক্ত হইয়াছিল।

অনেকে বলেন যে, ভোটদাতার কিছু সম্পত্তির মালিক হওয়া চাই এবং কিছু কর-প্রদানের ক্ষমতা থাকা চাই। সম্পত্তিহীন ব্যক্তি ব্যক্তিগত সম্পত্তির মূল্য ও মর্যাদা বুঝিতে পারে না, সেজন্য তাহারা সকল সময়েই ব্যক্তিগত সম্পত্তি যাহাতে নষ্ট হয় সেজন্য সচেতন থাকে। কিন্তু অধুনা ব্যক্তিগত সম্পত্তির মালিকানা ভোটদান-অধিকারের একটি যোগ্যতা বলিয়া বিশেষ পরিগণিত হয় না। প্রকৃত শিক্ষাপ্রাপ্ত ব্যক্তিমানেরই ভোটদানের অধিকার থাকা উচিত এবং এই প্রকৃত শিক্ষাবিস্তার করা বর্তমান কল্যাণরাষ্ট্রের একটি প্রধান কর্তব্য বলিয়া বিবেচিত হয়।

স্ত্রীলোকের ভোটাধিকার (Women Suffrage)

বহুদিন পর্বন্ত স্ত্রীজাতি ভোটাধিকার হইতে বঞ্চিত ছিল। এমন কি, ইয়ুরোপের বহু প্রগতিশীল দেশেও বর্তমান শতাব্দী পর্যন্ত স্ত্রীলোকদিগকে এই অধিকার দেওয়া হয় নাই। স্ত্রীলোকদের ভোটাধিকার দেওয়ার বিপক্ষে সাধারণতঃ যে যুক্তিগুলির অবতারণা করা হইত সেগুলি শুধু শিশু-সুলভ নয়, সেগুলিকে পুরুষের স্বার্থপরতার পরিচায়কও বলা যাইতে পারে। অনেকের ধারণা যে, স্ত্রীজাতি যদি রাজনৈতিক দ্বন্দ্বে অবতীর্ণ হয়, তাহা হইলে অনেক সময় স্বামী ও স্ত্রী, পিতা ও কন্যার মধ্যে মতভেদের ফলে গার্হস্থ্য জীবনের সুখশান্তি নষ্ট হইতে পারে। স্ত্রীজাতি অত্যধিক রাজনৈতিক চেতনাসম্পন্ন হইলে তাহাদের স্ত্রীসুলভ গুণগুলি অস্তিত্ব হইবে এবং তাহার ফলে শিশুপালন ও পারিবারিক জীবনধারণে স্ত্রীজাতির অবশ্যকরণীয় কার্য-গুলি ব্যাহত হইবে। ইহা ছাড়াও বলা হয় যে, স্ত্রীজাতি আত্মরক্ষা করিতে সক্ষম নয়। আত্মরক্ষার জন্য তাহাদের পুরুষের উপর নির্ভর করিতে হয়,

সুতরাং তাহাদের পৃথকভাবে ভোট দিবার অধিকার থাকিতে পারে না। যুদ্ধে যোগদান করিবার ক্ষমতাকে অনেকে ভোটদানের একটি অপরিহার্য যোগ্যতা বলিয়া মনে করেন। তাহাদের মতে যুদ্ধে যোগদানের অক্ষমতা-হেতু স্ত্রীজাতির ভোটাধিকার জন্মিতে পারে না। পরিশেষে বলা হয় যে, অনেক স্ত্রীলোক এই ভোটাধিকার চায় না, সুতরাং স্ত্রীলোকের ভোটাধিকারের কোন প্রয়োজনীয়তা নাই।

কিন্তু স্থলের বিষয় যে, প্রথম বিশ্বসমরের পরবর্তী কাল হইতে স্ত্রীলোকের ভোটদানের গ্রায্য অধিকার প্রায় সমস্ত সভ্য দেশ কর্তৃক স্বীকৃত হইয়াছে। স্ত্রীলোকের ভোটদান-অধিকার শুধু যে স্বীকৃত হইয়াছে তাহা নয়, আজ স্ত্রীজাতি ভোটদান-ব্যাপারে পুরুষের সমানাধিকার অর্জন করিয়াছে। ইংলেণ্ডে পুরুষ ভোটদাতার সংখ্যা অপেক্ষা নারী ভোটদাতার সংখ্যা কিছু বেশী। নারী ও পুরুষের মধ্যে প্রকৃতিগত পার্থক্য থাকিলেও সেই পার্থক্যের অভূহাতে সমাজের একটা বিরাট ও বিশিষ্ট অংশকে ভোটদান-ক্ষমতা হইতে বঞ্চিত রাখা যুক্তিযুক্ত নয়। জন স্টুয়ার্ট মিল স্ত্রীজাতির ভোটদান-ক্ষমতার একজন প্রধান সমর্থক ছিলেন। তাহার মতে মাতৃত্ব ও শিশুপালন স্ত্রীজাতির একমাত্র কর্তব্য বলিয়া বিবেচিত হইতে পারে না। স্ত্রীজাতি যদি মধ্যে মধ্যে ভোটদান করেন, তাহাতে তাহাদের স্ত্রীজলভ বৃত্তিগুলি নষ্ট হওয়ার সম্ভাবনা কম। ব্যক্তিস্বাভাব্য ও ব্যক্তিস্বাধীনতা যদি পুরুষের ব্যক্তিবিকাশের অপরিহার্য উপাদান বলিয়া পরিগণিত হয়, তাহা হইলে স্ত্রীলোকের ব্যক্তিবিকাশের জন্যও অনুরূপ উপাদান অপরিহার্য—এ কথা অস্বীকার করিবার কোন সম্ভব কারণ থাকিতে পারে না। স্ত্রী ও পুরুষের সমাবেশে সমাজ গঠিত। সুতরাং সমাজের একটি বৃহৎ অংশকে গ্রায্য অধিকার হইতে বঞ্চিত করিয়া পশু করিয়া রাখিলে সমাজই ক্ষতিগ্রস্ত হইবে। স্ত্রীজাতি আত্মরক্ষা করিতে পারে না বা যুদ্ধক্ষম নয়—এ কথা বলাও যুক্তিযুক্ত নয়। সক্রিয়ভাবে সৈনিকের কার্য না করিলেও অস্ত্র নানা প্রকারের বিশেষ করিয়া ধাত্ত্বীহিসাবে স্ত্রীজাতি যুদ্ধের সময় গুরুত্বপূর্ণ কার্য সম্পাদন করিয়া থাকে। উপযুক্ত শিক্ষা পাইলে স্ত্রীজাতি যে অনেক বিষয়ে পুরুষের সমান দক্ষতা অর্জন করিতে পারে, ইহার ভূরিভূরি প্রমাণ পাওয়া যায়। সুতরাং দৈহিক বা মানসিক অক্ষমতার অভূহাতে স্ত্রীজাতিকে ভোটাধিকার হইতে বঞ্চিত

রাখিবার আর সম্ভব কারণ নাই। ১৯১৮ খৃষ্টাব্দে ইংলণ্ডের নারীরা ভোটাধিকার অর্জন করেন ও দশ বছর পরে নতুন আইনের বলে তাঁহারা পুরুষের সমান অধিকার লাভ করেন। সোভিয়েত যুক্তরাষ্ট্রে অষ্টাদশবর্ষীয়া সকল নারীরই পুরুষের সমান ভোটাধিকার আছে। ভারতের নতুন শাসন-তন্ত্রে নারীর ভোটাধিকার স্বীকৃত হইয়াছে। কিন্তু স্বাধীনতা, সাম্য ও মৈত্রীর প্রচারক করাসী দেশে ও প্রত্যক্ষ গণতন্ত্রের জন্মভূমি সুইস দেশে এখনও পর্যন্ত স্ত্রীজাতির ভোটাধিকার স্বীকৃত হয় নাই।

প্রত্যক্ষ ও পরোক্ষ নির্বাচন (Direct and Indirect Election)

সাধারণতঃ দুইটি পদ্ধতিতে প্রতিনিধি নির্বাচন করা হয়—প্রত্যক্ষভাবে ও পরোক্ষভাবে। প্রত্যক্ষ নির্বাচনে ভোটদাতাগণ নিজেরাই সরাসরিভাবে ভোটদান করিয়া প্রতিনিধি নির্বাচন করিয়া থাকেন। আইনসভার নিম্ন-পরিষদের সদস্যগণ ও স্থানীয় সরকারগুলির আইনসভা ও বিভিন্ন স্থানীয় প্রতিষ্ঠানগুলির সদস্যমণ্ডলী সাধারণতঃ এই পদ্ধতিতে নির্বাচিত হইয়া থাকেন।

গুণ (Merit)

প্রত্যক্ষ নির্বাচনে ভোটদাতাগণ সরাসরি নির্বাচনে অংশ গ্রহণ করিতে পারেন বলিয়া রাজনৈতিক ব্যাপারে তাঁহাদের উৎসাহ বৃদ্ধি পায়। তাঁহাদের অধিকার ও কর্তব্য সম্বন্ধে তাঁহারা অধিকতর সচেতন থাকেন। নির্বাচিত প্রতিনিধিগণকেও ভোটদাতাগণের সংস্পর্শে আসিয়া তাঁহাদের সুবিধা-অসুবিধা সম্বন্ধে আলাপ-আলোচনা করিতে হয়। এইরূপে শাসক ও শাসিতের মধ্যে সহযোগিতার মনোভাব সৃষ্টি হয়। ফলে, শাসকের দায়িত্ব-বোধ ও শাসিতের রাজনৈতিক জ্ঞান বৃদ্ধি পায়।

দোষ (Demerit)

কিন্তু এই পদ্ধতির প্রধান ত্রুটি হইল যে, ভোটদাতাগণ যদি অশিক্ষিত হন, তাহা হইলে তাঁহারা নির্বাচনপ্রার্থীর ঘোগ্যতা বিচার করিতে পারেন না। অনেক সময় ভোটদাতাগণ ভালমন্দ বুঝিতে না পারিয়া প্রচারের

দ্বারা বিভ্রান্ত হন ও অযোগ্য ব্যক্তিকে নির্বাচন করিয়া দেশের বৃহত্তর স্বার্থের হানি করেন।

প্রত্যক্ষ নির্বাচনের এই ত্রুটির জন্য অনেকে পরোক্ষ নির্বাচন পছন্দ করেন। পরোক্ষ নির্বাচন দ্বারা যে প্রতিনিধি নির্বাচিত হন, তাঁহারা দুইটি পর্যায় ভোটদানের ফলে নির্বাচিত হইয়া থাকেন। প্রথমতঃ, দেশের প্রাথমিক ভোটদাতৃমণ্ডলী ভোট দিয়া একদল প্রতিনিধি নির্বাচন করেন। এইরূপ নির্বাচিত প্রতিনিধিগণ জনসাধারণের পক্ষে আইনসভার প্রতিনিধি নির্বাচন করেন। সুতরাং এই পদ্ধতিতে প্রতিনিধিগণ সোচ্ছাত্ত্বি ভোটদাতাগণ-কর্তৃক নির্বাচিত হন না। ভারতের বিভিন্ন রাজ্যে যেখানে দ্বি-কক্ষ আইনসভা আছে, যেখানে উচ্চ-পরিষদের সদস্যগণের একটি অংশ ভোটদাতাগণ কর্তৃক নির্বাচিত নিম্ন-পরিষদের সদস্যগণ কর্তৃক নির্বাচিত হইয়া থাকেন।

পরোক্ষ নির্বাচনের গুণ (Merit)

পরোক্ষ নির্বাচনের সপক্ষে বলা যায় যে, এই পদ্ধতিতে যোগ্যতর প্রতিনিধি নির্বাচিত হওয়ার সম্ভাবনা থাকে। প্রাথমিক ভোটদাতাগণ ভোট দিয়া অপেক্ষাকৃত যোগ্যতর যে প্রতিনিধি নির্বাচন করেন, সেই নির্বাচিত প্রতিনিধিদের দ্বারা আসল প্রতিনিধিরা নির্বাচিত হন বলিয়া যোগ্যতর প্রতিনিধি নির্বাচিত হওয়ার সম্ভাবনা থাকে। পরোক্ষ নির্বাচনের আর একটি সুবিধা হইল যে, আসল প্রতিনিধি নির্বাচন ব্যাপারে অল্পসংখ্যক লোক অংশ গ্রহণ করে। সুতরাং নির্বাচনের উত্তেজনা বা নির্বাচন-সংক্রান্ত কলহ, অশান্তি ও হুর্নাস্তি কম হয়।

দোষ (Demerit)

পরোক্ষ নির্বাচন গণতন্ত্রসম্মত পদ্ধতি নয় বলিয়া অনেকে ইহাতে আপত্তি করেন। এই পদ্ধতিতে নির্বাচিত প্রতিনিধিদের সহিত প্রাথমিক ভোটদাতাগণের কোন প্রত্যক্ষ যোগাযোগ থাকে না। প্রতিনিধিগণ অল্পসংখ্যক লোক দ্বারা নির্বাচিত হন বলিয়া অনেক সময় জনসাধারণের প্রতি তাঁহাদের স্বার্থবিবোধের অভাব দেখা যায়। জনসাধারণও প্রতিনিধি নির্বাচন ব্যাপারে

প্রত্যক্ষভাবে অংশ গ্রহণ করিতে পারে না। বলিয়া রাজনৈতিক ব্যাপারে ক্রমশঃ উদাসীন হইয়া পড়ে। ইহার প্রধান দোষ হইল যে, আসল প্রতিনিধি নির্বাচন ব্যাপার অল্পসংখ্যক লোকের হস্তে থাকে। সুতরাং নির্বাচনে নানাবিধ দুর্নীতি প্রশ্রয় পায়। যুক্তির দিক দিয়া দেখিতে গেলেও এরোক্ষ নির্বাচন বাহ্যমাত্র বলিয়া প্রতীয়মান হয়। ভোটদাতাগণ যদি যোগ্য মাধ্যমিক প্রতিনিধি নির্বাচন করিতে সক্ষম বলিয়া বিবেচিত হন, তাহা হইলে সরাসরি আসল প্রতিনিধি নির্বাচন ব্যাপারে তাঁহাদের অক্ষম ভাবিবার কোন সঙ্গত কারণ থাকিতে পারে না।

একসদস্য-সমন্বিত নির্বাচনকেন্দ্র বনাম বহুসদস্য-সমন্বিত নির্বাচন-কেন্দ্র (Single-Member Vs. Multiple-Member Constituency)

নির্বাচনকেন্দ্রগুলি একরূপভাবে সংগঠিত হইতে পারে যে, প্রতি নির্বাচন-জিলা হইতে মাত্র একজন প্রতিনিধি নির্বাচিত হইবেন অথবা একাধিক প্রতিনিধি নির্বাচিত হইবেন। একসদস্য-সমন্বিত নির্বাচনপ্রথার বৈশিষ্ট্য হইল যে, সমগ্র দেশটিকে প্রতিনিধির সংখ্যানুসারে ক্ষুদ্র ক্ষুদ্র জিলায় ভাগ করিয়া প্রত্যেক জিলা হইতে একজন করিয়া প্রতিনিধি নির্বাচন করা হয় এবং প্রত্যেক ভোটদাতাকে একটিমাত্র ভোটদানের ক্ষমতা দেওয়া হয়। গ্রেট ব্রিটেন, ভারত প্রভৃতি দেশে এই প্রথা অনুসারে নির্বাচনকার্য পরিচালিত হয়।

অপরপক্ষে, বহুসদস্য-সমন্বিত নির্বাচনপ্রথার বৈশিষ্ট্য হইল যে, যত সংখ্যক প্রতিনিধি নির্বাচিত হইবেন সমগ্র দেশটিকে তদপেক্ষা অনেক কম সংখ্যক নির্বাচন-জিলায় বিভক্ত করিয়া প্রতি জিলা হইতে একাধিক প্রতিনিধি নির্বাচন করা হয় এবং সেই জিলা হইতে যত সংখ্যক প্রার্থী নির্বাচিত হইবেন প্রত্যেক ভোটদাতা তত সংখ্যক ভোটদান করিতে পারেন। এই প্রথায় নির্বাচন-জিলাগুলি আকারে বৃহত্তর হয়। করাসী দেশ ও মার্কিন যুক্তরাষ্ট্রে এই প্রথায় নির্বাচন অল্পাধিক হইত, কিন্তু বর্তমানে ইহা পরিত্যক্ত হইয়াছে।

একসদস্য-সমন্বিত নির্বাচনকেন্দ্রের সুবিধা ও অসুবিধা (Advantages and Disadvantages of Single-Member Constituency)

প্রথমতঃ, একসদস্য-সমন্বিত নির্বাচনপ্রথার প্রধান সুবিধা হইল যে, এই প্রথায় ভোটদানব্যবস্থায় কোন জটিলতা না থাকার জন্য সাধারণ ভোট-

দাতাও তাহার একটিমাত্র ভোট তাহার পছন্দ অনুসারে যে-কোন প্রার্থীকে দিতে পারে।

দ্বিতীয়তঃ, এই ব্যবস্থায় নির্বাচন-জিলাগুলি সাধারণতঃ ক্ষুদ্র হওয়ার জন্য নির্বাচনপ্রার্থী এবং ভোটদাতা পরস্পরের পরিচিত হইয়া থাকেন এবং পারস্পরিক পরিচয়ের জন্য তাঁহারা সহযোগিতামূলক মনোভাব লইয়া কার্য সম্পাদন করিতে পারেন। তৃতীয়তঃ, এই প্রথাব আর একটি সুবিধা হইল যে, সংখ্যালঘু দলগুলি কোন-না-কোন জিলা হইতে তাঁহাদের কিছু সংখ্যক প্রতিনিধি নির্বাচন করিতে সমর্থ হন।

কিন্তু এই প্রথার প্রধান ত্রুটি হইল যে, নির্বাচন-জিলাগুলি ক্ষুদ্র হওয়ার কারণে ভোটদাতার পছন্দ সংকীর্ণ গণ্ডির মধ্যে আবদ্ধ থাকে। নির্বাচন-জিলায় ভোটদাতার পছন্দমত যোগ্য প্রার্থী না থাকিলেও তাহাকে বাধ্য হইয়া নিম্নস্তরের প্রার্থীকে ভোট দিয়া নির্বাচন করিতে হয়। দ্বিতীয়তঃ, একসদস্য-সমন্বিত নির্বাচন-জিলায় বহু প্রার্থী নির্বাচনে প্রতিদ্বন্দ্বিতা করবার ফলে ভোটগুলি ভাগ হইয়া যে প্রার্থী আপেক্ষিক সংখ্যাগরিষ্ঠ ভোট পাইয়া থাকেন তিনিই নির্বাচিত হন। সমগ্র ভোটসংখ্যার অর্ধেক ভোট না পাইয়াও আপেক্ষিক সংখ্যাগরিষ্ঠ ভোটে একজন প্রার্থী নির্বাচিত হইতে পারেন। কিন্তু এইরূপে সংখ্যালঘু ভোটে নির্বাচিত প্রার্থীকে জনমতের প্রকৃত প্রতিনিধি বলা সমীচীন নহে।

তৃতীয়তঃ, উপরি-উক্ত পদ্ধতিতে নির্বাচন অনুষ্ঠিত হইলে একটি বাস্তবনৈতিক দল অল্পসংখ্যক ভোট পাইয়াও অধিক সংখ্যক প্রতিনিধি নির্বাচন করিতে সক্ষম হয়, অর্থাৎ প্রাপ্ত ভোটসংখ্যার অনুপাতে সেই দল অধিক সংখ্যক আসন দখল করিতে পাবে। ভারতে ১৯৫৬ সালের নির্বাচনে কংগ্রেসদল প্রদত্ত সমুদয় ভোটসংখ্যাব শতকরা চল্লিশটি ভোট পাইয়াও সমুদয় আসন-সংখ্যাব শতকরা প্রায় সত্তরটি আসন দখল করিতে সক্ষম হয়।

চতুর্থতঃ, এই প্রথার আর একটি মারাত্মক ত্রুটি হইল যে, ক্ষমতায় আসীন দল তাহাদের সংখ্যাগরিষ্ঠতা বজায় রাখিবার উদ্দেশ্যে ইচ্ছামত নির্বাচন-জিলাগুলির পরিবর্তন সাধন করিতে পারে।

পরিশেষে বলা যায় যে, এই ব্যবস্থায় নির্বাচিত প্রতিনিধি ক্ষুদ্র নির্বাচন-জিলা হইতে নির্বাচিত হওয়ার ফলে তাঁহারা দৃষ্টিভঙ্গি স্বভাবতঃই সংকীর্ণ হইয়া

পড়ে। এইজন্য তিনি তাঁহার প্রধান কর্তব্য অর্থাৎ দেশের বৃহত্তর স্বার্থ-সম্পর্কিত ব্যাপারে উদাসীন হইয়া পড়েন।

বহুসদস্য-সমন্বিত নির্বাচনকেন্দ্রের সুবিধা ও অসুবিধা (Advantages and Disadvantages of Multi-Member Constituencies)

এই প্রথার পক্ষে বলা হয় যে, নির্বাচন-জিলাগুলি বৃহত্তর হওয়ার ফলে ভোটদাতাগণ বিভিন্ন ধোঁগ্যতার অধিকারী বিভিন্ন প্রার্থীর মধ্য হইতে ধোঁগ্যতম প্রার্থী নির্বাচন করিবার সুধোঁগ পায়। দ্বিতীয়তঃ, এই ব্যবস্থার দ্বারা দেশের প্রচলিত বিভিন্ন মতবাদের প্রতিনিধিত্বের অধিকতর সুধোঁগ হয়।

এই প্রথার সুবিধা ও অসুবিধাগুলি তুলনামূলক বিচার করিলে অসুবিধাগুলিই অধিকতর সুস্পষ্ট হয়। প্রথমতঃ, নির্বাচন-জিলাগুলি বৃহত্তর হওয়ার ফলে সাধারণ ভোটদাতার পক্ষে প্রার্থিগণের ধোঁগ্যতা বিচার করিয়া ভোটদান করা সম্ভব নয়। দ্বিতীয়তঃ, প্রার্থিগণের পক্ষেও ভোটদাতার ব্যক্তিগত সংস্পর্শে আসিয়া তাহার মতামত জ্ঞাত হওয়া একরূপ অসম্ভব। তৃতীয়তঃ, এই ব্যবস্থা য়ে-কোন রাজনৈতিক দল আপেক্ষিক সংখ্যাগরিষ্ঠ ভোটে অধিক সংখ্যক আসন দখল করিয়া সংখ্যালঘু দলগুলিকে তাহাদের জ্ঞাত্য আসনসংখ্যা হইতে বঞ্চিত করিতে পারে। পরিশেষে বলা যায় যে, এই অবস্থা আইনসভায় বহু দল ও উপদলের সৃষ্টি হয়—ফলে একাধিক দল লইয়া মন্ত্রিসভা গঠিত হয় বলিয়া কোন মন্ত্রিসভাই স্থায়িত্ব লাভ করিতে পারে না। ইহাতে দেশের বৃহত্তর স্বার্থ ব্যাহত হয়।

উভয় প্রথার সুবিধা ও অসুবিধা বিশ্লেষণ করিয়া এই সিদ্ধান্তে উপনীত হওয়া একান্ত স্বাভাবিক যে, কোন প্রথাই এককভাবে প্রতিনিধি নির্বাচনে প্রযুক্ত হওয়া বাঞ্ছনীয় নহে। এ সম্পর্কে ডাঃ গার্গারের উক্তি প্রশিধানধোঁগ্য। তিনি বলিয়াছেন যে, প্রতিনিধি-নির্বাচনে নির্বাচন-জিলাগুলির সংগঠন উভয় প্রথার সংমিশ্রণে হওয়া উচিত। গ্রেট ব্রিটেন, মার্কিন যুক্তরাষ্ট্র, ভারত প্রভৃতি দেশে এই মিশ্র ব্যবস্থা প্রবর্তিত হইয়াছে। ভারতের নির্বাচন-জিলাগুলি প্রধানতঃ একসদস্য-সমন্বিত হইলেও তপশীলভুক্ত সম্প্রদায় ও উপজাতিগুলির

জন্ম আসন সংরক্ষণ উদ্দেশ্যে অনেকক্ষেত্রে একাধিক সদস্য-সমন্বিত নির্বাচন-জিলা গঠিত হইয়াছে।

অবৈতনিক বনাম বেতনভুক্ত প্রতিনিধিত্ব (Should Representatives be paid or not ?)

জন্ম স্টুয়ার্ট মিল অবৈতনিক প্রতিনিধিত্বের পক্ষপাতী ছিলেন। তিনি বলেন যে, আইনসভার সদস্যগণ যদি বেতনভুক্ত হন, তাহা হইলে অর্থের লোভে তাঁহারা আইনসভার সদস্য হইবার নিমিত্ত অধিকতর উৎসাহিত হইবেন। আইন-প্রণয়ন ব্যাপারে বা অন্য জনহিতকর কার্যে তাঁহাদের তাদৃশ আগ্রহ থাকিবে না। এই সামান্য অর্থের লোভে অনেক সময় দ্বিতীয় শ্রেণীর যোগ্যতাসম্পন্ন ব্যক্তিগণ আইনসভার সদস্য হইবার জন্ত সচেষ্ট হইবেন। ফলে, যোগ্যতর ব্যক্তিগণ অর্থের লোভে আইনসভার সদস্য হওয়াকে সম্মানহানিকর বলিয়া বিবেচনা করিবেন। সদস্যগণ যদি বেতনভুক্ত হন, তাহা হইলে সরকারের ব্যয় বৃদ্ধি পাইবে ও জনসাধারণের উপর করভারের চাপ বেশী পড়িবে।

বর্তমান যুগে উপরি-উক্ত মতবাদের পরিবর্তন ঘটয়াছে। প্রায় সকল দেশের আইনসভার সদস্যগণই বেতন পাইয়া থাকেন। বেতনভুক্ত প্রতিনিধিত্বের পক্ষে অনেক যুক্তি দেখান যায়। আইনসভার কার্য বর্তমানে এত ব্যাপক ও জটিল হইয়াছে যে, সদস্যদের যথাযথভাবে তাঁহাদের কর্তব্য সম্পাদন করিতে হইলে এই কার্যে অনেক সময় অতিবাহিত করিতে হয়। বাস্তব অবস্থার সহিত পরিচিত হইয়া সমস্যাগুলি সমাধানকল্পে তাঁহাদের সর্বদা স্থানান্তরে বাতায়িত করিতে হয়। সভাসমিতিতে যোগদান করিয়া জনগণের সংস্পর্শে আসিতে হয়, নতুবা বাস্তবতার সহিত তাঁহাদের পরিচয় হইতে পারে না। ইহা ছাড়া, বর্তমানে অধিক সংখ্যক সদস্য বিস্তৃতিশীল শ্রেণীর লোক-দিগের মধ্য হইতে নির্বাচিত হইয়া থাকেন। বেতন না পাইলে তাঁহাদিগের পক্ষে আইনসভার সদস্যের কর্তব্য সম্ভাবজনকভাবে সম্পাদন করা সম্ভব নয়। সরকারের কার্য পরিচালনা করিবার জন্ত শাসনবিভাগ ও বিচারবিভাগ বেতন পাইয়া থাকে। সুতরাং আইন-পরিষদের সদস্যগণ কিঞ্চিৎ বেতন পাইবেন না, তাহার কোন সম্ভব কারণ থাকিতে পারে না। অধুনা গ্রেট ব্রিটেনের লর্ড সভা ব্যতীত অন্যান্য সকল দেশের আইনসভার সদস্যগণই বেতন পাইয়া থাকেন।

প্রতিনিধিত্বের স্বরূপ (Nature of Representation)

নির্বাচিত প্রতিনিধির কর্তব্য সম্বন্ধে লেখকদের মধ্যে মতভেদ দেখা যায়। অনেকে বলেন যে, প্রতিনিধি শুধু নিষ্ক্রিয় মুখপাত্র হিসাবে তাঁহার কার্য পরিচালনা করিবেন। তিনি যে কেন্দ্র হইতে নির্বাচিত হইবেন, সেই কেন্দ্রের ভোটদাতাগণের নির্দেশ অনুসারে তাঁহার কার্য পরিচালনা করা অবশ্য-কর্তব্য। তাঁহার নিজস্ব মতামত ব্যক্ত করিবার কোন অধিকার নাই।

উপরি-উক্ত মতবাদ সমর্থনযোগ্য নয় এবং বর্তমান কালে প্রতিনিধির কর্তব্য সম্বন্ধে ধারণার আমূল পরিবর্তন সাধিত হইয়াছে। প্রতিনিধি বর্তমানে আর নিজ কেন্দ্রের নিষ্ক্রিয় মুখপাত্র বলিয়া বিবেচিত হন না, তিনি সমস্ত জাতির প্রতিনিধি বলিয়া পরিগণিত হন। এ-কথা সত্য যে, প্রতিনিধিমাাত্রই একটি নির্দিষ্ট কেন্দ্রের ভোটদাতাগণ কর্তৃক নির্বাচিত হইয়া থাকেন। নির্বাচনের সময় প্রতিনিধিকে তাঁহার নির্বাচনের উদ্দেশ্য নির্বাচকমণ্ডলীর নিকট ব্যক্ত করিয়া তাঁহাদের সমর্থন লাভ করিতে হয়। নির্বাচনের পরেও প্রয়োজনমত প্রতিনিধিকে নির্বাচকমণ্ডলীর সংস্পর্শে আসিয়া বিভিন্ন সমস্তা সম্পর্কে তাঁহাদের মতামত জ্ঞাত হইতে হয়। কিন্তু ভোটদাতাগণ বর্তমানে প্রতিনিধির ব্যক্তিত্ব অপেক্ষা তাঁহার রাজনৈতিক মতামতের উপর অধিক গুরুত্ব আরোপ করেন এবং অধিকাংশ ক্ষেত্রে প্রতিনিধির রাজনৈতিক মতামতের জ্ঞানই ভোটদাতাগণ তাঁহাকে নির্বাচিত করেন। ভোটদাতাগণ ব্যক্তিত্ব অপেক্ষা মতবিশেষের সমর্থক বলিয়া প্রতিনিধি নির্বাচন করিয়া থাকেন। প্রতিনিধি হইলেন মত বা নীতি-বিশেষের প্রতিনিধি, কোন নির্দিষ্ট কেন্দ্রের প্রতিনিধি নহেন। সুতরাং নির্দিষ্ট কেন্দ্রের ভোটদাতাগণের নির্দেশ অনুসারে কার্যপরিচালনা করিলে প্রতিনিধি যে মতের সমর্থক তাহার প্রতি বিশ্বাসঘাতকতা করা হইবে। প্রতিনিধি জাতীয় স্বার্থসংশ্লিষ্ট ব্যাপারে অধিকতর উৎসাহী এবং সাধারণ লোক অপেক্ষা অধিকতর বুদ্ধিমান ও জ্ঞানবান বলিয়া ভোটদাতাগণ কর্তৃক নির্বাচিত হইয়া থাকেন। ক্ষুদ্র ও সংকীর্ণ স্বার্থ অপেক্ষা জাতির বৃহত্তর স্বার্থসংরক্ষণ ও ইহার উৎকর্ষসাধন হইল তাঁহান্ন প্রাধান্য কর্তব্য। প্রতিনিধি জাতীয় ধনভাণ্ডার হইতেই তাঁহার বেতন পাইয়া থাকেন, তাঁহার নির্বাচনকেন্দ্র তাঁহাকে বেতন প্রদান করে না। নির্দিষ্ট কেন্দ্র হইতে নির্বাচিত হইলেও তিনি জাতীয় স্বার্থসংরক্ষণের উদ্দেশ্যে

সমগ্র জাতির প্রতিনিধি বলিয়া বিবেচিত হইয়া থাকেন। যে কার্ষকে জাতীয় বৃহত্তর স্বার্থের অনুকূল বলিয়া প্রতিনিধির বিবেকবুদ্ধি নির্দেশ দিবে, নিজ নির্বাচনকেন্দ্রের স্বার্থবিরোধী হইলেও বৃহত্তর স্বার্থপ্রণোদিত হইয়া সেই কার্য করাই প্রতিনিধির প্রধান কর্তব্য বলিয়া বর্তমানে বিবেচিত হয়। সুতরাং প্রতিনিধিকে নির্বাচনকেন্দ্রের নিজস্ব মুখপাত্র না বলিয়া জাতির প্রতিনিধি বলিয়া গণ্য করা অধিকতর সমীচীন।

একাধিক ভোটদান (Plural Voting or Weighted Voting)

অনেকক্ষেত্রে একই ব্যক্তিকে একাধিক ভোটদান করিবার ক্ষমতা দেওয়া হইয়া থাকে। একই ব্যক্তি যখন বিভিন্ন যোগ্যতার জন্ত দুই বা ততোধিক ভোট প্রদান করিতে সক্ষম হন, তখন তাহাকে একাধিক ভোটদানব্যবস্থা বলা হয়। সম্পত্তির মালিকানার ভিত্তিতে যেখানে ভোটদানের যোগ্যতা স্থির হয়, সেখানে নির্বাচক বিভিন্ন নির্বাচনকেন্দ্রে সম্পত্তির মালিক হইলে পৃথকভাবে ভোটদান করিতে পারে। ভারতের নূতন শাসনতন্ত্র অনুসারে একই ব্যক্তি বিভিন্ন যোগ্যতার মাপকাঠিতে একাধিক ভোট প্রদান করিতে পারেন। নির্দিষ্ট নির্বাচনকেন্দ্রের প্রাপ্তবয়স্ক অধিবাসী মাত্রই ভোটদান করিতে পারে। এতদ্ব্যতীত বিশ্ববিদ্যালয়ের তালিকাভুক্ত উপাধিপ্রাপ্ত ব্যক্তি হিসাবে এবং তিন বৎসর কাল অন্ততঃপক্ষে মাধ্যমিক শিক্ষালয়ে শিক্ষাকার্যে ব্রতী থাকা ব্যক্তি হিসাবেও তাহার ভোটদান-ক্ষমতা থাকে।

একাধিক ভোটদানপদ্ধতির আর একটি প্রকারভেদ দেখিতে পাওয়া যায়। এই প্রকারভেদের বিশেষত্ব হইল যে, শিক্ষিত ব্যক্তির বা সম্পত্তির মালিকের ভোটদান-ক্ষমতায় অল্প ব্যক্তি বা সম্পত্তিবিহীন ব্যক্তির ভোটদান অপেক্ষা অধিকতর গুরুত্ব আরোপ করা হয়। শিক্ষিত ও অশিক্ষিত ব্যক্তিগণের এবং সম্পত্তির মালিক ও সম্পত্তিহীন ব্যক্তিগণের মধ্যে পার্থক্য করিবার জন্তই প্রথমোক্ত শ্রেণীর লোকদিগকে একাধিক ভোটদান-ক্ষমতা দেওয়া হয়।

এই পদ্ধতির সপক্ষে বলা হয় যে, শিক্ষিত ব্যক্তির প্রতিনিধি-নির্বাচনের যোগ্যতা অশিক্ষিত ব্যক্তির যোগ্যতা অপেক্ষা অনেক বেশী, সুতরাং বৃহত্তর স্বার্থসংরক্ষণের জন্ত শিক্ষিত ব্যক্তির একাধিক ভোটদান-ক্ষমতা অতীব

প্রয়োজনীয়। দ্বিতীয়তঃ, শিক্ষিত ব্যক্তি ও সম্পত্তির মালিকের সংখ্যা অশিক্ষিত ও সম্পত্তিহীন ব্যক্তিদের সংখ্যা অপেক্ষা অনেক কম। সুতরাং শিক্ষিত ব্যক্তি ও সম্পত্তির মালিকগণের একাধিক ভোটদান-ক্ষমতা না থাকিলে, সম্পত্তিহীন ও অশিক্ষিত ব্যক্তিগণের সংখ্যাধিক্যের ভোটের দ্বারা তাঁহাদের স্বার্থ সংকুচিত হইতে পারে। তৃতীয়তঃ, যে সমস্ত ব্যক্তি তাঁহাদের বিদ্যা, বুদ্ধি ও কর্মক্ষমতার দ্বারা নানা প্রকারে জাতীয় উন্নতির সহায়তা করেন, অজ্ঞ লোক অপেক্ষা জাতীয় ব্যাপার পরিচালনায় তাঁহাদের অধিকতর অংশ গ্রহণ করিবার সুযোগ দান করা যুক্তিযুক্ত।

উপরি-উক্ত যুক্তিগুলি বিশ্লেষণ করিলে উহাদের সারবত্তা সম্বন্ধে সন্দেহের উদ্বেক হয়। অজ্ঞ ব্যক্তি ও শিক্ষিত ব্যক্তির ভোটের গুরুত্ব স্থির করিবার উপযুক্ত এমন কোন মাপকাঠি নাই যদ্বারা প্রমাণিত হয় যে, শিক্ষিত ব্যক্তির ভোট সব সময়েই অশিক্ষিত ব্যক্তির ভোট অপেক্ষা জাতীয় স্বার্থের অধিক অমূল্য হইবে। সম্পত্তির মালিকানা-ভিত্তির বিরুদ্ধে বলা যাইতে পারে যে, সম্পত্তির মালিকানা অধিকাংশ ক্ষেত্রেই উত্তরাধিকারসূত্র হইতে প্রাপ্ত, সম্পত্তির মালিকের নিজ যোগ্যতার দ্বারা অর্জিত নয়। গণতন্ত্রের মূলনীতি হইল সমানাধিকার। একাধিক ভোটদান-পদ্ধতি সমানাধিকার নীতিকে ক্ষুণ্ণ করিয়া অভিজাততন্ত্রের প্রাধান্য প্রতিষ্ঠিত করিতে সহায়তা করে। সুতরাং এই পদ্ধতি গণতন্ত্রবিরোধী ও সেই কারণে বর্জনীয়।

প্রকাশ্য অথবা গোপন ভোট (Public or Secret Voting)

ভোটদান প্রকাশ্যে সর্বসমক্ষে অমুষ্ঠিত হইবে, না গোপনে অমুষ্ঠিত হইবে এ সম্বন্ধে পূর্বে মতভেদ ছিল। প্রকাশ্য ভোটদান-পদ্ধতির সমর্থকগণের মতে ভোটদান করা নাগরিকগণের একটি অবশ্যপালনীয় কর্তব্য এবং এই কর্তব্য নির্ভীকভাবে সর্বসমক্ষে পালন করা উচিত। ইহাতে ভোটদাতার স্বাধীন-ভাবে কাজ করিবার প্রবৃত্তি বৃদ্ধি করে। ভোটদাতা অপরের প্রশংসা বা নিন্দা উপেক্ষা করিয়া তাহার সংসাহসের পরিচয় দিতে পারে।

প্রকাশ্যে ভোটদান করা সংসাহসের পরিচায়ক হইলেও বাস্তবক্ষেত্রে এই পদ্ধতি ভোটদাতার পক্ষে বা সমাজের পক্ষে হিতকর নয়। অধিকাংশ ক্ষেত্রে দেখা যায় যে, সাধারণ ভোটদাতা অপেক্ষা নির্বাচনপ্রার্থী উচ্চস্তরের,

ব্যক্তি। নির্বাচনপ্রার্থী নানা প্রকারে ভোটদাতাগণকে প্রভাবিত করিতে চেষ্টা করে। বর্তমানে রাজনৈতিক দলের ভিত্তিতে নির্বাচনকার্য পরিচালিত হয়। সেইজন্য নির্বাচনপ্রার্থীর পশ্চাতে শক্তিশালী রাজনৈতিক দলের সক্রিয় সমর্থন থাকে। এরূপ অবস্থায় প্রকাশ্য ভোটদান-পদ্ধতি প্রবর্তিত হইলে ভোটদাতার নানাভাবে বিব্রত ও উৎপীড়িত হইবার সম্ভাবনা থাকে। স্বাধীন ও নির্ভীকভাবে ভোটদান করা ভোটদাতার পক্ষে কখনই সম্ভব হয় না। অনেক সময় বিবেকবুদ্ধি বিসর্জন দিয়া শুধু আত্মরক্ষার জন্তই ভোটদাতাকে ভোট দিতে বাধ্য হইতে হয়। স্ততরাং ভোটদাতা বাহাতে নিজের বিবেকবুদ্ধি দ্বারা পরিচালিত হইয়া স্বাধীনভাবে তাহার প্রতিনিধি নির্বাচন করিতে পারে, সেজন্য গোপন ভোটদান-ব্যবস্থা অপরিহার্য। ব্যক্তি-বিশেষ বা দলবিশেষকে ভোট দিয়া ভোটদাতার যদি নিগ্রহ ভোগ করিতে হয়, তাহা হইলে তাহার পক্ষে ভোটদান-ক্ষমতা বিড়ম্বনা মাত্র। রাষ্ট্র যদি ভোটদাতাকে উৎপীড়নের সম্ভাবনা হইতে রক্ষা করিতে না পারে, তাহা হইলে প্রকাশ্য ভোটদান-ব্যবস্থা কার্যকর করা সম্ভব নয়। প্রকাশ্যে ভোট-ব্যবহার এই অসুবিধার জন্য বর্তমানে গোপন ভোট-ব্যবস্থা সর্বত্র প্রচলিত হইয়াছে।

সংখ্যালঘিষ্ঠের নির্বাচনসমস্যা (Problem of Minority Representation)

রাজনৈতিক দলের ভিত্তিতেই বর্তমানে প্রতিনিধি-নির্বাচন হইয়া থাকে। সংখ্যাগরিষ্ঠ রাজনৈতিক দলই সাধারণতঃ নির্বাচনে অধিক সংখ্যক ভোট পাইয়া আইনসভার সংখ্যাগরিষ্ঠ দল বলিয়া গণ্য হয়। এই দলই মন্ত্রিসভা গঠন করিয়া শাসনকার্য পরিচালনা করে। সংখ্যালঘু দল তাহাদের সংখ্যার অল্পপাতে প্রতিনিধি নির্বাচন করিতে পারে না, ফলে, সংখ্যালঘুদের স্বার্থ প্রতাপদেই ক্ষুণ্ণ হইবার সম্ভাবনা। যে দল সংখ্যাগরিষ্ঠ, তাহারা শাসনকার্য পরিচালনা করিবে—ইহা স্বীকার করিয়া লইলেও সংখ্যালঘিষ্ঠের স্বার্থ বাহাতে উপেক্ষিত না হয়, সেইজন্য আইনসভায় তাহাদের সংখ্যাভূমিতে প্রতিনিধি থাকা একান্ত আবশ্যিক। ইহা ছাড়া, যে দল আজ সংখ্যালঘিষ্ঠ বলিয়া পরিচিত তাহারা ভবিষ্যতে যে সংখ্যাগরিষ্ঠ দলে পরিণত হইতে

পারিবে না তাহা স্থানান্তরিতভাবে বলা যায় না। সুতরাং আইনসভার সংখ্যালঘুদের প্রতিনিধিত্বের দাবী উপেক্ষণীয় নয়। গণতান্ত্রিক আদর্শ অনুসারে প্রত্যেক আইনসভাই দেশের বিভিন্ন শ্রেণীর মতের প্রতিনিধিমূলক হওয়া বাঞ্ছনীয়। জন স্ট্রাট মিলের মতে সংখ্যালঘু দলের আইনসভায় উপযুক্ত সংখ্যক প্রতিনিধি প্রেরণ করা গণতন্ত্রের একটা প্রধান উপাদান। সংখ্যালঘু দল যদি আইনসভায় প্রতিনিধি নির্বাচন করিতে না পারে, তাহা হইলে প্রকৃত গণতান্ত্রিক শাসনব্যবস্থা প্রবর্তিত হইতে পারে না। নির্বাচনে এমনও হইতে পারে যে, সংখ্যালঘু দল শতকরা ৪২টি ভোট পাইয়া একটি আসনও দখল করিতে পারিল না, আর শতকরা ৫১টি ভোট পাইয়া সংখ্যাগরিষ্ঠ দল সকল আসনগুলিই দখল করিল। এইরূপ নির্বাচনব্যবস্থার ফলে শতকরা ৪২টি ভোটের অধিকারী দল একটিও আসন না পাইলে এ-জাতীয় নির্বাচনব্যবস্থাকে গণতন্ত্রসম্মত ব্যবস্থা বলা যাইতে পারে না। মিলের মতে সংখ্যালঘু দলের আইনসভায় শুধুমাত্র কয়েকটি প্রতিনিধি প্রেরণ করিলে যথেষ্ট হইবে, তাহা নয়। প্রত্যেক সংখ্যালঘু দল যাহাতে তাহার সংখ্যার অনুপাতে প্রতিনিধি নির্বাচন করিতে পারে সেইজ্ঞান অনুসারে নির্বাচকমণ্ডলীর পুনর্গঠন করা উচিত। উদাহরণস্বরূপ বলা যাইতে পারে যে, নির্বাচকমণ্ডলীর দুই-তৃতীয়াংশ সংখ্যা যদি দল-বিশেষের পক্ষে ভোট দেয় এবং এক-তৃতীয়াংশ সংখ্যা যদি অন্য দলের পক্ষে ভোট দেয় তাহা হইলে সংখ্যাগুরু দল আইনসভার দুই-তৃতীয়াংশ আসন দখল করিতে পারিবে এবং সংখ্যালঘু দল এক-তৃতীয়াংশ আসন দখলের অধিকারী হইবে। প্রতিনিধিমূলক গণতন্ত্রে সংখ্যাগুরু দলই সর্বত্র শাসনকার্য পরিচালনা করিয়া থাকে, কিন্তু তাই বলিয়া শাসনব্যবস্থায় সংখ্যালঘু দলের যে কোন প্রকার ক্ষমতা থাকিবে না, এরূপ ব্যবস্থা কখনই গণতন্ত্রসম্মত ব্যবস্থা বলিয়া পরিগণিত হইতে পারে না। সুতরাং প্রত্যেক সংখ্যালঘু দলের আনুপাতিক প্রতিনিধিত্বের ব্যবস্থা করা গণতন্ত্রের অবিচ্ছেদ্য অংশ।

সংখ্যালঘু দল যাহাতে তাহাদের সংখ্যানুপাতে আইনসভায় প্রতিনিধি প্রেরণ করিতে পারে, সেজ্ঞান নানারূপ পদ্ধতি অবলম্বন করা হইয়াছে। নিম্নে সেগুলির বিবরণ দেওয়া হইল।

সংখ্যালঘুদের প্রতিনিধিত্ব-প্রণালী—Methods of Minority Representation

একক হস্তান্তরযোগ্য ভোটে আনুপাতিক নির্বাচন—Proportional Representation by single Transferable Vote (Hare Scheme)

এই নির্বাচন-পদ্ধতি অনুসারে সমগ্র দেশটিকে নির্বাচন উদ্দেশ্যে কতকগুলি বৃহৎ অঞ্চলে ভাগ করিয়া এক একটি অঞ্চল হইতে একাধিক প্রতিনিধি নির্বাচনের ব্যবস্থা করা হয়। প্রত্যেক নির্বাচনপ্রার্থী একটি নির্দিষ্ট সংখ্যক ভোট পাইলেই নির্বাচিত বলিয়া পরিগণিত হইয়া থাকেন। এই নির্দিষ্ট সংখ্যক ভোটকে Electoral quota বলা হয়। প্রত্যেক নির্বাচনক্ষেত্রে ষত সংখ্যক বৈধ ভোট গণনা কর হয়, সেই সংখ্যাকে সেই কেন্দ্রের আসন-সংখ্যার দ্বারা ভাগ করিলে ভাগফল যাহা হয়, তাহাই হইবে নির্দিষ্ট সংখ্যক ভোট বা quota. এই ব্যবস্থায় প্রত্যেক ভোটদাতাকে নির্বাচনপ্রার্থীগণের নামের একটি তালিকা দেওয়া হয় এবং ভোটদাতা একটির অধিক ভোট প্রদান করিতে পারেন না। এই তালিকায় ভোটদাতা যে প্রার্থীকে সর্বাপেক্ষা অধিক যোগ্য মনে করেন তাহার নামের পাশে ‘১’ লিখিয়া দেন। ভোটদাতা তাঁহার পছন্দমত অন্য প্রার্থীগণের নামের পাশে যোগ্যতা অনুসারে যথাক্রমে ২, ৩, ৪, ৫ লিখিয়া দিতে পারেন। এই সংখ্যাগুলি হইল ভোটদাতার পছন্দের পরিমাপক।

ভোট-গণনার সময় যে সমস্ত প্রার্থী ভোটদাতাগণের প্রথম পছন্দ অনুসারে পূর্বোক্ত নির্দিষ্ট সংখ্যক ভোট বা quota-র সমান ভোট পাইয়াছেন, তাঁহাদিগকে নির্বাচিত বলিয়া ঘোষণা করা হয়। যদি কোন নির্বাচন-প্রার্থী নির্দিষ্ট সংখ্যক ভোট অপেক্ষা অধিক ভোট পাইয়া থাকেন, তাহা হইলে এই নির্বাচিত প্রার্থীর অতিরিক্ত ভোট তাহার পরবর্তী দ্বিতীয় পছন্দ-প্রাপ্ত প্রার্থীদের হস্তান্তরিত করা হয়। অতঃপর তাঁহাদের ভোট গণনা করা হয়। দ্বিতীয় পছন্দ-প্রাপ্ত প্রার্থীদের মধ্যে যাহারা নির্দিষ্ট সংখ্যক ভোট পাইবেন, তাঁহাদিগকেও নির্বাচিত বলিয়া ঘোষণা করা হয় এবং তাঁহাদের অতিরিক্ত

ভোটগুলি তৃতীয় পছন্দ-প্রাপ্ত প্রার্থীদের মধ্যে হস্তান্তরিত হয়। এইরূপে সকল আসন পূর্ণ না হওয়া পর্যন্ত গণনা কার্য চলিতে থাকে।

এই পদ্ধতি বাহাতে ক্রটিবিহীন হয় সেইজন্য অনেক সময় quota ('কোটা') স্থির করিবার জন্য আসনসংখ্যার সহিত এক (১) যোগ করিয়া সেই সংখ্যা দ্বারা নির্বাচন-কেন্দ্রের সমগ্র বৈধ ভোটসংখ্যাকে ভাগ করা হয় এবং ভাগফলের সহিত এক (১) যোগ করা হয়। প্রণালীটি নিম্নে দেওয়া হইল :

$$\frac{\text{বৈধ ভোটসংখ্যা}}{\text{আসনসংখ্যা}} + ১ = \text{নির্দিষ্ট সংখ্যক ভোট বা quota.}$$

এই পদ্ধতির সুবিধা হইল যে, সংখ্যাহুপাতে প্রত্যেকটি সংখ্যালঘু দল আইনসভায় তাহাদের প্রতিনিধি নির্বাচন করিতে পারে। সাধারণ নির্বাচন-পদ্ধতিতে কোন প্রার্থী উপযুক্ত সংখ্যক ভোট না পাইলে ভোটদাতাদের ভোটটি কার্যকর হয় না। কিন্তু এই পদ্ধতিতে ভোটদাতার একটি ভোট অন্ততঃ কার্যকর হইবেই। ভোটদাতার প্রথম পছন্দ কার্যকর না হইলে দ্বিতীয় পছন্দ, না হইলে তৃতীয়—এইরূপে তাহার একটি পছন্দে একজন প্রার্থী নিশ্চয়ই নির্বাচিত হইবে। এই পদ্ধতির আরও একটি বিশেষ গুণ হইল যে, উহা যোগ্যতর ব্যক্তির নির্বাচন সম্ভব করিয়া আইনসভার মর্যাদা ও কার্যকারিতা বৃদ্ধি করে।

কিন্তু পদ্ধতিটি অতিশয় জটিলতাপূর্ণ ও ভোটগণনা করিতে দীর্ঘ সময় অতিবাহিত হয়। ইহা ব্যয়সাপেক্ষ ও সাধারণ ভোটদাতাগণ ইহার প্রয়োগ সম্বন্ধে সম্পূর্ণ অজ্ঞ।

তালিকা-প্রথায় আনুপাতিক নির্বাচন (Proportional Representation by the List System)

তালিকা-প্রথা আনুপাতিক নির্বাচন-পদ্ধতির একটি প্রকারভেদ বলিয়া গণ্য হয়। একক হস্তান্তরযোগ্য ভোট-পদ্ধতির ন্যায় তালিকা-প্রথায়ও মোট প্রদত্ত বৈধ ভোটসংখ্যাকে নির্দিষ্ট আসনসংখ্যা দ্বারা ভাগ করিলে যে ভাগফল হইবে উহাকে quota ('কোটা') বা নির্বাচনের উপযুক্ত ভোটসংখ্যা বলা হয়। এই প্রথায় প্রত্যেকটি রাজনৈতিক দল ইহার মনোনীত নির্বাচনপ্রার্থীদের একটি তালিকা প্রত্যেক ভোটদাতাকে প্রদান

করে। তালিকায় প্রদত্ত প্রার্থীসংখ্যা নির্বাচন-কেন্দ্রের আসনসংখ্যার সমান হওয়া চাই। সেই কেন্দ্রে যতগুলি আসন পূরণ করিতে হইবে, ভোটদাতাগণ প্রত্যেকে সেই সংখ্যক ভোট প্রদান করিতে পারিবে। কিন্তু এই পদ্ধতির বিশেষত্ব হইল যে, ভোটদাতাকে প্রার্থী-হিসাবে ভোট না দিয়া তালিকা-হিসাবে ভোট দিতে হয়। ভোটদাতা যে-কোন একটি তালিকাকে তাহার সমগ্র ভোট প্রদান করিবে। প্রত্যেক তালিকার উপর প্রদত্ত মোট ভোট-সংখ্যাকে ‘কোটা’ দিয়া ভাগ করিলে যে ভোটসংখ্যা পাওয়া যাইবে, সেই সংখ্যক প্রতিনিধি-সংশ্লিষ্ট তালিকা হইতে নির্বাচিত বলিয়া বিবেচনা করা হইবে। উদাহরণস্বরূপ বলা যাইতে পারে যে, একটি নির্বাচন-কেন্দ্রে চারিটি আসন পূরণ করিতে হইবে এবং এই কেন্দ্রে প্রদত্ত মোট ভোটসংখ্যা হইল ৪,০০০ হাজার। তাহা হইলে $৪,০০০ \div ৪$ অর্থাৎ ১,০০০ সংখ্যা ‘কোটা’ বলিয়া স্থির হইবে ও প্রত্যেক নির্বাচনপ্রার্থী দলের তালিকায় অন্ততঃপক্ষে ‘কোটা’ সংখ্যক ভোট পড়িলে সেই তালিকা হইতে একজন প্রার্থী নির্বাচিত হইতে পারিবে। ভোটদানের পর দেখা গেল যে, ‘ক’ দল মোট ভোটসংখ্যার মধ্যে দুই হাজার ভোট পাইয়াছে এবং ‘খ’ ও ‘গ’ দল যথাক্রমে এক হাজার করিয়া ভোট পাইয়াছে। প্রত্যেক দল কর্তৃক প্রাপ্ত ভোটসংখ্যাকে ‘কোটা’ দ্বারা ভাগ করিলে যে সংখ্যা দাড়াইবে, সেই সংখ্যক আসন তিনটি দলের মধ্যে বণ্টন করা হইবে অর্থাৎ ‘ক’ দল দুইটি আসন এবং ‘খ’ ও ‘গ’ দল যথাক্রমে একটি আসন লাভ করিবে।

এই পদ্ধতিতে প্রত্যেকটি রাজনৈতিক দলের অস্তিত্ব স্বীকৃত হয় ও প্রত্যেকটি দল সংখ্যানুপাতে প্রতিনিধি-নির্বাচনে স্বেযোগ পায়। একক হস্তান্তরযোগ্য ভোট-পদ্ধতির মত ইহা জটিল বা ব্যয়সাপেক্ষ নয়। কিন্তু এই পদ্ধতিতে রাজনৈতিক দলগুলির প্রভাব বৃদ্ধি পাইয়া নির্বাচনপ্রার্থীর যোগ্যতাকে ক্ষুণ্ণ করে।

সীমাবদ্ধ ভোট (Limited Vote System)

সংখ্যালঘুদের প্রতিনিধি-নির্বাচনের আর একটি উপায় হইল সীমাবদ্ধ ভোটপদ্ধতি। এই পদ্ধতি অনুসারে একটি নির্বাচন-কেন্দ্রে হইতে একাধিক প্রতিনিধি নির্বাচিত হইতে পারে। যদি কোন নির্বাচন-কেন্দ্রে ছয়টি আসন

পূরণ করিতে হয়, তাহা হইলে নির্দেশ দেওয়া হয় যে, কোন ভোটদাতাই চারিটির অধিক ভোট দিতে পারিবে না। এক্ষেত্রে সংখ্যাগরিষ্ঠ দল কোন-মতেই চারিটির অধিক আসন দখল করিতে পারে না। অবশিষ্ট দুইটি আসন সংখ্যালঘু দল পাইতে পারে।

এই পদ্ধতিতে সংখ্যালঘু দল কিছুসংখ্যক আসন পাইলেও তাহাদের সংখ্যালুপাতে যে প্রতিনিধি নির্বাচনে সক্ষম হইতে পারিবে, তাহার কোন নিশ্চয়তা নাই। ক্ষুদ্র ক্ষুদ্র দলগুলি হয়ত আদৌ কোন আসন দখল নাও করিতে পারে।

স্থূপীকারী বা একত্রিত ভোট (Cumulative Vote)

সংখ্যালঘুদের প্রতিনিধি নির্বাচনের আর একটি উপায় হইল স্থূপীকারী ভোটপদ্ধতি। এই ব্যবস্থায় ভোটদাতাগণ নির্বাচন কেন্দ্রের আসনসংখ্যার সমসংখ্যক ভোটদান করিতে পারেন। কিন্তু ভোটগুলি বিভিন্ন প্রার্থীদের মধ্যে ভাগ না করিয়া ভোটদাতা ইচ্ছা করিলে একজন প্রার্থী বা দুইজন প্রার্থীর মধ্যে ভাগ করিয়া দিতে পারেন। পরা যাউক, কোন নির্বাচন-কেন্দ্রের পাঁচটি আসন পূরণ করিবার জন্ত ভোটদাতার পাঁচটি ভোট আছে। এক্ষেত্রে ভোটদাতা পাঁচজন পৃথক্ প্রার্থীকে একটি করিয়া ভোট দিতে পারেন, অথবা পাঁচটি ভোট একজন প্রার্থীকে দিতে পারেন, কিংবা একজনকে তিনটি ও অপর একজনকে দুইটি ভোট দিতে পারেন। এইরূপে একটি সংখ্যালঘু দল তাহাদের সমুদয় ভোট একজন প্রার্থীকে দিয়া তাহাকে নির্বাচিত করিবার সুযোগ পায়।

এই পদ্ধতিতে বিভিন্ন দল প্রতিনিধি নির্বাচন করিবার সুযোগ পায় বটে কিন্তু সংখ্যালুপাতে প্রতিনিধি নির্বাচন করিতে পারে না। এই ব্যবস্থায় অনেক ভোট নষ্ট হয়। একজন জনপ্রিয় প্রার্থী তাহার প্রয়োজনের অতিরিক্ত বিপুল সংখ্যক ভোট পাইতে পারেন, অপরপক্ষে অপেক্ষাকৃত কম জনপ্রিয় প্রার্থী অল্পসংখ্যক ভোট পাইতে পারেন।

দ্বিতীয়বার ভোট গ্রহণ (Second Ballot System)

নির্বাচনপ্রার্থী শাহাতে নিরঙ্কুশ সংখ্যাধিক্যের ভোটে নির্বাচিত হইতে

পারেন সেজন্য অনেক ক্ষেত্রে দ্বিতীয়বার নির্বাচন অত্যাশঙ্কিত হইতে পারে। কোন নির্বাচন-ক্ষেত্রে একটিমাত্র আসনের জন্য যখন দুইটির অধিক প্রার্থী প্রতিযোগিতা করেন, তখন ইহাদের মধ্যে যে প্রার্থী সর্বাপেক্ষা অধিক সংখ্যক ভোট পান তাঁহাকে নির্বাচিত বলিয়া ঘোষণা করা হয়। সর্বাপেক্ষা অধিক সংখ্যক ভোট পাইলেও এই প্রার্থী নিরঙ্কুশ সংখ্যাধিক্যের দ্বারা নির্বাচিত নাও হইতে পারেন। ধরা যাউক, কোন নির্বাচন-ক্ষেত্রে বার হাজার ভোট প্রদত্ত হইয়াছে। এই বার হাজার ভোট তিনজন নির্বাচন-প্রার্থীর মধ্যে পাঁচ হাজার, চার হাজার ও তিন হাজার করিয়া ভাগ হইয়াছে। এরূপ ক্ষেত্রে পাঁচ হাজার ভোটপ্রাপ্ত প্রার্থী আপেক্ষিক সংখ্যাগরিষ্ঠ ভোটে নির্বাচিত হইয়া থাকেন। নিরঙ্কুশ সংখ্যাগরিষ্ঠের দ্বারা নির্বাচন করিবার জন্য যে প্রার্থী সর্বাপেক্ষা কম ভোট পাইয়াছেন তাঁহাকে প্রার্থীপদ হইতে অপসারিত করিয়া অধিক সংখ্যক ভোটপ্রাপ্ত দুইজন প্রার্থীর পক্ষে পুনরায় ভোট গ্রহণ করা হয়। দ্বিতীয়বার দুইজন প্রার্থী থাকায় একজন নিরঙ্কুশ সংখ্যাধিক্যের ভোটে নির্বাচিত হইতে পারেন।

এই ব্যবস্থায় নির্বাচনে বিলম্ব ঘটে ও প্রাধিকণেরও নির্বাচনের ব্যয় বৃদ্ধি পায়।

আনুপাতিক নির্বাচনের পক্ষে ও বিপক্ষে যুক্তি—Arguments for and against Proportional Representation

আনুপাতিক নির্বাচনের পক্ষে ও বিপক্ষে বহু যুক্তির অবতারণা করা যাইতে পারে। প্রথমতঃ, এই ব্যবস্থার দ্বারা প্রত্যেক দলই ইহার সংখ্যানু-পাতে আইনসভায় প্রতিনিধি নির্বাচন করিতে পারে। দ্বিতীয়তঃ, যখন দেশের বিভিন্ন মতাবলম্বী বিভিন্ন দল আইনসভায় প্রতিনিধি প্রেরণ করিতে পারে, তখন আইনসভা সার্থকরূপে জনমত প্রতিফলিত করিতে সক্ষম হয়। তৃতীয়তঃ, এই ব্যবস্থায় সংখ্যালঘু সম্প্রদায়গুলি সন্তুষ্ট থাকে এবং সর্বদলের প্রতিনিধি লইয়া গঠিত সরকারকে প্রকৃত জনগণ দ্বারা পরিচালিত সরকার বলা যায়। চতুর্থতঃ, হেয়ার উদ্ভাবিত পদ্ধতি অনুসারে নির্বাচন ব্যবস্থায় প্রত্যেক ভোটদাতা জানে যে, তাহার একটি ভোট নিশ্চিতরূপে সার্থক হইবে। এইজন্য ভোটদাতার আত্মপ্রত্যয় জন্মে এবং তাহার রাজনৈতিক

চেতনা বৃদ্ধি পাইয়া সাধারণ ব্যাপারে তাহার উৎসাহ জন্মে। *পরিশেষে বলা যায় যে, এই ব্যবস্থার দ্বারা যোগ্যতার নির্বাচন সম্ভব হয়। ফলে আইন-সভার মর্যাদা ও কার্যকারিতা বৃদ্ধি পায়।

কিন্তু কার্ষক্ষেত্রে আত্মপাতিক নির্বাচন-পদ্ধতির কার্যকারিতা *সম্বন্ধে সন্দেহের উদ্রেক হয়। পদ্ধতিটি ব্যয়বহুল ও সাধারণ ভোটদাতাগণ ইহার প্রয়োগ-পদ্ধতি সম্বন্ধে অবহিত নহে। এই পদ্ধতির বিশেষ ত্রুটি হইল যে, ইহা ক্ষুদ্র ক্ষুদ্র দল ও উপদল সৃষ্টি করিয়া আইনসভার সংহতি বিনষ্ট করে। ফলে জাতীয় স্বার্থের পরিপ্রেক্ষিতে জাতীয় দৃষ্টিভঙ্গী লইয়া কোন সমস্যার সমাধান করা সম্ভব নয়। বিভিন্ন স্বার্থের সংঘাতে আইন-প্রণয়ন কার্য বাধা পায়। বিভিন্ন দলের মধ্যে ঐক্যের অভাবে সরকার দুর্বল হয় এবং এই দুর্বলতার ফলে শাসনব্যবস্থায় নানাপ্রকার দুর্নীতি আশ্রয় পায়।

বিভিন্ন দেশে সংখ্যালঘু সম্প্রদায়ের অধিকাররক্ষার উপায় (Methods of Protection of the Rights of Minorities in different Countries)

আধুনিক অনেক দেশেই বিভিন্ন সংখ্যালঘু সম্প্রদায় দেখা যায়। আদর্শ গণতান্ত্রিক ব্যবস্থায় সংখ্যালঘু সম্প্রদায় ও সংখ্যাগুরু সম্প্রদায় সমান অধিকার ভোগ করিয়া থাকে। সংখ্যালঘু সম্প্রদায়ের অধিকারগুলি যাহাতে ব্যাহত না হয়, সেজন্য লিখিত বা অলিখিত আইন বা অন্ত নানা উপায়ে সংখ্যালঘু সম্প্রদায়ের অধিকারগুলি সুরক্ষিত করা হয়।

ইংলণ্ড—ইংলণ্ডে সংখ্যালঘু সমস্যা একপ্রকার নাই বলিলেও চলে। ইংলণ্ডে বসবাসকারী সকল সম্প্রদায়ই রাজনৈতিক চেতনাসম্পন্ন এবং এক গভীর জাতীয়তাবোধে উদ্ভূত। দেশের নিরাপত্তা ও স্বাধীনতা রক্ষা-কল্পে তাহারা সংকীর্ণ সাম্প্রদায়িক স্বার্থ উপেক্ষা করিতে পারে। ইংলণ্ডে ব্যক্তি ও সম্প্রদায়-নির্বিশেষে সকল নাগরিকের অধিকার ম্যাগ্না কার্টা, অধিকারের সনদ, অধিকারের আবেদন, হেবিয়াস কর্পাস অ্যাক্ট প্রভৃতি শাসনতান্ত্রিক

আইনের দ্বারা সুরক্ষিত। এতদ্ব্যতীত স্বাধীন ও পক্ষপাতহীন বিচারব্যবস্থা জনগণের অধিকাররক্ষার প্রধান উপায় বলিয়া পরিগণিত হয়।

মার্কিন যুক্তরাষ্ট্র—মার্কিন যুক্তরাষ্ট্রে সকল সম্প্রদায়ের লোক সমান অধিকার ভোগ করে এবং এই অধিকার মানবিক অধিকার ঘোষণার (Declaration of Rights of Man) দ্বারা সংরক্ষিত হইয়াছে। যুক্তরাষ্ট্রীয় বিচারালয় সূপ্রীম কোর্ট ইহার সিদ্ধান্ত দ্বারা ব্যক্তিস্বাধীনতা রক্ষা করে। সংখ্যালঘু সম্প্রদায়ের অধিকার সম্পর্কে এই বিচারালয় কতকগুলি বিশেষ নীতি নির্ধারণ করিয়া তাহাদের অধিকার অক্ষুণ্ণ রাখিতে সাহায্য করিয়াছে।

সোভিয়েত যুক্তরাষ্ট্র—সোভিয়েত যুক্তরাষ্ট্রে বিভিন্ন ভাষা-ভাষী ও বিভিন্ন ধর্মাবলম্বী বহু জাতি বাস করে। এই বিভিন্ন সম্প্রদায়ের ভাষাগত, কৃষ্টিগত ও ধর্মীয় অধিকারগুলি রক্ষা করিবার উদ্দেশ্যে স্ব-শাসিত প্রজাতন্ত্র (Autonomous Republic), স্ব-শাসিত অঞ্চল (Autonomous Region) ও জাতীয় এলাকা (National Areas) সৃষ্টি করা হইয়াছে। ক্ষুদ্র-বৃহৎ সংখ্যালঘু সম্প্রদায়গুলি এই স্থানীয় শাসনব্যবস্থার সাহায্যে তাহাদের জাতীয় বৈশিষ্ট্যগুলি বজায় রাখিতে পারে। আভ্যন্তরীণ ব্যাপারে এই সংস্থাগুলি সম্পূর্ণ স্বাধীন। ইহারা নিজস্ব ভাষায় ইহাদের শাসনকার্য পরিচালনা করে। সাম্যের ভিত্তিতে প্রত্যেকটি স্ব-শাসিত প্রজাতন্ত্র, প্রত্যেকটি অঞ্চল ও প্রত্যেকটি জাতীয় এলাকা সূপ্রীম সোভিয়েতে যথাক্রমে ১১, ৫ ও ১ জন প্রতিনিধি নির্বাচন করিতে পারে। জাতি-বর্ণ ও স্ত্রী-পুরুষ-নির্বিশেষে সকল নাগরিকের সর্ববিষয়ে সমান অধিকার শাসনতন্ত্র কর্তৃক স্বীকৃত হইয়াছে। কাজ করিবার, বিশ্রাম করিবার, শিক্ষা ও ধর্মমতঙ্গীয় অধিকার সকল সম্প্রদায়ের লোক ভোগ করে।

ভারত—ভারতে সংখ্যালঘু সম্প্রদায়গুলির অধিকারসমূহ শাসনতন্ত্রে বর্ণিত মৌলিক অধিকার দ্বারা সংরক্ষিত করা হইয়াছে। সংখ্যালঘু সম্প্রদায়-গুলির ভাষা, সাহিত্য, ধর্ম প্রভৃতি এই মৌলিক অধিকার পরীক্ষিত করা হইয়াছে। যদি কোন কারণে এই মৌলিক অধিকারগুলি ক্ষুণ্ণ হয়, তাহা হইলে নাগরিকগণ শাসনতান্ত্রিক উপায়ে উহার প্রতিবিধান করিতে পারে।

সুপ্রীম কোর্ট ও উচ্চ বিচারালয়গুলি মৌলিক অধিকারসমূহ রক্ষা করে। ইহা ব্যতীত সংখ্যালঘু সম্প্রদায় হইতে প্রতিনিধি মনোনীত করিবার বিশেষ ক্ষমতা রাষ্ট্রপতির হস্তে ন্যস্ত হইয়াছে।

আঞ্চলিক প্রতিনিধিত্ব বনাম বৃত্তিগত প্রতিনিধিত্ব (Territorial Vs. Occupational or Functional or Vocational Representation)

প্রতিনিধিগণ সাধারণতঃ, আঞ্চলিক ভিত্তিতেই নির্বাচিত হইয়া থাকেন। সমগ্র দেশটিকে কতকগুলি নির্বাচন-অঞ্চলে বিভক্ত করিয়া প্রত্যেক অঞ্চল হইতে এক বা একাধিক প্রতিনিধি নির্বাচন করা হয়। প্রত্যেকটি অঞ্চলের সমগ্র অধিবাসীবৃন্দ জাতি, বর্ণ ও বৃত্তি-নির্বিশেষে প্রতিনিধি-নির্বাচনে ভোট প্রদান করে। পশ্চিমবঙ্গের আইনসভার একজন প্রতিনিধি পশ্চিমবঙ্গের একটি জিলা বা মহকুমার সমস্ত ভোটদাতা কর্তৃক প্রদত্ত ভোটে আইনসভার সদস্য নির্বাচিত হন। উক্ত জিলায় বা মহকুমায় শিক্ষক, উকিল, ডাক্তার, তাঁতি, কর্মকার, রেলকর্মী প্রভৃতি নানা পেশার লোকের বাস থাকিলেও এই সকল বিভিন্ন পেশার লোক ভোটদাতা হিসাবে একত্রে ভোটদান করিয়া তাহাদের পছন্দমত যে-কোন বৃত্তির লোককে প্রতিনিধি-নির্বাচন করিতে পারে। এই ব্যবস্থামত একজন ডাক্তার তাহার নিজ অঞ্চলের অন্তর্ভুক্ত সমস্ত পেশার অগ্রাণু লোকদের প্রতিনিধিত্ব করিতে পারে। মাহুষ যখন একই অঞ্চলের অধিবাসী হয় তখন তাহার সমস্বার্থসম্পন্ন হয়। সুতরাং একজন ডাক্তার বৃত্তিগত পার্থক্য থাকা সত্ত্বেও সেই অঞ্চলের অগ্রাণু অধিবাসীদের—তাঁতি, কর্মকার, স্বত্বধর, শিক্ষক, রেলকর্মী, উকিল প্রভৃতির—প্রতিনিধিত্ব করিতে পারে। আঞ্চলিক প্রতিনিধিত্বের মূল কথা হইল যে, মাহুষের রাজনৈতিক মতামত তাহার আঞ্চলিক স্বার্থদ্বারা যতটা প্রভাবিত হয় অল্প কিছু দ্বারা ততটা প্রভাবিত হয় না। সুতরাং আঞ্চলিক ভিত্তির মধ্য দিয়াই তাহাকে তাহার রাজনৈতিক মতামত প্রকাশের সুযোগ দেওয়া উচিত।

এই ব্যবস্থার বিরুদ্ধবাদিগণ দাবী করেন যে, আঞ্চলিক নির্বাচন-কেন্দ্রের সাহায্যে যে নির্বাচন অমুষ্ঠিত হয়, তাহা দ্বারা জনগণের প্রকৃত প্রতিনিধি

নির্বাচিত হইতে পারে না। একই অঞ্চলের অধিবাসী হইলে যে সকল অধিবাসীই সমস্বার্থসম্পন্ন হইবে তাহার কোন নিশ্চয়তা নাই। একজন ডাক্তারের প্রতিবেশী হইলে একজন কর্মকার যে ডাক্তারের সমস্বার্থসম্পন্ন হইবে তাহা অনিশ্চিতরূপে বলা যায় না। শ্রমিক ও মালিক, জমিদার ও প্রজা, কোন কার্খানায়ের বড়কর্তা ও চাপরাসী একই অঞ্চলের অধিবাসী হইলেও তাহাদের সমস্বার্থসম্পন্ন বলা দূরে থাকুক বিরুদ্ধস্বার্থসম্পন্ন বলিলেও বোধ হয় অভ্যুক্তি হয় না। বর্তমানে জীবনসংগ্রামের তীব্রতা বৃদ্ধির ফলে মানুষের রাজনৈতিক মতামত তাহার জীবিকা অর্জনের বৃত্তিদ্বারা অধিক পরিমাণে স্থিরীকৃত হয়। সুতরাং বৃত্তিগত নির্বাচন-কেন্দ্রের মধ্য দিয়াই তাহার রাজনৈতিক মতামত প্রকাশের সুযোগ দেওয়া উচিত। একজন ডাক্তার ও একজন কর্মকারের স্বার্থের মধ্যে এত পার্থক্য পরিদৃষ্ট হয় যে, একজন ডাক্তার একজন কর্মকারের প্রতিবেশী হইলেও কর্মকারের প্রতিনিধিত্ব করিতে সক্ষম নয়। ডাক্তার ও কর্মকারের জীবনযাত্রা-প্রণালী ও চিন্তাধারার মধ্যে এত বৈষম্য আছে যে, কেহ কাহারও প্রতিনিধিত্ব করিলে অন্তের স্বার্থের সম্পূর্ণরূপে সংরক্ষিত হওয়া সম্ভব নয়। এইজন্য ডাক্তারের প্রতিনিধিত্ব করিবেন একজন সমস্বার্থসম্পন্ন ডাক্তার, অপরপক্ষে একজন কর্মকারের প্রতিনিধিত্ব করিবেন একজন সমস্বার্থসম্পন্ন কর্মকার। তাহা হইলে উভয়েকেই প্রকৃত প্রতিনিধিত্বের সুযোগ দেওয়া হইবে। সুতরাং নির্বাচন-কেন্দ্রগুলিকে আঞ্চলিক ভিত্তির উপর প্রতিষ্ঠিত না করিয়া বৃত্তি অনুযায়ী সংগঠিত করা আবশ্যক। এই ব্যবস্থামত সমস্ত দেশটিকে কতকগুলি বৃত্তিমূলক কেন্দ্রে বিভক্ত করিয়া প্রত্যেক বৃত্তির লোকের জন্ত পৃথক নির্বাচন-কেন্দ্র প্রতিষ্ঠিত করা উচিত। জমিদার, প্রজা, শ্রমিক, মালিক, শিক্ষক, কর্মকার প্রভৃতি বিভিন্ন স্বার্থসম্পন্ন বিভিন্ন পেশার ভোটদাতৃগণ এক অঞ্চলের অধিবাসী হইলেও পেশাগত নির্বাচন-কেন্দ্রের মধ্য দিয়া তাহাদের প্রতিনিধি নির্বাচন করিবার ব্যবস্থা করা অধিকতর যুক্তিযুক্ত। এই ব্যবস্থার মূল কথা হইল যে, মানুষের রাজনৈতিক মতামত তাহার বৃত্তিগত স্বার্থের দ্বারা যতদূর প্রভাবিত হয় অল্প কিছু দ্বারা ততটা হয় না। সুতরাং বৃত্তিগত নির্বাচন-ব্যবস্থার মধ্য দিয়াই তাহার রাজনৈতিক মতামত প্রকাশের সুযোগ দিলে গণতান্ত্রিক আদর্শ পূর্ণতাপ্রাপ্ত হইতে পারে।

সমালোচনা (Criticism)

যুক্তির দিক দিয়া দেখিলে বৃত্তিগত ব্যবস্থার দাবী একেবারে অস্বীকার করা যায় না। কিন্তু বাস্তবক্ষেত্রে আইন-পরিষদকে বৃত্তিগত প্রতিনিধিত্বের দ্বারা সংগঠন করিলে আইনসভার কার্যকারিতা হ্রাস পাওয়া অবশ্যজ্ঞাবী। বৃত্তিগত প্রতিনিধিত্ব প্রবর্তিত করিবার পথে অনেক অন্তরায় দেখিতে পাওয়া যায়। প্রথমতঃ, কোন বৃত্তিগুলি প্রতিনিধি নির্বাচন করিতে পারিবে ও কোনগুলি নির্বাচন করিতে পারিবে না তাহা স্থির করা একটা জটিল সমস্যা। দ্বিতীয়তঃ, এই সমস্যার সমাধান হইলেও অধিকতর গুরুত্বপূর্ণ বৃত্তিগুলিও অপেক্ষাকৃত কম গুরুত্বপূর্ণ বৃত্তিগুলির মধ্যে আসনসংখ্যা কি নীতিতে বণ্টন হইবে তাহা স্থির করা আর একটি সমস্যারূপে দেখা দিবে। তৃতীয়তঃ, বৃত্তি-মূলক প্রতিনিধিত্বের দ্বারা গঠিত আইন-পরিষদে বিভিন্ন বৃত্তির প্রতিনিধিগণ জাতীয় স্বার্থসংরক্ষণ অপেক্ষা বৃত্তিগত স্বার্থসংরক্ষণের জন্য অধিকতর যত্নবান হইবেন। ফলে জাতীয় স্বার্থ ক্ষুণ্ণ হইবে। বিভিন্ন বৃত্তির প্রতিনিধিগণের মধ্যে বিদ্বেষ ও কলহের ফলে আইনসভার সংহতি ও মর্যাদা অনেক পরিমাণে হ্রাস পাইবে। আইনসভা শেষ পর্যন্ত একটা বিতর্কসভায় পৰ্যবসিত হইবে। চতুর্থতঃ, এই ব্যবস্থার প্রধান ত্রুটি হইল যে, নির্বাচনব্যবস্থা মানুষের নাগরিকত্ববোধকে উপেক্ষা করিয়া তাহার বৃত্তিবোধের উপর অধিকতর গুরুত্ব আরোপ করে। মানুষ তাহার সমগ্র নাগরিক জীবনকে নিয়ন্ত্রিত করিবার জন্য প্রতিনিধি নির্বাচন করিয়া শাসনব্যবস্থা সংগঠন করে। বৃত্তিগত জীবন মানুষের সমগ্র নাগরিক জীবনের একটি অংশ মাত্র। স্বতরাং বৃত্তির মধ্য দিয়া প্রতিনিধি নির্বাচনব্যবস্থা পরিচালিত হইলে নাগরিক জীবন পূর্ণতাপ্রাপ্ত হইতে পারে না। যিনি প্রতিনিধিত্ব করিবেন তিনি কোন বিশেষ স্বার্থের প্রতিনিধি নহেন, তিনি নাগরিক জীবনের সমগ্র স্বার্থের প্রতিনিধি। পঞ্চমতঃ, প্রতিনিধি জাতীয় ধনভাণ্ডার হইতে তাঁহার বেতন পাইয়া থাকেন, কোন বিশেষ বৃত্তির লোকেরা তাঁহার বেতন প্রদান করে না। স্বতরাং কোন বৃত্তি-বিশেষের প্রতি তাঁহার পক্ষপাতিত্ব থাকা যুক্তিযুক্ত নয়। পরিশেষে বলা যায় যে, এই ব্যবস্থায় ভোটদাতার দৃষ্টিভঙ্গী শুধুমাত্র তাহার বৃত্তিগত স্বার্থের উপর নিবদ্ধ থাকার ফলে তাকে সংকীর্ণমনা করিয়া তুলে। এ জাতীয় ভোটদাতা কখনই প্রকৃত স্বদেশপ্রেমিক হইতে পারে না। স্বতরাং

বৃত্তিগত প্রতিনিধিত্ব কোনমতেই কাম্য নহে। আঞ্চলিক ভিত্তিতেই প্রতিনিধি-নির্বাচন হওয়া উচিত। কিন্তু নির্বাচনব্যবস্থা একরূপভাবে সংগঠিত হইবে যাহাতে দেশের বিভিন্ন রকমের মত ও বিভিন্ন স্বার্থ আইনসভায় প্রতিনিধিত্ব করিবার সুযোগ পায়।

সাম্প্রদায়িক ভিত্তিতে পৃথক্ নির্বাচন (Communal Representation through Separate Electorate)

ভারতবর্ষে বিদেশী শাসনের ফলে রাজনৈতিক দলগুলি রাজনৈতিক বা অর্থনৈতিক মতবাদের পার্থক্য অনুসারে সংগঠিত না হইয়া সামাজিক এবং ধর্মগত পার্থক্যের ভিত্তির উপর সংগঠিত হইয়াছিল। এই রাজনৈতিক দলগুলির হিন্দু, মুসলমান, শিখ, খৃষ্টান প্রভৃতি নামকরণও হইয়াছিল। ব্রিটিশ শাসনকালে নির্বাচনপ্রথার দ্বারা যখন আইনসভার আসনগুলি পূরণ করিবার ব্যবস্থা হইল তখন হইতে প্রত্যেক সম্প্রদায় সাম্প্রদায়িক ভিত্তিতে পৃথক্ নির্বাচন-ক্ষেত্রের মধ্য দিয়া নিজ নিজ প্রতিনিধি নির্বাচন করিতে আরম্ভ করিল। আইন-পরিষদে বিভিন্ন সম্প্রদায়ের জন্য নির্দিষ্ট সংখ্যক আসন রক্ষিত ছিল এবং সাম্প্রদায়িক ভিত্তিতে পৃথক্ নির্বাচনের দ্বারা এই আসনগুলি পূরণ করা হইত অর্থাৎ হিন্দু সম্প্রদায়ের জন্য নির্ধারিত আসনগুলি হিন্দু ভোটদাতাগণের ভোট দ্বারা নির্বাচিত হিন্দু প্রতিনিধি দ্বারা পূরণ করা হইত, আর মুসলমান সম্প্রদায়ের প্রতিনিধি মুসলমানগণের প্রদত্ত ভোট দ্বারা নির্বাচিত হইত। হিন্দুর মুসলমান ভোটদাতার ভোটের প্রয়োজন হইত না, আবার মুসলমান প্রতিনিধির নির্বাচনের জন্য হিন্দুর ভোটপ্রার্থী হইতে হইত না। এক অঞ্চলের অধিবাসী ও সমস্বার্থসম্পন্ন হইলেও হিন্দুর প্রতিনিধিত্ব করিত হিন্দু, আর মুসলমানের প্রতিনিধিত্ব করিত মুসলমান।

সাম্প্রদায়িক ভিত্তিতে পৃথক্ নির্বাচনের পক্ষে একমাত্র যুক্তি হইল যে, শক্তিশালী সংখ্যাগরিষ্ঠ দলের বিরুদ্ধে সংখ্যালঘু দল একমাত্র পৃথক্ নির্বাচনের সাহায্যে প্রতিযোগিতা করিয়া তাহাদের ত্রাণ অধিকার সংরক্ষণ করিতে সমর্থ হয়। পৃথক্ নির্বাচন-প্রথার অবর্তমানে তাহাদের একটি প্রতিনিধিও হয়ত আইনসভার সদস্য নির্বাচিত না হইতে পারে। একরূপ ক্ষেত্রে সংখ্যালঘু দলের স্বার্থহানি হইবার পূর্ণ সম্ভাবনা থাকে।

সাম্প্রদায়িক ভিত্তিতে পৃথক্ নির্বাচনব্যবস্থা পৃথিবীর অল্প কোন দেশে দেখা যায় না। এই ব্যবস্থা মানুষের চিন্তাধারাকে সঙ্কুচিত করিয়া সাম্প্রদায়িক ভাবাপন্ন করে। প্রত্যেক সম্প্রদায়ের লোক সাম্প্রদায়িক স্বার্থসংরক্ষণের জন্য অতিমাত্রায় বাগ্র হইয়া উঠে, ফলে জাতীয় স্বার্থের হানি হয়। প্রত্যেক সম্প্রদায় সাম্প্রদায়িক বুদ্ধি-প্রণোদিত হইয়া অল্প সম্প্রদায়ের সমস্বার্থের ক্ষতি করিবার জন্য সচেষ্ট থাকে। সরকারী চাকুরীগুলিতে যোগ্যতার মাপকাঠির পরিবর্তে সাম্প্রদায়িক সংখ্যালুপাতের দাবীতে কর্মচারী নিয়োগ করা হয়। ফলে দুর্নীতি ও অযোগ্যতার কারণে শাসনব্যবস্থা দুর্বল হইয়া পড়ে। পৃথক্ নির্বাচনব্যবস্থা সংখ্যালঘু সম্প্রদায়ের উন্নতির একটা প্রধান অন্তরায়। যে সম্প্রদায় সংখ্যালঘু বলিয়া বিশেষ স্বযোগ-সুবিধার অধিকারী হয়, তাহারা কখনই নিজ প্রচেষ্টা দ্বারা যোগ্যতা বৃদ্ধি করিয়া জাতীয় জীবনে একটা বিশিষ্ট আসন অধিকার করিবার প্রয়াস পায় না। সাম্প্রদায়িকতার ফলে ভারতবর্ষ আজ দ্বিধাবিভক্ত। সংখ্যালঘু সম্প্রদায়ের সংখ্যালুপাতিক প্রতিনিধিত্বের দাবী স্বীকার করিয়া লইলেই সাম্প্রদায়িক ভিত্তিতে পৃথক্ নির্বাচনব্যবস্থা কোনমতেই সমর্থনযোগ্য নয়।

নির্বাচকমণ্ডলীর কর্তব্য (Functions of the Electorate)

স্বৈরাচারী অথবা এক-নায়কের অধীন শাসনব্যবস্থায় নির্বাচকমণ্ডলী নিষ্ক্রিয় দর্শকের পর্যায়ে পরিণত হয়। শাসকের ইচ্ছানুসারেই শাসিতের কার্যাবলী পরিচালিত হয়। গণতন্ত্র স্বপ্রতিষ্ঠিত হওয়ার ফলে আধুনিক যুগে শাসক-শাসিতের সম্পর্কের আয়তন পরিবর্তন ঘটিয়াছে। শাসিতেরাই শাসকশ্রেণী নির্বাচন করিয়া শাসনকার্যকে চালু রাখে।

গণতান্ত্রিক শাসনব্যবস্থায় প্রাপ্তবয়স্ক ব্যক্তিমাত্রেই ভোটদানের অধিকারী। ভোটদান-ক্ষমতার প্রয়োগ করিয়া নির্বাচকমণ্ডলী আইনসভার সদস্য নিবাচন করে। আইনসভা শাসনকর্তৃপক্ষের কার্যের তদারক করে। স্তরান্ত শেষ বিশ্লেষণে দেখা যায় যে, ক্ষমতা যে-কেহই পরিচালিত করুক না কেন, ক্ষমতালব্ধ একমাত্র উৎস হইল নির্বাচকমণ্ডলী।

প্রতিনিধি-নির্বাচন ব্যতীত ভোটদাতৃমণ্ডলীর আর একটি কর্তব্য হইল শাসন-কর্তৃপক্ষের কার্যের উপর সতর্ক দৃষ্টি রাখা। নির্বাচিত প্রতিনিধি বা

শাসন-কর্তৃপক্ষ যদি নির্বাচকমণ্ডলীর মত উপেক্ষা করিয়া নিজেদের ইচ্ছামত আইনপ্রণয়ন বা শাসনকার্য পরিচালিত করে, তাহা হইলে ভোটদাতাগণ শক্তিশালী জনমত গঠন করিয়া সর্বতোভাবে সরকারের উপর প্রভাব বিস্তার করিতে পারে। নির্বাচকমণ্ডলী প্রত্যক্ষ ও পরোক্ষভাবে সরকারকে জনমত অনুসারে কার্যপরিচালনায় বাধ্য করিতে পারে। অল্প ব্যবধানে নির্বাচন, প্রত্যাবর্তনের নির্দেশ, গণভোট ও গণপ্রস্তাব অধিকারের মধ্য দিয়া নির্বাচকমণ্ডলী সমগ্র শাসনব্যবস্থার উপর প্রত্যক্ষভাবে প্রভাব বিস্তার করিতে পারে। অপরপক্ষে, সভাসমিতি, শোভাযাত্রা, সংবাদপত্র প্রভৃতির মধ্য দিয়াও নির্বাচকমণ্ডলী সরকারের উপর পরোক্ষভাবে জনমতের শক্তিকে কার্যকরী করিতে পারে।

বর্তমান যুগে প্রত্যেক দেশের সরকারই দলীয় ভিত্তির উপর প্রতিষ্ঠিত। প্রত্যেক রাজনৈতিক দলের নিজ নিজ নীতি ও কার্যক্রম আছে। এই নীতি ও কার্যক্রম নির্বাচকমণ্ডলী কর্তৃক সমর্থিত না হইলে সেই দলের পক্ষে সরকার গঠন করা সম্ভব নয়। সুতরাং নির্বাচকমণ্ডলী শাসনব্যবস্থার নীতি ও কার্যক্রমের পরিবর্তনসাধন করিতে পারে।

উপরি-উক্ত আলোচনা হইতে প্রতীয়মান হয় যে, নির্বাচকমণ্ডলী শুধু নিষ্ক্রিয় দর্শকমাত্র নহে, তাহাদের কার্যের যথেষ্ট গুরুত্ব আছে। শাসনকার্য দক্ষ ও জনস্বার্থের পরিপোষক হইবে কিনা তাহা প্রধানতঃ নির্বাচকমণ্ডলীর যোগ্যতার উপর নির্ভর করে। এইজন্য বলা যায় যে, গণতন্ত্রের সাফল্য সুসংবদ্ধ ও সদাঙ্গাগ্রত জনমতের উপর নির্ভর করে।

সংক্ষিপ্তসার

নির্বাচকমণ্ডলী ও সার্বজনীন ভোটাধিকার—জনসংখ্যার যে অংশ ভোটদান করিয়া আইনসভার সদস্য নির্বাচন করিতে সক্ষম, তাহাকে নির্বাচকমণ্ডলী বলা হয়। প্রাপ্তবয়স্ক ব্যক্তিমাত্রেরই ভোটদান-ক্ষমতা থাকা গণতন্ত্রের একটি অপরিহার্য অঙ্গ। বিকৃতমস্তিষ্ক, দেউলিয়া, হুঁত, বিদেশী প্রভৃতির ভোটদান-ক্ষমতা থাকে না। ভোটদান-ক্ষমতা একটা নাগরিক অধিকার বলিয়া পরিগণিত হইলেও প্রকৃতপক্ষে ইহা নাগরিক জীবনের

একটা প্রধান কর্তব্য। এই কর্তব্য যাহার। স্বর্হুভাবে পালন করিতে অক্ষম, তাহাদের এই অধিকার হইতে বঞ্চিত করা হয়।

স্রীলোকের ভোটাদিকার—স্রীজাতি পুরুষের উপর নির্ভরশীল, যুদ্ধে যোগদানে অক্ষম ও পারিবারিক সুখশান্তির পক্ষে অপরিহার্য—এই সমস্ত কারণে এতদিন পর্যন্ত তাহাদিগকে ভোটদান-ক্ষমতা হইতে বঞ্চিত রাখা হইয়াছিল। অধুনা স্রীজাতি জীবনের নানা ক্ষেত্রে তাহাদের যোগ্যতা প্রমাণ করিয়া পুরুষের সমান ভোটদান-ক্ষমতা অর্জন করিয়াছে। স্রীজাতি রাজনীতিতে সক্রিয় অংশ গ্রহণ করিলে রাজনৈতিক ক্ষেত্রে হইতে অনেক নীচতা লোপ পাইবে ও রাষ্ট্রের শক্তি দ্বিগুণিত হইবে।

প্রত্যক্ষ ও পরোক্ষ নির্বাচন—প্রত্যক্ষ নির্বাচনে ভোটদাতাগণ ভোট দিয়া সরাসরিভাবে প্রতিনিধি নির্বাচন করেন। পরোক্ষ প্রথায় ভোটদাতাগণ একদল মাধ্যমিক প্রতিনিধি নির্বাচন করেন ও এই প্রতিনিধিগণ আসল প্রতিনিধি নির্বাচন করিয়া থাকেন। প্রত্যক্ষ নির্বাচনে ভোটদাতা ও প্রতিনিধি পারস্পরিক সম্পর্কযুক্ত থাকিয়া মতামতের আদান-প্রদান করিতে পারেন। এই প্রথা ভোটদাতার রাজনৈতিক চেতনা বৃদ্ধি করে। পরোক্ষ নির্বাচনে ইহা সম্ভব নয়। ইহাতে প্রতিনিধি অল্পসংখ্যক ভোটদাতা কর্তৃক নির্বাচিত হইয়া থাকেন বলিয়া তাঁহার দায়িত্বজ্ঞান সীমাবদ্ধ হয়। পরোক্ষ নির্বাচনে নানা প্রকার খড়ষন্ত্র ও দুর্নীতি প্রশ্রয় পায়। কিন্তু পরোক্ষ নির্বাচনে যোগ্যতর প্রতিনিধির নির্বাচন সম্ভব হয় ও নির্বাচনকার্যে বিশেষ কোন গোলযোগ ঘটে না।

অবৈতনিক বনাম বেতনভুক্ প্রতিনিধিত্ব—পূর্বে প্রতিনিধিগণকে সাধারণতঃ কোনরূপ বেতন বা ভাতা দিবার রীতি ছিল না। সামান্য অর্থলোভের দ্বারা প্রণোদিত হইয়া অনেক অযোগ্য ব্যক্তি প্রতিনিধি নির্বাচিত হইতে পারে এইরূপ আশঙ্কা করা হইত। বর্তমানে এই মতবাদ পরিত্যক্ত হইয়াছে। আইনসভার সদস্যগণকে বর্তমানে নানাবিধ কার্য করিতে হয় ও তাহাদের এইজন্ত অনেক সময় ব্যয় করিতে হয়। তাহা ছাড়া যদি শাসন-বিভাগীয় ও বিচার-বিভাগীয় কর্মচারিগণ বেতনভুক্ হন, তাহা হইলে আইনপরিষদের সদস্যগণেরও বেতন পাওয়া উচিত বলিয়া বর্তমানে বিবেচিত হয়। এই কারণে আইনসভার সদস্যগণকে বেতন দেওয়া হইয়া থাকে।

প্রতিনিধিত্বের স্বরূপ—প্রতিনিধিকে শুধু তাঁহার নির্বাচনকেন্দ্রের প্রতিনিধি বলিয়া গণ্য করা হইলে ভুল করা হয়। প্রতিনিধি নির্বাচনকেন্দ্র-বিশেষ হইতে নির্বাচিত হইলেও তিনি জনমতের প্রতিনিধি, কোন অঞ্চল-বিশেষের প্রতিনিধি নহেন। সাধারণ স্বার্থসংরক্ষণের জন্ত তাঁহাকে নির্বাচিত করা হয়। প্রতিনিধি সাধারণ তহবিল হইতে তাঁহার বেতন ও ভাতা পাইয়া থাকেন, সুতরাং কোন অঞ্চল-বিশেষের প্রতি তাঁহার বিশেষ আনুগত্য প্রদর্শন করিবার কোন সঙ্গত কারণ নাই।

একাধিক ভোটদান পদ্ধতি—নির্বাচনে একই ব্যক্তিকে বিভিন্ন ধোঁগ্যতার জন্ত অনেক সময় একাধিক ভোট প্রদানের ক্ষমতা দেওয়া হইয়া থাকে। একই ব্যক্তিকে সম্পত্তির মালিক হিসাবে, শিক্ষক হিসাবে দুই বা তিনটি ভোটের অধিকারী হইতে দেখা যায়। এই প্রথা গণতন্ত্রবিরোধী বলিয়া অনেক দেশে ইহার বিলোপসাধন করা হইয়াছে।

প্রকাশ্য অথবা গোপন ভোট—প্রকাশ্য ভোটদান-ব্যবস্থায় সর্বসমক্ষে ভোটদাতাগণ ভোটদান করে। গোপন ভোটদান-পদ্ধতিতে ভোটদাতা সকলের অলক্ষ্যে নিজ ইচ্ছানুসারে ভোটদান করিতে পারে। প্রকাশ্য ভোটদান-ব্যবস্থায় ফলে ভোটদাতার নিগূহীত হইবার সম্ভাবনা থাকে ও সেইজন্ত ভোটদাতা সব সময়ে নিজ ইচ্ছানুসারে ভোটদান করিতে পারে না।

সংখ্যালঘিষ্ঠদের নির্বাচনসমস্যা—আইনপরিষদের সংগঠন একপ হওয়া উচিত বাহাতে প্রত্যেকটি সংখ্যালঘু দল সংখ্যানুপাতে আইনসভায় প্রতিনিধিত্ব করিতে পারে। সংখ্যালঘুদের প্রতিনিধির অভাবে গণতন্ত্র কার্যকর হইতে পারে না। এইজন্ত নিম্নলিখিত নির্বাচন-প্রণালীগুলির দ্বারা সংখ্যালঘুদের প্রতিনিধি-নির্বাচনের ব্যবস্থা করা হইয়া থাকে :—

- ১। একক হত্যাস্তরযোগ্য ভোটে আনুপাতিক নির্বাচন ; ২। তালিকা-প্রণায় আনুপাতিক নির্বাচন ; ৩। সীমাবদ্ধ ভোট ; ৪। সূপীকারী ভোট ; ৫। পৃথক নির্বাচনব্যবস্থা।

এই প্রণালীগুলির মধ্যে পূর্বে ভারতে প্রবর্তিত পৃথক নির্বাচনব্যবস্থা সর্বাপেক্ষা কৃতিকর। এই ব্যবস্থায় জাতীয়তাবোধ নষ্ট হয় ও বিভিন্ন

সম্প্রদায়ের মধ্যে কলহ-বিবাদ অনিবার্য হইয়া উঠে। ফলে শাসনব্যবস্থা দুর্বল হইয়া পড়ে।

আঞ্চলিক বনাম বৃত্তিগত প্রতিনিধিত্ব—সমগ্র দেশটিকে কতকগুলি নির্বাচনকেন্দ্রে বিভক্ত করিয়া প্রতি কেন্দ্র হইতে এক বা একাধিক প্রতিনিধি নির্বাচনব্যবস্থাকে আঞ্চলিক প্রতিনিধিত্ব বলা হয়। এই ব্যবস্থার মূল কথা হইল যে, একই অঞ্চলের অধিবাসী বলিয়া বিভিন্ন বৃত্তি-অবলম্বী হইলেও সেই অঞ্চলের সমুদয় অধিবাসীই সমস্বার্থসম্পন্ন হয়। সুতরাং এই বিভিন্ন পেশার ভোটদাতাগণের একত্রে ভোট প্রদান করিয়া তাহাদের প্রতিনিধি নির্বাচন করা উচিত। বৃত্তিগত প্রতিনিধিত্বের মূল কথা হইল যে, একই বৃত্তি দ্বারা জীবিকার্জন করিলে এক অঞ্চলের অধিবাসী না হইয়াও একই বৃত্তির লোকগণ অধিকতর সমস্বার্থসম্পন্ন হয়। সুতরাং নির্বাচনব্যাপারে সমস্বার্থ-সম্পন্ন ভোটদাতাগণকে একই নির্বাচনকেন্দ্রের মধ্যে দিয়া তাহাদের রাজ-নৈতিক মতামত প্রকাশের সুযোগ দেওয়া উচিত অর্থাৎ শিক্ষকের প্রতিনিধি হইবেন শিক্ষকশ্রেণী দ্বারা নির্বাচিত শিক্ষক, আর রেলকর্মীর প্রতিনিধিত্ব করিবেন রেলকর্মী দ্বারা নির্বাচিত রেলকর্মী।

পেশাগত প্রতিনিধিত্ব বৃত্তিযুক্ত মনে হইলেও বাস্তবক্ষেত্রে ইহার প্রয়োগ কাম্য নহে। আইনসভার আসনসংখ্যা বৃত্তিগতভাবে ভাগ করা দুর্বল। এই ব্যবস্থায় প্রতিনিধিগণের দৃষ্টিভঙ্গী তাহাদের সংকীর্ণ বৃত্তিগত স্বার্থে আবদ্ধ থাকার ফলে জাতীয় স্বার্থের হানি হয়। আইনসভায় জনমতের প্রতিনিধিত্বের ব্যবস্থা করা হয়, কোন বৃত্তি-বিশেষের প্রতিনিধিত্বের উদ্দেশ্যে আইনসভা গঠিত হয় না।

নির্বাচকমণ্ডলীর কর্তব্য—১। প্রতিনিধি নির্বাচন করা; ২। প্রতিনিধির মাধ্যমে শাসন-কর্তৃপক্ষের নীতি ও কার্যক্রমের উপর সতর্ক দৃষ্টি রাখা; ৩। প্রত্যক্ষভাবে গণভোট, গণপ্রস্তাব-অধিকার ও প্রত্যাভর্তনের নির্দেশ দ্বারা সক্রিয়ভাবে শাসনকার্যে অংশ গ্রহণ করা।

প্রশ্নাবলী

1. Briefly describe the various methods that have been suggested for the representation of minorities in the legislature. (C. U. 1956)

2. Describe the functions performed by the electorate in a modern state. How were the constituencies organised in West Bengal for the recent elections ? (C. U. 1952)

3. To what extent, if any, should a member of a legislature be bound by instructions of his constituent ? (Gauhati, Hons. 1948)

4. Distinguish between territorial representation and functional representation. Which of them would you recommend, and why ? (C. U. 1960)

5. What are the different methods by which the electorate can exercise control over their representatives in modern democracies. (C. U. B. A. Part I, 1962)

6. Examine the importance of the right to vote. What are the qualifications of a voter in a modern democracy ? (C. U. Part I, 1965)

7. Write an analytical note on the different methods of minority representation in modern states. (C. U. B. A. Part I, 1966)

8. What, according to you, should be the relationship between the representative and his constituency ? State your reasons fully. (C. U. B. A. Part I, 1970)

প্রশ্ন ও উত্তরের ইংগিত

1. Define Political Science and the nature of its relationship with Sociology, Economics and History.

উঃ ইঃ—রাষ্ট্রকে কেন্দ্র করিয়া সমাজবদ্ধ মানুষের যে রাজনৈতিক জীবন গঠিত হইয়াছে তাহা আলোচনা করাই হইল রাষ্ট্রবিজ্ঞানের প্রধান বিষয়বস্তু। যে রাজনৈতিক প্রতিষ্ঠানের মাধ্যমে মানুষের রাজনৈতিক চেতনা মূর্তি পরিগ্রহ করিয়াছে, সেই রাষ্ট্ররূপ প্রতিষ্ঠানের উৎপত্তি, ক্রম-বিকাশ ও তাৎপর্য এই শাস্ত্রে আলোচিত হয়। রাষ্ট্রের অতীত, বর্তমান ও ভবিষ্যৎ এই শাস্ত্রের বিষয়বস্তু।

রাষ্ট্রবিজ্ঞানকে সমাজবিজ্ঞানের একটি বিশেষীকৃত শাখা বলা যাইতে পারে। মানবজাতির সমগ্র জীবন হইল সমাজবিজ্ঞানের আলোচ্য বিষয়বস্তু, আর রাষ্ট্রবিজ্ঞানের বিষয়বস্তু শুধু রাষ্ট্রনৈতিক চেতনাসম্পন্ন মানুষের রাজনৈতিক জীবনের আলোচনায় সীমাবদ্ধ। সুতরাং রাষ্ট্রবিজ্ঞানের বিষয়-বস্তুর পরিধি অপেক্ষাকৃত সংকীর্ণতর।

মানুষের অর্থনৈতিক জীবন অনেকাংশে রাজনীতির দ্বারা পরিচালিত হয়। ধনবিজ্ঞানের মূল উদ্দেশ্য হইল দারিদ্র্য-সমস্যার সমাধানপূর্বক সমাজের অর্থনৈতিক মান উন্নয়ন করা। এই উন্নয়নব্যবস্থা রাষ্ট্রের অমূল্য নীতির উপর নির্ভর করে। অপরপক্ষে রাষ্ট্রের কাঠামো, ব্যবস্থাপনা ও কার্য-কারিতা বহু পরিমাণে দেশের অর্থনৈতিক ব্যবস্থার উপর নির্ভর করে। উভয় শাস্ত্রের উদ্দেশ্য হইল মানুষের সর্বাধিক কল্যাণসাধন করা। ধনতত্ত্ববাদ ও সমাজতত্ত্ববাদ হইল বর্তমান জগতের দুইটি গুরুত্বপূর্ণ রাষ্ট্রনীতি। কিন্তু এই উভয় নীতিই দুইটি বিশেষ অর্থনৈতিক মতবাদকে কেন্দ্র করিয়া গঠিত হইয়াছে।

রাষ্ট্রবিজ্ঞান ও ইতিহাসের সম্পর্ক সম্বন্ধে বলা হয় যে, ইতিহাস হইল রাষ্ট্র-বিজ্ঞানের মূল, আর রাষ্ট্রবিজ্ঞান হইল ইতিহাসের পরিণতি। ইতিহাস হইতে রাষ্ট্রবিজ্ঞানের উপাদান সংগৃহীত হয়। রাজনৈতিক চিন্তাধারা ও রাজনৈতিক প্রতিষ্ঠানগুলির মূল স্তরের সন্ধান পাইতে হইলে ইতিহাসের সাহায্য

আবশ্যক। কারণ মানবসমাজের ক্রমবিকাশ ও বিভিন্ন রাষ্ট্রের উত্থান-পতনের কাহিনী ইতিহাসে আলোচিত হয়। কিন্তু ইতিহাসকে শুধু রাজনৈতিক ঘটনার কালানুক্রমিক-বিবৃতি বলিলে ভুল হইবে। ইতিহাসের সমগ্র বিষয়বস্তু রাষ্ট্রবিজ্ঞানীর অঙ্গসম্বন্ধানের ক্ষেত্রে নহে। অপরপক্ষে রাষ্ট্রবিজ্ঞানের সমুদয় বিষয়বস্তুও ঐতিহাসিক তথ্যের সাহায্যে নির্ধারিত হয় নাই।

(৩—৪, ১৩—১৭ পৃষ্ঠা দ্রষ্টব্য)

2. Describe the different methods of study in Political Science. Which of them do you consider to be the most desirable and why?

উঃ ইঃ—রাষ্ট্রবিজ্ঞান অমূল্যের বিভিন্ন পদ্ধতি আছে, যথা, পরীক্ষামূলক পদ্ধতি, পর্যবেক্ষণমূলক পদ্ধতি, ঐতিহাসিক পদ্ধতি, তুলনামূলক পদ্ধতি, দার্শনিক পদ্ধতি ইত্যাদি। পরীক্ষামূলক পদ্ধতি অল্পসংখ্যক বলা হয় যে, বিভিন্ন ধরনের শাসনব্যবস্থার গবেষণার সাহায্যেই রাষ্ট্রবিজ্ঞানের তত্ত্বগুলি জানিতে পারা যায়। আবার পর্যবেক্ষণমূলক পদ্ধতি অল্পসংখ্যক বলা হয় যে, বিভিন্ন শাসনব্যবস্থার কার্যকলাপ পর্যালোচনা করিয়া রাষ্ট্রবিজ্ঞানের বিভিন্ন তত্ত্বের বিশ্লেষণ করা হয়। এইরূপে উপরি-উক্ত বিভিন্ন পদ্ধতিগুলি আলোচনা করিলে এই সিদ্ধান্তে উপনীত হওয়া যায় যে, এই পদ্ধতিগুলির কোনটিই একক রাষ্ট্রবিজ্ঞানের সম্যক অমূল্যীকরণ করিতে পারে না। প্রত্যেকটি পদ্ধতিই অসম্পূর্ণ। সুতরাং দুই বা ততোধিক পদ্ধতির সমন্বয়ে রাষ্ট্রবিজ্ঞানের আলোচনা করিলে সঠিক ফল পাওয়া যায়। রাষ্ট্রবিজ্ঞান শুধু পর্যবেক্ষণমূলক বিজ্ঞান বা গবেষণামূলক বিজ্ঞান নহে। কোন কোন ক্ষেত্রে ইহা পর্যবেক্ষণমূলক বিজ্ঞান, আবার কোন কোন ক্ষেত্রে ইহা গবেষণামূলক বিজ্ঞান।

(৮—১৩ পৃঃ)

3. Discuss the significance and meaning of territory as a constituent element of the state. What are the exceptions to the principle of exclusive jurisdiction of a state over its own territory?

উঃ ইঃ—নির্দিষ্ট ভূখণ্ড হইল রাষ্ট্রের বাস্তব অস্তিত্বের একটি প্রধান উপাদান। প্রত্যেক রাষ্ট্রের কার্যকলাপ ও আধিপত্য এই ভৌগোলিক

সীমার মধ্যে পরিচালিত হয়। নির্দিষ্ট ভূখণ্ড বলিতে রাষ্ট্রাঙ্গগত ভূভাগ, ভূগর্ভস্থ সমুদ্রয় পদার্থ, আকাশপথ, নদনদী, গিরিপর্বত ও তিন মাইল পর্যন্ত সমুদ্রোপকূল রাষ্ট্রের ভূখণ্ডের অন্তর্ভুক্ত।

রাষ্ট্রের ভূখণ্ডের আয়তনের কোন সীমা স্থিরীকৃত করা যায় না। স্তানম্যারিনোর জায় মাত্র ৩৮ বর্গমাইল বিস্তৃত ক্ষুদ্র রাষ্ট্রের পাশাপাশি ৮৭ লক্ষ বর্গমাইল আয়তনের সোভিয়েত যুক্তরাষ্ট্র দেখিতে পাওয়া যায়। তবে ক্ষুদ্র-বৃহৎ উভয় প্রকারের রাষ্ট্রেরই ভূখণ্ড থাকি চাই। ক্ষুদ্র রাষ্ট্রের বিভিন্ন অংশের মধ্যে ঘনিষ্ঠ সম্পর্ক স্থাপিত হওয়া সম্ভব যাহা বৃহদায়তন রাষ্ট্রের মধ্যে সম্ভব নয়। তবে ক্ষুদ্র রাষ্ট্রগুলি আত্মনির্ভরশীল হইতে পারে না এবং ইহাদের পক্ষে আত্মরক্ষা করাও দুঃসাধ্য হয়। অপরপক্ষে বৃহদায়তন রাষ্ট্রের পক্ষে আত্মনির্ভরশীল হওয়া সহজসাধ্য। আয়তনের বিস্তৃতির জন্য ইহাদের আত্মরক্ষা করাও সহজসাধ্য হয়।

রাষ্ট্রের নিজস্ব ভূখণ্ডের উপর একাধিপত্যের দুই-একটি বাধা আছে। বিদেশী রাষ্ট্রদ্বয়ের গৃহ স্ফরাষ্ট্রের অন্তর্ভুক্ত হইলেও সে গৃহ পররাষ্ট্রের ভূখণ্ডের অন্তর্ভুক্ত বলিয়া আইনতঃ পরিগণিত হয়। বিদেশী যুদ্ধজাহাজ পররাষ্ট্রের বন্দরে সাময়িক কালের জন্য অবস্থান করিলেও ইহার উপর বন্দর-কর্তৃপক্ষ রাষ্ট্রের কোন কর্তৃত্ব থাকে না। (৩১—৩৩ পৃঃ)

4. Criticise the Social Contract theory about the origin of the state. What abiding principle has emerged out of the theory ?

উঃ ইঃ—এই মতবাদে বলা হয়—রাষ্ট্র একটি মানবীয় প্রতিষ্ঠান এবং মানুষের সম্পাদিত চুক্তির দ্বারা ইহার উদ্ভব হইয়াছে।

রাষ্ট্র-জন্মের পূর্বে মানুষ এক ভয়াবহ প্রাক-সামাজিক অবস্থায় বাস করিত। এখানে আইন-শৃংখলার অভাবে মানুষের জীবন অসহনীয় হইয়া উঠিলে মানুষ নিজেদের মধ্যে একটি পারস্পরিক চুক্তি করিয়া রাষ্ট্র গঠন করিল। সুতরাং রাষ্ট্র চুক্তির প্রত্যক্ষ ফল। হব্‌স্‌, লক্‌ ও রুশো এই মতের প্রধান সমর্থক। হব্‌স্‌ তাঁহার যুক্তির সাহায্যে রাজশক্তির অবাধ কর্তৃত্ব প্রতিষ্ঠা করিতে চাহিয়াছিলেন। লক্‌ এই মতবাদকে ব্যক্তিস্বাধীনতার রক্ষাকবচ হিসাবে ব্যবহার করিয়াছিলেন। আর রুশোর হস্তে এই মতবাদ লোকায়ত্ত

সরকারের রূপ গ্রহণ করিল। সুতরাং এই তিনজন লেখক সামাজিক চুক্তিতে রাষ্ট্রের উৎপত্তি আরোপিত করিলেও তাঁহারা বিভিন্ন উদ্দেশ্য দ্বারা পরিচালিত হইয়াছিলেন।

এই মতবাদটি ঐতিহাসিক, অধৌক্তিক ও বিপজ্জনক বলিয়া বর্তমান যুগে ইহার আর বিশেষ কোন গুরুত্ব নাই। তবে এই মতবাদের অন্তর্নিহিত সত্য হইল যে, জনগণের সম্মতি ও সহযোগিতার উপর রাষ্ট্র প্রতিষ্ঠিত। এই মতবাদ ঐশ্বরিক উৎপত্তি ও বলপ্রয়োগ মতবাদ দুইটির বিলোপসাধন করিয়া বর্তমান গণতন্ত্রের গোড়াপত্তন করে। (৬৬—৭৮ পৃঃ)

5. State and examine the theory of Force as an explanation of the origin of the state.

উঃ ইঃ—এই মতবাদে বলা হয় যে, রাষ্ট্র পশুবলের সাহায্যে গঠিত হইয়াছে। এই মতবাদ ‘জোর যার মূলুক তার’ প্রবচনটি সমর্থন করে। সবল দুর্বলের উপর আধিপত্য বিস্তার করিয়া রাষ্ট্রের গোড়াপত্তন করে এবং রাষ্ট্রের অস্তিত্বও এই পশুবলের সাহায্য স্থায়ী করে।

রাষ্ট্রগঠনে ও রাষ্ট্রের অস্তিত্ব বজায় রাখিবার জন্য পশুবলের প্রয়োজন। ঐতিহাসিক ও বাস্তব দিক দিয়া দেখিতে গেলে এ-কথা অনস্বীকার্য হইলেও রাষ্ট্র যে একমাত্র পশুবলের উপর প্রতিষ্ঠিত এ-কথা বলা যায় না। যে অধিকার পশুবলের উপর প্রতিষ্ঠিত, বলের অবসানের সঙ্গে সঙ্গে সে অধিকারেরও অবসান ঘটে। পশুবলের ভিত্তিতে গঠিত কোন রাষ্ট্রই চিরস্থায়ী হয় না। বলপ্রয়োগ জনমত দ্বারা সমর্থিত হওয়া চাই। সুতরাং শাসিতের ইচ্ছা ও সম্মতির ভিত্তির উপর রাষ্ট্র প্রতিষ্ঠিত। (৬৩—৬৬ পৃঃ)

6. “The accepted theory of the origin of the state in modern Political Science is the Historical or Evolutionary theory.” Discuss.

উঃ ইঃ—রাষ্ট্রের উৎপত্তি সম্পর্কে বিভিন্ন মতবাদের পর্যালোচনা করিয়া ডাঃ গার্গার বলিয়াছেন—রাষ্ট্র বিধাতার সৃষ্টি বা পশুবলের সাহায্যে বা পরিবারের ক্রমসম্প্রসারণের ফলে অথবা চুক্তির দ্বারা গঠিত হয় নাই। কোন একটি মাত্র মতবাদের যুক্তির ভিত্তিতে রাষ্ট্রের উৎপত্তি বিচার করা সম্ভব নয়।

বর্তমানে ঐতিহাসিক মতবাদ বা বিবর্তনবাদ রাষ্ট্র-উৎপত্তির বিজ্ঞানসম্মত মতবাদ বলিয়া পরিগণিত হয়। এই মতবাদের বৈশিষ্ট্য হইল যে, ইহা রাষ্ট্র-গঠনের কোন একটি বিশেষ উপাদান বা রাষ্ট্র-উৎপত্তির কোন একটি নির্দিষ্ট পদ্ধতির উপর গুরুত্ব আরোপ না করিয়া সমুদয় মতবাদের সমন্বয়ে একটি সম্ভাব্য মতবাদ নির্ণয়ের চেষ্টা করে। রাষ্ট্র বহু যুগ ধরিয়া বহু ঐতিহাসিক ঘটনার ঘাত-প্রতিঘাতে বিবর্তনের মধ্য দিয়া বর্তমান রূপ পরিগ্রহ করিয়াছে। রক্তসম্বন্ধ, ধর্ম, পশুবল, রাজনৈতিক চেতনা, জাতীয়তাবোধ, আন্তর্জাতিকতা, অর্থনৈতিক কারণ প্রভৃতি বহু শক্তি রাষ্ট্রগঠনে কার্যকর হইয়াছে। রাষ্ট্র একদিনে নির্দিষ্ট পরিকল্পনা দ্বারা বা একটি উপাদানে গঠিত হয় নাই। রাষ্ট্র হইল মানবসমাজের দীর্ঘদিনব্যাপী বিবর্তনের ক্রমোন্নত ফল।

(৮৬—৮৯ পৃঃ)

7. Discuss the organic theory regarding the nature of the state.

উঃ ইঃ—জৈব মতবাদের সাহায্যে রাষ্ট্রের প্রকৃতি বিশ্লেষণ করা হইয়াছে। এই মতবাদে রাষ্ট্রকে একটি জীবদেহের সহিত তুলনা করিয়া ইহাকে একটি সজীব ও সচেতন দেহী বলিয়া ধারণা করা হইয়াছে। জীবদেহ যেমন অনেকগুলি জীবকোষ লইয়া গঠিত, রাষ্ট্রও তদ্রূপ ব্যক্তি-সমষ্টি লইয়া গঠিত। জীবকোষগুলি যে রূপ : (১) পরস্পরের সহিত অবিচ্ছিন্ন-ভাবে জড়িত এবং (২) সমগ্রভাবে জীবদেহের উপর একান্তভাবে নির্ভরশীল, রাষ্ট্রের জনগণও তদ্রূপ পরস্পরের উপর নির্ভরশীল এবং সমগ্রভাবে রাষ্ট্রের উপর নির্ভরশীল। জীবদেহের বিভিন্ন কোষ যে রূপ স্নায়ুতন্ত্র দ্বারা নিয়ন্ত্রিত হয়, রাষ্ট্রতন্ত্র জনগণ ও বিভিন্ন প্রতিষ্ঠান তদ্রূপ একটি শাসনব্যবস্থা দ্বারা পরিচালিত হয়। ব্রুনৎস্কি ও স্পেন্সার এই মতবাদের প্রধান সমর্থক ছিলেন।

রাষ্ট্র ও জীবদেহের মধ্যে যে সাদৃশ্যগুলির কথা বলা হয় সেগুলি বাহ্যিক, মূলগত নয়। রাষ্ট্র ও জীবদেহের মধ্যে বহু পার্থক্যও আছে, যথা, (১) জীবদেহের গঠন দৃঢ়সংবদ্ধ এবং জীবদেহের কোষগুলি পরস্পর সংলগ্ন, কিন্তু রাষ্ট্রের বিভিন্ন ব্যক্তি ও প্রতিষ্ঠান জীবকোষের স্তায় পরস্পর

সংলগ্ন নহে। •(২) জীবকোষ জীবদেহ হইতে বিচ্ছিন্ন হইয়া বাঁচিতে পারে না, কিন্তু এক রাষ্ট্র পরিত্যাগ করিয়া লোকে অন্য রাষ্ট্রের নাগরিক হইতে পারে। (৩) রাষ্ট্র স্থায়ী প্রতিষ্ঠান, জীবদেহ নশ্বর।

এই মতবাদে রাষ্ট্রভুক্ত জনগণের পারস্পরিক নির্ভরশীলতা ও রাষ্ট্রের অপরিহার্য এককের উপর গুরুত্ব আরোপ করা হইয়াছে। (২৪—২৮ পৃঃ)

8. Discuss the Marxist conception of the state.

উঃ ইঃ—সমাজতত্ত্ববাদকে ভিত্তি করিয়া মার্কস্ রাষ্ট্র সম্বন্ধে তাঁহার মতবাদ গঠন করেন। মার্কসীয় সমাজতত্ত্ববাদ তিনটি মূলমন্ত্রের উপর প্রতিষ্ঠিত, যথা, (১) উদ্ধৃত মূল্যের তত্ত্ব, (২) ইতিহাসের জড়বাদী ব্যাখ্যা ও (৩) শ্রেণী-সংগ্রাম।

মার্কসের মতে শ্রেণী-সংগ্রামের ফলেই রাষ্ট্রের উৎপত্তি হইয়াছে। ইতিহাসের এক অভিনব ব্যাখ্যার সাহায্যে মার্কস্ প্রমাণ করিয়াছেন যে, বিভিন্ন যুগে বিত্তবান শ্রেণী সমগ্র উৎপাদনব্যবস্থা করায়ত্ত করিয়া বিত্তহীন শ্রেণীকে নির্যমভাবে শোষণ করিয়াছে। এই শোষণকার্য সমর্থন ও স্থায়ী করিবার উদ্দেশ্যে শোষকশ্রেণী রাষ্ট্ররূপ সংগঠন সৃষ্টি করিয়াছে। রাষ্ট্র-প্রণীত আইন শোষকশ্রেণীর স্বার্থসিদ্ধির উপায় মাত্র এবং এই আইনের বলে তাহারা তাহাদের শোষণকার্য অব্যাহত রাখিতে সমর্থ হয়। শোষক-শ্রেণী রাষ্ট্রীয় পুলিশ ও সেনাবাহিনীর সাহায্যে শোষিতশ্রেণীর উপর ইহার কর্তৃত্ব সুপ্রতিষ্ঠিত রাখে। সুতরাং মার্কসের মতে রাষ্ট্রের উৎপত্তি ও অস্তিত্ব পশুবলের উপর প্রতিষ্ঠিত এবং পশুবল প্রয়োগ করিয়াই রাষ্ট্র সমাজের শ্রেণীগত কাঠামো বজায় রাখে। এই কারণে মার্কস্ রাষ্ট্রকে শ্রেণীস্বার্থের ধারক এবং শ্রেণীস্বার্থের পৃষ্ঠপোষক বলিয়া বর্ণনা করিয়াছেন। কিন্তু অবশেষে শোষিত শ্রেণী সংঘবদ্ধ হইয়া বিপ্লব-সাহায্যে ধনতন্ত্রের বিলোপসাধন করিয়া বিত্তহীনের একনায়কত্ব প্রতিষ্ঠিত করে।

মার্কসের মতবাদের প্রধান ত্রুটি হইল যে, এই মতবাদ ইতিহাসের ঘটনাবলী নিয়ন্ত্রণে একমাত্র অর্থনৈতিক শক্তির প্রভাবের উপর গুরুত্ব আরোপ করে। অর্থনৈতিক শক্তি ছাড়া আরও নানা কারণে ইতিহাসের ঘটনাবলী প্রভাবিত হইয়াছে এবং হইতে পারে। (১০০—১০৪ পৃঃ)

9. Discuss the nature of sovereignty, and distinguish between (a) Legal and Political Sovereignty and (b) *De jure* and *De facto* Sovereignty.

উঃ ইঃ—রাষ্ট্রের মৌলিক, অসীম ও অপ্রতিহত ক্ষমতাকে সার্বভৌম ক্ষমতা বলা হয়। রাষ্ট্রের প্রত্যেকটি অধিবাসী এবং রাষ্ট্রভুক্ত প্রত্যেকটি প্রতিষ্ঠানের উপর রাষ্ট্রের মৌলিক, চূড়ান্ত এবং অসীম ক্ষমতা আভ্যন্তরীণ সার্বভৌম ক্ষমতা বলিয়া পরিচিত। বৈদেশিক ব্যাপারেও রাষ্ট্র সম্পূর্ণ স্বাধীন। বৈদেশিক নিয়ন্ত্রণমুক্ত রাষ্ট্রের এই স্বাধীন সত্তাকে বাহ্যিক সার্বভৌমত্ব বলা হয়।

সার্বভৌমত্বের বৈশিষ্ট্য হইল যে, এই ক্ষমতা অসীম, অবিভাজ্য, হস্তান্তরের অযোগ্য, স্থায়ী ও অবিনশ্বর।

আইনগত সার্বভৌম হইল রাষ্ট্রের আইন প্রণয়ন এবং আইন বলবৎ করিবার চূড়ান্ত ক্ষমতার অধিকারী। ইংলণ্ডে রাজা-সহ পার্লামেন্ট সভা হইল আইনগত সার্বভৌম। আইনগত সার্বভৌমের পশ্চাতে যে শক্তি প্রত্যক্ষ এবং পরোক্ষভাবে আইনপ্রণয়নে প্রভাব বিস্তার করে সেই শক্তিকে রাজনৈতিক সার্বভৌম বলা হয়। দেশের নির্বাচকমণ্ডলী হইল রাজনৈতিক সার্বভৌম শক্তির অধিকারী। কিন্তু আইনগত সার্বভৌম আইনপ্রণয়নে সর্বস্বা হইলেও রাজনৈতিক সার্বভৌমের নিকট দায়ী। আবার রাজনৈতিক সার্বভৌম আইনগত সার্বভৌমের স্রষ্টা হইলেও তাহাদের নির্দেশ আইনের মর্যাদা লাভ করিতে পারে না।

যে ব্যক্তি বা যে প্রতিষ্ঠান আইনের চক্ষে সার্বভৌম বলিয়া স্বীকৃত হয়, সেই ব্যক্তি বা প্রতিষ্ঠানকে আইনানুমোদিত সার্বভৌম বলা হয়, যথা, ইংলণ্ডের রাজা-সহ পার্লামেন্ট সভা। অপরপক্ষে যে শক্তির বলে কোন কর্তৃপক্ষ বৈধভাবে বা অবৈধভাবে জনগণের নিকট হইতে আনুগত্য লাভ করে ও ইহার নির্দেশ বলবৎ করিতে পারে, তাহাকে বাস্তব সার্বভৌম বলা হয়। (১১০—১১৬ পৃঃ)

10. Discuss the Doctrine of Popular Sovereignty. What are its limitations ?

উঃ ইঃ—এই মতবাদে জনসাধারণকে সার্বভৌম ক্ষমতার অধিকারী বলা হয়। ফরাসী দার্শনিক রুশো এই মতের প্রধান সমর্থক ছিলেন।

জনগণ সার্বভৌম ক্ষমতার অধিকারী হইলেও কার্যক্ষেত্রে এই ক্ষমতা তাহারা প্রয়োগ করিতে অসমর্থ। অনেক বলেন, ভোটদানক্ষমতা হইল সার্বভৌম শক্তির পরিচায়ক। কিন্তু এই ভোটদানক্ষমতা সকলের নাই। ইহা ছাড়া, জনগণ সমবেতভাবে তাহাদের ইচ্ছা প্রকাশ করিলেও সেই ইচ্ছা আইন বলিয়া বিচারালয় কর্তৃক গৃহীত হইতে পারে না।

গণসার্বভৌমত্ব হইল সুসংবদ্ধ জনমতের শক্তি। কোন রাষ্ট্রই জনমতের দাবী উপেক্ষা করিতে পারে না। (১১৬—১১৯ পৃঃ)

11. State and examine the Austinian theory of sovereignty.

উঃ ইঃ—অষ্টিন আইনবিদের দৃষ্টিভঙ্গী লইয়া সার্বভৌমত্বের আলোচনা করিয়াছিলেন। তিনি সমাজের একটি সুনির্দিষ্ট মানবীয় কর্তৃপক্ষের উপর আইনগত সার্বভৌমত্ব আরোপ করিয়া তাহার নির্দেশকে আইন আখ্যা দিয়াছিলেন। সার্বভৌমত্বের ক্ষমতা অসীম, শ্রেয় ও অবিভাজ্য।

অষ্টিনের সার্বভৌমত্বের ত্রুটি হইল যে, এই মতবাদ গণতন্ত্র-বিরোধী। আইনপ্রণয়নে প্রথাগত বিধান ও রাজনৈতিক সার্বভৌমত্বের প্রভাব এই মতবাদে স্বীকৃত হয় না।

আইনগত সার্বভৌমত্বের সুস্পষ্ট ব্যাখ্যা হিসাবে গ্রহণীয় হইলেও তাহার মতবাদ সার্বভৌমিকতা সম্পর্কে পূর্ণাঙ্গ তত্ত্ব বলিয়া বিবেচিত হইতে পারে না। (১২১—১২৫ পৃঃ)

12. Discuss the Pluralistic criticism of the classical theory of sovereignty.

উঃ ইঃ—সার্বভৌম শক্তির অসীম ও অনিয়ন্ত্রিত ক্ষমতার প্রতিবাদ-স্বরূপ বহুত্ববাদের আবির্ভাব হয়। এই মতবাদের সারমর্ম হইল যে, রাষ্ট্র সমাজের অন্তর্ভুক্ত বহু প্রতিষ্ঠানের মধ্যে একটি প্রতিষ্ঠান মাত্র। বিশ্ববিদ্যালয়, ধর্মসংগঠন, শ্রমিকসংঘ প্রভৃতির স্রায় রাষ্ট্র একটি সামাজিক প্রতিষ্ঠান মাত্র। সমাজজীবনে সকল প্রতিষ্ঠানেরই উপযোগিতা আছে। প্রতিষ্ঠান হিসাবে রাষ্ট্র মানবজীবনের বহির্ভাগ নিয়ন্ত্রণ করে—অন্তর্ভাগ নিয়ন্ত্রণ করিতে অক্ষম। সুতরাং রাষ্ট্রের কার্যকারিতা স্বাভাবতঃই সীমাবদ্ধ।

কিন্তু কাজের অহুপাতে রাষ্ট্রের ক্ষমতা অসীম। এই কারণে বহুত্ববাদিগণ সসীম রাষ্ট্রকে অসীম ক্ষমতার অধিকার হইতে বঞ্চিত করিতে চাহেন। তাঁহারা বলেন, সমাজের প্রত্যেকটি প্রতিষ্ঠান নিজ নিজ কার্যক্ষেত্রে সম্পূর্ণ স্বাধীন। এই প্রতিষ্ঠানগুলির উপর অবাধ কর্তৃত্ব করিবার রাষ্ট্রের কোন অধিকার সমর্থন করা যায় না। কিন্তু এই মতবাদের বিরুদ্ধে বলা যায় যে, সমাজের বিভিন্ন প্রতিষ্ঠানগুলির মধ্যে মতবিরোধ ও বিবাদ অবসান করিবার জন্য রাষ্ট্রের প্রাধান্ত অপরিহার্য।

বহুত্ববাদিগণ আরও বলেন, আভ্যন্তরীণ ব্যাপারে রাষ্ট্রের অবাধ ক্ষমতা যেহেতু অন্তর্গত সামাজিক প্রতিষ্ঠানের অধিকার দ্বারা সীমাবদ্ধ, বৈদেশিক ব্যাপারেও রাষ্ট্রের অবাধ ক্ষমতা তদ্রূপ অন্ত রাষ্ট্রের অধিকার দ্বারা সীমাবদ্ধ। প্রত্যেক রাষ্ট্রের পক্ষে আন্তর্জাতিক আইন মানিয়া চলা বাধ্যতামূলক।
(১২৭—১৩১ পৃঃ)

13. How far is the sovereignty of a state limited by
(1) Constitutional Law, and (2) International Law ?

উঃ ইঃ—রাষ্ট্রের সার্বভৌম ক্ষমতাকে স্বৈর, অসীম ও অবিভাজ্য বলিয়া বর্ণনা করা হয়। সুতরাং সার্বভৌম ক্ষমতার এই সংজ্ঞাহসারে ইহার ক্ষমতা-প্রয়োগের কোন আইনসম্মত বাধা থাকিতে পারে না। কিন্তু অনেকে বলেন যে, শাসনতান্ত্রিক আইন হইল রাষ্ট্রের আভ্যন্তরীণ সার্বভৌম ক্ষমতার সীমা, আর বৈদেশিক ব্যাপারে আন্তর্জাতিক আইন হইল রাষ্ট্রের বাহ্যিক সার্বভৌম ক্ষমতার সীমা।

কিন্তু প্রকৃতপক্ষে শাসনতান্ত্রিক আইন রাষ্ট্রের সার্বভৌম ক্ষমতার সীমা নহে—এই আইন সরকারের ক্ষমতা নিয়ন্ত্রণ করে। রাষ্ট্র ইচ্ছা করিলে শাসনতান্ত্রিক আইন পরিবর্তন করিতে পারে। বৈদেশিক ব্যাপারেও কোন রাষ্ট্রের পক্ষেই আন্তর্জাতিক আইন রাষ্ট্রের সার্বভৌম ক্ষমতার আইনগত বাধা বলিয়া গণ্য হয় না। আইনতঃ কোন রাষ্ট্রই শাসনতান্ত্রিক আইন বা আন্তর্জাতিক আইন মানিতে বাধ্য নয়, তবে কার্যক্ষেত্রে অনেক সময় রাষ্ট্র ইহার কার্যকলাপ এরূপভাবে নিয়ন্ত্রণ করে যেহেতু ঐ নীতিগুলি উপেক্ষিত না হয়।
(১২৬—১২৭ পৃঃ)

14. Is it enough to say that law is the command of the sovereign ?

উঃ হৈঃ—জন অঙ্গিন ও তাঁহার অনুগামীদের মতে আইন হইল সার্বভৌমের নির্দেশ। আইন যেরূপে প্রচারিত হউক না কেন, ইহার একমাত্র উৎস হইল সার্বভৌম শক্তি। সুতরাং এই মতবাদ অনুসারে বলা হয় যে, আইন একটা নির্দিষ্ট কর্তৃপক্ষ কর্তৃক রচিত হয় এবং আইন বলবৎ করিবার জন্ত এক সার্বভৌম শক্তির প্রয়োজন অপরিহার্য। হেনরি মেইনের মতে সার্বভৌমের নির্দেশ আইনের একমাত্র উৎস নহে। প্রথা, আচার, ধর্মীয় বিধিনিষেধ, বিচারালয়ের সিদ্ধান্ত প্রভৃতি নানাপ্রকার সামাজিক শক্তি আইনের পরিবর্তনে সাহায্য করে। অঙ্গিনের সংজ্ঞানুসারে আন্তর্জাতিক আইনকেও আইন বলা যায় না, কারণ এই আইন কোন অভিভাবক রাষ্ট্রের (Super state) নির্দেশ নহে।

অঙ্গিনের অনুগামী হল্যাণ্ড প্রভৃতি লেখকগণ বলেন, আইন হইল মানুষের বহিজীবন-সম্পর্কিত কতকগুলি বিধিনিষেধ যাহা সার্বভৌম শক্তি কর্তৃক বলবৎ করা হয়। অঙ্গিনের অনুগামীগণ দুই দিক দিয়া অঙ্গিন-প্রদত্ত সংজ্ঞার পরিবর্তন করেন। প্রথমতঃ, আইন শুধু সার্বভৌমের নির্দেশ নয়, স্বভাবজাত প্রথা, বিচারালয়ের সিদ্ধান্ত প্রভৃতির সমাবেশে আইনের সৃষ্টি হয়। দ্বিতীয়তঃ, উর্ধ্বতন কর্তৃপক্ষ আইনের স্রষ্টা নয়। এই কর্তৃপক্ষ আইন বলবৎ করে মাত্র। উর্ধ্বতন কর্তৃপক্ষও আইন মানিতে বাধ্য।

বর্তমানে আইন জনমতের ভিত্তির উপর প্রতিষ্ঠিত বলিয়া পরিগণিত হয়। রাষ্ট্রের সার্বভৌম শক্তি জনমত অনুসারেই এই আইনগুলিকে বলবৎ করে।

(১৩৭—১৩৯ পৃঃ)

15. Define Law, and point out the distinction and relation between Law and Morality.

উঃ হৈঃ—আইন হইল মানুষের বহিজীবন-সম্পর্কিত কতকগুলি বিধিনিষেধ যাহা রাষ্ট্রীয় সার্বভৌম শক্তি কর্তৃক বলবৎ করা হয়। আইনের দুইটি প্রধান বৈশিষ্ট্য আছে—একটি হইল ইহার সার্বজনীন রূপ, অর্থাৎ সমাজের প্রত্যেক ব্যক্তির উপর আইন সমভাবে প্রযোজ্য। দ্বিতীয়টি

হইল আইন মানিবার বাধ্য-বাধকতা অর্থাৎ সকলেই আইন মানিতে বাধ্য।

১। নৈতিক নিয়ম মানুষের অন্তর্জীবন ও বহির্জীবন উভয়কে নিয়ন্ত্রণ করে—রাষ্ট্রীয় আইন শুধু মানুষের বহির্জীবনের একটা প্রধান অংশ নিয়ন্ত্রণ করে।

২। নৈতিক নিয়ম মানুষের বিবেক বা জ্ঞানমত দ্বারা অনুমোদিত হয়। রাষ্ট্রীয় আইন রাষ্ট্রের সার্বভৌম শক্তি কর্তৃক বলবৎ হয়।

৩। নৈতিক নিয়মগুলি অপেক্ষাকৃত অসংবদ্ধ ও অস্পষ্ট, অপরপক্ষে রাষ্ট্র-প্রণীত আইন সুসংবদ্ধ ও সুস্পষ্ট।

৪। নৈতিক নিয়মগুলি মানুষের ঔচিত্যবোধের মান দ্বারা স্থিরীকৃত হয়, রাষ্ট্রীয় আইনের ক্ষেত্রে এরূপ কোন নির্দিষ্ট মান নাই। সমাজের সুবিধা-অসুবিধা বিবেচনা করিয়া রাষ্ট্রীয় আইন পরিবর্তিত হইতে পারে।

৫। নীতিজ্ঞানবিরোধী কার্যকলাপ সব সময়ে বে-আইনী বলিয়া পরিগণিত হয় না, অপরপক্ষে নীতিজ্ঞানবিরোধী না হইলেও অনেক কার্যকলাপ বে-আইনী হইতে পারে।

উপরি-উক্ত পার্থক্য থাকা সত্ত্বেও রাষ্ট্রীয় আইন ও নৈতিক নিয়ম ঘনিষ্ঠ সম্পর্কযুক্ত। উভয় আইনই মানুষের ধর্মগত ধারণা হইতে উদ্ভূত হইয়াছে। প্রচলিত নীতিজ্ঞানসম্মত না হইলে কোন রাষ্ট্রীয় আইনই জ্ঞানমতের সমর্থন লাভ করিতে পারে না। মানুষের নৈতিক জীবনের উৎকর্ষসাধন করাই হইল উভয়বিধ আইনের প্রধান উদ্দেশ্য।

(১৪৫—১৪৭ পৃঃ)

16. Can International Law be regarded as Law in the strict sense of the term? Give reasons for your answer.

উঃ হঃ—আন্তর্জাতিক আইন সভ্য রাষ্ট্রসমূহের পারস্পরিক সম্পর্ক নির্ধারণ করে। এই আইন এক রাষ্ট্রের সহিত অপর রাষ্ট্রের শান্তির সময়ে, যুদ্ধকালে বা নিরপেক্ষ অবস্থায় কি সম্পর্ক হইবে তাহা স্থির করিয়া আন্তর্জাতিক শান্তি ও সম্প্রীতি রক্ষা করে। আন্তর্জাতিক আইন প্রণয়ন

করিবার কোন নির্দিষ্ট উচ্চতর কর্তৃপক্ষ নাই; রাষ্ট্রগুলির সম্মতিই হইল ইহার প্রধান অনুমোদন।

অষ্টিন-প্রদত্ত আইনের সংজ্ঞানুসারে আন্তর্জাতিক আইনকে প্রকৃত আইন বলা যায় না। আন্তর্জাতিক আইন-ভঙ্গকারী রাষ্ট্রকে দণ্ড দিবার উপযুক্ত কোন উচ্চতর কর্তৃপক্ষ নাই। এই সমস্ত কারণে আন্তর্জাতিক আইনকে প্রকৃত আইন বলিতে অনেকে আপত্তি করেন।

কিন্তু আন্তর্জাতিক আইন যে প্রকৃত আইন তাহা রাষ্ট্রগুলির সাধারণ আচরণের দ্বারা প্রমাণিত হয়। সাধারণতঃ রাষ্ট্রগুলি এই আইন মানিয়া চলে। -ইচ্ছাপূর্বক আন্তর্জাতিক আইন ভঙ্গ করিয়াছে বলিয়া কোন রাষ্ট্রই স্বীকার করে না। ইহা ছাড়া, আইন হইল কতকগুলি নিয়মের সমষ্টি বাহা সর্বসাধারণের সম্মতির উপর প্রতিষ্ঠিত—শুধু কোন উচ্চতর কর্তৃপক্ষের সম্মতির উপর প্রতিষ্ঠিত নহে। বর্তমান যুগে আন্তর্জাতিক আইনের সপক্ষে পৃথিবীব্যাপী একটি শক্তিশালী জনমতের সৃষ্টি হইয়া ইহাকে শক্তিশালী করিয়াছে। আন্তর্জাতিক আইন প্রকৃত আইন বলিয়া পরিগণিত না হইলে বিশ্বশান্তি প্রতিষ্ঠিত হইতে পারে না। (১৪৭—১৫০ পৃঃ)

17. Discuss the nature of the Law of Nature.

উঃ হৈঃ—রাষ্ট্র উৎপত্তির পূর্বে মানুষ যে পরিবেশে বাস করিত তাহাকে প্রকৃতির রাজ্য বলা হয় এবং এই অবস্থায় মানুষ যে সমস্ত আইন মান্ত করিত সেগুলি প্রাকৃতিক আইন বলিয়া বর্ণনা করা হইয়াছে। গ্রীক দার্শনিকগণের মতে প্রকৃতির রাজ্যে যে নিয়মানুবর্তিতা ও সামঞ্জস্য বিद्यমান, মানবসমাজের নিয়মগুলিও প্রাকৃতিক নিয়মগুলির অনুরূপ হওয়া উচিত। মনুষ্যকৃত নিয়মগুলি প্রাকৃতিক নিয়মগুলির অনুরূপ হইলে সেগুলিকে প্রাকৃতিক নিয়ম বলা হইত। মানুষের বিবেক-বুদ্ধি দ্বারা ব্যাখ্যাত প্রাকৃতিক নিয়মগুলি কালক্রমে আইনের মর্যাদা পায়। রোমকগণ এই প্রাকৃতিক আইনের ভিত্তিতে তাঁহাদের আন্তর্জাতিক আইন (Jus-Gentium) সৃষ্টি করেন।

প্রাকৃতিক নিয়মের বিরুদ্ধে বলা হয় যে, ইহার পশ্চাতে কোন আইনের অনুমোদন নাই। প্রাকৃতিক নিয়মগুলি একটি নৈতিক আদর্শের মান স্থির

করে। কিন্তু মানুষের দৈনন্দিন কার্যকলাপে এই নৈতিক মান বলবৎ করা সম্ভব নয়।

জুরির বিচার, বিচারকালে বিচারকদের ভ্রাতৃত্ব ও ধর্মনীতি অনুসরণ, আন্তর্জাতিক আইনের ক্রমবর্ধমান প্রভাব প্রভৃতিকে প্রাকৃতিক নিয়মের পরোক্ষ প্রয়োগ বলা যাইতে পারে। (১৪৩—১৪৪ পৃঃ)

18. Explain the theory "One Nation, One State." Would you accept it? State your reasons fully.

19. Discuss the case for and against the Right of self-determination as a principle of organisation of states.

উঃ ইঃ—একটি রাষ্ট্র একই জাতির লোক লইয়া গঠিত হইবে বা নানা জাতির লোক লইয়া গঠিত হইবে—ইহা লইয়া বহু মতভেদ আছে। অনেকের মতে একজাতির ভিত্তিতে গঠিত রাষ্ট্র হইল আদর্শ রাষ্ট্র এবং যখন প্রত্যেক স্বতন্ত্র জাতি স্বতন্ত্র রাষ্ট্র গঠন করিবার দাবী করে, তখন এই দাবীকে আত্মনির্ধারণের অধিকার বলা হয়। এই আত্মনির্ধারণের অধিকার অর্থাৎ প্রত্যেক স্বতন্ত্র জাতির পৃথক্ রাষ্ট্র গঠন করিবার অধিকার বহুদিন পর্যন্ত স্বীকৃত হয় নাই। ওয়েষ্টফেলিয়ার শান্তিচুক্তি সম্পাদনের সময় হইতে আরম্ভ করিয়া বর্তমান কাল পর্যন্ত ক্ষুদ্র ক্ষুদ্র পরাধীন জাতিগুলি এই দাবী করিয়া আসিতেছে এবং গণতান্ত্রিক আদর্শের বহুল প্রসারের ফলে আজ এই দাবী স্বীকৃত হইতে চলিয়াছে।

একজাতির ভিত্তিতে গঠিত রাষ্ট্রের অনেক সুবিধা আছে। যে রাষ্ট্রে শুধুমাত্র একজাতির লোক বাস করে, জাতিগত ঐক্যের ফলে তাহা সুদৃঢ় ভিত্তির উপর প্রতিষ্ঠিত হয়। ভাষা, ধর্ম, কৃষ্টি প্রভৃতির ঐক্যের ফলে সে রাষ্ট্র ধনে, জ্ঞান-বিজ্ঞানে অগ্রগামী হইতে পারে। এরূপ রাষ্ট্র নিজের ইচ্ছামত তাহার জাতীয় প্রগতির ব্যবস্থা করিতে পারে। অপরপক্ষে রাষ্ট্র যদি বহু জাতির সমন্বয়ে গঠিত হয়, তাহা হইলে জাতিগত, ভাষাগত, ধর্মগত, ভাবগত প্রভৃতি অনৈক্যের জগ্ন সে রাষ্ট্রে একাত্মবোধ জন্মিতে পারে না। পারস্পরিক কলহ ও বিদ্বেষ সে রাষ্ট্র দুর্বল হইয়া পড়ে—রাষ্ট্রের অগ্রগতি বাধা পায়। এইজন্য বহুজাতি-ভিত্তিক রাষ্ট্র ভাঙ্গিয়া একজাতি-ভিত্তিক রাষ্ট্রগঠনের দাবী সত্যসঙ্গত বলিয়া মনে হয়।

কিন্তু 'একজাতি, এক রাষ্ট্র'—এই ভিত্তিতে সব সময়ে রাষ্ট্র গঠন করা সম্ভবও নয়, কাম্যও নয়। প্রথমতঃ বলা যায় যে, বিভিন্ন জাতিগুলি একই দেশে দীর্ঘদিন ধরিয়া বাস করিয়া একরূপভাবে সংমিশ্রিত হইয়াছে যে, বর্তমানে তাহাদের পৃথক্ করা সম্ভব নয়। দ্বিতীয়তঃ, এই নীতির অবাধ প্রয়োগের ফলে বহু পুরাতন ঐক্যবদ্ধ রাষ্ট্র ভাঙ্গিয়া একাধিক রাষ্ট্র গঠন করিতে হইবে। ইয়ুরোপে বর্তমান ২৮টি রাষ্ট্রের পরিবর্তে ৬৮টি রাষ্ট্র হইবে। তৃতীয়তঃ, এই বিভাগের ফলে প্রত্যেক রাষ্ট্রের স্বয়ংসম্পূর্ণতা বিনষ্ট হইবে এবং এই বিভাগের ফলে পরস্পরের সম্পর্ক তিস্ত হইয়া কলহবিবাদের স্রোতপাত হয়। ভারত বিভাগ, প্যালেষ্টাইন বিভাগ ইহার জলন্ত দৃষ্টান্ত। পরিশেষে বলা যায় যে, বহুজাতি-ভিত্তিক রাষ্ট্র যে একজাতি-ভিত্তিক রাষ্ট্র অপেক্ষা দুর্বল বা অনগ্রসর তাহা সব সময়ে সত্য নহে। সোভিয়েত যুক্তরাষ্ট্র, মার্কিন যুক্তরাষ্ট্র প্রভৃতি দেশ বহু জাতির সমন্বয়ে গঠিত হইলেও ধনে, জ্ঞান-বিজ্ঞানে আজ পৃথিবীর শীর্ষস্থান অধিকার করিতে সমর্থ হইয়াছে। সুতরাং 'একজাতি, এক রাষ্ট্র' এই নীতি সর্বক্ষেত্রে প্রয়োগ করা যুক্তিযুক্ত নয়। (: ৬৪—১৬৭ পৃঃ)

20. What are the essential factors that tend to constitute a group of people into a nationality.

উঃ হঃ—বাহ্যিক ও ভাবগত ঐক্যের ফলে একদল লোক যখন ঐক্যবদ্ধ হইয়া পৃথিবীর অন্তান্ত জনসমাজ হইতে নিজেদের পৃথক্ মনে করে, তখনই তাহাদের জাতীয়তাবোধের উদয় হয়। জাতীয়তাবোধ বা সাজাত্যবোধ একটি মানসিক অল্পভূতির ব্যাপার। এই অল্পভূতি বাহ্যিক ঐক্য অপেক্ষা মানসিক ঐক্য দ্বারা অধিক প্রভাবিত হয়।

বাহ্যিক ঐক্যগুলি বংশগত, ভাষাগত, ধর্মগত বা বাসস্থানগত ঐক্য। যদি একদল লোক তাহাদের সকলকেই একক বংশোদ্ভব বলিয়া মনে করে, তাহা হইলে এই দলের মধ্যে ঐক্যবোধ দ্রুত বৃদ্ধি পাইয়া তাহাদের জাতীয়তাবোধ প্রবল হয়। একই ভাষা ভাব-বিনিময়ের বাহন। সুতরাং জাতীয়তাবোধ জাগ্রত করিতে ভাষাগত ঐক্যও সাহায্য করে। একই রাষ্ট্রের সকল লোকই যদি একই ধর্মমত অগ্রসরণ করে, তাহা হইলে এই ধর্মীয় বন্ধন তাহাদের জাতীয়তাবোধ বৃদ্ধি করে। আবার একই ভৌগোলিক

পরিবেশে বাস করিলে একতাবোধ গড়িয়া উঠে। উপরি-উক্ত প্রভাবগুলির সাহায্যে ঐক্যবোধ সৃষ্টি হইতে পারে ইহা সত্য। কিন্তু উক্ত প্রভাবগুলির অবর্তমানে যে জাতীয়তাবোধ জাগ্রত হইতে পারে না, ইহা বলিলে ভুল হইবে। সুইজারল্যাণ্ডে বিভিন্ন বংশোদ্ভব, বিভিন্ন ভাষা-ভাষী ও বিভিন্ন ধর্মাবলম্বী লোক বাস করিলেও তাহারা আজ এক শক্তিশালী জাতীয়তাবোধ দ্বারা অল্পপ্রাণিত হইয়া এক অখণ্ড জাতিতে পরিণত হইয়াছে। মোন্ডিয়েত যুক্তরাষ্ট্রও জাতি, ভাষা, ধর্ম প্রভৃতির বৈচিত্র্য সত্ত্বেও এক শক্তিশালী জাতিতে পরিণত হইয়াছে। তাই বলা হয় যে, জাতীয়তাবোধ সৃষ্টি করিতে বাহ্যিক ঐক্য অপেক্ষা ভাবগত ঐক্য অধিক প্রভাব বিস্তার করে। একদল লোকের মধ্যে কুলগত, ভাষাগত, ধর্মগত বিভিন্নতা থাকিতে পারে, কিন্তু অতীতে যদি একই ঘটনাবলীর পথে তাহাদের জীবন গঠিত হইয়া থাকে এবং ভবিষ্যতে একই অর্থনৈতিক ও রাজনৈতিক আদর্শে উপনীত হইবার জন্য যদি তাহারা একতাবদ্ধ হয়, তাহা হইলে এইরূপ মনোভাবসম্পন্ন একদল লোক এক জাতীয়তাবোধে অল্পপ্রাণিত হইয়া এক জাতিতে পরিণত হয়। অতীতের এই সম-সুখদুঃখভোগের স্মৃতি ও ভবিষ্যতের আদর্শ এই জনসমষ্টির মধ্যে ঐক্যবোধ জাগরিত করিয়া সকলকে একতার স্বত্রে গ্রথিত করে।

(১৫২—১৬২ পৃঃ)

21. Define the term 'Nation' and distinguish it from 'State'. Is India a nation ?

উঃ ইঃ—যখন একদল লোক কুলগত, ভাষাগত, ধর্মগত বা সংস্কৃতিগত ঐক্য দ্বারা অল্পপ্রাণিত হইয়া নিজেদের অন্ত সকল জনসমষ্টি হইতে পৃথক মনে করে, তখন এই জনসমষ্টিকে জাতীয় জনসমাজ (Nationality) বলা হয়। যখন কোন জাতীয় জনসমাজ নিজস্ব জাতীয় সরকার গঠন করে বা নিজেদের এক স্বাধীন রাষ্ট্র গঠন করিবার জন্য সচেষ্ট হয়, তখন জাতীয় জনসমাজ জাতিতে (Nation) পরিণত হয় (A nation is a nationality either independent or desiring to be so)। জাতিগঠনের উপাদান হইল বাহ্যিক এবং বিশেষ করিয়া ভাবগত ঐক্য। এই ঐক্যবোধ দ্বারা অল্পপ্রাণিত জনসমষ্টি যখন রাষ্ট্রনৈতিক চেতনাসম্পন্ন হইয়া স্বাধীন রাষ্ট্র গঠন করে, তখন রাজনীতির ভাষায় তাহাদের জাতি বলা হয়।

নির্দিষ্ট ভূখণ্ডের মধ্যে আইন ও শৃংখলার সহিত সংঘবদ্ধ জনসমষ্টিকে রাষ্ট্র বলা হয়। জনসমষ্টি, নির্দিষ্ট ভূভাগ, শাসনব্যবস্থা ও সর্বোপরি সার্বভৌমিকতা—এই চারটি হইল রাষ্ট্র অস্তিত্বের লক্ষণ। কিন্তু জাতির সংজ্ঞা রাষ্ট্রের সংজ্ঞা হইতে শুধু পৃথক্ নয়, গভীরতর বটে। জাতি বলিয়া পরিগণিত হইতে হইলে রাষ্ট্রভুক্ত জনসমষ্টির মধ্যে একাত্মবোধ থাকা অপরিহার্য। রাষ্ট্র ও জাতি একাত্মবোধক হয় তখন, যখন রাষ্ট্রভুক্ত সমগ্র জনসমষ্টি একই ঐতিহ্যে বিশ্বাসী ও একই আদর্শে অনুপ্রাণিত হয়। একাত্মবোধের অবর্তমানে একটি রাষ্ট্র গঠিত হইতে পারে, কিন্তু একজাতি গঠিত হইতে পারে না। কিন্তু একই রাষ্ট্রের মধ্যে দীর্ঘকাল বসবাস করিলে একই শাসন, আইন ও শিক্ষা-ব্যবস্থার ফলে বিভিন্ন জাতি ক্রমশঃই একাত্মবোধে উদ্বুদ্ধ হইয়া একজাতিতে পরিণত হয়। আবার একদল লোক যখন জাতীয়তাবোধে উদ্বুদ্ধ হইয়া তাহাদের নিজস্ব জীবন, ভাষা, রীতি ও অর্থনৈতিক স্বার্থ রক্ষা করিতে দৃঢ়সংকল্প হয়, তখন এই একাত্মবোধই তাহাদের জাতির ভিত্তিতে রাষ্ট্রগঠন করিতে সাহায্য করে। এইজন্য বলা হয় যে, রাষ্ট্র জাতি সৃষ্টি করে আবার জাতিও রাষ্ট্র সৃষ্টি করে (“The state creates the nation and the nation creates the state”)।

১২৪৭ সালে স্বাধীনতা লাভ করিবার পূর্বে ভারতকে একজাতি বলিয়া অনেকে গণ্য করিতেন না। বিশেষ করিয়া মুসলীম লীগ প্রচারিত দ্বিজাতিতত্ত্বের ভিত্তিতে ভারতকে একজাতি বলিয়া পরিগণিত করা যুক্তিসম্মত ছিল না। দেশবিভাগের পরবর্তী কালে পূর্ণস্বাধীনতা অর্জনের পর ভারতকে আর একজাতি বলিয়া স্বীকার না করিয়া পারা যায় না। সত্য বটে, ভারতে কুলগত, ভাষাগত, ধর্মগত প্রভৃতি জাতিগঠনের বিভিন্ন বাহ্যিক ঐক্যের অভাব। কিন্তু ভারতবাসী আজ এক গভীরতর ভাবগত ঐক্যের বন্ধনে আবদ্ধ হইয়া এক সার্বভৌম গণতান্ত্রিক সাধারণতন্ত্র প্রতিষ্ঠা করিয়াছে। আর এই স্বাধীন সার্বভৌম রাষ্ট্রের মাধ্যমে ভারতের হিন্দু, বৌদ্ধ, মুসলমান, শিখ, খৃষ্টান প্রভৃতি বিভিন্ন জাতি তাহাদের ভাবগত ঐক্যের দ্বারা অনুপ্রাণিত হইয়া বিশ্বের দরবারে তাহাদের ঐক্য সুপ্রতিষ্ঠিত করিতে সক্ষম হইয়াছে। অসংখ্য বৈচিত্র্যের মধ্যে ঐক্য স্থাপন করাই হইল ভারতীয় সভ্যতার মূল আদর্শ। এই আদর্শ স্বাধীন ভারতীয় রাষ্ট্রের মাধ্যমে আজ

সকল হইতে চলিয়াছে। স্বতরাং তিনজাতি-সম্বিত হুইস দেশ ও বহু-জাতি-সম্বিত রুশ দেশের মত ভারতীয়গণও আজ এক অঞ্চল জাতিতে পরিণত হইয়াছে। (১৫৭—১৫৯, ১৬৪—১৬৫ পৃঃ)

22. State the principal aims and objects of the United Nations. Give a brief outline of its organisations.

উঃ হুইঃ—যে উদ্দেশ্যে প্রথম বিশ্বযুদ্ধের পর জাতিসংঘ প্রতিষ্ঠিত হইয়াছিল, সেই একই উদ্দেশ্যে দ্বিতীয় বিশ্ব-মহাসমরের পর জাতিপুঞ্জ জন্মলাভ করে। চিরতরে যুদ্ধের অবসান ঘটাইয়া বিশ্বশান্তি প্রতিষ্ঠা করাই হইল এই প্রতিষ্ঠানের প্রধান উদ্দেশ্য। শান্তিপূর্ণ উপায়ে আন্তর্জাতিক শান্তি ও নিরাপত্তা রক্ষা করিতে ও নানাভাবে জাতিগুলির মধ্যে সম্ভাব ও সহযোগিতা বৃদ্ধি করিতে এই প্রতিষ্ঠান সাহায্য করে। ইহা ছাড়াও এই প্রতিষ্ঠান বিভিন্ন দেশের জনগণের মৌলিক অধিকার, তাহার মূল্য ও মর্যাদা সংরক্ষণ, জনগণের অর্থনৈতিক ও সামাজিক উন্নতিবিধান সম্বলিত প্রচেষ্টার দ্বারা করিবে বলিয়া স্থির করিয়াছে। ক্ষুদ্র-বৃহৎ সকল জাতির সমানাধিকার স্বীকৃত হইয়া বাহাতে সকল জাতিই পরস্পরের সহিত বন্ধুত্বাবাপন্ন প্রতিবেশীর ন্যায় বাস করিতে পারে তাহার জন্য জাতিপুঞ্জ সংকল্প করিয়াছে।

বর্তমানে প্রায় এক শত জাতি এই সংস্থার সদস্যভুক্ত। নিম্নলিখিত বিভাগগুলি লইয়া এই প্রতিষ্ঠান গঠিত :

১। সাধারণ সভা—সদস্য জাতিসমূহ হইতে পাঁচ জন করিয়া প্রতিনিধি লইয়া এই সভা গঠিত হইলেও প্রত্যেক জাতির একটি মাত্র ভোট আছে।

২। নিরাপত্তা, স্বস্তি পরিষদ—পাঁচ জন স্থায়ী ও দশজন অস্থায়ী মোট পনের জন সদস্য লইয়া এই পরিষদ গঠিত। এই পরিষদই হইল জাতিপুঞ্জের শাসনবিভাগ। কোন রাষ্ট্রের বিরুদ্ধে যুদ্ধ ঘোষণা করিতে হইলে সমস্ত স্থায়ী সদস্যের সম্মতি প্রয়োজন।

৩। অছি পরিষদ—আত্মনির্ধারণের অধিকারহীন জাতিসমূহের শাসন-ব্যাপারে এই পরিষদ তত্ত্বাবধায়কের কাজ করে।

৪। আন্তর্জাতিক আদালত—সাধারণ সভা কর্তৃক নির্বাচিত ১৫ জন

বিচারপতি লইয়া এই আদালত গঠিত। আন্তর্জাতিক আইন সম্পর্কিত বিষয় সম্পর্কে এই আদালত মীমাংসা করে।

৫। অর্থনৈতিক ও সামাজিক পরিবর্তন—আঠার জন সদস্য-সমন্বিত এই পরিষদ জাতিসমূহের সামাজিক ও অর্থনৈতিক সমস্যাসমূহের সমাধান সম্পর্কে আলোচনা করে।

ইহা ছাড়াও কর্মসংস্থা, শ্রম, স্বাস্থ্য ও শ্রমিক-সম্পর্কিত বিষয়গুলির সমাধান করিবার জন্ত বহু শাখা-সমিতি আছে। (১৭৫—১৭৯ পৃঃ)

23. What is meant by the term Rights? "Rights and Duties go together." Explain.

উঃ ইঃ—সাধারণ অর্থে অধিকার বলিতে আমরা বুঝি নাগরিকের স্ব-ইচ্ছায় কিছু করিবার বা না করিবার অবাধ ক্ষমতা। কিন্তু একজনের এইরূপ অবাধ অধিকার অন্য ব্যক্তির অধিকারভোগে বাধা জন্মাইতে পারে। সেইজন্য সমাজব্যবস্থায় কাহারও এইরূপ অবাধ ও অনিয়ন্ত্রিত অধিকার স্বীকৃত হয় না। রাষ্ট্রের উদ্দেশ্য হইল আইনের সাহায্যে সমাজে এইরূপ পরিবেশ সৃষ্টি করা, যে পরিবেশে প্রত্যেক ব্যক্তিই তাহার চরিত্রের পূর্ণ-বিকাশ করিয়া সমষ্টিগত জীবনের উন্নতিসাধন করিতে পারে। এই উদ্দেশ্য-সাধনের জন্ত যে সমস্ত অধিকারের প্রয়োজন সেগুলিকে প্রকৃত অধিকার বলা হয়। অধ্যাপক ল্যান্সি বলেন, অধিকার হইল মানুষের সামাজিক জীবনের সেইসকল ক্ষমতা, যেগুলির অভাবে মানুষ পূর্ণতাপ্রাপ্ত হইতে পারে না। সুতরাং যে ক্ষমতাগুলি মানুষের পূর্ণতাপ্রাপ্তির সহায়ক—অথচ অন্য ব্যক্তির গ্রাহ্য অধিকার ক্ষুণ্ণ করে না—সেইগুলি প্রকৃত অধিকার, আর যেগুলি পূর্ণতাপ্রাপ্তির অন্তরায় সেগুলিকে অধিকার না বলিয়া অনধিকার বলা যায়।

অধিকার ও কর্তব্য একই আদর্শের দুইটি বিভিন্ন প্রকাশ। একটিকে বাদ দিয়া অপরটি থাকিতে পারে না। আমার যাহা অধিকার, অন্তের তাহা কর্তব্য এবং অন্তের যাহা অধিকার, আমার তাহা কর্তব্য। আমার যেসকল বাঁচিয়া থাকিবার অধিকার আছে, অন্তের সেইরূপ বাঁচিয়া থাকিবার অধিকার আছে। আমার কর্তব্য হইল অন্তকে বাঁচিয়া থাকিতে দেওয়া ও

অন্তের কর্তব্য হইল আমার বাঁচিয়া থাকিবার অধিকার ক্ষুণ্ণ না করা। তাই অধিকার ও কর্তব্য অদ্বাদ্বিভাবে জড়িত। আবার রাষ্ট্রের সহিত সম্পর্কেও নাগরিকের বাহা অধিকার, রাষ্ট্রের তাহা কর্তব্য এবং রাষ্ট্রের বাহা অধিকার, নাগরিকের তাহা কর্তব্য। নাগরিক রাষ্ট্রের নিকট হইতে জীবন ও সম্পত্তির নিরাপত্তা দাবী করিতে পারে এবং রাষ্ট্রের কর্তব্য হইল এই নিরাপত্তা রক্ষা করা। আবার রাষ্ট্র নাগরিকগণের নিকট হইতে আত্মগত্যা ও কর-প্রদান দাবী করিতে পারে এবং নাগরিকের কর্তব্য হইল রাষ্ট্রের প্রতি আত্মগত্যা প্রদর্শন ও কর প্রদান। অধিকার ও কর্তব্য সম্পর্কে নাগরিকগণের সুস্পষ্ট ধারণা জন্মিলে সমাজজীবনের অগ্রগতি সম্ভব হয়। (২০২—২০৩ পৃঃ)

24. What are the fundamental duties of a citizen in a modern state ?

উঃ হৈঃ—কর্তব্যের অর্থ হইল দায়িত্ব অর্থাৎ যেগুলি নাগরিক হিসাবে প্রত্যেক ব্যক্তির পক্ষে অবশ্যকরণীয়। অধিকারের ত্রায় কর্তব্য আবার দুই প্রকারের হইতে পারে, যথা, নৈতিক কর্তব্য ও আইনগত কর্তব্য। পিতার কর্তব্য হইল পুত্রকে শিক্ষা দেওয়া—এই কর্তব্য হইল নৈতিক, ইহা পালন না করিলে পিতা সমাজে নিন্দনীয় হইলেও শাস্তি পান না। কিন্তু কর প্রদান করা হইল নাগরিকদের আইনগত কর্তব্য। এই কর্তব্য পালন না করিলে নাগরিক শাস্তি পায়।

আইনগত কর্তব্য ছাড়াও প্রত্যেক নাগরিকের কতকগুলি নৈতিক কর্তব্য আছে। এই কর্তব্যগুলি হইল পরিবারের প্রতি ও সমাজের প্রতি। মানুষ যে পরিবারে জন্মগ্রহণ করে ও যে সামাজিক পরিবেশে সে বর্ধিত হয়, সেই পরিবার ও সমাজের প্রতি তাহার আত্মগত্যা ও শ্রদ্ধা থাকা উচিত। মানুষ যে সমাজবিরোধী কোন কাজ করিবে না তাহা যথেষ্ট নহে, সে তাহার চিন্তাধারা ও কার্যকলাপ একরূপভাবে পরিচালিত করিবে বাহাতে তাহার নিজের ও সমাজের মঙ্গল হয়।

রাষ্ট্রের প্রতি নাগরিকের প্রধান কর্তব্য হইল আত্মগত্যা স্বীকার করা। আত্মগত্যের অর্থ হইল রাষ্ট্রের কার্যে বাধা না দিয়া সর্বতোভাবে রাষ্ট্রের

স্বায়ম্ভূত কাজ সাহায্য করা। দ্বিতীয়তঃ, রাষ্ট্র-প্রবর্তিত আইন মান্য করা নাগরিকের পবিত্র কর্তব্য। রাষ্ট্র-প্রণীত আইন যদি অত্যাচার বা অসঙ্গত মনে হয়, তাহা হইলে নাগরিকের কর্তব্য হইল জনমত সৃষ্টি করিয়া আইনানুসারিতভাবে অসঙ্গত আইনের বিরুদ্ধে আন্দোলন করা। তৃতীয়তঃ, রাষ্ট্র-পরিচালনাকার্যের ব্যয়নির্বাহের জন্য প্রত্যেক নাগরিকের পক্ষে সময়মত ধর্ম কর প্রদান করা। পরিশেষে বলা যায় যে, সততা ও সুবিবেচনা-সহকারে ভোটদান করাও প্রত্যেক নাগরিকের গুরু দায়িত্ব বলিয়া বিবেচিত হয়। (২১৮—২১৯)

25. What is meant by liberty? How is it related to law?

উঃ ইঃ—সাধারণ অর্থে স্বাধীনতা বলিতে বুঝায় মানুষের নিজ ইচ্ছানুসারে কাজ করিবার অবাধ ক্ষমতা। কিন্তু এরূপ স্বাধীনতার ফল হইল স্বেচ্ছাচারিতা। এই স্বেচ্ছাচারিতার ফলে অন্তের স্বাধীনতা নষ্ট হয়। আমার যদি বাহা খুশী তাহা করিবার অবাধ ক্ষমতা থাকে, তাহা হইলে অন্য লোকের স্বাধীনতা থাকিতে পারে না। সকলে বাহাতে স্বাধীনতা ভোগ করিতে পারে, সেইজন্য রাষ্ট্র মানুষের অবাধ ক্ষমতার উপর কতকগুলি বিধিনিষেধ আরোপ করিয়া অবাধ স্বাধীনতাকে প্রকৃত স্বাধীনতায় পরিণত করে। সুতরাং স্বাধীনতার প্রকৃত অর্থ হইল নিয়ন্ত্রিত স্বাধীনতা—যে স্বাধীনতা অপর লোকের স্বাধীনতায় হস্তক্ষেপ করে না।

স্বাধীনতার আবার বিভিন্ন রূপ আছে, যথা, (১) পৌর স্বাধীনতা, (২) রাজনৈতিক স্বাধীনতা, (৩) জাতীয় স্বাধীনতা।

(১) পৌর স্বাধীনতা ব্যতীত ব্যক্তির ব্যক্তি-স্ববিকাশ সম্ভব হয় না। ব্যক্তিগত সম্পত্তির মালিকানা, স্বাধীনভাবে চলা-ফেরা, বাক-স্বাধীনতা প্রভৃতি কতকগুলি অধিকারের সমষ্টিকে পৌর স্বাধীনতা বলা হয়।

(২) প্রত্যেক বয়স্ক ও যোগ্য ব্যক্তির ভোট দিবার ও ভোট পাইবার ক্ষমতা, যোগ্য হইলে সরকারী কাজে নিযুক্ত হইবার অধিকার প্রভৃতির সমষ্টিকে রাজনৈতিক স্বাধীনতা বলা হয়।

(৩) জাতীয় স্বাধীনতার অর্থ হইল ভিন্ন রাষ্ট্রের নিয়ন্ত্রণমুক্ত স্বাধীন সমষ্টিগত জীবন পরিচালনার অধিকার। এই স্বাধীনতার অবর্তমানে কোন জাতিই পৌর বা রাজনৈতিক অধিকার যথাযথভাবে ভোগ করিতে পারে না।
(১২৪—১২৬ পৃ:)

২৬ নং প্রশ্নের উত্তরের তৃতীয় প্যারা দ্রষ্টব্য।

26. What is Sovereignty? "Sovereignty and Liberty are not contradictory terms." Examine the proposition.

উঃ ইঃ—সার্বভৌমত্ব হইল রাষ্ট্রের আদিম ও স্বৈর ক্ষমতা—যে ক্ষমতার বলে দেশের সকল লোক ও সকল প্রতিষ্ঠানের উপর রাষ্ট্রের পূর্ণ কর্তৃত্ব থাকে এবং বিদেশী রাষ্ট্রের সম্পর্কেও সেই রাষ্ট্র সম্পূর্ণ স্বাধীন। রাষ্ট্র-গঠনের সর্বপ্রধান উপাদান হইল সার্বভৌম শক্তি। এই শক্তি ব্যতীত রাষ্ট্রের অস্তিত্ব থাকিতে পারে না এবং এই উপাদানটিই রাষ্ট্রকে সামাজিক অন্ত্যায় প্রতিষ্ঠান হইতে স্বাতন্ত্র্য দান করিয়াছে। সার্বভৌম ক্ষমতার কয়েকটি বৈশিষ্ট্য দেখিতে পাওয়া যায়। এই ক্ষমতা অসীম—ইহা দেশের অভ্যন্তরের বা বৈদেশিক কোন শক্তি দ্বারা সীমাবদ্ধ নহে। দ্বিতীয়তঃ, এই ক্ষমতা অবিভাজ্য অর্থাৎ ইহার বিভাগ সম্ভব নয়। তৃতীয়তঃ, এই ক্ষমতা স্থায়ী। রাষ্ট্র ব্যতীত এই ক্ষমতার অস্তিত্ব থাকিতে পারে না, আবার এই ক্ষমতা ব্যতীত রাষ্ট্র থাকিতে পারে না। সরকারের পরিবর্তনে এই ক্ষমতার কোন ব্যত্যয় হয় না। চতুর্থতঃ, এই ক্ষমতা হস্তান্তরযোগ্য নহে। সার্বভৌম ক্ষমতার আবার দুইটি রূপ আছে, যথা, আইনগত সার্বভৌমত্ব (Legal Sovereignty) ও রাজনৈতিক সার্বভৌমত্ব (Political Sovereignty)।

এখন প্রশ্ন হইল রাষ্ট্রের এই অসীম ও নিরঙ্কুশ ক্ষমতা ও ব্যক্তিস্বাধীনতা কি পরস্পর-বিরোধী? আপাতদৃষ্টিতে মনে হয় যে, রাষ্ট্রের এই অবাধ ক্ষমতার বর্তমানে ব্যক্তিস্বাধীনতা থাকিতে পারে না। কিন্তু একটু বিশদভাবে আলোচনা করিলে বুঝা যায় যে, রাষ্ট্রের এই ক্ষমতা ব্যক্তি-

স্বাধীনতাবিরোধী নহে, পরন্তু এই ক্ষমতা ব্যক্তিস্বাধীনতা রক্ষা করে ও ইহার প্রয়োগক্ষেত্র প্রসারিত করে।

স্বাধীনতার অর্থ স্বেচ্ছাচারিতা নয়। স্বেচ্ছাচারিতার ফলে অশ্রের স্বাধীনতা নষ্ট হয়। আমার যদি যাহা খুশী তাহা করিবার অবাধ ক্ষমতা থাকে, তাহা হইলে অত্র লোকের স্বাধীনতা থাকিতে পারে না। সকলে যাহাতে স্বাধীনতা ভোগ করিতে পারে, সেইজন্য রাষ্ট্র মানুষের অবাধ ক্ষমতার উপর কতকগুলি বিধিনিষেধ আরোপ করিয়া অবাধ স্বাধীনতাকে প্রকৃত স্বাধীনতায় পরিণত করে। এই বিধিনিষেধগুলিকে আইন বলা হয়। আইনের উদ্দেশ্য হইল প্রত্যেক ব্যক্তিকে অপরের স্বাধীনতার হানি না করিয়া নিজ স্বাধীনতা ভোগের সুযোগ দেওয়া। রাষ্ট্র যদি ইহাব সার্বভৌম শক্তির সাহায্যে এই বিধিনিষেধগুলি সমাজে বলবৎ না করিত, তাহা হইলে মানবসমাজের অবস্থা হব্‌স-বর্ণিত প্রাকৃতিক পরিবেশের 'জোর যার মুল্লুক তার' অবস্থার অনুরূপ হইত।

অতরাং প্রকৃত স্বাধীনতার অধিকারী হইতে হইলে এই সার্বভৌম শক্তিকে মানিয়া লইতে হইবে। নতুবা একজনের স্বাধীনতা অধিকতর শক্তিশালী বা চতুর ব্যক্তির ইচ্ছার উপর নির্ভর করিবে। কাজেই সার্বভৌম শক্তি ও ব্যক্তিস্বাধীনতার মধ্যে কোন অসংগতি নাই। সার্বভৌম শক্তি আইনের সাহায্যে ব্যক্তিস্বাধীনতা রক্ষা করে। (১২৭—১২৯ পৃঃ)

27. Estimate the strength and weakness of modern democracy as a form of Government.

উঃ ইঃ—জনসাধারণকে লইয়া, জনসাধারণের কল্যাণে, জনসাধারণ কর্তৃক যে শাসনব্যবস্থা (Government of the people, for the people and by the people) তাহাকে গণতন্ত্র বলা হয়। গণতন্ত্র আবার দুই প্রকারের হইতে পারে, যথা, প্রত্যক্ষ ও পরোক্ষ বা প্রতিনিধি-মূলক। প্রাচীন গ্রীস ও রোমে রাষ্ট্রের সীমা নগরেই সীমাবদ্ধ ছিল এবং সেজন্য প্রাচীন রাষ্ট্রগুলিকে নগররাষ্ট্র বলা হইত। এই নগররাষ্ট্রগুলির সকল নাগরিকই একত্র হইয়া আইনপ্রণয়ন ও শাসনকার্য পরিচালনা করিত। প্রত্যক্ষ গণতন্ত্রে প্রাপ্তবয়স্ক সকল নাগরিকই আইনসভার সদস্য

হিসাবে আইনপ্রণয়ন ও করদার্য ব্যাপারে অংশ গ্রহণ করে। সুতরাং প্রত্যক্ষ গণতন্ত্রে ভোটিদাতা ও আইনসভার সদস্য—এ দুই-ই অভিন্ন। বর্তমান যুগে সুইজারল্যান্ডের চারিটি ক্ষুদ্র ক্যান্টনে (বিভাগে) এই ব্যবস্থা চালু আছে। রাষ্ট্রের আয়তন ও জনসংখ্যা যদি স্বল্প হয়, তাহা হইলে, প্রত্যক্ষ গণতন্ত্র কার্যকর হইতে পারে। কিন্তু আধুনিক রাষ্ট্রগুলি আয়তনে ও জনসংখ্যায় শুধু বিশাল নয়, এই রাষ্ট্রগুলির সমস্তাগুলিও জটিলতাপূর্ণ। ভারত, চীন প্রভৃতি বিশালায়তনের ও বিপুল জনসংখ্যা দ্বারা অধ্যুষিত দেশে প্রত্যক্ষ গণতন্ত্র সম্ভব নহে। দেশের সমস্ত প্রাপ্তবয়স্ক লোকের পক্ষে এক স্থানে মিলিত হইয়া শাসনকার্য পরিচালনা করাও সম্পূর্ণ অসম্ভব। ইহা ছাড়াও সাধারণ লোকের রাজনৈতিক জ্ঞান এত কম যে, তাহাদের পক্ষে দক্ষতার সহিত শাসনকার্য পরিচালনা করা সম্ভব নয়। এই কারণে বর্তমান যুগে পরোক্ষ গণতন্ত্রের আবির্ভাব হইয়াছে। এই শাসনব্যবস্থায় প্রাপ্তবয়স্ক নাগরিকগণ নির্দিষ্ট সময়ের ব্যবধানে তাহাদের প্রতিনিধি নির্বাচন করে এবং এই নির্বাচিত প্রতিনিধিগণ আইনসভা, মন্ত্রিসভা প্রভৃতি গঠন করিয়া শাসনকার্য পরিচালনা করেন। অবশ্য এই নির্বাচিত শাসকগণ তাহাদের কার্যের জন্য জনসাধারণের নিকট দায়ী থাকেন। সুতরাং পরোক্ষ গণতন্ত্রে ভোটিদাতা ও আইনসভা দুইটি পৃথক্ সংস্থা। রাষ্ট্রের উদ্দেশ্য হইল জনসাধারণের হিতসাধন করা। পরোক্ষ গণতন্ত্রে নির্বাচন দ্বারা দক্ষ লোকের হস্তে শাসনভার অর্পিত হয়, সুতরাং পরোক্ষ গণতন্ত্র বাঙ্কনীয় সন্দেহ নাই।

গুণ (Merits)

(ক) অধুনা গণতন্ত্র শ্রেষ্ঠ শাসনব্যবস্থা বলিয়া পরিগণিত হয়। তাহার প্রথম কারণ হইল যে, এই শাসনব্যবস্থায় শাসকগোষ্ঠী শাসিতের নিকট দায়ী থাকে। তাহাতে স্বৈরাচারের সম্ভাবনা দূরীভূত হয়।

(খ) এই শাসনব্যবস্থায় প্রত্যেক নাগরিকই তাহার জাতি অধিকার রক্ষা করিবার সুযোগ পায়। জনস্বার্থ এই শাসনব্যবস্থায় ষে রূপভাবে সংরক্ষিত হয়, অল্প কোন শাসনব্যবস্থায় তাহা সম্ভব হয় না।

(গ) গণতন্ত্র প্রত্যেক ব্যক্তিকেই প্রত্যক্ষ অথবা পরোক্ষভাবে শাসনকার্যে অংশ গ্রহণ করিবার সুযোগ দিয়া তাহার ব্যক্তিবিকাশে সাহায্য করে।

(ঘ) এই শাসনব্যবস্থায় সমষ্টিগত জীবনের সর্বাপেক্ষা অধিক কল্যাণ সাধিত হয়। প্রত্যেক ব্যক্তি “সকলের তরে সকলে আমরা, প্রত্যেকে আমরা পরের তরে”—এই আদর্শ দ্বারা অনুপ্রাণিত হইয়া নিজ সামর্থ্যমত সমষ্টিগত জীবনের কল্যাণসাধনে তৎপর হয়।

(ঙ) এই শাসনব্যবস্থা মানুষের মধ্যে সাম্য ও মৈত্রীর ভাব প্রতিষ্ঠা করিতে সাহায্য করে। লর্ড ব্রাইসের মতে, এই শাসনব্যবস্থার প্রধান কৃতিত্ব হইল যে, যুট ও যুক জনগণকে ভোটদানের ক্ষমতা দিয়া উহা তাহাদের স্ব স্ব অধিকার ও কর্তব্যের সম্বন্ধে সচেতন করিয়া ব্যক্তিবিকাশে সহায়তা করে।

দোষ (Demerits)

(ক) গণতান্ত্রিক শাসনের অর্থ হইল, যাহারা সংখ্যায় বেশী তাহাদের শাসন। সুতরাং গণতন্ত্রে গুণ ও যোগ্যতা অপেক্ষা সংখ্যার উপর বেশী জোর দেওয়া হয়।

(খ) গণতন্ত্রের আদর্শ অনুযায়ী মানুষে মানুষে কোন পার্থক্য করা হয় না। কিন্তু কার্যক্ষেত্রে দেখা যায় যে, গণতন্ত্রের কাজ অল্পসংখ্যক চতুর ও বিবেকবঞ্জিত লোক দ্বারা পরিচালিত হয়।

(গ) গণতান্ত্রিক শাসনব্যবস্থায় যে আইন তৈয়ারী হয়, তাহাও সে দলের হাতে ক্ষমতা থাকে সেই দলের স্বার্থের জন্য রচিত হয়। ইহাতে অন্যান্য দলের স্বার্থ অধিকাংশ ক্ষেত্রে নষ্ট হয়।

(ঘ) গণতন্ত্র অল্প লোকের দ্বারা পরিচালিত সংখ্যাধিক্যের শাসনব্যবস্থা। সুতরাং এই শাসনব্যবস্থায় গুণ ও যোগ্যতার সমাদর হয় না।

(ঙ) এই শাসনব্যবস্থার প্রধান দোষ হইল যে, ইহা স্থায়ী হইতে পারে না। নির্বাচকমণ্ডলীর ইচ্ছার উপর ইহার স্থায়িত্ব নির্ভর করে এবং নির্বাচকমণ্ডলী খুশীমত ইহার পরিবর্তন করিতে পারে। (২০০—২০৫ পৃঃ)

28. What do you understand by Dictatorship? State its demerits. Has Dictatorship any merits? If so, what are they?

উঃ হিঃ—একনায়কত্বের প্রধান বৈশিষ্ট্য হইল যে, ইহার অধীনে একটি মাত্র দল থাকে এবং দলের নেতার হস্তে সর্বময় কর্তৃত্ব ব্রহ্ম থাকে। দেশে

অল্প কোন রাজনৈতিক দল থাকিতে দেওয়া হয় না। অবাধ দলীয় কর্তৃত্ব প্রতিষ্ঠার উদ্দেশ্যে দলের নেতা ব্যক্তির সামাজিক জীবনের প্রত্যেকটি কার্য নিয়ন্ত্রণ করে। একনায়কতন্ত্রে শেষ পর্যন্ত রাষ্ট্র ও দলীয় নেতৃত্ব অভিন্ন হইয়া রাষ্ট্রের ইচ্ছা নেতার ইচ্ছায় পরিণত হয়।

একনায়কতন্ত্র তিন প্রকারের হইতে পারে, যথা সামরিক, স্বাম্যবাদী, ও ফ্যাসিবাদী।

সামরিক একনায়কতন্ত্র বহু পুরাতন হইলেও বর্তমান যুগেও এই শাসনব্যবস্থা লোপ পায় নাই। যখনই সেনাবাহিনীর কোন অধিনায়ক সৈন্যগণের সাহায্যে শাসনক্ষমতা হস্তগত করিয়া সেনাবাহিনীর সাহায্যে শাসনকার্য পরিচালনা করেন, তখন এই শাসনব্যবস্থাকে সামরিক একনায়কতন্ত্র বলা হয়। ফরাসী দেশে নেপোলিয়নের শাসন, বর্তমানে স্পেন দেশে জেনারেল ফ্রান্সিস্কোর শাসন ও অতি-আধুনিক কালে পাকিস্তানে ফিল্ড মার্শাল আয়ুব খানের শাসন ইহার প্রকৃষ্ট উদাহরণ।

প্রথম বিশ্বযুদ্ধের পরবর্তী কালে ইউরোপের দুর্বল ও ক্ষয়িষ্ণু গণতন্ত্রের দুর্বলতার সুযোগে রুশিয়াতে সাম্যবাদী একনায়কতন্ত্র এবং ইতালি ও জার্মানিতে ফ্যাসিবাদী একনায়কতন্ত্রের অভ্যুত্থান ঘটে। রুশীয় একনায়কতন্ত্রের উদ্দেশ্য হইল শ্রেণীহীন সমাজব্যবস্থা গঠন করা ও অর্থনৈতিক জীবনে সাম্য প্রতিষ্ঠা করা। এই উদ্দেশ্যসাধনের নিমিত্ত সাময়িকভাবে এখানে বিত্তহীন শ্রমিকশ্রেণীর কর্তৃত্ব প্রতিষ্ঠিত হইয়াছে। ইতালিতে ফ্যাসিস্ট নেতা মুসোলিনি ও জার্মানির নাৎসি নায়ক হিটলার তাঁহাদের দলের সাহায্যে রাজ্যশাসন করিতেন। ফ্যাসিস্ট একনায়কতন্ত্রের মূল নীতি হইল—এক জাতি, এক রাষ্ট্র, এক নায়ক।

একনায়কতন্ত্রে ব্যক্তির ব্যক্তিগতবিকাশ সম্ভব নহে, কারণ একনায়কতন্ত্র হইল ব্যক্তি-বিশেষের শাসন এবং এই শাসন পশুবলের উপর প্রতিষ্ঠিত। একনায়কতন্ত্র অনেক সময় উগ্র জাতীয়তাবাদের উপর প্রতিষ্ঠিত হইয়া ক্ষুদ্র ক্ষুদ্র জাতিগুলির স্বাধীনতা নষ্ট করে। ফলে, যুদ্ধ অনিবার্য হয় ও জগতের শান্তি নষ্ট হয়। জার্মানি ও ইতালির একনায়কতন্ত্রের ইহাই ছিল প্রধান দোষ।

একনায়কতন্ত্রের যে কোন গুণ নাই একথা বলা ঠিক নহে। এই

শাসনব্যবস্থায় জাতীয় ঐক্য প্রতিষ্ঠিত হয় ও জটিল সমস্যাসমূহের দ্রুত সমাধান হয়। 'স্বনাগরিক সৃষ্টি' করিতেও একনায়কত্বের কার্যকারিতা কম নহে। কৃষি, শিল্প, বিজ্ঞান ও সার্বজনীন শিক্ষা-প্রসারে বিশেষ করিয়া রূপদেশ একনায়কত্বের অধীনে অতি অল্প কালের মধ্যে যে অভাবনীয় উন্নতি লাভ করিয়াছে তাহা গণতন্ত্রে কোথাও সম্ভব হয় নাই। (২৪৩—২৪৭ পৃঃ)

29. Distinguish between Democracy and Dictatorship.
Is Democracy suited to India? Justify your answer.

উঃ হৈঃ—১। গণতন্ত্রের ভিত্তি হইল স্বাধীনতা, সাম্য ও সামাজিক ন্যায়বিচার। একনায়কত্বের ইহাদের কোম স্থান নাই।

২। গণতন্ত্রে ব্যক্তিস্বাধীনতা স্বীকৃত ও রক্ষিত হয়, কিন্তু একনায়কত্বের ব্যক্তিস্বাধীনতা স্বীকৃতই হয় না।

৩। গণতন্ত্রে বিভিন্ন মতাবলম্বী রাজনৈতিক দল থাকিতে পারে, কিন্তু একনায়কত্বের শুধু একটি মাত্র দল থাকে—অন্য দলের অস্তিত্ব বরদাস্ত করা হয় না।

৪। গণতন্ত্র পারস্পরিক সম্মতি ও সহযোগিতার উপর প্রতিষ্ঠিত, আর একনায়কত্ব দলীয় স্বার্থের উপর প্রতিষ্ঠিত।

৫। গণতন্ত্রে শাসকশ্রেণী শাসিতের নিকট তাহাদের কাজের জন্ত দায়ী থাকে। একনায়কত্বের শাসকের আদৌ কোন দায়িত্ব নাই,—কাজেই নায়ক স্বৈরাচারী হয়।

সুতরাং গণতন্ত্র ও একনায়কত্ব দুইটি পরস্পর-বিরোধী আদর্শ।

গণতান্ত্রিক শাসনব্যবস্থা ভারতের বর্তমান অবস্থায় কতদূর উপযোগী তাহাই আলোচ্য বিষয়। মহামতি জন স্টুয়ার্ট মিল্ গণতন্ত্রের সাকল্যের জন্য যে কয়েকটি সামাজিক অবস্থার উল্লেখ করিয়াছেন তাহা হইল—(১) দেশের লোকের শাসনকার্যে অংশ গ্রহণ করিবার ইচ্ছা ও সামর্থ্য; (২) অধিকার রক্ষা করিবার দৃঢ় সংকল্প ও (৩) কর্তব্যপালনে তৎপরতা। ভারতের অধিবাসিগণ বহুদিন পরাধীন ছিল, সুতরাং তাহাদের স্বাধীনতা অর্জন করিবার ইচ্ছা ও সামর্থ্য পূর্ণভাবে আছে তাহা স্বাধীনতা অর্জনের পূর্বে প্রমাণিত হইয়াছে। ভারতের শাসনকার্য বর্তমানে ভারতীয়গণ কর্তৃকই পরিচালিত

হইতেছে—ইহা হইতে বুঝা যায় যে, ভারতের অধিবাসিগণের মধ্যে শাসন-কার্যে অংশ গ্রহণ করিবার ইচ্ছা ও সামর্থ্য বিद्यমান। স্বাধীনতা রক্ষা করিবার দৃঢ় সংকল্পও ভারতীয়গণের মধ্যে দেখা যায়, তবে বহুদিন পরাধীন থাকায় কলে ও স্ব-শিক্ষার অভাবে ভারতীয়গণের মধ্যে কর্তব্যবোধের একান্ত অভাব দেখা যায় এবং এই কারণে শাসনব্যবস্থায় নানারূপ বিশৃঙ্খলা ও স্লিয়মাল-বতিতার অভাব উপস্থিত হইয়াছে। ইহা ব্যতীতও গণতন্ত্রের সাক্ষ্যের জন্ম দেশে অর্থনৈতিক সাম্য একান্ত প্রয়োজন। ভারতে বর্তমানে অর্থ-নৈতিক সাম্য দূরের কথা, ধনী ও দরিদ্রের মধ্যে এত পার্থক্য রহিয়াছে যে, এই অসাম্য দূর না হইলে প্রকৃত গণতন্ত্র সাক্ষ্য লাভ করিতে পারিবে না।

(২৪৩—২৪৫ পৃঃ)

30. Distinguish between Unitary and Federal Governments ? Give examples.

উঃ ইঃ ১। এককেন্দ্রীয় শাসনব্যবস্থায় একটি মাত্র প্রধান শাসনব্যবস্থা থাকে এবং সেই শাসনব্যবস্থা হইল কেন্দ্রীয় সরকার। যুক্তরাষ্ট্রে দুই জাতীয় সরকার—কেন্দ্রীয় ও স্থানীয়—পাশাপাশি থাকে।

২। এককেন্দ্রীয় শাসনব্যবস্থায় শাসনক্ষমতার কোন ভাগ হয় না—যুক্তরাষ্ট্রে কেন্দ্রীয় সরকার ও স্থানীয় সরকারের মধ্যে ক্ষমতা ভাগ হয়—ভারতীয় যুক্তরাষ্ট্রে শাসনতন্ত্রে ক্ষমতার এই ভাগ দেখা যায়।

৩। এককেন্দ্রীয় শাসনব্যবস্থায় কেন্দ্রীয় সরকার হইল সমস্ত ক্ষমতার উৎস, আর যুক্তরাষ্ট্রে শাসনতন্ত্রই হইল ক্ষমতার উৎস। এই কারণে এককেন্দ্রীয় শাসনব্যবস্থায় কেন্দ্রীয় সরকারের আর যুক্তরাষ্ট্রে-ব্যবস্থায় শাসন-তন্ত্রের প্রাধান্য দেখা যায়।

৪। যুক্তরাষ্ট্রের শাসনতন্ত্র সাধারণতঃ লিখিত ও অনমনীয় হয়, কিন্তু এককেন্দ্রীয় শাসনব্যবস্থার শাসনতন্ত্র লিখিত ও অনমনীয় নাও হইতে পারে।

৫। যুক্তরাষ্ট্রে একটি যুক্তরাষ্ট্রীয় বিচারালয় থাকিবেই, এককেন্দ্রীয় শাসনব্যবস্থায় ইহার কোন গুরুত্ব নাই। ভারত যুক্তরাষ্ট্র, তাই এখানে একটি সুপ্রীম কোর্ট আছে।

(২৫১—২৫২ পৃঃ)

31. What are the conditions of success of a Federal Union ? How far do they exist in India ?

উঃ ইঃ—যুক্তরাষ্ট্রীয় শাসনব্যবস্থা বাহাতে স্বর্চরূপে কাষ করিতে পারে, সেজন্য যুক্তরাষ্ট্রের বিভিন্ন প্রদেশগুলির মধ্যে ভৌগোলিক নৈকট্য (Geographical contiguity) থাকা একান্ত আবশ্যক। এই নৈকট্যের অভাবে প্রদেশগুলির মধ্যে একতাবোধ জন্মিতে পারে না। পূর্ব ও পশ্চিম পাকিস্তানের মধ্যে এই নৈকট্য নাই, কিন্তু ভারতের আন্দামান প্রভৃতি কয়েকটি ক্ষুদ্র অঞ্চল ব্যতীত অন্যান্য অংশগুলির মধ্যে এই নৈকট্য বর্তমান আছে। দ্বিতীয়তঃ, বিভিন্ন বৈশিষ্ট্যপূর্ণ বিভিন্ন অঞ্চল লইয়া গঠিত হইলেও যুক্তরাষ্ট্র একটি মাত্র সার্বভৌম রাষ্ট্র। সুতরাং ইহার নাগরিকগণের মধ্যে একজাতীয়তাবোধ একান্ত আবশ্যক। তৃতীয়তঃ, এই জাতীয়তাবোধ বৃদ্ধিতে ভৌগোলিক নৈকট্য ও এক জাতি, এক ভাষা ও এক ধর্ম বা একই ঐতিহ্য সাহায্য করে। সুতরাং যুক্তরাষ্ট্রের সাকল্যের জন্ত জাতিগত, ভাষাগত বা ভাবগত ঐক্য থাকা একান্ত প্রয়োজন। চতুর্থতঃ, যুক্তরাষ্ট্রের সাকল্যের জন্ত বিভিন্ন অঞ্চলগুলির মধ্যে রাজনৈতিক সমতা (Political equality) বাঞ্ছনীয়। যুক্তরাষ্ট্রীয় আইনসভার উচ্চ-কক্ষে প্রত্যেক অঞ্চল হইতে সমান সংখ্যক প্রতিনিধি প্রেরণ করিয়া মার্কিন দেশে ছোট-বড় সকল অঞ্চলগুলির রাজনৈতিক সমতা রক্ষা করা হইয়াছে। ভারতে প্রত্যেক রাজ্য হইতে জনসংখ্যার আনুপাতিক হারে রাজ্যসভায় প্রতিনিধির সংখ্যা স্থির হয়। রাজনৈতিক সমতা না থাকিলে বড় বড় রাজ্যগুলি ভোটের জোরে ছোট ছোট রাজ্যগুলির মতামত উপেক্ষা করিতে পারে। ইহা ছাড়া, যুক্তরাষ্ট্রের সাকল্যের জন্ত দেশের জনসাধারণের শিক্ষা, একাত্মবোধ ও কর্মদক্ষতা একান্ত প্রয়োজন।

এখন প্রশ্ন হইল, ভারতীয় যুক্তরাষ্ট্রে যুক্তরাষ্ট্রের সাকল্যের উপাদানগুলি কি বর্তমান আছে ? ভারতীয় যুক্তরাষ্ট্রের আন্দামান ও আন্ধিনীপ দ্বীপপুঞ্জ ব্যতীত অন্যান্য প্রধান অংশগুলির মধ্যে যুক্তরাষ্ট্রস্থলভ ভৌগোলিক নৈকট্য বর্তমান। ভারতের অধিবাসিগণের মধ্যে জাতিগত, ভাষাগত, ধর্মগত প্রভৃতি ঐক্য না থাকিলেও ভারতের স্বাধীন শাসনব্যবস্থার মাধ্যমে নানা উপায়ে ভারতে একজাতীয়তাবোধ বৃদ্ধির চেষ্টা চলিতেছে। ভারতে আঙ্গিক

রাজ্যগুলির সমান প্রতিনিধিত্বের দাবী স্বীকৃত না হইলেও আনুপাতিক সমতা রক্ষিত হইয়াছে।
(২৫৮—২৬৩ পৃঃ)

32. Distinguish between Parliamentary and Presidential forms of government and indicate their respective merits and demerits.

উঃ ইঃ—আইনসভা-প্রধান শাসনব্যবস্থায় শাসন-বিভাগের সমুদয় ক্ষমতা একটি মন্ত্রিসভায় হাতে থাকে। মন্ত্রিগণ তাঁহাদের কাজের জন্য আইনসভার নিকট দায়ী থাকেন। আইনসভা অনাস্থা প্রস্তাব পাশ করিলে তাঁহাদের পদত্যাগ করিতে হয়। আইনসভার সংখ্যাগরিষ্ঠ দলের নেতাগণ মন্ত্রিসংসদ গঠন করেন এবং এই ব্যবস্থায় শাসন-বিভাগীয় ও আইন-বিভাগীয় ক্ষমতার একত্র সমাবেশ হয়। ভারতে এই শাসনব্যবস্থা প্রচলিত আছে।

রাষ্ট্রপতি-চালিত শাসনব্যবস্থার প্রধান বৈশিষ্ট্য হইল শাসন-বিভাগীয় ক্ষমতা ও আইন-বিভাগীয় ক্ষমতার পৃথকীকরণ। এই ব্যবস্থায় একজন নির্বাচিত রাষ্ট্রপতি থাকেন। রাষ্ট্রপতি তাঁহার অধস্তন সহকর্মিগণের সাহায্যে শাসন-পরিচালনা করেন। তিনি আইনসভার সদস্য নহেন ও আইনসভার নিকট দায়ী নহেন।

মন্ত্রিসংসদ-চালিত সরকারের গুণ হইল, (১) আইনসভা ও শাসন-বিভাগের মধ্যে সহযোগিতা থাকার ফলে শাসনকার্য সু-পরিচালিত হয়। (২) মন্ত্রিসংসদ আইনসভার নিকট দায়ী থাকে বলিয়া তাঁহারা যাহা খুশী তাহা করিতে পারেন না। (৩) বিভিন্ন মতাবলম্বী দলগুলির মধ্যে আলাপ-আলোচনার সাহায্যে সিদ্ধান্ত গ্রহণ করা হয় বলিয়া দেশের সামগ্রিক কল্যাণ সাধিত হয়।

ইহার ত্রুটি হইল যে, এই শাসনব্যবস্থা দুর্বল ও অস্থায়ী। মন্ত্রিসংসদের সদস্যগণের মতভেদ হইলেই ইহার পতন ঘটে। দ্বিতীয়তঃ, দলীয় সমর্থনের উপর প্রতিষ্ঠিত বলিয়া ইহার পুনঃ পুনঃ পরিবর্তন সম্ভব এবং বার বার পরিবর্তন হইলে কোন দীর্ঘমেয়াদী কার্যসূচী গ্রহণ করিয়া দেশের কল্যাণ-সাধন করা সম্ভব হয় না। তৃতীয়তঃ, এই শাসনব্যবস্থায় একটি মাত্র

রাজনৈতিক দলের ক্ষমতা বৃদ্ধি পায় এবং শেষ পর্যন্ত দলের ক্ষমতা দলের নেতার হস্তে কেন্দ্রীভূত হয়।

রাষ্ট্রপতি-চালিত শাসনব্যবস্থার গুণ হইল যে, এই ব্যবস্থায় শাসন-কর্তৃপক্ষ ও আইনসভার মধ্যে প্রত্যক্ষ কোন যোগসূত্র থাকে না। স্তত্রাং প্রত্যেক বিভাগই পরস্পরের প্রভাবমুক্ত হইয়া নিজ নিজ কার্য করিবার সুযোগ পায়। আইনসভার প্রভাবমুক্ত বলিয়া শাসন-কর্তৃপক্ষ স্বাধীনভাবে শাসনকার্য পরিচালনা করিতে পারে ও জরুরী অবস্থায় দ্রুত সিদ্ধান্ত গ্রহণ করিতে পারে।

কিন্তু ইহার দোষ হইল যে, দায়িত্বশীল নয় বলিয়া শাসন-কর্তৃপক্ষ স্বেচ্ছাচারী হইয়া উঠিতে পারে। আর ক্ষমতা পৃথকীকরণের ফলে আইনসভা ও শাসন-কর্তৃপক্ষের মধ্যে সহযোগিতার অভাবে গুরুতর মতভেদ ঘটিয়া শাসনকার্যে অচল অবস্থা সৃষ্টি হইতে পারে।

(২৭৭—২৮১ পৃঃ)

33. Distinguish between Unitary and Federal forms of government. Is India Unitary or Federal ?

উঃ ইঃ—পার্থক্যের জন্য ৩০নং প্রশ্নের উত্তর দ্রষ্টব্য।

ভারতের বর্তমান শাসনব্যবস্থা মূলতঃ যুক্তরাষ্ট্রীয়। যুক্তরাষ্ট্রের বৈশিষ্ট্যগুলি ভারতে পূর্ণভাবে দেখা যায়। ক্ষমতা বিভাজন, লিখিত ও অনমনীয় শাসনতন্ত্র, যুক্তরাষ্ট্রীয় বিচারালয়, রাজস্বের বন্টন প্রভৃতি হইল যুক্তরাষ্ট্রের প্রধান বৈশিষ্ট্য। ভারতের শাসনতন্ত্রে রাষ্ট্রীয় ক্ষমতা যুক্তরাষ্ট্রীয়, রাজ্য ও যুগ্ম-তালিকায় ভাগ করা হইয়াছে। ভারতের শাসনতন্ত্র লিখিত ও অনমনীয়। ভারতের সুপ্রীম কোর্ট যুক্তরাষ্ট্রীয় বিচারালয়ের কাজ করে।

কিন্তু যুক্তরাষ্ট্রমূলক বৈশিষ্ট্যগুলি থাকা সত্ত্বেও ভারতের শাসনব্যবস্থায় এককেন্দ্রীয় শাসনব্যবস্থার কতকগুলি নিদর্শন রহিয়াছে। ভারতের এককেন্দ্রীয় শাসনব্যবস্থার বৈশিষ্ট্যগুলি হইল যে, (১) একই শাসনতন্ত্রে কেন্দ্রীয় সরকার ও রাজ্য সরকারগুলির গঠন, প্রকৃতি ও কার্যক্ষেত্র স্থান পাইয়াছে। রাজ্য সরকারগুলির কোন পৃথক শাসনতন্ত্র গঠন বা পরিবর্তন করিবার ক্ষমতা নাই। (২) ভারতে সদস্য রাজ্যগুলির কোন রাজনৈতিক

সমতা নাই। (৩) ক্ষমতা বিভাজনের ক্ষেত্রে কেন্দ্রীয় সরকারের হস্তে গুরুত্বপূর্ণ বিষয়গুলির শাসনভার অর্পিত হইয়া কেন্দ্রীয় সরকারের প্রাধান্য সুপ্রতিষ্ঠিত করা হইয়াছে। (৪) এই শাসনতন্ত্রে ক্ষমতা বণ্টন ব্যাপারে অবশিষ্ট ক্ষমতাসমূহ কেন্দ্রীয় সরকারের উপর গ্রস্ত হইয়াছে। (৫) সমগ্র ভারতের জন্ত একদফা নাগরিকত্ব, একটি মাত্র আপীল আদালত ও একটি মাত্র নির্বাচন-সংসদ প্রতিষ্ঠা দ্বারা এই শাসনতন্ত্রের কেন্দ্রী-ভাবে আতিশয্য সূচিত হয়। (৬) রাষ্ট্রপতি কর্তৃক জরুরী অবস্থা ঘোষণাকালে এই যুক্তরাষ্ট্রীয় শাসনব্যবস্থাকে অনায়াসে এককেন্দ্রীয় শাসনব্যবস্থায় পরিবর্তিত করা যায়। সুতরাং যুক্তরাষ্ট্রীয় শাসনব্যবস্থার প্রধান বৈশিষ্ট্যগুলি এই শাসনতন্ত্রে স্থান পাইলেও ইহার কেন্দ্রী-ভাবে আতিশয্য কাহারও দৃষ্টি অতিক্রম করিতে পারে না।

(২৫১—২৫২ পৃঃ)

34. Distinguish between Parliamentary and Presidential forms of Government. Is the Government of India Presidential or Parliamentary ?

উঃ ইঃ—পার্থক্যের জন্য ৩২ নং প্রশ্নের উত্তরের প্রথম ভাগ দ্রষ্টব্য।

ভারতের শাসনব্যবস্থার শীর্ষস্থানে একজন নির্বাচিত রাষ্ট্রপতি থাকিলেও এই শাসনব্যবস্থা মূলতঃ আইনসভা-প্রধান বা মন্ত্রিসংসদ-চালিত শাসনব্যবস্থা। মন্ত্রিসংসদ-চালিত শাসনব্যবস্থায় আইনতঃ সমস্ত ক্ষমতার অধিকারী হইলেন একজন রাজা কিংবা নির্বাচিত রাষ্ট্রপতি। কিন্তু কার্যতঃ শাসনক্ষমতা একটি মন্ত্রিসভার হস্তে গ্রস্ত থাকে। এই সভাই শাসন পরিচালনা করেন। আইনসভার সংখ্যাগরিষ্ঠ দলের নেতারা মন্ত্রিসংসদ গঠন করিয়া আইনসভার অমুমোদনে সমস্ত শাসনকার্য পরিচালনা করেন। মন্ত্রিসভা তাঁহাদের নীতি ও কার্যের জন্য আইনসভার নিকট দায়ী থাকেন। মন্ত্রিসভার কার্য যদি আইনসভা কর্তৃক অমুমোদিত না হয়, তাহা হইলে মন্ত্রিসভাকে পদত্যাগ করিতে হয়। এই শাসনব্যবস্থার বৈশিষ্ট্য হইলে শাসন বিভাগীয় ও আইন-বিভাগীয় ক্ষমতার একত্র সমাবেশ।

ভারতের রাষ্ট্রপতি হইলেন শাসকপ্রধান। কিন্তু প্রকৃত ক্ষমতা মন্ত্রিসভার হস্তে গ্রস্ত। সংখ্যাগরিষ্ঠ কংগ্রেস-দলের নেতাগণ মন্ত্রিসভা গঠন করিয়া

আইনসভার অমুমোদনে শাসনকার্য, আইন-প্রণয়ন ও আয়-ব্যয় নিয়ন্ত্রণ করেন। আইনসভার আস্থা হারাইলে তাঁহাদের পদত্যাগ করিতে হইবে। সুতরাং শাসকবর্গ আইনসভার নিকট দায়ী। এইজন্য ইহাকে দায়িত্বশীল সরকার বলা হয়। (২৭৭—২৭৯ পৃঃ)

35. What are the different organs of the Government ? Describe their respective functions.

উঃ হঃ—আধুনিক কালে সরকারগুলির কাজ প্রধানতঃ তিনটি বিভাগ দ্বারা পরিচালিত হয়। বিভাগ তিনটি হইল। ১। আইনসভা, ২। শাসন-বিভাগ ও ৩। বিচার-বিভাগ।

আইনসভার কার্য—১। আইনসভার প্রধান কার্য হইল একটা নির্ধারিত পদ্ধতিতে আইন প্রণয়ন করা। আইনসভা নূতন আইন প্রণয়ন করে ও পুরাতন আইন বর্জন বা সংশোধন করিতে পারে। ২। আইন পাশ করিবার পূর্বে আইনসভা প্রত্যেকটি আইন বিশেষভাবে বিচার-বিবেচনা করে, এইজন্য আইন প্রণয়ন করিতে দীর্ঘ সময় অতিবাহিত হয়। ৩। সরকারী আয়-ব্যয়ের আলোচনা ও মঞ্জুরি করা আইনসভার আর একটি কাজ। শাসন-কর্তৃপক্ষ ও বিচার-বিভাগকে আইনসভা কর্তৃক মঞ্জুরিকৃত ব্যয়ের উপর নির্ভর করিতে হয়। ৪। শাসন-কর্তৃপক্ষ তাহাদের কাজের জন্য আইনসভার নিকট দায়ী থাকে। শাসন-বিভাগীয় কার্য বৈধ বলিয়া বিবেচিত হইতে গেলে অনেক দেশে আইনসভার অমুমোদন প্রয়োজন। ৫। রাষ্ট্রপতি ও বিচারপতিগণ অনেক দেশে আইনসভা কর্তৃক নির্বাচিত হইয়া থাকেন। আইনসভার কিছু বিচার-বিভাগীয় কাজও থাকে। রাষ্ট্রপতি, মন্ত্রী প্রভৃতি উচ্চপদস্থ সরকারী কর্মচারীদিগকে অভিযুক্ত ও বিচার করিবার ক্ষমতা আইনসভার উচ্চ-কক্ষের হস্তে গ্ৰস্ত থাকে। সুতরাং আইন-প্রণয়ন ব্যতীতও আইনসভাকে আরও নানাবিধ কার্য করিতে হয়।

শাসনবিভাগীয় কার্য—১। শাসন-বিভাগের প্রধান কার্য হইল আইনসমূহ প্রয়োগ করিয়া শাসনকার্য পরিচালনা করা। ২। বৈদেশিক রাষ্ট্রের সহিত কূটনৈতিক সম্পর্ক স্থাপন করা ও চুক্তি সম্পাদন করা। ৩। যুদ্ধ-পরিচালনা করিবার জন্য স্থল, নৌ ও বিমানবাহিনী গঠন ও পরিচালনা করা। ৪। জরুরী

অবস্থায় শাসন-কর্তৃপক্ষ জরুরী আইন প্রণয়ন করিতে পারে। ভারতের রাষ্ট্রপতির এই ক্ষমতা আছে। শাসন-কর্তৃপক্ষের কিছু কিছু বিচার-বিষয়ক ক্ষমতাও থাকে।

বিচার-বিভাগীয় কার্য—১। বিচার-বিভাগের প্রধান কার্য হইল আইন প্রয়োগ করা। ২। আইনগুলির প্রয়োগ ব্যতীতও তাঁহার আইনগুলির ব্যাখ্যা ও বিশ্লেষণ করেন। ৩। আইন ব্যাখ্যাকালে অনেক সময় তাঁহার নূতন আইন সৃষ্টি করেন। ৪। যুক্তরাষ্ট্রীয় বিচারালয়ের বিচারপতিগণকে শাসনতান্ত্রিক আইনগুলির ব্যাখ্যা করিতে হয়। ৫। অনেক সময় বিচার-পতিগণকে আইনসভা ও শাসন-বিভাগকে আইন-সম্বন্ধীয় পরামর্শ দান করিতে হয়। (২৮৮—২৯২, ৩১০—৩১৪ পৃঃ)

36. Give a critical estimate of the theory of Separation of Powers.

উঃ ইঃ—সরকারের শাসন-পরিচালনাকার্য সাধারণতঃ তিনটি বিভাগ দ্বারা সম্পাদিত হয়, যথা, আইনপ্রণয়ন-বিভাগ, শাসন-বিভাগ ও বিচার-বিভাগ। ক্ষমতা-পৃথকীকরণ নীতি অমুযায়ী বলা হয় যে, সরকারের এই তিনটি বিভাগ সম্পূর্ণ পৃথক থাকিয়া স্বাধীনভাবে প্রত্যেকে প্রত্যেকের কার্য পরিচালনা করিবে। একে অপরের কার্যে হস্তক্ষেপ করিবে না। যদি একাধিক ক্ষমতা একই ব্যক্তি বা একই ব্যক্তি-সংসদের উপর ন্যস্ত হয়, তাহা হইলে স্বৈরাচারী শাসন প্রবর্তিত হইয়া ব্যক্তিস্বাধীনতা নষ্ট হইতে পারে। পুরাকালে রাজার হাতে যখন আইন প্রণয়ন, আইন বলবৎ ও বিচার করিবার ক্ষমতা ছিল, তখন অধিকাংশ ক্ষেত্রে রাজা স্বৈরাচারী হইয়া ব্যক্তিস্বাধীনতা ক্ষুণ্ণ করিতেন। এই মতবাদের প্রধান ব্যাখ্যাতা ও সমর্থক ছিলেন ফরাসী দার্শনিক মণ্টেস্কু ও ইংরাজ লেখক ব্ল্যাকষ্টোন। ফরাসী দেশের ও মার্কিন যুক্তরাষ্ট্রের শাসনতন্ত্রের উপর এই মতবাদ বিশেষ প্রভাব বিস্তার করিয়াছিল।

সমালোচনা—এই মতবাদের বিরুদ্ধে বলা হয় যে, ক্ষমতার পৃথকীকরণ কার্যতঃ সম্ভব নহে, কাম্যও নহে। কোন দেশের শাসনব্যবস্থায়ই এই নীতি সম্পূর্ণভাবে বলবৎ হয় নাই। ভারতে মন্ত্রিমণ্ডলী, আইনসভার সদস্য,

আবার জরুরী অবস্থায় রাষ্ট্রপতি আইন প্রণয়ন করিতে পারেন। দ্বিতীয়তঃ, প্রত্যেক দেশেই দেখা যায় যে, এক বিভাগ অল্প বিভাগের কিছু কিছু কার্য করে। সব দেশেই আইনসভা কিছু বিচার-বিষয়ক কার্য করে। সুতরাং বাস্তবক্ষেত্রে ক্ষমতার সূক্ষ্ম বিভাগ সম্ভব নহে। তৃতীয়তঃ, ব্যক্তিস্বাধীনতা ক্ষমতায় পৃথকীকরণের উপর একান্ত নির্ভরশীল নহে। ইংলণ্ডের শাসন-ব্যবস্থায় এই নীতি কার্যকর হয় নাই, তাহা সত্ত্বেও ইংলণ্ডের লোক স্বাধীন। চতুর্থতঃ, এই মতবাদে বলা হয় যে, সরকারের তিনটি বিভাগই সমান ক্ষমতার অধিকারী, কিন্তু কার্যতঃ দেখা যায় যে, আইনসভার ক্ষমতা অপর দুইটি বিভাগের ক্ষমতা অপেক্ষা বেশী। পঞ্চমতঃ, ক্ষমতার সম্পূর্ণ পৃথকীকরণের ফলে তিনটি বিভাগের মধ্যে গুরুতর মতভেদ হইলে সরকারী কাজে অচল অবস্থার সৃষ্টি হওয়া সম্ভব।

সুতরাং দেখা যায় যে, বিভাগগুলির মধ্যে সহযোগিতা না থাকিলে শাসনকার্য সুষ্ঠুভাবে চলিতে পারে না। তবে এই মতবাদের মূল্য হইল যে, ব্যক্তিস্বাধীনতা রক্ষার অল্প বিভাগগুলির মধ্যে কিছু পরিমাণ স্বাভাবিক থাকিবে—বিশেষ করিয়া বিচার-বিভাগের স্বাধীনতা অটুট রাখিতে হইবে। বিভিন্ন বিভাগগুলির কর্মদক্ষতার জন্য কিছু পরিমাণ পৃথকীকরণ কাম্য।

(৩২৩—৩২৮ পৃঃ)

37. "The function of the legislature is not merely the making of laws". What other functions does the legislature in a democratic country discharge ?

উঃ ইঃ—৩৫ নং প্রশ্নের দ্বিতীয় প্যারা দ্রষ্টব্য। (২৮৮—২৯১ পৃঃ)

38. What is meant by a bi-cameral form of legislature ? Do you favour such a form of legislature ? If so, why ?

উঃ ইঃ—যে আইনসভা দুইটি কক্ষ—উচ্চ ও নিম্ন লইয়া গঠিত হয় তাহাকে দ্বি-পরিষদ আইনসভা বলা হয়। ভারতের আইনসভা পাল্লিমেণ্ট—রাজ্যসভা ও লোকসভা এই দুইটি কক্ষ লইয়া গঠিত। সুতরাং ভারতের আইনসভা দ্বি-পরিষদযুক্ত।

বর্তমানে পৃথিবীর প্রায় সমস্ত সভ্য দেশের আইনসভাই দ্বি-কক্ষবিশিষ্ট।

গণতান্ত্রিক শাসনব্যবস্থা জনপ্রিয় হওয়ার ফলে দ্বি-কক্ষবিশিষ্ট আইনসভার উপযোগিতা বৃদ্ধি পাইয়াছে। আইনসভা দুইটি কক্ষ লইয়া গঠিত হইলে নিম্নলিখিত সুবিধাগুলি পাওয়া যায়।

প্রথমতঃ, আইনসভা দ্বি-কক্ষবিশিষ্ট হইলে উচ্চ-পরিষদ নিম্ন-পরিষদের দ্রুত ও বিবেচনাহীন আইন-প্রণয়নে বাধা দিয়া জনমত জাগ্রত করিতে পারে। দ্বিতীয়তঃ, আইন-প্রণয়ন ব্যাপারে উভয় পরিষদ পরস্পরের তুল-ক্রটি সংশোধন করিতে পারে। তৃতীয়তঃ, দুইটি পরিষদ থাকিলে দেশের অধিক সংখ্যক লোক আইন-প্রণয়নে অংশ গ্রহণ করিতে পারে। ফলে, আইনসভা কর্তৃক প্রণীত আইন অধিকতরভাবে জনমত প্রতিকলিত করে। চতুর্থতঃ, উচ্চ-কক্ষ বিশেষ শ্রেণী ও যোগ্য ব্যক্তিগণের প্রতিনিধিত্ব করিতে পারে। পঞ্চমতঃ, যুক্তরাষ্ট্রীয় শাসনব্যবস্থায় দ্বি-পরিষদ আইনসভার বিশেষ গুরুত্ব আছে। যুক্তরাষ্ট্রের উচ্চ-পরিষদ সাধারণতঃ বিভিন্ন প্রদেশ বা রাজ্যগুলির প্রতিনিধি লইয়া গঠিত হয় বলিয়া বিভিন্ন প্রদেশগুলির স্বার্থ অক্ষুণ্ণ রাখিতে পারে।

উপরি-উক্ত যুক্তিগুলির ভিত্তিতে দ্বি-কক্ষ আইনসভার অস্তিত্ব সমর্থন করা হয়, কিন্তু এই যুক্তিগুলির বিরুদ্ধেও আবার অনেক যুক্তি দেখান যায়। (২২২—২২৫ পৃঃ)

39. Why is it considered desirable to separate powers of the legislative, executive and judicial organs of a government ?

উঃ ইঃ—সরকারের তিনটি প্রধান কার্য হইল আইন-প্রণয়ন, শাসন ও বিচার। এই তিনটি কার্য পরিচালনার জন্ত প্রত্যেক দেশেই আইনসভা, শাসন-বিভাগ ও বিচার-বিভাগ থাকে। আইনসভার প্রধান কাজ হইল আইন প্রণয়ন করা। শাসন-বিভাগ এই আইন বলবৎ করে এবং বিচার-বিভাগ আইন ভঙ্গ হইয়াছে কিনা তাহা পরীক্ষা করিয়া অপরাধীকে শাস্তি দেয়।

কমতাবিজ্ঞান নামে একটি মতবাদে সরকারের এই তিনটি বিভাগের পারস্পরিক সম্পর্ক আলোচিত হইয়াছে। এই মতবাদের প্রধান সমর্থক

ফরাসী দার্শনিক মন্টেস্কু বলেন যে, এই তিনটি ক্ষমতা একই হস্তে গ্ৰস্ত করা সমীচীন নহে। একই হস্তে তিনটি ক্ষমতা গ্ৰস্ত হইলে ব্যক্তিস্বাধীনতা ক্ষুণ্ণ হয়, কারণ একই ব্যক্তি বা ব্যক্তি-সংসদ যদি তিনটি ক্ষমতার অধিকারী হয়, তাহা হইলে এই ব্যক্তি বা ব্যক্তি-সংসদ তাহাদের খুশীমত আইন প্রণয়ন করিবে এবং নিজেদের খামখেয়ালমত বিচার করিয়া আইন বলবৎ করিবে। শাসনকর্তা যদি আবার বিচারক হন, তাহা হইলে তিনি বে-আইনীভাবে লোক গ্ৰেপ্তার করিয়া খুশীমত শাস্তি দিতে পারেন। এই অবস্থায় গ্ৰায়বিচার আশা করা যায় না—ফলে শাসকের অত্যাচারে ব্যক্তিস্বাধীনতা ক্ষুণ্ণ হয়। এইজন্যই আইন-প্রণয়ন, শাসন ও বিচার এই তিনটি বিভাগ পৃথক রাখা প্রয়োজন যাহাতে এক বিভাগ অন্য বিভাগের কার্যের উপর অব্যক্তি হস্তক্ষেপ করিতে না পারে।

কিন্তু বর্তমানে উপরি-উক্ত যুক্তির ভিত্তিতে সরকারের তিনটি কার্যের পৃথকীকরণ সমর্থন করা যায় না। কারণ ক্ষমতা পৃথকীকরণ ব্যতীতও ব্যক্তিস্বাধীনতা অক্ষুণ্ণ থাকিতে পারে। গ্রেট ব্রিটেনের শাসনব্যবস্থা ক্ষমতা পৃথক না করিয়াও ব্যক্তিস্বাধীনতা রক্ষা করিতে সমর্থ হইয়াছে। ক্ষমতা পৃথকীকরণ নীতির অন্তর্নিহিত সত্য হইল যে, আইন-প্রণয়ন, শাসন ও বিচার, সরকারের এই তিনটি কাজ বর্তমান যুগে জটিল আকার ধারণ করিয়াছে। আর এই তিনটি কাজ সম্পূর্ণ পৃথক ধরণের। সুতরাং একই ব্যক্তি বা একই ব্যক্তি-সংসদের পক্ষে এই তিনটি পৃথক কাজ স্বল্পভাবে সম্পন্ন করা সম্ভব নহে। সুতরাং পৃথক যোগ্যতাসম্পন্ন তিনটি পৃথক সংস্থার হস্তে এই কাজগুলি গ্ৰস্ত করা কাম্য। কিন্তু সরকারী কাজগুলির মধ্যে যে মূলগত ঐক্য আছে তাহা অক্ষুণ্ণ রাখিবার জন্য বিভাগগুলির মধ্যে সহযোগিতা কাম্য। তবে ব্যক্তিস্বাধীনতা রক্ষার জন্য বিচার-বিভাগের স্বাভাব্য ও স্বাধীনতা নিশ্চয়ই বজায় রাখিতে হইবে। (৩২৩—৩২৪ পৃঃ)

40. Explain the limits to the theory of Separation of Powers.

উঃ হৈঃ—ক্ষমতা পৃথকীকরণ-নীতি অহুসারে বলা হয় যে, সরকারের তিনটি প্রধান বিভাগ—আইনসভা, শাসন-বিভাগ ও বিচার-বিভাগ ব্যক্তি-

স্বাধীনতা রক্ষা করিবার জন্য পরস্পর হইতে পৃথক্ ও স্বাধীন থাকিবে, কিন্তু নীতিগতভাবে ইহা কাম্য নহে এবং কার্যক্ষেত্রে ইহা প্রয়োজন নহে। কারণ এক বিভাগ অন্য বিভাগের কার্য সম্পাদন করিয়া থাকে। উদাহরণস্বরূপ বলা যায় যে, আইন প্রণয়ন করা ছাড়াও আইনসভা শাসন ও বিচার-বিভাগীয় কিছু কাজ করে। দ্বিতীয়তঃ, আবার দেখা যায়, এক বিভাগ অন্য বিভাগকে নিয়ন্ত্রিত করে। ভারতে মন্ত্রিসভার সদস্যগণকে আইনসভার সদস্য হইতে হয় এবং মন্ত্রিসভার সদস্যগণ তাঁহাদের কার্যের জন্য আইনসভার নিকট দায়ী থাকেন। এইরূপ কোন বিভাগই অন্য দুইটি বিভাগের সম্পূর্ণরূপে প্রভাবমুক্ত বা সম্পর্কহীন নহে। তৃতীয়তঃ, এই নীতি স্বাধীনতার রক্ষাকবচ নহে। ইহার প্রয়োগ ব্যতীতই গ্রেট ব্রিটেনে ব্যক্তিস্বাধীনতা অক্ষুণ্ণ রহিয়াছে। চতুর্থতঃ, তিনটি বিভাগই সমান ক্ষমতার অধিকারী ও সম্পূর্ণ স্বাধীন হইতে পারে না। কারণ বিভাগগুলির মধ্যে বিরোধ হইলে মীমাংসার আর কোন উপায় থাকে না। এইজন্য সব দেশেই আইনসভাই হইল সবচেয়ে বেশী ক্ষমতার অধিকারী। পঞ্চমতঃ, বর্তমান যুগে কল্যাণরাষ্ট্র ধারণার আবির্ভাবে এই নীতির গুরুত্ব অনেক পরিমাণে হ্রাস পাইয়াছে। কল্যাণরাষ্ট্রের উদ্দেশ্য হইল সমগ্রভাবে জন-কল্যাণ সাধন করা। সরকারের বিভাগগুলির মধ্যে বিরোধিতা ও প্রতিযোগিতা স্থলে ঐকান্তিক সহযোগিতা না থাকিলে জনকল্যাণসাধন সম্ভব নহে। সুতরাং ক্ষমতার সম্পূর্ণ পৃথকীকরণ নীতি প্রয়োগের পথে অনেক বাধা আছে।

(৩২৩—৩৩০ পৃঃ)

41. State and explain the Socialist theory about the functions of Government.

উঃ হৈঃ—সরকারের কার্যকলাপ সম্পর্কে যে সমস্ত মতবাদ প্রচলিত আছে, তাহার মধ্যে সমাজতন্ত্রবাদ একটি শক্তিশালী মতবাদ বলিয়া বর্তমান যুগে পরিগণিত হয়। অত্যধিক ব্যক্তিস্বাতন্ত্র্যবাদের ফলে যে পুঁজিবাদের (Capitalism) আবির্ভাব হয় তাহারই প্রতিবাদস্বরূপ সমাজতন্ত্রবাদের আবির্ভাব হয়। সমাজতন্ত্রবাদের মূল কথা হইল, রাষ্ট্রের কর্মপরিধি সীমাহীন। রাষ্ট্রের কর্মক্ষেত্র শুধু পুলিশী কার্যে সীমাবদ্ধ নয়, পরন্তু সমাজ-

জীবনের সর্বক্ষেত্রে রাষ্ট্রের অবাধ কর্তৃত্ব বাঞ্ছনীয়। জনসাধারণের কল্যাণ-সাধনের জন্ত যাহা-কিছু প্রয়োজন তাহার সব-কিছুই রাষ্ট্র করিবে।

সমাজতত্ত্ববিদগণ রাষ্ট্রের অর্থনৈতিক কাঠামোর উপর বিশেষ গুরুত্ব প্রদান করেন। তাঁহারা বলেন, দেশের যাবতীয় ধনোৎপাদনের উৎস, যথা, জমি, খনি, শিল্প, কল-কারখানা, রেল, ডাক, জাহাজ, পোষ্ট, টেলিগ্রাফ, টেলিফোন প্রভৃতি এবং ব্যাংক, বীমা কোম্পানী, সর্বপ্রকার বাণিজ্য প্রভৃতির মালিকানা ও ব্যবস্থাপনা রাষ্ট্র কর্তৃক পরিচালিত হইবে। প্রত্যেক মানুষ রাষ্ট্রের কর্মী হিসাবে তাহার গুণ ও যোগ্যতা অনুসারে কাজ করিবে এবং আপন প্রয়োজন অনুযায়ী ভোগ্যবস্তু পাইবে। সমগ্র সামাজিক জীবন অক্ষুণ্ণ ও অব্যাহত রাখিবার জন্ত রাষ্ট্র দেশের নিরাপত্তা, শিক্ষা, চিকিৎসা-ব্যবস্থা ও জনসেবা পরিচালনা করিবে।

এই ব্যবস্থার ফলে ধনী-দরিদ্রের পার্থক্য দূর হইয়া সামাজিক ন্যায় প্রতিষ্ঠিত হইবে। ব্যক্তিস্বাতন্ত্র্যের ফলে যে ধ্বংসাত্মক প্রতিযোগিতা হয়, সমাজতান্ত্রিক রাষ্ট্রব্যবস্থা তাহা দূর করিয়া তৎপরিবর্তে মানুষের মধ্যে সহযোগিতা সৃষ্টি করিয়া সমষ্টির তথা সমষ্টির অংশ ব্যক্তির উন্নতিসাধনে সাহায্য করিবে।

(৩৪৭--৩৪৯ পৃঃ)

42. Classify the functions of a modern government. Explain clearly why some are called essential while others optional.

উঃ হৈঃ—আধুনিক রাষ্ট্রের কার্যকলাপগুলিকে অপরিহার্য ও ইচ্ছামূলক—এই দুই ভাগে ভাগ করা হয়। যে সমস্ত কাজ না করিলে রাষ্ট্রের অস্তিত্ব থাকে না, সেগুলিকে অপরিহার্য বা অবশ্যকরণীয় কার্য বলা হয়, আর যে কাজগুলি জনহিতকর হইলেও রাষ্ট্র করিতেও পারে, আবার নাও করিতে পারে, সেগুলিকে ইচ্ছামূলক কার্য বলা হয়।

দেশরক্ষা ও সেই উদ্দেশ্যে সশস্ত্রবাহিনী রাখা, পুলিশবাহিনীর সাহায্যে আভ্যন্তরীণ শান্তি-শৃংখলা রক্ষা করা এবং বিচারালয় সাহায্যে ন্যায়বিচার প্রতিষ্ঠা করা হইল প্রধান প্রধান অপরিহার্য কার্য।

নানাবিধ জনহিতকর কার্য যথা, শিল্প-বাণিজ্য নিয়ন্ত্রণ, শ্রমিকস্বার্থ সংরক্ষণ, পূর্তকার্য, স্বাস্থ্যোন্নতি, শিক্ষাবিস্তার প্রভৃতি হইল ইচ্ছামূলক কার্য।

বর্তমান যুগের কল্যাণরাষ্ট্রের পক্ষে সামাজিক হিতসাধনের সহায়ক সব কাজই অপরিহার্য কাজ বলিয়া গণ্য। সুতরাং অপরিহার্য ও ইচ্ছামূলক কাজের আর কোন পার্থক্য করা চলে না। (৩৭৩—৩৭৫ পৃঃ)

43. State the functions of modern government. •Would you regard India as a modern State according to this concept ?

উঃ ইঃ—আধুনিক রাষ্ট্রের কার্যকলাপগুলিকে অপরিহার্য ও ইচ্ছামূলক—এই দুই ভাগে ভাগ করা হয়। যে সমস্ত কাজ না করিলে রাষ্ট্রের অস্তিত্ব থাকে না, সেগুলিকে অপরিহার্য বা অবশ্যকরণীয় কার্য বলা হয়, আর যে কাজগুলি জনহিতকর হইলেও রাষ্ট্র করিতেও পারে, আবার নাও করিতে পারে, সেগুলিকে ইচ্ছামূলক কার্য বলা হয়।

দেশরক্ষা ও সেই উদ্দেশ্যে সশস্ত্রবাহিনী রাখা, পুলিশবাহিনীর সাহায্যে অভ্যন্তরীণ শান্তি-শৃংখলা রক্ষা করা এবং বিচারালয় সাহায্যে ন্যায়বিচার প্রতিষ্ঠা করা হইল প্রধান প্রধান অপরিহার্য কার্য।

নানাবিধ জনহিতকর কার্য, যথা, শিল্প-বাণিজ্য নিয়ন্ত্রণ, শ্রমিকস্বার্থ সংরক্ষণ, পূর্তকার্য, স্বাস্থ্যোন্নতি, শিক্ষাবিস্তার প্রভৃতি হইল ইচ্ছামূলক কার্য।

বর্তমান যুগের কল্যাণরাষ্ট্রের পক্ষে সামাজিক হিতসাধনের সহায়ক সব কাজই অপরিহার্য কাজ বলিয়া গণ্য হয়। সুতরাং অপরিহার্য ও ইচ্ছামূলক কাজের আর কোন পার্থক্য করা চলে না।

ভারতকে সব দিক দিয়াই আধুনিক রাষ্ট্র আখ্যা দেওয়া হইতে পারে। দেশের নিরাপত্তা ও অভ্যন্তরীণ শান্তি-শৃংখলা রক্ষা করিবার উদ্দেশ্যে স্তল, নৌ ও বিমানবাহিনী ও পুলিশবাহিনীর উত্তম ব্যবস্থা এদেশে রহিয়াছে। ন্যায়বিচারব্যবস্থা প্রতিষ্ঠা করিবার উদ্দেশ্যে সুপ্রীম কোর্ট হইতে আরম্ভ করিয়া গ্রামের ন্যায়পঞ্চায়েৎ পর্যন্ত প্রতিষ্ঠিত হইয়াছে। শাসন-বিভাগ হইতে বিচার-বিভাগের পৃথকীকরণ কাজও অনেক রাষ্ট্রে আরম্ভ হইয়াছে। বাল্যবিবাহ, পণপ্রথা, জমিদারী প্রথা, অস্পৃশ্যতা প্রভৃতি সমাজবিরোধী বহু পুরাতন প্রথা ভারত সরকার নিরোধ করিয়াছেন। পর পর তিনটি অর্থনৈতিক পরিকল্পনার সাহায্যে ভারত সরকার কৃষি, ক্ষুদ্র-বৃহৎ শিল্প,

ব্যবসায়-বাণিজ্য, যোগাযোগ, পরিবহন প্রভৃতি ব্যবহার উন্নতিসাধন করিয়া দেশের দুর্গত অর্থনৈতিক অবস্থা দূর করিবার চেষ্টা করিতেছেন। ভারত সরকারের কার্যাবলীর উদ্দেশ্য হইল সমাজব্যবস্থা হইতে অসাম্য দূর করিয়া সকলের জ্ঞাত হিতকর কর্মসংস্থানের সাহায্য সমাজব্যবস্থাকে সমাজতান্ত্রিক ধাঁচে পুনর্গঠন করা। দেশের চরম দুর্গত অবস্থার দিকে লক্ষ্য রাখিয়া বিচার করিলে বলিতে হয় যে, ভারত সরকার এখনও পর্যন্ত ভারতকে সম্পূর্ণরূপে কল্যাণরাষ্ট্রে রূপায়িত করিতে সমর্থ হন নাই। তথাপি ভারত সরকার আজ পর্যন্ত যাহা করিয়াছেন, একটি নবগঠিত সরকারের পক্ষে তাহা কৃতিত্বের পরিচায়ক বলিতে হইবে। সুতরাং ভারতকে আধুনিক অন্টাগা রাষ্ট্রের সমপর্যায়ভুক্ত বলা যাইতে পারে। (৩৭১—৩৭৩ পৃঃ)

44. What, in your opinion, should be the proper sphere of the state ?

উঃ হৈঃ—বর্তমান যুগে রাষ্ট্র সম্বন্ধে মানুষের ধারণার আয়তন পরিবর্তন ঘটিয়াছে। অতীতে রাষ্ট্রকে মানুষ শুধু ক্ষমতার একটি আধার বলিয়া মনে করিত। আইন-শৃংখলা রক্ষা করা ও বহিঃশত্রুর আক্রমণ হইতে দেশ রক্ষা করিয়া শাসকগোষ্ঠী নিজেদের ক্ষমতা সুপ্রতিষ্ঠিত রাখিতেন। বর্তমান রাষ্ট্রগুলির উদ্দেশ্য হইল জনকল্যাণসাধন। শুধু শাসকশ্রেণী বা নির্দিষ্ট একটি শ্রেণীর লোকের স্বার্থসাধনের উদ্দেশ্যে এখন আর রাষ্ট্রের ক্রিয়াকলাপ পরিচালিত হয় না। গণতান্ত্রিক আদর্শ সুপ্রতিষ্ঠিত হইবার সঙ্গে সঙ্গে জনকল্যাণসাধনই রাষ্ট্রের প্রধান উদ্দেশ্য বলিয়া পরিগণিত হইয়াছে। সুতরাং জনকল্যাণের জ্ঞাত যাহা অপরিহার্য তাহা রাষ্ট্রের অবশ্যকর্তব্য বলিয়া বিবেচিত হয়। মানুষের সামাজিক, নৈতিক, ও অর্থ-নৈতিক উন্নতিসাধন করিবার জ্ঞাত যাহা-কিছু প্রয়োজন তাহার সব-কিছুই রাষ্ট্র করিতে পারে। (৩৭১—৩৭৩ পৃঃ)

45. Define the term 'constitution' and distinguish between written and unwritten constitutions. State the merits and demerits of each.

উঃ হৈঃ—প্রত্যেক রাষ্ট্রেরই একটি নিজস্ব শাসনতন্ত্র থাকে। শাসনতন্ত্র ছাড়া রাষ্ট্রের অস্তিত্ব কল্পনা করা যায় না। প্রত্যেক দেশের শাসনকার্যই

কতকগুলি বিধিবদ্ধ আইন ও নীতি অস্থায়ী পরিচালিত হয়। এই সকল আইন ও নীতির সমষ্টিকে শাসনতন্ত্র বা সংবিধান বলা হয়। সুতরাং শাসনতন্ত্র হইল কতকগুলি লিখিত ও অ-লিখিত আইনের সমষ্টি, যাহা দ্বারা একদিকে সরকারের সংগঠন ও কার্যকলাপ, অপরদিকে শাসক ও শাসিতের সম্পর্ক নির্ধারিত হয়।

শাসনতন্ত্র লিখিত বা অ-লিখিত হইতে পারে। অ-লিখিত শাসনতন্ত্র কোন পূর্ব-পরিকল্পিত নিয়ম অস্থায়ী কোন প্রতিনিধিযুক্ত সংসদ দ্বারা গঠিত হয় না। এই শাসনতন্ত্র বিভিন্ন প্রথা ও আদালতের সিদ্ধান্তের ভিত্তিতে গড়িয়া উঠে। যে প্রথা ও বিধিব্যবস্থাগুলি শাসনব্যবস্থায় বহুদিন হইতে প্রচলিত থাকে, অ-লিখিত হইলেও সেগুলি লিখিত আইনের মত কার্যকরী হয়। ইংলণ্ডের শাসনতন্ত্র অ-লিখিত শাসনতন্ত্রের প্রকৃষ্ট উদাহরণ। ইংলণ্ডের মন্ত্রিসভা কিভাবে গঠিত হইবে এবং রাজার ও পার্লামেন্টের সহিত ইহার কি সম্পর্ক হইবে তাহা প্রাচীন প্রচলিত প্রথা দ্বারা ই স্থির হয়।

শাসনব্যবস্থার গঠনপ্রণালী যখন লিখিত থাকে, তখন শাসনতন্ত্রকে লিখিত শাসনতন্ত্র বলা হয়। লিখিত শাসনতন্ত্র পূর্বপরিকল্পনামুখ্যায়ী একটি নির্দিষ্ট প্রতিনিধি-সংসদ দ্বারা রচিত হয়। শাসনব্যবস্থার গঠন, প্রকৃতি ও শাসক-শাসিত সম্পর্ক এই শাসনব্যবস্থায় বিশদভাবে লিখিত থাকে। বর্তমানে অধিকাংশ দেশের শাসনব্যবস্থাই লিখিত শাসনতন্ত্র দ্বারা পরিচালিত হয়। ভারত, মার্কিন যুক্তরাষ্ট্র প্রভৃতি দেশের শাসনতন্ত্র লিখিত।

কিন্তু মনে রাখিতে হইবে যে, লিখিত ও অ-লিখিত শাসনতন্ত্রের পার্থক্য সর্বত্র সুস্পষ্ট নহে। কারণ কোন শাসনতন্ত্রই সম্পূর্ণভাবে লিখিত বা সম্পূর্ণভাবে অ-লিখিত হইতে পারে না। লিখিত শাসনতন্ত্রে অ-লিখিত অংশ থাকিতে পারে, আবার অ-লিখিত শাসনতন্ত্রে লিখিত অংশ থাকিতে পারে।

লিখিত শাসনতন্ত্রের প্রধান গুণ হইল যে, ইহা সুস্পষ্ট। এই সুস্পষ্টতার জন্য শাসকবর্গ ও জনসাধারণ তাহাদের অধিকার ও কর্তব্য সম্পর্কে সচেতন

থাকিতে পারে। দ্বিতীয়তঃ, লিখিত বলিয়া ইহা অধিকতর স্থায়ী হয়। যুক্তরাষ্ট্রীয় শাসনব্যবস্থায় লিখিত শাসনতন্ত্র অপরিহার্য।

লিখিত শাসনতন্ত্র সহজে পরিবর্তন করা যায় না বলিয়া ইহা জাতীয় জীবনের প্রয়োজন মিটাইতে পারে না, ফলে দেশে অসন্তোষ বৃদ্ধি পায়।

অ-লিখিত শাসনতন্ত্রের প্রধান গুণ হইল যে, অবস্থা পরিবর্তনের সঙ্গে সঙ্গে এই শাসনতন্ত্র পরিবর্তন করিয়া সমন্বয়সাধনী করা যায়। সহজে পরিবর্তন করা যায় বলিয়া ইহা বিপ্লবের আশংকামুক্ত থাকে।

অ-লিখিত শাসনতন্ত্রের প্রধান ত্রুটি হইল যে, ইহা সহজে পরিবর্তন করা যায় বলিয়া ইহার কোন স্থায়িত্ব থাকে না। দ্বিতীয়তঃ, প্রচলিত প্রথা ও আচারের উপর প্রতিষ্ঠিত বলিয়া ইহার বিধিগুলিও স্থম্পষ্ট হয় না। ফলে শাসকগণ তাহাদের যুগ্মীয়ত ইহার ব্যাখ্যা করিতে পারেন এবং সেজন্য অনেক সময় ব্যক্তিস্বাধীনতা ক্ষুণ্ণ হওয়ার সম্ভাবনা থাকে।

(৩২৫—৩২৯ পৃঃ)

46. Define the term 'Constitution'. Distinguish between rigid and flexible constitutions. Illustrate your answer by reference to the Constitution of India.

উঃ ইঃ—৪৫ নং প্রশ্নের প্রথম ভাগ দ্রষ্টব্য।

শাসনতন্ত্রকে নমনীয় ও অ-নমনীয় এই দুই ভাগে ভাগ করা হয়। যে শাসনতন্ত্র সহজে অর্থাৎ সাধারণ আইন-প্রণয়ন পদ্ধতিতে সাধারণ আইনসভা কর্তৃক পরিবর্তন করা যায়, তাহাকে নমনীয় শাসনতন্ত্র বলা হয়। ইংলণ্ডের আইনসভা রাজা-সহ পার্লামেন্ট সাধারণ আইন-প্রণয়ন পদ্ধতিতে শাসনতান্ত্রিক আইনও পরিবর্তন করিতে পারে। শাসনতান্ত্রিক আইন পরিবর্তনের জন্য কোন ভিন্ন পদ্ধতি অবলম্বন করিতে হয় না। সুতরাং ইংলণ্ডের শাসনতন্ত্র সহজে পরিবর্তন করা যায়। এখানে সাধারণ আইন ও শাসনতান্ত্রিক আইন সমপর্যায়ভুক্ত।

কিন্তু অ-নমনীয় শাসনতন্ত্রের ক্ষেত্রে দেখা যায় যে, সাধারণ আইনসভা সাধারণ আইন-প্রণয়ন-পদ্ধতিতে শাসনতন্ত্র পরিবর্তন করিতে পারে না। শাসনতন্ত্র পরিবর্তনের জন্য বিশেষ পদ্ধতি অবলম্বন করা প্রয়োজন হয়,

কারণ সাধারণ আইন অপেক্ষা শাসনতান্ত্রিক আইনগুলিকে বিশেষ মর্যাদা দেওয়া হয়। মার্কিন যুক্তরাষ্ট্রের সাধারণ আইনসভা কংগ্রেস সাধারণ আইন প্রণয়ন করিতে পারিলেও শাসনতান্ত্রিক আইন পরিবর্তন করিতে পারে না। এজন্য বিশেষ জটিল পদ্ধতি অবলম্বন করিতে হয়। এইজন্য ইংলণ্ডের শাসনতন্ত্রের দ্বারা মার্কিন শাসনতন্ত্র সহজে পরিবর্তন করা যায় না। ভারতের শাসনতন্ত্র সাধারণভাবে বলিতে গেলে দুঃপরিবর্তনীয়। কারণ ভারতের আইনসভা পার্লামেন্ট সাধারণ আইন-প্রণয়ন-পদ্ধতিতে এই শাসনতন্ত্র অধিকাংশ ক্ষেত্রে পরিবর্তন করিতে পারে না। শাসনতন্ত্র পরিবর্তনের প্রস্তাব কেন্দ্রীয় আইনসভার দুইটি সভায়ই দুই-তৃতীয়াংশ সদস্যের ভোটে পাস হইয়া রাষ্ট্রপতির সম্মতি পাইলে তবেই কার্যকরী হয়। কিন্তু সাধারণ আইন অধিকাংশ সভ্যের অনুমোদনে পাস হয়। কিন্তু ভারতের শাসনতন্ত্রের কতকগুলি বিষয়, যেমন, রাজ্যগুলির সীমানা-নির্ধারণ প্রভৃতি—সাধারণ আইন-প্রণয়ন পদ্ধতিতে পাস করা যায়। সুতরাং ভারতের শাসনতন্ত্রের কিছু অংশ নমনীয় বলা যায়। (৩০২—৪০১ পৃঃ)

47. Define a Party. What are the merits and demerits of a Party System of Government.

উঃ ইঃ—দেশের রাজনৈতিক ও অর্থনৈতিক সমস্যা সম্পর্কে এক-মতাবলম্বী একদল লোক যখন সংঘবদ্ধ হইয়া তাহাদের নির্ধারিত নীতি অনুযায়ী শাসন পরিচালনা করিতে চায়, তখন এই একমতাবলম্বী লোকদের লইয়া এক-একটি রাজনৈতিক দল গঠিত হয়। একতা ও সংঘবদ্ধতা হইল রাজনৈতিক দলের ভিত্তি। গণতান্ত্রিক আদর্শ প্রসারের কালে রাজনৈতিক দল গড়িয়া উঠিয়াছে।

এস্থলে রাজনৈতিক দলের সহিত কুচক্রের পার্থক্য করা দরকার। কুচক্রী দলও (Faction) অনেক সময় নিজেদের রাজনৈতিক দল বলিয়া পরিচয় দেয়, কিন্তু প্রকৃতপক্ষে কুচক্রী দল অতি সংকীর্ণ আদর্শ দ্বারা পরিচালিত হয়। রাজনৈতিক দলের উদ্দেশ্য হইল দেশের সর্বসাধারণের মঙ্গল-সাধন করা, আর কুচক্রী দল শুধু নিজেদের সংকীর্ণ স্বার্থসাধনের উদ্দেশ্যে পরিচালিত হয়। কুচক্রী দলের বিশেষ কোন নীতি থাকে না।

গুণ : ১। রাজনৈতিক দল অসংবদ্ধ জনমতকে সুসংবদ্ধভাবে গঠিত

করিয়। ইহাকে শক্তিশালী করে। দলের প্রচারকার্যের মধ্য দিয়া দেশবাসী জাতীয় সমস্তাগুলি ও এই সমস্তাগুলির সমাধান-প্রস্তাবগুলির সহিত পরিচিত হয়। ইহাতে জনশিক্ষা প্রসারলাভ করে।

২। অসংবদ্ধ দল-ব্যবস্থা না থাকিলে শাসনকার্য অস্থূভাবে পরিচালিত হইতে পারে না। গণতান্ত্রিক শাসনব্যবস্থায় সংখ্যাগরিষ্ঠ দল সরকার গঠন করে। দলের সমর্থন ব্যতীত কোন সরকারই স্থায়িত্বলাভ করিয়া জনহিতকর কার্য সম্পাদন করিতে পারে না।

৩। দলীয় শাসনের আর একটি গুণ হইল যে, বিভিন্ন দলের প্রতি-যোগিতায় শাসনব্যবস্থার উন্নতি হয়। সংখ্যাগরিষ্ঠ দল ক্ষমতায় আসীন থাকে, আর সংখ্যালঘিষ্ঠ দল বিরোধী দল হিসাবে সর্বদাই ক্ষমতায় আসীন দলের কার্যের সমালোচনা করে এবং ভুল-ত্রুটি জনসাধারণের নিকট প্রকাশ করে। এইজন্য ক্ষমতায় আসীন দল স্বেচ্ছাচারী হইতে পারে না।

দোষ : ১। রাজনৈতিক দল মানুষের মধ্যে কৃত্রিম বিভেদ সৃষ্টি করিয়া দলাদলি সৃষ্টি করে।

২। দল-ব্যবস্থায় মতামতের স্বাধীনতা থাকে না। দলীয় নীতি সকলকেই মানিতে হয়।

৩। দলের মতামত মানিয়া লইতে হয় বলিয়া দলের সমর্থকগণ দেশের বৃহত্তর স্বার্থের কথা ভুলিয়া দলীয় স্বার্থকে বড় করিয়া দেখিতে অভ্যস্ত হয়। ইহাতে দেশের বৃহত্তর কল্যাণ ব্যাহত হয়।

৪। নির্বাচনকালে বিভিন্ন দলগুলির মধ্যে অবাস্তিত প্রতিযোগিতার ফলে কলহ-বিবাদে সৃষ্টি হয় এবং ইহার ফলে দেশের নৈতিক আবহাওয়া বিষাক্ত হয়।

৫। দলাদলির ফলে অনেক সময় দলীয় কর্তৃত্ব অযোগ্য লোকের হস্তে যায় এবং এই অযোগ্য ব্যক্তিগণ দলের সাহায্যে নির্জৈদের ক্ষুদ্র স্বার্থ-সাধনে তৎপর হয়।

(৪০২—৪১০ ; ৪১৩—৪১৬ পৃঃ)

48. Discuss the relative advantages and disadvantages of a (a) multi-party system, (b) two-party system and (c) single-party system.

উঃ ইঃ—কোন কোন দেশে এক-দলীয় শাসনব্যবস্থা দেখা যায়।

প্রথম বিশ্বযুদ্ধের পরবর্তী কালে জার্মানি, ইতালি ও রুশ দেশে এই এক-দলীয় শাসনব্যবস্থা চালু হয়। সাধারণভাবে বলিতে গেলে ইংলণ্ডে দুই-দলীয় শাসনব্যবস্থা বহুদিন হইতে চলিয়া আসিতেছে। আবার ফরাসী দেশ ও ভারতে বহু দলের অস্তিত্ব দেখা যায়।

দেশে বহু দল থাকিলে জনমত অধিকতর স্পষ্টভাবে প্রকাশিত হইবার সুযোগ পায়। দক্ষিণপন্থী, বামপন্থী ও মধ্যপন্থী বিভিন্ন মতামত এই বিভিন্ন দলগুলির মধ্য দিয়া আত্মপ্রকাশ করিতে পারে। দ্বিতীয়তঃ, মন্ত্রিসংসদ বহু দলের সদস্য লইয়া গঠিত হয় বলিয়া ইহা জনমত অধিকতর প্রতিফলিত করিতে পারে। তৃতীয়তঃ, বহু দলের সমর্থনে গঠিত বলিয়া মন্ত্রিসংসদ জনমতবিরোধী কাজ করিতে পারে না।

কিন্তু এই ব্যবস্থার প্রধান ত্রুটি হইল যে, ভিন্ন মতাবলম্বী বহু দলের সহযোগিতায় মন্ত্রিসংসদ গঠিত হয় বলিয়া ইহা স্থায়ী হইতে পারে না। দ্বিতীয়তঃ, অস্থায়ী বলিয়া মন্ত্রিসংসদ কোন দীর্ঘমেয়াদী কার্যক্রম সফল করিতে পারে না। তৃতীয়তঃ, বহু দলের সম্মতিসাপেক্ষ বলিয়া শাসকগণ কোন বিষয়ে দ্রুত সিদ্ধান্ত গ্রহণ করিতে পারে না।

দুই দল থাকিবার প্রধান সুবিধা হইল যে, সংখ্যাগরিষ্ঠ দলের সমর্থনপুষ্ট মন্ত্রিসংসদ স্থায়ী হয়। দ্বিতীয়তঃ, দুই দল থাকিলে ভোট-দাতারও প্রার্থী-নির্বাচনের সমস্যা সহজ হয়। তৃতীয়তঃ, বিরোধী দলের সমালোচনার ভয়ে শাসকগণ বে-আইনী কাজ করিতে পারে না।

দুই-দলব্যবস্থার ত্রুটি হইল যে, ইহাতে দেশের বিভিন্ন জনমত বিশেষ করিয়া মধ্যপন্থী মত প্রকাশ পায় না। দ্বিতীয়তঃ, সংখ্যাগরিষ্ঠ দল ইচ্ছামত কাজ করিলে সংখ্যালঘিষ্ঠ দল বাধা দিতে পারে না। তৃতীয়তঃ, একটি মাত্র দলের প্রতিনিধি লইয়া গঠিত মন্ত্রিসভা দেশের জনমত প্রতিফলিত করিতে পারে না।

এক-দলীয় শাসনের সুবিধা হইল যে, ইহাতে দেশে দলাদলি হইবার সম্ভাবনা নাই। এক-দলীয় সরকার দ্রুত সিদ্ধান্ত গ্রহণ করিতে পারে ও নির্ভয়ে ইহার কার্যক্রমকে রূপদান করিতে পারে।

এই ব্যবস্থার প্রধান দোষ হইল যে, ইহাতে দেশের জনমত আদৌ প্রতিফলিত হইতে পারে না। ইহাতে ব্যক্তিস্বাধীনতা নষ্ট হয়। মতামত

প্রকাশের স্বাধীনতা নষ্ট করিয়া এই ব্যবস্থা ব্যক্তির ব্যক্তিস্বাধীনতার
অস্তরায় সৃষ্টি করে। (৪১৮—৪২৩ পৃঃ)

49. Explain the nature and importance of public opinion in modern states.

উঃ ইঃ—জনমত বলিতে সর্ববাদিসম্মত-মত বা সংখ্যাগরিষ্ঠের মত বুঝায় না। যে মত জনগণের বিচারবুদ্ধির উপর প্রতিষ্ঠিত ও যাহার উদ্দেশ্য হইল জনগণের বৃহত্তর কল্যাণসাধন করা, সেই মতকে জনমত বলা হয়।

গণতন্ত্র সফল করিবার একমাত্র উপায় হইল শিক্ষিত ও সচেতন জনমত সৃষ্টি করা। বর্তমান গণতান্ত্রিক ব্যবস্থায় প্রত্যেক নাগরিকের পক্ষে প্রত্যক্ষ ও সক্রিয়ভাবে শাসনকার্য পরিচালনায় অংশ গ্রহণ করা সম্ভব নয়। অথচ জনগণ যদি তাহাদের অধিকার সম্বন্ধে উদাসীন থাকে এবং অধিকারগুলি রক্ষা করিতে কৃতসঙ্কল্প না হয়, তাহা হইলে গণতন্ত্র স্বৈরতন্ত্রে পরিণত হয়। জনগণ যদি সুসংবদ্ধভাবে রাজনৈতিক ব্যাপারে তাহাদের মতামত প্রকাশ করে, তাহা হইলে শাসকগোষ্ঠী জনমতের বিরুদ্ধে কোন কার্য করিতে পারে না। সুতরাং প্রকৃত গণতন্ত্রের কার্যকারিতা সচেতন ও সক্রিয় জনমতের উপর নির্ভর করে। (৪২৬—৪২৯ পৃঃ)

50. What is the nature of public opinion ? How is it created ?

উঃ ইঃ—৪৯ নং প্রশ্নের উত্তরের প্রথম ভাগ দ্রষ্টব্য।

নানা উপায়ে জনমত গঠিত ও প্রভাবিত হইয়া থাকে।

১। বর্তমান যুগে জনমত-গঠনে সংবাদপত্র এক বিশিষ্ট স্থান অধিকার করিয়াছে। সংবাদপত্রগুলি শুধু নানাবিধ সংবাদ পরিবেশন করিয়া জনগণের জ্ঞানের পরিধি বিস্তারে সাহায্য করে তাহা নয়, সম্পাদকীয় মন্তব্য ও সংবাদ পরিবেশন-পদ্ধতির মধ্য দিয়া পাঠকদের মত-গঠনে সাহায্য করে।

২। জনমত গঠনে শিক্ষায়তনগুলি বিশিষ্ট ভূমিকা গ্রহণ করে।

বাল্যকালে ও কৈশোরে মানুষ যে শিক্ষা পায় পরবর্তী জীবনে সে শিক্ষার প্রভাব অনতিক্রমণীয়।

৩। রাজনৈতিক দলগুলি সংবাদপত্র, প্রচারপুস্তিকা ও সভাসমিতির মাধ্যমে তাহাদের মতবাদ প্রচার করিয়া জনমত গঠন ও প্রভাবিত করে।

৪। অধুনা বেতার ও চলচ্চিত্রের সাহায্যে প্রচারকার্য দ্বারাও জনমত সৃষ্টি করা হয়।

৫। দেশের আইনসভার তর্ক-বিতর্ক ও আলোচনার দ্বারাও জনমত সচেতন হইয়া রাজনৈতিক ব্যাপারে জনগণ অধিকতর উৎসাহী হয়।

(৪২৮—৪২৯ পৃঃ) .

51. What is meant by adult suffrage? How do you justify it? Should there be any limitation to adult suffrage?

উঃ ইঃ—গণতান্ত্রিক আদর্শ অনুসারে প্রত্যেক প্রাপ্তবয়স্ক ব্যক্তিই ভোটদানের অধিকারী বলিয়া গণ্য হয়। যত অধিক সংখ্যক লোক ভোটদানেব অধিকারী হইবে, গণতন্ত্র হইবে সেইরূপ ব্যাপক। আবার যত অধিক সংখ্যক লোক ভোটদান-ক্ষমতা হইতে বঞ্চিত থাকে, গণতন্ত্রের পরিসর সেই অনুপাতে সংকীর্ণ হয়। একটি দেশে যখন আবাল-বৃদ্ধ-বনিতা সকলেরই ভোটদানের ক্ষমতা থাকে তখন তাহাকে ব্যাপক বা সার্বজনীন ভোটাধিকার বলা হয়। কিন্তু সার্বজনীন ভোটাধিকার হইলেও অপ্রাপ্তবয়স্ক, উম্মাদ, দেউলিয়া, ভবঘুরে প্রভৃতি শ্রেণীর ভোট দিবার ক্ষমতা থাকে না।

পক্ষে যুক্তি—১। ভোটদান-ক্ষমতা ব্যক্তি মাত্রেই জনগত অধিকার। রাষ্ট্রের সার্বভৌম ক্ষমতার ভিত্তি হইল জনসাধারণের সমষ্টিগত ইচ্ছা এবং এই ইচ্ছাকে কার্যে পরিণত করিবার একমাত্র উপায় হইল সার্বজনীন ভোটাধিকার দান।

২। গণতান্ত্রিক শাসনব্যবস্থা জনসাধারণের সম্মতির উপর প্রতিষ্ঠিত। সুতরাং জনগণের ভোটদান-ক্ষমতা না থাকিলে তাহারা প্রতিনিধি নির্বাচন করিয়া তাহাদের সম্মতি প্রকাশ করিতে পারে না।

৩। ভোটদান-ক্ষমতা প্রয়োগ করিয়া জনসাধারণ অকর্ণগ্য ও দায়িত্ব-জ্ঞানহীন সরকারকে অপসারিত করিয়া স্বৈরাচার বন্ধ করিতে পারে।

৪। রাষ্ট্রের সকল নাগরিকই রাষ্ট্রের নিকট হইতে সমান অধিকার দাবী করিতে পারে। সুতরাং এই সাম্যনীতির ভিত্তিতে সার্বজনীন ভোটাধিকার সমর্থন করা যায়।

বিপুলক্ষে যুক্তি : ১। মিল, মেইন, লেকি প্রভৃতি মনীষিগণ সার্বজনীন ভোটাধিকারের বিরুদ্ধে যত প্রকাশ করিয়াছেন। তাঁহারা বলেন যে, যাহাদের ভোটদানের উপযুক্ত যোগ্যতা নাই, তাহাদের ভোটাধিকার দেওয়া যুক্তিসঙ্গত নয়। এ-সম্পর্কে মিল বলিয়াছেন যে, যাহারা লিখিতে-পড়িতে জানে না ও গণিতশাস্ত্রের প্রাথমিক সূত্রের সহিত যাহাদের পরিচয় নাই, তাহাদের ভোটাধিকার দেওয়া উচিত নয়। তিনি বলেন, আগে শিক্ষা, পরে ভোটদান-ক্ষমতা (Universal teaching must precede Universal enfranchisement)। কিন্তু মিলের এই মতের নীতি হিসাবে বা বাস্তব জীবনে বিশেষ কোন গুরুত্ব নাই। বর্ণপরিচয় থাকিলে তাহাকে শিক্ষিত বলা চলে না বা শিক্ষাপ্রাপ্ত ব্যক্তি ভোটদাতা-হিসাবে বর্ণজ্ঞানহীন ব্যক্তি অপেক্ষা শ্রেষ্ঠতর এ-কথা সব সময়ে সত্য নহে। বরঞ্চ ভোটদানের অধিকার থাকিলে লোকে তাহাদের অন্য অধিকার সম্বন্ধে সজাগ হইয়া অন্য অধিকারগুলি দাবী করিতে পারে। তবে গণতান্ত্রিক শাসনব্যবস্থার সাফল্যের জন্য যে ভোটদাতার শিক্ষার প্রয়োজন ইহা অস্বীকার করা যায় না।

২। অনেকে বলেন যে, ভোটদাতার কিছু পরিমাণ সম্পত্তির মালিক হওয়া চাই এবং কিছু কর-প্রদানের ক্ষমতা থাকা চাই। কিন্তু আধুনিককালে এই গুণগুলি আর ভোটদান-ক্ষমতার যোগ্যতা বলিয়া বিবেচিত হয় না।

প্রাপ্তবয়স্ক দায়িত্ববোধসম্পন্ন প্রত্যেক ব্যক্তিই বর্তমানে ভোটদান-ক্ষমতার অধিকারী বলিয়া গণ্য হয়। (৪৩৬—৪৩৯ পৃঃ)

52. Distinguish between territorial representation and functional representation. Which of them would you recommend and why ?

উঃ ইঃ—সমগ্র দেশটিকে কতকগুলি নির্বাচন-কেন্দ্রে বিভক্ত করিয়া প্রতি কেন্দ্র হইতে জাতি-ধর্ম-নির্বিশেষে এক বা একাধিক প্রতিনিধি নির্বাচন-ব্যবস্থাকে আঞ্চলিক ভিত্তিতে প্রতিনিধিত্ব বলা হয়। এই ব্যবস্থার মূল কথা

হইল যে, একই অঞ্চলের অধিবাসী বলিয়া বিভিন্ন বৃত্তি অবলম্বী হইলেও সেই অঞ্চলের সমুদয় অধিবাসীই সমস্বার্থসম্পন্ন হয়। সুতরাং এই বিভিন্ন পেশার ভোটদাতাগণের একত্রে ভোট প্রদান করিয়া তাহাদের প্রতিনিধি নির্বাচন করা উচিত।

বৃত্তিগত প্রতিনিধিত্বের মূল কথা হইল যে, একই বৃত্তি দ্বারা জীবিকা অর্জন করিলে, এক অঞ্চলের অধিবাসী না হইয়াও একই বৃত্তির লোকগণ অধিকতর সমস্বার্থসম্পন্ন হন। সুতরাং নির্বাচন ব্যাপারে সমস্বার্থসম্পন্ন ভোটদাতাগণকে একই নির্বাচনক্ষেত্রের মধ্য দিয়া তাহাদের রাজনৈতিক মতামত প্রকাশের সুযোগ দেওয়া উচিত, অর্থাৎ শিক্ষকশ্রেণীর প্রতিনিধি হইবেন শিক্ষকশ্রেণীর দ্বারা নির্বাচিত শিক্ষক, আর রেলকর্মীর প্রতিনিধিত্ব করিবেন রেলকর্মী দ্বারা নির্বাচিত রেলকর্মী।

পেশাগত প্রতিনিধিত্ব যুক্তিযুক্ত মনে হইলেও বাস্তবক্ষেত্রে ইহার প্রয়োগ কাম্য নহে। আইনসভার আসনসংখ্যা বৃত্তিগতভাবে ভাগ করা দুর্লভ। এই ব্যবস্থায় প্রতিনিধিগণের দৃষ্টিভঙ্গী তাহাদের সংকীর্ণ বৃত্তিগত স্বার্থে আবদ্ধ থাকার ফলে জাতীয় স্বার্থের হানি হয়। আইনসভায় জনমতের প্রতিনিধিত্বের ব্যবস্থা করা হয়, কোন বৃত্তিবিশেষের প্রতিনিধিত্বের উদ্দেশ্যে আইনসভা গঠিত হয় না। সুতরাং আঞ্চলিক প্রতিনিধিত্বই কাম্য। (৪৫২—৪৬২ পৃঃ)

53. Discuss the Idealist Theory regarding the nature of the state.

উঃ ইঃ—রাষ্ট্রের প্রকৃতি সম্বন্ধে প্রচলিত মতবাদগুলির মধ্যে এই মতবাদটি সম্পর্কে বলা যায় যে, ইহা সম্পূর্ণ বাস্তবতাবর্জিত একটি কল্পনা মাত্র। এই মতবাদটি রাষ্ট্রের দার্শনিকতত্ত্বমূলক ব্যাখ্যার সাহায্যে একটি আদর্শ রাষ্ট্রের কল্পনা করে।

গ্রীক দার্শনিক প্লেটো হইলেন এই মতবাদের আদি জন্মদাতা। প্লেটোর মতে এই রাষ্ট্র ন্যায়পরায়ণতার উপর প্রতিষ্ঠিত এবং এই আদর্শ রাষ্ট্রের নাগরিক হিসাবেই মানুষ পূর্ণপরিণতি লাভ করিতে পারে।

জার্মান দার্শনিক কান্ট, ফিচে ও বিশেষ করিয়া হেগেলের হস্তে এই মতবাদ এক অভিনব রূপ পরিগ্রহ করে। হেগেল রাষ্ট্রে দেবত্ব আরোপ

করিয়া ইহাকে এক অতিমানবীয় প্রতিষ্ঠান বলিয়া গণ্য করেন। তাঁহার মতে জনসমষ্টি ব্যক্তিত্ব ছাড়াও রাষ্ট্রের একটি স্বতন্ত্র ব্যক্তিত্ব আছে—যে ব্যক্তিত্ব সকল ব্যক্তিত্বের উর্ধ্বে। রাষ্ট্রের ঐ ব্যক্তিত্ব শুধু আত্মসচেতন নয়, ইহা সমস্ত কর্মপ্রেরণা ও কর্মপ্রচেষ্টার উৎস। রাষ্ট্রের এই ব্যক্তিত্বের আবার একটি নৈতিক মান আছে—যে মানের মাপকাঠিতে ব্যক্তিগত ইচ্ছা, অধিকার ও সমস্ত প্রচেষ্টার পরিমাপ করিতে হইবে। যেহেতু রাষ্ট্র হইল সমস্ত সভ্যতা, কৃষ্টি এবং ব্যক্তিগত অধিকার ও প্রচেষ্টার উৎস, সেইহেতু ব্যক্তিগত ইচ্ছা বা স্বার্থ কখনও রাষ্ট্রের ইচ্ছার বিরোধী হইতে পারে না। রাষ্ট্রের নির্দেশ পালন করাই হইল জনগণের একমাত্র পবিত্র কর্তব্য, কারণ রাষ্ট্রের এই অবাধ ক্ষমতা ভগবৎপ্রদত্ত।

হেগেলের শিষ্য বার্গহাউজ ও ট্রিটস্কে রাষ্ট্রকে একটি অপরিমিত শক্তির আধার বলিয়া বর্ণনা করেন। তাঁহারা যুদ্ধের দ্বারা রাষ্ট্রের এই শক্তি নিয়ত প্রয়োগ করিতে বলেন। তাঁহাদের মতে যুদ্ধ না করিলে রাষ্ট্রের পৌরুষের হানি হয়। অনেকে মনে করেন যে, এই আদর্শবাদী জ্ঞানী জীবনদর্শনের জন্মই জার্মান জাতি এতটা রাজভক্ত ও যুদ্ধপ্রিয় হইয়া উঠিয়াছিল এবং এই জ্ঞানী মনোভাবের ফলে জার্মানি আজ তাহার পূর্বগৌরবচ্যুত হইয়াছে।

ইংরাজ দার্শনিক গ্রীণ, ব্রাড্লে ও বোসাংকে আদর্শবাদ সম্পর্কে আলোচনা করেন। তাঁহাদের মতে রাষ্ট্র সর্বপ্রধান সংগঠন ও সর্বশক্তির মূল উৎস হইলেও রাষ্ট্রের শক্তির ও কার্যক্ষেত্রের একটি সীমা আছে। তাঁহারা জার্মান আদর্শবাদীদের দ্বারা ব্যক্তিকে সম্পূর্ণরূপে রাষ্ট্রের ক্রীড়নক করেন নাই।

এই মতবাদের প্রধান ত্রুটি হইল যে, ইহা ব্যক্তির ব্যক্তিত্ব সম্পূর্ণরূপে ক্ষুণ্ণ করে এবং আন্তর্জাতিক ক্ষেত্রে যুদ্ধবাদ প্রচার করে। এই মতবাদে রাষ্ট্রের যে স্বাধীনতা ও সর্বময় কর্তৃত্বের কথা বলা হয় তাহা স্মরণ্য ছাড়া আর কিছুই নয়। তবে এই মতবাদের অন্তর্নিহিত সত্য হইল যে, সংঘ হিসাবে রাষ্ট্র হইল সর্বশ্রেষ্ঠ সংঘ এবং এই সংঘের সভ্য হিসাবেই নাগরিকগণ তাহাদের অধিকার ভোগ করে। সুতরাং রাষ্ট্রের প্রতি আন্তরিকতা প্রদর্শন করা নাগরিকগণের পবিত্র কর্তব্য।

54. Discuss the problem of Nationalism and Internationalism.

উঃ ইঃ—জাতীয়তাবোধ একটি মানসিক অমুভূতি এবং এই অমুভূতি কোন ব্যক্তি বিশেষের অমুভূতি নয়—ইহা একটি ঐক্যবদ্ধ সম-স্বার্থক ভোগ-সম্পন্ন জাতির সমষ্টিগত অমুভূতি। এই অমুভূতির ফলে জাতির প্রত্যেক ব্যক্তির মনে আত্মপ্রীতি ও আত্মপ্রত্যয় জন্মে। এই আত্মপ্রীতি ও আত্মপ্রত্যয়ের ফলে তাহারা নিজেদের ঐক্যবদ্ধ করিয়া স্বাধিকারে প্রতিষ্ঠিত হয়। বহু জাতির মধ্যে এই জাতীয়তাবোধ উন্মেষের ফলে তাহারা বিদেশী শাসনের কবল হইতে মুক্তিলাভ করিয়া স্বাধীনভাবে জাতীয় জীবন পরিচালনা করিতেছে। তাহাদের জাতীয় জীবনের বৈশিষ্ট্যগুলি সম্যক্রূপে বর্ণিত করিয়া তাহারা জগৎ-সভ্যতার অগ্রগতিতে সাহায্য করিতেছে। এই জাতীয়তাবোধ বৃদ্ধির ফলে জার্মানি ও ইতালিতে ঐক্য প্রতিষ্ঠিত হয়, পোলাও স্বাধীন হয় এবং পরবর্তী কালে এসিয়া ও আফ্রিকার নির্ধাতিত জাতিগুলি স্বাধীনতা অর্জন করিয়া তাহাদের নিজ ইচ্ছানুযায়ী রাষ্ট্রগঠন দ্বারা আত্মনিয়ন্ত্রণ করিতে সমর্থ হইয়াছে। জাতীয়তাবোধ জগতের সাময়িক কল্যাণের সহায়ক। কারণ, এই জাতীয়তাবোধের ফলে বিভিন্ন জাতিগুলির স্বাধীন ও স্বতন্ত্র অস্তিত্ব স্বতন্ত্র নবগঠিত রাষ্ট্রের মাধ্যমে আত্মপ্রকাশ করে। স্বাধিকারে প্রতিষ্ঠিত হইলেই প্রত্যেক জাতি তাহার নিজস্ব গুণাবলী, সভ্যতা ও সংস্কৃতির পুষ্টিসাধন করিয়া জগৎ-সভ্যতাকে উন্নততর করিবার স্বযোগ পায়। প্রত্যেক স্বতন্ত্র জাতি এই জাতীয়তাবোধে উদ্বুদ্ধ হইলে কলহ, বৈরীভাব ও যুদ্ধ-বিগ্রহ প্রশমিত হয়।

কিন্তু এই জাতীয়তাবোধ যখন আত্মপ্রীতি ও আত্মপ্রত্যয়ের গতি অতিক্রম করিয়া উগ্রমুষ্টি ধারণ করে, তখনই এই জাতীয়তাবোধ পরবিধেধে পরিণত হইয়া মারাত্মক হয় এবং জগতের শান্তি বিঘ্নিত করে। জার্মানি একটি ঐতিহ্যবিশিষ্ট প্রগতিশীল জাতি। জার্মান জাতির আত্মপ্রীতি ও আত্মপ্রত্যয় আদর্শস্থানীয়। কিন্তু যদি জার্মানি ইহার এই শ্রেষ্ঠত্ব প্রতিবেশী রাষ্ট্রগুলির উপর বলপূর্বক আরোপ করিতে চায়, তাহা হইলে জার্মানির এই সাজাত্য-বোধ অগ্র রাষ্ট্রগুলির পক্ষে মারাত্মক হয়। ফরাসী, পোল, বেলজিয়াম প্রভৃতি জাতিগুলির জার্মানির মতই জাতীয়তাবোধ আছে। সুতরাং জার্মানি

যদি তাহার, শ্রেষ্ঠ সভ্যতা ও কৃষ্টি এই সকল জাতির উপর বলপূর্বক আরোপ করিতে চায়, তাহা হইলে জার্মানির জাতীয়তাবোধকে বিকৃত জাতীয়তাবোধ বলা যায় এবং এরূপ জাতীয়তাবোধ শুধু যে জগতের শান্তি বিনষ্ট করে তাহা নহে, ইহা আন্তর্জাতিক সৌহার্দ্য ও সম্প্রীতির বিরোধী। আন্তর্জাতিকতার উদ্দেশ্য হইল, প্রত্যেক জাতিকে তাহার স্বাভাব্য বজায় রাখিবার সুযোগ দিয়া পরস্পরের মধ্যে আদর্শগত ও কৃষ্টিগত ভাবের আদান-প্রদান সম্ভব করিয়া বিশ্বমৈত্রী প্রতিষ্ঠা করা। ‘দিবে আর নিবে, মেলাবে মিলিবে’—ইহাই হইল আন্তর্জাতিকতার সারমর্ম। প্রকৃত জাতীয়তাবোধ ও আন্তর্জাতিকতার মধ্যে কোন বিরোধ থাকিতে পারে না, কারণ উভয় আদর্শ-ই একই মূল নীতির উপর প্রতিষ্ঠিত—আপনি বাঁচ ও অপরকে বাঁচিতে দাও (live and let live)। তাহা হইলেই ব্যক্তি ও সমষ্টির এবং জাতি ও জাতিপুঞ্জের সর্বাধিক কল্যাণ সাধিত হইবে। (১৭০—১৭২, ১৭৪—১৭৫ পৃঃ)

55. Define law and point out its different sources with their relative importance.

উঃ হঃ—আইন বলিতে প্রাকৃতিক নিয়ম, নৈতিক নিয়ম, সামাজিক নিয়ম প্রভৃতি নানাজাতীয় নিয়ম বুঝায়। কিন্তু রাষ্ট্রবিজ্ঞানে শুধু রাষ্ট্র-নৈতিক আইনের আলোচনা করা হয়। কিন্তু এই আইন সম্পর্কেও সকল লেখক একমত নহেন। অষ্টিনের মতে আইন হইল সার্বভৌমের আদেশ (Law is the Command of the Sovereign)। কিন্তু অষ্টিন-প্রদত্ত সংজ্ঞার বিরুদ্ধে বলা হয় যে সার্বভৌমের আদেশ ছাড়াও এমন বহু রীতিনীতি আছে যাহা সার্বভৌমের আদেশ না হইলেও প্রায় সব দেশেই আইন বলিয়া গণ্য হয়। অষ্টিনের সংজ্ঞা অনুসারে আন্তর্জাতিক আইনকেও আইন বলা যায় না, কারণ এই আইন কোন শ্রেষ্ঠতর রাষ্ট্রের নির্দেশ নহে।

উপরি-উক্ত সমালোচনার সহিত সামঞ্জস্য বিধানকল্পে অষ্টিনের অনুগামীগণ আইনের নূতন ব্যাখ্যা করেন। তাঁহারা বলেন : আইন হইল সমাজে মানুষের প্রচলিত চিন্তাধারা ও অভ্যাসের সেই অংশ, যে অংশ কতকগুলি নির্দিষ্ট নিয়মের আকারে সমাজ কর্তৃক স্বীকৃত হয় ও যে নিয়মগুলি শাসন-কর্তৃপক্ষ তাহাদের শক্তি ও প্রভাব দ্বারা বলবৎ করে।

হল্যাণ্ড-প্রদত্ত সংজ্ঞা আইনের শ্রেষ্ঠ সংজ্ঞা বলিয়া গ্নরিগণিত হয়। তিনি বলেন, আইন হইল মানুষের বহিজীবন-সম্পর্কিত কতকগুলি বিধিনিষেধ যাহা রাষ্ট্রীয় সার্বভৌম শক্তি কর্তৃক বলবৎ করা হয়। সুতরাং আইন শুধু সার্বভৌম নির্দেশ নহে, স্বভাবজাত প্রথা, বিচারালয়ের সিদ্ধান্ত প্রভৃতির সমাবেশে আইনের সৃষ্টি হয়।

আধুনিক লেখকগণ বলেন, আইন হইল বহিজীবন নিয়ন্ত্রণের কতকগুলি বিধিনিষেধ যাহা জনসাধারণের সম্মতির উপর প্রতিষ্ঠিত। আইন মান্ত করিলে ব্যক্তিগত ও সমষ্টিগত স্বার্থ সংরক্ষিত হয়, এই বিবেচনা দ্বারা চালিত হইয়া সাধারণতঃ লোকে আইন মান্ত করে। সুতরাং আইনের বাধ্যবাধকতা আইনের কার্যকারিতার উপর নির্ভর করে—সার্বভৌমের নির্দেশের উপর নহে।

কোন দেশের আইনই শুধু রাষ্ট্র কর্তৃক সৃষ্ট নহে, নানাবিধ সামাজিক প্রভাব আইন-প্রণয়নে সাহায্য করে।

১। প্রথা (Custom)—প্রত্যেক দেশের প্রচলিত আইনগুলির মধ্যে কতকগুলি প্রথাগত রীতিনীতি দেখা যায়। রাষ্ট্র উদ্ভবের পূর্ব হইতে এই প্রথাগত বিধিনিষেধগুলি ধীরে ধীরে প্রবর্তিত হইয়া সমাজজীবনকে নিয়ন্ত্রিত করে। পরবর্তী কালে রাষ্ট্র কর্তৃক স্বীকৃতির ফলেই প্রথাগুলি আইনের মর্যাদা পায়। এই প্রথাগুলি জনসাধারণের সম্মতির উপর প্রতিষ্ঠিত ছিল, সুতরাং আইনের সার্বজনীন ভিত্তি এই প্রথাগুলির দ্বারা সৃচিত হয়।

২। ধর্ম (Religion)—ধর্মীয় অনুশাসনগুলিও সমাজজীবন নানাভাবে প্রসংযত করিয়া সমষ্টিগত জীবনে শৃংখলা ও নিয়মানুবর্তিতা শিক্ষা দিয়াছে। রাষ্ট্রীয় ব্যাপার পরিচালনা ক্ষেত্রে এই অনুশাসনগুলি বিশেষ সহায়ক বলিয়া রাষ্ট্র ইহার কতকগুলিকে স্বীকৃতি দান করিয়া আইনের মর্যাদা দিয়াছে।

৩। বিচারালয়ের সিদ্ধান্ত (Adjudication)—আইনের অর্থ সম্পষ্ট করিবার উদ্দেশ্যে বিচারকগণ অনেক সময় প্রচলিত আইনের ব্যাখ্যা করেন ও নূতন সিদ্ধান্ত গ্রহণ করেন। পূর্ববর্তী বিচারকের ব্যাখ্যাত সিদ্ধান্ত যখন পরবর্তী বিচারকগণ কর্তৃক অনুসৃত হয়, তখন এই সিদ্ধান্ত আইনে পরিণত হয়। এই আইন জনসাধারণ-সমর্থনপুষ্ট না হইলেও বিশেষজ্ঞগণ কর্তৃক পরীক্ষিত আইন বলিয়া গণ্য হয়।

৪। ন্যায়পরতা (Equity)—বিচারকগণ দুই প্রকার আইনসৃষ্টিতে সাহায্য করেন—প্রথমতঃ, আইনের ব্যাখ্যা দ্বারা—দ্বিতীয়তঃ, আইন-প্রয়োগে ন্যায়ধর্মের অনুসরণ করিয়া। আইনের অসম্পূর্ণতার জন্য বিচারকগণ অনেক সময় ন্যায় ও বিবেকবুদ্ধির প্রয়োগ করিয়া বিচারকার্য পরিচালনা করেন। এই ন্যায়ধর্মের ভিত্তিতে অনেক আইনের সৃষ্টি হইয়াছে। তবে এরূপ আইনের সংখ্যা কম।

৬। আইনবিদগণের আলোচনা (Discussion of eminent jurists) —প্রাচীন ও আধুনিক বহু আইনবিদগণ তাঁহাদের আলোচনা ও রচনা দ্বারা নূতন নূতন আইন-সৃষ্টিতে সাহায্য করিয়াছেন। রোমান আইনবিদগণ, ভারতের মহা, পরাশর এবং মুসলমান লেখকগণ কর্তৃক রচিত নিয়মাবলী বহু আইনের জন্মদান করিয়াছে।

৬। বর্তমান যুগে আইনসভা-প্রণীত আইনগুলি সর্বাধিক প্রাধান্য লাভ করিয়াছে, কারণ আইনের একমাত্র উৎস জনমত এই আইনসভার মাধ্যমে আত্মপ্রকাশ করিয়াছে। প্রথাগত বিধান, ধর্মীয় অনুশাসন, ন্যায়-পরতা বা বিচারালয়ের সিদ্ধান্ত—এইসকল শক্তিগুলি আইনসভা কর্তৃক সম্বৃদ্ধিত হওয়া চাই। (১৩৭—১৩৯, ১৪০—১৪২ পৃঃ)

56. Point out the importance and functions of the Judiciary in a modern state.

উঃ হৈঃ—বিচার-বিভাগ হইল সরকারের প্রধান তিনটি বিভাগের অন্যতম। লর্ড ব্রাইস বলেন, যে-কোন দেশের শাসনব্যবস্থার উৎকর্ষ দেশের বিচারব্যবস্থার দক্ষতার উপর নির্ভর করে। বিচারব্যবস্থার দক্ষতা আলোচনা করিবার পূর্বে বিচার-বিভাগের কার্যাবলী আলোচনা করা প্রয়োজন।

বিচার-বিভাগ আইনসভা-প্রণীত আইনগুলিকে ষাষাধভাবে প্রয়োগ করিয়া দোষী ব্যক্তিকে শাস্তি প্রদান করেন ও নির্দোষ ব্যক্তি অব্যাহতি পায়। দ্বিতীয়তঃ, বিচারকগণ আইন প্রয়োগ করেন ও প্রয়োজনদৃষ্টিতে আইনের উচিত ব্যাখ্যা করেন। বিচারক কর্তৃক ব্যাখ্যাত আইন অত্র বিচারক কর্তৃক অনুসৃত হইয়া নূতন আইন সৃষ্টি করে। তৃতীয়তঃ, বিচারকগণ ন্যায়-

ধর্ম-নীতি প্রয়োগ করিয়াও অনেকক্ষেত্রে নূতন আইন সৃষ্টি করেন। চতুর্থতঃ, যুক্তরাষ্ট্রীয় বিচারালয়গুলি কেন্দ্রীয় সরকার ও আঞ্চলিক সরকারগুলির শাসনতান্ত্রিক সম্পর্ক অক্ষুণ্ণ রাখিতে সাহায্য করে। আবার অনেক সময় বিচারপতিগণ আইনসভা ও শাসন-কর্তৃপক্ষ কর্তৃক অগ্রদূত হইয়া তাহাদিগকে আইন সম্পর্কে পরামর্শ দান করিয়া থাকেন।

উপরি-উক্ত আলোচনা হইতে বিচার-বিভাগের গুরুত্ব সম্যক উপলব্ধি করা যায়। দেশে শান্তি-শৃংখলা রক্ষা ও ব্যক্তিস্বাধীনতা অক্ষুণ্ণ রক্ষাকল্পে ন্যায়বিচারব্যবস্থার গুরুত্ব ও প্রয়োজনীয়তা সর্বত্র স্বীকৃত হয়। শাসন-কর্তৃপক্ষের বে-আইনী কার্যকলাপের হস্ত হইতে নাগরিক অধিকারগুলি রক্ষা করিবার একমাত্র উপায় হইল স্বাধীন ও নিরপেক্ষ বিচারব্যবস্থা। যুক্তরাষ্ট্রীয় শাসনব্যবস্থায় কেন্দ্রীয় সরকার ও আঞ্চলিক সরকারগুলির মধ্যে ক্ষমতার ভারসাম্য রক্ষাকল্পেও বিচারব্যবস্থার গুরুত্ব অনস্বীকার্য। স্ততরাং বিচার-বিভাগ সম্পর্কে নর্ড ব্রাইসের উক্তি আদৌ অতিরঞ্জিত নহে।

(৩১৩—৩১৫ পৃঃ)

57. State and examine the doctrine of Individualism.

উঃ ইঃ—ব্যক্তিস্বাতন্ত্র্যবাদ অ-রাষ্ট্রতন্ত্র্যবাদের একটি মার্জিত সংস্করণ মাত্র। এই মতবাদ অনুসারে বলা হয় যে, রাষ্ট্র একটি অপরিহার্য পাপ অর্থাৎ প্রয়োজনীয় অথচ ক্ষতিকর সংগঠন (Necessary evil)। এই মতবাদ Laissez Faire নামেও অভিহিত হইয়া থাকে। ব্যক্তিস্বাতন্ত্র্যবাদীরা রাষ্ট্রের উপযোগিতা স্বীকার করেন না। তবে অ-রাষ্ট্রতন্ত্র্যীদের মত তাঁহারা রাষ্ট্রকে অচিরৎ ধ্বংস করিবার পক্ষপাতীও নহেন। তাঁহারা বলেন, যতদিন মানবসমাজে নানাজাতীয় অপরাধ অহুষ্ঠিত হইবে, ততদিন রাষ্ট্রের অস্তিত্ব মণিয়া লইতে হইবে। এইজন্য তাঁহারা বর্তমানে রাষ্ট্রের ক্ষমতা একটি নির্দিষ্ট গণ্ডির মধ্যে সীমাবদ্ধ রাখিয়া ব্যক্তিগত অবাধ স্বাধীনতা প্রবর্তন করিবার পক্ষপাতী। এই মতবাদে বলা হয় যে, রাষ্ট্র শুধু অপরাধ নিবারণ করিবে, আভ্যন্তরীণ শান্তি-শৃংখলা রক্ষা করিবে এবং বহিরাগত আক্রমণ হইতে দেশ রক্ষা করিবে। এতদতিরিক্ত কোন কাজই রাষ্ট্র করিবে না। অষ্টাদশ শতাব্দীর মধ্যভাগ হইতে এই মতবাদ বিশেষ শক্তিশালী হয়

এবং অ্যাডাম স্মিথ, রিকার্ডো, মিল প্রভৃতি লেখকগণ এই মতবাদ সমর্থন করেন।

ব্যক্তিস্বাতন্ত্র্যবাদ নিম্নলিখিত যুক্তিগুলির উপর প্রতিষ্ঠিত। প্রথমতঃ, এই মতবাদ সহজাত ত্রায়পরতার উপর প্রতিষ্ঠিত, অর্থাৎ মানুষ 'নিজের ভাল' নিজে বুঝে। সুতরাং রাষ্ট্রকর্তৃত্বের অবসান হইলে সে নিজের অভিক্রিচি অনুযায়ী কাজ করিয়া স্বাধীনতা ও স্বথের অধিকারী হইতে পারে। দ্বিতীয়তঃ, ডারউইন-প্রবর্তিত বিবর্তনবাদ প্রয়োগ করিয়া ব্যক্তি-স্বাতন্ত্র্যবাদীরা বলেন যে, প্রাকৃতিক নিয়ম অনুসারে অবাধ স্বাধীনতার ফলে যোগ্যতম টিকিয়া থাকে ও অক্ষম বিতাড়িত হয়। তৃতীয়তঃ, 'অর্থনৈতিক যুক্তির দ্বারা তাঁহারা সহযোগিতা অপেক্ষা প্রতিযোগিতার উপর অধিকতর গুরুত্ব আরোপ করেন। প্রতিযোগিতার ফলে উৎপাদন-পরিমাণ বৃদ্ধি পাইয়া শিল্পজ্ঞাত দ্রব্যের উৎকর্ষ বৃদ্ধি পায় ও মূল্য হ্রাস হয়। চতুর্থতঃ, অতীতের অভিজ্ঞতার ভিত্তিতে তাঁহারা রাষ্ট্রপ্রচেষ্টার ব্যর্থতা প্রমাণিত করিয়া ব্যক্তিগত প্রচেষ্টার সাফল্যের উপর গুরুত্ব প্রদান করেন। পরিশেষে তাঁহারা বলেন, রাষ্ট্র মানুষের সর্ববিধ মঙ্গলসাধনে সম্পূর্ণ অক্ষম। সুতরাং ব্যক্তিগত প্রচেষ্টার দ্বারাই ব্যক্তিগত স্বাথের সংরক্ষণ বাঞ্ছনীয়।

ব্যক্তিস্বাতন্ত্র্যবাদী মতবাদ আলোচনা করিলে এই মতবাদের যুক্তির অসারতা প্রমাণিত হয়।

প্রথমতঃ, তাঁহাদের যুক্তির বিরুদ্ধে বলা যায় যে, মানুষ সব সময়ে তাহার ভাল বুঝে না। সুতরাং এরূপ ক্ষেত্রে রাষ্ট্রনিয়ন্ত্রণ ব্যক্তিগত স্বার্থসংরক্ষণে অপরিহার্য। দ্বিতীয়তঃ, জীবনসংগ্রামে যাহারা বাঁচিয়া থাকে তাহারাই একমাত্র যোগ্যতম বলিয়া বিবেচিত হইতে পারে না। রাষ্ট্রপ্রচেষ্টার দ্বারা যোগ্যতাহীন অক্ষম ব্যক্তিকে সক্ষম করিতে পারিলে সমাজের কল্যাণ বৃদ্ধি পায়। তৃতীয়তঃ, রাষ্ট্রের অবর্তমানে আইন-শৃংখলা থাকিতে পারে না। আইন-শৃংখলার অবর্তমানে সমাজে প্রকৃত স্বাধীনতার পরিবর্তে স্বৈরাচারের অভ্যুত্থান ঘটে। চতুর্থতঃ, অবাধ প্রতিযোগিতার ফলে অর্থনৈতিক ক্ষেত্রে একচেটিয়া কারবার, দ্রব্যমূল্য বৃদ্ধি, বাণিজ্য-চক্র, বেকার-সমস্যা প্রভৃতি নানাবিধ অর্থনৈতিক কুফল দেখা যায়। সুতরাং এক্ষেত্রেও ব্যক্তিগত অবাধ প্রতিযোগিতার পরিবর্তে রাষ্ট্রনিয়ন্ত্রণ ব্যক্তির মঙ্গলের জন্য কাম্য।

পঞ্চমতঃ, সমান সুযোগ-সুবিধার অভাব অনেক সময় ব্যক্তিস্বিকাশের অন্তরায় ঘটায়। রাষ্ট্রপ্রচেষ্টার দ্বারা সমান সুযোগ-সুবিধা প্রতিষ্ঠিত হইলে প্রত্যেক ব্যক্তি তাহার চরিত্রের স্বাভাবিক প্রবণতা অনুযায়ী ব্যক্তিস্বিকাশে সক্ষম হয়। সুতরাং দেখা যায় যে, ব্যক্তিস্বাভাববাদী মতবাদ ব্যক্তিস্বাধীনতার উপর অত্যধিক গুরুত্ব আরোপ করিয়া সামাজিক স্বার্থ ব্যাহত করে। ব্যক্তিস্বাধীনতা কাম্য হইলেও যে স্বাধীনতা সমাজের সামগ্রিক কল্যাণ ব্যাহত করে, তাহা কখনই সমর্থনযোগ্য নহে।

(৩৪০—৩৪৫ পৃঃ)

58. Democracy is not complete without Socialism..
Discuss.

উঃ ইঃ—গণতন্ত্রের অর্থ হইল গণশাসন অর্থাৎ যে শাসনব্যবস্থায় জনগণই হইল শাসনক্ষমতার প্রকৃত অধিকারী। এব্রাহাম লিংকন বলেন, জনসাধারণকে লইয়া জনসাধারণের কল্যাণে জনসাধারণ কর্তৃক যে শাসনব্যবস্থা পরিচালিত হয় তাহাকেই গণতন্ত্র বলা হয় (A government of the people, for the people and by the people)। গণতন্ত্র প্রত্যক্ষ ও পরোক্ষ হইতে পারে। প্রত্যক্ষ গণতন্ত্রে পূর্ণবয়স্ক সকল নাগরিকই শাসনপরিচালনাকার্যে সক্রিয়ভাবে অংশ গ্রহণ করিতে পারে। কিন্তু বিশালায়তন ও বহু জনসমষ্টি দ্বারা অধ্যুষিত বর্তমান রাষ্ট্রগুলিতে সকল নাগরিকের পক্ষে রাষ্ট্রপরিচালনাকার্যে অংশ গ্রহণ করা সম্ভব নয়। তাই আধুনিক কালে পরোক্ষ গণতন্ত্রের আবির্ভাব হইয়াছে। পরোক্ষ গণতন্ত্রব্যবস্থায় পূর্ণবয়স্ক ও নির্দিষ্ট যোগ্যতার অধিকারী জনগণ একটি নির্দিষ্ট কালের জন্য তাহাদের প্রতিনিধি নির্বাচন করিয়া শাসনব্যবস্থা এই নির্বাচিত প্রতিনিধিদের হস্তে তুলিয়া দেয়। এই নির্বাচিত প্রতিনিধিগণ সরকার গঠন করিয়া নির্বাচকমণ্ডলীর মতানুযায়ী শাসনকার্য পরিচালনা করেন ও এজন্য তাঁহারা নির্বাচকমণ্ডলীর নিকট দায়ী থাকেন। এইরূপে গণতান্ত্রিক শাসনব্যবস্থায় জনসাধারণ পরোক্ষভাবে শাসনব্যবস্থায় অংশ গ্রহণ করেন। 'জনপ্রতি এক ভোট' এই নীতি গণতন্ত্রের একমাত্র বৈশিষ্ট্য নহে। যে সমস্ত ক্ষেত্রে জনগণ সক্রিয়ভাবে শাসনব্যবস্থার উপর প্রভাব বিস্তার করিতে পারে, একমাত্র সেই শাসনব্যবস্থাকে গণতন্ত্র আখ্যা দেওয়া যাইতে পারে।

গণতন্ত্রের 'ভিত্তি' হইল ব্যক্তিস্বাধীনতা ও সাম্য। স্বাধীনতা ও সাম্যের আদর্শ সমাজজীবনের প্রত্যেক ক্ষেত্রে প্রতিষ্ঠিত হইলেই গণতান্ত্রিক আদর্শ পূর্ণতাপ্রাপ্ত হয়। এইজন্য শুধু রাজনৈতিক ক্ষেত্রে স্বাধীনতা ও সাম্য প্রতিষ্ঠিত করিলে চলিবে না, সমাজব্যবস্থায় বিশেষ করিয়া অর্থনৈতিক জীবনে, 'শিল্প-বাণিজ্যের ক্ষেত্রে এই স্বাধীনতা ও সাম্যের দাবী কার্যকর করিতে হইবে। এইজন্যই গণতান্ত্রিক আদর্শ সফল করিতে হইলে সমাজ-তান্ত্রিক অর্থনৈতিক ব্যবস্থা 'প্রবর্তন অপরিহার্য। অর্থনৈতিক ক্ষেত্রেও 'জন প্রতি এক ভোট' নীতি অমুখ্যায়ী স্বাধীনতা ও সাম্য প্রতিষ্ঠা প্রয়োজন। সকলের জ্ঞান সমান সুযোগ-সুবিধা প্রদান করিতে হইবে। অর্থনৈতিক অধিকারগুলি ব্যতীত রাজনৈতিক অধিকার সার্থক হইতে পারে না। মানুষ যদি সর্বদা অনশন, বেকার ও আশ্রয়হীন হইবার ভয়ে সন্ত্রস্ত থাকে, তাহা হইলে এক্ষণে ব্যক্তির নিকট ভোটাধিকার ও মতামত প্রকাশের স্বাধীনতা বিড়ম্বনা মাত্র। অর্থনৈতিক জীবনে স্বাধীনতা ও সাম্য প্রতিষ্ঠিত করিতে হইলে সকলের জ্ঞান উপযুক্ত পরিমাণ অভাবপূরণের সামগ্রী না হওয়া পর্যন্ত মুষ্টিমেয় লোকের জ্ঞান প্রাচুর্য থাকিতে পারিবে না। অর্থনৈতিক স্বাধীনতা ও সাম্যের তাৎপর্য হইল উৎপাদনব্যবস্থায় গণতন্ত্রের প্রবর্তন। ইহার অর্থ হইল প্রথমতঃ, শ্রমিকগণের কাজ করিয়া উপযুক্ত মজুরি পাইবার ও বিশ্রামলাভের, অসুস্থতা, বেকার অথবা আকস্মিক বিপদ কালে সাহায্য পাইবার, শ্রমিক-সংঘ গঠন করিবার অধিকার প্রভৃতি। দ্বিতীয়তঃ, শ্রমিকগণের উৎপাদনব্যবস্থা নিয়ন্ত্রণ করিবার অধিকার। শ্রমিকগণের যদি উৎপাদনব্যবস্থা নিয়ন্ত্রণের কোন অধিকার না থাকে, তাহা হইলে তাহাদের কর্মে অল্পপ্রেরণা নষ্ট হইয়া তাহারা উৎসাহহীন নিষ্স্বার্থ কর্মীতে পরিণত হয়। যে উৎপাদনব্যবস্থা অনশন বা বেকার ভয়ে ভীত কমিউন দ্বারা পরিচালিত হয়, সে উৎপাদনব্যবস্থা কখনই দক্ষ বা স্বয়ংসম্পূর্ণ হইতে পারে না। সমাজতন্ত্রবাদ অর্থনৈতিক জীবনে এই মানবিক অধিকার প্রতিষ্ঠা করিবার প্রয়াস পায়। সুতরাং গণতান্ত্রিক আদর্শ সফল করিতে হইলে এই আদর্শকে সমাজতন্ত্রবাদের উপর প্রতিষ্ঠিত করিতে হইবে। সমাজতন্ত্রবাদের আধিক্য অর্থাৎ অত্যধিক মাত্রায় রাষ্ট্রনিয়ন্ত্রণ পরিহার করিয়া গণতন্ত্রের সহিত সমাজতন্ত্রবাদের সমন্বয়সাধন করিতে পারিলে

গণতন্ত্র সফল হইবে (Democracy should be diluted with and not polluted by Socialism)। (২৩০—২৩২ পৃঃ)

59. Discuss the case for minority representation and write an analytical note on the different methods of minority representation in modern democracies.

উঃ ইঃ—গণতান্ত্রিক আদর্শ অনুসারে প্রত্যেক আইনসভাই দেশের বিভিন্ন শ্রেণীর প্রতিনিধিমূলক হওয়া কাম্য। মিলের মতে সংখ্যালঘু দলের আইনসভায় উপযুক্ত সংখ্যক প্রতিনিধি প্রেরণ করা গণতন্ত্রের একটা প্রশংসনীয় উপাদান। মিলের মতে সংখ্যালঘু দলের আইনসভায় যে শুধুমাত্র কয়েকটি প্রতিনিধি প্রেরণ করিলে যথেষ্ট হইবে তাহা নয়, প্রত্যেক সংখ্যালঘু দল যাহাতে তাহার সংখ্যার অনুপাতে প্রতিনিধি নির্বাচন করিতে পারে, সেজন্যে অনুরূপভাবে নির্বাচকমণ্ডলীর পুনর্গঠন করা উচিত। উদাহরণে বলা যায় যে, নির্বাচকমণ্ডলীর দুই-তৃতীয়াংশ যদি দল-বিশেষের পক্ষে ভোট দেয় এবং এক-তৃতীয়াংশ যদি অন্য দলের পক্ষে ভোট দেয়, তাহা হইলে সংখ্যাগুরু দল আইনসভায় দুই-তৃতীয়াংশ আসন দখল করিতে পারে এবং সংখ্যালঘু দল এক-তৃতীয়াংশ আসন দখলের অধিকারী হইবে। সত্য বটে, গণতন্ত্র হইল সংখ্যাগরিষ্ঠের শাসন, কিন্তু তাই বলিয়া সংখ্যালঘু দলের কোন প্রকার ক্ষমতা থাকিবে না, এরূপ হইতে পারে না। সুতরাং সংখ্যালঘু দলের আনুপাতিক প্রতিনিধিত্বের ব্যবস্থা করা গণতন্ত্রের অবিচ্ছেদ্য অংশ।

সংখ্যালঘু দলের প্রতিনিধি নির্বাচনব্যাপারে নানাপ্রকার ব্যবস্থা প্রচলিত আছে, যথা, আনুপাতিক নির্বাচন, সীমাবদ্ধ ভোট, একত্রিত ভোট, দ্বিতীয়বার ভোট গ্রহণ বা সাম্প্রদায়িক ভিত্তিতে পৃথক নির্বাচন।

আনুপাতিক নির্বাচন অনুসারে সংখ্যাগরিষ্ঠ দল অধিক সংখ্যক প্রতিনিধি নির্বাচন করিতে পারিলেও সংখ্যালঘু দল কিছু সংখ্যক প্রতিনিধি নির্বাচন করিতে পারে।

সীমাবদ্ধ বা নিয়ন্ত্রিত ভোটব্যবস্থায় একটি নির্বাচন-কেন্দ্র হইতে একাধিক প্রতিনিধি নির্বাচিত হইতে পারে। যদি তিন জন নির্বাচিত

হইতে পারেন—তাহা হইলে কোন ভোটদাতাই দুইটির বেশী ভোট দিতে পারেন না। কাজেই সংখ্যালবিস্ত দলের মধ্য হইতে তৃতীয় প্রতিনিধি নির্বাচিত হওয়ার সম্ভাবনা থাকে। একত্রিত ভোটদান-পদ্ধতির অর্থ হইল যে, একটি নির্বাচন-কেন্দ্র হইতে ষত সংখ্যক প্রতিনিধি নির্বাচিত হইবে, প্রত্যেক ভোটদাতা তত সংখ্যক ভোটদান করিতে পারিবে এবং ভোটদাতা ইচ্ছামত তাহার ভোটগুলি একজন প্রার্থীর সপক্ষেও দিতে পারে অথবা একাধিক প্রার্থীর মধ্যে ভাগ করিয়া দিতে পারে। এইরূপে সংখ্যালঘু দল তাহাদের ভোটগুলি একজন মাত্র প্রার্থীকে দিয়া তাহার নির্বাচন সুদৃষ্টিত করিতে পারে।

দ্বিতীয়বার ভোটগ্রহণ-পদ্ধতি অনুসারে নির্বাচনপ্রার্থীকে শুধু অধিক সংখ্যক ভোট পাইলেই হইবে না, তাহার সমগ্র নির্বাচনকেন্দ্রের ভোটদাতার সংখ্যাগরিষ্ঠ ভোট পাওয়া চাই। এই ব্যবস্থায় সংখ্যালঘু দলের প্রতিনিধি-নির্বাচনের কোন নিশ্চয়তা থাকে না।

সাম্প্রদায়িক ভিত্তিতে পৃথক্ নির্বাচন-পদ্ধতির সাহায্যে সংখ্যালঘু দল তাহাদের প্রতিনিধি নির্বাচন করিতে পারে এবং এই ব্যবস্থায় তাহারা সংখ্যাভূপাতে আসন লাভ করিতে পারে। স্বাধীনতালাভের পূর্বে ভারতের বিভিন্ন সংখ্যালঘু সম্প্রদায়ের প্রতিনিধি এইরূপে পৃথক্ সাম্প্রদায়িক নির্বাচন-কেন্দ্রের মধ্য দিয়া নির্বাচিত হইত। এই ব্যবস্থায় সংখ্যালঘু দল তাহাদের জাতীয় অধিকার সংরক্ষণ করিতে পারিলেও ইহাতে জাতীয়তাবোধ দুর্বল হয়, দলাদলি বৃদ্ধি পায়—ফলে জাতীয় স্বার্থ ব্যাহত হয়।

(৪৫২—৪৫৭ পৃঃ)

বর্ণানুক্রমিক সূচী

বিষয়	পৃষ্ঠা	বিষয়	পৃষ্ঠা
অ		আত্মনির্ধারণের নীতি	১৬৫
অর্থনৈতিক অধিকার	২১৫	আদর্শবাদ	২৮-
অর্থনৈতিক স্বাধীনতা	১২৫	আন্তর্জাতিক আইন	১৪৭
অধিকার	২০২	আন্তর্জাতিকতা	১৭৪
অনমনীয় শাসনতন্ত্র	৩২২	আমলাতন্ত্র	১৪৭
অপিতৃকৃত্য বলে আইন		উ	
প্রণয়ন	৩০১	উচ্চপরিষদ	২২২
অবতারণা	১	এ	
অবৈতনিক প্রতিনিধিত্ব	৪৪৬	একজাতি একরাষ্ট্র	১৬৮
অবাধ রাজতন্ত্র	২২৬	একক শাসনকর্তৃপক্ষ	৩০২
অভিজাততন্ত্র	২২৭	একক হস্তান্তরযোগ্য ভোট	৪৫২
অ-রাষ্ট্রতন্ত্র	৩৩২	এককেন্দ্রীয় শাসনব্যবস্থা	২৫১
অ-রাষ্ট্রতন্ত্রী সমাজতন্ত্রবাদ	৩৫৬	একদলীয় শাসন	৪২১
অ-লিখিত শাসনতন্ত্র	৩২৬	একাধিক ভোটদান	৪৪৮
অষ্টনের সার্বভৌমত্ব মতবাদ	১২১	একনায়কতন্ত্র	২৪৩
আ		একসদস্য-সমন্বিত নির্বাচনকেন্দ্র	৪৪৮
আইন	১৩৭	ঐ	
আইন ও জনমত	৪২২	ঐতিহাসিক মতবাদ	৮৬
আইনগত সার্বভৌম	১১৩	ঐশ্বরিক উৎপত্তি মতবাদ	৫৬
আইনের উৎস	১৪০	ক	
আইনানুমোদিত সার্বভৌমত্ব	১১২	কল্যাণ-রাষ্ট্র	৩৩৬
আইন প্রণয়ন পদ্ধতি	২২৭	কাল্পনিক সমাজতন্ত্রবাদ	৩৩৬
আইনমূলক মতবাদ	২৩	ক্রমবিবর্তমান সমাজতন্ত্রবাদ	৩৪৫
আইনের শ্রেণীবিভাগ	১৫০	খ	
আইনসভা	২৮৮	খৃষ্টীয় সমাজতন্ত্রবাদ	৩৫৬

বিষয়	পৃষ্ঠা	বিষয়	পৃষ্ঠা
গ		দল-ব্যবহার ক্রটি দূর	
গণতন্ত্র	... ২২৯	করিবার উপায়	... ৪২৩
গণতান্ত্রিক রাষ্ট্র, গণতান্ত্রিক		দ্বি-কক্ষ আইনসভা	... ২২২
সমাজ ও সরকার	২২৯, ২৩০	দুই-দল বনাম বহু-দল	... ৪১৮
গণনির্দেশাধিকার	... ২৩৫	ধ	
গণপ্রস্তাব অধিকার	... ২৩৬	ধনতন্ত্রবাদ	... ৩৭৭
গণভোট	... ২৩৭	ধর্মীয় আইন	... ১৪৪
গণসার্বভৌমত্ব মতবাদ	... ১১৬	ন	
গণসীবাদ	... ৩৮৪	নগর-রাষ্ট্র	... ৪৮
গোপন ভোট	... ৪৪২	নমনীয় শাসনতন্ত্র	... ৩৯৯
চ		নাগরিকতা	... ১৮৩
গণস্বষ্টিকারী ও স্বার্থ-প্রণোদিত		নাগরিক অধিকার ও কর্তব্য	২০২
সংস্থা	... ৪১৭	নাগরিক ও নির্বাচক	... ১৮৫
দৈনিক সাম্যবাদ	... ৩৬৭	নাগরিক ও বিদেশী	... ১৮৪
জ		নাৎসীবাদ	... ৩৮৩
জনকল্যাণ নীতি	... ৩৩৬	নির্বাচকমণ্ডলী	... ৪৩৬
জনমত	... ৪২৬	নিয়মতান্ত্রিক রাজতন্ত্র	... ২২৬
জাতীয়তাবাদ	... ১৭০	নৈতিক আইন	... ১৪৪
জাতীয় জনসমাজ	... ১৫৭	প	
জাতীয় রাষ্ট্র	... ৫০	পিতৃতান্ত্রিক মতবাদ	... ৬০
জাতীয় স্বাধীনতা	... ১২৬	পৌর অধিকার	... ২০৭
জাতীয় সার্বভৌমিকতা	... ১১৯	পৌর স্বাধীনতা	... ১২৪
জৈব মতবাদ	... ২৪	প্রকাশ্য ভোট	... ৪৪২
ত		প্রকৃত বন্ধন	... ২৬২
জালিকা প্রথায়		প্রজাতন্ত্র	... ২২২
আত্মপাতিক নির্বাচন	... ৪৫৩	প্রতিনিধিত্বের স্বরূপ	... ৪৪৭
দ		প্রত্যক্ষ ও পরোক্ষ নির্বাচন	... ৪৪১
দলবিহীন শাসন	... ৪২৫		

বর্ণানুক্রমিক হুচী

বিষয়	পৃষ্ঠা	বিষয়	পৃষ্ঠা
প্রাকৃতিক অধিকার	... ২০৪	যুক্তরাষ্ট্রীয় ব্যবস্থায় নাগরিকত্ব	১৮৮
প্রাকৃতিক আইন	... ১৪৩	র	
প্রাকৃতিক স্বাধীনতা	... ১২৪	রাজতন্ত্র	... ২২৬
প্রাচীনকালের গণতন্ত্র	... ২৪১	রাজনীতির শেষ সমস্তা	... ৩৮৭
প্রত্যাবর্তনের আদেশ	... ২৩৭	রাজনৈতিক অধিকার	... ২১৪
ক		রাজনৈতিক দল	... ৪৮
ফ্যাসিবাদ	... ৩৮১	রাজনৈতিক স্বাধীনতা	... ১২৫
ব		রাষ্ট্র	... ২২৭
বলপ্রয়োগ মতবাদ	... ৬৩	রাষ্ট্রের উপাদান	... ৩০
বহুত্ববাদ	... ১২৭	রাষ্ট্র ও আইন	... ৪২
ব্যক্তিগত বন্ধন	... ২৬২	রাষ্ট্রপতি পরিচালিত সরকার	... ২৭৬
ব্যক্তিস্বাতন্ত্র্যবাদ	... ৩৪০	রাষ্ট্রপ্রধান সমাজতন্ত্রবাদ	... ৪২
বিকেন্দ্রীকরণ	... ২৮১	রাষ্ট্র ও জাতি	... ১৫৮
বিকৃত জাতীয়তাবাদ	... ১৭১	রাষ্ট্র ও জাতীয়তাবাদ	... ১৫৭
বিচার-বিভাগ	... ৩১৩	রাষ্ট্র ও শাসনযন্ত্র	... ৪৭
বিবর্তনবাদ	... ৮৬	রাষ্ট্র ও সমাজ	... ৪৩
বিশ্বরাষ্ট্র	... ৫১	রাষ্ট্র ও সংঘ	... ৪৫
ব্যক্তিগত প্রতিনিধিত্ব	... ৪৫২	রাষ্ট্রবিজ্ঞানের অসুসঙ্গানপদ্ধতি	... ৮
ভ		রাষ্ট্রবিজ্ঞান কি বিজ্ঞান	...
ভারতে জনমত	... ৪৩০	পর্যায়ভুক্ত	... ৭৫
ম		রাষ্ট্রবিজ্ঞানের সহিত অন্তর্ভুক্ত	...
মন্ত্রিসংসদচালিত সরকার	... ২৭৫	বিজ্ঞানের সম্বন্ধ বিচার	... ১৩
মার্কসীয় সমাজতন্ত্রবাদ	... ৩৫০	রাষ্ট্রের উদ্দেশ্য	... ৩৩৪
রাষ্ট্র	... ১০০	রাষ্ট্রের বিভিন্ন প্রকাশ	... ৪৮
মাতৃতান্ত্রিক মতবাদ	... ৬২	রুশোর অভিমত	... ৭২
মৌলিক অধিকার	... ২১২	ল	...
য		লকের অভিমত	... ৪২
যুক্তরাষ্ট্রীয় শাসন	... ২৫১	লিখিত শাসনতন্ত্র	... ৩৭

রাষ্ট্রতত্ত্ব

বিষয়	পৃষ্ঠা	বিষয়	পৃষ্ঠা
শাসনকর্তৃপক্ষ	৩০৮	সার্বজনীন ভোটাধিকার	৪৩৬
শাসনতন্ত্র	৩৭৪	সার্বভৌমিকতা	১১০
শাসনতন্ত্র পরিবর্তন পদ্ধতি	৪০৪	সার্বভৌমিকতা ও শাসনতান্ত্রিক	
শাসনতন্ত্রের বিষয়বস্তু	৪০৫	আইন	১২০
স		সামন্ততান্ত্রিক রাষ্ট্র	৫০
সন্ধিবন্ধন	২৬৮	সামাজিক আইন	১৪৪
সন্ধি-সমবায়	২৭০	সামাজিক চুক্তি মতবাদ	৬৬
স্বত্বাধিকার	৩৩	সাম্য	১২২
স্বত্বাধিকারের শ্রেণীবিভাগ	২২৫	সাম্যবাদ	৩৫৭
সংখ্যালঘিষ্ঠের নির্বাচন	৪৫০	সাম্প্রদায়িক নির্বাচন	৪৬২
সমষ্টিগত শাসনকর্তৃপক্ষ	৩০২	সাম্রাজ্যবাদ	১৭৩
সমষ্টিপ্রধান সমাজতন্ত্রবাদ	৩৫৪	সীমাবদ্ধ ভোট	৪৫৪
সমাজতন্ত্রবাদ	৩৪৭	সুপীকারী ভোট	৪৫৫
সমিতিপ্রধান সমাজতন্ত্রবাদ	৩৫৬	স্থায়ী কর্মচারিবৃন্দ	৩১২
সম্মিলিত জাতিপুঞ্জ	১৭৫	স্ত্রীলোকের ভোটাধিকার	৪৩২
স্বজাতীয় মাহুষ	১৫৭	স্বাধীনতা	১২৪
সাধারণ ইচ্ছা	৭৪	হ	
সার্বভৌম ও অসার্বভৌম		হবসের অভিমত	৬৮
আইনসভা	২২৮	ক্ষ	
		ক্ষমতার স্বাতন্ত্র্যবিধান নীতি	৩২২

